


Yoac kekehagocac  
Dzadzahac gboria nga  
Mitiyegec



The New Testament and Psalms in the Dedua Language of Papua  
New Guinea

**Yoac kekehagocac Dzadzahac gboria nga Mitiyegec**  
**The New Testament and Psalms in the Dedua Language of**  
**Papua New Guinea**  
**Buk Baibel long tokples Dedua long Niugini**

copyright © 2005 Wycliffe Bible Translators, Inc.

© 2012 Wycliffe Bible Translators, Inc.

Language: Dedua

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 21 Feb 2024 from source files dated 31 Aug 2023  
19b7c48c-f4ce-5007-838d-58f01dc01ecc

## Contents

.....	1
MITIYEGEC .....	3
MATAIO .....	125
MAREKO .....	176
RUKA .....	206
YOHANE .....	259
APOSORO .....	297
ROMA .....	347
1 KORINTI .....	373
2 KORINTI .....	397
GARATA .....	412
EFESO .....	421
FIRIPI .....	429
KOROSAI .....	435
1 TESARONIKE .....	441
2 TESARONIKE .....	446
1 TIMOTEO .....	449
2 TIMOTEO .....	456
TITO .....	461
FIREMONG .....	464
HEBIRAIO .....	466
YAKOBO .....	485
1 PETORO .....	492
2 PETORO .....	499
1 YOHANE .....	503
2 YOHANE .....	509
3 YOHANE .....	510
YUDA .....	511
YOHANEAC KPEFING .....	513
Read the New Testament .....	538

# Yoac kekehagocac Dzadzahac gboria nga Mitiyegec

## The New Testament and Psalms in the Dedua Language of Papua New Guinea

### Buk Baibel long tokples Dedua long Niugini

*Yoac kekehagocac Dzadzahac gboria nga Mitiyegec*

The New Testament and Psalms in the Dedua Language of Papua New  
Guinea  
[ded]

Translation by Wycliffe Bible Translators

© 2005, Wycliffe Bible Translators, Inc.

Print publication, 2005 by Wycliffe Bible Translators

Web version

© 2013, Wycliffe Bible Translators, Inc.  
www.Wycliffe.org

<http://pngscriptures.org>

[www.ScriptureEarth.org](http://www.ScriptureEarth.org)

This translation is made available to you under the terms of the Creative Commons license (Attribution-Noncommercial-No Derivative Works).  
<http://creativecommons.org/licenses/by-nc-nd/3.0>

**Your are free to share** – to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

**Notice** – For any reuse or distribution, you must make clear to others the license terms of this work.

#### **Tok Orait**

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri.** Yu ken wokim kopi na givim long husat i laikim. Tasol, yu mas tok klia dispela samting i kam long <http://>

*tokplesbaibel.org*. Yu no ken kisim mani na salim dispela. **Yu mas givim nating.** Na tu, **yu no ken senisim Tok.**

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa. Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela.**

Olgeta tok orait na lo long tok ples English i stap long *<http://creativecommons.org/licenses/by-nc-nd/3.0/legalcode>*.

Sapos yu gat askim long dispela, **plis askim mipela.**

## **Table of Contents**

page

# Mitiyegec

## MITIYEDEC KIBI 1

### 1

#### *Mitiyegec 1-41*

#### *Faka yohockang*

<sup>1</sup> Ngic goa yeni Anutu ngadehema mangana megecdeac ayemmeu ngic mong ye imoc wama yeneac dederecgeyoac mi modacande, me ngic kopoc-sigoc yeneac sinnu mi kengande, nga ye desusuicngic, yeneac botucfu naric mi tarude, ngic ifia ye kenehagoc. <sup>2</sup> Ye Anutuac dedeseriyoacac songo negemma hadzing toforec imoc hennegeng amma negengising angkecde.

<sup>3</sup> Ngic yeneng doku eacdaeu ic mong homecgec nasoya hau fora amma maria mi dzanggeande, mong ye siriha imocacsoc kecma wiac sasawa angande, imoc forayagoc anu ngereeude.

<sup>4</sup> Ngic Anutu ngadehema mangana megecdeac ayemmeande, yeni ngic dindingac, yeni isoc kpac. Firanggo padi sebera homemea mefirangge-ande, yeni ifia isoc. <sup>5</sup> Imocac ngic mangana yeni Anutuac yoacfu namma naric mi serigece. Yeni kopocsicmemengo dindingac yeneac kpebunnu Anutuac kicfu mi serigece. <sup>6</sup> Anutungo ngicngac dindingac yeneac sing hennegeng amma garengyunuude. Nga ngic Anutu ngadehema mangana megecdeac ayemmeande, yeni ine kpac anggecde.

### 2

#### *Meising ngictau*

<sup>1</sup> Foracngoc, bangec monnunac ngicngac Anutu mi negemmidae, yeneng faka mangana anggecdeac yoac dedzege andae nga ngiha ngiha yeni negen negeng ua mema kpedzongemeandae. <sup>2</sup> Bangecac ngictau yeni efaigec ngic enara uayoacnginagoc, yeni kpeturanggema KEBU memagecde. Nga yeng ngic meisinggema kerecdokungo nadzicmiec, ye ifingoc memagecdeac yoac yofi deandae. <sup>3</sup> “Yeri sengngo witicnunuoc, nenang imoc herecgema rekongngirango mendannunude, imoc merecgema ukubisina.”

<sup>4</sup> Ngic kurumenga kurumenga, imohai kecde, ye dzomorede. KEBUNGO yenemma detenic ayemmema <sup>5</sup> yoac ngabayagoc deu herebuyango kengec meficgeyemmema yofi deude, <sup>6</sup> “Foracngoc, ni ngictauna neac Siong tiki kpetiacfu bic faiba tacde.” <sup>7</sup> KEBUNGO yoac desima neac deec, imoc dekperagiba, yofi edenuoc, “Ni yagucnoc megudua. Ge medacna nga ni geac Mangga. <sup>8</sup> Ge wiac gembadeac kpesinenna ni ngicngac bangec monnunac desigemba yeneng maridzomingga anggecde. Bangec tegia fekende, yeni sasawa geac anggec geng mingingngina annade. <sup>9</sup> Ngictauyasuga aiengngo memea mekecne, ge imoc mema ngicngoc enang kpedzameandae, ifi isoc yasugango kpedzameyununade.”

<sup>10</sup> Imocac ngictau ngeni yomoc negensibisia. Bangecac enara uayoacng-inagoc kecdae, ngeni goroyoac yomoc negemma garengemema kecbisia. <sup>11</sup> Ngeni KEBU kengecngoc kingang kpepima dzonong fede fedegoc desogai ammbisia. <sup>12</sup> Medac ye herebu bic angkecde. Yeng ngaba angemmeu ngeni sinnu manganema kpac ambauac haniau ngonducnema titikokoc ammbisia.

Ngicngac yeac hoannu sufuma kecdae, yeni kenecnginagoc.

### 3

#### *Ngicngacfora garengyunuude*

Dawidingo medaha Absaronggac kicfunac worama yegec yofi heiec.

<sup>1</sup> O KEBU, ngic ngabafocna yeni homac yombong nga ngic homacngo yacma nubeso andae. <sup>2</sup> Ngic homac yeneng neac yofi deandae, “Anutungo ye ebicfunac naric mi mesiude.” *Selac*

<sup>3</sup> O KEBU, gennoc oronnuma kasona annec. Geng kuc nga kibikpergiagoc ambadeac anengkecma orucna memiacma meserinukecne. <sup>4</sup> Ni KEBUARU seria kiacha yeng kpetiac tikiyau tacma yoacna turunga merennenude. *Selac*

<sup>5</sup> KEBUNGO nanggenuude, imocac ni mafema monggoc yacbade. <sup>6</sup> Ngic teng taoseng nga noc yeneng habuya habuya kpedzucnema noboc nobocnac hama nubeso oronnugac ni yeneac mi kengecnuude.

<sup>7</sup> O KEBU, ge hama ebicfunac mesinuna. Anutuna, ge ngabafocna ngebacngina kpedzamema manganameme enacngina kpemoronggena mabeso.

<sup>8</sup> KEBU ye ebic mesi mesi mingina. Kebu, ge ngicngacfocga kenecnununa. *Selac*

### 4

#### *Makpekpea yeneac nunumu*

Yegecgareng yearu. Gitakurere nga noc kpema yegec yomoc heibesonga. Dawidingo mitiyegec yofi heiec.

<sup>1</sup> O Anutu, ge dindingac kekecna, ni kpacguba ge kpakpacna negemma turunga merennenna. Ebicfu ubaebic meficgeba geng titing meficgenenna kekecna ngereeu naric kefai. Ge wosoefac anemma nunumuna negenna.

<sup>2</sup> Ngicac medacfora, ngeni neac eweheihei kekec heimeremma desofoc anengandae, imoc naso dafiguc angkegecede? Ngeni yoc sicsauc foraya kpac, imocac songo negemma ikocac sing meficgegecedeac ua meandae, ngeni imoc naso dafiguc angkegecede?

<sup>3</sup> KEBUNGO yengena enac tofoc tofohongic bic segereu yengena areng ande, ngeni imoc negembisia. Ni KEBU kpacha yeng ubaudumenna negenude.

<sup>4</sup> Ngeni herengina buu kopocsic mi meficgebisia nga fefenginau fema ubanginau wiac negensima waicke febisia. *Selac*

<sup>5</sup> Ngeni sese sirihau meficgema faima KEBU negenserima kecbisia.

<sup>6</sup> Ngicngac homacngo yofi deandae, “Wiac gombunga edzacnunugecedeac anemme. O KEBU, ge kicmesugaac kperagingo nerarannununa.” <sup>7</sup> Ngic goa yeni semeng uanginau wit nga waing gboria efea kpac fingeru so-gaigecde anu geng sogac sogai herenau fainec, imocngo ine yeneac ubangerec ferahade. <sup>8</sup> O KEBU, geng ongonnuna ruaegoc kecbadeac ruaegoc fefenau mama gau febade.

### 5

#### *Anutu ye memeficna*

Yegecgareng yearu. Kungac fima heibesonga. Dawidingo yegec yofi heiec.

<sup>1</sup> KEBU ge kedzac faima yoacna negenna nga asoringa anende, imoc negensina. <sup>2</sup> Ngictauna nga Anutuna, ni numugenduaeac kedzac kpema nga

meficnunadeac kpacguba ge kpacpacna nga enacudumenna negenna. <sup>3</sup> O KEBU, ni asoacngoc kpacguba enacudumenna negengannec nga asoacngoc sesena mengerema gearu faima tomai kecbade.

<sup>4</sup> Anutu, geng ngic ngadeguma mangana megecdeac ayemmeande, yeneac ubangerec mi negennec nga ngic mong ye faka mangana hoanggeande, yeng gegoc naric mi kefude. <sup>5</sup> Ngic yoackpekpe yoac homac osoandae, yeni geac kicfu naric mi hama nanggecde. Ge yarengic ubango ukuyunudacma wayununade. <sup>6</sup> Geng ngic ikocyoac deandae, yeni kpetotieyununa kpac anggecde. Nga ngic ogofocngina kpebucyunuma sac hembeso ayemmeande nga ogofocngina tobangyunuandae, ngic ifia KEBUNGO ubango wayunuude.

<sup>7</sup> Geng yoac dedzege amma imoc modackecnec. Imocac ni amagau erema kicna kpetiac womonggau fima eweheiheigoc fafoc heigemma numugembade. <sup>8</sup> O KEBU, ni ngabafocna kecdaeac geangga faka dindingacfu hesicnuma singga mesorongainenna tima kembade.

<sup>9</sup> Yeni enanginau yoac fora mong mi fede nga herenginau ogofocngina memanganeyunugecdeac negen negensac fede. Yeni ubangina imoc kicsere ange anggea nga nedzarangnginango yoac deandae, imocngo ngicngac kerec ayemmema manganau faiyunugecde. <sup>10</sup> O Anutu, ge ngic ifia yoacfu faiyunuma kopocsicnginaac turunga yemmebesena. Yeni yenaoc yoac goa dzegegecac yoac imocngo memayunubeso. Yeni singyoac kpekegcgc homac andeac kporacyununa yeni ngadeau kemema kecbisia. Yeni yoacga kpegec, imocac ge memayunubesena. <sup>11</sup> Ngicngac hoanggau hama sufuma kecdae, yeni sogac sogai meficgeyemmema ubangerec ayemmena nasoc ubangerecac yegec heikecma sogac sogaigoc kecbisia. Geng orongyunuma ongongyununa. Ge ifi anna ngicngac yeneng kpacgaac songo negemma geac negenggec engena anu sogaigecde. <sup>12</sup> KEBU, geng ngic dindingac kenehema gombunga ammina imocngo mariku isoc kasoya anude.

## 6

### *Kebu, ge mengerenuna*

Yegecgareng yearu. Gitakurere nga noc kpema sheminic uba modacma heibesonga. Dawidingo mitiyegec yofi heiec.

<sup>1</sup> KEBU ge ngaba amma ngabasiricfu yoac mi anenna amma herega buu numeme mi anenna. <sup>2</sup> O KEBU, ni kucna kpac anu homebeso anduae nga kengec amma dzononna fededeac neac ubaga manganau sebina mengerena. <sup>3</sup> O KEBU, ni ongana kengectoa meficgema ebirima kecdaeac ubaebicna bic meickenadeac tomai kecduae.

<sup>4</sup> O KEBU, ge dzigene hama kekecna ebicfunac mesina. Ge yoac dedzege amma imoc modackecnecac ebicfunac mesinuna. <sup>5</sup> Homecfu kemegec, yeni ge mi negensigugecde nga mong ye homec amau kemema fede, yeng ge naric mi dengereguude.

<sup>6</sup> Ni asoringa anengkefu kucna kpac ande. Ni tofocnacsoc kiacha kikkumana dokutoa isoc mama heifefena heiude. Amma ni homac kiacha kikkumanango fefena meu boroc boroc yombong angande. <sup>7</sup> Ni ubahodunnagoc kecduaeac kiacha kicna ngopic kpede nga kiacha ngabafocna sasawa ebic meficgenenggec kicna kuha kpac ande.

<sup>8</sup> KEBUNGO kedzac kpema neac kiac ubamangang bic negendacac manganameme ngic ngeni sasawango wanuma meickegec. <sup>9</sup> Ni ubamangang amma KEBU dekpesi ammiba imoc bic negendac. KEBU ye nunumuna negenu ngereede. <sup>10</sup> Ngabafocna yeni gameyunudaru homac yombong



kengecyunuu fakanginaac amma gameyunuu wanuma bic yombong wor-gecede.

## 7

### *Ngaba witiiau kefec*

Yegec yomoc Shiggaiong uba modacma heibesonga. Dawidingo Benyaming ngic mong kpara Kushiac yoac negemma yegec yofi KEBU heimiec.

<sup>1</sup> O KEBU, Anutuna, ni geac hoannu hama sufuduae. Ngic yeni sasawango kisannuma menubauac ongonnuma ebicfunac mesinuna. <sup>2</sup> Ngic monggo yeneac mariunac naric mi mesinuudeac raiong yangtoa isoc sorienacng-inango sebina merecegegec kapuc kpeu menuma kembauac geng ongonnuna.

<sup>3</sup> O KEBU, Anutuna, ni faka mangana dedaemoc anaiu me marinango ngicngac goa memanganeyunubai dede. <sup>4</sup> Me ngic monggo nigoc ruae kecmanu mangana hoanggema ammibai me ngabangicnaac finac eng wangecma mekembai dede <sup>5</sup> ngabangicna geng negemmana kisannuma naric menubeso. Ye kpebcnuudeac ubana tindziru onganango bangecac gotennu febeso. *Selac*

<sup>6</sup> O KEBU, ge ngaba amma yacna. Ngabafocna yeni herengina buu geng yacma memayunubesena. O Anutuna, kopocsic turunga fingecyem-meudeac deserinecac amma ge gborima yacma meficnuna. <sup>7</sup> Ngicngac yeni kicgau hama kpeturanggegec ge wi kurumennu ngictau tatacgau tacma garengyununa. <sup>8</sup> KEBUNGO ngiha ngiha sasawa faka angammengina isinggedacma foraya deude. O KEBU, ni didingac kecma kopocsic mong mi meficgeai. Ge imocac faka angammemena yoacfu isinggema foraya dena faka didingac meficgenenna firang ambesare.

<sup>9</sup> O, gennoc Anutu didingac amma ngicngac negen negengngina nga herenginaac hengising mingina. Geng ngic mangana megedeac ayemme-ande, yeneac yarefakaac kpae heina kpac ambeso nga ge ngicngac dindin-gac tatacngina meficgema faiyununa ihai seria tacbisia.

<sup>10</sup> Anutu Kuctoa mingina, ye neac kasona. Yeng ngicngac heren-inau ikoc nga hamangec mong mi fede, nenang ebicfunac mesinunuude. <sup>11</sup> Anutungo ngicngac faka angammemengina yoacfu isinggema faka didingac modacma foraya deude. Amma ye wenacsoc mangana hemma modzea tide. <sup>12</sup> Ngic mong ye ubea mi merendeu Anutungo soea dzumuma teba kpesaiudeac efaiude.

<sup>13</sup> Ye kpebcyunuudeac dzikacac iwaiya mengerema tebemedaha gerec borangagoc memengere bic andac. <sup>14</sup> Negenggec, ngic imoc ye wiac mangana kpenanggema ebicngo tobangyunuudeac heregoc kecma wiac hereau meficgeu imohacnac fingerude, imoc kpara ikoc. <sup>15</sup> Ngicngac botacfu meyunuudeac negemma yeng teng keme kemea anudeac bangec homac usuma yengenaocngoc makpema tengau kemeude. <sup>16</sup> Ye tobangyunuudeac ebic arenggema ngicngac ogofora ayemmeu ebic imocngo dzigene hama yengena oruhau heiude. Nga ye ogofora memanganeyunuu faka imocngo yengenaaru dzigenema ye memanganema oruhau heiude.

<sup>17</sup> KEBU ye didingac, imocac ubangerec ammibade. Ni yegec heima KEBU Kuctoa minginaac kpac kuneng heiwayong memibade.

## 8

*Ge kpacga Engenatoa*

Yegecgareng yearu. Gati yeneac musiwiac kpema heibesonga. Dawidingo mitiyegec yofi heiec.

<sup>1</sup> O KEBU, ge Kebunina, bangectoa bangec fekendeu kpacga Engenatoa yombong feude. Ge kurumenga kurumenga feracyunuma kucga kibikperagiagoc wi yombong faina fede. <sup>2</sup> Ge nambarac kapia nga sabac namuu kecdae uayoac yemmena yeneng geac kpac kuneng heiwayong memigec faka kuhagoc fingerude. Ge ngabafocga kecdae, yeneac amma ifi anec. Nambarac yeni ifi anggec ngabafocga nga ngicngac goa yeni turung kpoukpouyoac homac osoandae, yeni yoacngina kpac anu waicke tacgede.

<sup>3</sup> Geng kurumenga kurumenga meficyununa marikibiga andae nga ge afo nga asomeng sasawa wi faiyununa tatacnginau seria tacgec yenenganduae. Yenemma <sup>4</sup> yofi negensima deba, “Geng bangecfu ngicngacnec negensinunuma ngicac medacfora gombunga garengnukecnec, imocac warecguduae. <sup>5</sup> Geng ngic meficgema tatahau faina yeng Anutuac siric anu Anutungo kunenga kecede. Ye kuc kibikperagigoc kefudeac ge imocngo iraya isoc heiminec. <sup>6</sup> Ge marikibiga sasawa meficgena yeng imocac mingina kefudeac fainec. Ge wiac sasawa yengena haniaac bageu fainec. <sup>7</sup> Imoc amau rama burumaka sasawa nga manennu yang sasawa <sup>8</sup> amma sawau neng sasawa nga kondunnu kondungyang amma kondung manau yang hania hania singngina mema kenghaandae, imoc yeac haniaac bageau faina garengyunuude.”

<sup>9</sup> O KEBU, ge Kebunina, bangeha bangeha fekendaue kpacga imoc engenatoa yombong fekefude.

## 9

*Makpekpea ongongyunuude*

Yegecgareng yearu. Yegec mong kpara Medac homeec, imocac uba modacma yegec yomoc heibesonga. Dawidingo mitiyegec yofi heiec.

<sup>1</sup> KEBU, ni heregoc yombong ubangerec megemma yofi edeyunuba, “Ye ua sasawa mekecede, imoc bibiagoc yombong.”

<sup>2</sup> Ni ubangerec negemma geac amma sogabade. O Kuctoa mingina, ni geac kpac kuneng heiwayong memima yegec heibade.

<sup>3</sup> Ngabafocna yeni gemma dzigenema tifainggema mayunuu kpac anggec.

<sup>4</sup> Nga geng yoacfu nanggenuma yoacna faka dindingafu desina yoacfu firang anai. Ge ngictau tatacgau tacma faka dindingac modacma yoac isinggema desinec.

<sup>5</sup> Geng ngicngac bangec monnunac Anutu mi negemmidae, yeni yunumeting ayemmenec nga ngic Anutu ngadehema mangana megedecac ayemmeande, yeni kpetotieyununa kpac anggec kpacngina meickenec. Nga imoc sufuma nasoya nasoya kpac anude. <sup>6</sup> Ngabafocnina yeni amangina sesuhasac wisic wisickea kpac anu ngaba yeneng imohai kpac anggec. Geng taongngina hembareckena kpac anggec ngic mongngo yeneac naric mi negensiude.

<sup>7</sup> KEBU ye ngictau amma tatahau nasoya nasoya tarude. Ye ngictauc tataha faiu seria taru yoacfu faifai uaya meudeac efaide. <sup>8</sup> Ye faka dindingac modacma bangectoa bangecac ngicngac yoacngina isinggema foraya dema monde mondea kpac kecma ngiha ngiha yoacngina desiude.

<sup>9</sup> Ngicngac goa yeneng ngic ogofocngina ebic meficgeyemmegec ubaebic-  
nginagoc kecgec, yeneac sufu sufumangina seria, imoc KEBUNOC. Naso  
mangana hau yeng amangina seria anu ihai sufugecde. <sup>10</sup> O KEBU, ngicngac  
yeneng geac kpac kuneng negengandae, yeni negenserigugecde. Ngicngac  
yeneng ge hofocgugec geng yeni mi ngadeyunuma wayununade.

<sup>11</sup> KEBUNGO Sionnu ngictau tatahau tacde, ngeni ye yegeg heimima den-  
gerebisia amma yeng ua mekecde, imoc ngiha ngiha botucnginau dekper-  
agibisia. <sup>12</sup> Ye ngic sac hetinggegec, yeni negengyunuma kopocsicnginaac  
turunga kpouyemmeude. Ngicngac ebicnginagoc kecma ye kpacgec yeng  
imoc naric mi nigeckpeude.

<sup>13</sup> O KEBU, ngabafocna yeneng ngadenuma kpendzeng nga ebic nenggec  
kecduae. Ge neac ubaga manganeu meficnuna. O Kebu, ni homecac naguu  
febare geng miacnuna monggoc imohacnac erebade. <sup>14</sup> Ge ifi anna ni  
faka gombunga angannec, imocac siduc andacma erienzong megembade.  
Nga ge ebicfunac mesinunec, imoc Siong narogaac naguu namma sogac  
sogaigoc dekperagiyemmebade.

<sup>15</sup> Ngicngac bangec monnunac Anutu mi negemmidae, yeni yenaoc teng  
usuma imohai kemegec nga ufcic mesufuma faigec, imocngo haninginau  
meu mayunuec. <sup>16</sup> KEBUNGO yoacfu faifai uaya ngicngac yenearu meu  
neni ye negemmidimbe. Ngic Anutu ngadehema mangana megecdeac  
ayemmeande, yeni maringinango ua megec, imocngo yenang botacngina  
amma witicynuuude. *Higgaiong, Selac*

<sup>17</sup> Ngicngac Anutu ngadehema mangana megecdeac ayemmeande nga  
bangec monnunac ngicngac Anutu nigeeyunuu kecandae, yeni ngic home-  
gec, yeneac amau kemma kecgecde. <sup>18</sup> Ngicngac iwaiac obohoma kecandae,  
Kebungo yeneac ebicngina nasosoc mi nigeckpeude, kpac. Ngicngac  
makpekpea yeneng Anutungo meficynuuudeac negensima tomai kecandae,  
yeni nasoya hau wiac imocac fora henggecde.

<sup>19</sup> O KEBU, ge bangecngic kpaee heiyemmena firang mi ambisia. Bangec mon-  
nunac ngicngac yeni geac kicfu nangegec geng yoacfu faiyunuma fakangina  
isinggena. <sup>20</sup> O KEBU, geng kengec meficgeyemmena. Ngicngac bangec  
monnunac yeni bangecngicsac andae, imoc edzacyununa negembisia. *Selac*

## 10

### *Ebicfunac mesi mesiac nunumu*

<sup>1</sup> O KEBU, ge nocac neac hereau yombong nannec nga ge nocac ebic-  
naso anu sufuma kecnece? <sup>2</sup> Ngic Anutu ngadehema mangana meudeac  
ammiane, ye yengenaac negenu engena ande. Ifi anu gereagoc kemma ngic-  
ngac kucmama kisangyunuma ebicngina arenggema mendangyunuuude.  
<sup>3</sup> Ngic Anutu ngadehema mangana meudeac ammiande, ye hereau negen-  
songo mangana fede, imocac negenu engena anu yoac homac osoude. Ye  
iwaiac kichodung amma wiac homac mekpedzuc amma mekefudeac ammi-  
ude amma KEBU ngadehema yeac sowecyoac deude. <sup>4</sup> Ngic Anutu ngade-  
hema mangana meudeac ammiande, ye sebua meemma deude, "Anutu ye  
wiac imocac mi kpesinenude." Amma yofi negensima kecde, "Anutu mong  
mi kecde, kpac." <sup>5</sup> Ngic mong ifi kecande, ye uaya nasosoc naric amma  
ngereuude. Ye ngabafora sasawa yeneac negenu wiac efeacnac andeac  
dzomoreyemmeude. Ye yoacga kpekefu geng wiac hengising amma foraya  
deannec, imoc yeac hereau fedeac imoc naric mi henude. <sup>6</sup> Ye yengenaac  
yofi negenude, wiac mongngo menuu goroc goroc naric mi ambade. Ni nga

esangabofocna kecma ebic mong naric mi meficgenide. <sup>7</sup> Ye sowecyoac nga ikoc amma ogofocngina ebicfu faiyunuudeac yoac dekefude. Dekefu enara imocngo wakeu enacbibihau ngicngac tobangyunuudeac yoac nga ogofocngina memanganeyunuudeac yoac mesufuude. <sup>8</sup> Ye amabangec wegenacfu sufuma tomai tacande. Taru ngic mongngo mangana mi meande, ye hau ngic manganango ngic memanganeyunuudeac areng andae, kiwa yenearu fima sufu sufuu kpebucyunuude.

<sup>9</sup> Raiong yangtoango icbisis botucnginau sufuma tacande, yeng ifi isoc sufuma kucmama yeni meyunuudeac tomai taru ngicngac memeficngina kpac andae, yeni ufihau mendanggegec meyunuma kenude. <sup>10</sup> Ebicfu mayunugecdeac areng yeni ngonducnema bangecfu sufuma tacdae. Tacma memeficngina kpac kecma yeac mariu kpegec yeng kuhagoc meyunuude. <sup>11</sup> Ngic mangana ye ubeau yofi negensiude, “Anutu ye neac nigeckpeu kiwa semema naric mi nenude.”

<sup>12</sup> O KEBU, ge yacna. Anutu, ge mariga miacna enu. Ngic goa yeneng ngic ogofocngina ebic meficgeyemmegec ebicgoc kecandae, ge yeneac mi nigecegubeso. <sup>13</sup> Ngic Anutu ngadehema mangana meudeac ammiande, ye nocac Anutu ngadehema yengenaac negemma yofi deude, “Ye kopocsinaac turunga mi kpounenude.” <sup>14</sup> Anutu, geng sifu ngicngac ebic nga kpendzeng-goc kecdae, yenemma ebicngina negensima marigango meficyununadeac negennec. Memangac manganea kecde, ye kekeha gearu waande nga geng beging yeneac memeficngic. <sup>15</sup> Geng ngic Anutu ngadehema mangana meudeac ammiande nga yarengic, yeneac maringina hetackena. Hetackema fakangina mangana hengising amma meficgekecna sasawa kpac andacbeso.

<sup>16</sup> KEBU ye ngictau kecde nga kecengkefude. Nga bangec monnunac ngicngac Anutu mi negemmidae, yeneng yeac bangecfunac meickema kpac angecde.

<sup>17</sup> O KEBU, ngicngac yumia yeneng heresongongina edegugec ge imoc negemma herengina meseriyemmenade. Yeni kpacgugec ge kedzacga yenearu faina. <sup>18</sup> Nga ngicngac goa yeni ogofocngina ebicfu faiyunugec. Faiyunugec ge ngicngac ubaebicgoc kecdae nga nambarac beging kecdae, yenenggareng ayemmema faka dindingac modacma ayemmebesena. Ge ifi anna bangecngic yeneng kengectoa monggoc mi meficgeyemmegecde.

## 11

### *Kebungo onggonnuude*

Yegecgareng yearu. Dawidingo yegec yofi heiec.

<sup>1</sup> Ni KEBUAC hoannu hama sufuma kecba ngeni dafi negemma yoac yofi edenudae, “Ge neng isoc kemma tikigau worana.” <sup>2</sup> Negenna, ngic Anutu ngadehema mangana megecdeac ayemmeande, yeni ngic goa herenginau ikoc nga hamangec mong mi fede, yenemma tebededahango wedecyunugecdeac negemma kundunnu namma gurutu taima kpesaigecde. <sup>3</sup> Ngic yeneng dedeseriyoaraac titiseri kpetotieyunuma meickegecdeu ngicngac dindingac yeneng wiac imoc mengeregecdeac obohogecde.

<sup>4</sup> KEBUNGO womonga kpetiacfu tacde. Ye ngictau tatahau kurumennu tacma kiwango ngicac nambarcfora yenemma kiwa yenearu fima fakangina hennegeng anude. <sup>5</sup> KEBUNGO ngic dindingac fakangina tobanggeude. Yeng ngic Anutu ngadehema mangana megecdeac ayemmeande, yeneac faka momoc tobanggeu ngic yarefakaac songo negengandae, yeni ubango

wayunuude. <sup>6</sup> Ngicngac Anutu ngadehema mangana megecdeac ayemme-ande, yeng yeneac witiu hoc gerec dzedzeagoc nga sarafa gerec borangagoc kpakeu yenereude. Yenereu firang gerea yenereu imocngo pakenginac kpakegec yananggac wiac anu yeni ebic imoc pakeunac isoc negecde.

<sup>7</sup> KEBU ye dindingac amma ye faka dindingac songea negende. Nga ngicngac uba kongaha amma ikoc nga hamangengina kpac kecdae, yeneng yeac kicmesu henggecde.

## 12

### *Kebuac yoacngo ongonnuuude*

Yegecgareng yearu. Yegec yomoc shemini uba modacma gitakurere witingina 8ngo kpema heibesonga. Dawidingo mitiyegec yofi heiec.

<sup>1</sup> Ngicngac yoac modac modacfaka angandae, yeni bic kpac andacma ngicngac botucninau monggoc mi kecgecde. Nga Anutuac enac tofoc tofohongic, yeni kpac amma monggoc mi kecgecde. O KEBU, imocac meficnunubesena. <sup>2</sup> Ngic sasawa yeni ogofocnginagoc denengeng amma ikoc andagec enacbicnginaunac yoackerec ikoha ereu herenginac mananganango tobangyunugecdeac yoac degecde. <sup>3</sup> Ngicngac yeni enacnginau yoackerec ikoha anggecde nga nedzarangngina yananggac yoac engena homac osogec KEBUNGO imoc herecgema meickebeso. <sup>4</sup> Yeni yofi deandae, “Neni nedzaranninango kuc nemmeu seria nannide nga enacbicninango meficnunu ngic mongngo naric mi garennuma dzegenunuude.”

<sup>5</sup> Ifi degec KEBUNGO ine yoac yofi dede, “Yeni makpekpea memayunuma memanganeyunuandae. Nga ngicngac yeni ebic witiu kecma asoringa ayemme, imocac yaguc yacma ongongyunubade. Yeni sufuu sufuu ruaegoc tacgecdeac ayemmeu neng meyunuma hoannau faiyunubade.”

<sup>6</sup> KEBUNGO yoac deserima deec, imoc sasawa yoac kongaha nga seuha kpac. Ngic yeni siriwa gerec gereagoc ohogec atac 7 anu bangecfu mama kongac koporarac anude. KEBUNGO yoac deserima deec, imoc ifi isoc ane.

<sup>7</sup> O KEBU, geng ongonnunuma ngicngac yofinenggac kecdae, yenearunac nasosoc garennuma. <sup>8</sup> Ngicac medacfora botucnginau yarefakaac negenggec engena ande. Nga ngic Anutu ngadehema mangana megecdeac ayemmeande, yeni noboc noboc oronnuma kengha andae.

## 13

### *Ge kicmesuga mi mesufuna*

Yegecgareng yearu. Dawidingo yegec yofi heiec.

<sup>1</sup> O KEBU, ebicna noc nasou wisickeude? Ge naso wisic wisicke kpac kecma neac mi nigecegbeso. Ge kicmesuga nearu mesufukecneac, ge faka imoc wanadeac tomai kecduae. <sup>2</sup> Ni ubaebicgoc kecduae, imoc wisickeudeac tomai kecma ubahodung wenacsoc negengkecduae, imoc kpac anudeac tomai kecduae. Ngabafocna yeni firang anggec yeneac bageu kecduae, imoc wisickeudeac tomai kecduae.

<sup>3</sup> O KEBU Anutuna, ge neac negensima turunga merennenna. Ni homecfu heima febaiac kicnau kperagiga faina kecbesare. <sup>4</sup> Nocac ngabangicnango yofi debacac, “Ni firang bic andua.” ifi deu ni goroc goroc amma manubeso anu ye imocac sogaiabac meficnuna. <sup>5</sup> Geng yoac dedzege amma imoc modackecneac negenseriguma kecduae. Geng ebicfunac mesinunecac amma ni heregoc geac desogai angkecduae.

<sup>6</sup> KEBUNGO gombunga anengandeac yegec heimibade.

## 14

### *Anutua kpac kekec*

Yegecgareng yearu. Dawidingo yegec yofi heiec.

<sup>1</sup> Ngic negen negengngina kpac, yeni herenginau yofi negemma deandae, “Anutu mong mi kecede, kpac yombong.” Yeni fakangina manganeu faka mangana yombong anggecede. Ngic mongngonec faka gombunga mi angkecede, imoc kpac yombong. <sup>2</sup> KEBUNGO kurumennu kecima ngicac nambarac yenemma kefude. Nga ngic mong ye negen negentegehagoc kecima Anutu hofocande, Kebungo kic fiu mau ngic ifia yeac kicfifi angkecede. <sup>3</sup> Nga yeni ine sasawango ngade ngade monggoc kemedacma fakangina heimeremma manganedacgec. Ngic mongnga mong faka gombunga mi angkecede, mocdong kpac yombong.

<sup>4</sup> Yarengic yeni wiac negemma negen negentegecgnginagoc mi anggecede. Nga ngicngo yaka neandae, yeni ifi isoc ngicngacfozna neyunuma KEBU ine naric mi kpacgecede. <sup>5</sup> Anutungo ngicareng dindingac kecandae, yenigoc kefudeac manganameme yeneng kengectoa amma homac yombong kpido-hogecede. <sup>6</sup> Yarengic ngeneng ngic makpekpea arengngina memanganebesogandae, fora. Nga KEBU yennoc yeneac sufu sufuama.

<sup>7</sup> O, Israe neneac mengec mengere, ye Siong tikiunac mama habeso, imocac yombong anemmede. KEBUNGO ngicngacfora monggoc mengerenunuu naric kecnide, naso imohai Yakoboac nambaracfora sogaignecde nga Israe neni ubangerec negennide.

## 15

### *Anutua womonnu*

Dawidingo yegec yofi heiec.

<sup>1</sup> O KEBU, geac kporucwomongga kpetiacfu merang naric tarude? Nga merang tikiga kpetiacfu naric kefude?

<sup>2</sup> Ngic mong ye faka angammemeau kopocsic mong mi meficgeude nga mong ye faka gombunga angkecima hereaunac yoac fora ereu deude, yeng ihai naric kefude. <sup>3</sup> Ngic mong ye nedzarangango ngadeyoac mi deude nga ogea mi memanganeude nga mong ye ogofora yeac wegenac kecandae, yeni game kpekpeuu naric mi faiyunuude, yeng ihai naric kefude. <sup>4</sup> Ngic mong ye ngic mangana, yeneac modzea tiande nga ngicngac KEBU ewehei-heigoc hoanggeandae, yeneac ewengina heiude. Nga mong ye dedeseriyoac modaru imocngo ebic homac meficgemiudeu imoc sifu modarude nga ye imoc negenu wiac engena mi anude, ngic imocngo Kebuac tiki kpetiacfu naric kefude. <sup>5</sup> Ngic goa yeneng ngic mong yearu turung angkecdae amma kpougecede, imohai yeng profit dema dzo monggoc torokpema mi meude. Amma ngicngac goa kopocsicngina kpac kecdae, yeng yeni yoacfu memayunuudeac moneng naric mi meude, ngic ifia yeng Kebuac tiki kpetiacfu naric kefude.

Ngic mong ye faka imoc angkecede, ye wiac mongngo meu goroc goroc naric mi anude.

## 16

### *Kingangfora garengyunuude*

Yegec yomoc miktang uba modacma heibesonga. Dawidingo yegec yofi heiec.

<sup>1</sup> O Anutu, ni geac hoannu hama sufuma kecbadeac ongonnuna. <sup>2</sup> Ni KEBU yofi ededuae, “Ge Kebuna, forangoc, gea kpac wiac mong gombunga naric mi mekecbai.” <sup>3</sup> Bangecfu ngicngac kpetiac yeni ngicngac eweheiheingagoc, yeneac negemba ngereede. <sup>4</sup> Ngicngac nemuonga meisinggema hoanggeandae, yeni ine ubahodung kekecnginau kpedzige hama ebicngina monggoc nga monggoc anude. Ni yeneac sese dema sac naric mi hetinggebade nga kpacngina enacbibicnango naric mi kpachade.

<sup>5</sup> KEBU, geng wiac noboha nennec, imoc pakene isoc anu imoc mema nebade. Geng maridzominna garenggena imoc neac amma fekefude. <sup>6</sup> Wiac mederema nemmegec, imohai neac maridzoming wiac gombungau huficeu nenggec. Foracngoc, ni maridzominna imocac ubangerec negenduae. <sup>7</sup> KEBUNGO dedereceg anemma sing edzacnuudeac kenehebade.\* Herenango tofocnac ifingoc edekpou anangande.

<sup>8</sup> Ni nasosoc kicna KEBUARU fikecduae. Yeng marifoiau kecdeac wiac mongngo menuu goroc goroc naric mi ambade. <sup>9</sup> Imocac herenango ubangerec negemma ongana sogaiu sebina ifingoc ruaegoc anude. <sup>10</sup> Geng ongana wana homec amau naric mi kemeude. Amma ge enac tofoc tofongicga onggonggena kicsere naric mi henude. <sup>11</sup> Geng kekecac sing kpounennec. Geac kicfu sogac sogai hafoangoc fede nga marifoigau ubangerec feengkefude.

## 17

### *Kebu ge ongonnuna*

Dawidingo yofi numuec.

<sup>1</sup> O KEBU, ni dindingac amma ebicfu kecma yoac deduae, imocac yoacna negenna. Ni arohoma kpacguba ge yoacna negenna. Enacbibicna ikoha kpacngo numugemba ge kedzac kpema nunumuna negenna.

<sup>2</sup> Ge yoacfu neac yoac faka dindingac modacma forana debesena nga geac kicngo faka dindingac hembeso. <sup>3</sup> Foracngoc, ge tofonac yugucnuma to-bangge herena hennegeng annadeu nearu mangana mong mi meficgenade. Enacnango yoac kopocsihagoc mong mi debadeac negenseriai. <sup>4</sup> Ngic goa yeni faka angammengina hania hania fede, fora. Nga ni sifu enacbibic-gango yoac denec, imoc modacma garengemema yarengic yeneac sinnu mong mi kenai. <sup>5</sup> Ni serima geac sinnu tima kengha amma hanina mong mi tipsockeec.

<sup>6</sup> O Anutu, geng nunumunaac turunga merennennadeac kpacguduae. Ge kedzacga nearu faima yoacna negenna. <sup>7</sup> Geng yoac dedzege amma imoc modackecneac, wiac imoc bibiagoc andeac imoc edzacnuyombonggena. Ngicngac neni ngabafocnina yenearunac meickema sufunideac geac hoannu hani geng ebicfunac mesinununade. Nga ngaba yenearunac gearu hama marifoigau sufunide. <sup>8</sup> Ge geangga kicga garenggeannec, ge ifi isoc ni garennuma kpeganggaac debannu fainuma mesufununa.

<sup>9</sup> Ngic goa yeni Anutu ngadehema mangana megecdeac ayemmu kpeto-tienubeso andae. Nga ngaba yeni kpebucnugecdeac negemma oronnuma nandae, ge yenearunac mesufununa. <sup>10</sup> Yeni herengina dzegegec yenearu ubamangang mong mi feyemmu enacnginango yoackpekpe kpegecde.

\* **16:7:** Anutungo mefcinunuu nenang bangecngicngacnec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereede. (Fingec fingec 9:26, 14:20, 24:48, Mitiyegec, 26:12, 103:22 nga goa homac fede.)



<sup>11</sup> Yeni hanina modacma kisannuma meficnuma yaguc oronnuma nandae. Yeni kicngina kucgoc nearu fima bangecfu kpefacnubeso andae. <sup>12</sup> Raiong yangtoango wiac kisamma sorienacngo sebia merecgeudeac ammiande nga raiong kuhagocngo sufu sufuu ngonducnema tomai feande, yeni ifi isoc andae.

<sup>13</sup> O KEBU, ge yacma kemma ngabafocna kicnginau hama yunuma bangecfu ukuyununa. Ngic Anutu ngadehema mangana megecdeac ayem-meande, yeni menugecac dzikacbeanggango kekecna yeneac mariunac mesina. <sup>14</sup> O KEBU, ge geangga maringo bangecngic yenearunac mesinuna. Bangecngic yeni bangec yomohai kecma imocac wiac mekpedzuc amma mekecdae, yeni imocac areng. Ge yeneac negemma wiac faina fede, imocngo herengina mewakeude. Mewakeu medacfocngina yeneng wiac imoc monggoc nga monggoc mekecma nambaracfocngina yeneac negemma noboha faigec tarude.

<sup>15</sup> Anu ni ditingac kecma kicmesuga hemma gauunac gborima geac kicsiric hembra gunucnude.

## 18

### *Ngictaungo firang anec*

Yegecgareng yearu. KEBUNGO kingang ngiha Dawidi ngabafora sasawa yeneac maringinaunac mesima Sauroac kuc memama yearunac meickeu Dawidingo KEBU yegec yofi heimiec.

<sup>1</sup> O KEBU, ge neac kucna, ni geac songo negenduae. <sup>2</sup> KEBU ye neac hoc peperandzi seria, ye amana seria amma neac yungec yungecngic. Ye Anutuna nga neac hoc peperandzi seria anu ni yeac hoannu kemma sufuma kecbade. Ye kasona nga ye kuhagoc amma ebicfunac mesinuu yeac odaseriau kecbade. <sup>3</sup> KEBU erienzong memini ngereyombonggede. Ni ye kpacba yeng ngabafocna yeneac witicfunac mesinuude.

<sup>4</sup> Homecac witicngo fusenuu doku tunggbaungngo wegenac hama manganenubeso anu kucna kpac anec. <sup>5</sup> Nga homec amaac witicngo fusenuu homecac botacngo sinna hedzickegec.

<sup>6</sup> Ni ebicfu kecma Anutunango meficnuudeac kpacbare yeng womongau tacma ubaudumenna negemma kedzac kpema kiacna negeneac.

<sup>7</sup> Yeng ngaba anecac bangecngo kockpac amma kpemindaheu usoc meu tikiac titiseri yeni dendeng kpegec. <sup>8</sup> Ye samaha singausing hosuc mau gerecngo enarausing erema wiac dzerecgeu kpac andarec. Hoc gerecy-ohoagocngo enaraunac ereu singsararang kpema kenggec. <sup>9</sup> Ye kurumenga kurumenga merarangyunuma hau kundungtoango hania bageau tarec. <sup>10</sup> Ye kerobing witiau taru imocngo kpegangagoc kpututuckeu haec. Ye firanggac kpeganga witiau heima sawakebangau haec. <sup>11</sup> Ye kundung mema imocngo kperacemema kiahoeing dzadzungo bedzoya amma oronggeu imocac manau tarec. <sup>12</sup> Kibikperagingo waraimima hoeng mekperagiyunuu yeni yeac kicfu kenggec kia nomanggbomea kuneng amma mau hoc gerecyohoagocngo ifingoc hoeng manaunac maec.

<sup>13</sup> Nga nomanggbomeatoa nga hoc gerecyohoagocngo maec, imocac manaunac KEBUNGO kurumenga kurumenga, imohai tacma gumparandang meficgeu haec. Kuctoa minginango yoac deu yeni enacudumenga negenggec. <sup>14</sup> Ye tebe kperecgema tebemedac isoc kpesaiu ngabafora singsararang kpegec. Ye piratac kucnginagoc sing edzacyunuma faiu yeni sing imoc modacma kenggec. <sup>15</sup> O KEBU, geng yoac ngabasiric edeyunuma



samacgausing asu fifina kucgoc erema kondungtoa meu dzikeu kperemenga fingctegeru henggec. Nga bangectoa bangecac titiseri imoc didiu faina henggec.

<sup>16</sup> Ye sawau tacma maria sinema menuma doku dzohong keme ke-meacun kpedzinuac. <sup>17</sup> Neac ngabangic kuhagoc anu yeng yeac mariunac mesinuu ngic neac modzongina tiande, yeneac kucngo feracnuecac yeng yenearunac mesinuec. <sup>18</sup> Naso manganango ebihagoc neac wegenac hau ngabafocna yeneng kicnau hama namma nubeso anggec KEBUNGO meserinuma mefinuac. <sup>19</sup> Ye neac songo negenecac amma ebicfunac mesinuma sawea homac meficgenemma hesicnu kemma ihai fainuac.

<sup>20</sup> KEBUNGO neac faka dindingac henec, imocacsoc faka gombunga anenec. Nga marinango faka kongaha angkefaiac ye imocac turunga merenemma wiac gombunga nenec. <sup>21</sup> Ni Anutu wama faka mangana mong mi amma KEBUAC sing gombunga modacanduaengoc. <sup>22</sup> Yeac dedesiyoac imoc sasawango kicnau feu ni nasosoc hemma yeac singyoac mong mi ngadehema wayai. <sup>23</sup> Amma ni yeac hehennu kopocsic mong mi meficgeai, kpac. Ni kopocsic meficgebaiaac fagung amma garengemekefai. <sup>24</sup> Nga marinango faka kongaha angkefecac KEBUNGO neac faka angammeme dindingac hemma gombungaac turunga kpounenec.

<sup>25</sup> O Kebu, ngic mongngo yoac modackefu ge yoacga modackecneac, imoc edzahanade. Nga mong ye kopocsic mong mi meficgeu geng kopocsic mong mi meficgeanneac, imoc edzahana henude. <sup>26</sup> Mong ye uba kongahagoc kefu geng ubaga kongaha, edzahanade. Nga mong ye fakaya heimeremma mangana modackefu ge ifingoc fakaga gombunga heimeremma mangana ammina henude. <sup>27</sup> Geng ngicngac yumia ebicfunac mesiyununade. Nga ngic yenangac negenggec wiac engena ande nga gamea kpac kecma kicngina miacandae, geng ine yeni memayununade.

<sup>28</sup> KEBU Anutunango kundunna meickeu kperagia angkecde. Oc, genoc kifana kpedzereckenade. <sup>29</sup> O, ge sing meficgenenna ngabahabu memayunubade. Anutunango kuc nenu odatangina membarackema ferahabade.

<sup>30</sup> Anutu ye faka angammemea dindingac nga KEBUNGO yoac deserima deu fora fingerudenoc. Ngicngac yeneng yeac hoannu hama sufudacgec yeng kasongina amma mesufuyunuude. <sup>31</sup> KEBU ye mocgungo Anutu fora amma Anutunina mocgungo hoc peperandzi seria. <sup>32</sup> Ngicngac wamba heigec kemeande, ifi isoc Anutungo kuc heinenu kemeu sing ebiha kpac meficgenenu gombunga kengkechade. <sup>33</sup> Yeng hanina mengereu kate yanggac haniherec isoc anu bic yombong nedzibade. Nga ye tikiu nambadeac kuc nenu naric mi manuue. <sup>34</sup> Ye marina mengereu dzikacac negen negenggoc anduaeac tebe seria aiengngo memea, imoc naric taibade.

<sup>35</sup> Ge ebicfunac mesinuna imocngo kasona angkecde. Ge marifoigango nanggenuna serima namba geng meficnuna ngickuneng anai. <sup>36</sup> Ni tiserima nambadeac geng tumiatoa meficgenenna haninango mong mi tiposockeac. <sup>37</sup> Amma ni ngabafocna kisangyunuma meficyunuma memanganeyunuba kpac andacgec monggoc dzigeneai. <sup>38</sup> Ni ngic yunuhomeai, yeni haninau makpema monggoc mi yacgec.

<sup>39</sup> Geng dzikac kpebadeac kuc heinemma ngabafocna neac bageau faiyununa mayunuu fegec. <sup>40</sup> Nga ge ngabafocna faka ayemmena yeni ngadengina nearu meremma wanuma kenggec. Nga ngic yeneng neac modzong-

ina tiu neng kpetotieyunuba kpac anggec. <sup>41</sup> Yeni memefiac kiaceg nga ebicfunac mesiyunuudeac ngic mong ine mi tarec. Yeni KEBUNGO meficynuudeac kiaceg yeng yoacngina mong mi merenec. <sup>42</sup> Ni kpedzameyunuba yeni sendung firangngo mefiranggeande, ifi isoc anggec. Ni sinnu goteng isoc meicyunuma ngadeau ukuyunuai.

<sup>43</sup> Ngiha ngiha yeneng ngaba anenggec geng imohacnac mesinunec. Mesinuma sing meficgenenna bangec monnunac ngicngac yeneac garengtoa anai. Ni ngicngac areng goa mi negengyunuba yeneng neac bageu kecma kingang kpenenggec. <sup>44</sup> Ngic yeni siducna negemma yoacna bic tofohogec kuricngic yeneng hama neac kicfu ngonducnema ewena heigec. <sup>45</sup> Yeni kucngina mau dzonongngina fedeu amangina seria wama imohacnac mama hagec.

<sup>46</sup> KEBU kecede. Neac hoc peperandzi seria, ye kenehebesonga.\* Anutu ebicfunac mesinuc, ye kpac kuneng mibesonga. <sup>47</sup> Anutungo ebicna negemma turunga kpouyemmema ngiha ngiha neac bageu kecgecdeac faiyunuc. <sup>48</sup> Oc, ye ngabafocna yeneac mariunac mesinuma kicnginau miacnuma kpac kuneng nenec. Ge yarengic kucnginagoc, yeneac mariunac mesinunec. <sup>49</sup> Imocac bangec monnunac ngicngac botucnginau namma afegubade. O KEBU, ni yegec heima geac kpac kuneng heiwayong memibade. <sup>50</sup> Yeng ngictauya faka ammiu dzikatoau firang angkefude. Ye ngic meisinggema kerec nadzicmiu yeng yeac ngictau anu yegoc kecma yoac dedzege anec, imoc modackefude. Yeng Dawidi meisinggema nasoya nasoya ye nga esangaboforagoc kecede nga kecengkefude.

## 19

### *Anutuac marikibi*

Yegecgareng yearu. Dawidingo yegec yofi heiec.

<sup>1</sup> Anutu ye kuc nga kibikperagiagoc, kurumenga kurumenga yeni siduc imoc dekeragikecdae nga sawango yeac marikibi deireckeude. <sup>2</sup> Hadzing mongngo hadzing ogea yoac imoc edeu tofocnac mongngo tofocnac ogea imoc dedekeragi ammiude. <sup>3</sup> Yeni yoacngina ning kpeu yoac mong mi dedae, fora. Ngic mongngo ubaudumengngina mi negenude. <sup>4</sup> Nga ubaudumengngina imoc sifu bangectoa bangec, imohai kengkecede. Yeni yoacnginango bangec noboc noboc wisic wisickeau kendarude. Anutungo kurumenga kurumenga, imohai wenacac kporucbedzo mong faiu fede. <sup>5</sup> Ye memeturang ngic mongngo memeturang ama manaunac ubangeregcoc maande, ifi isoc haude. Wenac ye nedzi nedzi ngic kuhagocngo firang anudeac sogac sogaigoc nedziande, ifi isoc hama <sup>6</sup> kurumenga kurumenga tegia monnusing erema singa modacma kemebesonga tegia nobocsing ke-meude. Ye gerea yombong anu wiac mongngo yearu naric mi sufuude.

<sup>7</sup> KEBUAC dedeseri imoc gombunga amma ngicngac ubaonganina heigboriude. Amma KEBUNGO yoac dekeragi nemmeude, imoc fora yombong amma ngic negen negentegecac obohoande, ye negen negentegec meficgemiude. <sup>8</sup> KEBUAC dederecgeyoac imoc dindingac amma sogac sogai hereninai meficgenemmeude. Amma KEBUAC nonoyoac imoc kongaha amma kicnina mekperagiude. <sup>9</sup> KEBUAC ewehaiheigoc kecec imoc kongaha

\* **18:46:** Anutungo meficnunu nenang bangecngicngacnec yumia kecma Anutuac kenecyoac debisina, yoac imoc mitikibi homac fede nga yeng faka imocac negenu ngereeu. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

amma feengkefude. Nga KEBUNGO dederecgeyoac modacnideac faiec, imoc seria amma dindingac. <sup>10</sup> Imoc gol ferahama gol tegeng momoc ferahaude. Amma imoc kukundzau songea ferahama songea yombong ande. Imoc kukundzau kpedzucneandimbe, imoc ferahayombonggeude. <sup>11</sup> Dederecgeyoacgango kingang ngicga goroya kpeu ye imoc modackefu, imocngo ubangerec wiac engena miude.

<sup>12</sup> Ngic yengenaocngoc isingemema kopocsiha naric mi hentegerude, kpac. Kebu, ge kopocsicna sufu sufuya wana. <sup>13</sup> Ni, kingang ngicgango kopocsicfaka goa yofi negemma mekecbai, “Faka imoc songea andeac angkecbadenoc.” Ni ifi amba geng sinna hedzickena kopocsinggo mi garenubeso. Ge ifi anna ni kopocsic mong mi meficgebade nga singyoac kpema faka mangana mi ambade. <sup>14</sup> Nga enacbibicnaunac yoac nga negen negeng herenau fede, imoc negenna ngerebeso.

O KEBU, gennoc neac hoc peperandzi seria nga ge bummenuma ebicfunac mesinunec.

## 20

### *Ngictau kerec nadzicmiec*

Yegecgareng yearu. Dawidingo mitiyegec yofi heiec.

<sup>1</sup> KEBUNGO ebicnasou yoacgaac turunga merenggembeso. Yakoboac Anutu, yeac kpac kunenggo ge onggonggubeso. <sup>2</sup> Yeng womongaunac memefic suegenu Siong tikiunac heimefic anggema mang anggembeso. <sup>3</sup> Ge sese mema faiannec, yeng imoc sasawa negenu febeso nga sesegerecga ohoannec, imocac negenu ngerebeso. *Selac*

<sup>4</sup> Ge wiac monggac heresongoga anu ye wiac imoc gembeso nga geng areng sasawa faina yeng imocac fora meficgegembeso. <sup>5</sup> Ge firang andanggac ubangerec arohoma sogac sogai ambisina. Nenang Anutuninaac kpacfu firanggac ma kpedzini embeso. KEBUNGO kpesi kpesiga sasawa negemma foraya meficgebese.

<sup>6</sup> KEBUNGO ngictau meisinggema kerec nadzicmiec, ye ebicfunac mesiude, imoc yaguc negenduae. Ye kpetiac kurumengaunac yeac nunumuac turunga meremmima marifoianggo faka kucgoc mema ye ebicfunac mesiu firang anude.

<sup>7</sup> Ngic goa yeni dzikacac keretac negenggec wiac engena anu yoac homac osogecde. Nga goa yeni becosiac negenggec wiac engena anu yoac homac osogecde. Nga nenang KEBU Anutuninaac kpac kuneng negenserima negenni wiac engena ande. <sup>8</sup> Yeni kucngina kpac anu fafocnginango heima mayunuude. Nga nenang yacma hongngoc serima nannide.

<sup>9</sup> O KEBU, ge ngictau meficgena firang ambeso. Neni kpacguni geng turunga merennemmena.

## 21

### *Ngictaungo firang ande*

Yegecgareng yearu. Dawidingo mitiyegec yofi heiec.

<sup>1</sup> O KEBU, ge kucgagoc, imocac ngictau ye geac ubangerec negenude. Nga geng ye meficgekecneac ye firang amma homac yombong sogaima kecde.

<sup>2</sup> Hereau songo feec, ge imoc meficgemidang nga enacbihango wiacac kpesigenu ge imoc sasawa mima mong mi wadang. *Selac*

<sup>3</sup> Geng ye heitaima kenecgaac finactoa mima ngictau ira gol tegengo memea oruhau fainec. <sup>4</sup> Ye kekecac kpesigenu geng kekec mina nasoya nasoya fekungkefude. <sup>5</sup> Nga ge mefickena ye firang amma feracyunuma kuc nga kibikperagitoagoc ande. Ge ngickunenggac kuc nga kibikperagi mina ye kunengngina fekefude. <sup>6</sup> O, kenecgango yegoc nasosoc feengkefude. Ge yegoc kecnecac ye ubangerec negemma sogaima kefude. <sup>7</sup> Ngictau ye KEBU negenserima kecde. Kebu Engenatoango yoc dedzege amma imoc modacma kecandec wiac mongngo ngictau meu goroc goroc naric mi anude.

<sup>8</sup> Ge marigango ngabafocga mendangyununade nga marifoigango ngic geac modzongina tiande, yeni meyunuude. <sup>9</sup> Ge didi fingctegecnade, naso imohai ngaba yeni ngic gerecfu manganeandae, ifi isoc kecgec gerecgango yonohoude. KEBUNGO herebu amma gbokoyunuu gerecnge yonohou kpac anggecde. <sup>10</sup> Ge yeneac esafocngina kpetotieyunuma bangecfunac meicyununade. Amma ge yeneac gborifocngina ngic medacfocngina botucngin-aunac meicyununa kpac anggecde.

<sup>11</sup> Yeni mangana arenggema gubeso amma ge tobanggugecdeac sing mengeregecdeu uangina imoc naric mi fingerude. <sup>12</sup> Ge tebega kicnginau kpesaina yeni dzigenema ngadeguma woragecde.

<sup>13</sup> O KEBU kuctoagagoc, neni afeguma kuctoaga afehema yegec heinide.

## 22

### *Ge nocac wanudang*

Yegecgareng yearu. Yegec yomoc yegec mong kpara Asoacac kebesec, imocac uba modacma heibesonga. Dawidingo mitiyegec yofi heiec.

<sup>1</sup> Anutuna, Anutuna, ge ngadenuma wanudang, imoc naric mi ande. Ge neac hereau yombong kecma ebicfunac mi mesinunec, imoc mi ngereede. Ni asoring anenu kiacha ge nocac hereau namma yoacna mi negennec, ifi isoc ande. <sup>2</sup> O Anutuna, ni hadzing tofocnac kiacha turunga mi merennec, ni waickema mong mi kecbade.

<sup>3</sup> Ge kpetiac, imoc fora. Israe neneng erienzong megenni, imocngo ngictau tatacga anude.

<sup>4</sup> Bangecfocnina yeni warac negenseriguma kecgec. O, yeneng negenserigugec geng ebicfunac mesiyununec. <sup>5</sup> Yeni kpacgugec geng ebicfunac mesiyununec. Yeni negenseriguma seria nanggec ubangina kuha mi maec.

<sup>6</sup> Anu ni ngic kpac, ni gususac. Ngic yeneng desofoc anenggec ngicngac yeni neac modzongina tide. <sup>7</sup> Ngicngac sasawa yeni nemma detenec anemma nedzarang sinenemma orucngina kpatitickenemma yofi dedae, <sup>8</sup> “Ge ebicga KEBUAC mariu fainecac yeng ebicfunac mesigubeso. Ye geac songo negendeac ebicfunac mesigubeso.”

<sup>9</sup> KEBU gennoc nonggo heremanaunac menuna fingeacma sabacfu neng-gacnaac namu nema febareng geng garennumana ruaegoc fekefai. <sup>10</sup> Ni fingeraiunacngoc geac hoannu fainugec geac anai. Ni nonggo heremanau tachbareng kecma yaguc ge Anutuna kecnec. <sup>11</sup> Ebicngo mewegenenuu mongngo mi meficnuudeac geng neac hereau mi kecbesena.

<sup>12</sup> Burumaka ngiwa homacngo oronnuma nandae. Basanggac burumaka ngiwa kucnginagocngo oronnuma nandae. <sup>13</sup> Yeni mewegenenuma enacngina anggedae. Raiong yangtoa soringina nga enacnginango wiac mong merecgegecdeac kucgoc yombong arohoandae, yeni ifi isoc andae.

<sup>14</sup> Ngicngac yeneng doku bokonnunac kpakeandae, yeni ifi isoc ni kpak-enugec kerengaiba sicna dzuhura sasawa fotockedacdac. Ni ubaherena kendokereha isoc amma herena manau sisingaima doku doku ande.

<sup>15</sup> Enang dzame dzameaac noboha kerenga fede, ni ifi isoc gbanggema kucna dzikema kpac andac. Nedzarannango kerengaima dumbennau mendanggeu ge homecac sendunnu fainuna feduae.

<sup>16</sup> Kasi yeneng oronnuma sinna tidzickecdae nga yarengic habunginagoc yeneng oronnuma nangkecdae. Yeni hanimarina nendangedau. <sup>17</sup> Sicna sasawa fingctegeru ni imoc osobadeacsoc anduae. Nga ngicngac yeneng kic nearu fiyomboggema ni ifi nemma negenggec ngereede. <sup>18</sup> Yeni wambana botucnginau mederema ngakpina merang meudeac kpeing kpedae.

<sup>19</sup> O KEBU, ge neac hereau mi kecna. O, neac memeficngic, ge bic hama meficnuna. <sup>20</sup> Ge hama dzikacac beang, imohacnac mesinuna nga kekecna kasi yeneac kucfunac meickena. <sup>21</sup> Ge raiong yangtoaac enacfunac mesinuna. O, geng kpacna negemma ubaongana ubaebicgoc kecde, imoc kate burumakaac baicfunac onggonggenecac <sup>22</sup> ni munafocna geac kpac kuneng dekperagiyemema kpebung botucnginau namma ge erienzong megembade.

<sup>23</sup> Ngicngac KEBU ewea heiandae, ngeni ye erienzong memibisia. Nga Yakoboac gboricfora sasawa, ngeni ye afehebisia. Nga Israeac gboricfora sasawa, ngeni hemma yeac negenggec engena andeac kicngina yearu fima afehema nambisia. <sup>24</sup> Ye ngic kpendzengagoc hemma kpendzengetoaac amma ye mi ngadeheec nga ubango mi waec. Ye kicmesuya yearunac mi mesufuec nga kiaru yeng kiara negeneac. <sup>25</sup> Geng oyang boyang ubanau faina ni habutoa yeneac botucfu namma ge erienzong megembade. Nga ngic geac ewega heiandae, yeneac kicfu namma dedeserinaac turung kpoudacbade.

<sup>26</sup> Ngicngac makpekpea yeni nema gebecyunuude nga ngicngac KEBU hofocandae, yeneng ye dengeregecde. O, ngeni herengina nasoya nasoya fekecheso. <sup>27</sup> Bangec tegiaunac ngiha ngiha yeneng yeac negemma ubangina dzigeneu KEBUARU kenggecde. Nga ngiha ngiha yeni sasawango tosofocnginagoc hama yeac kicfu ngonducnema numumigece. <sup>28</sup> KEBU, kuc minginango bangec monnunac ngicngac garengyunuude.

<sup>29</sup> O, bangecac ngicngac yeni yenangac ngenggec wiac engena ande, yeni sasawango yeac kicfu ngonducnegecde. Yeni sasawango yeac kicfu ngonducnema bangecfu sendunnu kenggecde. Ngic yeni kekecngina garenggegecdeacsoc mi amma homedacgecde, yeni yeac kicfu ngonducnegecde. <sup>30</sup> Bangecfocngina ngade hagecde, yeneng kingang kpeimgieci. Ngicareng ngade fingecgecde, yenemma Kebuac kpacsiduc dekperagiyem-megec negenggecde. <sup>31</sup> Yeneng yeac fakaya dindingac, imoc ngicngac areng ngade fingecgecde, yeni edeyunugecde. Ye uaya ifi mesiec, imoc edeyunugecde.

## 23

### *Ramagareng gombunga*

Dawidingo mitiyegec yofi heiec.

<sup>1</sup> KEBU ye neac gareng. Ramagarengngo ramafora garengyunuande, ye ifi isoc nenggareng anenu wiac monggac naric mi obohobade. <sup>2</sup> Ye maneng kpinzing sabayagoc fede, ihai fainuu febade nga doku tegiau hesicnuu

ruaegoc kecnegeng ambade. <sup>3</sup>Ye ubaongana mengerema kuc gboria mong-goc nenude. Amma ye yengena kparaac amma sing dindingacfu hesicnuu imohai kengkecbade.

<sup>4</sup>Nga ni homecac kperemennu kemema kundung kundunnu kembadeu wiac mangana fingeru imocngo kengec naric mi meficgenenude, nocac Kebu gennoc nigoc kecnec. Geac dzikac nga yasungo meserinuecde.

<sup>5</sup>Ge ngabafocna kicnginau yombong yakana mengerena neba kerec-dokungo orucnau nadzicnenna sebinango ireckeude. Ge neac kpakenece mewakeyombonggena tosea ngadeau maude. <sup>6</sup>Ge faka gombunga anennade. Foracngoc, geng yoac dedzege amma imoc modackecnecc nga fakaga imocngo hesicnuma kekecnaac uameme sasawau hesicnungacngoc.

Nga ni KEBUAC amau erema ihai nasoya nasoya kecnengkecbade.

## 24

### *Kuc nga kibikperagiaac ngictau*

Dawidingo mitiyegec yofi heiec.

<sup>1</sup>Bangeha bangeha nga wiac sasawa bangecfu fede, imoc KEBUAC. Bangectoa bangec nga ngiha ngiha imocac witiau kecdae, yeni sasawa yeac.

<sup>2</sup>Yennoc bangec meficgema imoc kondungdoku nga dokutoa witinginau faiu seria fede.

<sup>3</sup>Ngic merang KEBUAC tikiu naric enude nga merang yeac ama kpetiacfu naric nanude? <sup>4</sup>Mong ye maria nga herea kongaha kecande nga nemuonga mi afeheude amma ikoc mi amma yoac mong mi deserima deude, <sup>5</sup>ye ifi kecmanu KEBUNGO ye keneheu Anutu ebicfunac mesimesi minginango ye ngic dindingac demiude. <sup>6</sup>Ngicareng Anutu hofocandae, yeni siricngina ifi. Yeni Yakoboac Anutu, yeac kicfu nambeso ayemmede. *Selac*

<sup>7</sup>Nagutoa ngeni hereema witigec. Nagu feengkecdae, ngeni kuc nga kibikperagiaac ngictaungo ereudeac hereema kunengngoc witigec. <sup>8</sup>Nga kuc nga kibikperagiaac ngictau imoc merac? Ye KEBU kuctoa mingina amma KEBU yennoc dzikacfu firang angkecde.

<sup>9</sup>Nagutoa ngeni hereema witigec. Nagu feengkecdae, ngeni kuc nga kibikperagiaac ngictaungo ereudeac hereema kunengngoc witigec. <sup>10</sup>Nga kuc nga kibikperagiaac ngictau imoc merac? Ye KEBU wasai habuya habuya yeneac kunengngina, yennoc kuc nga kibikperagiaac ngictau. *Selac*

## 25

### *Ge kopocsicna nigecgubeso*

Dawidingo yegec yofi heiec.

<sup>1</sup>OKEBUNA, ubaongana miacma gearu faiba hade. <sup>2</sup>O Anutuna, ni negenseriguma kecduae. Ngic yeneng game kpekpeu fainubauac geng kpae heiyemmebesena. Ngabafocna yeneng ebicnaac sogaima dedzomoc anembauac kpae heiyemmebesena. <sup>3</sup>Oc, ngic mong ye ge negensingguma tomai kefu yeneng desofoc ammibauac kpae heiyemmebesena. Nga ngicngac goa ikoc ayemmegecdeac areng faiandae, yeni ine game kpekpeu faiyunubesena.

<sup>4</sup>O KEBU, ge singga edzacnuma hanisingga kpounenna. <sup>5</sup>Anutu ge neac ebicfunac mesi mesingic. Ge imocac yoacga forau hesicnuma faka fora edekpou anenna. Ni asoac kemma marai geac tomai kecduae.

<sup>6</sup> O KEBU, ge wosoefacgagoc nga geng yoac dedzege amma imoc modackecnec, imocnoc hanac hanaheaunacngoc feec amma fehakecde, imoc negensina. <sup>7</sup> O KEBU, ge gombunga. Amma yoac dedzege amma imoc modackecnec, imocac neac negenna febeso. Ni ngicmedac kecma singyoac kpekecma kopocsic meficgeai, ge imoc ine mi negenna febeso.

<sup>8</sup> KEBU ye gombunga, ye dindingac yombong. Ye imocac ngicngac kopocsicgoc kecdae, yeni yengena sing edekpou ayemmeude. <sup>9</sup> Ye ngicngac yumia faka dindingac modacma hesicyunuma yengena sing edekpou ayemmeude.

<sup>10</sup> Ngicngac KEBUAC dzadzahac nga dedekperagiyoac modacandae, yeni KEBU hemma yofi negenggecde, ye yoac modac modac Kebu. Amma ye yoac dedzege amma imoc modackefude. <sup>11</sup> O KEBU, ni kopocsic ebira yombong meficgeaiac kpac kunenggaac amma imoc sifu wana. <sup>12</sup> Ngic mong ye KEBUAC ewea heikecde, ngic ifia ye merak? KEBUNGO yenoc sing edekpou ammiu ngic ye sing imoc meisinggema modacbeso. <sup>13</sup> Amma ngic imoc ye kekeha ngereeu wiac monggac mi obohoute nga yeac esamedacfora yeni maridzoming dema bangec mema mingina anggecde. <sup>14</sup> Nga ngic KEBUAC ewea heikecdae, yeneng yeac ogofora anggecde. Ye yengena dzadzahac dekperagiyemmu yeni imoc negentegecgecde.

<sup>15</sup> KEBUNGO hanina ufcifunac mesiudeac meficnuudeac negeung amma kicna nasosoc yearu fikecbade. <sup>16</sup> KEBU, ni tembucna amma ebicgoc kecduaeac neacnec wosoefac anemma dzigenema nearu monggoc hana. <sup>17</sup> Ni ebicna herenau fede, imoc monggoc yadide. Ge ubaebicfunac mesinuma ebicna sasawa meickena. <sup>18</sup> Ge kpendzenna nga hereebicna negensima kopocsicna wadacna. <sup>19</sup> Neac ngabangic yeni homac amma yeni ngaba-toanganngoc amma ngadenuandae, imoc negensina.

<sup>20</sup> O, ni geac hoannu hama sufubadeac kekecna onggonggema ebicfunac mesinuna. Nga ngic yeneng desofoc anembauac ge kpae heiyemmesesena.

<sup>21</sup> Ni geac tomai kecduaeac dindingac kecma kopocsic mong mi meficgeanduae amma ikoc nga hamangecna kpac kecanduaeac faka imocngo ongonnubeso.

<sup>22</sup> O Anutu, ge Israe ngicngac bummenunuma ebicfunac mesinunudacna.

## 26

### *Ge yoacfu neac yoac dena*

Dawidingo yegec yofi heiec.

<sup>1</sup> O KEBU, ni dindingac kecma kopocsic mong mi meficgeaiac nanggenuna yoacfu firang ambesare. Ni seria namma KEBU negenserima kecanduae.

<sup>2</sup> O KEBU, geng faitobannu fainuma kekecna isinggema ubaherena ifingoc isinggema henna.

<sup>3</sup> Ge yoac dedzege amma imoc modackecnec, imoc hemma geac yoac tofohoma kecbade. <sup>4</sup> Ni ikocngic yenigoc naric mi kecbade nga ngic manganangina gombunga bageau mesufuandae, yenigoc naric mi kecbade. <sup>5</sup> Ni yarengic yenigoc naric mi kecbade nga ngic Anutu ngadehema mangana megecdeac ayemmeande, yenigoc naric mi tacbade.

<sup>6</sup> O KEBU, ni kopocsic mong mi meficgema marina dzuacba kongac kpeu arataga wegenacfu yerecgebade. <sup>7</sup> Ni ubana miacma ubangerec megemma kucfakaga wiac engena negemma dekperagiba negenggecde. <sup>8</sup> O KEBU, ge amagerecgau kuc nga kibikperagigagoc kecnec, ama imocac songo negenduae.



<sup>9</sup> Ge kopocsicmeme meicyununade, naso imohai ni yenigoc mi meicnuna. Nga ngic goa yeneng ngicngac ogofocngina yeneac sac hetinggegedecdeac ayemmeande, ge meicyunuma neac kekec yenigoc mi meickebesena. <sup>10</sup> Ngic imoc yeni maringinau yarefaka anggedecdeac wiac megedce nga marifoinginau hiedzo mema benukerere faka megeg wakeude. <sup>11</sup> Ni neannaoc dindingac kecma kopocsic mong mi meficgekefai. Ge imocac wosoefac anemma ebicfunac mesinuna.

<sup>12</sup> Haninango bangec sorongau tima nambade nga habutoa yeneac kicfu KEBU kenehebade.\*

## 27

### *Kebu ye kperagi nga memefic*

Dawidingo yegec yofi heiec.

<sup>1</sup> KEBU ye neac kperagi nga memengerec, ni wiac monggac kengec naric mi ambade. Ye sufu sufuamana amma ye kekecna onggonggema kecdeac monggac kengec mi ambade. <sup>2</sup> Yarengic yeneng wegenac hama gbokocnubesonga andae amma ngabafocna ogofocnginagoc wegenac hama tifainggema mayunuude. <sup>3</sup> Wasai ngic habutoagoc hama nugecdeac bedzongina mema oronnugecdeu ni naric mi kengecnuude. Yeni nugecdeac dzikac kpegedceu ni negengyohocna kpac kecma seria nambade.

<sup>4</sup> Ni wiac mocgu imocac KEBU numumima dekpesi ammima imoc hofockecduae, imoc yofi, ni KEBUAC amau nasosoc tacyac amba kekecna-sona wisickebeso. Ni yeac siraha gombunga yombong, imoc hemma yeac womonnu ye hembadeac anende. <sup>5</sup> Ye ebicnasou yengena oda manau onggonnuude. Ye kporuchedzoyau mesufunuma wi hoc peperandzi seriau fainuu gombunga kecbade.

<sup>6</sup> Ye orucna miaru ngabafocna oronnudae, yeni feracyunuma wi namma yenembade. Ni sogaima ubangerec negemma Anutu womongau sese faima-soga socgogaiac yegec heima KEBU yaiyo kpemibade.

<sup>7</sup> O KEBU, ni kunengngoc kiacha ge negennemma neac ubaga manganau turunga merennenna. <sup>8</sup> Geng yofi denec, “Ge neac kicmesu hennadeac anggembeso.” Ge ifi dena herenango meremma dede, “O KEBU, ni geac kicmesuga hembeso anende.” <sup>9</sup> O Anutu, ge ebicfunac mesinunade nga ni geac kingang ngicga. Ge kicmesuga nearunac mi mesufuna nga ngaba amma mi meicnuna. Ge meficnukecnecac mi ukununa. Ge ni mi ngadenuma wanuna.

<sup>10</sup> Nonggo manna yereng ngadenuma wanuec KEBUNGO ine heitainuma nenggareng anenude. <sup>11</sup> O KEBU, ngabafocna memanubeso ayemmedeac singga kpounemma sing sorongau hesicnuma kenna. <sup>12</sup> Ngic goa yeni enacnginaunac yareasu ereande, yeni yoacfu yacma neac yoac ikoha degedce. Ge yeneac songo mi modacna nga yeneac mariu mi fainuna. <sup>13</sup> Ni ngicngac gbori kecdae, yeneac bangecfu KEBUAC kekec nga angammeme gombunga hembade, imoc negensingeduae.

<sup>14</sup> Ge KEBUAC tomai kecma seria nambesena. Heregango efaima kucgoc ambeso. Oc, ge KEBUAC tomai kecbesena.

\* **26:12:** Anutungo meficnunuun nanang bangecngicngacnec yumia kecma Anutuac kenecyoac debisina, yoac imoc mitikibiui homac fede nga yeng faka imocac negenu ngereeu. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)



## 28

*Neac peperandzi seria*

Dawidingo yegec yofi heiec.

<sup>1</sup> O KEBU, ge neac hoc peperandzi seria, ni kpacguduae. Ge kedzacga mi kpefonggena. Ge yoacga waickenadeu ni ngic homecamau kendae, yeni isoc ambade. <sup>2</sup> Ni kpesi kpesi gearu hama kiachba ge ubaudumenna negenna. Ni kicna kpetiac womonggaugeng fima marina miachba geng meficnunadeac numubade.

<sup>3</sup> Ngic Anutu ngadehema mangana megecdeac ayemmeande nga yarengic amma ngic enacnginango ruae dema herenginango ine tobangyunugecdeac mangana arengeandae, meicyunnade, imohai ni yenigoc mi meicnuna.

<sup>4</sup> Yeni fakangina mangana anggec nga megec, imocac turunga merengyemena. Nga yeni mangana maringinango megec, ge imocac siricfu turunga yemena. <sup>5</sup> KEBUNGO ua mekecde nga mariango wiac meficgekecde, yeni imoc hemma wama mi negensiandaeac yeng kpedzameyunuma monggoc mi nanggeyunuude.

<sup>6</sup> KEBUNGO neac kiac udumeng negendacac kenehebade.\* <sup>7</sup> KEBU ye kucna nga kasona anu herenango ye negenserima kefude. Ye meficnuu herenango sogaiu ubangerecac yegec heimibade.

<sup>8</sup> KEBU ye ngicngacfora yeneac kucngina. Ye ngiha meisinggema kerec nadzimima yeac sufu sufaamea amma ebicfunac mesiude. <sup>9</sup> O, ge ngicngacfocga ebicfunac mesiyununa amma maridzoming ngicngacfocga andae, yeni kenecyunuma yenenggareng ayemmema nasoya nasoya tofoyunubesena.

## 29

*Anutuac kpakpac didiu fingejde*

Dawidingo yegec yofi heiec.

<sup>1</sup> O, anutu hania hania yeneac medacfocongina kucnginagoc kurumennu kecdae, ngeni KEBU erienzong memibisia. Amma ngeni KEBUAC kuc kibikperagiagoc negensima ewehihehei ammibisia. <sup>2</sup> Ngeni KEBUAC kpara ewehiheigoc heiwayong memibisia. KEBU ye kpetiac, imocac ngeni ngonducnema numumibisia.

<sup>3</sup> KEBUAC ubaudumeng imoc doku witinginau fingerude. Anutu kuc nga kibikperagia minginango kondungtoa witiau gbururung amma heiude.

<sup>4</sup> KEBUAC ubaudumeng imoc kuhagoc yombong. KEBUAC ubaudumeng imoc ngictauac ubaudumeng ande. <sup>5</sup> KEBUAC ubaudumengngo yomondzoc ic kpetackeude. KEBUNGO Rebanong bangecac yomondzoc ic kpedzameyunuude. <sup>6</sup> Yeng Rebanong bangec yoac edeu ye burumaka medaha isoc yuude nga Siriong bangec ye burumaka ngiwa isoc yuude.

<sup>7</sup> KEBUAC ubaudumengngo gerechorang meficgema ukuyunuu singsararang kpegecde. <sup>8</sup> KEBUAC ubaudumengngo bangec kisiu fingeru imocngo dzonoma fedeude. KEBUNGO Kadesi bangec kisi kpemindaheude. <sup>9</sup> KEBUAC ubaudumengngo kateburumaka yoac edeyunuu medacfocongina fingegecde. Yeng ic maria kpemorongedarude.

\* **28:6:** Anutungo meficnunuun nanang bangecngicngacnec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeu. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

Yeaç womonnu yofi dema arohodacgecde, “KEBU ewehelheiaogoc dengereni.”

<sup>10</sup> KEBUNGO ngictau tatahau dokutunggbaung witiau tacde. Ye ngictau tatacfa tacma ngictau nasosoc kecengkefude. <sup>11</sup> KEBUNGO ngicngacfora kuc nemmema kenecnunuu ruaegoc kecbisina.

## 30

### *Kebu ye gombunga*

Dawidingo womong desi desinasoac mitiyegec yofi heiec.

<sup>1</sup> KEBU ge keme kemeaunac tainuna ereduac afegubade. Geng ngabafocna kpaè heiyemmena yeneng neac amma ubangerec mi meficgebisia.

<sup>2</sup> O KEBU, Anutuna, ni gearu memefiac kiacma numuba geng mengerenunec. <sup>3</sup> O KEBU, ge homec amaunac menunec. Nga tennu keme kemeac arennu tacbareng geng menuma kekecna homecfa kemegecde, yeneac arenunac mesinunec.

<sup>4</sup> O, KEBUAC ngicngac kpetiac, ngeni ye dengerema yegec heibisia. Ngeni yeac kpara kpetiac heiwayong memibisia. <sup>5</sup> Ye ngabaya naso wegenanec mekefude nga fakaya gombunga imoc kekecninau sasawa fekefudengoc. Ge tofocnac kiacade nga asoac sogac sogai meficgenade. <sup>6</sup> Ni naric kecma wiac monggac mi obohoai, imohai yofi deai, “Ni seria nanduaeac wiac monggongoc mi goroc goroc naric mi ambade.” <sup>7</sup> Nga ge kicga nearu sufuna ine kengecngoc memanuec. O KEBU, gennoc faka gombunga anemma tatacnau fainuna tiki seria isoc seria yombong nanai. <sup>8</sup> O KEBU, ni kpacguma kpesi kpesi amba negennennadeac yofi numugenai,

<sup>9</sup> “KEBU, ni homema homecamau kemebadeu wiac mong naric mi gembac. Bangecac sendungngoc ge naric mi dengereguude nga ge yoac modac modac Kebu, imoc naric mi dekperagiude. <sup>10</sup> O KEBU, geng negennemamma ubamanggang anenna, o KEBU, ge meficnuna.”

<sup>11</sup> Geng ubaebicna heimerenna yegec fededuae nga songgonggac wamba heikefai, ge imoc meickema sogac sogaiac wamba heinenna kemeec. <sup>12</sup> Ge ifi anna ni waicke monggoc mi kecbade. Herenango yegec heima ewehelheigoc afegubade, o KEBU, Anutuna, ni nasoya nasoya ge erienzong megembade.

## 31

### *Ruae meficgenide*

Yegecgareng yearu. Dawidingo yegec yofi heiec.

<sup>1</sup> O KEBU, ni gearu hama sufubeso anduae. Ngicngac yeneng game kpekpeu fainubauac kpaè heiyemmedacna. Ge dindigac, imocac ebicfunac mesinuna. <sup>2</sup> Ge kedzacga nearu faima nearu bic hama ebicfunac mesinuna. Ge neac hoc peperandzi seria anna imohai hama sufubade. Ge amana seria amma ebicfunac mesinubesena.

<sup>3</sup> Foranoc, ge neac hoc peperandzi nga amana seria. Ge kpac kunenggaac amma hesicnuma singga edzacnuna. <sup>4</sup> Ge neac sufu sufuama annecac ngic yeni ufc sufu sufuu faigec mendannuu, geng imohacnac yungecnuna. <sup>5</sup> Ni asuna marigau faiduae. O KEBU, yoac modac modac Anutuna, geng bummenuma ebicfunac mesinunec.

<sup>6</sup> Ngicngac yeneng nemuonga ikocnginagoc hoangyunuma ewehelheiyemmeandae, ni ine yeni ubango wayunuma KEBU negenserima kecbade.

<sup>7</sup> Geng kpendzenna hengkecnec nga geng yoac dedzege amma imoc modackecnec, imocac ubangerec negemma sogaiabade. <sup>8</sup> Ge ngabafocna yeneac mariu mi fainuma sawea homac meficgenenna haninango naric tima nam-bade.

<sup>9</sup> O KEBU, ni ubaebicgoc kecduaeac amma ge neac ubaga manganau. Ni ubahodunnagoc kecha kicna ngopic ande nga ongasebinango undzang kpema kecduae.

<sup>10</sup> Kekecna ubahodunggoc kefai nga asoringa anenu kifana kengkefec. Ni ngicngac memanganeyunukefaiac amma kucna kpac anu sicnango kucmama amma kpac ambeso ande.

<sup>11</sup> Ngabafocna sasawa yeneng desofoc anenggecde. Nga ngicngac nigoc wegenac kecandae, yeni neac modzongina tiu wanugec ogofocna yeneng sinnu meficnuma nemma woragecde. <sup>12</sup> Ngic ogofocngina homegec ngicngac yeneng yeneac nigecyunuande, yeni ifi isoc neac nigecyunuec. Enang mong tohou ngic yeneng imoc ukuandae, ni ifi isoc anduae.

<sup>13</sup> Ngicngac homacngo neac dengunuc kpengunuc anengkecdae imoc negenduae. Ni noboc noboc kemma kengectoa amma kpidohoba yeni nugecdeac yoac dedzege amma kpebucnugecdeac yoac dzegedae.

<sup>14</sup> O KEBU, ni negenseriguma yoac yofi deba, "Ge Anutuna." <sup>15</sup> Neac naso imoc geac mariu fede. Ge ngabafocna nukporac anendae, yeneac mariunac mesinuna. <sup>16</sup> Ni geac kingang ngicga, imocac kicmesugango nerarannuna. Geng yoac dedzege amma imoc modackecnecac ebicfunac mesinuna.

<sup>17</sup> O KEBU, ni kpacguduaeac negennenna. Ngaba yeneng game kpekpeu fainubauac ge kpae heiyemmena. Ngic Anutu ngadehema mangana megecdeac ayemmeande, yeni ine game kpekpeu faiyunubesonga nga yeni yoacngina kpac amma homecamau kemebisia. <sup>18</sup> Nga ngicngac enacbibicnginango ikoc angandae, ge yeneac enac medzickena. Ngic yeni yenanaggac negenggec engena anu ngic ogofocngina dindinga ngadeyunuma yeneac ubakpekpeyoac deandae, ge ngic imoc yeneac enac medzickena.

<sup>19</sup> Ngicngac ge ewehelhei anggenda, yeni gombangagango garengyunuannec. Nga ngicngac neneng geac hoannu hama sufuni geng ngicngac sasawa yeneac kicfu gombangaga meficnununade, fakaga gombangua imoc homac yombong kpac. <sup>20</sup> Ge kasonina anna ngicngac yeneng memanganenunugecdeac arenggegec geng mesufununuannec. Ge kasonina amma hoangnununa ngic mangana yeneac yoac manganango naric mi memanganenunuude.

<sup>21</sup> KEBU kenehebesonga. Ngaba yeneng taongtoa hedzickeandae, yeni ifi isoc sinna hedzikegec imohai Kebu yoac dedzege amma imoc modackecde, yeng wiac engena mema garennuec. <sup>22</sup> Foracngoc, ni kengec amma yofi deai, "Yeni kicgaunac meicnuma hereau fainugec." Nga ni kpesi kpesi amma meficnunadeac kiacha gennoc kiacna negennec.

<sup>23</sup> KEBUAC kpetiac ngicngac sasawa, ngeni ye songogoc hoanggebisia. Yeng ngicngac yeac yoac modacandae, yeni onggongyunuude. Ngic yeni yenangac negenggec wiac engena anu angammeme hania hania angandae, imohai yeng turunga mangana efea kpac merengyemmeude.

<sup>24</sup> KEBUAC tomiai kecandae, ngeni herengina meserima serima nandacbisia.

## 32

### *Kopocsic defic deficge*

Yegec yomoc masiki uba modacma heibesonga. Dawidingo yegec yofi heiec.

<sup>1</sup> Ngic mong ye singyoac kpeu Kebungo ebiha wamima kopocsihaac ebic semeec, ye kenehagoc. <sup>2</sup> Ngic mong ye ngicngac ogofora memanganeyunuu KEBUNGO kopocsiha wau kpac andac deande nga ngic mong ye asuyau ikoc mong mi fede, ngic imoc ye kenehagoc.

<sup>3</sup> Ni kopocsicna mi deficgema waba feu asoacnac kemma marai asoringa anenu mi wisickemanu kecbare sebina kpac ambeso anec. Wenac nasou wiac kerenga amma moronggeande, ni kucna ifi isoc kpac anec. <sup>4</sup> Ge marigango hadzing toforec merandzinukecneac wenacngo kpeu bangec gbanggeande, kucna ifi isoc gbanggema kpac ambeso anec. *Selac*

<sup>5</sup> Anu ni kopocsicna gearu deficgeai. Ni kopocsicna mi semema yofi deai, “Ni singyoac kpekefai, imoc KEBUARU deficgebade.” ifi deba geng kopocsicna wama ubamanganna meickena kpac anec. *Selac*

<sup>6</sup> Anutuac enac tofoc tofohongic yeni ebic fingecyemmu yeneng gearu numubisia. Numugec ebic kuneng me doku tunggbaungngo naric mi kpesereyunuude. <sup>7</sup> Ge neac sufu sufuama. Ebicngo memanubeso anu geng ongonnuna ebicngo naric mi memanganenuu geng sogac sogaiac aro kunengngo oronnunade. *Selac*

<sup>8</sup> KEBUNGO deec, “Ge singga tinade, imoc edekpou anggema, imoc modacbesena. Kicnango modacguma dederecgeyoac anggembade.

<sup>9</sup> Becosic nga donggi yeni negen negengngina kpac kecdae. Ge yeni isoc mi ambesena. Yeni dumbengnginau witic kpna kemu, imohai yoacga modacgede nga witiha kpacngo geac wegenac naric mi hagecde.”

<sup>10</sup> Ngicngac Anutu ngadehema mangana megecdeac ayemmeande, yeni ebic homac meficgema mayunuude. Nga ngicngac yeni KEBU negenserima kegcac KEBUNGO yoac dedzege amma imoc modarude. Nga yeac faka imocngo orongyunuude.

<sup>11</sup> O ngicngac dindingac, ngeni sasawango sogaima KEBU dengerebisia. Ngicwiac herenginau ikoc nga hamangec mong mi fede, ngeni sasawango sogaima dendzerenggema arohobisia.

## 33

### *Dedengerecac yegec gboria*

<sup>1</sup> O ngicngac dindingac, ngeni KEBUAC amma sogaiabisia. Ngicngac ngeni ikoc nga hamangecngina kpac kecdae, ngeni ye eriendzong memigec ngereede. <sup>2</sup> Ngeni kurerengo KEBU dengerema gita witiha 10 kpema yeac musi gombunga kpebisia. <sup>3</sup> Ngeni yeac yegec gboria heimibisia. Ngeni gita mengerema kpegec musi gombunga fingeru dendzerenggema yegec heibisia.

<sup>4</sup> KEBUAC yoacfu ikoc nga hamangec mong mi fede, kpac. Ye yoac dema imoc modacma uaya sasawa mekecma mesiude. <sup>5</sup> KEBUNGO dindingac kecec nga sing dindingac modac modac fakaac songo negenude. KEBUNGO yoac dedzege amma imoc modackecde, yeac faka imocngo bangec sokoma fede. <sup>6</sup> KEBUNGO yoac dema kurumenga kurumenga meficyunuec. Ye enacasuyango wenac nga afo amma asomeng habutoanginagoc meficyunuec. <sup>7</sup> Ngicngac yeni doku kirunnu faiandae, yeng ifi isoc kondunggac doku kpedzucyunuu mocgu angcec amma kondung keme kemea dokungiagoc amangina mengerema tatacnginau faiyunuec.

<sup>8</sup> Bangectoa bangecngo KEBU ewea heimibeso nga bangectoa bangecac ngicngac, ngeni sasawango hemma yeac negenggec engena ambeso. <sup>9</sup> Yeng yoac enacngo deu wiac imoc fingerec. Nga fingecgec deu imohaingoc

wiac sasawa fingeedacma seria feec. <sup>10</sup> Bangec monnunac ngicngac Anutu mi negemmdae, yeneng negen negengngina arengegec KEBUNGO imoc meu kemma kpac anude. Nga ngiha ngiha yeneng ua mong mebesonga arengegec yeng singngina hedzickeu imoc naric mi megedce.

<sup>11</sup> Nga KEBUNGO wiac mong mebesonga negenude, wiac imocngo nasosoc fefeseri feengkefude. Yeac hereaac negen negeng, imongo fingecehahenina fekeddesoc, imohai feengkefude.

<sup>12</sup> Bangecareng mong yeni Anutungina KEBU yeni kenecnginagoc. Ye yengena areng meisingyunuu yeac maridzoming areng anggec.

<sup>13</sup> KEBUNGO kurumennunac kiwa fiu mau bangecngicngac sasawa yenen-darude. <sup>14</sup> Ye ngictau tatahau tacma kiwa bangecac ngicngac yenearu fima nenendacma <sup>15</sup> ngicngac neneac woubocninaac siriha dema meficgedaru faka angammemenina sasawa hennegeng anude.

<sup>16</sup> Ngictau ye yengena wasai ngichabu yeneac kucfu dzikacfu firang naric mi anude nga wasaingic ye yengena kucfu ngaba yeneac mariunac naric mi woraude. <sup>17</sup> Dzikacac becosiac kucfu dzikacfu firang angandae anu negen negeng imocngo fora mi ande. Nga becosic kuctoanginagocngo ngaba yeneac mariunac naric mi mesiyunugecde.

<sup>18</sup> Foracngoc, ngicngac yeneng KEBUAC ewea heiandae, Kebungo yeni kiwango yenenude. Yeng yoac dedzege amma imoc modackefude nga ngicngac yeneng imoc negensima fora fingerudeac tomai kecandae, ye kiwango yeninoc yenenude. <sup>19</sup> Yeng yengggareng ayemmema homecfunac mesiyunuude. Ye bodi nasou yakaac garengyunuu kegedce.

<sup>20</sup> KEBU ye memefic nga kasonina nga wiac fingerudeac ubaonganinango yeac tomai kecde. <sup>21</sup> Neni yeac kpara kpetiac negenserima kecnideac hereninango yearu sogaima kecde.

<sup>22</sup> O KEBU, geng yoac dedzege amma imoc modackecnecac hoannunubesen. Neni ge negensinguma tomai kecni fora fingecebeso.

## 34

### *Ebicfunac mesiec*

Dawidingo Abimerecac kicfu fingeema ikoc amma uba sufu sufungic isoc anu Abimerecngo ye kporaru mama worama yegec yofi heiec.

<sup>1</sup> Ni nasosoc KEBU keneheba,\* yeac dedengerecngo neac enacbibicfu nasosoc fekefude. <sup>2</sup> Ubaonganango KEBUAC negenu wiac engena anu ye dengereba. Ngicngac makpekpea yeneng imoc negemma sogaihisia. <sup>3</sup> O, ngeni nigoc KEBU kpac kuneng mima nenahafoc yeac kpac kuneng heiwayong memini.

<sup>4</sup> Ni KEBUNGO meficnuudeac ye hofocba yeng kengecna meickema ebicfunac mesinuc. <sup>5</sup> Ngicngac neni kicnina yearu fini sogac sogaiac kperagingo kicmesunina mekperagiu kperagigoc annide nga kicmesunina gameagoc amma saccac naric mi kpeude. <sup>6</sup> Ni ngic makpekpeango kiacha KEBUNGO neac kpakpac negemma ebicfunac mesinudarec.

<sup>7</sup> Ngicngac neneng Anutuac ewehaiheigoc kecni KEBUAC angerongo ebicfunac mesinunuudeac nenigoc kecma oronnuude.

\* **34:1:** Anutungo meficnunu nanang bangecngicngacnec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereude. (Fingec fingece 9:26, 14:20, 24:48, Mitiyegec 16:7, 26:12, 103:22 nga goa homac fede.)

<sup>8</sup> KEBU gombunga, ngeni imocnoc nehemma kicnginango hembisia. Ngic mong ye yeac hoannu kemma sufuma kecande, ye sogac sogaigoc kefude. <sup>9</sup> KEBU eweheihei ammiandae, yeni wiac monggac naric mi obohogecde. Imocac ngicngacfora kpetiac kecdae, ngeni ye eweheimima kecbisia. <sup>10</sup> Raiong yang gboria yeni yaka hofocma herenginaac homegecde, fora. Anu ngicngac KEBU hofocandae, yeni wiac gombunga monggac naric mi obohogecde.

<sup>11</sup> O nambarac, ngeni yei hama yoacna negembisia. Ni KEBUAC ewehei-heigoc kekec kpoungemmebade. <sup>12</sup> Ge kecnadeac anggendeu nga nasoga mehereema kekec gombunga kecnadeac anggendeu <sup>13</sup> ge nedzarangango yoac mangana mi debesena amma ge enacbibicgango ikocyoac mong mi debesena. <sup>14</sup> Ge yarefaka wama gombunga angekebesena amma ruaekec meficgenadeac anggenu imoc meficgenadeac uatoa mebesena.

<sup>15</sup> KEBUNGO kiwa ngicngac dindingac yenearu fima kedzac kpema ki-acngina negenude. <sup>16</sup> Ye yarengic yenemma meicyunuu bangecfu ngicngac ninigec meficgeyemmu yeneng monggoc mi negensiyunugecde. <sup>17</sup> Ngicngac dindingac yeni KEBUNGO meficyunuudeac kiacec yeng ki-acngina negemma ebicfunac mesiyunudarude. <sup>18</sup> Ngicngac ubamangang-gac wosongina toho yakecgec KEBUNGO yeneac wegenac kefude nga ngicngac asuu kpungge kpunggea kecdae, yeni ebicfunac mesiyunude. <sup>19</sup> Ngic dindingacngo kpendzeng kpekecde, imoc wiac homac yombong, nga KEBUNGO sifu ye ebicfunac mesidarude. <sup>20</sup> Ye sira gombunga garenggeu sira mongngo naric mi usuude.

<sup>21</sup> Ngic Anutu ngadehema mangana meudeac ammiande, ye yarefakaac wiac manganango kpebuageude. Nga ngicngac ngic dindingac ngaba ayam-meande, yeni yoacfu kopocsicnginagoc deyemmegec makpegecde.

<sup>22</sup> KEBUNGO kingang ngicfora kekecngina bummema ebicfunac mesiyunude nga mong ye yeac hoannu hama sufuude, ye yoacfu naric mi makpeude.

## 35

### *Nukporac anenggec garennuna*

Dawidingo yegec yofi heiec.

<sup>1</sup> O KEBU, ngic yoackpekpe anendae, yeni yoackpekpe ayemmebesena. Nga ngic nigoc eweandae, yenigoc ewema yunubesena. <sup>2</sup> Kebu ge dzikacac kaso nga mariku mema yacma meficnuna. <sup>3</sup> Ge tebe nga dzikacac naka mema ni kisannuandae, yeni yununa. Ge ongana yofi edena, "Ni ebicfunac mesigubade."

<sup>4</sup> Ngic yeni kpebucnubeso anggec geng feracyunuma game kpekpeu faiyununa eweheiheia kpac ambisia nga kpetotienubeso anggec geng kpae heiyemmena yeni dzigenema oboc kpoboc ambisia. <sup>5</sup> KEBU, firangngo padihakoya fifiranggema kisangande, ifi isoc fingecebeso. Geac angerongo ifi kisangyunuu kembisia. <sup>6</sup> Ge negemmana yeni singngina kundung kpema pososoc anu KEBUAC angerongo kisangyunubeso. <sup>7</sup> Yeni hania kpacfu eng memanganenubeso dema ufic mong mesufuma faigec nga kekecna eng megecdeac dema teng mong usugec. <sup>8</sup> Nga geng negemmana yeneng wiac mong mi negemmagec wiac manganango hama kpetotiyunubeso. Yeni ufic faigec, imohai imocngo yenang mendangyunubeso amma teng usugec, imohai yenaoc kemegec kpetotiyunuu kpac andacbisia.

<sup>9</sup> Ifi anu onganango KEBUAC amma sogac sogai meficgeude amma yeng ebicfunac mesinudacac ubangerec negembade. <sup>10</sup> Sicna sasawango degecde, “O KEBU, ge isoc mong mi kecde. Ngic kucnginagoc yeni kucmama feracyunugec geng yeneac mariunac mesiyununade. Ge ngic kucmama nga makpekpea godzungic maringinaunac mesiyunuanec.”

<sup>11</sup> Ngic yeni mangana arenggema yacma yoacfu nearu hama faka goa mi negenduae, imocac dekpesi anendae. <sup>12</sup> Ni yeneac faka gombunga amba yengeng ine turunga mangana merennendae, imocac ongana ebiride.

<sup>13</sup> Anu yeneng hafei amma kecgec, imohai ni sifu ubamanganggac wamba torungo memea heima yakasege kpendzengoc kecma ngonducnema yeneac amma numuai. <sup>14</sup> Faka anai, imoc neanna sactosona monggac me dacnaac angang isoc ubamangang negengkefai. Amma nonggonango homeu ambai isoc songgonggac wamba heima ngonduc ngonduc kengha kefai.

<sup>15</sup> Anu ni tifainggeai, imohai yeneng ine ubangerec negemma adzoroma namma nubeso anggec. Yeneng memanugecdeac kpedzucnegoc nga godzungic goa mi negengyunuduae, yeneng memanganenugec, imoc wisickea kpac. <sup>16</sup> Ngic Anutu ngadehema mangana angkecdae, yeneng yeni isoc monggoc nga monggoc enac kisaranggedae.

<sup>17</sup> O KEBU, ge naso dafiguc wiac imoc kicga fima hennade? Yeni manganenudaeac yeneac mariunac meicnuna. Ge kekecna raiong yangtoa yeneac meicnuna. <sup>18</sup> Geng ifi anna ni kpebung habutoa yeneac kicfu geac ubangerec megembade amma ngicngac habutoagoc nanggec ni yenigoc namma erienzong megembade.

<sup>19</sup> Anu ngabafocna yeneng hania kpacfu ngaba anemma dedzomoc anembauac kpaheiyemmebesena. Yeni hania kpacfu neac modzongina tiu ebic imocac ubangerec negemma kicparac kpounembauac kpaheiyemmebesena. <sup>20</sup> Yeni ruaeac yoac mong mi deandae nga ngic bangecfu yumia kecdae, yeneac ikocyoac dema memanganeyunugecdeac negensidae. <sup>21</sup> Yeni enacngina anggema udumengtoa meficgema neac yofi deandae, “Yahec, imoc gennoc andang, neni gending.”

<sup>22</sup> O KEBU, ge wiac sasawa bic hennec. Ge imocac yoacga mi waickena. O KEBU, ge neac hereau mi kecbesena. <sup>23</sup> O Anutu, ge neac Kebu. Ge yacma kockpac amma yoacna nanggema meseribesena. <sup>24</sup> O KEBU Anutuna, ngabafocna yeneng dedzomoc anembauac fakaga dindingac modacma nanggenuna yoacfu firang ambesare.

<sup>25</sup> Yeni ge negemmana yofi mi deemebisia, “Naric yombong, ifi yombonnoc fingecmiudeac negening.” nga yeni monggoc mi debisia, “Yagucnoc ye kpetotieni kpac andarude.”

<sup>26</sup> Yeni neac ebicac amma ubangerec negendae, imocac ge negemmana yeni oboc kpoboc anggec game kpekpeu faiyunubesonga. Ngicngac goa yeneng memanuma feracnuma ubangerec negendae, yeni gamengo wamba isoc semeyunuu ewehiheiia kpac kecbisia.

<sup>27</sup> Nga ngicngac yeni neac yoacac fora dindingac fingerudeac ayemmeade, yeni ge negemmana ubangerec negemma sogaima dendzerenggema arohobisia. Yeni nasoc yofi dekecbisia, “KEBU ye engena yombong, ye kingang ngihango gombunga kefudeac songo negenude.” <sup>28</sup> Ifi anu neac nedzaranggo fakaga dindingac dekperagima asoacnac kemma marai dengerecga deude.



## 36

*Manganaac faitobang*

Yegecgareng yearu. KEBUAC kingangngic Dawidingo yegec yofi heiec.

<sup>1</sup> Ngic mong ye Anutu ngadehema mangana meudeac ammiu singyoackpekpenge yeac herea keme kemeau yombong kehema yoac edeude. Ye kiwango wiac hendacma Anutuac kengec mong mi negenude. <sup>2</sup> Ye yoackerec nga ikoc angemema ubeau yofi negenude, “Ngicngac ogofocna memanganeyunudua, imoc ngic mongngo naric mi hennegeng anude nga fakana imocac modzongina mi tiude.” <sup>3</sup> Ngic imoc ye enacngo ogofocngina tobangyunuudeac yoac nga ikocyoc arenggema deude. Ye bicngoc negentegecma wiac gombunga angkefec, imoc bic wama eng kefude. <sup>4</sup> Nga ye fefeau fema ogofora tobangyunuudeac mangana arenggema sing manganasac modackefudeac negenude. Ye faka angammeme mangana mong mi ngadehema waude.

*Anutu ye memeficnina*

<sup>5</sup> O KEBU, geng yoac dedzege amma imoc modackecneac, fakaga imocngo emma kurumenga kurumenga kpesereyunuude. Nga yoac modac modac fakagango wi emma hoeng kpesereyunuude. <sup>6</sup> Tikitoa nangkendae, ifi isoc geac dindingac kekecga ande. Ge yoacfu sing dindingac modacma yoacngina desiyemmeanneac, imocngo kondung keme kemea isoc ande. O KEBU, ge ngicngac nga yang hania hania momoc onggongyununade.

<sup>7</sup> O Anutu, geng yoac dedzege amma imoc modackecneac, fakaga imoc wiac engena yombong. Neni, ngicngac yeneac nambaracfcnginango, geac hoannu hadacma kpegangga marabeau sufuma kecnide. <sup>8</sup> Geac amau yaka gombunga gombunga homac feu ubangerecga doku isoc hanemmeu nekecdimbe.

<sup>9</sup> Kekecac haniaac dokudzohong, imoc gearu fekefude nga neni geac kperagi kperagi hengkecdimbe.

<sup>10</sup> O Kebu, geng yoac dedzege amma imoc modackecneacac fakaga imocac ngicngac negengguekcdimbe, nenearu fekecbeso. Ngicngac herenginau ikoc nga hamangec mong mi fede, geng yeni ebicfunac mesiyununa.

<sup>11</sup> Ubakpekpe ngic ye haniango ni tifaacnubaac kpaec heimibesena. Amma ngic Anutu ngadehema mangana megecdeac ayammeande, ge yeneac kpaec heina yeneng ni mi kporacnubisia. <sup>12</sup> Yarengic yeni bangecfu mayunuu fedae, yeni mayunuu monggoc mi yacgecde.

## 37

*Bangec medacgecde*

Dawidingo yegec yofi heiec.

<sup>1</sup> Ngic Anutu ngadehema mangana megecdeac ayammeande, ge yeneac modzoga mi tibeso. Nga faka mangana angandae, ge yeneac keracmangang mi ambesena. <sup>2</sup> Yeni naso wegenacneacsac kecma kpindzingngo dzanggeande, ifi isoc dzanggegecde. Wiac mong maria tengging tenggingngo homeande, yeni ifi isoc homegecde.

<sup>3</sup> Ge KEBU negenserima kecma faka gombunga angkecbesena. Ge ifi amma bangecfu naso herea kecma bangec imocac hoannu sufuma ruaegoc kecnade. <sup>4</sup> Ge KEBUAC songo negembesena. Ge ifi anna yeng heregaac songo modacma wiac genude. <sup>5</sup> Ge kekecgaac sing KEBUAC mariu faima ye negenserima kecna yeng uaya mekefude. <sup>6</sup> Nga yeng nanggeguu ge firang



anna imocngo wenac kperagia isoc mekperagiyunuude. Amma nanggeguu dindingac annade, fakaga imoc wenac nasou wenac kperagiande, ifi isoc kperagiude.

<sup>7</sup> Ge KEBUAC kicfu waickema tomai kecma kucga mi mabeso. Ngic mongngo yarefaka arenggema iwai sasawa meficgema naric kefude, imoc fingeru ge yeac modzoga mi tibeso. <sup>8</sup> Ge ngaba mi ambesena nga herebufaka imoc ngadehema monggoc mi negembesena. Modzotitingo manganau wangecguudeac ngicngac ubango mi ukuyunubesena.

<sup>9</sup> Ngic Anutu ngadehema mangana megecdeac ayemmeande, ye meicyunuu kpac anggecde. Nga ngicngac KEBUAC tomai kecandae, yeni maridzomingac arennu bangec mema mingina anggecde. <sup>10</sup> Ngic Anutu ngadehema mangana megecdeac ayemmeande, yeni naso mi hereemanu monggoc mi kecgecde. Ge tatahau kemma ye hofocymbonggema naric mi meficgenade.

<sup>11</sup> Anu ngicngac yumia yeni maridzoming arennu bangec mingina anggecde. Yeni finac hania hania efea kpac mekecma ubangerecgcoc kecgecde.

<sup>12</sup> Ngic Anutu ngadehema mangana megecdeac ayemmeande, yeni ngic dindingac yunugecdeac areng faima enac kisaranggedae. <sup>13</sup> Nga KEBUNGO ine yenemma dzomoreude, nocac nasongina wegena haude, imoc bic negende.

<sup>14</sup> Ngic Anutu ngadehema mangana megecdeac ayemmeande, yeni soe taima tebengina kpedzigece. Yeni ngicngac makpekpea amma ngicngac iwaiac obohoma kecdae, yenemma ngicngac ikoc nga hamangecngina kpac kecandae, yeni yenemma yunugecdeac ayemmeude. Yeni ngicngac herengina dindingac kpebucyunugecdeac ayemmeande. <sup>15</sup> Soenginango yenang herengina nendanggeu tebengina usuude. <sup>16</sup> Nga ngic didingacngo wiac kapianec mekecde, imoc wiac gombunga. Anu ngic Anutu ngadehema mangana megecdeac ayemmeande, yeni wiac efea kpac feyemmeude, imocngo ngic dindingac yeac finacbisc, ifi isoc mi ngereude.

<sup>17</sup> Ngic Anutu ngadehema mangana megecdeac ayemmeandae, yeni ebicfu enggec maringina kpetackeude. Anu KEBUNGO ngicngac dindingac nanggeyunuu seria nanggecde.

<sup>18</sup> KEBUNGO ngic kopocsic mong mi meficgeandae, yeneac nasongina negendacde. Nga yeni maridzoming negemma wiac megecde, imoc wisic wisickea kpac anu <sup>19</sup> naso ebihagoc hau yeni seria nanggecde. Mongngo game kpekpeu naric mi faiyunuude nga bodinaso hau wiac monggac naric mi obohogece.

<sup>20</sup> Ngic Anutu ngadehema mangana megecdeac ayemmeande, yeneng ine kpac anggecde. Dzaring dzuria moronggema kpac angandae, ifi isoc KEBUAC ngabafora kpac anggecde. Yeni hosuc engande, ifi isoc emma kpac anggecde.

<sup>21</sup> Ngic Anutu ngadehema mangana meudeac ammiude, ye wiac turung amma mema turunga imoc mi kpouande. Ngic dindinga, yeng ubangerec negemma wiac naric eng yemmeude. <sup>22</sup> Ngicngac KEBUAC kenecgcoc kecdae, yeneng maridzomingac arennu bangec mema mingina anggecde. Nga ngicngac Kebuac sowec bageau kecgec Kebungo meicyunuu kpac anggecde.

<sup>23</sup> KEBUNGO ngic monggac singgac negenu ngereudeu ye yeac kenghaya meseriu sing titia seria anude. <sup>24</sup> Ye todinggebac, fora. Nga Kebungo mariaui medeac naric mi makpeude.

<sup>25</sup> Ni medacnaungoc kecerekecma yaguc ngickpengeng anduae, imohai hembra Anutungo ngic dindingac naric mi wau eng kecande, kpac. Nga yeac

nambaracfora yeni yakaac mong mi derecegecede. <sup>26</sup> Yeng nasosoc iwai eng yemmekecede nga nambaracfora yeni ogomefic amma ngicngac ogofocngina kenec meficgeyemmegecede.

<sup>27</sup> Ge faka angammeme mangana ngadehema wama faka gombunga amma bangecfu wisic wisickea kpac kecnade.

<sup>28</sup> KEBUNGO ngicngac sing dindingac modacgecedeac ammiu yeac kpetiac areng, yeni naric mi ngadeyunuma wayunuude. Ye onggonyunuude, imoc wisic wisickea kpac. Ngic Anutu ngadehema mangana megecedeac ayemmeande, yeng yeac nambaracfora ine meicyunuu kpac anggecede. <sup>29</sup> Ngicngac dindingac yeneng maridzominggac arennu bangec mema mingina amma naso wisic wisickea kpac imohai kececede.

<sup>30</sup> Ngic dindingac ye enarango yoaac negen negentegecgoc deude nga nedzarangango sing dindingac modacnideac yoaac deude. <sup>31</sup> Ye KEBUAC dedeseriyoaac ubahereau feu hania naric mi tiposockeude. <sup>32</sup> Ngic Anutu ngadehema mangana megecedeac ayemmeande, yeni ngic dindingac yeneac kicfifi kecma kpebucyunubeso anggec <sup>33</sup> KEBUNGO ngic dindingac naric mi wayunuude nga ngaba yeneac kucnginango naric mi feracyunuma memayunuude. Ngaba yeneng yeneac yoaac mekemma yoaafu faiyunugec KEBUNGO kpaee hiyemmeu kopocsicac areng naric mi deyemmegecede.

<sup>34</sup> Ge KEBUAC tomai kecma yeac sing modachesena. Ge ifi anna yeng miacguma maridzominggac arennu bangec genu mingina annade. Nga yeni geac kicfu ngic Anutu ngadehema mangana megecedeac ayemmeande, meicyunugec kpac anggecede. <sup>35</sup> Ni ngic mong henai, ye Anutu ngadehema mangana meudeac ammiu ngicngac ogofora ebicfu faiyunukefec. Nga yeneng ubaebicgoc kecmagec yeng Rebanong bangecac yomondzoc ic herea isoc feracyunuma nangkefec. <sup>36</sup> Nga ni monggoc ihai kemma nanangasac hembra yengena mi nanu hembra dema hofocba imohai mi nanec.

<sup>37</sup> Ngic kopocsic mong mi meficgeande, ngeni ye hentegecbisia. Ngic mong ye ikoc nga hamangeha kpac kecande, ye hembisia. Ngic ruaegoc kecande, yeng arengfora yenigoc naso herea kefude. <sup>38</sup> Nga singyoackpekpe ine kpetotieyunugec kpac andacgecede nga ngic Anutu ngadehema mangana megecedeac ayemmeande, yeni wiacngina ngereema feec, imoc meickegec kpac anude. <sup>39</sup> KEBUNGO ngic dindingac ebicfunac mesiyunuma ebicnasou yeneac sufu sufumangina anu ihai sufuma kececede. <sup>40</sup> KEBUNGO meficyunuma ebicfunac mesiyunuude. Yeni yeac hoannu hama sufuma kecdaeac amma yeng ngic Anutu ngadehema mangana megecedeac ayemmeande, yeneac mariunac mesiyunuude.

## 38

### *Kpendzenggoc nunumu*

Dawidingo sese fai faiac nunumuyegec yofi heiec.

<sup>1</sup> O KEBU, ge ngaba amma yoaac ngabasiric mi anenna nga herega buu kopocsicac amma numeting mi anenna. <sup>2</sup> Ge tebegango wedecnunec nga marigango witinau faima ferandzinunec. <sup>3</sup> Ge neac modzoga tikecedeac sebina sasawa manganeu hafei ande nga kopocsicnaac amma sicna yeni sasawango hafeinginagoc andae.

<sup>4</sup> Ni kopocsic meficgekecba imocngo feracnuma semenukecde. Nga finactoa ebirango ngicngac yiniande isoc niu imoc naric mi tofohobade. <sup>5</sup> Ni kopocsicnagoc kecma kapafaka angkecduaeac amma kubecna sasawa hoema homuna fiu <sup>6</sup> patickema ngonducnema asoacnac kemma marai ubahodungtoa negengkecduae.

<sup>7</sup> Sebina gerea nohou hafeingo sokodaru gombunga mong mi ande.

<sup>8</sup> Amma ni kucna kpac andaru manganema pereckema panggeduae. Amma herenau negengyohocgoc kpeborongtoa amma asoringa anenu kpacma arohoduae.

<sup>9</sup> Kebu, ni wiac sasawaac anende, imoc negendacnec. Nga ni asoringa anenu imocngo gearu mi sufuude.

<sup>10</sup> Ni wosona tantang anu kucna kpac andaru kicnaac kperagi bic pisickedac.

<sup>11</sup> Ni kpendzennagoc, imocac tosofocna nga amaarengfocna wanuma wegenac naric mi hagecde nga nonggo mang dacmunacfocna yeni hereau nandae. <sup>12</sup> Ngic kpebuclubeso ayemmede, yeneng botac faima kpetotienugecdeac yoac dedae. Yeni asoacnac kemma marai ikocfu faitobang anenggecdeac arenga faikecdae. <sup>13</sup> Ngic kedzacfongngo yoac mi negengande, ni ifi isoc anduae. Amma enacmedzicngo yoara kpac kecde, ni ifi isoc enac anggema yoac mong mi deduae.

<sup>14</sup> Oc, ni neannaoc ngic mong yoac mi negengande, ifi isoc amma kecduae. Ngic mong ye enacngo demetingyoac naric mi merengyemmeande, ni ifi isoc anduae.

<sup>15</sup> O KEBU, ni geac tomal kecduae. O KEBU Anutuna, gennoc yoacnaac turunga merennnade. <sup>16</sup> Ni numuma yofi deduae, “Ngaba yeneng feracnuma ubangerec negembauac nga tiposockeba yeneng negenggec wiac engena anu yoac homac osobauac kpaie heiyemmebesena.”

<sup>17</sup> Ni manubeso anu kpendzenggoc kecbare imocngo mong mi wanuude.

<sup>18</sup> Ni ngic memanganefaka angkefai, imoc deficgema kopocsicnaac amma ubahodung negemma kecduae.

<sup>19</sup> Ngabafocna yeni ine ngaba eng anendae amma yeni kucngina monggoc. Nga ngic endzirango hania kpacfu ubango ukunudae. <sup>20</sup> Ni faka gombunga amba yeneng ine imocac turunga yarefakango merennengecde. Ni faka gombunga modacma angkecduaeac yeni ngabafocna andae.

<sup>21</sup> O KEBU, ge mi ngadenuma wanuna. O Anutuna ge neac hereau mi kecna. <sup>22</sup> O Kebu, memeficna, ge bic hama meficnuna.

## 39

### *Kekecnina kpac anude*

Yegecgareng yearu. Yehudutung siriha modacma heibesonga. Dawidingo yegec yofi heiec.

<sup>1</sup> Ni negen nengengua mema deai, “Nedzarannango kopocsic meficgebaiaac nedzaranna nga fakana garenggebade. Ngic Anutu wama magana megecdeac ayemmeande, yeneng nigoc wegenac kecmagec enacbibicna kpaie heimiba yoac mong mi debeso.”

<sup>2</sup> Ni udumenga kpac waickema kecma wiac mong mi deba imoc memefihagoc mi anec, kpac. Kpendzenna imoc monggoc yombong yadiec. <sup>3</sup> Herena gerea anu negen negeng ua meba herena gerec dzeu nedzarannango yoac deai.

<sup>4</sup> Yoac yofi deai, “O KEBU, ni nasona wisickebeso ande, negen negeng imoc dekperaginembesena. Ge uameme nasona kpeteagoc bic nennec kecduae,

imoc edzacnuna negentegecbesare. <sup>5</sup> Negenna, ge uameme nasona faina neneng imoc maringo naric edzacyununi, imoc wegenac yombong ande. Kekecna imoc geac kicfu wiac wegenacnec ande. Ngic tembus tembus neneac kekec imoc wiac engena kpac, geng asu naso mocgu heiannec, ifi isoc ande.” *Selac*

<sup>6</sup> “Nga wenac nasou ic ongea fingeacnde, ngicngo ifi isoc kengha anu wisickeude. Ye uatoa homac mekecde nga imoc eng fingeru foraya mong mi fingeacde. Ngicngo wiac mekpedzuc angkecde nga wiac imoc merang ngade meude, imoc ine mi negenude.”

<sup>7</sup> “Kebu, ifi anu ni wiac mong fingeacnudeac tomai mi kecbade. Geng meficnudeac tomai kecha negen negenna gearu fede. <sup>8</sup> Ni singyoac kpema mangana angkefai. Nga ngic negen negengngina kpac yeni desofoc anembauac kpaheiyemmesena.

<sup>9</sup> Nga gennoc faka yomoc meficgena fingeacnendacac amma ni waicke kecma enacna mong mi anggebade, kpac. <sup>10</sup> Geng ni kpendzeng nennec, imoc nearunac meickena. Ge marigaac kucngo nuu kpac ambeso anduae.

<sup>11</sup> Geng bangecngic kopocsicninaac amma yoac ngabasiric dema turunga merengnemema kpeleting anemmeanec.

Gisicngo wamba neande, ge ifi isoc songowiacnina nedacna kpac andarude. Foracngoc, ngicngac sasawa neni wiac engena kpac, geng naso mocgu asu heiannec, ifi isoc andimbe.” *Selac*

<sup>12</sup> “O KEBU, ge nunumuna negenna memeficac kiacha ge kedzac faima negenna. Ni kickumana madeac ihoc bahoc mi anna. Ni kuricngic amma hama naso wegenacnecnac kecbade. Ni esangabofocna isoc kuricngicsac anduae.”

<sup>13</sup> “Ge wanuma kicga nearu mi fina. Geng ifi anna ni sogac sogai monggoc meficgemaguc yomoc wama kendacna kpac ambade.”

## 40

### *Ni Kebu kpacba*

Yegecgareng yearu. Dawidingo yegec yofi heiec.

<sup>1</sup> Ni modzotitia kpac kecma KEBUAC tomai kecbare yeng kiwa nearu faima kpakpacna negenec.

<sup>2</sup> Ye kpetotiekekac tennunac kpedzinuma goteng yohoctaunac tainuma hoc peperandzi seria witiu fainuu namba hanina meseriu tiseriduae. <sup>3</sup> Ye yegec gboria enacnau faiu heianduae, imoc Anutuninaac dedengerec yegec. Ngicngac homacngo imoc hemma KEBU ewehiheie ammima ye negenseri-ima kecgecde.

<sup>4</sup> Ngic mong ye KEBU negenseriande, ye kenehagoc. Yeng ngic yenanggac negenggec wiac engena angkecde, yeneac hoannu mi kemma yenigoc naric mi kefude. Ye sing mi segeude, nga ye ngic nemu ikoha modacandae, yenearu naric mi kenude.

<sup>5</sup> O KEBU Anutuna, ge isoc mong mi kecde. Ge neneac negemma kucfaka wiac engena homac meanec, imoc monggoc nga monggoc mekecneac. Ni imoc dekperagima ngicngac edeyunubade dema kpetengina homac amma imoc memeac siriha kpac.

<sup>6</sup> Ge sesegerec nga kopocsicac sese hania haniaac mi anggengande. Ge sese dema yang nga burumaka hafoa oho oho me kopocsic meic meickeac sese, imocac mi kpesiannec. Geng kedzacna mesarinec, imocac ni geac kingang ngic amma kecbade. <sup>7</sup> Ifiac amma yoac yofi deai, “Kibi kpou kpouya manau

neac siduc bic ohogec fede nga ni bic hadua. <sup>8</sup>O Anutuna, ni geac songo sogac sogaigoc modacbade nga geac dedeseriyoac imoc herenau fede.”

<sup>9</sup>O KEBU, ni siduc gombung bic edeyunuai. Geng ebicfunac mesinunukec-nec, ni habutoa yeneac kicfu namma siduc imoc dekperagiyemmema enacbibicna mong mi kidzickeai, ge imoc negennec. <sup>10</sup>Amma geac faka dindingac imoc herenau mi mesufuai. Ge yoac modac modac Kebu amma ge ngicngac ebicfunac mesinunukec-nec, ni habutoa yeneac kicfu namma imoc dekperagiyemmeai. Geng yoac dedzege amma imoc modackec-nec amma ge yoac modac modac Kebu, imoc mi mesufuma habu sasawa edeyunudacba negendagec.

<sup>11</sup>O KEBU, ge ubamangangga mi dzegenenna. Geng yoac dedzege amma imoc modackec-nec amma ge yoac modac modac Kebu. Geac fakaga imocngo hoannuma nasosoc ongonnubeso.

<sup>12</sup>Yarefakanaac kpetea osobadeacsoc mi amba yeni oronnukecdae. Ni ngicngac ogofocna memanganeyunukefai, faka imocngo feracnumanu wiac mong naric mi hembade. Nga imoc homac yombong amma orucna dzoea ferahau herena kuha kpac ande.

<sup>13</sup>O KEBU, ge neac negenna ngereeu ongonnuna. O KEBU, ge bicbic hama meficnuna.

<sup>14</sup>Ngic yeni kekecna hamangec mebeso andae, imocac ge yenemma game kpekpeu faiyununa oboc kpoboc ambisia. Ngic yeni ni memanganenubeso ayemmeande, ge negemmana ngic imoc dzigenegecdeac ayemmena yeni worama ewehelheingina kpac ambisia.

<sup>15</sup>Ngic yeneng neac deendema yoac yofi deandae, “Yahec, yahec!” Yeni yenaoc gameyunuudeac amma manganema nambisia.

<sup>16</sup>Ngicngac ge hofocgukecdae, yenennoc sogaima geac ubangerec negem-bisia. Ngicngac geac memengerecac songo negendae, yeni yofi dekecbisia, “KEBU dengereni.”

<sup>17</sup>Neng ine makpekpea amma iwaiac obohoma kecma naric mi meficemeba Kebungo sifu ebicna henu wiac monggac mi obohobade. O Anutuna, ge memeficna nga ebicfunac yungec yungecngicna, ge naso mi ukuma nearu bic hana.

## 41

### *Hafeigoc yeac nunumu*

Yegecgareng yearu. Dawidingo yegec yofi heiec.

<sup>1</sup>Ngic mong ye ngicngac makpekpea yenengareng ayemmeande, ye kenehagoc. Ebicnasou KEBUNGO ye ebicfunac mesima <sup>2</sup>onggonggema kekeha garenggeu ye bangehau sogac sogaigoc kefude. Ngabafora yeneng megecdeac ayemmeu KEBUNGO yeneac mariu naric mi faiude. <sup>3</sup>Ye hafei ammiu femanu KEBUNGO meserima hafeia meickema monggoc mengereude.

<sup>4</sup>Neng yoac yofi deai, “O KEBU, ni gearu kopocsic meficgeai. Ge imocac neac ubaga manganeyu mengerenuna.” <sup>5</sup>Ngabafora yeneng neac yoac mangana dema yofi deandae, “Ye homeu kpara kpac ambeso.”

<sup>6</sup>Ngic mongngo yugucnubeso hama ni tobannuudeac negen negeng uba-herenau arenggeude. Ye yoac fora mong mi dema monggoc mama kemma imoc deyadiude. <sup>7</sup>Ngic neac modzongina tiande, yeni sasawango neac yoac sangic sangic denengeng amma wiac mangana yombong fingec-nuudeac

negemma <sup>8</sup> yofi deandae, “Ye hafei mangana yombong ammiu fefeunac monggoc naric mi yarude.”

<sup>9</sup> Nga tosona nigoc wegenac kecande, ye negenserima kefai. Ye warac yaka nigoc nekefec nga yeng ifingoc gofoc gofohango tificnuma docfu fainuec.

<sup>10</sup> O KEBU, ge ubaga sifu neac manganeu miacnuna ngereema namma turunga merengyemebade.

<sup>11</sup> Ngabafocna yeni firang amma mi memanugec, imocac yofi negenduae, ge neac negenna ngereede. <sup>12</sup> Ni dindingac kecma kopocsic mong mi meficgeaiac geng nanggenuma geac hoannu fainuna ni imohai nasosoc kecbade.

<sup>13</sup> KEBU Israeac Anutu, ye nasoya nasoya kenehema keneengkechesonga. Imoc fora nga fora yombong.

## MITIYEDEC KIBI 2

### 42

#### *Mitiyegec 42-72*

#### *Ubaonganango Anutuac ammid*

Yegecgareng yearu. Yegec yomoc masiki uba modacma heibesonga. Kora medacfora yeneng yegec yofi heigec.

<sup>1</sup> Kate burumakabisicngo dokuac ammiu doku hofocande, ubaonganango ifi isoc Anutu ge hofocgude.

<sup>2</sup> Ni dokuac homeanduae, ifi isocngoc ubaonganango Anutu kekehagoc yeac ammid. Ni kemma Anutuac kicfu namma ye hembade, naso imocac homac yombong tomai kecduae. <sup>3</sup> Ni hadzing toforec kickumanango yakana angkefu ngicngac yeni nasosoc kpesinendae, “Geac Anutu mong mi hendimbe, kpac yombong.”

<sup>4</sup> Ni onganaac negen negeng hafoangoc widicma edzacguma wiac yomoc negemba fede, ni warac ngicngac arengnginagoc kenggec waraiyemmeba Anutuac womonnu kening. Neni ngicngac habutoango hombang nasoninau sogac sogaiac arohoma ubangerecac yegec heikefing.

<sup>5</sup> O ubaongana, ge kucmama mi kecbesena amma ge herena manau dewaidzoc mi ambesena. Ni monggoc Anutu erienzong memibade. Ge imocac ye negensima tomai kecna fora fingecceso. Ye memeficna nga Anutuna.

<sup>6</sup> Ni Yodang bangecfu nga Hermong amma Midza tikiu kecduae. Amma ubaherenaac kuha madeac Anutuna ni geac negemba fede.

<sup>7</sup> Ni ubana ebirima yofi isoc ande, geac dokudundung yeni kpeborongtoa kpmagec dzohong mongngo dzohong ogea kparu geac kondungsiri yeni kucgoc hama semenudau.

<sup>8</sup> KEBUNGO yoc dedzege amma modackecde, ye imoc hadzinnu sing edzahau nigoc kefude. Nga tofocnac yeac yegec nigoc feu heikecna Anutu kekecna sasawangoc garennukecde, numumibade. <sup>9</sup> Anutu ye neac hoc peperandzi seria anu yeac deba, “Ge neac nigecgudac, ifi isoc ande. Ngabafocna yeneng ebicfu fainugec ubaebicgoc kecduae, imoc nocac fingecende, imoc mi negentecduae.”

<sup>10</sup> Ngabafocna yeni deendema anemma deandae, “Ge Anutuga mong mi hendimbe, kpac yombong.” ifi degec kubec manganaac kpendzeng kpeandimbe, kpendzeng ifi isoc sebinau kpeduae.

<sup>1</sup> O ubaongana, ge kucmama mi ambesena, herena ge dewaidzoc mi ambesena. Ni monggoc Anutu erienzong memibade, imocac ge ye negensima tomai kecna fora fingecheso. Ye memeficna nga Anutuna.

## 43

### *Ge nocac ngadenuma wanunec*

Yegec 42ac tosea

<sup>1</sup> O Anutu, ngic Anutu wama kecandae, yeneng memanubauac geng nanggenuna firang ambesare. Ge ngic ikocnginagoc nga ngic faka dindingac mi modacandae, yeneac mariunac mesinuna. <sup>2</sup> Anutu, ni geac hoannu hama sufuma kecha ge nocac ngadenuma wanunec. Ngabafocna yeni ebicfu fainugec ubaebigoc kecduae, imoc fingece ndeac titiha mi negentegecduae. <sup>3</sup> O Kebu, ge kperagiga nga yoacga fora faina maec yereng sinnu hesicnuma kenec geng kpetiac tikigau kecne, imohai habesare.

<sup>4</sup> Ifi anu ni Anutuac aratau kembade. O, sogac sogaitoac Anutuna, ni gearu kemma gita kpema dengeregubade. O Anutu, ge Anutuna.

<sup>5</sup> O ubaongana, ge kucmama mi kecbesena amma ge herena manau dewaidzoc mi ambesena. Ni monggoc Anutu erienzong memibade. Ge imocac ye negensima tomai kecna fora fingecheso. Ye memeficna nga Anutuna.

## 44

### *Ebicnasoac nunumu*

Yegec areng yearu. Yegec yomoc masiki uba modacma heibesonga. Kora medafora yeneng yegec yofi heigec.

<sup>1</sup> O Anutu, ge bicngoc esangabofocnina yeneac nasou kucfaka meanec, imoc edenunugec kedzacninango negening. <sup>2</sup> Ge marigango bangec monunac ngicngac kporacyunuma neneac bangecfocnina semeng uau isoc homecyununa ihai kegcec. Ge bangecareng tosea ebicfu faiyununec, fora. Nga ge bangecfocnina witicfunac yungecyununa witicngina kpac kegcec.

<sup>3</sup> Yeni yenang dzikacac beangngo firang amma bangec mi megec, kpac. Amma yenang maringinaac kucngo firang mi angcec, kpac. Geng yeneac songo negennec amma marifoigango kucfaka menec, yeni imocac firang amma bangec megec. Geng marigaac kuc nga kicmesugaac kperagingo meficyununec.

<sup>4</sup> O Anutu, ge ngictauna nga Anutuna. Geng yoac dena, Yakoboac arengngo, firang annide. <sup>5</sup> Ngabafocnina yeneng wegenac hagec neni geac kucfu igocyununi worama kengcec geac kpacfu ngabafocnina tidzicyunuma memayununide. <sup>6</sup> Ni tebena mong mi negenserima kecanduae nga dzikacac beannango ebicfunac naric mi mesinuude. <sup>7</sup> Geng warac ngabafocnina yeneacunac mesinununec. Ngicngac yeneng ubango ukunugec geng faka ayemmena oboc kpoboc angcec.

<sup>8</sup> Neni Anutuac negenni engena angkecde. Geac kpac kuneng heiwayong memima nasoya nasoya ifi angkecnide. *Selac*

<sup>9</sup> Ge yaguc ine ngadenunuma neneac wasai areng yenigoc mi hama kecneac game kpepeu fainununec.

<sup>10</sup> Ge ngabafocnina kpae mi heiyemmena neni yeneacunac worama hani yeneng finacnina medaccec. <sup>11</sup> Rama yeni memeficngina kpac kecmagec

ngic yeni meyunuma kpehou angkecdae, neni ifi isoc aning nga geng ngic imoc kpaie mong mi heiyemmenec, kpac. Ge meicnununa singsararang kpema bangec monnunac ngicngac botucnginua fainununec. <sup>12</sup> Ge ngicngac focga fainunuma bung efeaneacsac dena menunugec. Ge neneac bung kuneng mong mi denec. Imoc hembra mi ngereede.

<sup>13</sup> Ge ngicngac wegenac kecdae sing meficgeyemmenecac yeni deendema anemmeandae nga ngicngac oronnunuandae, yeni detenic anemmema desofoc anemmegecde. <sup>14</sup> Nga ge bangec monnunac ngicngac sing meficgeyemmena yeneng neneac yoac dekecgec yeneac dzomoc tirea andimbe. Ngicngac areng hania hania yeni dedzomoc anemmema orucngina kpatitickenemmegecde.

<sup>15</sup> Ni asoacnac kemma marai ewehiheiia kpac kecba gamengo kicmesuna semeu kecduae. <sup>16</sup> Nocac yeni deendema anemma demanganenugec yoacngina negenganduae. Ngabafocna nga ngic yeni turung kpougecdeac ayemeande.

<sup>17</sup> Imoc sasawa fingecnemmeec, fora. Nga neneng sifu geac mong mi nigechnunuec, kpac. Ge nenigoc dzadzahac menec, imoc wama ikoc mong mi anggening. <sup>18</sup> Neni hereninango geac hereau mong mi kefing nga geac sing modackecma faka imoc mi wanide. <sup>19</sup> Geng ine eng kate yang yeneac kekecfu fainununa kecmiina kpedzamenunuma kundungtoango semenuunec.

<sup>20</sup> Neni Anutuninaac kpac kuneng nigechnunuu marinina miacma nemu furia afehebinnu <sup>21</sup> Anutungo imoc meficgema negendacbac. Ye hereninau wiac sufu sufu fede, imoc negendacde. <sup>22</sup> Geac areng andimbeac amma yeni asoacnac kemma marai homecfu fainunukecdae. Yeneng nenemma yofi negendae, neni rama kpebucyunuandae isoc andimbe.

<sup>23</sup> O Kebu, ge gauunac yacma negenggborina. Ge naso wisic wisickea kpac mi wanunuma kecbesena. <sup>24</sup> Ge kicmesuga mesufuma neneac kpendzeng nigeceguc, imoc naric mi ande. Ngic yeneng ebicfu fainunugec neni ubaebicgoc kecdimbe. O, Kebu, imoc mi nigezgubeso. <sup>25</sup> Ubaonganina bangecfu sendunnu ngonducneu sebininango bangecfu mendanggema fede. <sup>26</sup> O Kebu, ge gborima yacma ebicfunac yungecununa. Ge yoac dedzege amma imoc modacanecac amma meficnunuma bummenunuma ebicfunac yungecununa.

## 45

### *Ngictau nga enembingeha*

Yegegareng yearu. Yegec yomoc masiki yegec kpara Lili dzaring, imocac uba modacma heibesonga. Kora medacfora memeturangyegec yofi heigec.

<sup>1</sup> Yoac gombunga gombungango herena wakeu ni ngictauac yegec yofi heibade. Nedzarannango kibi oho ohongic gombunga yeac pen isoc ande.

<sup>2</sup> Ngictau, ge siricga gombunga yombong, ge isoc bangecngic mong ifia mi kecde. Nga geac enacbicgaunac yoac songea ereude. Anutungo kenecguma monggoc wisic wisickeac kpac kenecgubeso.

<sup>3</sup> O Firangngic kucgagoc, ge ngictauac kuc nga kibikperagigagoc kecne. Ge dzikacac soega kebanggau dzegema dzikacac efaina. <sup>4</sup> Ge ngictau kucgagoc kecma dzikacac becocsicfu tacma yoac fora nga yumiakekec amma dindingac kekec meseriyununadeac kucgoc kemma firang ambesena. Ge



marifoigango kucfaka wiac engena yombong kpougembeso. <sup>5</sup> Ge tebe-medaha enaragocngo ngictauac ngabafora yeneac woubocfu wedecna ke-mebeso. Ngiha ngiha yeni geac bageu kemema kecbisia.

<sup>6</sup> O Anutu, geac ngictau tatacga imoc wisic wisickea kpac amma feengkecfu ge ngicngacfocga ngictauyasugango garengyununade amma yoacga imoc monde mondea kpac. <sup>7</sup> Ge dindingac kekecac anggenu ngicngac Anutu ngadehema mangana megecdeac ayemmeande, yeneac faka imocac modzoga tiande. Imocac Anutu, geac Anutungonoc tosofocga yeneac botucfunac meisingguma feracyunuma sogac sogaiac kerec nadzicgenu sebigango ireckeude.

<sup>8</sup> Ngicngac yeni wambagau mira nga aroe amma kassia heigec homuna gombunga gombunga fiande. Yeni erefang yanggac baihango wiac gombunga gombunga mema ngictauamagau faigec siriha gombunga anude. Yeni imohai gitakurere kpegec udumeng gombunga meficgegengec ubangerec negengannec.

<sup>9</sup> Ngictau yeneac naroangfocngina yeni ngac yenigoc amagau kecma geac kingang kpema oronggudae. Enembingecga ye Ofiri bangecfunac gol heima foigaugeng tacde.

<sup>10</sup> O naroang, negenna, ge kedzac kpema yoacna negemma negensina. Ge arengfocga nga manggaac ama imoc nigecegubeso. <sup>11</sup> Ngictau ye geac siricga gombunga imoc hembokoma kecede. Ye geac kebu, imocac ge yeac kicfu ngonducnema ewehelhei ammina. <sup>12</sup> Ge yeneac negenna ngereeudeac negemma ngicngac Tiro taonnunac yeneng geac ubangerec wiacngina mehama genggecde. Yeni dzofinactoainginagoc amma ngicngac sasawa feracyunudae. <sup>13</sup> Nga ngictauac naroang ye ngackereng yombong yengena manau tacde. Ye ngakpia imoc gol mucngo memea nga <sup>14</sup> wamba kibiagoc kpebimigec, imoc yearu heigec kemeu ye hesickema ngictau yearu mehagec ngacnaroang tosofora yeneng ye hesickegec yenahafoc gearu hagecde. <sup>15</sup> Yeni ubangerec nga sogac sogaiac hesicyunuma kemma ngictauac ama manau endae.

<sup>16</sup> O ngictau, ge medacfocga fingecma mangfocga yeneac tatac megec geng areng faina yeneng bangectoa bangec garenggegecde. <sup>17</sup> Fingecsahenina fekeddesoc, yeneac kicfu geac kpac kuneng miacha yeneng afegugecde. Ngicngac areng sasawa yeneng wisic wisickea kpac erienzong megenggecde.

## 46

### *Amanina seria*

Yegecgareng yearu. Yegec yomoc aramoc uba modacma heibesonga. Kora medafora yeni yegec yofi heigec.

<sup>1</sup> Anutu ye sufu sufuananina nga kucnina. Ye ebicnasou nenigoc nasosoc kecma meficnunuude. <sup>2</sup> Imocac kengec naric mi annide. Bangec kpe-mindzaheudeu me tiki kondung keme kemeu turic turic anggecdeu <sup>3</sup> nga doku tunggbaungtoango udumeng kunengngoc meficgema kporoc tima tiki yunuu dendeng kpegecde, fora. Nga neneng sifu kengec mi annide. *Selac*

<sup>4</sup> Doku mong mahama Anutuac taonnu sogac sogai meficgede. Anutu Engenatoango kpetiac ama imohai kecede. <sup>5</sup> Anutungo taong imocac botuhau yombong kecdeac wiac mongngo meu imoc goroc goroha kpac kecma naric mi makpeude. Anutungo ama werewereckengac ye meficgeude. <sup>6</sup> Bangec monnunac ngicngac Anutu mi negemmidae, yeneng dzomugerec mekecdae nga bangecac eucerereng yeni goroc goroc amma mayunuude. Ye ubia

miacma kparu bangectoa bangecngo sisingaima kpac andarude. <sup>7</sup> KEBU kurumenggac wasaiareng kunengnginango nenanggoc kecede. Yakoboac Anutu ye sufu sufuamanina. *Selac*

<sup>8</sup> Ngeni hama KEBUAC ua hembisia. Ye bangecfu faka bibiagoc meec, ngeni imoc hembisia. <sup>9</sup> Yeng bangec tegia noboc noboc dzikac menomanema tebe pokong sasawa kpetackedacma dzikacac kasongina gerecfu faiu dzeude.

<sup>10</sup> Anutungo yofi dede, “Ni Anutungina, ngeni waicke tacma imoc negembisia. Bangec monnunac ngicngac yeneng yaiyo kpenenggecede nga bangectoa bangec yeni afenugecede.” <sup>11</sup> KEBU kurumenggac wasaiareng kunengnginango nenanggoc kecede, Yakoboac Anutu ye sufu sufuamanina. *Selac*

## 47

### *Ngictaungo tatahau matacde*

Yegegareng yearu. Kora medacfora yeni mitiyegec yofi heigec.

<sup>1</sup> Ngiha ngiha sasawa, ngeni mari kpema Anutuac yegec sogac sogaicoc dendzerenggema heimibisia. <sup>2</sup> KEBU Engenatoa ye bibiagoc, ye bangectoa bangec imoc ngictautoa. <sup>3</sup> Ye ngiha ngiha memayunuma nenang bageu faiyunuec. Ye bangec monnunac ngicngac hanininaac bageau faiyunuec.

<sup>4</sup> Yeng Yakoboac songo negendeac amma bangec imoc meisinggeu Yakobongo imoc negenu wiac engena anec. Kebungo bangec imoc maridzominggac arennu nemmeec. *Selac*

<sup>5</sup> Anutungo sogac sogaiac arogoc kurumennu enec. KEBUNGO trampet udumengtoagoc kurumennu enec. <sup>6</sup> Ngeni Anutuac oheha mema yegec heima eriendzong memima yegec heimibisia. Ngeni ngictaunina yaiyo kpemima yegec heimima dedengerec yegec heimibisia.

<sup>7</sup> Anutu ye bangectoa bangec imocac ngictau. Ngeni yeac yegec heimima ye dengerebisia. <sup>8</sup> Anutu ye ngictau amma bangec monnunac ngicngac areng kucgoc garengyunuma kecede. Ye ngictau tataha kpetiacfu tacde.

<sup>9</sup> Ngiha ngiha yeneac ngictauac medacfocongina yeni Abarahanggac Anutu yeac ngicngacfora. Nga yeni hama kpedzucnema tacgecede. Ngicngac bangectoa bangec imocac kaso amma kecandae, yeni Anutuac ngic. Imocac ye afehema afehekechesonga.

## 48

### *Anutuac taong*

Kora medacfora yeni mitiyegec yofi heigec.

<sup>1</sup> KEBU ye engena, ye oyang boyang memibesonga. Yeac tiki kpetiacfu, Anutuninaac amatoau, ye dengerebesonga. <sup>2</sup> Tiki imoc herea nga gombunga yombong amma bangectoa bangec sogac sogai meficgeyemmeude. Imoc Siong tiki, imoc not bigeng yombong tacde amma imoc ngictau Engenatoa, yeac taong. <sup>3</sup> Anutungo ngictau amatoau tacma amea onggonggema gombunga henggareng ammiude, imoc hengkecdimbe. <sup>4</sup> Negenggec, ngictau yeneng kpedzucnema yenhafoc dzikac kpegecedeac hama <sup>5</sup> taongtoa imoc hemma kpidohoma kengec homac yombong yunuu woragec. <sup>6</sup> Yeni hemma kengecyunuu dzonongngina fedeece. Ngacngo ngadze kiu kpendzeng kpeande, yeni ifi isoc kpendzeng kpegec. <sup>7</sup> Geng wenac ere ereanac firang dena imocngo hama Tarsisi taonggac wage kpedzameyunuande, ge ifi isoc memanganeyununa yeni kengectoa anggec.

<sup>8</sup> Neni warac siduha negening, imocac fora hening. Nga kicinango KEBU kurumenggac wasaiareng kunengngina Anutuninaac taonnu hening. Anutungo amatoa imoc tatahau faiu nasoya nasoya seria feengkefude. *Selac*

<sup>9</sup> O Anutu, geng yoac dedzege amma imoc modackecnec, imoc geac womonnu namma negensiandimbe. <sup>10</sup> O Anutu, geac kpac kuneng nga geac eriwidzong imoc bangec tegia fekendaemoc kpesereyunuu negendacgede. Ge marifoigango firang angkecnecac mariga imocngo wakede. <sup>11</sup> Siong tiki ye ubangerec negembeso nga ge wiac foraya deannecac Yudaac amafora yeni sogaibisia.

<sup>12</sup> Ngeni Siong yerecgema yeac odaac ama herec herec osoma kpetengina mebisia. <sup>13</sup> Ngeni Siong tikiac oda dafia, imoc mengere hemma ngictauac amaseria hembisia. Hemma fingecehahenina fekefude, imocac siduc yofi meymmebisia.

<sup>14</sup> Anutu yomoc nenang Anutu, ye nasoya kpac kecengkefude. Yeng sing edzacnunukefungoc kekecnina wisickeude.

## 49

### *Yeni sasawango homegede*

Yegecgareng yearu. Kora medacfora yeni mitiyegec yofi heigec.

<sup>1</sup> Ngiha ngiha ngeni yoac yomoc negembisia nga ngicngac bangectoa bangecfu kecdac, ngeni kedzac kpema yoac yomoc negembisia.

<sup>2</sup> Ngicngac kpacctoanginagoc nga kpacngina kpac, dzofinactoanginagoc nga makpekpea, ngeni yoac yomoc negembisia.

<sup>3</sup> Enacnango negen negentegecac yoac debade nga herenango negen negengua mema wiac hania hania negentegecma kecbade. <sup>4</sup> Ngic yeni yoac heima degec ni kedzac kpema imoc negembade. Ni gita kpema udumeng gombunga negemma yoac heiheiac hania deireckebade.

<sup>5</sup> Naso manganango hau ngic yeni nukporac anenggec ngabafakangi-nango oronnuu kengec naric mi ambade. <sup>6</sup> Ngicngac imoc yeni hiedzongina negenserima kecandae, yeni dzofinactoanginaac negenggec wiac engena anu imocac yoac homac osogecde.

<sup>7</sup> Foracngoc, ngic mongngo munia monggac kekec dzofinacngo bung naric mi meude, kpac. Ye buma imoc naric mi meficgeude nga yeac bung Anutu naric mi miude. <sup>8</sup> Ngickekecac bung imoc engena yombong nga imocac hiedzo homac yombong faigecdeu imoc sifu naric mi kpoudarude. <sup>9</sup> Imocac ngic mongngo naso herea wisic wisickea kpac mi kefude. Ngicngac sasawa yeneng kicsereu kemema imoc hendacgede. <sup>10</sup> Oc, ngic negen negentegecnginagoc yeni ifingoc homeandae, imoc hengandimbe. Ngic negen negengngina kpac nga oboc kpoboc yeneng ifi isocngoc homegede. Yeni hiedzongina wagec goa yeneng imoc megede. <sup>11</sup> Yeni amangina fefeseri feudeac negemma bangec goa ifingoc yenaoc wase meandae, fora. Nga kicserengo sifu yeneac amabangecngina feengkefude. Yeni fingecehahenina fekefudesoc kicsereinginau kemema kegede. <sup>12</sup> Ngic mong wiac kibiagoc gombunga gombunga mekecma heiu wiac ifiango ye kefudeac naric mi meficgeude, kpac. Ye ine yang hania hania yeni homeandae, ifi isoc homema kpac anude.

<sup>13</sup> Ngicngac yeneng ubafong amma yenanggac negensima kecandae, yeneac kekec imoc ifinoc. Nga ogofocngina goa yeneac yoacnginaac songo negemma modacyunuandae, yeneng sing ifiango kenggede. *Selac*

<sup>14</sup> Ngic yeni rama meisingyunuma homec amaac arennu faiyunuandae, yeni ifi isoc andae. Homecngo rama garengngina amma hesicyunuu yeni kemema kicsereu fegec sebingina hoaeu homec amango amangina anude. Anu ama wereckenu ngic ikoc nga hamangecngina kpac kecandae, yeneng kunengngina amma garengyunugecde.

<sup>15</sup> Anutungo sifu ni hoannuma menuudeac ubaongana homec amaac kucfunac bummema mesiude. *Selac*

<sup>16</sup> Ngic mong ye dzofinaha homac nga amagereha nga finatoaya monggoc anu ge imoc hemma imocac negenna wiac engena mi ambeso.

<sup>17</sup> Ye homeude, imohai wiac imohacnac mong mi tofoma kenu iwaiya sasawa imocngo ye modacma homec amau naric mi kenude. <sup>18</sup> Foracngoc, ye gbori kecma yengenaac yofi negengande, ni keneccngoc. Ngic ye kekeha sasawa ngereeu ngicngac yeneng imoc hemma ye dengerekecgecde <sup>19</sup> nga ye sifu homeude. Ye bangecfora bic kemma kperagi monggoc mi hengandae, yenearu kemeude. <sup>20</sup> Ngic mong ye kecma wiac kibiagoc gombunga gombunga mekecma heiu wiac ifiango ye fekefudeac naric mi meficgeude, kpac. Ye ine yang hania hania homeandae, ifi isoc homema kpac anude.

## 50

### *Sese gombunga*

Asafango mitiyegec yofi heiec.

<sup>1</sup> Anutu Kuctoa mingina, KEBU yeng yoac dema bangec kparu wenac ere ereaunac kengkecma wenac keme kemeau wisickeude. <sup>2</sup> Siong ye sirihia gombunga yombong ande nga Anutungo imohacnac fingectegecma kperagiango nerarannunude. <sup>3</sup> Anutuninango hama naric mi waickeude. Yeac kicfu gerecngo dzema waraimiude nga kiafirang kuhagocngo ye yerecgeude.

<sup>4</sup> Ye ngicngacfora yoacngina isinggema forangina deudeac kurumenga kurumenga wi fekendae amma bangec momoc kpacyunuude.

<sup>5</sup> Kpacyunuma yofi deude, “Ngicngacfocna yoac tofohoma kecandae, ngeni yeni kpedzucyunuma sueyunugec nearu hadacbisia. Yeneng neac hosuc heima sese ohoma nigoc dzadzahac megecac kpacyunuduae.”

<sup>6</sup> Anutungo yoacngina isinggema deudeac amma kurumenga kurumenga yeni yoac yofi deperagikecdae, “Anutu ye dindinga.” *Selac*

<sup>7</sup> “Ni neannaoc Anutu, ngeneac Anutu. Ngicngacfocna, ni yoac deba negembisia. Israe habu, yoacfu faingunuma yoacngina debade. <sup>8</sup> Ngeni ubangerecac sese meandae nga neac sese ohogec imoc hengkecduae. Ni ine wiac monggac negemma gorongina kpeduae, imoc yofi, ngeni Anutu Engenatoac kpacfu wiac deserima dema imocac fora mi meficgegec. <sup>9</sup> Ngeni burumaka ngiwa me noning ngiwa odangina manaunac mema nenggec, imoc sifu mi ngereude, kpac.

<sup>10</sup> Imoc yofiac, kateu yang sasawa yeni neac nga rama burumaka sasawa bangec buma taosennu kecdae, imoc yeni ifingoc neac. <sup>11</sup> Sawakebangau neng sasawa kecdae, yeni negengyunuduae. Nga wiac sasawa kekecnginagoc manennu kenghaandae, yeni ifingoc neac. <sup>12</sup> Bangectoa bangec nga wiac sasawa imohai fedacde, imoc neac andeac herenaac homebadeu imoc ngeni mi edengunubai, kpac.

<sup>13</sup> Ni burumakaac busia mi neanduae nga noningcac sawa ifingoc mi neanduae, kpac.

<sup>14</sup> Ngeni Anutu ubangerec ammigeç imocngo sesengina ambeso. Ngeni Anutu Engenatoaac kpacfu wiac deserima dema imocac fora meficgegeç <sup>15</sup> ebicnaso hau ngeni ni kpacnugeç neng ebicfunac mesingunuba ngeneng ni afenubisia.”

<sup>16</sup> Ngic Anutu ngadehema mangana megeçdeac ayemmeande, yeneac ine Anutungo yofi deande, “Ngeni neac enac mema singyoacna degeç, imocac kpae heingemmeba imoc naric mi debisia. Nga dzadzahac meai, imoc kpacma yoac mong mi debisia, imoc kpaeagoc.

<sup>17</sup> Ngeni neac dedereçgeyoacac modzongina tiu yoacna ngadehema waanda. <sup>18</sup> Ngeni hamangeçngic hemma yegoc torokpema yeac ogofora anggeçde. Nga ngeni kaisero ngic yenemna yenigoc tacyac angandae.

<sup>19</sup> Ngeni enacbibicngina mi dzegema imocngo ngicngac ogofocngina memanganeyunugeçdeac yoac mangana deandae nga nedzarangnginango ikoçyoac degeçdeac sing arengggeandae.”

<sup>20</sup> “Ngeni ngenang dacmunafocngina yoacnginango memanganeyunuan-dae nga nengacyombongnginaac medaha enacfu faifai ammiandae.

<sup>21</sup> Ngeni faka ifi anggeç ni waickema keçba ngeneng negengeç, ‘Ni keçduaengoc, ye neni isoc, ye siriha mong mi ande.’ Nga imoc kpac, ni yaguc ine ngeni demeting angemmema mesunginau kpebade. <sup>22</sup> Ngeni Anutu nigecngunuande, ngeni wiac imoc negensibisia. Ifi mi negensigecdeu neng ine kpedzamengunuba mongngo naric mi ongongngunuude.

<sup>23</sup> Nga ngic mong ye neac ewena heima ubangereçac sese heinemna sing dindingac modackeçde, ye ebicfunac mesiba yeng Anutuac faka henude.”

## 51

### *Anutu ge kopocsicna wana*

Yegeçgareng yearu. Dawidingo Batsebagoç serofaka anu profetengic Natangno yearu kemna dzigeneu Dawidingo yegeç yofi heieç.

<sup>1</sup> O Anutu, geng yoac dedzegeç amma imoc modackeçneac neac ubaga manganeu. Geac wosoefac imoc efea kpac, imocac neng singyoac kpema kopocsic meficgeai, imoc dzuacdacna kpac ambeso. <sup>2</sup> Ni ngicngac ogofocna faka mangana ayemmeai. Ge dzuacnuna kongaha ambesare. Ge kopocsicna medzuacna kongac kpebesare.

<sup>3</sup> Ni singyoac kpeai, imoc negengkeçduae nga kopocsicna imoc nasosoc hensiduae. <sup>4</sup> Gearusac kopocsic meficgema kicgau faka mangana yombong anai. Ifi anu geng yoac denec imoc fora fingetegerude ge ngic hania isinggema yoacngina desineç, imoc dindingac.

<sup>5</sup> Foracngoc, nengganango kopocsicgoc keçma ni kpenannuma menuu kopocsicnagoc fingerai. <sup>6</sup> Nga herenau yoac forasac febeso, ge imocac negenna ngereude. Ge imocac here sufu sufunau negen negentegeç kpounenna.

<sup>7</sup> Ge babacmeac mema dzuacnuna kongac kpeba dzuacnuna hoeng kongaha feracyunuma kongac ambesare. <sup>8</sup> Ge negemmana ni sogac sogai nga ubangereç negembesare. Geng sicna kpedzameneç nga ge negemmana yeni monggoc sogai debisia. <sup>9</sup> Ge kopocsicna imohacnac kicga mesufubesena amma ni ngic ogofocna memanganeyunudarai, imoc dzuacdacna kpac ambeso.

<sup>10</sup> O Anutu, ge herena kongaha gboria meficgenemna asu gboria nga dindingac meficgema herena manau fainenna. <sup>11</sup> Geac hoannunac ni ukununa amma kpetiac Asuga nearunac mi meickena. <sup>12</sup> Ge ebicfunac mesinunecac sogac sogai monggoc mengere nemna enactofoc tofoho nga

ogomeficac asu nemma nanggenuna. <sup>13</sup> Ge ifi anna ni singyoackpekpengic geac sing kpouyemmeba kopocsicgoc yeneng ubangina dzigeneu gearu monggoc hagecde.

<sup>14</sup> O Anutu, memengerecnaac Anutu, ni ngic kopocsiha kpacfu eng kpe-homebaiaac imohacnac mesinuna. Ge ifi anna ni nedzarannango imocac sogac sogai yegec kunengngoc heigemma geng ebicfunac mesinunec, imoc edeyunubade. <sup>15</sup> O Kebu, ni enacnango dengeregubadeac enachibicna mesina.

<sup>16</sup> Ni sesegerec megemba ge imocac songo mi negennade nga sese dema hosuc ohogemba ge imocac negenna ifingoc mi ngereebac. <sup>17</sup> O Anutu, ni ine asuna ebicngo kipac kipactanggea gemba imocngo sesena anude. O Anutu, ubamanganggo ngichereu ebic meficgema kipatanggeu ge imoc hemma naric mi wanade.

<sup>18</sup> Ge Sionggac songo negemma gombunga ammima Yerusarenggac hocodatoa monggoc heimengere anna. <sup>19</sup> Ge ifi anna sese gombunga nga dindingac megenni imocac negenna ngereeu sese ohogemma seseyang hafoangoc ohogennide. Neni sese dema burumaka ngiwa aratagau faiyunuma ohogennide.

## 52

### *Yarefaka fingerec*

Yegegareng yearu. Yegec yomoc masiki uba modacma heibesonga. Edomingic mong kpara Doege ye Sauroaru kemma yofi edeec, “Dawidi ye Ahimerecac amau kemma kecde.” imohai Dawidingo yegec yofi heiec.

<sup>1</sup> O ngic kuctoagagoc, ge Anutuac enac tofoc tofohongic tobanggema kpenec. Ge imocac defefec amma yoac homac osokecne. Ge ngic kpetotieyununa kpac anggecde, ifi negemma asoacnac kemma marai negeng areng angkecne. <sup>2</sup> Ge nedzarangga imoc resa enaragoc, ifi isoc anu ikoc ayemmema kpetotieyunuane. <sup>3</sup> Ge manganaac songo homac negemma gombungaac songo mong mi negemma ikocyoc debesonga anggenu yoac fora deneadeac mong mi anggengande, kpac. *Selac*

<sup>4</sup> Is, nedzarang ikohagoc, yoac manganango ngicngac memanganeyunuande, ge imocac songo negenganec.

<sup>5</sup> Anutungo ine kpedzameguu nasoga kpac ambeso. Ye kporuchbedzogau hama imohacnac kucgoc meicguma ukuguu kekecnginagoc yeneac bangecfunac meicgudaru imohai monggoc mi kecnade. *Selac*

<sup>6</sup> Ngic dindingac yeni imoc hemma kpidohoma kengec amma yarengic hemma dzomoremima yofi degecde, <sup>7</sup> “Henggec, ngic imoc ye Anutuac hoannu kemma mi sufuec. Ye ine ngicngac ogofora memanganeyunuma yengena dzofinactoya negenserima kefu wiac imocngo sufu sufueamea anec.” <sup>8</sup> Anu oriwa icngo sabayagoc nangande, ni ifi isoc Anutuac amau namba Anutungo yoac dedzege amma imoc modackecde, ni nasoya nasoya wiac imoc negenserikecduae.

<sup>9</sup> Anutu, geng ua menec, ni nasoya nasoya imocac ubangerec megembade. Geac kpac kuneng, imoc gombunga nga ni imocac negensima fora fingerudeac negemma kecbade. Amma geac enac tofoc tofohongicngacfogca yeneac kicfu geac kpac kuneng heiwayong memibade.

## 53

*Yeni negen negengngina kpac*

Yegecgareng yearu. Yegec yomoc maharatac sing masiki uba modacma heibesonga. Dawidingo yegec yofi heiec.

<sup>1</sup> Ngicngac negen ngentegecngina kpac, yeni herenginai yofi negemma deandae, “Anutu mong mi kecde, kpac yombong.” Yeni fakangina manganeu faka mangana yombong hania hania angkecma yenearunac mongngo faka gombunga mi anude.

<sup>2</sup> Anutungo kurumennunac kic fiu mau ngicngac yenengkecde. Ye ngicngac negen negentegecgoc kecma Anutu hofocandae, ngic ifia hofocyunuma kecde. <sup>3</sup> Yeni sasawango ine faka gombunga ngadehedacma fakangina manganedaru yenearunac mongngo mong faka gombunga mi angande, mocdong kpac.

<sup>4</sup> Ngicngac yaka dzegoc neandae, yarengic yeni ifi isoc ngicngacfcocna neyunuandae, yeni memeficac Anutu mi kpacgecde. Yeni negen negengtegecngina kpac. <sup>5</sup> Ngic ge gugecdeac kpedzucnegec yeni Antungo sicngina kpedzameude. Imocac wiac mong kengehagoc mi fingeru yeni ine kengectoa amma kpidohogecde. Anutungo wayunuecac gameyunuu nanggecde.

<sup>6</sup> O, ebicfunac mesi mesi, imocngo Siong, imohacnac habeso, imocac yombong anemmede. Anutungo ngicngacfora mengereyunuu kekecngina ngereude, imohai Yakoboac areng yeni sogaignecde nga Israeac areng yeni ubangerec negenggecde.

## 54

*Memeficac nunumu*

Yegecgareng yearu. Gitakurere kpema heibesonga. Sifingic yeneng Sauroaru kemma yofi edegec, “Dawidi ye nenanggoc sufuma kecde.” Ifi anggec Dawidingo masikiyegec yofi heiec.

<sup>1</sup> O Anutu, ge kpac kunenggaac amma ebicfunac mesinuma kucgango ongonnuna ngic yeneac yoacfu firang ambesare. <sup>2</sup> O Anutu, ge nunumuna negemma yoacnaac kedzac kpema.

<sup>3</sup> Kuricngic yeni yacma nubeso andae nga ubakpekpe ngicngo Anutuac negenggec engena mi angkecde, yeni ngaba anema kpebucnubeso andae. *Selac*

<sup>4</sup> Foracngoc, Anutu ye memeficngicna. Kebungo kekecna garenggekecdae, yenigoc kecma nanggeyunuu seria nanggecde. <sup>5</sup> Ngic neac ngabayoac degec yeng ngadeyoacngina merenu yeni imocac ebic meficgegecde. Kebu, ge yoac modac modac Anutu, imocac memanganeyununa kpac ambisia.

<sup>6</sup> O Kebu, ni ubaefac amma geac sese megembade. Ge kpacga gombunga, imocac geac kpac kuneng heiwayong memibade. <sup>7</sup> Geng ebicfunac mesinudacma ngabafocna memanganeyununa ni firang amma kicnango yenenai.

## 55

*Tosofocna yeni wanugec*

Yegecgareng yearu. Gitakurere nga noc kpema heibesonga. Dawidingo masikiyegec yofi heiec.

<sup>1</sup> O Anutu, ge neac nunumunaac kedzac faina wiac monggac kpesigemba ge imoc negemma ihoc bahaoc mi ambesena.



<sup>2</sup> Ubaebicnango feracnuu negen negennango sicsauc andeac ge negenemma yoacna turunga merennenna. <sup>3</sup> Ngabafocna yeni kpeborong kpekecdae nga ngic Anutu ngadehema mangana megecdeac ayemmeande, yeni kicngina nearu fima ngaba anemma ebicfu fainugec ubaebicgoc kecduae. Yeni ngaba amma nubeso andae. <sup>4</sup> Herenau ubaebic mema homecac kengectoa amma kpidohoma manganebeso anduae. <sup>5</sup> Ni kpidohoma kengecnuu dzononna fedede. Ni kpidohoba kengectoango feracnuu ubaebicgoc kecduae.

<sup>6</sup> Ni yofi deduae, “Ni kebesac neng isoc kpegannagoc ambai dede kpututuckema bangec monnu kemma ruae meficgebesare, imocac yombong anende. <sup>7</sup> Foracngoc, ni kpututuckema bangec ngiha kpacfu kemma amagerecna ihai mema kecbai. *Selac* <sup>8</sup> Kia frangtoa kpeu ni sifu sufuamana mong meficgema ihai bicbic kpututucke kemma sufubai.”

<sup>9</sup> O Kebu, ni taonnu ngic yenemba yeni ngaba angemema yarefaka angandae. Ge imocac negen negengngina kpetotiena yoacnginau tohoemebisia.

<sup>10</sup> Yeni hadzing tofocnac taonggac odatoa witiau kengha amma yerecgema nangandae nga taong manau tosongo ngicngac tosofocngina memanganayunugec ebic homac fede. <sup>11</sup> Yeni wiac kpetotiegecdeac negen negeng mekecgec, imocngo taong botuhau wiac kuneng ande. Ngic yeni ngicngac ogofocngina ebicfu faiyunugec ubaebicgoc kecdae nga goa yeni ikoc amma hiedzo kiregecandae. Faka imocngo emenecnginau fekecma mi kpac anude.

<sup>12</sup> Neac ngabangicngo yoac deendema anembac ni naric serima imoc negengkecbai nga ngaba mongngo ubakpekpe anenu yearunac naric sufubai. <sup>13</sup> Faka ifia ine gennoc ogona angkecnec. Nerang arennira mocgu amma ge ngic ni isoc amma wegenac kecandipe, ge tosoyombonna, gennoc faka ifia anengkecnecac ubahodung negenduae. <sup>14</sup> Neri nerahafoc kecma desogai angkecma habutoagoc Anutuac womonnu nerahafoc kengkefic.

<sup>15</sup> Homecngo ngabafocna meyunubeso. Yarefakango amangina nga herengina mewakeudeac yeni sebingina gbori femanu homec amau kemebisia.

<sup>16</sup> Anu ni sifu Anutu kpacba KEBUNGO ebicfunac mesinuude. <sup>17</sup> Ebicngo mananu asoringa anenu ni asoac nga marai amma tofocnac imocac kiacma ebicyoacna edeba yeng ubaudumenna negenude. <sup>18</sup> Foracngoc, ngic homac yeni ngaba anemma nubeso andae nga Kebungo dzikacfu garenuma bummenuma ongonnuude.

<sup>19</sup> Anutungo ngictau tatahau bicngoc tarec amma nasosoc tarude. Ngic imoc, yeni ine ubangina naric mi dzigeneude. Yeni Anutu kengec nga ewehelheigoc naric mi hoanggegede. Imocac ye neac kiac negemma kpendzenuu faiyuuude. *Selac*

<sup>20</sup> Tsonango yeac dzadzahac kpema maria sinema ngic ogea kpebeso anec. <sup>21</sup> Yeac yoac yumia hosonec kerec isoc deu herea manau ine dzikacngo feu yoac deec, imoc ine ruagoc yombong kerecdokuya isoc amma soengo yenereande, ifi isoc yenereac.

<sup>22</sup> Ge ebic sasawa tofohonec, imoc KEBU wamina yeng ebic imoc tofodacma meserigubeso. Ye ngic dindingac garenggema kpae heimiu wiac mongngo ye meu goroc goroc naric mi anude. <sup>23</sup> Ngic yeni ngic ogofocnginaac sac hetinggebeso ayemmeande nga ikocngic, yeni kekecngina kebangau homegede. O Anutu, geng kpefacyununa yeni teng keme kemeau kemeyombonggegede.

Anu ni negenserigukecbade.



## 56

*Ge kickumuna mi nigecgubeso*

Yegecgareng yearu. Yegec mong kpara Kebesac neng aga saruc icfu tacle, imocac uba modacma miktangyegec yomoc heibesonga. Firistiareng yeneng Dawidi Gata amau meficgema mendanggegec yeng yegec yofi heiec.

<sup>1</sup> O Anutu, ngicngac yeneng ni mematiti anendae nga ngabafocna yeneng asoacnac kemma marai ebicfu fainugec ubaebicgoc kecduae. Ge imocac neac ubaga manganeu. <sup>2</sup> O Kebu Engenatoa, ngabafocna yeni asoacnac kemma marai enacfu faifai amma sebingina meemma mematiti anemma ngaba anengkecdae.

<sup>3</sup> Ni kengecnuu negenseriguanduae. <sup>4</sup> Ni Anutuac yoac dengerema ye negenserikecma kengec mi ambade. Ngic yeneng wiac mong naric mi anenggecde.

<sup>5</sup> Yeneng asoacnac kemma marai enacfu faifai anemma memangenenukecdae. Yeni ebic hania hania fingeccnudeac negen negengua ebirangoc mekecdae. <sup>6</sup> Yeni memanganenugecdeac denegeng amma neac tomai sufuma namma kpebucnugecdeac ayemmu ni kengha ambadesoc garennukecdae.

<sup>7</sup> O Anutu, ge ngicngac areng sasawa yarefakanginaac turunga kpouyem-mema herebugaac ebic witicnginau ukuna mau. <sup>8</sup> Yeni nukporac anenggec wenac dafiguc ama heidac kefai imocac kpetea osoma medacnac. Amma kickumana bic osoma kibigau ohonec fede, imocac kpetea negensibesena. <sup>9</sup> Anutungo nigoc kecde, imoc negenduae. Yeng ni meficnuudeac kpacha imohai ngabafocna dzigenema woragecde.

<sup>10</sup> Ni Anutuac yoac dengerema Kebuac yoac dengerema <sup>11</sup> ye negenserikecma kengec mi andanduae. Ifi amba bangecngic yeneng wiac mong anenggecdeacsoc mi ande.

<sup>12</sup> O Anutu, ni yoac deserima ge edeguai, imoc tofohobesare. Ni uban-gerecnaac sese megembade. <sup>13</sup> Ge ubaongana homecfunac mesima hanina meserina mong mi tifainggeai. Ge ifi anna ni Anutuac kicfu kekecac kpera-giau kecbade.

## 57

*Ngiha ngiha botucnginau afegubade*

Yegecgareng yearu. Yegec kpara: Ge mi kpetotiebesena, imocac uba modacma miktangyegec yomoc heibesonga. Dawidingo Sauro yearunac worama hocsingau sufuma yegec yofi heiec.

<sup>1</sup> O Anutu, ge neac ubaga manganeu. Ubaonganagoc geac hoannu sufud-uaeac amma ge neac ubamangang negenna. Ni geac kpeganggaac debannu sufuma kecbare kiafirang mangana kpac andacbeso.

<sup>2</sup> Ni Anutu Engenatoango meficnuudeac kpacduae. Anutu yennoc neac kekecareng uayagoc faima uaya nearu kpsidarude. <sup>3</sup> Ye memefiha kurumennunac sueu imocngo ebicfunac mesinuude amma ngic mematiti anenggec imoc yenemma game kpekpeu faiyunude. Anutungo yoac dedzege amma imoc modackecde nga ye yoac modac modac Kebu amma faka imoc faiu hanemmeude. *Selac*

<sup>4</sup> Raiong yangtoa yeni yang siricfu herenginaac homema bangecngic medacfocngina neyunuandae, ni botucnginau feduaenoc. Ngic yeneac enacngina imoc pokong nga tebemedaha isoc amma nedzarangngina imoc

dzikacac soe isoc enara monggoc. <sup>5</sup> O Anutu, afegugec imocngo kurumenga kurumenga ferahema embeso. Ge kucga nga kibikperagiaga bangecfu faina mau bangectoa bangec sokoma fedacbeso.

<sup>6</sup> Yeneng neac ufic faigecac ni ebic kuneng meficgeba neac sinnu teng mong usuma yenaoc teng imohai kemegec. *Selac*

<sup>7</sup> O Anutu, herenango ge seria meguma kecbade, oc, herenango seria meguma kecbade. Ni yegec heima music mema afegubade. <sup>8</sup> Ubaongana ge negengboribesena. Gitakurere ngeni gboribisia. Ni ama negemma yegec heima amabangecac kperagi midibade.

<sup>9</sup> O Kebu, ni ngiha ngiha botucnginau ge ubangerec megemma bangec monunac ngicngac botucnginau namma geac yegec heima dengeregubade.

<sup>10</sup> Geng yoc dedzege amma imoc modackecneac nga imocngo wiac herea amma kurumenga kurumenga manau naric enude nga ge yoc modac modac Kebu. Geac faka imocngo wiac herea amma sawau emma hoeng kpesereyunuude. <sup>11</sup> O Anutu, ngicngac afegugec, imocngo kurumenga kurumenga ferahema embeso nga ge kucga nga kibikperagiaga faina bangecfu mau bangectoa bangec sokoma fedacbeso.

## 58

### *Anutu wadae*

Yegecgareng yearu. Yegec kpara: Ge mi kpetotiebesena, imocac uba modacma miktangyegec yomoc heibesonga. Dawidingo yegec yofi heiec.

<sup>1</sup> Nemu hania hania, ngeni yoara kpac kecma desi desi ua dindingac mi megecde. Ngeni yoacfu ngicngac yeneac yoc isingising ikohau meandae. <sup>2</sup> Ngeni herenginango negen negeng mangana arenggekecma maringinango bangecfu yarefaka fingerudeac ua mederema yemmeandae.

<sup>3</sup> Ngicngac Anutu ngadehema mangana megecdeac ayemmeande, yeni nonggo heremanaunacngoc sing segema fingeema kecdae. Yeni fingegec-funacngoc sing segema ikocyoc deandae. <sup>4</sup> Yeni marasingngina mangana imoc boidzocac marasing mangana isoc ande nga kpate kedzafongngo kedzaha mefonggeande, yeni ifi isoc andae. <sup>5</sup> Boidzoc ifiango dzinacngic ubaudumengngina naric mi negenude nga dzinacngicngo ye tobanggema uatao mema udumeng gombunga meficgeu kpatengo imoc naric mi negenude.

<sup>6</sup> O Anutu, geng enacsicngina dumbengnginaunac kpedzamena. O KEBU, geng raiong gboria baicngina kpetackema meickena. <sup>7</sup> Geng sueyununa yeni dokungo worama kengande, ifi isoc kembisia. Nga ngicngac yeneng kpinding tidzamegec moronggeande, yeneng ifi isoc ge negemmana ngic Anutu ngadehema mangana megecdeac ayemmeande, yeni tidzameyunubisia. <sup>8</sup> Geng negemmana yeni gowohahacngo homema hoaeande, ifi isoc hoaebisia. Nga geng negemmana yeni sabacngo yadiseri mi amma nonggo heremanaunac homemea fingeema wenackiwa naric mi henude, ye isoc ambisia. <sup>9</sup> Ngic Anutu ngadehema mangana megecdeac ayemmeande, yeni sabanginagoc me dzangge dzanggea kecgec yeng meicyunuu kpac ambisia. Enang bebedaha gerecngo dzeu fitickema yacande, Anutuac herebungo dzefticyunuu yeni ifi isoc yachisia.

<sup>10</sup> Yeni kopocsicnginaac turunga ifi fingeeyemmeu ngic dindingac yeni imoc hemma sogai gecde. Yeni ngic Anutu wama kopocsic meficgegecdeac ayemmeande, yeneac sacngina tima haningina dzuacgec <sup>11</sup> ngicngac yeneng

degecde, “Foracngoc, ngicngac dindingac yeni angammemenginaac foraya gombunga fingecyemmeude. Foracngoc, Anutu kecde, ye bangecfu desi desi ua mekecde.”

## 59

### *Ge mesinuna*

Yegecgareng yearu. Yegec kpara Ge mi kpetotiebesena, imocac uba modacma miktangyegec yomoc heibesonga. Saurongo ngicfora Dawidi kpebugecdeac sueyunuu Dawidiac ama garenggema nanggec yeng yegec yofi heiec.

<sup>1</sup> O Anutuna, ge ngabafocna yeneac mariunac mesinuna. Ngic nubesonga andae, geng yeneacunac ongonnuna. <sup>2</sup> Yarengic nga ngic sacna hetingebesoy ayemme, ge yeneac mariunac mesinuna.

<sup>3</sup> O Kebu, ni singyoac kpema kopocsic mong mi meficgeai nga yeni ine yagungoc kekecna meickegecdeac nembima ngonducnema tomai kecdae nga yarengic ngabatoanginagoc yeni nugecdeac negemma yoac dzegedae.

<sup>4</sup> Ni faka mangana mong mi anai nga yeneng ine efaima hama nubesoy andae. Ge kic fima ebicna hemma yacma meficnuna. <sup>5</sup> O KEBU, Anutu kurumenggac wasaiareng kunengngina, ge Israe neneac Anutu. Ge gauunac yacma bangec monnunac ngicngac mi negenggudae, yeni sasawa kopocsicnginaac amma turunga kpouyemmena. Ngic ikocngina mesufuma yarefaka arengandae, yeni mi onggonyunubesena. *Selac*

<sup>6</sup> Yeni wenasoc ama marai anu dzigenema hama kasi isoc taua kpema taonnu hofoc hofoc kengha angandae. <sup>7</sup> Yeni enacnginausing wiac urunggec maude, imoc hembesena. Yeni enacbicicnginaunac wiac urunggec maude, imoc dzikacac beang isoc. Imoc enara monggoc anu deandae, “Mongngo yoacnina naric mi negenude.”

<sup>8</sup> O KEBU, geng ine dzomoreyemmema bangec monnunac ngicngac ge mi negenggudae, yeni tenicfu faiyununade. <sup>9</sup> O Anutu, ge neac memeserina nga amana seria, imocac ni kic gearu fibade. <sup>10</sup> Anutuna yeng yoac dedzege amma imoc modarude. Ye warainemma kemma sinnu meficnuude. Anutunango sing meficgeu ni firang amma ngabafocna memayunuma yenembade.

<sup>11</sup> O KEBU, ngicngacfozna yeneng wiac imoc nigecyunubaac ngabafocna mi kpebucyununa. Ge ngic ifia kucgango memayununa kucmama nga goroc goroc amma kecbisia. O Kebu, ge kasonina. <sup>12</sup> Yeni enacnginaunac yoac mangana mau kopocsicgoc amma sowec nga ikocyoac degecde. Yeni wiac imoc negenggec engena anu imocngo botacngina amma meyunubesoy. <sup>13</sup> Ge herebugango gbokoyunubesena. Oc, ge gbokoyununa kpac andacbisia. Ifi anna bangectoa bangec tegia fekendaeu ngicngac yeneng yofi negenggecde, “Anutungo Yakoboac areng garengyunukecde.” *Selac*

<sup>14</sup> Yeni wenasoc ama marai anu dzigenema hama kasi isoc taua kpema taonnu hofoc hofoc kengha angandae. <sup>15</sup> Yeni yaka meficgegecdeac hofocma kengha amma mi gebecyunuudeu ngaba yombong amma arohogecde.

<sup>16</sup> Ni ine kucgaac amma yegec heigembade. Geng neac amana seria nga ebicnasou geac hoannu haba geng sufu sufuamana angkecnec. Ge yoac dedzege amma imoc modackecnec, imocac asoacngoc ubana miacma fakaga imocac ubangerec yegec heibade. <sup>17</sup> O Anutu, ge memeserina nga amana seria, imocac geac dedengerec yegec heibade. Anutu ge yoac nigoc dedzege amma imoc modacnade.

## 60

*Anutu, ge wanununec me?*

Yegecgareng yearu. Yegec kpara: Dzadzahaac lili dzaring, imocac uba modacma miktangyegec yomoc heima ubau faibesonga. Dawidingo yegec yofi heiec.

<sup>1</sup> O Anutu, ge nagdenunuma kpetotienunuma neneac ngaba annec. O Kebu, ge monggoc mengerenununa. <sup>2</sup> Ge bangec kpemindzahena usoc meu titing kuneng fingeru goroc goroc andeac geng titinga monggoc mengerena. <sup>3</sup> Ge ngicngacfogca kpendzengtoau fainunuma waing seria gumecnununa neinggac hanititinina goroc goroc anu sicsaufu kengha aning. <sup>4</sup> Ngicngac ge ewehiheigoc hoangugec yeni ine tebemedahaac sinnunac hesicyununadeac firac mong miacna yeni imoc hemma ihai kpedzucnema nanggecde. *Selac* <sup>5</sup> Ge ngicngacfogca neneac songo negennec, nga ebicfunac mesiyununadeac neni marifoigango dzikacfu meficnununa firang ambisina. Ge nunununaac turunga merennemmena.

<sup>6</sup> Anutu ye womongau tacma yoac deserima yofi deec, “Ni firang amma sogaima Sikeng ama mederema Sukoc bangec tume imoc medereba noboha noboha anu ngicngacfogca yemmebade. <sup>7</sup> Gireade nga Manasse yeri neac. Efaraing imoc wasai opocna nga Yuda ye ngictau yasuna. <sup>8</sup> Moabi imoc dzuac dzuac sokocna nga ni Edonggaru hanitabena ukuba yunuude amma ni firang amma Firistia bangec arohomiba negenggecde.”

<sup>9</sup> Mongngo nigoc kemma taong odaya seria imohai menuma Edong bangec fu hesicnuna kembeso. <sup>10</sup> O Anutu, gennoc wanunuma ukununudacnec. Ge wasaingicnina yenigoc dzikacfu monggoc mi kenganec.

<sup>11</sup> Ngicngo meficnunuude, imoc memefihagoc kpac. Imocac gennoc meficnunununa ngabafocnina yunubesena. <sup>12</sup> Neni Anutugoc namma kuctoaninagoc amma firang annide. Yennoc ngabafocnina mematiti ayemmeude.

## 61

*Kpegangga bageu*

Yegecgareng yearu. Gitakurere nga noc kpema yegec yomoc heibesonga. Dawidingo mitiyegec yofi heiec.

<sup>1</sup> O Anutu, ge kpakpacna negemma nunununaac kedzac kpema negenna. <sup>2</sup> Ni bangectoa bangec tegiau namba woubocna kucmama anu kpacguduae. Ge hesicnuna hoc peperandzi herea mong feracnude, imohai kemma nambisira. <sup>3</sup> Ge neac sufu sufuama. Ngabafocna yeneng nubeso anggec geng amana herea nga seria annec.

<sup>4</sup> Ge kporuchedzougau fainuna ni nasoya nasoya ihai kecbade. Ni geac kpegangga bageu sufuma kecbadeac anende. *Selac*

<sup>5</sup> O Anutu, ni yoac deserima deai, imohai ge imoc negemma ngicngac ewehiheigoc hoanguandae, ge maridzoming desiyemmenec, imoc ni ifingoc desinennec. <sup>6</sup> Ge ngictauac kekeha mehereena kifa homac kecbeso amma apangabofora yenembeso. <sup>7</sup> Anutu, ye geac kicfu nasoya nasoya ngictau tatahau takecbeso. Ge yoac modac modac Kebu amma yoac dedzege amma yoacga imoc modackecnec amma fakaga imocngo ge negemmana ngictau henggareng ammbesa.

<sup>8</sup> Geng ifi anna ni dedeserina imoc wenacsoc modackecma geac kpac kuneng nasoya nasoya heiwayong memibade.

## 62

*Anutuac kicfu ruae*

Yegecgareng yearu. Yegec kpara: Yehudutung, imocac uba modacma yegec yomoc heibesonga. Dawidingo mitiyegec yofi heiec.

<sup>1</sup> Anutungo ebicfunac mesinuu ubaonganango yeac hoannu ruae meficgeude. <sup>2</sup> Ye neac hoc peperandzi seria amma ebicfunac mesinuude. Ye amana seria anu mongngo menuu goroc goroc naric mi amba yeng naric mi meicnuude.

<sup>3</sup> Ngeni ngic kuha kpac ngabaac siricfu kpekecdae, imoc wisickebeso. Ngeni sasawango ye kpema bangecfu ukuyombonggebeso andae. Ye oda kuha kpac nga odabasic dzame dzame isoc nanu ngeni ye memanganegec tod- inggema makpeudeac negemma kpekecdae.

<sup>4</sup> Ye ngickuneng tatahau taru yeni negen negengina arenggema yofi negengandae, "Ye tatahaunac meickebesonga." Yeni ikocyoac negenggec ngereu enacnginaunac kenecyoac maande nga herengingango ine sowecyunugecde. *Selac*

<sup>5</sup> Ni Anutu negensima tomai kecha foraya fingerudeac ubaonganango yeac hoannu ruae meficgeude. <sup>6</sup> Yennoc neac hoc peperandzi seria amma ni ebicfunac mesinuude. Ye amana seria, imocac wiac mongngo menuu goroc goroc naric mi ambade. <sup>7</sup> Neac memengerec nga ewehihei imoc Anutuarunac haude. Yennoc neac hoc peperandzitoa seria nga ni Anutuac hoannu kemma sufubade.

<sup>8</sup> O ngicngac, ngeni nasoya nasoya Anutu negenserima kecbisia. Yeac hoannu kemma sufuma kecnide. Ngeni herenginaw wiac sasawa fedacde, imoc ye edebisia. *Selac*

<sup>9</sup> Ngic mamea yeni ngicngo asu naso mocgu heiandae, imoc wiac ifi. Ngic engena kecdae, yeni firang onga ikoha fifu kpac angande, ifi isoc andae. Sigeriu faiyunugec yeni ebicngina kpac. Yeni efea yombong nga enacasuac ebic sigeriu yeneac ebic ferahede.

<sup>10</sup> Ngeni hodzinnu wiac mema finacgoc anggecdeac mi negensibisia nga yarefaka amma finacnginagoc anggecdeac mi negensima sicsauc amma imocac tomai kecbisia. Ngeni dzofinacngina monggoc nga mongoc anu mekecgecdeu negen negengngina imohai mi faigec febeso.

<sup>11</sup> Anutungo naso mocgu yoc yofi deec, imoc atac yohockang anu negenai, "Ni Anutu kuc mingina nga <sup>12</sup> ni yoc dedzege amma imoc modacbade." Kebu ge ngicngac tembus tembus angammengina hennegeng amma turunga kpouyemmenade.

## 63

*Wosoefacga*

Dawidingo Yuda bangec kisiu sufuma kecma mitiyegec yofi heiec.

<sup>1</sup> O Anutu, neac Anutuna, ni ge hofocgukecduae, imoc bangec gbangge gbanggeango dokuac ammiande, ni geac ifi isoc anende. <sup>2</sup> Ni kuc nga ewehiheiga hembadeac kicna aratagau fima genai.

<sup>3</sup> Geng yoc dedzege amma imoc modackecneac, fakaga imocngo kekec ferahadeac amma dengeregubade.

<sup>4</sup> Ifi anu ni kecbadesoc kecegubade\* amma geac kpacfu numuma marina miacba enu. <sup>5</sup> Geng ubaongana yakaac kuc nga kerehagoc megume ammina wakeu enacbibicnango sogac sogaiac yegec heiu enacnango ge dengeregu-ude.

<sup>6</sup> Ni kecnegeng naso amma tofocnacsoc fefenau fema ge negensiguma geac negensikecma feanduae. <sup>7</sup> Gennoc neac memeficngic, imocac geac kpegangga bageu sogaima kecma yegec heigembade. <sup>8</sup> Ubaongana gearu kpeketaheu marifoigango nanggenunade.

<sup>9</sup> Ngicngac kekecna kpetotiebeso andae, yeni ine homec amau kemegecde.

<sup>10</sup> Yeni dzikacfu kenggec beangngo feracyunuma kpebucyunuu katekasi yeneng sebingina negecde.

<sup>11</sup> Ngictaungo Anutuac sogaiu ngicngac sasawa yeac kpacfu dedeseri deandae, yeneng yeac negenggec engena angande. Ikocngic yeneac enac ine fitec kpegecde.

## 64

### *Sufu sufuu mi tarude*

Yegegareng yearu. Dawidingo mitiyegec yofi heiec.

<sup>1</sup> Anutu, ni ebicyoacna edeguba ge ubaudumenna negenna. Ngaba yeneng nubeso andaeac kengecnude. Ge imocac onggonnuna. <sup>2</sup> Ngic yeneng Anutu ngadehema mangana megecdeac ayemmeu sufu sufuu yoac dedzege angandae. Geng yenearunac mesufununa yeni mi meficnubisia. Yarengic yeni memanganenugecdeac areng faigec ge mesufununa yeni mi meficnubisia.

<sup>3</sup> Ngic yeni soe dzumuandae, yeni ifi isoc nedzarangngina dzumugecde. Ngic yeni tebededaha kpesaima ukuandae, ifi isoc kpesaima yoacngina hodungagoc ukugecde. <sup>4</sup> Yeni sufuma fema ngic kopocsic mong mi meficgeec, ye wedecandae. Yeni kengecngina kpac kecma bic yombong wedecgecde.

<sup>5</sup> Yeni yarefaka megecdeac negen negeng seria mekecma ning kpema sufu sufuu subangina idegecdeac yoac denegeng angandae. Yeni yofi negemma deandae, "Mongngo naric mi nenenude, kpac." <sup>6</sup> Yeni mangana dedzege amma deandae, "Neni wiac imoc gombunga yombong arenggedinggac naric annide." Foracngoc, ngic ubaherenginaac negen negeng, imoc kemea yombong, i.

<sup>7</sup> Ifi ammagec Anutungo tebea yenearu kpesaima wedecyunuu yeni bic yombong kubecnginagoc amma mayunuude. <sup>8</sup> Ye nedzarangngina mangana imocngo kpetotieyunuu kpac anggec ngicngac ogofocngina yenengan- dae, yeni faka imoc hemma hata gigigece.

<sup>9</sup> Ngicngac sasawa yeneng Anutungo faka meec, imoc negensima deyadigec ngicngac sasawa kengec anggecde.

<sup>10</sup> Anu ngic dindingac yeni KEBUNGO faka meecac sogaima yeac hoannu hama sufuma kecbisia. Ngicngac uba kongaha kecandae amma herengin- au ikoc nga hamangec mong mi fede, yeni Kebuac negenggec wiac engena ambeso.

\* **63:4:** Anutungo meficnunu nanang bangecngicngacnec yumia kecma Anutuac keceyoac debisina, yoac imoc mitikibi homac fede nga yeng faka imocac negenu ngereeu- de. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

## 65

*Wiac gombunga nemmeude*

Yegecgareng yearu. Dawidingo yegec nga mitiyegec yofi heieic.

<sup>1</sup> O Anutu, Siong taonnu ge erieendzong megembesonga nga geac kicfu namma dedzegeninaac fora modacbisina. <sup>2</sup> O Kebu, ge nunumuac turunga merengannec. Bangeengicngac sasawa yeni gearu hakecdae. <sup>3</sup> Neni ngicngac ogofocnina memanganeyunuinggac ebic imocngo memanunuu geng singyoac kpeinggac kopocsicnina wanec.

<sup>4</sup> Geng ngic mong meisinggema hoanggema wangepna womonggau kefudeac haude, ngic imoc ye kenehagoc. Neni geac amaac nga womong kpetiacac gombungagoc kecni gebecnunuu kecnide. <sup>5</sup> O Anutu, memengerecnina, ge nunumunina negemma fakaga mi hehena amma turunga merennemmema ebicfunac mesinununade. Bangec tegia fekende, imocac ngicngacfora nga ngicngac kondung ferahema tegiau kecdae, yeni sasawango kekecnginau wiac fora fingerudeac ge negensiguma tomaiga kecgede. <sup>6</sup> Ge kucga heina kemeu kucgango tiki meficyunuma tatacnginau faiyununec. <sup>7</sup> Kondung yeni kunengngoc arohogec ge arongina menomanena ning kpegede nga kondunggac siri udumengtoagoc kpeande, imoc menomanena ning kpema feude. Ge ngiha ngiha yeneac dzomugerec ifingoc memonanenade.

<sup>8</sup> Ge ngicngac negensinggugecdeac kucfaka meannecc, imohai ngicngac bangec feracyunudacma tegiau kecdae, yeni imocac kerectegec anggede. Geng ama werec werekengaunac hanahema kemma bangec wenac keme kemeau wisickeude, imohai ubangerec ayemmena ubangerec negemma kunengngoc arohogecde.

<sup>9</sup> Ge bangec yugucke kia mina bangec kerehagoc yombong anudeac aminade nga Anutuac doku, imohai doku efea kpac fede. Ge bangec ifi mengerema ngicngac semengngina meficgeyemmenade. <sup>10</sup> Ge kia dena kpema semeng sereau kia kehema semeng homac nadzicmiude. Ge bangec buriric mesorongaina kia kpema bangec meyumeu bangecac semeng sasawa kenehena fora gombunga fingerude. <sup>11</sup> Ge kifaacsoc semeng homac meficgena imocngo kifaac iraya isoc anude. Geac hanititigaac bangec imoc kerehagoc nga semengtoayagoc. <sup>12</sup> Bangec kisiu ramaburumakaac bangec imoc kpindzinggo wakedarude. Bangec buma yeni ubangerec heigec kemeu sogac sogai anggede. <sup>13</sup> Ramaburumakaac bangec yeni ramaburumaka habu homac wamba isoc heigec kemeu sokodacgede nga bangec tumia emai imoc semengngo mewakeyunude. Wiac sasawa imoc yeni kpeturanggema arohoma yayi kpema yegec heigecde.

## 66

*Dendzerenggegec*

Yegecgareng yearu. Yegec nga mitiyegec.

<sup>1</sup> Bangecfu wiac sasawa, ngeni Anutu dendzerenggema yayi kpema <sup>2</sup> yegec heima yeac kpac kuneng heiwayong memima ye oyang boyang memima <sup>3</sup> yofi debisia, “Geng wiac angannec, imoc wiac engena yombong, imocac kerectegec andimbe. Ge kucga monggoc, imocac ngabafocga geac bageu kecma ngonducnegecde.

<sup>4</sup> Bangec sasawango geac kicfu ngocducnema numugemma yayi kpema yegec heigendae. Yeni geac kpac kuneng heiwayong memima yegec heidae.”  
*Selac*

<sup>5</sup> Ngeni hama Anutungo ua meec, imoc hembisia. Ye bangecngicngac nenanggoc kecma ua bibiagoc meude. <sup>6</sup> Yeng kondung heimerenu bangec kerenga anu ngicngac yeni haningo doku imoc ferecgegec. Ye faka imoc meecac amma nenang sogac sogaiogc kefing. <sup>7</sup> Ye nasoya nasoya kuhagocngo wiac sasawa garenggema kiwango bangec monnunac ngicngac sasawa yenemma kefude. Yoackpeke yeni sebingina mi meembisia. *Selac*

<sup>8</sup> Ngiha ngiha ngeni Anutinina kenehema\* enac udumengnginango ye oyang boyang ammigec ngicngac yeni negendachisia. <sup>9</sup> Yeng garenunuu gbori kecdae, yenigoc kecni ye haninina garenggeu mong mi tiposockenide.

<sup>10</sup> O Anutu, imoc yofiac, ngic yeni siriwa isingeandae, geng ifi isoc faitobannu fainunuma isinnununec. <sup>11</sup> Ge uficfu fainununa kemeni ge ebic kuneng witininau faina imoc tofohokefing. <sup>12</sup> Geng negemmana ngic yengeng orucninau tima kenggec. Neni gerec manau kehema dokuu kemema kening, fora. Nga geng yaguc menunuma amabangec tumiatoau fainununa wiac monggac mi obohonide.

<sup>13</sup> Ni womonggau hama sese ohogemma wiac ambadeac dedeseri deai, imoc ambade. <sup>14</sup> Ni ebicfu kecma wiac ambadeac enacbibicnango yoac deserima deai nga yoac enacnango deai, imocac <sup>15</sup> ramaburumaka kerehagoc sese negemma gembade. Nga rama ngiwa sese dema ohoma hosuc heima burumaka nga noning ngiwa gamba sese ambeso. *Selac*

<sup>16</sup> Ngicngac Anutu ewehelheigoc hoanggeandae, ngeni hama yoacna negembisia. Yeng nearu ua meec, imoc edengunuba. <sup>17</sup> Enacbibicnango ye kuenengngoc kpacba nedzarannango ye bic afehec.

<sup>18</sup> Ni ngicngac ogofocna memanganeyunubadeac negen negeng herenau arenggebai dede Kebungo neac kedzac mi kpebac. <sup>19</sup> Amma forangoc, Anutungo negennemna nunumunaac yoac negensima kefec. <sup>20</sup> Ye nunumuna mi ngadehema yoac nigoc dzegeec, imoc mi waec, imocac Anutu kenehebesonga.

## 67

### *Yaiyo kpegembisia*

Yegecgareng yearu. Yegec nga mitiyegec, gitakurere nga noc kpema heibesonga.

<sup>1</sup> Anutungo wosoefac anemmema kenecnunuma kicmesuyango neraran-nunubeso. *Selac* <sup>2</sup> Ifi anna ngicngac bangecfu kecdae, yeni geac haniaga negembisia nga ge ebicfunac mesiyununadeac kuc fegende, bangec monnunac ngicngac botucnginau kecdae, yeni imoc negembisia.

<sup>3</sup> O Anutu, ngiha ngiha yeneng afegubisia, yeni sasawango ge yaiyo kpegembisia. <sup>4</sup> Ge monde mondega kpac kecma ngiha ngiha siric mocguu isingyununade nga bangec monnunac ngicngac sing edzacyununa imoc modacgecdeac yeni ubangerec negemna sogac sogai yegec heigembisia. *Selac*

<sup>5</sup> O Anutu, ngiha ngiha yeneng afegubisia, yeni sasawango ohecga megembisia. <sup>6</sup> Anutu ye nenang Anutu. Yeng kenecnunuu bangecngo semeng gombunga meficgenemmeude.

<sup>7</sup> Anutungo kenecnunubeso nga ngicngac bangec tegia fekendaesoc, yeni sasawango ye ewehemima hoanggebisia.

\* **66:8:** Anutungo meficnunuu nenang bangecngicngacnec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereue. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)



## 68

*Anutungo firang ande*

Yegecgareng yearu. Dawidingo yegec nga mityegec yofi heiec.

<sup>1</sup> Anutungo yacma ngabafora yunu singсарarang kpema kecbisia nga yeac modzongina tiande, yeni yearunac worama kendacbia.

<sup>2</sup> Firangngo hosuc mefiranggeu kengkecde, geng ifi isoc kporacyununa worama kendacbia. Ngicngac Anutu ngadehema mangana megecdeac ayemmeande, yeni ge negemmana kerecngo gerec wegenau tacma sisingaiande, yeni ifi isoc Anutuac kicfu sisingaima kpac ambisia.

<sup>3</sup> Anu ngicngac dindingac, ngeni ubangerec negemma Anutuac kicfu sogaima kecbisia. Ngeni ubangerec homac yombong negemma sogabisia.

<sup>4</sup> Ngeni Anutuac yegec heibisia, ngeni yeac kpac kuneng heiwayong memma dedengerec yegec heibisia. KEBU hoennu tacma kengande, ngeni yeac kicfu sogaima yegec heima oeha memibisia.

<sup>5</sup> Anutungo kpetiac womongau tacde. Ye beging mang ayemmema hodzec yenengareng ayemmema onggongyunuude. <sup>6</sup> Anutungo ngicngac dzen-gong amagerec meficgeyemmeu tosofocnginagoc kecgecde. Ye witicngic witicamaunac mesiyunuu yeneng mama kecma wiac monggac mi obohogece. Yoackpekpe ngic yeni ine bangec dzangge dzanggeau kecgecde.

<sup>7</sup> O Anutu, geng warac ngicngacfocga waraiyemmema bangeckisiusing wangecyununa kenggec. *Selac* <sup>8</sup> Imohai bangecfu usoc meu Anutu, Sinai bangec gbangge gbanggeac Anutu amma Anutu, Israeac Anutu, kurumenga kurumenga yeneng geac kicfu kia faigec maec.

<sup>9</sup> O Anutu, geng kia faina bangecfu mau dokuac mi obohoing. Ge bangec gbangge gbanggea soc kpema nemmea kuha mina icngo monggoc kpedzienu bangec imoc kerehagoc anec. <sup>10</sup> Ifi anu kpebunggango bangec imohai kemma tacngisigec. O Anutu, ge wiacga homac fedec ubangerec-gaac imoc mema makpekpea yemmena wiac monggac mi obohogec.

<sup>11</sup> Kebungo yoac deu ngicngac homacngo siduc imoc tofohoma dekperagima <sup>12</sup> degec, "Ngictau yeni wasaingicfocnginagoc bic kemma woradacgec ngicngo dzikacfu firang amma iwai megec ngac yeneng amanginau kecma imoc hedzicma megecde. <sup>13</sup> Amma dzikacac hepuc amau tacgec yeni neng dzongina siriwa nga gol tengging tengging isoc ifiango sebingina soko soko faec." <sup>14</sup> Anutu kpudamyagocngo ngictau yunu singсарarang kpegec imohai nomang kia isoc mama Dzarimong tiki semeec.

<sup>15</sup> O Basang tikitoa tiki, ge bumaga homac nga herea herec, o Basang tiki. <sup>16</sup> Tiki bumaga homac nga herea herec, geng nocac kichodung amma Anutuac tikiu kic finec? Anutu yengenaoc tiki yomoc yeac anudeac segerema ye ihai ngictau kecma nasoya nasoya tacyac anude, ge nocac imoc kihodung amma hengkecnecc?

<sup>17</sup> Anutungo dzikacac keretaha tausenga tausenga mehadac. Ye Sinai bangec wama kpetiac womongau emma kecde. <sup>18</sup> Geng wi sawau yombong emma witicareng witicyunuma wangecyununa arenggau kenggec. Ngic yeneng ubangerecac wiac genggec. O KEBU Anutu, geng ihai kecnecc nga ngic yeni geac modzongina tiu yoacga kpeandae, yeni ifingoc ubangerecac wiac genggecde.

<sup>19</sup> Kebungo nasosoc sesehenunuma nanggenunukecde, ye kenehebesonga. Anutu ye memengerecnina. *Selac* <sup>20</sup> Anutunina ye memengerec mingina nga KEBU Israeac Anutu, ye homecfunac mesinunuudeac mingina.

<sup>21</sup> Ye ngabafora yeneac oruc kpedzameu ngic mangana mekecma nasosoc kopocsicnginagoc kecandae, yeneac orucsicngina dzoeagoc hetackeude.

<sup>22</sup> Kebungo yofi deec, “Ni ngic imoc Basang bangecfunac merengyunubade nga kondung buya keme kemeaunac meyunuma erebade. <sup>23</sup> Ifi amba ngeni haningina yeneac sacngo nadzicgecde nga kasifocngina tosea ifingoc yemmegec sacngina aberegecde.”

<sup>24</sup> O Anutu, hombanggac habuga arenggoc hagec ngicngac yeneng gengecde. Neac Anutu ngictauna habuya arennu hama kpetiac womongau enu ye henggecde. <sup>25</sup> Yegec heihei areng yeneng waraima wiac kpegec music fingeande, yeni wisic wisickeau hagec ngacnaroang yeni tambarangina kpema botucnginau hadae.

<sup>26</sup> “Kpebung habutoa manau Anutu kenehebesonga. \* O, Israeac fingeceha, ngeni sasawango KEBU kenehebisia.”

<sup>27</sup> Benyaming areng yeni areng kapiango enara meyemmu kendae. Yuda arennunac ngictau kekecac areng habutoango kecmagec Dzeburung arenggac ngictauac areng nga Naftari arenggac ngictauac areng yeni ifingoc modacyunadae.

<sup>28</sup> Anutu ge kucga kpedzucnema efaina. O Anutu, ge kucgaac hania warac mekperagima edzacnununec, imoc monggoc edzacnununa. <sup>29</sup> Womongga Yerusarennu tacdeac ngictau yeneng ubangerecac wiac mehama gendae.

<sup>30</sup> Yang hania hania dokuac haseng manau kecandae, ge yeneac yoac ngabasiric dena kate burumaka ngiwa yeni habunginagoc kenggec ngic yeneac burumaka medaha kapia botucnginau kegec ge gorongina kpebesena.† Geng yeni memayununa siriwa toseatoa mehama gembisia. Ngic sasawa dzikacac songea negengandae, yeni yununa singsararang kpebisia.

<sup>31</sup> Ngic kuneng yeni Aigita bangecfunac hagec ngic Etiopia bangecfunac yeni maringina bic miacma Anutuaru hagecde.

<sup>32</sup> Bangec areng ngictaunginagoc kecdae, ngeni Anutu yegec heimima Kebu yegecfu yaiyo kpemibisia. *Selac*

<sup>33</sup> Negenggec, yeng kurumenga kurumenga hanahema fingegec, yeneac witinginau tacma kende. Ye ubaudumenga miacma kunengngoc yombong kpacde.

<sup>34</sup> Anutu ye kuhagoc, imoc deyadibesonga. Yeng ngictauac kucgoc amma Israeac ngicngacfora garengyunude. Yeac kuc imoc sawau fedengoc. <sup>35</sup> O Anutu, ge damu damugagoc amma ge kpetiac womonggau kecneac. Israeac Anutu ye ngicngacfora gareng anggecdeac kuc nga sebinginaac kuc yemmeude. Anutu kenehebesonga, hallelu Yac.

## 69

### *Ebic witiau kecduae*

Yegecgareng yearu. Yegec kpara Lili dzaring, imocac uba modacma yegec yemoc heibesonga. Dawidingo mitiyegec yofi heiec.

<sup>1</sup> O Anutu, dokungo ubanau erema feracnubeso andeac ebicfunac mesinuna. <sup>2</sup> Ni goteng dzohonnu kemebeso anduae, imohai titiseriac wiac mong mi fede. Ni doku dzohong kunennu kemeba doku tunggbaungngo semenuu

\* **68:26:** Anutungo meficnunu nenang bangecngicngacneac yumia kecma Anutuaac kenecyoac debisina, yoac imoc mitikibiu homac fede nga yeng faka imocac negenu ngeregeude. (Fingec fingeac 9:26, 14:20, 24:48, Mitiyegec 16:7, 26:12, 103:22 nga goa homac fede.) † **68:30:** Dawidi ye Israeac yeneac ngabafocngina Aigita ngic yeneac negensima yoac heima deec.

<sup>3</sup> memeficac kiackecba kucna kpac anu ngorucbonna gbanggede. Ni Anutungo meficnuudeac kicfifi kecba kicna kundung kpebeso ande.

<sup>4</sup> Ngic yeni hania kpacfu ubango ukunudae, yeneac kpete imoc orucdzonaac kpete ferahade. Ngabafocna yeni homac nga ngic kucnginagoc ikoc amma neac ngadeyoac dema memanganubeso anggede. Ni wiac mong hamangec mi meai nga yeneng ine turunga yemebadeac dekecdae.

<sup>5</sup> O Anutu, ni kapa ua mekefai, imoc geng negennec nga manganana hania hania, imoc geac kicfu naric mi sufuude. <sup>6</sup> O KEBU Anutu, kurumenggac wasaiareng kunengngina, ge negensigugoc fora fingerudeac tomai kecdae, yeni neac amma ngic yeneng game kpekpeu faiyunubauac kpae heiyemebesena. O Israeac Anutu, ngicngac ge hofocgudae, yeni neac amma ewehiheia kpac kecbauac faka imoc kpetaribesena.

<sup>7</sup> Yeni geac ammanoc deendema anenggec gamenuu imocngo kicmesuna semeu kicmesuna sufukecduae. <sup>8</sup> Ngic ogofocna yeni negennenggec ni monnunac isoc anduae nga dacmunafocna yeni negennenggec kuric isoc anduae.

<sup>9</sup> Ni amawomonggaac amma herena gerec dzema dzendandannuude nga ge dedenggaring anggenggec imocngonoc neac witiu enude. <sup>10</sup> Ni kiacma yaka waba yeni detenic anenggec <sup>11</sup> ubamanganggac wamba heiba desusuic anenggec.

<sup>12</sup> Ngicngac yeni taonggac sobennu tacma ni dedzomoc anenggec ngic doku seria neandae, yeni neac kiki kpema yegec heiandae.

<sup>13</sup> O KEBU, ni sifu gearu numuduae. O Anutu, geng yoac dedzege amma imoc modackecnec, imocngo mi kpac anudeac amma nasoya hau geng turunga merennembesena. Yoac modac modac Anutu, ge meficnubesena.

<sup>14</sup> Ni goteng dzohonnu kemebaiac meicnuna. Geng negemmana yeni ngabafocna yeneac mariunac mesinuma doku dzohonnunac onggonubisia. <sup>15</sup> Doku tunggabaunggo semenubaac kpae heimina. Doku dzohongngo gbokonubaac me tenggo menuma naguya heibaac geng kpae heiyemmena imoc wabisia.

<sup>16</sup> O KEBU, geng yoac dedzege amma imoc modackecnec, imoc gombunga yombong nga ge wosoefacga efea kpac, imocac kicmesuga nearu monggoc merenna. <sup>17</sup> Ge kicmesuga kingang ngicga nearu mi sufubesena. Ebic witiu yombong kecduaeac ge bic yombong turunga merennenna. <sup>18</sup> Ge neac wegenac hama bummenuma ebicfunac mesinuma ngabafocna yeneac amma witicfunac mesinubesena.

<sup>19</sup> Ngic dedenggaring anemma game kpekpeu fainugoc goiheiheia kpac kecduae, ge imoc negemma ngabafocna sasawa negengyunudacnec. <sup>20</sup> Yeni dedenggaring anemma herena kpedzamegecac ubaebictoa meficgema kecduae. Ni negemba goa yeneng neac ubangina manganeudeac kic fima mong mi meficyunuma memeseringic hofocyunuma mong mi meficyunuai.

<sup>21</sup> Yeni wiac marasing manganagoc nebadeac gumecnuma doku aengagoc nebadeac nenggec.

<sup>22</sup> Yeneac tatak nasoac nenedoku, imoc geng negemmana botac isoc amma mendangyunubeso nga ogofocnginagoc sesegerec yang negec, imocngo suba isoc amma meyunubeso. <sup>23</sup> Yeni ge negemmana kicngina kundung kpeu wiac mong naric mi hemma tinicngina nasosoc dendeng kpekecbeso.

<sup>24</sup> Ge herebuga yenearu kpakena imoc gerec isoc dzema feracyunuma yeneac witiu feu <sup>25</sup> yeni amabangecngina kisi fingeru ngic mongngo yeneac kporucbedzonginau mi tacbeso.

<sup>26</sup> Geng ngic hanahema yununa yeneng torokpema yunukporac ayemmedae. Geng ngic dzoboya yununa yeneng kpendzengngina monggoc meyandiandae. <sup>27</sup> Geng yoacfu torokpeu torokpe faiyunubesena, yeni geac memengerecfu mi torokpebisia. <sup>28</sup> Geng negemmana yeni kpacngina kekecac kibiunac dzuacbesonga amma ngic ddingac kecandae, yeneac kpacarennu mi kpeturanggebesonga. <sup>29</sup> Ni ine ubaebicgoc kecma kpendzeng kpema kecduae. O Anutu, ge memengerecngano ni ongonnubeso.

<sup>30</sup> Ni Anutuac kpac kuneng yegecfu yayiyo kpemima ubangerec memima afeheba <sup>31</sup> KEBUNGO imocac negenu ngereede. Imocngo burumaka ngi-waac sese ferahama burumaka baiha nga gbongagoc, imocac sese ferahade. <sup>32</sup> Ngic yeni ogofocngina ebicfu faiyunugec yeneng ubaebicgoc andae, yeninoc imoc hemma ubangerec negembisia. Ngicngac Anutu hofocandae, ngeni herengina kekecgoc monggoc anude. <sup>33</sup> KEBUNGO ngicngac iwaiac obohohecandae, yeneac nunumu negengkecde, ye ngicngacfora witicamau kecdae, yeni naric mi wayunuude.

<sup>34</sup> Kurumeng nga bangec ngeri ye dengereec kondung nga kondung manau wiac sasawa kenghaandae, ngeni ye dengerebisia.

<sup>35</sup> Imoc yofiac, Anutungo Siong ebicfunac mesima Yudaac taong fekendaemoc monggoc heigboriyunuma amangina meyemmeude. Yeac kingang ngicngacforango tacngisima bangec imoc mema mingina anggecde. <sup>36</sup> Kingang ngicfora yeneac nambaracfocongina yeneng maridzoming dema bangec imoc megeg ngicngac yeac kpac kuneng songogoc hoanggeandae, yeni ihai kecgecde.

## 70

### *Ge bic hama meficnuna*

Yegecgareng yearu. Dawidingo nunumuac mitiyegec yofi heiec.

<sup>1</sup> O Anutu, ge hama ebicfunac mesinubesena. O KEBU, ge bic hama meficnuna. <sup>2</sup> Ngic kpebucnubeso andae, yeni geng negemmana game kpekpeu faiyunugec oboc kpoboc ambisia. Nga memanganenubeso ayemmeande, geng yeni memayununa eweheiheia kpac kecma dzigenebisia. <sup>3</sup> Ngic yofi denengandae, “Naric yombong, naric yombong.” yeni yenang gameyunuu dzigenebisia.

<sup>4</sup> Anu ngicngac ge hofocgudae, yeni geac amma sogaima ubangerec negenggec ngicngac geac memengerecga songogoc hoanggeandae, yeni monggoc nga monggoc yofi debisia, “Anutu ye engenatoa.”

<sup>5</sup> Ni ine makpekpea amma iwaiac obohoma kecduae. O Anutu, ge nearu bic hana. Ge memeficna nga ebicfunac yungec yungecngicna. O KEBU, ge naso mi ukuma nearu bic hana.

## 71

### *Yada yeneac nunumu*

<sup>1</sup> O KEBU, ni geac hoannu hama sufuma kecbade. Ngic yeneng desofoc anembauac nasosoc kpaee heiyemmekecma <sup>2</sup> fakaga ddingac modacma ebicfunac yungecununa. Ge kedzacga nearu faima ebicfunac mesinuna. <sup>3</sup> Geng neac hoc peperandzi seria nga sufu sufumana amma ama seria anembesena. Ge neac hoc peperandzi seria nga amana seria annecac

yoac edeyununa ebicfunac mesinubisia. <sup>4</sup> O Anutuna, ge yarengic yeneac mariunac mesinuna. Ngic singkpekpe nga godzungic menugec geng maringinaunac mesinuna.

<sup>5</sup> Kebu, ni negen negensinna gearu faiba fora fingerudeac tomai kecduae. Ni hanahema sebigbori kefai kecma yaguc, imoc KEBU negenseriguma kecduae. <sup>6</sup> Ni nonggo heremanaunac mi fingecmangoc, imohacnac geng naggenuna kefai nga gennoc nonggo heremanaunac meficnunc. Ni nasosoc ge yaiyo kpegembade. <sup>7</sup> Neac kekecna imoc ngic homac yeneac kicfu wiac kengehagoc yombong nga gombunga kpac, ifi isoc angande, fora. Nga ge sufu sufumana seria. <sup>8</sup> Enacnau geac dedengerecngo wakeu asoacnac kemma marai ge ewehihehi angembade.

<sup>9</sup> Ni ngickpengeng ambade, naso imohai ge mi ukunubesena nga kucna kpac anu ge ngadenuma mi wanubesena.

<sup>10</sup> Ngabafocna yeni neac yoac dema kpebucnubeso amma kpedzucnema denengeng amma <sup>11</sup> yofi deandae, "Anutungo ngic imoc ngadehema wamanu mongngo naric mi ongonggeudeac nenang ngic imoc kisamma kemma meni."

<sup>12</sup> O Anutu, neac hereau yombong mi kecbesena. O Anutuna, ge bic hama meficnuna. <sup>13</sup> Mesunau nuandae, yeni geng negemmana game kpekpeu faiyunugec kpac ambisia. Ngic memanganenubeso andae, yeni desofoc ayemmegec goiheiheia kpac kecbisia.

<sup>14</sup> Ni sifu nasosoc ge negensiguma fora fingerudeac tomai kecma monggoc nga monggoc dengeregubadeac anende. <sup>15</sup> Enacnango fakaga dindingac edeyunuba geac memengerec uagaac kpetengo engena anu imoc naric mi osobade. Ni asoacnac kemma marai imoc dekperagibade.

<sup>16</sup> O KEBU, Israeac Anutu, geng ua kuhagoc mekecnec, ni hama imoc dekperagibade. Ge faka dindingac mingina, imocac ohec megembade.

<sup>17</sup> O Anutu, ni sebigborinaungoc kecha geng wiac edekpou anennec nga ni naso yofinenggac kucfakaga wiac engena hemma dekperagima kecduaengoc. <sup>18</sup> O Anutu, ni kpengeng yegbonnagoc ambade, ge imohai ifingoc mi ngadenuna amma mi wanuna. Ge nigoc kecmana fingecsahe hakegecdesoc, yenearu ifingoc geac kucfaka engena dekperagiyemmbade.

<sup>19</sup> O Anutu, geac fakaga dindingac imocngo wi engkecma kurumenga kurumenga kpesereyunuude. Geng wiac engena mema kecnec. O Anutu, ge isoc mong mi kecede.

<sup>20</sup> Geng negemmana ebic nga wiac mangana homac fingecnenu henai nga gennoc megborinuma kekec monggoc nennade. Ge bangec keme kemeaunac monggoc hesicnuna erebade. <sup>21</sup> Ge kpacna meyadina imoc ewehiheigoc monggoc anude nga ge monggoc meserinuna herena nomaneude.

<sup>22</sup> O Anutuna, ge yoac modac modac Anutu. Ni gitana kpema udumeng gombunga megembade. O, ge Israeac kpetiac ngic, ni gita kpema afeguma

<sup>23</sup> dedengerec yegec heigemma enacbibicnango sogaima arohobade. Ge ubaongana ebicfunac mesinec, imocac dengeregubade. <sup>24</sup> Ge faka dindingac amma meficnuncac nedzarannango asoacnac kemma marai imoc dekperagibade. Nocac ngic memanganenubeso anggec, ngicngac yeneng yeninoc game kpekpeu faiyunuma wayunugec yeni goiheiheingina kpac anggec.

Ngictau Saromongngo yofi numuec.

<sup>1</sup> O Anutu, ngictau ye geac desi desifakaga dindingacgoc kefudeac derecgemina. Ge ni, ngictauac medac, fakaga dindingacgoc ambadeac derecgenenna. <sup>2</sup> Ge ifi anna yeng faka dindingacfu ngicngacfocga yoacngina desibeso nga sing dindingac modacma makpekpea yoacngina desibeso. <sup>3</sup> Tiki yeneng ngicngac ruae meficgeyemmebisia nga fagang yeneng dindingac kekecac fora meficgeyemmebisia.

<sup>4</sup> Ngictauac ngicngacfora tosea makpekpea kecdae, yeni yoacfu nangeyunuma yoacngina deu firang ambisia. Nga ngicngac iwaiac obohoma eng kecdae, yeni meficyunuma wiac yemmebeso. Ngic mongngo ngicngac ogofora ebicfu faiyunuu ubaebicgoc kecgoc ngictaungo hemma kpezameu kuha kpac ambeso. <sup>5</sup> Wenacngo feengkefude, ye imoc isoc kekec herea kecbeso. Nga afo fekefude, ye ifi isoc fekecma ngicngac fingcsahengina fekefudesoc kecbeso.

<sup>6</sup> Neni semeng uanina mengereni kiango imohai heiande, ye semeng ua ifia isoc amma kiango bangecfu heiu dokuyagoc angkecde, ye bangec ifia isoc ambeso. <sup>7</sup> Afo imoc nasosoc fekefude, ifi isocngoc ngictauac nasou faka dindingac sabayagoc amma ruae kunengtoa fefeseri fekecbeso.

<sup>8</sup> Ngictau ye kondunga kondunga tegiau nga Eufrate dokutoa hanahema bangec tegiau wisickede, bangec imocac mingina amma imoc garenggebeso. <sup>9</sup> Ngabafora bangec kisiu kecandae, yeni yeac kicfu ngonducnema sendung nedzarangnginango aberebisia. <sup>10</sup> Tarasis bangec nga nuha nuha bangecngina fekendae, imocac ngictau yeneng yeac ubangerec wiac mehama ye mibisia. Arabiaac Saba bangec nga Etiopiaac Seba bangecac ngictau yeneng ifingoc ubangerec wiac mehama ye mibisia.

<sup>11</sup> Ngictau sasawa yeneng yeac kicfu ngonducnegec bangec monnunac ngicngac yeni sasawango yeac kingang kpebibisia. <sup>12</sup> Imoc yofiac, ngicngac iwaiac obohoma kecandae, yeneng ye kpacgec yeng ebicfunac mesiyunuude nga ngicngac makpekpea nga memeficngina kpac kecdae, yeneng kpacgec yeng ebicfunac mesiyunuude. <sup>13</sup> Ye ngicngac kucmama nga iwaiac obohokecdae, yeneac uba mangang negemma iwaiac obohokecdae, yeneac kekec onggonggeude. <sup>14</sup> Ye yeneac sacngina negenu engena angkecdeac amma ngic yeneng yarefaka amma ogofocngina ebicfu faiyunugec ubaebicgoc kecgoc yeng ebicgoc yeneac kekecngina bummema ebicfunac mesiyunuude.

<sup>15</sup> Ngictau ye naso hereangoc kecbeso. Arabiaac Seba bangecfunac ngicngac yeneng gol mema ye mibisia. Yeac tatahoc numuma asoacnac kemma marai ye kenehebesonga. <sup>16</sup> Bangecfu semeng homac fingeru ngicngac yeneng monggoc yakaac mi obohobisia. Semeng imoc tiki buma bumau mekemmeha amma Rebanong bangec isoc ambeso. Taong sasawa fekendae, ngicngac yeneng imohai kecdae, yeni kpingdingngo manennu sabayagoc yombong angande, ifi isoc ambisia.

<sup>17</sup> Ngictauac kpac kuneng imoc nasoya nasoya feengkecbeso. Wenacngo tatacseri takecde, ifi isoc yeac kpac kuneng deyadigec nasoya nasoya fekecbeso. Yeng bangec monnunac ngicngac sing meficgeyemmeu yeni kenecnginagoc amma yofi debisia, "Ye kenehagoc."

<sup>18</sup> KEBU kenehebesonga.\* Israeac Anutu yengsac kucfaka engena mekefu neneng imoc negenni wiac engena ande. <sup>19</sup> Yeac kpac kuneng imoc kuc nga kibikperagiagoc, imocac nasoya nasoya ye kenehebesonga. Yeac kuc nga kibikperagiango bangeha bangeha sokodacheso. Imoc fora nga fora yombong.

<sup>20</sup> Isaiac medac Dawidi, yeac nunumu yofi wisickedde.

## MITIYEGEC KIBI 3

### 73

#### *Mitiyegec 73-89*

#### *Anutuac hoannu kekec*

Asafango mitiyegec yofi heiec.

<sup>1</sup> Foracngoc, Anutungo Israe areng faka gombunga ayemmeude. Ngicngac uba kongaha amma ikoc nga hamangecngina kpac kecandae, yeni faka gombunga ayemmeude.

<sup>2</sup> Ni ine hanina pososoc anu tifainggema manubeso anec. <sup>3</sup> Ngic yoackpekke angandae nga ngic Anutu ngadehema mangana mebeso ayemme-ande, yenemba yeni naric kecma wiac monggac mi obohogec, imohai keracmangang anai. <sup>4</sup> Yeni kpendzengngina kpac eng kecma sebingina kuhagoc anu kucmamea kpac kecgcede. <sup>5</sup> Ngicngac goa yeni ebicgoc kecandae nga ngic imoc yeneng ine ifi isoc mi kecgcede, kpac. Ngicngac goa yeni kpendzeng kpema kecandae nga ngic imoc yeneng kpendzenga kpac kecgcede.

<sup>6</sup> Imocac amma yeni yenanggac negenggec wiac engena angkecede, faka imoc kubu isoc ubahema godzufaka ngakpingina isoc heigecde. <sup>7</sup> Yeni herengin-inau negen negeng sicsauc hania hania dzacgoc fema ereu kichabungina ngopic amma yadiande. <sup>8</sup> Yeni deendema ayemmema yoac mangac manganea dema ngicngac ebicfu faiyunugecdeac ngabasiricfu yoac degecede. <sup>9</sup> Yeni enacibicnginango kurumeng demanganema nedzarangnginaunac yoacngo bangec ferecgema kenude.

<sup>10</sup> Imocac ngicngac yeni yeneac hoannu kemma yoacngina imoc doku ne-andae, ifi isoc efea kpac negebec amma <sup>11</sup> yofi deandae, "Autungo wiac imoc naric mi negenude. Anutu Engenatoa ye wiac ifia naric mi negenude."

<sup>12</sup> Negenggec, ngic mangana yeni ifia. Yeni nasosoc wiac monggac negengy-ohoha kpac kecma hiedzongina meyadigecde.

<sup>13</sup> Foracngoc, herena garenggeba kongaha feec, fakana imoc uaya kpac yombong anec. Ni kopocsicna kpac kecma marina dzuacba wononga kpac anec, fakana imoc uaya kpac yombong. <sup>14</sup> Kebungo numengere anengkefu ni asoacnac kemma marai kpendzeng kpekecma asoacsoc kopocsicac amma numengere anenggec. <sup>15</sup> "Ni yoac ifia dekecbade." Ni ine ifi debai dede nam-baracfoagaac areng tobangyunuma ikoc ayemmema wayunubai. <sup>16</sup> Nga manganango kuhagoc fekecede, ni wiac imocac hania negentegecbadeac uaya mema negemba osiec. <sup>17</sup> Amma ni ngade Anutuac womonnu emma noc wiacngo wisic wisickeau fingecyemmeude, ni imohainoc negentegerai.

<sup>18</sup> Foracngoc, ge ngic ifia bangec gbafiringau faiyunuma kpetotieyununa kpac andagecede. <sup>19</sup> Yeni bic yombong manganema kpac anggecede. Yeni

\* **72:18:** Anutungo mefinunuu nenang bangecngicngacnac yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)



kengectoa amma kpidohogec wiac imocngo meicyunudarude. <sup>20</sup> O Kebu, ngicngac gau hemma yacma imoc nigecyunuande, yeni ifi isoc. Geng yacma yeni ifi gauac siric andae dema wayununade.

<sup>21</sup> Ubaonganango negenghodongaiba imocngo herena biring isoc nendangeu <sup>22</sup> ni ubafong amma negen negenna kpac kecma yang yengeng memanganeyunuaandae, ni ifi isoc geac kicfu ubakpekpe anggenai, fora.

<sup>23</sup> Amma ni sifu gegoc kecba geng marifoinau menunade. <sup>24</sup> Ge dederecegyoac nemma garennukecna wisic wisickeau goiheihei anemma heitainuma hoannunade. <sup>25</sup> Kurumennu geng neac areng angkecne, mongngo kpac. Ni bangecfu ge meficgubadeac anende, wiac monggac mi anende. <sup>26</sup> Sebina nga woubocna yeri kucngira kpac ambeso angandapeu dede Anutu geng neac woubocnaac kuc amma ge nasoya nasoya neac Anutu kecne.

<sup>27</sup> Foracngoc, geac hereau kecandae, yeni kpac anggecde nga ngicngac geac kicfu faka forau mi kecandae, ge yeneac kekec herecgena kpac anude.

<sup>28</sup> Nga ni Anutuac wegenac kecba ngereede. Ni KEBU Israeac Anutuac hoannu kema yeng neac sufuamana amma onggongnuma kecde. Ni geng wiac sasawa annec, imoc desahebede.

## 74

### *Hadzing nga toforec yeri geac*

Yegec yomoc masiki uba modacma heibesonga. Asafango yegec yofi heiec.

<sup>1</sup> O Anutu, ge nocac wanunuma ukunudacne? Rama habufocga geac bangecfu kecdimbe, ge nocac herebugango nunuma hosuc isoc kporacnununec? <sup>2</sup> Ge kpebung habufocga warac yombong menununec, imoc negenna febeso. Neni geangga maridzoming ngicngac areng annideac geng gummenunuma ebicfunac mesinununec. Geng Siong tikiu tacannec, imoc negenna febeso.

<sup>3</sup> Ngabafocnina yeneng kpetiac womongga kpetotiedacgec amabangec sesuhasac amma ifi feengkefude, ge hama imoc hembesena. <sup>4</sup> Ngabafocga yeni amabangecga kpetiacfu hama kunengngoc arohoma yenang onga hania hania ihai faigec tacde.

<sup>5</sup> Yeni nagu wi tacde, imocacsing hama wiac icngo memea imoc nakango heima hembarackedacma <sup>6</sup> onga marikibi gombunga icngo memea, imoc naka nga hamango hedzamedacgec. <sup>7</sup> Yeni womongga faigec dzema bangecfu maec amma geac kpac kunenggac amagerec, yeni imoc heidzadzupema kpedzamegec bangecfu mau <sup>8</sup> negemma degec, "Memayunuyombonggenide." yeni ifi negemma bangecninau Anutuac kpekpeturangama fekendae, imoc sasawa faigec dzedarec.

<sup>9</sup> Anu geac faka bibiagoc hengandimbe, imoc monggoc mi hengandimbe nga profete mongngo mi kecde. Ebic imoc noc nasoac kpac anude, imoc neneanunac mongngo mi negende. <sup>10</sup> O Anutu, ngabafocnina yeneng naso dafiguc detenic anggenggecde? Ngabangic yeni nasoya nasoya geac kpac kuneng ngadeheandae, imoc mi ngereede. <sup>11</sup> Ge onggongyunuma marigango mi meyununec amma marifoiga segerekecne, imoc mi ngereede.

Ge mariga monggoc mi mesufuma mariga sinema memanganeyununa kpac ambisia.

<sup>12</sup> O Anutu ngictauna, gennoc waracngoc kecma kecnegec amma ge bangecfu yagucngoc memengerec ua mekecne. <sup>13</sup> Anutu ge kucgango



kondung kperecgena yohockang anec nga ge doku dzohonggac wasaiyang orucngina kpedzameyununec. <sup>14</sup> Rewiatang ye wasaiyang oruha homac nga gennoc yeac oruha sasawa kpedzamedacma sebia imoc bangeckisiac yang yeni gumecyununec. <sup>15</sup> Geng doku kiwa nga doku tunggbaung singngina kpendzicna yeni fingecma hakecdae. Ge doku fefeseri hakecgec yeni singngina hedzickena gbanggedacgec.

<sup>16</sup> Hadzing nga toforec yeri geac. Geng kperagia amma wenac tatacngirau warac faiyuruna seria nandape. <sup>17</sup> Ge bangecac ma faima meseriyununec. Geng wenac nga kia naso meficyurunec.

<sup>18</sup> O KEBU, ngabafocga yeni ngadeguma deendema anggenggec ngic negen negengngina kpac, yeni geac kpac kuneng demanganeandae, imoc negenna febeso. <sup>19</sup> Ni geac kebesac neng isoc anduae, ge kebesacgaac ubaonga ongonggenna wasai yang yeneng mi menubisia. Ge ngicngacfocga makpekpea kecdae, yeneac kekec nasoya nasoya mi nigecgubeso.

<sup>20</sup> Bangec noboc noboc kundung kundung imoc godzufakango mewakeu homac fede. Ge dzadzahac menec, imocac negensikecbesena. <sup>21</sup> Ngicngac yeni ngicngac ogofocngina meenti memati ayemmemma game kpekpeu faiyunubauac kpaie heiyemmena ngicngac makpekpea nga iwaiac obohoma kecandae, yeneng geac kpac kuneng heiwayong memibisia. <sup>22</sup> O KEBU, ge yacma geangga yoac nanggebesena. Ngic mangana yeneng asoacnac kemma marai geac dedzomoc angandae, imoc negenna febeso. <sup>23</sup> Ngabafocga yeneng kunengngoc arohogec, imoc mi nigecguu yeneng nasosoc yoackpekpe kunengngoc kpekecdae, ge imoc mi nigecgubeso.

## 75

### *Ni monde mondena kpac*

Yegecgareng yearu. Yegec kpara Mi kpetotiebesena, imocac uba modacma yegec yomoc heibesonga. Asafango mitiyegec yofi heiec.

<sup>1</sup> Anutu, geac kpac kuneng wegenac fedecac amma ge ohec megendimbe. Ngicngac yeni kucfakaga negenggec wiac engena angkecdeac imocac yoacsiduc deandae.

<sup>2</sup> Ge yofi denec, “Ni monde mondena kpac nga kecma naso mong faiba hau faka angammemengina isinggema desibade. <sup>3</sup> Bangec nga bangecfu ngicngac kecdae, yeni imohai goroc goroc amma kockpac anggecde. Ni neannaoc bangecac wotungtoa meseriyunuma nanggeyunuma kecduae.”  
*Selac*

<sup>4</sup> Ngic yeni yenanggac negenggec wiac engena anu yoac homac osoandae, yeneac yofi debade, “Ngeni ngenanggac negenggec wiac engena angkecde, yoacngina imoc wadacbisia.” Nga ngicngac Anutu ngadehema mangana megecdeac ayemmeande, yeni yoac yofi edeyunubade, “Ngeni kucngina mi miacbisia. <sup>5</sup> Ngeni kucngina wi kurumennugeng miacma ubangina meemma yoackpekpe kpeandae, faka imoc wadacbisia.”

<sup>6</sup> Imoc yofiac, ngic mong ye wenac ere ereaunac me wenac keme kemeaunac bangec kisiunac haude, ye ngic ogea miarudeacsoc mi ande, kpac.

<sup>7</sup> Anutungo desi desi ua mekecma ngic mong memama ngic ogea miarude.

<sup>8</sup> KEBUNGO mariaua kpakenec mong menande, imocac manau Anutuac ngabaac waing faifaia, imoc wiac homunagoc yerec yerecgea kporoc tima wake wake fede. Ye imoc bangecfu kpakedaru ngic Anutu ngadehema mangana megecdeac ayemmeande, yeneng doku mangana imoc hafoangoc nedacgecde.

<sup>9</sup> Ni nasosoc sogac sogaigoc kecma Yakoboac Anutu yegec heimima den-gerebade. <sup>10</sup> Ngic Anutu ngadehema mangana megecdeac ayemmeande, minginango yeneac kucngina meickeu kpac anu ngic dindingac yeneac kucngina monggoc meenude.

## 76

### *Geac kengectoa negembesonga*

Yegecgareng yearu. Gitakurere nga noc kpema yegec yomoc heibesonga. Asafango mitiyegec yofi heiec.

<sup>1</sup> Yuda bangecfu Anutu negengkecdae nga Israe bangecfu yeac kpac kuneng heiwayong memigece. <sup>2</sup> Yeac bedzo tatahau faigec Sareng bangecfu tacde nga amagereha Sionnu faigec <sup>3</sup> ye imohai kecma tebe-medaha piratac isoc hagec, imoc kpetackema dzikacac kaso nga beang nga noc, imoc sasawa kpetackedarec. *Selac*

<sup>4</sup> Anutu, geac kuc nga kibikperagi, imoc wiac engena. Tiki yeni wiac engena amma herea herec yeneng nasoya nasoya fekecdae, ge ngictau kuc-gagoc engena yombong, imocngo yeni feracyunuude. <sup>5</sup> Ngic ubaherengina kuhagoc kecandae, yeni serima kecma iwai dzikacfu megec goa yeneng fi-rang amma yenang wiacngina wangecyunugec. Ngic kucnginagoc yeni tod-inggema mama homema fegec nga wasaingic yeni maringina miacgecdeac-soc mi anggec.

<sup>6</sup> O Yakoboac Anutu, ge yoac seria ngabasiricfu edeyununa becosi nga ngic witiau tacma kisangyunuandae, yeni mayunuu homema fegec. <sup>7</sup> Geac kengectoa negembesonga. Ge herebu negemmana ngic mongngo geac kicfu nanudeacsoc mi ande, imoc kpac yombong. <sup>8</sup> Anutu, ge kurumenga kuru-menga fekendae, imohai tacma imohacnac desi desiyoacga dena bangecngo kengec amma waickeec. <sup>9</sup> Ge foraya dede nasoya fainadeac yacnec, imohai ifi fingerec. Ngic yeni ngic ogofocngina ebic meficgeyemmegec yeneng ubaebicgoc kecgoc geng ebicfunac mesiyunudacnadeac hanec. *Selac*

<sup>10</sup> Bangecngic yeneac herebu, imocngo ge dengereguude. Ge herebuac tosea kebanggau dzegena dzikacac wiacga ande.

<sup>11</sup> Ngeni KEBU Anutunginaac kicfu yoacngina deserima imoc modacbisia. Bangec monnunac ngicngac yerecgema kecdae, ngeni Anutuac kengec amma ubangerec wiac mehama mibisia. <sup>12</sup> Nocac yeng ngictau medac-focngina yeneac onganginaac kuc meickema bangecac ngictau kengectoa meficgeyemmeude.

## 77

### *Ebic nasou Anutu numumini*

Yegecgareng yearu. Yegec kpara Yehudutung modacma heibesonga. Asafango mitiyegec yofi heiec.

<sup>1</sup> Ni Anutuaru kunengngoc kpacduae, Anutungo negennudeac seriangoc kpacba. <sup>2</sup> Ni ebicnasou Kebu meficgebadeac uatoo mekecma tofocnac kucmamea kpac kecma marina Kebuaru miackecba ubaonganango memer-seriac memefic naric mi meude.

<sup>3</sup> Ni Anutu negensiba asoringa anenu ye hennegeng amma negensikecba ongana ebiriude. *Selac*

<sup>4</sup> Geng kicna tapea miacna gauya kpac kecba herenango ebic meficgedeac enacnaunac yoac mong naric mi ereude. <sup>5</sup> Ni naso bicngoc feec, imoc negensima kecba kifa bic wisickeec, imoc negemba fede. <sup>6</sup> Ni yegecna negemba

fedé, imoc tofocnac negensiba asunango negengising anu herenango imoc hennegeng amma negensiude.

<sup>7</sup> “Kebu ye nasoya nasoya wanuma gombunga monggoc mi anenude.” ni negengyohoc amma ifi negemma kecduae. <sup>8</sup> “Yeng yoac dedzege amma imoc modackecde, fakaya imoc yaguc kpac amma nasoya nasoya kpac andarude. Nga ye yoac deserima deec, imoc yaguc kpac anu nasoya nasoya kpac andarude.” ifi isoc ande.

<sup>9</sup> “Anutungo wosoefac anemmeande, imocac nigeckpeec nga ubamangang anemmeande, fakaya imoc ngaba amma kpae heimiec, ifi isoc ande.” *Selac* <sup>10</sup> Ifi negemma yofi deai, “O Kebu Engenatoa, ge mariga warac angkefec, ifi isoc monggoc mi amma siriha merennec ubahodunggoc kecduae.”

<sup>11</sup> KEBUNGO faka warac meec, imoc negensibade. Oc, geng warac kucfaka bibiagoc menec, imoc negen negennau faiba fekefude. <sup>12</sup> Geng ua sasawa medacnec, imoc hennegeng amma negensikecba geac kucfakaga engena, imoc ubangerec goc negensima kecbade.

<sup>13</sup> O Anutu, geac sing imoc kpetiac. Nemu mongngo Anutunina mi feraheude, kpac. <sup>14</sup> Anutu ge mocungo kucfaka bibiagoc mekec nec. Ge kucuaga ngicngac areng botucnginau mena yeneng imoc bic henggec. <sup>15</sup> Ge mariga kuhagocngo ngicngac focga Yakobo nga Yosefeac gboricfora bummeyunuma ebicfunac yungecyununc. *Selac*

<sup>16</sup> O Anutu, doku nga dzohong yeneng warac gemma kengec anggec. Bangec manau kemeango gemma dendeng kpeec. <sup>17</sup> Hoeng yeneng doku kpakegec sawango gbururung heiu tebemedahango piratac heima noboc noboc kpesaiec. <sup>18</sup> Firang kunengngo amabangec heimerenu imocac manau geac gbururungac udumengtoa fingerec. Geac piratacngo bangeha bangeha mekperagiyunuu bangecngo kengec amma dendeng kpekefec. <sup>19</sup> Geac sing imoc kondungtoa dzongiau kenu singbisciga imoc kondungtoa manau tima kengannec, fora. Nga haniga ongea sifu mi hening.

<sup>20</sup> Ge ngicngac focga Mose nga Arong yereac mariu faiyununa yereng rama isoc heitaiyunuma wangecyunuoc.

## 78

### *Ngicngacfora waraiyemmekefec*

Yegec yomoc masiki uba modacma heibesonga. Asafango yegec yofi heiec.

<sup>1</sup> Ngicngac focna, ngeni neac kpouk pouac kedzac faigec enacnaunac yoac mau kedzac faima negembisia. <sup>2</sup> Ni yoac heima deba, imoc enacnaunac maudeac ande nga wiac warac kundunnu sufu sufuya feec nga wiac ngade fingechesande, imocac yoac debade. <sup>3</sup> Esangabofocnina yeni warac yoac degec, imoc kedzacngo negening nga imoc negen negenninau fedé.

<sup>4</sup> Neni nambarac focninango imoc negenggecdeac wiac mong naric mi mesufunide nga fingecsahe nina ngade feengkefude, yeni edeyununide. KEBUNGO kuc nga kibikperagiagoc kecma uatoa meec, imoc edeyununide. Nga yeng kucfaka bibiagoc mekefec, imocac siduc ayemmenide.

<sup>5</sup> Kebungo Yakoboac areng dederecgeyoac yemmema edeyunuma kpouyem meec nga Israe habu dedeseriyoac yemmema edeyunuma kpouyem meec. Ye esangabofocnina yeneng nambarac focngina edekpou ayem megecdeac edeyunuec. <sup>6</sup> Fingecsahe ngade feengkefude, yeneng imoc negenggecdeac negenec. Nga nambarac focngina mi fingecgecngo ngade fingegecde, yeni imoc negenggecdeac edeyungecde.

7 Ifi anggec yeneng Anutu negensima fora fingerudeac tomai kecma yoacngina negemma Anutuac kucfaka bibiagoc mi nigecyunubeso. Yeni yeac nonoyoac tofohoma kecbisia. 8 Yeni mangesafocngina yeni isoc ambauac ifi anec. Mangesafocngina yeni serima kecma yoackpekpe areng amma herenginango ye seria mi modacgec nga asunginango Anutu wama kecgec. 9 Efarainggac areng tebe mema kecma dzikac nasou dzigenema woragec. 10 Yeni Anutungo dzadzahac meec nga yeac dedeseriyoac mi modacma wadacgec. 11 Yeng wiac bic meec nga kucfakaya bibiagoc edzacyunuu kicnginango imoc henggec, yeni wiac imoc nigecyunudarec.

12 Ye Aigita bangecac Dzoang yeneac bangec nobohau esangabo yeneac kicfu kucfakaya bibiagoc meec. 13 Ye kondung kperecgeu doku tegegma yohockang amma noboc noboc emma serima nanu yeng sing faiyemmeu yeni botuhau ferecgema kenggec. 14 Yeni wenacfu hoengngo waraiyem-mema hesicyunuec nga tofocnac gerecac kperagingo mekperagiyunudarec. 15 Ye bangec kisiu hoc kpendziru keme kemeunac doku efea kpac ereu imoc gumecyunuu nekecgec. 16 Ye doku hocfunac kpeu dokungo doku dzuamagoc maande, ifi isoc mama feec.

17 Ngicngac yeneng imoc henggec, fora. Nga yeni ine yeac uba kpema kopocsic monggoc meficgema bangec kisiu Kebu Engenatoaac yoac kpekecgec. 18 Yeni songongina yaka siriha monggac ayemmeu imocac serima dekecma Anutu igockema 19 yoara kpema degec, "Anutungo bangec gbangge gbanggea yomohai yaka meficgenemmeudeacsoc mi ande, kpac. 20 Foracngoc, ye hoc kpendziru dokutoa nga doku tunggbac endzirango mama feec. Nga yaka ine naric mi nemmeude, kpac. Ye ngicngacfora yang naric mi meficgenemmeude."

21 Imocac amma KEBUNGO yoacngina negemma herebu kuneng yombong negemma Yakoboac areng yenereudeac gerec mong fiu dzeu ngabayango Israe yenearu fingeacma feec. 22 Yeni Anutu mi negensinggema ye ebicfunac mesiyunuudeac kuctoa femide, imoc mi negenserigec, fora.

23 Nga ye sifu hoeng wi sawau edeyunuma kurumenggac nagu witiu 24 uaya meu manna yakango kia isoc witinginau mau ngicngac yeneng negecdeac yemmeec. Ye kurumenggac yaka yemmeu nekecgec 25 yaka efea kpac faiu mau nema kecgec. Bangecngicngo angero yeneac yaka nekecgec.

26 Nga yeng kurumenga kurumenga imohai wenac ere ereaunac firang mong sing meficgemima sueu haec. Ye kuhagocngo saot bigeng imocac firang mong ameaunac hesickema hau ngadeau haec. 27 Hau sendung homac angande, ye ifi isoc yang homac ukuu kia isoc maec. Neng kpegangnginagoc yeni kpetengina kondunggac sangi isoc anec, yeni kia isoc magec.

28 Yeng negemmanu neng yeni ngicngac bedzongina mema nandacgec, imohai mama tacgec. 29 Ngicngac yeni songonginango noc wiacac anu derecgegec, imoc yemmeecac ngicngac yeneng neng imoc nema negebec anggec. 30 Songongina imoc mi wisickemanu yaka enacnginau femanungoc 31 Anutungo ine ngaba ayemmema ngicfocngina kucnginagoc kecgec, yeni kpebucyunuec. Israeac arengfora yeneng semeng sabayagoc isoc kecgec, yenemma memayunuma kekecngina herecgeu kpac anec.

32 Ye wiac sasawa ifi anu yeneng ine kopocsic meficgemangoc kecgec. Yeng kucfakaya bibiagoc mekefec, imoc fora. Nga yeneng ine imoc wama mi negensinggegec. 33 Ifi anu ye kekecac wenacnaso faiyemmeec. Imoc

naso mocgu asu taigec kpac angande, naso ifi faiyemmeu kpac anec. Yeni kengectoa amma kpidohoma ubaebicgoc kecmagec kifangina kpac anec.

<sup>34</sup> Nga Anutungo yunukpebuc anec, yeni naso imohaingoc ubamereng amma herenginango hofocma ye modacgec. <sup>35</sup> Anutu ye yeneac hoc peperandzi seria nga Anutu Engenatoango bummeyunuma ebicfunac mesiyunuec, yeni imoc negenggec feec. <sup>36</sup> Nga yeni enacnginango ine kerecyoac ammima nedzarangnginango ikocyoac ammigec. <sup>37</sup> Yeni herengina yearu seria mi feu yeac dzadzahac imoc faka forau mi modacgec.

<sup>38</sup> Yeni kopocsicnginagoc kecgec, forangoc, nga yeng sifu yeneac ubea manganau manganangina wama mi kpetotieyunuec. Ye naso homac ngabaya dzegema herebuya erebacac imoc kpetarimiec.

<sup>39</sup> Yeni bangecngicngacsac, ye imoc negenu feec. Yeni ngicngo asu taiu erema kemma monggoc mi dzigeneande, yeni ifiasac.

<sup>40</sup> Yeni bangec kisiu kecma naso homac yombong yeac kpema bangec gbangge gbanggeau ubaebic fingecmiudeac ammigec. <sup>41</sup> Ifi ammima Anutu monggoc nga monggoc faitobannu faima Israeac Kpetiac Ngic heremiac miac ammikecgec.

<sup>42</sup> Ye kuc mingina, imoc mi negensigec nga yeng ngaba yeneac mariunac bummeyunuma mesiyunuec, wenac imocac mong mi negensigec. <sup>43</sup> Ye Aigita bangecfu ngic yeneng negensinggegecdeac kucfaka mi hengena meficgema Soang manennu kucfakaya bibiagoc hania hania mekefec, yeni naso imoc mong mi negensima kecgec. <sup>44</sup> Yeng dokutoangina merenu sac andacgec yeni doku imohai negecdeac osigec. <sup>45</sup> Mogoc enaragoc areng kuneng yombong sueyunuu botucnginau hama neyunudacgec nga sepeng homac sueyunuu kpetotieyunugec. <sup>46</sup> Ye semengngina kpembong gumecyunuu nedacgec uanginaac semeng imoc ipua gumecyunuu nedacgec. <sup>47</sup> Ye nomanggbomea kia isoc faiu waing uanginau mama imoc kpetotieu kpac andaru nomang sueu nomangngo figi icnginaac gbomea dzedarec. <sup>48</sup> Yeng negemmanu nomanggbomea kia isoc burumakanginaac witiu mama memanganeyunudaru gbumparandang kiau firangagocngo rama nga noning memanganeyunudarec.

<sup>49</sup> Yeac ngaba imoc gerec dzeande, ifi isoc dzeu ye witiha mesiu yenereec. Ye herea buu mangananginaac amma ubea hodungaiu ubaebic kuneng mema kpetotie uaac angero habunginagoc sueyunuu hagec. <sup>50</sup> Ye herea buu imocac singa meficgema homefunac mi ongongyunuec. Ye kekecngina homeac kpaec mi faima hafei manganaac enarau faiyunudarec. <sup>51</sup> Ye Aigita yeneac warac nambaracfocongina kpebucyunudarec. Ye Haggac esangabo kporucamanginau kecgec, yeneac kucnginaac waracmedacfocongina sasawa kpebucyunudarec.

<sup>52</sup> Imoc wisickeu Anutungo ngicngacfora meyunuma rama wangecyunuma waraiyemmeandae, ifi isoc waraiyemmema kenec. Ngic yeneng bangec kisi dokuya kpacfu ramahabu hesicyunuandae, ifi isoc wangecyunuu kenggec. <sup>53</sup> Ye yenenggareng ayemmema ongongyunuma hesicyunuu yeni kengeha kpac kecmagec kondungngo ngabafocngina semeyunuec.

<sup>54</sup> Ye meyunuma yengena bangec kpetiacfu kenec. Ye firang amma ngabafora feracyunuma yengena marifoiac kuhango tiki imoc warac firang amma meecac ngicngacfora imohai meyunuu kenggec. <sup>55</sup> Yeng yeni hagecdeac amma bangec monnunac ngicngac Anutu mi negemmidae, yeni

kporacyunuu kenggec bangec imoc Israe habu medereyemmeu yeni amagerecngina ihai feudeac kporucedzocnginau faiyunuu tacgec.

<sup>56</sup>Ye ifi anec, fora. Nga yeneng ine Anutu Engenatoa tobanggekecma yeac yoac kpekecma dederecegyoac mi modacma eng kecgec. <sup>57</sup>Yeni mangesafocngina warac angkecgec, ifi isoc Anutu wama ye mi negensinggec. Ngic yeni tebe gbaring gbaring kpesaigec dindingac mi kengande, yeni ifi isoc ihai nga ihai kenggec. <sup>58</sup>Yeni nemu yeneac arata hania hania tiki bu-mau meyunuma Anutu woseau mema ngaba meficgemima nemunginagoc kecma yeac keracmangang meficgemigec.

<sup>59</sup>Anutungo imoc negemma herebu kuneng fingecmiu Israe habu wayunudarec. <sup>60</sup>Ye amagereha Siro fekefec, imoc wama kporucedzoya ngicngac yeneac botucfu tarec, imoc ifingoc wama <sup>61</sup>kuhaac katapa wama ngaba yeneac mariu faiu yeneac witicamau feec. Yeng kuc nga kibikperagia wama ngaba yeneac mariu faiu feec. <sup>62</sup>Ye maridzomingfora herebu negengyemmema ngicngacfora wayunuu ngic yeneng dzikacac beangngo kpebucyunugec.

<sup>63</sup>Gerecngo sebigbori medacfocngina yonohou homegec naroangfocngina ngiha kpac kecma memeturanggac yegecngina mong mi heigec. <sup>64</sup>Ngic yeneng womong garengfocngina dzikacac beangngo yunuma kpebucyunuu yenengfocngina yeni kiac ubamangang anggecdeacsoc mi anggec.

<sup>65</sup>Anu ngicngo gauunac yacandae, Kebungo ifi isoc amma yarec. Ngic seria mongngo waing dokuac kucfu arohoande, ye ifi isoc arohoec. <sup>66</sup>Ye ngabafora yunuma firang amma game kpekpeu faiyunuu nasoya nasoya ifi kegcgede.

<sup>67</sup>Ye Yosefeac kporucedzo ngadehema Efarainggac areng mi meisinggema <sup>68</sup>Yuda areng meisinggec. Ye Siong tikiac songo negendeac imoc meisinggema <sup>69</sup>womong kpetiac meec imoc kurumenga kurumenga wi fekendae, yeni isoc anec. Ye bangec meficgema faiu feengkefude, womonga kpetia ifi isoc meec.

<sup>70</sup>Ye kingang ngiha Dawidi meisinggema rama odaunac meu haec.

<sup>71</sup>Ye Yakoboac areng garengyunuma yeng waraiyemmeudeac faima Israe habu garengyunuudeac ye faiec. Meisinggeu yeng rama nonggo medac yenengareng ayemmekefec, ua imoc wama Anutuac maridzomingfora garengyunuec. <sup>72</sup>Dawidiac hereu ikoc nga hamangec mong mi feu yeneng-gareng ayemmema negen negenggoc uaya mema mariango garengyunuma wangecyunuu kegcgec.

## 79

### *Yerusareng kpedzamedacgec*

Asafango mitiyegec yofi heiec.

<sup>1</sup>O Anutu, bangec monnunac ngicngac mi negenggudae, yeneng maridzoming bangecgau eredau. Yeni ewehelhei faka mi amma womongga kpetiacfu eregec imoc gotengagoc anu Yerusareng ama kpedzamedacgec amabangec sesuhasac ande. <sup>2</sup>Yeni geac kingang ngicngacfocga kpebucyunuma farengngina koec koec nga huntoc yemmegec imocngo yeneac yaka anu neyunugec. Yeni geac ngicngac kpetiac kpebucyunuma sebingina imoc bangecfu yang kecdae, imoc yemmegec negec.

<sup>3</sup>Yeni sacngina hetinggegec imocngo Yerusareng fekendeu doku isoc nedzima feu farengngina tonggoudeac areng mong mi kefec. <sup>4</sup>Ngicngac nenigoc

wegenac kecandae nga oronnunuma kecdae, yeneng deendema anem-mema dzomorenemmedae.

<sup>5</sup> O KEBU, faka imoc wisickeudeac tomai kecdimbe. Ge herebu negen-nemmena imocngo wisic wisickea kpac fekefude, ifi isoc ande. Nga ge keracmangang anemmena imocngo gerec isoc dzeu mi wisickede, ifi isoc ande.

<sup>6</sup> Bangec monnunac ngicngac yeneac witinginau herebuga hetinggena mau nga bangec areng goa yeni geac kpac kuneng mi kpacandae, ge herebuga yenearu kpakena mau. <sup>7</sup> Yeni Yakoboac areng yaka isoc gbokoyunuma amabangecnina kpetotiegec kisi fede.

<sup>8</sup> Mang esafocninango kopocsic meficgegec, geng imocac mi negenna feu nga ge imocac turunga mi kpounemmena. Yeni memanunugec wiac sasawa obohoyombonggedimbeac neneac ubaga manganeu bic yombong hama sinnu meficnununa.

<sup>9</sup> O Anutu memengerecnina, kpacga imoc kuc nga kibikperagiagoc, imocac meficnununa. Ge kpac kunenggaac amma ebicfunac mesinunuma kopocsicnina wana. <sup>10</sup> Bangec monnunac ngicngac Anutu mi negemmidae, yeneng yofi debau, “Ngeni Anutungina mong mi hendimbe, kpac.” yeni ifi degec negemba naric mi ande. Ngic yeneng kingang ngicngacfocga sacngina kpakegec, imocac turunga bangec monnunac ngicngac yenearu kpouyemmena neni kicninango hemma nambisina. <sup>11</sup> Witicngic asoringa ayemmede, yeneac ebicnginango gearu hasikeu imoc negembesena. Ngic yeneng ngic ogofocngina homegecdeac bic desiyunugec geng hama kuc-toagango onggongyununa. <sup>12</sup> O Kebu, ngicngac nenigoc wegenac kecdae, yeni ge deendema anggenggecac kopocsicnginaac turunga naso seweng kekecnginau kpouyemmena.

<sup>13</sup> Ifi anna neneng ngicngacfocga nga rama habufocga anni geng garen-nunukecna, neni nasoya nasoya ge erienzong megennide. Nga fingecsa-henina ngade feengkefude, yeneng fingecma nenigoc torokpema ge ifingoc dedengerec anggenggecde.

## 80

### *Ge neneac mi nigecgubeso*

Yegecgareng yearu. Yegec kpara Dzadzahaac lili dzaring, imocac uba modacma heibesonga. Asafango mitiyegec yofi heiec.

<sup>1</sup> O Israeac rama gareng, ge kedzac faima yoacnina negenna. Geng Yosefeac areng rama habu isoc wangecyununade. Kerobing yeneng mi-acguma ngictautatacga anggec geng yeneac witiu tacannec, gennoc hama kperagigango nerarannunubesena. <sup>2</sup> Ge Efaraing areng nga Bengyaming amma Manasse areng, yeneac kicfu kucga hafoangoc heina kemedaru hama ebicfunac mesinununa. <sup>3</sup> O Anutu, geng monggoc mengerenununa komoc kpenideac kicmesugango mekperaginununa.

<sup>4</sup> O KEBU Anutu, kurumenggac wasaiareng kunengngina, ge ngicngac-focga neneac nunumuac ngaba negengkecnec, imoc wisickeudeac tomai kecdimbe. <sup>5</sup> Geng kickumanina gumecnununa imocngo yaka nga dokunina ande. <sup>6</sup> Geng sing meficngena ngicngac wegenac kecdae, yeneng desofoc anemmeandae nga ngabangic yeneng detenic anemmeandae.

<sup>7</sup> O Anutu, kurumenggac wasaiareng kunengngina, ge monggoc mengere-nununa kicmesugango nerarannununa komoc kpebisina.



<sup>8</sup> Gennoc neni waingkomoha isoc Aigita bangecfunac menunuma hanec. Ge bangec monnunac ngicngac mi negenggudae, yeni kporacyununa woragec neni bangec imohai waing isoc homecnununa kecdimbe. <sup>9</sup> Ge waing ic imocac bangec memengere amma homecna ye bangec imohai godea mema kemema fingsahe amma bangec sokodarec. <sup>10</sup> Sokodaru fawango tiki fekendae, imoc semeyunuma nokumuc meficgeyemmema yomondzoc ic fawatoanginagoc ifingoc kperacyunuu yeni imocac bageau nanggec. <sup>11</sup> Ye fawa sinema imocngo kemma kondungtoanina meficgeu sera sinema Eufarata dokutoa kpeseregec.

<sup>12</sup> Anu ge odaya hembarackenec, imoc negenni naric mi ande. Ge ifi anna titinga fingeru ngicngac yeneng imohai ferecedacma ic imocac forasicsauc mesinec anggecde. <sup>13</sup> Nga kateberec ngiwa yeneng godea suruhegec manennu yang yeneng seraac kiwa kirecgenec angandae.

<sup>14</sup> O Anutu, kurumenggac wasaiareng kunengngina, ge monggoc nenearu dzigenema nenenna. Ge kurumennunac kicga fina mau nenemma waing ic yomocnec henggarang ambesena. <sup>15</sup> Gennoc ic komoha imoc marifoigango homecnec. Gennoc medacga imoc gegoc kefudeac garenggena yadiseri anec. <sup>16</sup> Ngic yeneng waing icga imoc kperecgema gerecfu faigec dzeu geng fingecyemmema yoac ngabasiricfu edeyununa yeni manganema kpac ambisia.

<sup>17</sup> Gennoc ngicga meisinggena kuhagoc anudeac amminec, yeng marifoigau tacmanu marigango nanggebesena. <sup>18</sup> Ge ifi anna neneng monggoc mi ngadegunide, kpac. Geng megborinununa geac kpac kuneng kpacma afe-gunide. <sup>19</sup> O Anutu, kurumenggac wasaiareng kunengngina, ge monggoc mengerenunuma kicmesungango nerarannununa komoc kpebisina.

## 81

### *Israe ge sogabesena*

Yegecgareng yearu. Gatingic yeneac musiwiac kpema heibesonga. Asafango yegec yofi heiec.

<sup>1</sup> Anutu ye kucnina. Ngeni dendzerenggema yegec heimima Yakoboac Anutu sogac sogaic arohoma oheha memibisia. <sup>2</sup> Ngeni tambarang nga gita amma kurere kpema udumeng gombunga meficgema yegec heibisia.

<sup>3</sup> Afo gboria mau nga nasotoanina afo dzongiau trampet fifigec arohobeso.

<sup>4</sup> Anutungo Israeac singyoac ngemmeec. Yakoboac Anutungo yoac ifi deseringemmeec. <sup>5</sup> Anutu yengenaoc Aigita bangecfu kemma dzikac kpema firang anec, imohai dederecgeyoac imoc Yosefeac areng yemmeec.

Ni ubaudumeng nga yoac warac mi negengkefai, imoc naso imohai nege-nai.

<sup>6</sup> Negemba yofi deec, “Ni fuanginaunac ebic mesima maringinaunac uaac sakac ebira meickeba <sup>7</sup> ngeni ebicnginagoc kecma kpacnugec ebicfunac mesingunuai. Ni hoennu gbururunggac manau sufuma yoacnginaac turunga merengngemmema Meriba doku imohai faitobannu faingunuyai.”  
*Selac*

<sup>8</sup> “O ngicngacfocna, ngeni kedzac faigec goroyoac edengunuba. O Israe habu, ngeni neac yoac negembisia. <sup>9</sup> Ngeni anutu furia mong mi mekecbisia nga bangecareng goa yeneac anutu fafoc mi heimibisia.

<sup>10</sup> Ni ngeneac KEBU nga Anutungina. Nennoc Aigita bangecfunac menunuma hayai. Ngeni enacngina anggegec mewakengunubade.”



<sup>11</sup> “Ngicngacfocna ngeneng ine ubaudumennaac kedzac mong mi kpegec, kpac yombong. Israe areng ngeni wanuma neac yoac mi tofohogec.

<sup>12</sup> Imocac wangunuba ngeni ubasinginagoc kecma ngenang negen negeng modacgec.

<sup>13</sup> O ngicngacfocna, ngeni neac yoac modacma kedzac kpebau, imocac yombong anende. Nga Israe ngeneng neac sing modacbau, imocac homac anende. <sup>14</sup> Ngeni ifi ambau neng ngabafocngina bic memayunuma mari-nango singngina hedzickebai.”

<sup>15</sup> “Ifi amba ngicngac KEBU ubango ukudae, yeneng yeac kicfu hama fafoc heimibau. Yeni kopocsicnginaac turunga ebicgoc kecdae, imoc nasoya na-soya feengkecbac. <sup>16</sup> Ifi kefu Israe areng, ni wit yaka gombunga ngenmeba nebau nga ni hoc peperandziac kukundzau meficgema ngenmeba nebau.”

## 82

### *Anutu tosea yoacngina desiude*

Asafango mitiyegec yofi heiec.

<sup>1</sup> Anutungo anutu hania hania yeneac adzoc adzorotoau enara amma tata-hau anutu hania hania botucnginau tacma isingyunuma yaocngina desima <sup>2</sup> yofi dede, “Fakangina yomoc mi ngereede, ngeni sing dindingac wama ngic yoacngina desiandae. Ngeni monde monde angandae nga ngic Anutu ngadehema mangana megecdeac ayemmeude, ngeni yeni meficyunukec-dae nga fakangina imoc mi wisickede, kpac.” *Selac*

<sup>3</sup> “Ngeni ngic kucmama nga beging kecdae, yeneac yoac sing dindingac modacma desibisia. Ngicngac ogofocngina ebic witaui kecma wiac sasawa obohokecdae, ngeni yenenggareng ayemmema yeneac yoac sing dindin-gacfu desibisia.

<sup>4</sup> Ngic Anutu ngadehema mangana megecdeac ayemmeande, yeneng ngic-ngac kucmama nga iwaiaac obohoma kecandae, yeni meyunugec ngeneng meficyunuma yeneac mariunac mesiyunubisia. <sup>5</sup> Yeni ine wiac mong mi negemma wiac naric mi negentegecma kundung manau kengkecdae. Ifi anu bangecac titiseri sasawango goroc goroc andae.”

<sup>6</sup> Ni yofi deai, “Ngeni sasawango anutuareng nga Anutu Engenatoa neac medacfocna.” <sup>7</sup> “Foracngoc, ngeni bangecngic homeandae, ifi isoc home-gecde. Ngictauac medacfoc, ngeni ngictau yeneac nambaracfocngina sa-sawa mayunuande, ngeni ifi isoc mangunuude.”

<sup>8</sup> O Anutu, bangeha bangeha ngicngac areng sasawa yeni geac. Imocac ge yacma bangecfu desi desi uaga mebesena.

## 83

### *Israe yunubeso andae*

Asafango mitiyegec yofi heiec.

<sup>1</sup> O Anutu, ge mi waickena amma kedzacga mi kpefonggena, o Anutu, ge eng mi tacna. <sup>2</sup> Henna, ngabafocga yeni kpeborongtoa kpedae nga ngic ubango ukugudae, yeni orucngina miacma nandae. <sup>3</sup> Yeni geac ngicngacfocga tobangyunugecdeac negemma areng faima yoac dedzege andae. Geng ngicngacfocga nenenggareng amma onggongnunuanec, yeni neninoc memanganenunubeso amma <sup>4</sup> dedae, “Hagec, nenang Israe bangec areng meicyununi kpac andacbisia nga ngicngac yeneng Israe kpacngina monggoc mi negengec febeso.”

<sup>5</sup> Yeni uba mocgu amma yoac dedzege amma Israe memanganegedcaed dzadzahac mekecdae. <sup>6</sup> Ngic imoc Edonggac areng kporuchedzonginau kecandae. Yeni Ismaeac areng nga Moabi areng amma Hagiri, yeac areng. <sup>7</sup> Yeni Gebare nga Among amma Amareke ngic. Yeni Firisti bangecac ngicngac areng nga Tiro taonnunac hagec <sup>8</sup> Asiria habu ifingoc yenigoc torokpeyunudau. Yeni kucnginagoc amma Rotiac gboricfora yeni nonggo tacyemmedae. *Selac*

<sup>9</sup> Geng warac Midiangbangec kpemeting amminec, ifi isoc yeni ayamemema Kisong doku tegiau ngictau Sisera nga Yabing faka ayecmenec, ge ifi isoc kpemeting ayemmebesena.

<sup>10</sup> Geng warac Eng Doro amau ngic kpetotieyununa farengnginango bangecfu kerac isoc hoama kpac angec. <sup>11</sup> Ge ngickunengngina meyununa Orebe nga Dzebe yeri manganeec, ifi isoc ayemmema ngictau yeneac medacfocngina kucnginagoc sasawa meyununa yeni Dzeba nga Dzarimuna ayecmenec, yeni ifi isoc ayemmebesena. <sup>12</sup> Nocac yeni degec, "Neni Anutuac manangbangec meni imocngo nenang ambeso."

<sup>13</sup> O Anutuna, geng ngic ifia meyununa sendungngo firannu yeregeande, ifi isoc yeregebisia. Ngic yeneng padi seuha firangngo mefiranggeande, ifi isoc mefirangyununa. <sup>14</sup> Nga gerecngo ickate dzeande nga gerechorangngo tikiu fekengkecma bangec faiu dzeande, ge ifi isoc amma <sup>15</sup> kiafirangngango kisangyunuma firangngo kuneng kpeu kengectoa meficgeyemmebesena.

<sup>16</sup> O KEBU, geng kicmesungina game kpekpeu faiyunudacna yeneng geac kpac kuneng hofocbisia. <sup>17</sup> Yeni geng negemmana gameyunuu nasoya nasoya negeng mangangoc kecma imocngo nasosoc mebucyunuu ngicngac yeneng wayunugec kpac ambisia. <sup>18</sup> Geac kpac kuneng imoc KEBU. Ge mocgungo bangectoa bangec fekendacde, imocac Engenatoa kecne, yeni imoc negembisia.

## 84

### *Anutuac amawomonna kengandae*

Yegecngareng yearu. Gatingic yeneac musiwac kpema heibesonga. Kora medacfora yeneng mitiyegec yofi heigec.

<sup>1</sup> O KEBU, kurumenggac wasaiareng kunengngina, geac ama womong imoc songogoc nga sogac sogagoc wakema fede. <sup>2</sup> KEBU, ni ongaasunango geac womong sobenggaac ammiu imohai kebadeac homema kecde. Ni heresebinango Anutu kekehagoc, yeac sogac sogai yegec heide.

<sup>3</sup> Dzinuc nengbisia ye ifingoc aema meficgeande nga dzibirarec ye medacfora fingecgedcaed negemna faeha geac aratagau heide. O KEBU, kurumenggac wasaiareng kunengngina, ge neac ngictau nga Anutu. <sup>4</sup> Ngicngac geac amau kecdae, yeni kenecnginagoc amma yeni nasoya nasoya dengereguma yegec heigenggecde. *Selac*

<sup>5</sup> Ngicngac yeni kucngina gearu fede, yeni kenecnginagoc amma yeneac herenginau Sionggac singtoa modacma Sionnu kenggedcaed ayemmeude.

<sup>6</sup> Yeni Bakaac kickuma kperemennu ferecgema kengkecmagec dokukiwa homac imohai fingecgedce. Nga semeng homec homecnasoac kia kpema doku dzohongngo bangec imoc mewakeude. <sup>7</sup> Yeni kuc meficgema kuc monggoc nga monggoc torokpema mema kengkecma anutu hania hania yeneac Anutu Sionnu henggecde.

<sup>8</sup> O KEBU Anutu, kurumenggac wasaiareng kunengngina, ge nunumuna negenna. Yakoboac Anutu ge kedzac faina. *Selac*

<sup>9</sup> O Anutu, ge kasonina henna. Ge ngic kerecngo nadzicminec, yeac kicmesuya henna.

<sup>10</sup> Imoc yofiac, ni geac sobenggau uameme mocgu kecbade, imocngo ama goau uameme tausengngoc kecbai, imoc ferahade. Ni Anutunaac nagugareng nambeso anende nga ngic Anutu ngadehema mangana megedceac ayemmeande, yeneac kporuc amanginau naric mi kecbade.

<sup>11</sup> Nocac KEBU Anutu ye wenac nga kaso. Ye wosoefac nga eweheihei anemmema ngicngac dindingac kecandae, yeni faka gombunga ayemmema wiac gombunga mong naric mi segereyemmeude.

<sup>12</sup> O KEBU, kurumenggac wasaiareng kunengngina, ngic mongngo negenseriguma kecande, yennoc kenehagoc.

## 85

### *Ngicngacfora ruae yemmeude*

Yegecgareng yearu. Kora medacfora yeneng yegec yofi heigec.

<sup>1</sup> KEBU ge bangecga gombunga yombong ammima Yakoboac areng monggoc mengereyununa naric kegcac.

<sup>2</sup> Ngicngacfocga yeneng ngicngac ogofocngina memanganeyunugec, fora. Nga geng imoc wama kopocsicngina sasawa wayemmenec. *Selac*

<sup>3</sup> Ge herebuga wama ngaba gereagoc angkecnec, imoc wadacnec. <sup>4</sup> O Anutu memengerecnina, ge monggoc mengerenununa. Nga neni wosogau meing, imoc monggoc mi negensina.

<sup>5</sup> Ge neni nasoya nasoya ngaba anemmekecma fingecehahenina fekefudesoc, ge yeneac herebu ifingoc negengkecnade, imoc henni mi ngereede.

<sup>6</sup> Ngicngacfocga neneng desogai anggenni ngereede. Ge imocac sifu kekecnina monggoc heigborinemmebesena.

<sup>7</sup> O KEBU, geng yoac dedzege amma imoc modackecnec, imoc edzacnunuma ebicfunac mesinunnadeac deserinemmena.

<sup>8</sup> KEBU Anutungo yoac deude, imoc negembeso anende. Ngicngac ubaherengina meremma yearu haandae, yeni yeac kpetiac ngicngacfora nga yeng ngicngacfora imoc ruaeyoac edeyunuude. <sup>9</sup> Foracngoc, yeac kuc kibikperagiagoc bangecninau fekefudeac amma yeng ngicngac yeac ewehiandae, yenemma ebicfunac mesiyunuude.

<sup>10</sup> Anutungo yoac dedzege amma imoc modackecde, faka imoc nga yoac modac modacfaka yereng meficemeec dindingac kekec amma ruae kekec yereng titikokoc angemeecde. <sup>11</sup> Yoac modac modac faka, imocngo bangecfunac nemonggema ereu dindingac kekecngo kurumennunac fiu maude.

<sup>12</sup> Fora, KEBUNGO wiac gombunga nemmeu bangecninaac semeng uangong semeng monggoc meficgeude. <sup>13</sup> Dindingac kekecngo waraimima yeac haniaac sing mengeremiude.

## 86

### *Ge singga edzacnuna*

Dawidingo yofi numuec.

<sup>1</sup> O KEBU, ni ngic makpekpeango iwaiac obohoma kecduaeac kedzaga faima yoacnaac turunga merennenna. <sup>2</sup> Ni geac enac tofoc tofohoga nga ge neac Anutuna. Ge imocac kekecna onggonggena. Ni geac kingang ngicngo negenseriguma kecduaeac ebicfunac mesinuna. <sup>3</sup> O Kebu, ni asoacnac kemma marai gearu kiackecduaeac ge neac ubaga manganeu. <sup>4</sup> O Kebu,

ubaongana memiacma gearu faiduaeac ubaonganaac ubangerec meficgenenna.

<sup>5</sup> Ge gombunga anemmema kopocsic wanemmenade. O Kebu, geng yoac dedzege amma imoc modackecnec. Nga ngic yeneng hofocgugec geng faka imoc modacma wiac gombunga efea kpac ayemmenade. <sup>6</sup> O KEBU, ge kedzac faima nunumuna negenna. Ni kpesi kpesi amma kiacha ge kedzac kpema negenna. <sup>7</sup> Geng turunga merennennadeac ebicnasonau kpacgubade.

<sup>8</sup> O Kebu, anutu hania hania kecdae, yeneac botucfu mongngo ge isoc mi kecde. Anu geng ua mekecnec, ua ifi isoc mongngo mi mekecde, kpac. <sup>9</sup> O Kebu, ge bangeha bangeha ngicngac areng meficyununec, yeneng gearu hadacma kicgau fafoc heigemma hama geac kpac kuneng heiwayong memigece. <sup>10</sup> Ge mocgungo Engenatoa kecma faka bibiagoc mekecnec amma geng Anutu.

<sup>11</sup> O KEBU, ni yoacga fora modackecbadeac singga kpounenna. Ge herenau ubayohoc meickena geac kpac kuneng ewehelheigoc hoanggebesare.

<sup>12</sup> O Kebu Anutuna, ni heregoc ge ubangerec megemma geac kpac kuneng nasoya nasoya heiwayong memibade. <sup>13</sup> Geng yoac dedzege amma imoc modackecnec, ge imoc anenna wiac engena ande. Kekecnango emu homec amau feu gennoc kekecna imohacnac mesina ereec.

<sup>14</sup> O Anutu, ubakpekpe ngic yeneng yacma nubeso anggec yarengic yeni habutoagoc hama kpebucnubeso andae. <sup>15</sup> O Kebu, ge Anutu ubamangang nga wosoefac mingina. Ge ngaba bic mi annade nga geng yoac dedzege amma imoc modackecnec, fakaga imoc wiac engena. Ge yoac modac modacac Kebu nga faka imocngo wake wakea fegende.

<sup>16</sup> Ge nearu dzigenema neac ubaga manganeu. Ge kingang ngicga kuc nemma kingang ngacgaac medac, imoc ni, ebicfunac mesinuna. <sup>17</sup> KEBU, geng meficnuma meserinunade. Ge imocac ngic ubango ukunudau, yeneng geac fakaga hemma gameyunuudeac geng neac negenna ngereeande, imocac ma mong edzacnubesena.

## 87

### *Siong taonnu fingerec*

Kora medacfora yeneng mitiyegec yofi heigec.

<sup>1</sup> KEBUNGO tiki kpetiacfu taong mong faiu fede. <sup>2</sup> KEBUNGO Sionggac nagutoaac songotoa negemma Yakoboac ama noboha yeneac songo ifi mi negenude. <sup>3</sup> O Anutuac taong, geac yoacsiduc imoc damuyagoc. *Selac*

<sup>4</sup> “Bangec areng goa ni negennudae, imoc kpacyunubade, Aigita nga Babirong amma Firisti yeneac bangec nga Tiro amma Etiopia, yeneng deandae, ‘Ngic yomoc ye ihai fingerec.’” <sup>5</sup> Engenatoango ye tatahau Sionnu faiu seria tarudeac amma Siong manaungoc degece, “Ngic yomoc amma ngic imoc, yeni imohai fingegec.” <sup>6</sup> KEBUNGO bangec areng yeneac kpacngina kpedzucnema arengyunuma yofi ohoude, “Yomocngo ihai fingerec.” *Selac*

<sup>7</sup> Yegec fede fedeac ngicngac sasawa yeneng yegec yofi dema heiandae, “Neac dokudzohong sasawa yeni Sionnu tacdae.”

## 88

*Ubaebic meficgeec*

Kora medacfaora yeni yegec yofi heigec. Yegecgareng yearu. Esrangic Hemang amaunac, yeng masiki yegec heieci, ifi isoc yegec yomoc Maharac rennoc, imocac uba modacma heibesonga.

<sup>1</sup> O KEBU, Anutuna, ge neac ebicfu mesi mesingic. Ni hadzing tofocnac geac arohoma kiackecba <sup>2</sup> geng nunumunaac kedzac kpna nga kiacnango gearu hau negenna.

<sup>3</sup> Ubaonganango ebic wakeyombonggeu kekecnango homec ama bic mewegenede. <sup>4</sup> Yeni neac yofi negendae, “Ye ngic bic homegec, yeni isoc ande.” Ni ngic kucngina kpac, yeni isoc anduae. <sup>5</sup> Ngic wayunuma homec yeneac botucfu faiyunuandae, yeni isoc feduae. Yeni ngic kpebucyunuma kicsereu faiyunugec fedae, ifi isoc anduae. Ge ninigec meficgema neac monggoc naric mi negenna fede, ni ifi isoc anduae. Ge ngic marigaunac meicyunuma monggoc mi garengyununa kpac angandae, ni ifi isoc anduae.

<sup>6</sup> Ge teng mana keme kemeau kicsere menuma kundung dzic manau fainunec. <sup>7</sup> Geac herebungo neac witiu emma mepetannuma kondungsiri isoc semenuna kucna kpac anec. *Selac*

<sup>8</sup> Geng ifi anenna ogofocna yeni imoc hemma ngadenuma neac ebic hemma kengectoa amma kpidohoma nandae. Ni witicfu ifi kecduaeac naric mi worabade. <sup>9</sup> Ni ubahodunggoc kecha kicna kundung kpebeso ande. O KEBU, ni wenacsoc kpacguma marina gearu sinekecduae. <sup>10</sup> Ni homebeso anduae nga ge ngic homemea yenearu kucfaka bibiagoc mi menade, kpac. Homegec yeneng onga amma naric mi yacgede nga yeni eriendzong naric mi megenggede. *Selac*

<sup>11</sup> Geng yoac dedzege amma imoc modackecnec, ngic kicsereu yeneng yoac imoc mi dekperagiandae nga ge yoac modac modac Anutu, imoc homec amau naric mi deyadigede. <sup>12</sup> Kundung manau geac kucfaka bibiagoc naric mi negenggede. Nga geng meficyunuma ebicfunac mesiyunuanec, imocngo ninigec amau naric mi fingetegerude.

<sup>13</sup> O KEBU, ni sifu asoac anu memeficac kiacgemma arohoma gearu nunumuna faiba haude. <sup>14</sup> O KEBU, ge ni wanuma kicmesuga nearu mesufunec, imocac hania mi negentegeduae.

<sup>15</sup> Ni sebigborinaungoc kpendzengoc kecma homecfu heima kefai. Ge kengec efea kpac meficgenenna kpidohoma ubaebicgoc amma memeficna kpac kecduae. <sup>16</sup> Geac herebungo semenuu kengec efea kpac gearunac meficgema kengecnuu manganema kpac anai. <sup>17</sup> Geac kengectoa imoc asoacnac kemma marai doku tunggbaung isoc yadima oronnuma noboc nobocnac hama semenukefu <sup>18</sup> geng negemmana songo ogona nga arengfocna yeni sasawango wanuma ngadenugec kundungngo tosoyombonna ande.

## 89

*Kebu, ge dahai?*

Esrangic Etangngo masikiyegec yofi heieci.

<sup>1</sup> O KEBU, geng yoac dedzege amma imoc modackecnecac nasoya nasoya yegec heigembade. Ge yoac modac modac Kebu, imoc enacbibicnango dekperagiba fingeceha fekefudesoc, yeneng imoc negendacgede. <sup>2</sup> Ni yofi deba, “Geng yoac dedzege amma imoc modackecnec, fakaga imoc

nasoya nasoya faina fekefude. Ge yoac modac modac Anutu. Kurumenga kurumenga nasosoc fefeseri fekecdae, ifi isoc geac fakaga ifingoc fekefude.”

<sup>3</sup> Geng yofi denec, “Ni ngicna Dawidi meisinggema yegoc dzadzahac mema ye kingangngicna anu yofi deserima edeai, <sup>4</sup> Ni geac gborifocga tatacnginau faiyunuba yeneng nasoya nasoya seria tacgede. Yeni fingecehahengina fekefudesoc ngictau tatacfu tacma ua imoc torokpeu torokpe medacgede.” *Selac*

<sup>5</sup> O KEBU, ge kurumenga kurumenga sing faiyemmena yeni geac kucfaka bibiagoc oyang boyang mebisia. Ge yoac modac modac Kebu, fakaga imoc kpetiac areng yeneac adzoc adzou dengerebesonga.

<sup>6</sup> KEBU, wi sawakebangau ge isoc mong mi kecde. Nga anutu hania hania yeneac medacfocngina kecdae, botucnginau ge isoc mong mi kecde. <sup>7</sup> Kpetiac areng yeneac adzoc adzou tacandae, yeneng yofi negengandae, Anutu ye damu damuyagoc. Ye engenatoa amma yeng kurumenggac areng ye yerecema nandae, yeni feracyunuu yeneng yeac kengec homac angandae.

<sup>8</sup> O Anutu, kurumenggac wasaiareng kunengngina, KEBU, mongngo ge isoc kuhagoc mi kecde. O KEBU, ge yoac modac modac Kebu nga fakaga imocngo oronguma fede.

<sup>9</sup> Kondungngo kpeborong kuhagoc kpeu geng mingina amma kuha memana siri kuneng kpeu mengisiyununade. <sup>10</sup> Ngic yeneng ngic goa yunuma memanganeyunugec, geng Aigita bangec medzamena ifi isoc feec. Ge mariga kuhagocngo ngabafocga kisangyununa yeni singsararang kpegec.

<sup>11</sup> Ge kurumenga kurumenga yeneac mingingngina nga bangec imoc ifingoc geac. Geng bangec toa bangec nga wiac sasawa ihai fedae faiyununa seria kecgede. <sup>12</sup> Geng bangec noboc noboc not nga saut meficyununec. Taboro nga Herimong tiki yereng sogaima geac kpac kuneng oyang boyang memiecede. <sup>13</sup> Fuakpegangga imoc kuhagoc nga mariga imoc kuhagoc, ge marifoiga sawau miacnec. <sup>14</sup> Ge fakaga dindingac nga ge sing dindingac modacma yoac desianneac, wiac imocngo ngictau tatacgaac sering ande. Geng yoac dedzege amma imoc modackecnec amma ge yoac modac modac Kebu, fakaga imocngo waraigendape.

<sup>15</sup> O KEBU, ngicngac geac kimesugaac kperagiau kecandae, yeneng afegucedaeac sing negemma sogaima kpacma afeguandae, yenennoc kenecnginagoc. <sup>16</sup> Yeni geac kpac kunenggac amma asoacnac kemma marai sogaima kecma fakaga dindinga afehegede.

<sup>17</sup> Ge ngicngac imoc yeneac kibikperagi nga kucngina. Amma ge wosoefac anemmena kucninagoc amma firang annide.

<sup>18</sup> Ngictau ye kasonina nga KEBU ye kasonina mingina. Ye Israeac kpetiac ngic amma yeng neneac ngictau, yeac mingina.

<sup>19</sup> Ge warac onga nga kpefingyoacfu singyoacga dena ngicngacfocga geac yoac modac modac kecgec, yeni yofi edeyununec,

“Ni ngic mong kuhagoc meficgema ye ngictauac ira heimiai. Ni ngicngac yeneac botucfunac sebigbori medac mong meisinggema gununggeai. <sup>20</sup> Ni kingang ngicna Dawidi meisinggema kerecna kpetiacngo nadzicmiai. <sup>21</sup> Ifi anu marinango ye nasoya nasoya nanggema marinaac kucngo meseribade.

<sup>22</sup> Ngabangic mongngo ye tobanggema naric mi feraheude nga ngic Anutu ngadehema mangana megedeac ayemmede, yeni ye mi memagede. <sup>23</sup> Ni ngabafora yeac kicfu kpedzameyunubade nga ngic ye ubango ukudae, yeni kpefacyunuba mayunuude.

<sup>24</sup> Ni yoacna modacma yoac dedzege amma imoc modacbade, fakana imocngo ye garenggekefude. Ni neannaac kpacfu nanggeba yeng kuhagoc amma firang anude. <sup>25</sup> Ni kondung yeac mariu faiba yeng imoc garenggema marifoiano doku haandae, yeni garengyunuude. <sup>26</sup> Yeng kpacnuma yofi deude, 'Ge Manna nga Anutuna amma memengerecnaac hoc peperandzi seria.'

<sup>27</sup> Ni ye meisinggeba yeng neac morocmedac anu bangecfu ngictau yeneac kunengngina anudeac faiba kefude. <sup>28</sup> Ni yoac yegoc dedzege amma imoc nasoya nasoya modacma dzadzahacna yegoc mebade, imocngo yegoc fefeseri feude. <sup>29</sup> Ni Dawidiac nambarac nga esamedac fingeckecgedesoc tatacnginau faiyunuba nasoya nasoya seria tacgede. Yeac ngictau tatac nanggeba nasoya nasoya fekefu kurumenga kurumenga yeneac wenac dafiguc fede, kpetea ifi isoc anude."

<sup>30</sup> "Esangaboforango neac dedeseri wama ngadehema dederecgeyoacna kpema imoc mi modacgedeu <sup>31</sup> me yeni kpema nonoyoac edeyunuai, imoc mi modacgedeu <sup>32</sup> ni yeneng singyoac kpegecac amma turunga kpouyemmema gbarucngo yunubade. Yeni ngicngac ogofocngina memanganeyunugecac dzikacngo yunuba kpendzeng kpegede. <sup>33</sup> Ni Dawidigoc yoac dedzege amma imoc modacduae, fakana imoc naric mi wangechade. Ni ikoc mi ambade nga yoac modac modac fakana naric mi wabade. <sup>34</sup> Ni dzadzahac meai, imoc mi kpebade nga enacnaunac yoac maec, imoc mengerema siriha mong mi debade.

<sup>35</sup> Ni naso mocgu kpetiac kekecnau namma dedeseri seria deai, imoc nasosoc fora angkefude, 'Ni Dawidi ikoc mi ammibade.' <sup>36</sup> Yeac bangecfora yeni kpac angana kpac torokpeu torokpe kecengkegede. Wenac kiwango nasoya nasoya neac kicfu fekecede, ngictau yeac ngictau tatacngo ifi isoc fekefude. <sup>37</sup> Sawakebanggac hepuc, imoc afo, ye tataha mi wama takecede. Nga ni ngictau tatahau faiba ye ifi isoc nasoya nasoya seria tackefude." *Selac*

<sup>38</sup> Geng kingang ngicga Dawidi kerecdokungo nadzicminec, fora. Nga geng ine yeac herebu negemma ye ngadehema wanec. <sup>39</sup> Ge kingang ngicngagoc dzadzahac menec, imoc wana wisickeu ngictau iraya bangecfu sendunnu ukuna gotengagoc andarec. <sup>40</sup> Ge yeac taonggac hocoda kpebarackedacma amea seria kpedzamedacna sesuhasac andae.

<sup>41</sup> Nga ngicngac yeneng imohai ferecge kengha angandae, yeni iwaiya mema woraandae. Ngicngac yeac wegenac kecandae, yeneng desofoc ammidaae.

<sup>42</sup> Ge ngabafora marifoingina memiacna dzikacfu sericeng ngabafora sasawa sogaigecdeac sing meficgeyemmenec. <sup>43</sup> Fora, ge ngictau dzikacfu mi nanggenec nga yeac dzikacac beang, imocac enara merenna ngadeaubigeng kenec. <sup>44</sup> Ge ngictau yasuya mariaunac wangecma ngictau tataha bangecfu ukuna maec. <sup>45</sup> Ye sebhigori kecmanu ge wenahaac kpete mewegenena homac mi anec. Ye game kpekpeu faina imocngo ye semeu kecede. *Selac*

<sup>46</sup> O KEBU, ge mesufuemema monggoc kicin nau fingeadeac tomai kecduae. Ge nasoya nasoya ifi sufuma kecnade, ifi isoc ande. Geac herebu gerec isoc dzekecede, imoc wisickeudeac tomai kecduae.

<sup>47</sup> O Kebu, kekecna imoc wegenacneacsac ande, imoc negenna febeso. Ge ngicac medacfora fainununa eng fingeacma kpac annide. <sup>48</sup> Ngic mong ye keengkecma mi homeude, ifia mong mi kecede, kpac. Homec amau ngic kucgoc meyunugec ngic mongngo imohacnac naric mi mesiuade. *Selac*

<sup>49</sup> O Kebu, geng yoac dedzege amma imoc modackecnec nga yoacga modackecnec, imoc warac Dawidi deserima desiminec, imocac fora hofoc-



duae. <sup>50</sup> O Kebu, yeni ni, kingang ngicga deendema anengandae, imoc negenna febeso. Ngicngac yeneng deendema anenggec ebic imoc herenau tofohokeyduae. <sup>51</sup> O KEBU, ge ngictau meisinnuma kerec nadzicnennec nga ngabafocna yeneng ine deendema anengandae. Ni sing tikengkecha yeneng hanititina hemmodacma desusuic anemma yoac mangana denenggede.

<sup>52</sup> KEBU nasoya nasoya kenehebesonga. Imoc fora nga fora yombong.

## MITIYEGEC KIBI 4

### 90

#### *Mitiyegec 90-106*

#### *Naso wegenanec kefude*

Anutuac ngic Mosengo yofi numuec.

<sup>1</sup> O Kebu, neni fingecsahehena bic fekefec, geng yeneac sufu sufumangina angkecnec. <sup>2</sup> Ge Anutu, tiki mi fingecmagec geng marigango bangec nga bangectoa bangec mi meficgemangoc imohai bic kecnec. Ge nasoya nasoya kecnec nga kecbesannec.

<sup>3</sup> Geng yoac dena ngic yeni monggoc sendung anggede. Ge yofi deannec, “Ngicac nambac, ngeni monggoc bangecfa dzigenema sendung ambisia.”

<sup>4</sup> Imoc yofiac, kifa tauseng imocngo geac kicfu uameme mocgu kemma bic kpac andac, ifi isoc ande. Imoc tofocnac monggac noboha isoc ande.

<sup>5</sup> Ge ngic wanggenununa seuc isoc kengandimbe nga kekecnina imoc gau negengandimbe, ifi isoc ande. Kpindingngoc asoac gborima monggoc ere-ande, ifi isoc. <sup>6</sup> Imocngo asoac gboria nga sabayagoc anu marai anu sokuema ururueude.

<sup>7</sup> Geac herebungo neni memanganenunuu kpac andimbe. Geac heregerecngo ebicfu fainunuu kecdimbe. <sup>8</sup> Neni ngicngac ogofocnina memanganeyununi geng wiac imoc kicgau arenggema hengkecnec. Nga kopocsic sufu sufuu meficgeing, ge imoc kicgaac kperagi uaina feu hengkecnec. <sup>9</sup> Anu kekecninaac uameme sasawa geac herebugaac bageau kecni nasonina kpac anude. Ngicngo asoringa ammiu kpac angande, neni kifanina ifi isoc kecni kpac andarude.

<sup>10</sup> Kekecninaac kpete imoc kifa 70 me kucnina feudeu kifa 80 kecnide. Kifa imocac manau kekecnina gombunga yombong kecandimbe, imohai ine ebic nga ubahodunggoc ifingoc kecandimbe. Kifanina bic meickegec kpac andaru neni kpututukema kendacnide. <sup>11</sup> Ngic monggoc geac ngabagaac kuc mi negensiude, kpac. Kengecngoc geac ewehihei kuneng anggembesonga nga heregerecga kuneng imoc ifingoc imocacsoc ande.

<sup>12</sup> Kekecnina uameme dafigucacsoc fede, imoc negensinideac wiac imoc kpounemmena. Ge ifi anna neni hereninango negen negentegecngoc anude.

<sup>13</sup> O KEBU, ge monggoc dzigenena. Naso dafiguc monggoc geac tomai tachesonga? Ge kingang ngicfocga neneac ubaga manganeu. <sup>14</sup> Neni uameme kecnidesoc sogac sogagoc kecma ubangerec negennideac amma geng yoac dedzege amma imoc modackecnc, imoc asoacngoc mewakenunubesena. <sup>15</sup> Ge wenac homac ebicfu fainununc, uameme ifi isocngoc ubangerec nemmena. Neni kifa homac yarefaka hengkefing, imocacsoc ifingoc kifa ubangerecngoc meficgenemmena. <sup>16</sup> Geng ua mekecnec, imoc kingangngicfocga nenearu didiu edzacnunuma kucga damu damuyagoc imoc esamedacfocninango hembisia. <sup>17</sup> Kebu Anutuninaac ubangerecngoc



semennunubeso. Ge marininaac ua tataha meficgena seria febeso. Fora, ge marininango ua meandimbe, imoc tataha meficgena seria febeso.

## 91

### *Engenatoango garennunukecde*

<sup>1</sup> Anutu Engenatoango ngic mong garenggema mesufuu yeng Kuctoa minginaac debannu kecnegeng kecande, <sup>2</sup> ye KEBU edeude, “Ge sufu sufua-mana nga amana seria, ge Anutuna nga ni negenseriguma kecduae.”

<sup>3</sup> Ye nengmeme ngic yeac botacfunac mesiguude nga homecac hafei man-ganango memanganegubaac yeng onggongguude. <sup>4</sup> Ye kpegang dzoeango kperacguu geng yeac kpegang bageau sufuma kecnade. Ye yoac modac kperac Kebu nga fakaya imocngo geac kasoga amma odaga seria ande.

<sup>5</sup> Ge tofocnac wiac mong manganaac kengec mi annade nga wenacfu tebe-medahaac kengectoa amma naric mi kpidohonade. <sup>6</sup> Hafeitoa kundung manau haande, imocac kengec naric mi amma homecac hafei mangana wenacfu fingeacma yunuande, imocac kengec mi annade.

<sup>7</sup> Ngic tauseng yeneng hoanggau namma homegac ten tauseng yeneng foigaugeng namma homegacdeu wiac mangana mongngo gearu naric mi fingerude. <sup>8</sup> Ge kicgango yenemmana ngic Anutu ngadehema mangana megecdeac ayemmeande, yeni angammemenginaac amma turunga megecde.

<sup>9</sup> Geng yofi denec, “Ni KEBUAC hoannu sufuma kecduae nga Kebu Engenatoa ye kecnegeng amana.” <sup>10</sup> Yarefakaac ebicngo gearu naric mi hau ebic mangana mongngo geac kporuc amagaac wegenac naric mi haude. <sup>11</sup> Ye angerofora uayoac yemmeu yeneng sing sasawa kengkecnec, imohai garenggugecde. <sup>12</sup> Ge haniga hocngo heibacac yeneng maringina witiau faiguma sesehegugecde. <sup>13</sup> Ge raiong yangtoa witiau nga kpate witingirau eng tikemma raiong sebigbori nga boidzocac witingirau tima tidzamey-ununade.

<sup>14</sup> Kebungo yofi dede, “Ye neac songo negemma nigoc kpeketahema kecdeac ebicfunac mesibade. Ye neac kpac kuneng negendeac neng heng-gareng amma ongonggebade. <sup>15</sup> Ye kpacnuu ni turunga meremmibade. Ye ebic witiau kefu ni yegoc kecma ebicfunac mesima ewehihehi ammibade.

<sup>16</sup> Ni kekeha mehereeaba kecma gebeckpeu memengerecna edzahabade.”

## 92

### *Ge marigango ua menec*

Sondaac mitiyegec.

<sup>1</sup> O KEBU, ge Engenatoa. Ni ubangerec negemma geac kpac kuneng heiwayong memima yegec heigemba, faka imocngo ngereede. <sup>2</sup> Geng yoac dedzege amma imoc modacnade, imoc asoac dekperagibade. Nga ge yoac modac modac Kebu, imoc tofocnac dekperagima <sup>3</sup> gita witiha tengngo kpema udumeng mema kurere hania hania kpema udumeng yumiango geac kpac kuneng heiwayong memibade, imocngo wiac ubangerehagoc ande. <sup>4</sup> O KEBU, geng ua mekecnec, imocngo ubangerec meficgenenu marigango ua menec, imoc hentegecma sogac sogaiac yegec heibade.

<sup>5</sup> O KEBU, geng ua meannec, imoc bibiagoc nga geac negen negeng imoc engena nga keme kemea yombong. <sup>6</sup> Ngic kapayango imoc naric mi

negenude nga ngic negen negenga kpac, ye wiac yomoc naric mi negente-gerude. <sup>7</sup> Imoc ine yofi, ngic yeneng Anutu ngadehema mangana megedceac ayemmeande, yeni kpindzing isoc erema sabanginagoc anggedce nga yarengic yeni faka mangana angkecma yadiseri anggedce. Nga yeneng yoacngina bic desigec fede, yeni manganaac areng deyec deyecmea.

<sup>8</sup> O KEBU, gennoc engenatoa nga ge nasoya nasoya ifi kechereema kechesannec. <sup>9</sup> Foracngoc, KEBU, geac ngabafocga yeni homecac areng andae nga yarengic sasawa yeni singsararang kpegedce.

<sup>10</sup> Kateburumakango kuhagoc kecande, ge sifu kuc ifia nemma nanggenuna kucgoc amma firang ambade. Ge kerec gombunga kpakema nadzicnennec. <sup>11</sup> Ni kic fima ngabafocna mayunuu yenenai. Nga yarengic yeneng wegenac hama nubeso anggec, yeni kopocsicnginaac turunga ebira megec, imoc kedzacnango negenai.

<sup>12</sup> Ngic dindingac yeneng pam ic gombunga sabayagoc, ifi isoc andae. Yeni Rebanong bangecac yomondzoc ic herea yadiseri angande, ifi isoc yadiseri anggedce. <sup>13</sup> Yeni ic isoc KEBUAC amau homehomera, yeni Anutuac ama-sobennu sabanginagoc anggedce. <sup>14</sup> Yeni esea anggedce, fora. Nga yeni sifu fora meficgema maringina besaima fora homac gbarigoc angkecma <sup>15</sup> yofi degedce, “KEBU ye faka angammemea dindingac. Yeng neac hoc peperandzi seria yombong nga yearu faka mangana mong mi fede.”

## 93

### *KEBU ye ngictau*

<sup>1</sup> KEBUNGO ngictauac kuc, imoc ngakpi isoc heiu kemeu ngicngac garengyunuude. Ye ngictauac kuc heiu ngakpia ande. Ye kuha bic heima kebangau dzegeec.

O, yeng bangectoa bangec tatahau faiu seria tacdeac wiac mongngo meu goroc goroc naric mi anude. <sup>2</sup> O KEBU, geng ngictau tatacga bicngoc tatahau faina seria feu ge nasoya nasoya kecnecc nga kechesannec. <sup>3</sup> O KEBU, dokutoa yeneng ubaudumeng miacgec, dokutoa yeneng ubaudumengngina miacgec, dokutoa yeneng kucgoc arohoma ubaudumengngina miacgec. <sup>4</sup> KEBU wi kecde, ye damu damuyagoc. Ye doku dundung yeneac udumeng ferahama kondung siri yeneac kuc ifingoc ferahade.

<sup>5</sup> O KEBU, geac singyoac imoc sasawa seria nga fora. Geac amau nasoya nasoya kpetiac feengkecbeso.

## 94

### *Ge yoacfu faiyununa*

<sup>1</sup> O KEBU, ge turung kpoukpou Anutu. Turung kpoukpouac Anutu, ge kperagigagoc fingctegecna. <sup>2</sup> O bangecac desi desi ngic, ge yacna. Ngic goa yenangac negenggec engena angkecde, geng ngic imoc angammemenginaac turunga merengyemmebesena. <sup>3</sup> O KEBU, ngic Anutu ngadehema mangana megedceac ayemmeande, yeni nasoherec bic kecgecac nasongina kpac anudeac tomai kecduae. Yeni naso herea bic kecma ngicngac yeneac ebicac amma sogaima kecandaec nasona herecgena kpac ambeso. <sup>4</sup> Yeni enacnginaunac ubakpekpe yoac makecde nga yarengic sasawa yeni sebingina meemma yoac homac osokecdae.

<sup>5</sup> O KEBU yeni geac ngicngacfocga kpedzameyunuma maridzomingfocga kpendzenu faiyunuma <sup>6</sup> ngac hodzec nga kuricngic yunuma beging kpebucyunuma <sup>7</sup> yofi deandae, “KEBU ye naric mi nenenude nga Yakoboac Anutungo imoc naric mi negensiude.”

<sup>8</sup> Ngicngac ubafong, ngeni kedzac faima yoacna negembisia. Oboc kpobocngic, ngeni negen negengoc anggecdeac yoac edengunubade. <sup>9</sup> Anutungo kedzac ngicfu faiu fede amma ye wiac imoc naric negenude. Nga kic imoc Anutuac marikibi. Imocac ye wiac imoc henudengoc. <sup>10</sup> Yennoc bangeha bangeha ngicngac areng kpeleting ayemmema yunuude. Ye negen negeng minginango ngicngac kpouyemmeu yeneng negen negeng arengegecde.

<sup>11</sup> KEBUNGO ngicngac negen negennina negendacde. Ye ngicngac negen negengngina hennegeng amma negenu imoc uaya kpac. Nenang asu mocgu taiandimbe, ifi isoc.

<sup>12</sup> O KEBU, ge ngic mong kopocsicac kpeleting amma dedeseriyoacga edekpou ammiannec, ngic imoc ye kenehagoc. <sup>13</sup> Geng ruae mina ebicnaso mong mi henude. Nga ngic goa Anutu ngadehema mangana megecdeac ayemmeande, yeneng ine kecma kemegecdeac amma teng usuyemmegecde.

<sup>14</sup> KEBUNGO ngicngacfora mi ngadeyunuma wayunuude. Ye maridzomingfora naric mi wayunuude. <sup>15</sup> Ngic mong ye sing dindingac modarude, imohai desi desingc yeneng yeac yoac sing dindingacfu desima monggoc degecde. Ngicngac herenginau ikoc nga hamangec mong mi fede, yeneng desi desi yoac dindingac imoc modacgecde.

<sup>16</sup> Ngic goa yeni Anutu ngadehema mangana megecdeac ayemmeande. Nga merang ni meficnuude nga merang yacma kicnginau nanude? Ni imocac tomai kecduae. Ngic mongngo meficnoma yarengic yeneac kicfu nanudeac tomai kecduae.

<sup>17</sup> KEBUNGO hama ni mi meficnubacfu ubaonganango bic kemema ngicac ubaudumenga kpacfu nga kicsereu febac. <sup>18</sup> Ni yofi deai, “Hanina pososoc anu manubeso ande.” O KEBU, ni ifi debareng fakaga modacma yoac dedzege amma imoc modacma nanggenunec, imohai mi manuec. <sup>19</sup> Herenau negengyohoc homac mekecba geng meserinuma ubaonganaac ubangerec meficgenenec.

<sup>20</sup> Ngicenara goa yeni Anutu ngadehema mangana megecdeac ayemmeande, yeneng geac ogofocga naric mi anggecde. Yeni singyoac hania hania ohoandae, imocngo ngicngac ogofocngina faitobang ayemmema memanganeyunugecde. <sup>21</sup> Yeni ngic dindingac kpehomegecdeac yoac dedzege angkecma ngic kopocsiha kpac homecac arennuu desigecde.

<sup>22</sup> Anu KEBU ye neac ama seria nga Anutuna. Ye neac hoc peperandzi seria amma sufu sufamana. <sup>23</sup> Ngicngac yeneng ogofocngina memanganeyunugec yeng imocac turunga kpouyemmeude. Yeni Anutu wama faka mangana meandaeac yeng meicyunuu kpac anggecde. KEBU Anutuninango meicyunuude.

## 95

### *Yea enac tofohobesonga*

<sup>1</sup> Hagec, KEBUAC yegec heima oeha memini. Ye hoc peperandzi serinina nga memengerecnina. Nenang sogaima yeac yegec dendzerenggema heima

<sup>2</sup> yeac hoannu kemma ye ubangerec memibisina. Neni yeac afe afeheyegec sogaima dendzerenggema heibisina.

<sup>3</sup> KEBU ye Anutu engena yombong, ye anutu sasawa yeneac ngictau engenatoa. <sup>4</sup> Yeng bangectoa bangec manau keme kemea fede, imoc mariaua mema garenggeude. Bangec kperec kperemenga nga tiki sasawa imoc yeac. <sup>5</sup> Yennoc kondung meec, imocac amma kondung imoc yeacngoc. Amma yeng bangec kerenga meu imocngo yeac marikibi ande.

<sup>6</sup> Hagec ngonducnema numumini. KEBUNGO meficnunuuec, nenang yeac kicfu fafoc heimini. <sup>7</sup> Ye Anutunina nga nenang yeac ngicngacfora. Ye yengena odayau fainunuma nenanggareng angkefu ramafora anni yeng mariango menunuu kecdimbe.

O, ngeni yaguc kedzac kpema yeac enacudumeng negembau, imocac yombong anende. <sup>8</sup> Mang esafocngina yeni Meriba dokuu ubaseri amma Massa bangecfu kegec, naso imohai bangec kisiu faka anggec, ngeni ifi isoc mi ambisia. <sup>9</sup> Ni faka kuhagoc meba yeni imoc hengkegec, imoc fora. Nga yeni sifu tobannuma faitobannu fainugec.

<sup>10</sup> Ifi anggec ni kifa 40 ngicngac areng yeneac modzona tiu yofi deai, "Ngicngac imoc yeni ubaherenginau sing segema neac sing ngadehema kecdae."

<sup>11</sup> Imocac ni yeneac ngaba amma yofi deserima deai, "Yeni neac kecnegeng kekecfu naric mi enggecde."

## 96

### *Yegec gboria heimini*

<sup>1</sup> KEBUAC yegec gboria heimibesonga. Bangectoa bangec, ge KEBU yegec gboria heimibesena. <sup>2</sup> KEBU oeha mema yegec heimima yeac kpac kuneng kenehebesonga.\* Ngeni wenaha wenaha memengerec uayaac yoac edeyunukecbisia. <sup>3</sup> Kebu ye kuc nga kibikperagiagoc, imoc bangeha bangeha ngicngac areng botucnginau dekperagima edeyunugec yeng kucfaka bibiagoc meec, imoc ngiha ngiha botucnginau edeyunubisia.

<sup>4</sup> KEBU ye engenatoa nga ye oyang boyang memibesonga. Ye tatahau wi yombong tacma anutu hania hania feracyunudacdeac ye kengec nga ewehaiheigoc hoanggebesonga. <sup>5</sup> KEBUNGO kurumenga kurumenga meficynuec. Nga bangec monnunac ngicngac, yeneac anutufocngina hania hania, yeni ine nemuongasac andacdae. <sup>6</sup> Eweheihei nga ngictauac kuctoa kibikperagiagoc imoc KEBUARU fede. Yeac kpetiac amau kuc nga kibikperagia fede.

<sup>7</sup> Ngiha ngiha arengnginagoc kecdae, ngeni KEBU dengerema yeac kuc nga kibikperagia afehebisia. <sup>8</sup> KEBUAC kpac kuneng imoc kuhagoc nga kibikperagiagoc. Imoc ewehaiheigoc hoanggebesonga. Ngeni sese mema yeac amawomongau hama meembisia. <sup>9</sup> Ngeni kpetiac kekec heigec kemeu siricngina gombunga anu KEBU numumibisia. Bangectoa bangecac ngicngac areng, ngeni yeac kicfu kengec amma dzonong fede fedegoc nambisia.

<sup>10</sup> Ngeni bangec monnunac ngicngac Anutu mi negemmidac, yeneac botucfu yoac yofi dekperagiyemmebisia, "KEBU ye ngictau. Ye kuc imoc mekecma garengyununuma kecde. Foracngoc, ye bangectoa bangec tatahau faiec, imoc nasoya nasoya seria feu wiac mongngo meu goroc goroc naric mi

\* **96:2:** Anutungo meficnunuun nenang bangecngicngacnec yumia kecma Anutuac kenecyoac debisina, yoac imoc mitikibi homac fede nga yeng faka imocac negenu ngeregeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

anude. Ye monde mondea kpac kecma ngiha ngiha faka angammemengina yoacfu isinggema desiude.”

<sup>11</sup> Kurumenga kurumenga ngeni ubangerec negenggec bangecngo so-gaibeso. Kondung nga wiac sasawa imohai wakema fedacdae, ngeni udu-meng kuneng meficgebisia. <sup>12</sup> Maneng nga semeng ua nga wiac sasawa imohai fedacdae, ngeni sogaibisia. Nga kateu ic sasawa, ngeni sogac sogaiac yegec heibisia.

<sup>13</sup> KEBUNGO hadeac amma yeac kicfu sogaibisia. Ye bangecfu desi desi ua meudeac hama bangec sasawa faka dindingacfu isingyunuma ngiha ngiha faka forau yoacngina desiude.

## 97

### *Anutu ye ngictau*

<sup>1</sup> KEBU ye ngictauac kuc minginango bangectoa bangec garenggema kecde. Imocac bangecngo sogaibeso nga kondung tegiau bangec fekendae, yeni ubangerecgcg kecbisia.

<sup>2</sup> Hoeng nga kundung kunengngo ye oronggema fedape. Faka dindingac nga sing dindingac, imocngo yeac ngictautatahaac sering seria. <sup>3</sup> Gerecngo waraimiu ngabafora noboc noboc ye oronggeandae, yeni yonohodarude.

<sup>4</sup> Yeac piratacngo bangectoa bangec mekperagiuc bangec ye imoc hemma dendeng kpeude. <sup>5</sup> Bangec sasawaac KEBU hau tiki yeni KEBUAC kicfu pereckema kendo kereha sisingaiande, ifi isoc sisingaigecde. <sup>6</sup> Kurumenga kurumenga yeni yeac faka dindingac dekperagigec ngiha ngiha yeneng yeac kuc nga kibikperagia henggecde.

<sup>7</sup> Ngic yeni nemuongaac kicfu ngonducnema numuyemmeandae nga imocac negenggec wiac engena yombong anu yoac homac osoandae. Nga nemuongangina yeni wiac fora mi meficgeyemmegecde, kpac. Yeni game kpekpeu faiyunugec eng nangecde. Nga anutu hania hania yeni Kebuac kicfu ngonducnemigece.

<sup>8</sup> Ge anutu hania hania isingyunuma yoacngina desinadeac Siong ye imoc negemma ubangerec meficgeu Yudaac ngacnaroang yeni sogaigecde. <sup>9</sup> O KEBU, ge Anutu engenatoa yombong nga bangec sasawaac ngic kunenga. Ge anutu hania hania feracyunudacnecac afeguyombonggeni.

<sup>10</sup> KEBUNGO kpetiac ngicngacfora kekecngina onggonggeude. Ngic yeni yarefaka henggec imocac modzongina tiande, KEBUNGO yeni songogoc hoangyunuude. Ngic goa Anutu ngadehema mangana megecdeac ayemme-ande, yeng ngicfora yeac mariunac mesiyunuude. <sup>11</sup> Ngicngac dindingac kecandae, yenearu ama wereckenude. Nga ngicngac uba kongahagoc kecdae amma herenginau ikoc nga hamangec mong mi fede, yeni sogac sogai meficgegecde. <sup>12</sup> Ngicngac dindingac ngeni KEBUAC sogac sogaigoc kecma yeac kpara kpetiac yayio kpemibisia.

## 98

### *Bangec sasawaac ngictau*

Mitiyegec.

<sup>1</sup> KEBUNGO faka kuhagoc nga bibiagoc meu yegec gboria heimibesonga. Ye marifoia nga fuaya kpetiac sinema ngabafora feracyunuma firang anec.

<sup>2</sup> KEBUNGO firang bic anec, imoc dekperagiyemmec. Ye faka dindingac

modacma ngicngac yoacngina dema nanggeyunuec, imoc bangec monunac ngicngac ye mi negemmidae, yeni imoc didiu edzacyunuu yeni imoc kicnginango henggec. <sup>3</sup> Ye Israe habu yenigoc yoac dedzege amma imoc modackecde, ye imoc negenu fekecde nga ye yoara modarudeac faka mong mi nigeckpeec. Anutuninango firang anec, imoc ngicngac bangec tegiau fekendae, yeneng henggec.

<sup>4</sup> Bangecfu ngicngac sasawa, ngeni sogaima KEBU dendzerenggema yegec heimibisia. Ngeni dendzerenggema oeha memima yegec heimima kpara heiwayong memibisia. <sup>5</sup> Ngeni gita kpema KEBUAC yegec heibisia. Ngeni gita kpegec yegec udumenga gombunga fingecheso. <sup>6</sup> Ngeni trampet nga taumengtoa fifigec musi udumeng gombunga fingecheso. Ngeni KEBU ngic-tauninaac kicfu kecma yegec dendzerenggema sogac sogaiogc heimibisia.

<sup>7</sup> Kondung, ge nga geac manau wiac sasawa fedae, ngeni udumengtoa meficgebisia. Bangectoa bangec nga imocac manau kecdae, ngeni ifingoc udumeng kuneng meficgebisia. <sup>8</sup> Doku ngeni mari kpegec tiki ngeni sogaima yegec ngenahafoc heibisia.

<sup>9</sup> KEBUNGO desi desi ua meudeac bangecfu hade. Imocac yeac kicfu yegec heibisia. Ye faka dindingacfu bangectoa bangecac ngicngac areng isingyunuma yoacngina desima mondea kpac kecma ngiha ngiha faka angammengina isinggema yoacfu desiude.

## 99

### *Anutu ye kpetiac*

<sup>1</sup> KEBU ye ngictau amma ye ngiha ngiha garengyunuu yeni dzonong fede fedegoc kecbisia. Ye kerobing botucnginau ngictau tatahau taru usocngo bangecfu mebeso.

<sup>2</sup> KEBU ye Siong manau kunennina kecde. Ye engena amma ngiha ngiha sasawa feracyunuude. <sup>3</sup> Geac kpacga imoc damu damuyagoc. Yeneng imoc dengerebisia. Kebu ye kpetiac.

<sup>4</sup> Ngictau ye kuctoayagoc. Ye faka dindingac fingerudeac ammidde. Geng faka mongang mongangka kpac, imoc faina seria fede. Ge Yakoboac areng yeneac botucfu faka angammengina isinggema yoacfu desima sing dindingac modacma yoacngina desinec.

<sup>5</sup> KEBU Anutunina ye kpetiac. Ngeni afehema yeac haniaac tatacfu ngonduc-nema numumibisia.

<sup>6</sup> Mose nga Arong yereng yeac womong gareng habugoc kefec nga Samue ye yeac kpac kuneng kpacma nunumu ua mekefec. Yeni desambic ammigece yeng negengyemmema turunga merengyemmekefec.

<sup>7</sup> KEBUNGO hoeng mong hereatoaac manau tacma yoac edeyunuu yeni yeac dedekperagiyoac nga singyoac tofohoma kecgec. <sup>8</sup> O KEBU Anutunina, geng ngicngac nunumunginaac turunga merengyemmenec. Ge kopocsi wawa Anutungina amma kopocsi nginaac turunga ifingoc merengyemmenec.

<sup>9</sup> KEBU Anutunina ye kpetiac. Ngeni imocac amma afehema tiki kpetiacfu emma fafoc heimima numumibisia.

## 100

### *Kebuac womonnu kenni*

Ubangerecseseac mitiyegec.

<sup>1</sup> Bangec sasawa, ngeni KEBU dendzerenggema sogac sogai yegec heim-ibisia. <sup>2</sup> Ngeni KEBU ubangeregcoc kingang kpemima sogac sogaiac yegegcoc yeac kicfu habisia. <sup>3</sup> KEBU ye Anutu, ngeni imoc negembisia. Yennoc meficnunuma menunuu nenang yeac ngicngac areng andimbe. Nga yeac ngicngac areng amma yeac rama habufora amma yeac oda manau kecdimbe. <sup>4</sup> Ye ubangerec ammima yeac nagutoau embesonga amma ama sobengau dedengerecac yegec heibesonga. Yeac ubangerec dema yeac kpac kuneng kenehebesonga.\*

<sup>5</sup> KEBU ye gombunga. Yeng yoac dedzege amma imoc modackecde, fakaya imoc nasoya nasoya feengkefude. Ye yoara modackecde, imocngo fingecehengahina fekefudesoc, yenearu feengkefude.

## 101

### *Yoac deserima deec*

Dawidingo mitiyegec yofi heiec.

<sup>1</sup> O KEBU, gearu yoac modac modac faka fede. Nga sing dindingac modacma yoacngina desinade, imocac yegec heigembade. <sup>2</sup> Ni kopocsiha kpac kecma sing imohai kengkecbadeac negensima kecduae. O, ge dafinengac nearu hanade? Ni ngic ogofocna mong mi memanganeyunuma herenau dindingac nga kopocsicna kpac kecma amanau kecbade. <sup>3</sup> Wiac mongngo sinna gombunga memanganenuudeacsoc anu ni kic imohai naric mi fibade. Ngicngac sing segema negen negensingngina kpac kecandae, yeneac uac modzona tiu wiac imocngo nigoc mi kpeketaheude.

<sup>4</sup> Herenau sing gombunga modacma imoc naric mi wabade nga kekec mangana imoc nigoc kpac. Yare faka hania hania, imocac negen negeng nearu mi febeso. <sup>5</sup> Mong ye ogea wegenac kecma yeac ngadeyoac sufu sufuu deude, ni ngic ifia memanganeba kpac ambeso. Ngic mong ye yengenaac negenu wiac engena anu ngic ogofora yenemma yeneac negenu mamea angande nga hereau ubakpekpe faka meande, yeac modzona tiude.

<sup>6</sup> Bangecnau yoac modac modac ngic nigoc kegcgecdeac kicna yenearu fima negemba ngereede. Mong ye kopocsiha kpac kecande, yeng neac kingang ngic amma uana mebeso. <sup>7</sup> Ngic mong ye faitobang amma ngicngac ikocfu faiyunuande, yeng neac amau mi kecbeso. Nga ngic mong ikocyoac deande, yeng neac hoannu naric mi kefude.

<sup>8</sup> Ngic Anutu ngadehema mangana megecdeac ayemmeande, yeni asoac-soc bangecfu memanganeyunudacba kpac anggecde. Ni yarengic sasawa meicyunuba kpac anggecde. Yeni KEBUAC taonnu mi kechisia.

## 102

### *Ge ngictau tatacgau tacna*

Kucmamango KEBUAC kicfu hama desambic amma yoac yofi edede.

<sup>1</sup> O KEBU, ge nunumuna negenna memefiac kiacba imocngo gearu habeso. <sup>2</sup> Ge neac ebicnasou kicga nearu mi sufuma kedzacga nearu faina. Ni kpacguba turunga bic merennenna.

\* **100:4:** Anutungo meficnunu nenang bangecngicngacnec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereede. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

<sup>3</sup> Uamemena imoc hosuc ereande, ifi isoc erema kpac anggec sicnango gerea yombong amma gerec isoc dzekecede. <sup>4</sup> Kpindzing herecgegec dzanggema homeande, herenango ifi isoc dzanggede. Kucna kpac yombong anu yaka nenena nigecnude. <sup>5</sup> Ni kpendzeng kpema kunengngoc arohodu-aec amma sebi fusingango kemma sicnau kpeketahade. <sup>6</sup> Ni bangec gbangge gbanggeau kpendzo neng isoc anduae nga kpbekuruc mong amabangec sesuhau kecede, ifi isoc kecduae. <sup>7</sup> Ni gaugbori kecba neng mongngo ama witiau tembuha tacande, imoc isoc anduae.

<sup>8</sup> Ngabafocna yeneng asoacnac kemma marai game kpepeu fainuma deendema anemna kpacna soweckegecede. <sup>9</sup> Ni ic sogong nebadeac anenu hamango yakana angkecede nga kickumanango sokocfu kemema dokuna anu nekecduae. <sup>10</sup> Ge ubaga manganeu ngaba anennec, imocac menu emma ukununa mayai. <sup>11</sup> Uamemena sasawa maraiac onganinango hereeande, ifi isoc ande nga ni kpindzing isoc homema dzanggeduae.

<sup>12</sup> O KEBU, ge nasoya nasoya ngictau tatacgau tacna geac kpac kuneng imoc ngicngac fingecehahena fekefudesoc, nenearu feengkefude. <sup>13</sup> Ge monggoc yacma Sionggac ubaga manganeu. Yagucnoc ubamangang amminadeac naso memea hade. <sup>14</sup> Kingang ngicngacfogca yeneng Sionggac hoc songea negemma yeac sendunggac ubamangang negenda.

<sup>15</sup> Bangeha bangeha ngicngac yeneng KEBUAC kpac kunenggac kengec amma eweheimigec bangecfu ngictau sasawa yeneng geac kuc nga kibikperagigaac ewea heibisia. <sup>16</sup> KEBUNGO Siong ama monggoc mema heigboriu kuc kibikperagiagoc fingecegeru henggecede. <sup>17</sup> Ye ngicngac makpepea neneac nunumuac kedzac faiu wiacac desambic ammini imoc naric mi waude.

<sup>18</sup> Ngicngac fingecehahe ngade anggecede, yeneac amma yoc yomoc kibiu ohogec ngicngac yeneng ngade fingecema KEBU erienozong memibisia.

<sup>19</sup> “Ye yengena kpetiac tikiau wi tacna kiwa fiu maec. KEBUNGO kurumenunac kiwa fima bangec hene. <sup>20</sup> Ngic witicamau kecdae, yeng kiacngina negemma kiwa bangecfu fima homec areng yungecyunuudeac kiwa fiu maec.” <sup>21</sup> Ifi anu KEBUAC kpac kuneng Siong taonnu dekperagibesonga nga Yerusarennu erienozong memibesonga. <sup>22</sup> Ngiha ngiha yeni ngictau areng yenigoc kpeturanggema KEBUAC kicfu ngonducnema numumigecde.

<sup>23</sup> Ye kucna dzongiau memama uameme nasona mewegeneu <sup>24</sup> deai, “O Anutuna, ge kifaga nasoya nasoya ngicngac fingecehahena fekefudesoc, imoc feracyunuma feengkefude. Ge uameme nasona dzongiau herecgema mi meicnuna.” <sup>25</sup> Ge hanac hanaheaunacngoc kecmab bangecac tisiseri fainec seria fede. Kurumenga kurumenga yeni geangga marikibinoc. <sup>26</sup> Wiac imoc sasawa yeni kpac anggec, fora. Nga ge sifu kecengkecnade. Yeni ngakpi isoc esea anggecede nga wamba hesikpe amma ukuandimbe, ge ifi isoc wayunuma gboria fainade.

<sup>27</sup> Geng nasoya nasoya siric ifiangoc kecengkecnade nga geac kifaga imoc wisic kecmab kpac. <sup>28</sup> Geac kingang ngicfocga yeneac nambaracfocngina, yeneng geac hoannu kecec geng esamedacfocngina hoanggau faiyununa yeneng gegoc serima kececde.



1 O ubaongana, ge KEBU kenehena.\* Wiac sasawa neac manau fede, imocngo yeac kpara kpetiac kenehebeso. 2 O ubaongana, ge KEBU kenehena. Yeng faka gombunga anggenc, imoc mi nigecgubeso.

3 Geng ngicngac ogofocga memanganeyununa yennoc kopocsicga imoc waude. Ye hafeidzoicga sasawa mengerema 4 kekecga bummema homec-funac mesiude. Yeng yoac dedzege amma imoc modacma wosoefac anggenu imocngo kekecgau iraga isoc anude. 5 Ge wiac monggac anggenu yeng wiac kereng kereng genu soha anu naric yombong kecnade. Huntoc neng ye dzoea heigboriu sebigbori isoc angande, imoc isoc sebiga monggoc gboriude.

6 KEBUNGO ngic garengyunuu goango ngic ogofocngina ebicfu faiyunuec ubaebicgoc kecege yeng sing dindingac modacma yoacngina faka dindin-gacfu isinggema desiude.

7 Ye singa Mose edzahama uaya mema Israe habu imoc edzacyunuec.

8 KEBUNGO wosoefac anemmema neneac ubamangang negemma ngaba bic mi anude. Ye yoac dedzege amma imoc modackecde, faka imocngo yearu wiac engena. 9 Ye nasosoc mesuninau mi nunukefude nga ye ngaba nasoya nasoya mi mekefude. 10 Nenang kopocsic meficgeing, ye imocacsoc faka mi anemmeude nga fakanina manganaac siricfu turunga mi kpounemmeude.

11 Ngicngac yeneng eweheimigec yeng yoac yenigoc dedzege amma imoc modarude. Yeac faka siriha yofi, kurumenga kurumenga yeni bangec ferahama wi enggec fedae, ye ifi isoc ngicngacfora yeneac songo efea kpac negenude. 12 Wenac ere erea imocngo keme kemeagoc wegenac naric mi tacde, imoc herea yombong. Nenang singyoac kpema mangana meficgeing, ifi isoc imoc meickeu nenanggac hereau kenude.

13 Manggac mongngo nambaracfora yeneac ubea manganeu hoangyunuande, ye ifi isoc ngicngac KEBU eweheimiandae, yeneac ubamangang negemma hoangyunuude. 14 Nga dafiu fingering, imoc yeng negende. Nenang sendungsac, ye imoc negennu fede.

15 Kpindzinggo manennu kpafuya kpeande, imoc uameme nasoya wege-nacsac ande. Nga bangecfu ngic ye uameme nasoya ifi isoc ande. Dzaring dzuria sabayagoc anu 16 firangngo mefiranggeu morongge mama kpac anu wiac imoc tacande, tatahango imoc monggoc mi negenude. Ngic ye kekeha bangecfu ifi isoc ande, fora.

17 Nga KEBUNGO sifu yoac dedzege amma imoc modarude. Ngicngac yeneng eweheihei ammigec yeng nasoya nasoya hoangyunuma kecengke-fude, fakaya dindingac imocngo nambarac nga esamedacfocngina fin-gecgedesoc, yenearu fekefude. 18 Nga ngicngac yeneng yeac dzadzahac seria modacgec yeng ifi ayemmeude. Nga ngicngac yeac nonoyoac negenggec fede, yeni ifingoc ifi ayemmeude.

19 KEBUNGO ngictau tataha kurumenga kurumenga fekendaeu tatahau faiu seria nande. Ye ngictau amma eucererenga wiac sasawa feracyunuma mingina ande. 20 O KEBUAC angero, ngeni ye kenehebisia. Yeac areng kucnginagocngo yeac yoac negengkecma yoara tofohoma ua mekecdae nga yeac ubaudumeng negenggecdeac kedzac kpeandae, ngeni ye kenehebisia.

\* **103:1:** Anutungo mefinunuu nenang bangecngicngacnec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeu. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

<sup>21</sup> Kurumenggac wasai arengfora nga kingang ngicngacfora yeac songo modacandae, ngeni KEBU kenehebisia. <sup>22</sup> KEBUAC marikibifora sasawa bangecfu yeac bageau kecdae, ngeni sasawango KEBU kenehebisia. O ubaongana, ge KEBU kenehena.†

## 104

### *Wiac sasawa mefigeec*

<sup>1</sup> O ubaongana, ge KEBU kenehena. O KEBU, Anutuna, ge engenatoa yombong amma ewehaihei nga ngictauac kuc kibikperagiagoc heima kecanec. <sup>2</sup> Ngicngac yeneng wamba heiandae, ge ifi isoc kperagiango kperacemema kecnec. Geng kurumenga kurumenga meficyunuma kporuchedzo isoc kpedziyununa fekendae. <sup>3</sup> Ge ama managaac kpete doku witiau mema hoeng imoc geac keretac anu geng firanggac kpegang mema witiau tacma kisanna firangngo meguma kenude. <sup>4</sup> Geng firang sueyununa yeneng yoacga mema kenggec gerechorang uayoac edeyununa yeneng kingang kpegengecde.

<sup>5</sup> Geng bangec mema imocngo goroc goroc amma kengha ambacac ge imoc titiseria tatahau fainecac wiac mongngo meu goroc goroc naric mi anude. <sup>6</sup> Geng dzohongtoa mema imocngo bangec kperahana kporuc isoc heiu kemeu dokungo tiki feracyunuma feu <sup>7</sup> geng doku yoac ngabasiric edeyununa yeni kengec amma woradacgec. Ge parandangac mingina nga doku yeneng geac parandang udumeng negemma kengecyunuu woragec. <sup>8</sup> Ge tiki kperemeng tatacngina deseriyemmena tiki yeni yacgec kperemeng yeni kemema ihai fegecde. <sup>9</sup> Geng kpetengina faina feu bangec monggoc semebauac ferahegecdeac kpae heiyemmenec.

<sup>10</sup> Ge bangec keme kemeau doku kiwa faina doku kucgoc hakecma tiki botucnginau mama feec. <sup>11</sup> Fema manennu yang sasawa doku gumecyunuu nekecgec kateu donggi yeneng dokuac homema doku imoc nekecgecde. <sup>12</sup> Kateu yeneng faecngina doku tegiau mema ihai fema ic fawau tacma arohgecde.

<sup>13</sup> Ge wi amagau tacma tikiu doku kpema uaga mema kecna foragoc anu bangecngo fora negebec anude. <sup>14</sup> Geng kpingding dena fingeru ramaburumakango imoc negecde. Geng dzaring nga semeng mefigena fingeru ngicngac neneng semeng ua meni bangecfu yaka fingerudeac edena neandimbe. <sup>15</sup> Ngichereu ubangerec fingerudeac waing mefigenec nga ngicngac kicisiricnina pirac anudeac geng kerec mefigenec. Amma ngicngac herengina kucgoc anudeac yaka mefigema yemmenec.

<sup>16</sup> KEBUNGO Rebanong bangecac yomondzoc ic homecyunuma doku efea kpac kpeyemmu nekecgec <sup>17</sup> neng yeneng faecngina ihai megec kpendzo neng ye faeha yomondzoc icfu mema ihai fekecde. <sup>18</sup> Tiki kuneng herea yeneng kate noning yeneac amabangec nga mandzang yeneng hoc peperandzi singau sufuma kecgecde.

<sup>19</sup> Geng afo faina imocngo kifasoc kecnideac kpete angkefu wenac yengenaocngoc keme keme nasoya negenude. <sup>20</sup> Geng kundung faina ama toforeu kateu yang yeneng kenghaanggecde. <sup>21</sup> Raiong yang sebigbori yeni Anutungo yakangina meficgeudeac negemma yang yunuma negecdeac

† 103:22: Anutungo meficnunu nenang bangecngicngacnec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeu. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

kucgoc arohogecde. <sup>22</sup> Wenac ereu yeni monggoc meickema faecnginau kemma fegecde.

<sup>23</sup> Imohai ngicngo ama uayau kemma ua mema kefu ama marai anude.

<sup>24</sup> O KEBU, ge wiac hania hania medacnec, imocac kpetea engena yombong. Ge negen negengecgango imoc sasawa mena wiac sasawa kekecnginagoc yeneng geac marikibiga amma bangec mewakedae. <sup>25</sup> Kondung ye kuneng kpererema edi feu kondungyang nga yang kuneng kapia hania hania homac yombong imocac manau fedae, yeneac kpete naric mi osodacnide. <sup>26</sup> Wage yeni imohai kengha angkecdae. Nga geng kondunggac kondungyang kuneng ifingoc meficyununa yeneng kondunnu yuengyuma anggecde.

<sup>27</sup> Wiac imoc sasawa yeni kicngina gearu figec geng nasoya hau yaka yemmenadeac negeung kecgec <sup>28</sup> geng wiac yemmena imoc mekecgecde. Geng mariga mederena yeni wiac gombunga homac negebec angkecdae.

<sup>29</sup> Ge kicga yenearu sufuna yeni kpidohoma kengecyunuude. Ge asungina wangecyununa yeni homema bangecnginau monggoc dzigenegecde.

<sup>30</sup> Geng meficyunuma Asuga monggoc fifina yeneng monggoc gborigecde. Ge bangecac siriha heigborikecna monggoc gboria fingerude.

<sup>31</sup> KEBUAC kuc nga kibikperagi imoc nasoya nasoya feengkecheso. KEBUNGO marikibia hemma ubangerec negembeso. <sup>32</sup> Yeng kiwa bangecfu fiu bangecngo dendeng kpeu mariango tiki kpesereyunuu tikingo hosuc kpegecde.

<sup>33</sup> Ni kekecna kecbadesoc KEBU yegec heimibade. Ni kekecna kecma Anutu dengerekecbadengoc. <sup>34</sup> Ni KEBUARU sogac sogai meficgekecma yeac wiac hennegeng angkecba yeng imocac negenu ngereebesoo. <sup>35</sup> Ngic kopocsigoc bangecfunac meicyunubesonga nga ngic Anutu ngadehema mangana megecdeac ayemmeande, yeni kpac ambisia.

O ubaongana, ge KEBU kenehena. \* KEBU erienzong memini, hallelu Yac.

## 105

### *Fora meficgeude*

<sup>1</sup> O ngicngac, KEBU ubangerec memima yeac kpac kuneng hofocbesonga. Yeng ua sasawa meande, imoc ngiha ngiha dekperagiyemmema edeyunugoc yeneng imoc negendacbisaa. <sup>2</sup> Ngeni yeac yegec heimibisaa. Ngeni dedengerec yegec heimima yeng ua bibiagoc meande, imoc ngicngac edeyunubisaa. <sup>3</sup> Yeac kpara kpetiac. Ngeni imocac negengec wiac engena ambeso. Ngicngac KEBU hofocandae, ngeni sogabisaa. <sup>4</sup> Ngeni KEBU hofocma yeac kuhaac kic fima yeac hoannu kemma kecgecdeac nasosoc angemmebesoo. <sup>5</sup> Yeng ua bibiagoc amma kucfaka bibiagoc mekecma desi desiyoac enarango dekefec, ngeni imoc negenggec febesoo. <sup>6</sup> O, yeng ngeni meisingngunuec. Ye kingang ngiha Abarahngac gboricfora nga Yakoboac medacfora meisingngunuec.

<sup>7</sup> Yennoc KEBU Anutunina nga yeng ngicngac yoacngina isinggema desiude, faka imoc bangecfu sokoma fede. <sup>8</sup> Ye dzadzahac meec, imoc nasosoc negensima dedeseriyoac edengunuec, imoc ngicngac fingeceahengina fekefude, imoc andenga tauseng feenude, imocacsoc negensima kefude.

<sup>9</sup> Ye Abarahngac dzadzahac imoc mema Isakaac yoac deserimima edema

\* **104:35:** Anutungo meficnunu nenang bangecngicngacnec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeu. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

<sup>10</sup> Yakoboaru dedeseriyoac imocnoc meserima Israeog dzadzahac imoc fefeseri feudeac dema <sup>11</sup> yofi deec, “Ni maridzoming arennu Kanaang bangec ge gembade, imocnoc geac bangec noboha anude.”

<sup>12</sup> Ngicngac imoc yeni kpetengina kuneng kpac. Yeni ngicngac efeanecsac amma bangec imohai kemma kuric kecgec. <sup>13</sup> BANGECARENG yeneac bangecngina fekende, yeni imohai yerecgema ngictau monggac bangec yerecgema ngictau monggac bangecfu kengkecma ngicngacareng mong yenigoc kecma wayunuma monggaru kengkecgec.

<sup>14</sup> Kebungo ngic kpaie heiyemmeu mongngo mong ebicfu mi faiyunuec. Ye yeneac amma ngictau yoac ngabasiricfu ayemmema <sup>15</sup> yofi edeyunukefec, “Ni ngic meisinggema kerecdokungo nadzicyemmeai, ngeneng mi kpesereyunubisia nga profetefocna mangana mong mi ayemmebisai.”

<sup>16</sup> Yeng bangec imohai boditua fingerudeac edeac, imohai neneseMengngina sasawa kpetotieu kpac anudeac negemma <sup>17</sup> ngic mong bic sueu waraiyemmeec, imoc Yosefe. Yeneng ye wanac ngic anudeac dema suema dzo megec. <sup>18</sup> Yeni hania ic gigidangau faima ubiau becsac aiengngo memea dzegegec.

<sup>19</sup> Yeng ifi kefu yeac kpefing yoac dedea, imoc erema heiu KEBUAC yoacngo Yosefeac hania tobanggeu seriec. <sup>20</sup> Seriu Aigita yeneac ngictaungo ngicfora sueyunuu kemma Yosefe yungecgec. Ngiha ngiha yeneac ngictaungo Yosefe witicfunac yungerec.

<sup>21</sup> Ngictaungo ye amea manaac enara faiu yeng iwaiya sasawa garenggeudeac uayoac demiec. <sup>22</sup> Demiu Yosefengo songeaac arennu ngictauac medacfora dederecge ayemmema ngic enarafora negen negentegec edekpou ayemmekefec.

<sup>23</sup> Ifi anu Israe yeneng Aigita bangecfu hagec. Yakobongo Hanggac bangecfu kuric kefu <sup>24</sup> KEBUNGO ngicngacfora meficyunuu fingece-sahe kuneng nga kucgoc amma ngabafocngina yeneac kuc ferahagec. <sup>25</sup> Ferahegeg yeng Aigita ngic yeneac negen negeng merenu yeneng ngicngacfora ubango ukuyunugec. Yeni yenhafoc yoac denegeng amma Kebuac kingang ngicfora faitobannu faiyunugec.

<sup>26</sup> Ifi anggeg Kebungo kingang ngiha Mose suema Arong ifingoc meisinggeu <sup>27</sup> yereng yeneac botucfu faka kuhagoc meoc. Yeri Hanggac bangecfu kucfaka mi hehena mekefoc.

<sup>28</sup> Anutungo kundung sueu bangec mekundungkpeu yeneng ine yeac yoac kpema wagec. <sup>29</sup> Ye dokungina sasawa heimerenu sac andaru kondungyang kpebucyunuu homedacgec.

<sup>30</sup> Sepeng yeneng hama bangecngina sokodacma ngickunengfocngina yeneac fefeamnginaungoc engkecgec. <sup>31</sup> Yeng yoac deu dawec nga dokuac mogocbisic habutoanginagoc hama ama bangecngina sasawa sokodarec.

<sup>32</sup> Yeni kia kpeudeac negenggeg yeng nomanggbomea yemmeu piratacngo amabangecngina sokoma heidarec. <sup>33</sup> Yeng waing icngina kpezamema fig ic amma icngina goa bangecnginau kpetackedarec.

<sup>34</sup> Ye ipua yoac edeyunuu yeneng hagec. Ipuu gboria kucnginagoc hagec, yeneac kpetengina naric mi mebesonga. <sup>35</sup> Yeneng hama bangecfu wiac maria tengging tengging sasawa nedacma bangecnginaac semeng nedacgec kpac anec.

<sup>36</sup> Yeng bangecnginau warac medacfocngina sasawa kpebucyunudacma kucnginaac fora warac fingegec, yeni kpebucyunuu homedacgec.

<sup>37</sup> Imoc sasawa fingeru wisickeu ye Israe habu meyunuu Aigita bangec wama kenggec. Yeni siriwa nga gol momoc mema kenggec yeac ngicngac arengfora yeneanunac mongngo mi tifainggema makpeec. <sup>38</sup> Aigita ngicngac yeneac ngicngac yeneac homac kenggecyunueac amma yeneac wayunuma kenggec, imocac ubangerec negenggec.

<sup>39</sup> Anutungo hoeng tiameu imocngo kperacngina amma witinginau feu tofocnac gerec yemmu imocngo mekperagiyunuec. <sup>40</sup> Yeni kpesimigec yeng neng negecdeac yemmema kurumenggac yaka efea kpac yemmu negebec anggec. <sup>41</sup> Ye hoc kpendziru doku dundungngo mama bangec dokuya kpac, imohai dzuamagoc mekeng feec.

<sup>42</sup> Nocac ye dedeseri kpetiac deserima bic deec. Nga ye kingang ngiha Abarahang, yeac ifingoc negenu feu <sup>43</sup> ngicngacfora sogac sogagoc wange-cyunuec. Ye meisingfora hesicyunuu yeni yegec heima arohoma sogaima kenggec. <sup>44</sup> Yeng bangec monnunac ngicngac yeneac bangec wange-cyunuma meisingngicngacfora imoc yemmu ngicngac yeneac semeng uaac mingina amma fora mema nekecgec. <sup>45</sup> Yeneng yeac singyoac mekecma dedeseri yoara seria modacgecdeac ifi anec.

KEBU eriendzong memini, hallelu Yac.

## 106

### *KEBU eriendzong memini*

<sup>1</sup> KEBU eriendzong memini, hallelu Yac. KEBUNGO yoac dedzege amma imoc modarude nga woseofaha imoc nasoya nasoya feengkefude amma ye gombunga, imocac ubangerec memibesonga. <sup>2</sup> KEBUNGO faka kuhagoc mekecde, ngic mongngo kucfaka ifia naric mi deude nga ye kucfaka imoc dengereudeacsoc kpac.

<sup>3</sup> Ngicngac sing dindingac nasosoc modacbeso ayemmeande nga faka dindingac angandae, yeni kenecnginagoc. <sup>4</sup> O KEBU, ge ngicngacfocga gombunga ayemmema neac ifingoc negenna febeso. Ge ngicngac ebic-funac mesiyunuma ni ifingoc meficnubesena. <sup>5</sup> Geng ngicngacfocga meis-inyununa yeni naric kecma wiac monggac mi obohogece, imoc hembeso anende. Ngicngac arengfocga yeneng ubangerec negengandae, imoc hemma sogabadeac anende. Geac maridzoming ngicngacfocga yeni sogaima ge dengeregugecde, imohai ni yenigoc sogabadeac anende.

<sup>6</sup> Warac mangesafocnina yeni kopocsic meficegec nenang meficnyunuma Anutu ngadehema mangana menideac anemmu ngicngac ogofocnina memanganeyunuma faka mangana ayemmeing. <sup>7</sup> Esangabofocnina yeni Aigita bangecfu kecma geac kuc fakaga bibiagoc hengwa anggec. Geng yoac dedzege amma imoc modacnade, imoc wiac engena. Yeneng ine imoc nigecyunuu kondung sacsac tegiau kecma Anutu Engenatoaac yoac kpegec <sup>8</sup> ye yengena kparaac amma ebicfunac mesiyunuma kuhaac hania mekper-agiyemmeec.

<sup>9</sup> Yeng kondung sacsac yoac ngabasiric ammiu gbanggeec. Nga yeng dzo-hong keme kemeausing bangec gbangge gbanggeau kengandae, ifi isoc wangecyunuma nobocgeng enec.

<sup>10</sup> Ye ifi amma ngic ngadeyunuec, yeneac mariunac mesiyunuma ngabafocngina yeneac kucfunac mesiyunuec. <sup>11</sup> Doku imocngo ngabafocngina semeyunudaru kpac anggec yeneanunac mongngo mi kefec. <sup>12</sup> Ifi anu yeneng yeac yoac negensinggema dedengerec yegec heimigec. <sup>13</sup> Nga yeni ine bic

yombong ye uaya mekefec, imoc nigecyunuu yoac dederecge ayemmeudeac tomai mong mi anggec. <sup>14</sup>Yeni bangec kisiu yakaac songo kuneng negemma imoc mi garenggema bangec gbangge gbanggeau Anutu faitobannu faigec. <sup>15</sup>Nga ye wiac mong yemmeudeac derecgegec, imohai yeng imoc yemmema hafei kuneng mong botucnginau sueu yenearu haec.

<sup>16</sup>Anu ngic yeneng kporucedzongina nangenec, ihai kecma Moseac keracmangang amma Arong, KEBUAC kpetiacngic, yeac keracmangang ifin-goc anggec <sup>17</sup>bangecngo anggema Datang gbokoma Abirang arengforagoc semeyunuec. <sup>18</sup>Gerecngo mama ngicngac yeni modacyunukecgec, yeni sasawa yonohoc. Gerechorangngo yarengic yonohodarec.

<sup>19</sup>Anu yeni Horebe tikiu kecma burumaka medahaac ongea mong mema nemuonga aiengngo mema, imoc eweheimima numumigec. <sup>20</sup>Yeni Anutuac kuc nga kibikperagia wama imoc merenggec burumaka kpindzing neande, onga imocngo yeac tataha meudeac negemma faigec. Faima fafoc heimima numumigec.

<sup>21</sup>Anutu memengerecnginango Aigita bangecfu faka kuneng mekefec, yeac nigecyunuec. <sup>22</sup>Yeng Hanggac bangecfu kucfaka bibiagoc mema kondung sacsacfu faka kicfurua meu kerectegec anggec. <sup>23</sup>Yeneng ifi anggec yeng kpetotieyunuudeac deu Mose meising ngihango Anutuac kicfu namma yeac herebu menomanec. Ye ifi mi nambac dede Anutungo kpetotieyunuu kpac ambau.

<sup>24</sup>Anutungo yoac deserima deu yeneng imoc mi negensinggema bangec gombunga yemmeu megecdeac dedea, imoc ngadehegec. <sup>25</sup>Yeni kporucedzonginau Anutuac pandzeng kpouma tacma KEBUAC ubaudumeng negemma imoc mi tofohogec. <sup>26</sup>Imocac yeng maria miacma yoac yofi deserima deec, "Ni bangec kisiu yunuba homema fedacbisia nga <sup>27</sup>esamedacfocngina medereyunuba bangeha bangeha ngicngac areng yeneac botucfu kecgecde. Yeni ifi kecgec ngicngac yeneng yunukpebuc ayemmegec neng bangeha bangeha fekendae, imohai sueyunuba singsarang kpema kecbisia."

<sup>28</sup>Imocac witiau yeni Peore tiki Baari nemuac ongagoc kpekete hama kecma nemuonga homemea yeneac sesegerec oho ohoya, imoc nekecgec.

<sup>29</sup>Yeni ifi amma KEBUAC here miacgec yeng angammemenginaac amma ngaba ayemmeu hafei mangana mongngo yenearu fingerec.

<sup>30</sup>Anu Pinehasingo sifu yacma KEBUARU nunumu ua meu hafei mangana imocac kuha mau kpac anec. <sup>31</sup>Yeng ifi anecac amma fingece sahe feerekecgecde, yeni sasawango Pinehasiac fakaya dindingac, imoc negen-sicdegecde.

<sup>32</sup>Anu yeni Meriba dokuu kecma KEBU ngaba ifingoc meficgemigec Mosengo yeneac ebicac amma ebicfu enec. <sup>33</sup>Yeneng Moseac asu mehodungagoc yeng yoac mi negentegecma deec.

<sup>34</sup>KEBUNGO dederecgeyoac ayemmeec nga yeni ine ifi isoc habu goa mi kpetotieyunuma meicyunugec, kpac. <sup>35</sup>Yeneng ine bangeha bangeha ngicngac areng yenigoc kengha amma yeneac faka arenggema imoc modacgec.

<sup>36</sup>Yeni yeneac nemuonga hania hania modacgec. Faka imocngo botacngina amma mendangyunuu <sup>37</sup>yeni nroangmedacfocngina meyunuma kpebucyunugec. Faka imocngo asu manganaac hosuc heiyemmekecgec.

<sup>38</sup>Yeni nambaracfocngina yeneac sac kopocsiha kpac kpakegecac bangecngina seuhagoc anec. Yeni nroang medacfocngina sese dema kpebucyunuma

Kanaang baneac nemuonga yeneac sesegerec ohogec baneacngo sacac kopocsicac seuhagoc anec.

<sup>39</sup> Ngicngac yeni angamemengina ifia angkecgecac amma uba seucnginagoc amma Anutuac kicfu yeni kaisero siric anggec.

<sup>40</sup> Imocac KEBUNGO ngicngacfora ngaba ayemmema maridzoming ngicngacfora yenenu seucnginagoc anggec negemma modzea tiu wayunuec. <sup>41</sup> Wayunuma baneac monnunac ngicngac ye mi negemmidae, yeneac mariu faiyunuu yeneng ubango ukuyunuma garengyunugec.

<sup>42</sup> Ngabafocnginango ebicfu faiyunugec ubaebicgoc kecgec yeneng meyunuma memayunuma kucngina bageau faiyunugec. <sup>43</sup> Kebungo naso homac ebicfunac mesiyunukefec nga yeneng ine yoackpekpengic amma faka imocsac negensima kecgec. Yeni ngicngac ogofocngina memanganeyunukecgecac yeng memayunuu memefiac obohoma <sup>44</sup> kpendzeng kpekecma kiacec, fora. Nga yeng sifu ebicngina negensima memefiac kiacec negenece.

<sup>45</sup> Ye warac dzadzahac yenigoc meec, imoc yeneac amma negenu fec. Yeng yoac dedzege amma imoc modackecde, imocngo efeac kpac femideac amma yeneac ubamangang negengkefec. <sup>46</sup> Ngic witicfu faiyunuma meyunuma kecdacec, yeng faka ayemmeu yeneng yeneac ubahodung negenggec.

<sup>47</sup> O KEBU, Anutunina, ge ebicfunac mesinunuma baneac monnunac ngicngac ge mi negenggudae, yeneac botucfunac menunuma kpedzucnununa. Geng ifi anna neni geac kpacga kpetiacac ubangerec negemma homac dengeregunide.

<sup>48</sup> KEBU Israeac Anutu, ye nasoya nasoya kenehebesonga. Imoc fehereema fekecbeso.

Ngicngac sasawango yofi debisina, "Imoc Fora." KEBU eriendzong memini, hallelu Yac.

## MITIYEGEC KIBI 5

### 107

#### *Mitiyegec 107-150*

#### *Amabaneac gombunga meficgeec*

<sup>1</sup> KEBU ye gombunga. Ye yoac dedzege amma imoc modackecde, fakaya imocngo nasoya nasoya feengkefude. O, ngeni imocac ubangerec memibisia. <sup>2</sup> KEBUNGO ngicngac bummenunuma ebicfunac mesinunuec, ngeneng ifi dekecbisia. <sup>3</sup> Ngeni bangeha bangeha kecgec yeng imohacnac mengunuec. Goa ngeni wenac ere ereau kecgec nga goa wenac keme kemeau kecgec. Goa ngeneng not bigeng kecgec nga goa saot bigeng kecgec nga yeng imohacnac mengunuma kpedzucngunuec.

<sup>4</sup> Goa ngeni taong monnu kemma kecgecdeac sing hofocma baneac kisi gbange gbangeau kengha angkecma <sup>5</sup> yakaac nga dokuac homema ubaongangina herenginau homeec. <sup>6</sup> Ngeni ebicfu ifi kecma KEBUARU kiacec yeng kpendzeng imohacnac mesingunuma <sup>7</sup> sing wegenacfu waneacngunu kengkecma taong nga amabaneac gombunga meficgengemmeu ihai kecgec. <sup>8</sup> KEBUNGO yoac dedzege amma imoc modackecde, ngeni imocac ubangerec memibisia. Yeng baneacngic medacfocngina meficngunuma faka bibiagoc mekecdeac ngeni ubangerec memibisia. <sup>9</sup> Mongngo dokuac ammiu yeng doku miu negebec anude nga mongngo yakaac homeu yeng wiac gombunga miu neu gebeckpeude.



10-11 Goa yeni Anutu Engenatoa yeac yoac kpema dederecgeyoara ngade-hekecgecac kundung manau kengkpung hakpung anggec witicngo witi-cyunugec tacandae, ifi isoc tacma kpendzeng kpegec. 12 Yeni uatoa mekecgec herenginango kuha kpac anu bangecfu mayunuu mongngo mi meficyunuec.

13 Yeni ebicfu ifi kecma KEBUARU kiacgec yeng kpendzeng imohacnac mesiyunuma 14 kundung dzic imohacnac meyunuu erema witicngina herecgec.

15 KEBUNGO yoac dedzege amma imoc modarude nga yeneng imocac ubangerec memibisia. Yeng bangecngic medacfocngina meficyunuma faka bibi-agoc mekecdeac ubangerec memibisia. 16 Yeng nagu seria aiengngo memea sasawa, imoc hembareckeu aiengngo kpae heiheia imoc kpetackeude.

17 Goa yeni kopocsicac fakagoc kecgecac hafei ayemmeec. Yeni ngicngac ogofocngina memanganeyunugecac amma kpendzeng kpekecma 18 yaka negecdeac mi ayemueu yaka sasawa wama homecac nagu heima fegec.

19 Yeni ebicfu ifi kecma KEBUARU kiacgec yeng kpendzeng imohacnac mesiyunuma 20 yoara sueu mama hafeingina mengereu wiac kpetotieyunuu kpac ambeso anggec, imohacnac mesiyunuec.

21 KEBUNGO yoac dedzege amma imoc modackecde, yeneng imocac ubangerec memibisia. Yeng bangecngicac medacfocngina meficyunuma faka bibiagoc mekecdeac ye ubangerec memibisia. 22 Yeni ubangerecac sese ohoma yeng uaya sasawa mekecde, imocac oyang boyang memima imoc ngicngac edeyunubisia.

23 Goa ngeni kondunnu wageu emma kenggec nga goa ngeni dokutoau kengkecma finac mehama ngicngac yenearu suegec. 24 Ngeni ihai kecma KEBUNGO ua kuneng sasawa mekefec, imoc hengkecgec. Ngeni yeac ua bibiagoc kondunggac keme kemeau henggec. 25 Yeng enacngo deu firang kucgoc kpema kondunggac siri miaru kucgoc kpeu 26 wagenginango sawau yombong emma emu keme kemeau yombong kemegec ngic ngeni ebic imoc hemma ongangina worau kengecngunuec. 27 Ngeni kicngina gigiu ngic doku seria neandae, ifi isoc goroc goroc amma kengha amma negen negengngina mi ireckeec. 28 Ngeni ebicfu ifi kecma KEBUARU kiacgec yeng kpendzeng imohacnac mesingunuma 29 firangnomang menomanu kpac anec nga kundung siri menomanu ning kpema feec. 30 Kundung kuha mau ngeneng ruaegoc kecgecac ubangerec negenggec. Nga yeng wangecngunuu ngeni ihai me ihai kembesonga negenggec, ihai kengsikegec.

31 KEBUNGO yoac dedzege amma imoc modackecde, ngeneng imocac ubangerec memibisia. Yeng bangecngic medacfocngina meficngunuma faka bibi-agoc mekecdeac ngeni dangge memibisia. 32 Ngeni habu yeneac kpekpeturannu Kebu oyang boyang memima enarafocngina yeneac botucfu namma ye eriedzong memibisia.

33 Yeng dokutoa heimerenu bangec gbangge gbanggea anggec. Nga doku kiwagocngo kerengaima bangec gbangge gbanggea anggec. 34 Ngicngac areng goa yeneng bangecnginau kecma Anutu ngadehema mangana megecdeac ayemmeec. Imocac yeng bangec kerehagoc imoc merenu bangec kisi kondungagoc anec. 35 Ye bangec kisi gbangge gbanggea heimerenu doku dzohong homac fingegec nga bangec dzangge dzanggea merenu doku dzuamagoc fingegec. 36 Ye ngicngac yakaac homegec, yeni ihai faiyunuu kecma taongngina ihai megec amagerecngina seria anec. 37 Yeni semeng nga waing uaginuu homegec fora homac anec.



<sup>38</sup> Yeng kenecyunuu nambaracfocongina homac fingegec. Amma ram-aburumakangina keneheu yeneac kpetengina mi maec. <sup>39</sup> Ngic yeneng ebicfu faiyunugec ubaebicgoc kecma memefiac obohoma ebicfu nga uba-hodungoc kecgec kpetengina mau habu kapiancec anggec. <sup>40</sup> Anutungo ine ngictauc medacfora yeneac modzea tiu ebic meficgeyemmema bangec kisi singa kpac, ihai faiyunuu kengkpung hakupung ihai kengkecgec. <sup>41</sup> Nga ngicngac yeni iwaiaic obohoma kpendzenuu kecgec, yeng yeni ebicfunac mesiyunuu nambaracfocongina yeneng fingecehetoa amma rama habutoa angandae, ifi isoc anggec. <sup>42</sup> Ngicngac ikoc nga hamangecongina kpac kecan-dae, yeneng imoc hemma ubangerec negenggecde. Nga ngic Anutu ngade-hema mangana megecdeac ayemmeande, yeneng ine yoacngina waick-egecde.

<sup>43</sup> Mong ye negen negentegecgec kecde, yeng wiac yomoc hensima negen-tegecbeso. KEBU ye yoac dedzege amma imoc modarude, bangecfu ngicngac yeneng imoc negenghomebisia.

## 108

### *Anutuac dangge*

Dawidingo mitiyegec yofi heiec.

<sup>1</sup> O Anutu, herenango efaiu udumeng gombunga amma yegec heibade. Ubaongana, ge gaunac yacna. <sup>2</sup> O, ni ama werec wereckenggac yombong midibade nga gitakurere ngeri negengboribesera.

<sup>3</sup> O KEBU, ni ngiha ngiha botucnginau ge ohec megemma bangec monnunc ngicngac yeneac botucfu yegec heima ge dengeregubade. <sup>4</sup> Geng yoac dedzege amma imoc modackecneac, imocngo wiac engena amma engkecma kurumenga kurumenga feracyunuma enude. Nga ge yoac modac modac angkecneac, faka imocngo sawau emma hoeng kpesereyunuude.

<sup>5</sup> O Anutu, ge oyang boyang megengandae, imocngo kurumenga kuru-menga ferahema erebeso. Ge kucga nga kibikperagiga bangecfu faina mama bangectoa bangec sokodacbeso. <sup>6</sup> Geng ngicngacfocongina neneac songo negennec, neni ebicfunac mesinununadeac marifoigango meficnunuma nunununaac turunga merennemmena.

<sup>7</sup> Anutungo womonga kpetiacfu tacma yoac yofi deserima deec, “Ni firang amma sogac sogaicog Sikeng ama nga Sukocac bangec tumia medereyem-mebade. <sup>8</sup> Gireac nga Manasse imoc neac, Efarang imoc wasaiopocna nga Yuda ye ngictauyasuna. <sup>9</sup> Moabi ye dokunadzic terana nga Edonggaru hanitabena ukuma Firistia bangecfu firang amma arohobade.”

<sup>10</sup> Dawidingo monggoc yofi deec, “Taong odaya seria fede, mongngo imohai hesicnuu kendedeac negenduae. Mongngo naric hesicnuu Edong bangecfu kendedeac negenduae.” <sup>11</sup> O Anutu, ge wanunuma ukunudacma neneac wasaingichabugoc monggoc mi kengannec.

<sup>12</sup> Ngicngo meficnunuande, imoc memefihagoc kpac. Imocac geng mefic-nununa ngabafocnina yunubisina. <sup>13</sup> Neni Anutugoc namma kuctoaninagoc amma firang annide. Gennoc ngabafocnina tidzicyununa bangecfu fegecde.

## 109

### *Ni kopocsicna kpac*

Yegecgareng yearu. Dawidingo mitiyegec yofi heiec.

<sup>1</sup> O dedengerec Anutuna, ge yoacga mi waickena. <sup>2</sup> Ngic goa ge waguma mangana megecdeac ayemmeande nga faitobang ngic ikocnginagoc, yeneng memanganenubeso enacngina anggema nedzarangngina ikohagoc neac yoac mangana dema <sup>3</sup> ngadenuma oronnuma memangac manganeyoac denemma hania kpacfu hama nugecde. <sup>4</sup> Ni songogoc hoangyunuba yeneng mesunnau nuandae, fora. Nga ni sifu yeneac numubade. <sup>5</sup> Ni faka gombunga ayemmeba yeneng turunga mangana merenenggec. Ni songogoc hoangyunuba yeneng ubango ukunugecde.

<sup>6</sup> Yeni yofi dedae, “Ngc mong Anutu ngadehema mangana meudeac ammiande, ye uayoac mina yeng ngic manganaac yoac kpebeso. Ngic mongngo yoacfu marifoiau namma yeac mesuyau kpebeso. <sup>7</sup> Desi desingicngo ye isinggema yoac desima ngic imocac manganaya hembeso nga yeac nunumuya imoc Anutungo negenu kopocsihagoc angkecde, ifi desibeso. <sup>8</sup> Kekecnasoya imoc wegenanec anu ngic mongngo yeac ngicenaraac tatac mebeso.

<sup>9</sup> Nambaracfora yeneng beging anggec enemango hodzec ambeso. <sup>10</sup> Nambaracfora yeneng amaheidac kecma yakaac derecgema kecbisia. Yeni amabangec sesuhau kecgec imohai meficynuma imohacnac ifingoc kporacyunubesonga. <sup>11</sup> Ngic mong ye faka sirihau mi amma hiedzo meande, yeng finaha segereu kuricngic yeneng uayaac fora mekecbisia.

<sup>12</sup> Mongngo ye ubangerec mi ammibeso nga begingfora yeneac ubamangang mi negengyemmebisia. <sup>13</sup> Yeac esamedacfora meicyunugec kpac ambisia. Ye esamedacfora yeneac arennu yeac kpac meickebesonga. <sup>14</sup> Mangesafora yeneng ngicngac ogofocngina memanganeyunugec, KEBUNGO kopocsingina imoc negenu febeso. Nga nonggeaac kopocsic imoc naric mi wabesonga. <sup>15</sup> Yeneac kopocsic imoc nasosoc KEBUAC kicfu feu hengkecbeso. Ngic imoc bangecfunac meickegec kpac anu yeac nigecyunudacheso.”

<sup>16</sup> “Ye wiac gombunga anudeac nigeckpeu makpekpea nga iwaiac obohoma kecgec, yeni yunukporac ayemmema ubaebicgoc kisangyunuma homecfu faiyunuec. <sup>17</sup> Ye sowecyoac deudeac songo negengkefec, imocac yeneng soweckebisia. Ye kenecyoac mi ammiecac kenec yeac hereau febeso. <sup>18</sup> Ye sowec ngakpi isoc heima kefecac sowecngo sebifusiau doku isoc kemema sirau kerec isoc kemebeso. <sup>19</sup> Sowecngo ngakpitoaya anu kperacemebeso nga kebangau fadeng isoc anu wenacsoc dzegebeso.”

<sup>20</sup> Ngabafocna yeneng yoacfu nukecgec KEBUNGO turunga imoc kpouyem-mebesos. Yeni ngadeyoac denenggec yeng ifi ayemmebeso.

<sup>21</sup> O KEBU Anutuna, ge kpac kunenggac amma yoacna dema nanggenuna. Geng yoac dedzege amma imoc modackecnec, imoc fedecac ebicfunac mesinuna. <sup>22</sup> Ni ngic makpekpea amma iwaiac obohoma kecduae. Nga yeni herena manau woubocna kpegec tohoec. <sup>23</sup> Maraiac ongango hereema tofocnac kpac angkecde, ni ifi isoc kpac ambeso anduae. Firangngo ipua mefiranggeu kengandae, ifi isoc kenduae. <sup>24</sup> Ni yakasege kecma fafocna kuha kpac anu sicnasac anduae. <sup>25</sup> Ngic mesunau nudae, yeneng desofoc anemma orucngina kpatitickenendae.

<sup>26</sup> O KEBU, Anutuna, ge meficnuna. Geng yoac dedzege amma imoc modackecnecac ebicfunac mesinuna. <sup>27</sup> O KEBU, ge marigango wiac imoc menec, yeni imoc negentegebisia. O Kebu, geng ua imoc menec. <sup>28</sup> Yeni sowecyoac dekecdae, naric, nga ge sifu kenecyoac debesena. Ngicngac neac wegenac hama memanganenubeso angandae, yeni ge negemmana

game kpekpeu faiyunubesonga. Geac kingang ngicngo ubangerec negemma kecheso. <sup>29</sup> Ngicngac mesunau nuandae, yeni eweheiheia kpac kechisia. Imocngo wamba isoc sangoyunubeso. Yeni gameyunuu kecdae, imocngo ngakpitoa isoc witinginau embeso.

<sup>30</sup> Enacbibicnango KEBU oyang boyang ammima ngicngac habutoangi-nagoc kecdae, yeneac botucfu namma ye oyang boyang memibade. <sup>31</sup> Ngic mong ye wiac sasawaac obohoma kefu yeng marifoiau nanude. Yeneng yeac degecde, “Ye manganaac areng amma homebeso.” Ifi degec Anutungo ye yeneac mariunac mesiude.

## 110

### *Ngictau uau faigec*

Dawidingo mitiyegec yofi heiec.

<sup>1</sup> KEBUNGO neac Kebuna yofi edeec, “Ge marifoiau tacmana ngabafocga hanigaac bageau faiyunuba yeni hanigaac tatac anggecde.”

<sup>2</sup> KEBUNGO Siong amau tacma ngictauyasuga faiu hau ge imoc mema ngabafocga yeneac botucfu ngictau amma ngic kunengngina kecbesena.

<sup>3</sup> Ngicfocga yeni dzikac nasou gegoc kenggecdeac songo negemma hama edegugec geng hesicyununa tiki kpetiacfu enggecde. Sacgbori habungi-nagoc yeni ubaefac amma wamba kpetiac heima asoacac dzimbong heima feande, ifi isoc amma gearu hagecde.

<sup>4</sup> KEBUNGO yoac yofi bic deseriec, imoc naric mi meickeude, “Geng Merikisedeac siricfu womonggareng wisic wisickea kpac kecengkecnade.”

<sup>5</sup> Kebu foigaugeng nande, ye herebunasoya hau ngictau kpedzameyunuude. <sup>6</sup> Ye bangeha bangeha ngicngac areng botucnginau tacma isingyunuma yoacngina desiu homegec farengnginango bangecnginau femeuude. Ye bangeha bangeha fekendeu ngic enarafocngina kpetotieyunuude.

<sup>7</sup> Ye sing tegiau doku mahama feu hemma neudeac oruha miacma kuhagoc nanude.

## 111

### *Anutuac ua feengkefude*

<sup>1</sup> KEBU erienzong memibesonga, hallelu Yac. Ngicngac uba kongaha amma ikoc nga hamangecngina kpac kecdae, yeneac kpebung habugoc namma heregoc yombong KEBU ubangerec ammbade.

<sup>2</sup> KEBUNGO uaya mekecde, imoc wiac engena nga imocac songo negengandae, yeneng imoc negengising angkecdae. <sup>3</sup> Kebungo wiac sasawa meec, imocngo ngictauac kuhagoc nga damuyagoc wakema fede. Ye fakaya dindingacngo nasoya nasoya feengkefude.

<sup>4</sup> Ye uaya bibiagoc meec, imoc yeng negemmanu negenggec fekefude. KEBUNGO neneac ubea manganau ubangerec anemmeude. <sup>5</sup> Ngicngac eweheihei ammiandae, ye yeni yaka yemmeude nga dzadzahac meec, imoc nasoya nasoya negensikefude. <sup>6</sup> Kebu ye ngicngacfora uayaac kuc edzacyunuma maridzoming dema bangec monnunac ngicngac yeneac bangec imoc ngicngacfora yemmeec.

<sup>7</sup> Yeng wiac mariango meande, imoc yoara modacma faka dindingacgoc. Nenang yeac dederecegyoac sasawa negenserima mekechisina. <sup>8</sup> Ye dederecegyoac faiu imocngo nasoya nasoya seria fema fefeseri feengkefude.

Imoc ikoc nga hamangeha kpac kecma modacma kecbesonga. <sup>9</sup> Yeng wiacfora sueyunuu yeneng ngicngacfora yungecyunugec. Ye dzadzaha feengkefudeac yoac seria edeyunuuc. Yeac kpac imoc kpetiac nga bibiagoc.

<sup>10</sup> KEBU eweheihei ammima ye hoanggebesonga. Faka imoc negen negen-tegecac hania ande. Ye eweheiheigoc hoanggeandae, yeni negen negengngina irec ireckea. Yeac erienzong, imoc nasoya nasoya feengkefude.

## 112

### *Kperagingo neraranggeude*

<sup>1</sup> KEBU erienzong memibesonga, hallelu Yac. Ngic mong ye KEBU eweheihei ammiande nga yeac nonoyoac songotoagoc hoanggeande, ye kenehagoc.

<sup>2</sup> Yeac esamedacfora yeni bangecfu kucnginagoc kecgcede. Ngicngac areng ikoc nga hamangecngina kpac andae, yeni kenecnginagoc. <sup>3</sup> Yeac amau hiedzo finactoa endzirangoc feude amma yeac faka dindingacngo nasoya nasoya feengkefude.

<sup>4</sup> Ngicngac uba kongaha amma ikoc nga hamangecngina kpac kecandae, yeni kundung manau kecmagec kperagi fingecyemmeude. Kebu ye ubangerec ayemmema ubamangang negengyemmema dindingac kefude. <sup>5</sup> Ngic mong ye sing dindingac modacma ngic wosoefac ayemmema yengena wiac turung dema maringinau faiu ua goa meandae, ngic ifia ye naric kecde.

<sup>6</sup> Ngic dindingac ye seria nanu wiac mongngo meu goroc goroc naric mi anude. Amma ngicngac yeneng yeac negenggec fekefude. <sup>7</sup> Ye yarefakaac yoacsiduc negemma kengec naric mi anude. Ye hereango KEBU negenserima kefude. <sup>8</sup> Yeac herea imoc seri seria. Ye kengeha kpac serima kecma firang amma ngabafora yenenude. <sup>9</sup> Ye songea modacma wiac mederema ngicngac makpekpea yemmeude. Yeac faka dindingac, imoc nasoya nasoya feengkefude nga ye kuhagoc anu ngic yeneng eweheihei ammima nangegecde.

<sup>10</sup> Ngic Anutu ngadehema mangana meudeac ammiande, yeng ngic mong dindingac henu kekeha ngereeude, imohai enac kisaranggeu dzameude. Ye wiac mong meudeac negensiande, imoc fora naric mi fingerude, kpac yombong.

## 113

### *Engentoango wosoefac anemmeude*

<sup>1</sup> KEBU erienzong memibesonga, hallelu Yac. O, KEBUAC kingang ngicfora, ngeni KEBU oyang boyang memima KEBUAC kpac kuneng heiwayong memibisia.

<sup>2</sup> KEBUAC kpac kuneng, imoc yaguc kenehema nasoya nasoya kenehekecbesonga. <sup>3</sup> Wenac ere ereaunac kengkecma wenac keme kemeau wisickede, imohai KEBUAC kpac kuneng heiwayong memibesonga.

<sup>4</sup> KEBUNGO bangeha bangeha ngicngac areng feracyunuma kecde. Yeac kuc kibikperagigoc, imoc kurumenga kurumenga feracyunuma emma feude. <sup>5</sup> KEBU Anutunina kecde, ye isoc mongngo mi kecde, kpac yombong. Ye wi tatahau tacma <sup>6</sup> kiwa fiu mau kurumenga kurumenga nga bangec yenenude. <sup>7</sup> Yeng ngic makpekpea sendunnunac memiacyunuude nga ngicngac iwaiac obohoma kecandae, yeni hamaseucfunac meyunuu eregecde.

<sup>8</sup> Eregec yeng ngictauac medacfoengina yenigoc tatacfu faiyunuu tacgecde. Ye ngicngacfora yeneac ngictauac medacfoengina, yenigoc faiyunuude.

<sup>9</sup> Ye ngac kufing amagerec miu ye sabac nonggea amma sogaima kefude. KEBU erienzong memibesonga.

## 114

### *Anutuac kicfu dzonoma fedebeso*

<sup>1</sup> Israengo Aigita bangec wama erema kenec. O, Yakoboac areng yeni ngicngac kuricyoac dekegec, yeni wayunuma kenggec. <sup>2</sup> Yuda ye Anutuac womong kpetiac anec nga Israe imoc yeac eucererenga anec.

<sup>3</sup> Kondung ye imoc hemma kpidohoma kenu Yodang doku dzigeneec.

<sup>4</sup> Tiki yeneng rama ngiwango futuckeandae, ifi isoc futuckegec nga fagang yeneng ramamedaha yuma engemmama angandae, ifi isoc sogac sogaihoc yuma engemmama anggec.

<sup>5</sup> Kondung ge kpidohoma woranec nga Yodang ge kpidohoma dzigenenec.

<sup>6</sup> O tiki, ngeni kpidohoma rama ngiwa isoc futuckedae nga fagang ngeni kpidohoma ramamedaha isoc yuma engemmama andae.

<sup>7</sup> O bangec, ge KEBUAC kicfu dendeng kpekecbesena. Ge Yakoboac Anutu yeac kicfu gbigbihebesena. <sup>8</sup> Yennoc hoc peperandzi seria heimerenu doku dzohong angkecde nga harongang heimerenu doku kiwa anude.

## 115

### *Ge Kebu negensingena*

<sup>1</sup> O KEBU, ge neneac kpac mi miacbesena, kpac. Geng yoac dedzege amma imoc modackecneac nga ge yoac modac modac Kebu, imocac geac kpac kuneng imoc eweheiheigoc kpacbesonga. <sup>2</sup> Bangec monnunac ngicngac Anutu mi negemmidae, yeneng deandae, "Yeni Anutungina mong mi hendimbe, kpac." Yeni nocac ifi deandae? <sup>3</sup> Anutuninango kurumenga kurumenga, imohai kecma songoya modacma uaya mekecde.

<sup>4</sup> Ngicngac Anutuac yoac ifi deandae, yeneac nemuonngina siriwa nga golngo memea, yeni bangecngic yeneac marikibisac. <sup>5</sup> Yeni enacbibicnginagoc nga yoac ine naric mi degecde. Yeni kicngina noboc noboc amma wiac naric mi henggecde. <sup>6</sup> Yeni kedzacngina noboc noboc amma wiac mong naric mi negenggecde. Yeni samacnginagoc amma wiac monggac homuna naric mi homunggecde. <sup>7</sup> Yeni maringinagoc nga maringinango wiac mong naric mi menenggecde. Yeni haninginagoc nga haninginango sing naric mi kenggecde amma ubanginango udumeng mong naric mi meficgecde.

<sup>8</sup> Ngicngac nemuonngina meyunuandae, yeni nemuonngina isoc angggeg. Nga nemuonngina negenserima kecandae, yeni sasawango nemuonngina isocngoc anggecde.

<sup>9</sup> O Israe ngicngac, ngeni KEBU negenserima kecbisia, yennoc memeficngina nga kasongina. <sup>10</sup> O Aronggac ama areng, ngeni KEBU negenserima kecbisia, yennoc ngeneac memefic nga kasongina. <sup>11</sup> Ngicngac KEBU eweheiheigoc hoanggeandae, ngeni KEBU negenserima kecbisia, yennoc ngeneac memefic nga kasongina.

<sup>12</sup> KEBUNGO neneac negenside. Yeng kenecnunuude, ye Israeac ama areng kenecyunuma Aronggac ama areng kenecyunuma <sup>13</sup> ngicngac KEBU eweheiheigoc hoanggeandae amma ngicngac kuneng nga kapia

kenecyunuude. <sup>14</sup> KEBUNGO ngeni nga nambaracfocngina mesahen-gunubeso. <sup>15</sup> KEBU kurumeng nga bangec meficyuruec, yeng kenecn-gunubeso.

<sup>16</sup> Kurumenga kurumenga yeni KEBU yengena ama nga bangec imoc ngicac medacfocongina kecdimbeac nemmeu ihai kecdimbe. <sup>17</sup> Homemea yeni KEBU eriendzong naric mi memigece, kpac. Ngicngac ningkpe fedae, yeneng ye naric mi dengeregece, fora. <sup>18</sup> Nga KEBU dengerenide. Neni ye yofinenggac kenehema\* kecma nasoya nasoya kenehenide.

KEBU eriendzong memibesonga, hallelu Yac.

## 116

### *Kebu ye memeficnina*

<sup>1</sup> Ni KEBUARU kpesi kpesi faiba yeng ubaudumenna negenecac ye songogoc hoanggebade. <sup>2</sup> Ye kedzaha nearu faiecac amma ni kecbadesoc kpakpacna yearu kpacba kengkefude.

<sup>3</sup> Homecac witicngo dedecnuu homec amaac kengec amma ubaebicngo mendannuu ni ubaebic nga kengecgoc kecma <sup>4</sup> KEBUAC kpac kuneng kpacma yofi deai, "O KEBU, ge kekecna ebicfunac mesina."

<sup>5</sup> KEBU ye wosoefac nga faka dindingacac KEBU. Anutuninango ubamang-gang anemmeude. <sup>6</sup> Ngicngac negen negengtoangina kpac kecgec KEBUNGO yeni ongongyunuude. Ni memeficac obohobare yeng ebicfunac mesinuec.

<sup>7</sup> O ubaongana, KEBUNGO ubangerec homac anggeni naric kecnecac amma ge ruaegoc monggoc kecbesena. <sup>8</sup> Ge ubaongana homecfunac mesima kickumana mekerenggena tifainggema manubacac hanina ong-gengenen. <sup>9</sup> KEBU, ni geac kicfu kekecnginagoc yeneac bangecfu kengkecbadeac ifi annec.

<sup>10</sup> Ni yofi deai, "Ni kpendzeng kuneng kpema kecduae." Ni negen negensingoc kefaiac ebicnasou ifingoc negensingumangoc kefai. <sup>11</sup> Nga ubaebicngoc kecma deai, "Ngic sasawa yeni ikocnginagoc." <sup>12</sup> KEBUNGO ni gombunga anemma wiac sasawa nenu ni naric kecma imocac turunga noc wiac ammiba ngereeudeac obohoude. <sup>13</sup> Ni memengerecac kpakenec mema miaama KEBUAC kpac kuneng kpacbade. <sup>14</sup> Ni yoac KEBUAC kicfu deseriai, imoc ngicngacfora sasawa yeneac kicfu namma fora meficgebade.

<sup>15</sup> KEBUAC ngicngac kpetiac homedae, imocngo yeac kicfu wiac buma kuneng ande. <sup>16</sup> O KEBU, ni geac kingang ngicga amma uangacgaac medac. Gennoc witicfunac mesinunec. <sup>17</sup> Ni ubangerecac sese faigemma KEBUAC kpac kuneng kpacbade. <sup>18</sup> Ni yoac KEBUAC kicfu deseriai, imoc ngicngacfora sasawa yeneac kicfu namma fora meficgebade. <sup>19</sup> Imoc Yerusareng, geac botuhau KEBUAC ama tacde, imocac amabangecfu ambade.

KEBU eriendzong memini, hallelu Yac.

## 117

### *Ngeni Kebu dengerebisia*

<sup>1</sup> Bangec monnunac ngicngac, ngeni KEBU fendzonggema dengerebisia. Ngiha ngiha sasawa ngeni KEBU afehebisia. <sup>2</sup> Yeng yoac dedzege amma imoc

\* **115:18:** Anutungo meficnunuun nenang bangecngicngacnec yumia kecma Anutuac kenecyoac debisina, yoac imoc mitikibi homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

modackecde, faka imocngo hoannunuude, imoc wiac engena. KEBUNGO yoara modackecde, faka imocngo nasoya nasoya feengkefude.

KEBU erienzong memini, hallelu Yac.

## 118

### *Kebu ge meficnununa*

<sup>1</sup>O, KEBU ye gombunga, yeng yoac dedzege amma imoc modackecde, faka imoc nasoya nasoya feengkefude, imocac ubangerec memibesonga. <sup>2</sup>Israe habu ngeneng yofi debisia, “Yeng yoac dedzege amma imoc modackecde, faka imoc nasoya nasoya feengkefude.” <sup>3</sup>Aronggac ama areng ngeneng yofi debisia, “Yeng yoac dedzege amma imoc modackecde, faka imoc nasoya nasoya feengkefude.” <sup>4</sup>Ngicngac KEBU eweheiheigoc hoanggeandae, ngeneng yofi debisia, “Yeng yoac dedzege amma imoc modackecde, faka imoc nasoya nasoya feengkefude.”

<sup>5</sup>Ni ebic kuneng mema KEBU kpacba KEBUNGO kpakpacnaac turunga meremma ebicfunac yungecnuac. <sup>6</sup>KEBU ye nigoc kefu ni naric mi kengecnuude. Ngic yeneng wiac mong naric mi anenggecde. <sup>7</sup>KEBU ye memeficna amma nigoc wegenac kecdeac ni firang amma ngic ubango ukunudae yenemma nambade.

<sup>8</sup>Nenang KEBUAC hoannu kemma sufuma kecni ngereede. Ngic negensingyununi memefihagoc yombong mi ande. <sup>9</sup>KEBUAC hoannu kemma sufuma kecni ngereede. Ngictau medacfocngina negensingyununi memefihagoc mi ande.

<sup>10</sup>Bangec monnunac ngicngac Kebu mi negendae, yeni sasawango oronudagec ni KEBUAC kpacfu firang amma kporacyunuba kpac anggec. <sup>11</sup>Yeni noboc noboc oronnuma keagec, fora. Nga ni sifu KEBUAC kpacfu firang amma kporacyunuba kpac anggec. <sup>12</sup>Yeni sangobide isoc noboc noboc oronnugec kate dzema borang tima bic bokoande, ifi isoc anggec. Ni KEBUAC kpacfu firang amma kporacyunuba kpac anggec. <sup>13</sup>Yeneng kucgoc kpefacnugec manubesonga anec, fora. Nga KEBUNGO ine meficnuac.

<sup>14</sup>KEBU ye neac kuc nga yegecna. Yennoc neac memengerecna.

<sup>15</sup>Ngicngac ditingac yeneng firang amma kporuchedzonginau sogac sogaiac yegec heigec yegecngina negembisia. “KEBUAC marifoingo faka bibiagoc amma firang andac. <sup>16</sup>KEBUNGO marifoia miaru sawau yacde. KEBUAC marifoingo faka bibiagoc amma firang andac.”

<sup>17</sup>Ni naric mi homebade. Ni ine gbori kecma KEBUNGO uaya mekefec, imoc dekperagibade. <sup>18</sup>KEBUNGO kopocsicnaac amma kpemeting ebiranogoc anec, fora. Nga homecac mariu mong mi fainuac. <sup>19</sup>Ngeni ditingac kekec womongamaac nagutoa witinenggec ni imohai emma KEBU ubangerec memibade.

<sup>20</sup>KEBUAC nagu yomoc nga ngicngac ditingac yeneng imohai enggecde. <sup>21</sup>Ge yoacna turunga merennenna memengerecna amma meficnunc. Imocac geac ubangerec megembade. <sup>22</sup>Amameme ngic yeneng hoc mong mangana dema ukugec. Nga hoc imocngo amaac hoc wotung amma seria nanude. <sup>23</sup>KEBUNGO faka me imocngo nenang kicfu wiac bibiagoc ande. <sup>24</sup>KEBUNGO uamemenaso yomocnoc meu nenang naso yofinenggac sogaima ubangerec negenni. <sup>25</sup>O KEBU, neni kpacsambic amma yofi dedimbe, “Ge ebicfunac mesinununa. O KEBU, neni naric kecnideac gombunga anemmena.”

<sup>26</sup> Ngic KEBUAC kpacfu erahade, ye kenehagoc. Neni KEBUAC amau namma kenecngunukecdimbe.

<sup>27</sup> KEBU ye Anutu. Yeng kperagi nemmeu imocngo mekperaginunuec amma mekperaginunuude. Ngeni ic maria sabayagoc maringinau mema arennu hakecma hombanggac sese mehagec, imoc witicngo arata baihau dedeckebisia.

<sup>28</sup> Ge Anutuna. Ni erienzong megembade. Ge Anutuna, imocac afegubade. <sup>29</sup> KEBU ye gombunga, yeng yocac dedzege amma imoc modackecde, faka imoc nasoya nasoya feengkefude, imocac ubangerec memibesonga.

## 119

### *Kebuc dedeseriyoac*

<sup>1</sup> Ngicngac yeni kopocsic mong mi meficgema kecma KEBUAC dedeseri modacandae, yeni kenecnginagoc. <sup>2</sup> KEBUNGO yocac ngicngac dekperagiyemmu yeneng imoc modacma heregoc ye hofocandae, yeni kenecnginagoc amma <sup>3</sup> kopocsic mong mi meficgema yeac hanising modacma kengkecegecde. <sup>4</sup> KEBU, geng dederecegyoacga nemmena imoc serima modacnideac negennec.

<sup>5</sup> Ni geac singyoac seria tofohoma sing imoc hafaogoc yombong modacma kecbadeac yombong anende. <sup>6</sup> Ni geac nonoyoac sasawa hengkecba ngic yeneng game kpekpeu naric mi fainugecde.

<sup>7</sup> Ni geac dederecegyoac dindingac negen negennau arenggeba herenau ikoc nga hamangec mong mi feu ge dengeregubade. <sup>8</sup> O, ni geac singyoac modacbade. Kebu ge ni mi ngadenuma wanudacna.

### *Kebuc dedeseriyoac tofobesonga*

<sup>9</sup> Sebigbori medac ye singau garengemema uba kongaha kefude, sing imoc eng mi meficgeude, kpac. Ye geac yocac gombunga modacma garengemeude, imohai naric kefude,

<sup>10</sup> Ni heregoc hofoguduae. Geac nonoyoac kpebaiaac garenuma kpaee heinenna. <sup>11</sup> Ni yoacga kpema kopocsic meficgebaiaac yoacga herena manau faiba feude.

<sup>12</sup> O KEBU, kenecgubisina.\* Ge singyoacga kpounenna ni imoc negen negennau arenggema mekecbade. <sup>13</sup> Enacgaac dederecegyoac sasawa, imoc enacbibicnango dekperagibade. <sup>14</sup> Ngicngac yeneng dzofinacnginaac sogaiandae, ni ifi isoc geac dedekperagiyocac negemma sing imoc modacma sogabade. <sup>15</sup> Ni geac dederecegyoac hennegeng amma imoc negensikecma kicna fima geac sing hengkecbade.

<sup>16</sup> Ni singyoacgaac ubangerec negemma geac yocac naric mi nigecnuude, kpac.

### *Dedeseriyoacngo ubangerec meficgenende*

<sup>17</sup> Ni, kingang ngicngango gbori kecma yoacga tofobobadeac gombunga anenna. <sup>18</sup> Wiac gombunga gombunga dedeseriyoacgau fede, imoc hembadeac kicna merecgena.

\* **119:12:** Anutungo meficnunuun nenang bangecngicngacnec yumia kecma Anutuac keneyoac debisina, yoac imoc mitikibiuhomac fede nga yeng faka imocac negenu ngereeuide. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)



<sup>19</sup> Ni bangecfu kuric kecduae. Ge nonoyoacga nearunac mi mesufuna. <sup>20</sup> Ubaonganango nasosoc geac dederecgeyoac negembeso ammiu kuha kpac ambeso ande.

<sup>21</sup> Anutu ge ubakpekpe ngic yoac ngabasiric ayemmeanec, yeni geac nonoyoac wama ngadehema kecgec ge sowecyununec.

<sup>22</sup> Ni geac dedekperagiyoac modackecduaeac amma yeni desofoc nga desusuc anendae. Ge faka imoc meickenenna kpac ambeso. <sup>23</sup> Ngictau yeneac medacfocongina yeneng tacma ni memanganenugecdeac yoac denegeng angandae, fora. Nga ni, geac kingang ngicngo sifu geac singyoac hennegeng amma imoc negensikecbade. <sup>24</sup> Geac dedekperagiyoacngo ni ubangerec meficgenemma dederecge gombunga anenude.

### *Dedseriyoac tofohobade*

<sup>25</sup> Ubaonganango sendunggoc kpeketahema homebeso ande. Ge yoacga dema deserinec, imoc modacma kekecna monggoc megborina. <sup>26</sup> Ni hani-ana edeguba geng imocac turunga merennemma singyoacga kpounenna.

<sup>27</sup> Geng meefainuna dederecgeyoacgaac sing negentegecma uaga bibiagoc hennegeng amma negensikecbade. <sup>28</sup> Ubaebicngo ubaongana meebiriu sisingaima kpac ambeso ande. Ge yoacga denec, imoc modacma monggoc meserinuna. <sup>29</sup> Ge ikocfakaunac ongonnuma ubangerec anemma dedeseriyoacga kpounenna.

<sup>30</sup> Ni yoac modac modac ngic ambeso negenduaeac sing imoc meis-inggema kengkecduae. Ni dederecgeyoacga kicnau faiba fede. <sup>31</sup> O KEBU, ge dedekperagiyoacga nennec imoc seria mekecduaeac goa yeneng desofoc anembauac kpaec heiyemmesena. <sup>32</sup> Ge negen negentegecna meyadikecna geac nonoyoacgaac sinnu nedzikecbade.

### *Negen negentegec nembesena*

<sup>33</sup> O KEBU, ge singyoacga fainec, imocac sing kpounenna. Ni imoc negen negennau arengema modacma kengkecba kekecna wisickebeso. <sup>34</sup> Ni dedeseriyoacga modacma heregoc imoc tofohobadeac negen negentegec nenna. <sup>35</sup> Nonoyoacgaac ubangerec negenduaeac sing imohai hesicnuna. <sup>36</sup> Ge herenaunac bangecac songo meickema geac dedekperagiyoacngo seria febeso. <sup>37</sup> Wiac hania hania uaya kpac fede, ni kicna imohai fibaiac kicna garengena kekecna geac sinnu kengkebeso.

<sup>38</sup> Ngicngac goi heigengandae, yeni wiac yemmesongna deserima denec, imoc kingang ngicnga nearu meserima edzacnuna. <sup>39</sup> Geac dederecgeyoac sasawa imoc gombunga. Game kpekpeu fainugec kengecgec kecbaiac ebic imoc meickenenna.

<sup>40</sup> Ge fakaga ditingac imocac amma kekecna megborima kekec monggoc nenna. Negenna, ni geac dederecgeyoac negembadeac anende.

### *Kebuac dedeseri negensima ruaegoc kecbade*

<sup>41</sup> O KEBU, geng yoac dedzege amma imoc modackecnec, geac faka imocngo nearu habeso. Ge ebicfunac mesinunadeac deserima denec, faka imocngo ifingoc nearu habeso. <sup>42</sup> Ifi anu ngic goa deendema anengandae, yeni turunga naric merengyemmede. Ni geac yoac negenserima kecbade.

<sup>43</sup> Ni yoac forau kecma yoac fora dekecduae, imoc kpac ambacac ge imoc enacnaunac mi meickebesena. Ni geac dederecgeyoac negensikecba fora fingerudeac tomai kecduae. <sup>44</sup> Ni geac dedeseriyoac nasoya nasoya modackecbade. <sup>45</sup> Ni geac dederecgeyoac meficgebadeac ua mekefaiac witiha kpac kengha ambade.

<sup>46</sup> Ni ngictau yeneac kicfu ifingoc geac dedekperagiyoac ayemmeba game kpekpeu naric mi fainugecde. <sup>47</sup> Ni geac dedeseriyoacac songo negemma yoac imoc ubangerecgcoc debade. <sup>48</sup> Ni nonoyoacgaac songo negemma marina miacma fendzonggema singyoacga hennegeng amma negensikecbade.

### *Dedeseri hoanggema ruaegoc kecbade*

<sup>49</sup> Ge ni, kingang ngicga yoac edenunec, imoc negenna febeso. Ge imoc denenna negensikecba fora fingerudeac tomai kecduae. <sup>50</sup> Geac dedeserigango kekek meficgenenu kpendzeng kpekecbare wiac imocngo meserinuude.

<sup>51</sup> Ngic Anutu ngadehema kecdae, yeneng deendema anengandae, fora. Nga ni sifu geac dedeseriyoac mong mi ngadehema wabade. <sup>52</sup> O KEBU, ge dederecgeyoacga warac yombong denec, imoc negensikecba imocngo meserinuude.

<sup>53</sup> Ngic Anutu ngadehema mangana megecdeac ayemmeande, yeneng geac dederecgeyoac ngadehema wagec, imocac amma herebu negemba herena gerec dzeude.

<sup>54</sup> Ni yei kuricngic amma amanginau kecbare singyoacgango ubangerecyegecna anu heibade. <sup>55</sup> O KEBU, ni tofocnac geac kpac kuneng negemba feu geac dedeseriyoac modackecduae. <sup>56</sup> Ni dederecgeyoacga modackecba imoc fingcnenu neac kenec ande.

### *Uba hafoangoc*

<sup>57</sup> O KEBU, ge neac areng nga yeneng bangec isoc mederema noboha nenggec, imoc ge. Ni yoacga modacbadeac geac kicfu deserima deduae. <sup>58</sup> Ge neac negenna ngereuede, imoc meficgebadeac herenango hafoa uatoa meai. Ge yoac deserima denennec, imoc modacma wosoefac anenna.

<sup>59</sup> Ge faka modackecnec, imoc negensima geac dedekperagiyoacga modacbadeac nananna mengereba geac yoacgau kenude. <sup>60</sup> Ni naso mi ukuma geac nonoyoac bic yombong modacma uaya mebade.

<sup>61</sup> Ngic Anutu ngadehema mangana megecdeac ayemmeande, yeneac witcngo dedecnuande, fora. Nga ni geac dedeseriyoac sifu mong mi nigecnuude. <sup>62</sup> Ni tofocnac dzongiau yacma dedeseriga dindingac negemma imocac dengeregukecbade.

<sup>63</sup> Ngicngac geac ewehelhei angandae nga dederecgeyoacga modacandae, yeneac ogongina. <sup>64</sup> O KEBU, geng yoac dedzege amma imoc modacnade, fakaga imocngo bangec sokoma fede. Ge singyoacga kpounenna.

### *Dedeseri imoc wiac engena*

<sup>65</sup> O KEBU, ge yoacga modacma ni, kingang ngicga, gombunga anengkecnec. <sup>66</sup> Ni geac nonoyoac negensinggeduaeac negen negentegec nga negengising faka gombunga kpounenna. <sup>67</sup> Ni kpendzenga kpac kefai, imohai sing segema kengkefai. Nga yofinenggac geac yoac modacbade.

<sup>68</sup> KEBU, ge gombunga amma faka gombunga angannec. Ge singyoacga kpounenna.

<sup>69</sup> Ngic Anutu ngadehema kecdae, yeneng ikoc amma ngadeyoac dema enacfu faifai anengkecdae, fora. Nga ni sifu geac dederecgeyoac heregcoc modackecbade. <sup>70</sup> Ngic Anutu wagec, yeni ubaseri amma tosofocngina yeneac ubamangang negenggecdeacsoc mi ande, fora. Nga ni sifu geac dedeseriyoacac ubangerec negengkecbade.

<sup>71</sup> Ge ebic meficgenennec, imoc negemba ngereede. Ge ifi anna geac singyoac haniaac negen negeng mema arenggekecbade. <sup>72</sup> Geac enacgaac

dedeseriyoac, imocngo wiac engena ande. Imocngo ngereenende nga imoc hoc gol nga siriwango memea taoseng nga taoseng feracyunuude.

### *Dedeseri imoc dindinga*

<sup>73</sup> Geng meficnuma marigango menuma memengere anennec. Ni nonoyoacgaac negen negeng arenggema mekecbadeac anende. Ge imocac negen negentegec nenna. <sup>74</sup> Ni geac yoac negensiba fora fingerudeac tomai kafaiac amma ngicngac goa ewehihehi anggengandae, yeneng nemma so-gaigecde.

<sup>75</sup> O KEBU, geac singyoac imoc dindingac nga gennoc yoac modac modac Kebu, imocac ebic meficgenennec, imoc negenduae. <sup>76</sup> Ge ni, kingang ngicga, yoac deserinennec. Ge yoac imoc modacma faka anenna. Geng yoac dedzege amma imoc modackecnec, ge efaima fakaga imocngo ni, kingang ngicga, meserinuna. <sup>77</sup> Ni dedeseriyoacgaac ubangerec negenduaeac uba-mangang anenna gbori kecbade.

<sup>78</sup> Ngic Anutu ngadehema kecdae, yeneng hania kpacfu mangana anenggecac ge negemmana game kpekpeu faiyunubesonga. Ni geac dederecgeyoac hennegeng amma imoc negensikecbade. <sup>79</sup> Ge ewehiheigoac hoangguma kecandae, yeneng naric nearu hama geac dedekperagiyoac negembisia. <sup>80</sup> Ngicngac goa yeneng gameu fainubauac herenango geac singyoacfu seria kpeketaheu kopocsic mong mi meficgebesare.

### *Naso dafiguc tomai kecbesare?*

<sup>81</sup> Ubaonganango geac memengerecac ammikefu yoacga negensiba fora fingerudeac tomai kecduae. <sup>82</sup> Kicnango dedeseriga fora fingeru hembadeac fikecha kuha kpac anu yofi deanduae, "Ge hama meserinunade, naso imocac tomai kecduae."

<sup>83</sup> Ni waing sebera hosucfu fekecma harandanggeande, ifi isoc anai, fora. Amma dedeseriyoacga sifu mi nigecnuec, kpac. <sup>84</sup> Ni, kingang ngicgango naso dafiguc ebicfu kecma tomai kecbesare? Ngic nukporac anengandae, yeni turunga yemmenade, naso imocac tomai kecduae.

<sup>85</sup> Ngic Anutu ngadehema kecdae, yeneng menugecdeac teng keme kemea usugec. Ngic imoc yeni geac dedeseriyoac kpema kecdae.

<sup>86</sup> Ge nonoyoac sasawa dekecne, imoc yoac fora. Ngic yeneng ine ikoc amma nukporac anengkecdaeac meficnuna. <sup>87</sup> Yeni bangecfu kekecna kpetotiebeso anggec, fora. Nga ni sifu dederecgeyoacga mekecma imoc ngadehema mi wayai.

<sup>88</sup> Geng yoac dedzege amma imoc modackecnec. Ni enacgaac dedekperagiyoac modacbadeac fakaga imocngo kekecna ongonggena.

### *Dedeseriyoac negensingbesonga*

<sup>89</sup> O KEBU, geac yoac imoc kekecseri. Imoc nasoya nasoya kurumenga kurumenga, imohai fefeseri fekefude. <sup>90</sup> Ge yoacga modackecnec, imocngo fingecsahenina fekefudesoc, yenearu feengkefude. Geng bangec tatahau faina seria tarudengoc. <sup>91</sup> Geng yoac dema wiac sasawa faiyemmenec. Imocac amma imoc yofinenggac fedengoc. Wiac sasawa fedacde, yeni geac enac tofohogecde.

<sup>92</sup> Geac dedeseriyoacngo ubangerec mi meficgenembacfu kpendzen-nango mebucnuu kpac ambai. <sup>93</sup> Ge dederecgeyoacga faima kekec nennecac amma dederecgeyoacga naric mi nigecnuude. <sup>94</sup> Ni geac ngic nga dederecgeyoacga meficgebadeac ua mekefaiac ebicfunac mesinuna.

<sup>95</sup> Ngic Anutu ngadehema mangana megecdeac ayemmeande, yeneng me-manganenuma meicnugecdeac tomai feandae, fora. Nga ni sifu dedekper-agiyoacga negensima kecbade.

<sup>96</sup> Wiac gombunga nga sirihau, imoc sasawa hembra wisic wisickea feu maya kpesereai. Nga geac dederecgeyoac imoc maya kpac feecngoc fede.

### *Dedeseriac songo negembesonga*

<sup>97</sup> O, ni geac dedeseriyoacac songo homac yombong negemma asoacnac kemma marai imoc hennegeng amma negensima kecanduae. <sup>98</sup> Geac dedeseriyoac, imoc nasoya nasoya nearu fekecdeac imocngo ngabafocna feracyunuma negen negentegec homac meficgenenude. <sup>99</sup> Ni dedekper-agiyoacga hennegeng amma negensikecduaeac negen negentegecog amma kpoukpoufocna feracyunubade. <sup>100</sup> Ni geac dederecgeyoac modackecduaeac ngicngac kifangina homac kecgec feracyunuma monggoc negen-tegebade.

<sup>101</sup> Ni yoacga modacbadeac amma haninango yarengic yeneac sing mangana hania hania tibaiac hanina kpaie heimima garenggekecbade. <sup>102</sup> Geng dederecgeyoacga kpounennecac amma imoc naric mi ngadehema wabade.

<sup>103</sup> Ni yoacga negemba songea yombong ande, enacnau imoc kukundzauac songea ferahade.

<sup>104</sup> Geac dederecgeyoacngo negen negentegec nenudeac sing ikoha sawa imocac modzona tiude.

### *Dedeseringo mekperaginunuude*

<sup>105</sup> Geac yoac, imocngo haninaac kifa amma sinna mekperagiude.

<sup>106</sup> Ni dedeseriyoacga dindingac modacbadeac yoac deserima imoc mese-riai.

<sup>107</sup> O KEBU, ni ebicnagoc yombong kecduae. Ge yoacga modacma kecec nenna. <sup>108</sup> O KEBU, ni efaima enacnango dedengerec sese megenduae, imocac negenna ngereebesoo. Ge dederecgeyoacga kpounendacna negen negeng imoc arenggema mekecbade.

<sup>109</sup> Ni kececna marinau mekecduae, fora. Nga dederecgeyoacga sifu mong mi nigecnuude. <sup>110</sup> Ngic Anutu ngadehema mangana megecdeac ayemmeande, yeneng botac faima menubesonga angandae, fora. Nga ni dederecgeyoacga modackecma sing mi segebade, kpac.

<sup>111</sup> Geac dedekperagiyoac, imoc nasoya nasoya maridzominna fefeseri fenenude. O, herenango imoc negemma sogaima kecbade. <sup>112</sup> Herenango geac singyoac nasoya nasoya angammemenango modacbadeac isinggeai, ni ifi kecba naso wisickeude.

### *Dedeseri modacma ruaegoc kecni*

<sup>113</sup> Ngic monde monde kecdae, yeneac modzona tiu geac dedeseriyoacac songo negengkecduae. <sup>114</sup> Ge sufuuamana nga kasona nga ni geac yoac negensiba fora fingerudeac tomai kecbade.

<sup>115</sup> Ni Anutunaac nonoyoac modacbadeac negenduae. Yarengic ngeni imocac wanuma kembisia.

<sup>116</sup> Ge yoac deserima denec, imoc modacma garennuna gbori kecbade. Ni negen negensina foragoc mi ambacac ngic yeni geng negemmana game kpekpeu mi fainubisia. <sup>117</sup> Ge marinau menuma nanggenuma onggonnuna. Ni geac singyoac negensima kecbade.

<sup>118</sup> Ngicngac sing segema singyoacga kpeandae, yeni ikocnginagoc kegec uatoanginango fora mong mi meficgeude. Ge imocac ngadeyunudacnec. <sup>119</sup> Geng ngic Anutu ngadehema mangana megecdeac ayemmeande, yenenna seuc isoc angkecde, imocac amma ni dedekperagiyoacgaac songo nenengkecduae.

<sup>120</sup> Ni geac kengec amba sebinango gbigbihekecde nga geng yoacna isinggema desinade, imoc negemma negengfagungoc kecduae.

### *Dedeseriyoac tofobesonga*

<sup>121</sup> Ni singyoac mi kpema faka dindingac angkefai. Ngic yeneng ebicfu fainubeso ambauac ongonnuma yeneac mariu mi fainuna. <sup>122</sup> Ni, kingang ngicgango naric kecbadeac nenggareng anenna. Nga ngic Anutu wama kecandae, yeneng ebicfu fainubauac geng ongonnuma.

<sup>123</sup> Ge faka dindingac modacma deserima ebicfunac mesinunadeac denec, imocac fora fingerudeac kicfifi kecba kicna kuha kpac ande.

<sup>124</sup> Geng yoac dedzege amma imoc modackecnec. Ge ni, kingang ngicga gombunga anemma singyoacga kpounenna. <sup>125</sup> Ni geac kingang ngic amma dedekperagiyoacga arenggema negembadeac negen negentegec nenna.

<sup>126</sup> Ngicngac yeneng dedeseriyoacga kpegecac KEBU, ge efaina, uaga menadeac naso bic hade.

<sup>127</sup> Ni imocac geac nonoyoacac songo negenduae. Nga imocngo golac songo ferahaude, imoc goltegegeng pircac pircac, imocac songo ferahaude.

<sup>128</sup> Ni imocac geac dederecgeyoac sasawa modacma imocac sing tikecma sing ikoha hania hania tibeso modzona tiude.

### *Dedeseri modacbadeac anende*

<sup>129</sup> Geac dedekperagiyoac imoc wiac engena, imocac ubaonganango imoc modackefude. <sup>130</sup> Ge yoacgaac nagu witina imocngo ngicngac mekperagiymmema ngicngac negen negengngina efea, yeni negen negentegec yemmeude.

<sup>131</sup> Ni nonoyoacgaac homac anenu enacna anggema asoringa anenu kecanduae. <sup>132</sup> Ngicngac geac kpac kunenggaac songo negengandae, ge neneac anggengandeac nearugeng dzigenema neac ubaga manganeu. <sup>133</sup> Faka manganango kekecna garenggeu ngicngac ogofocna memanganeyunubaiac singtitina meserina. Ge yoac deserima denec, imoc modacbesare. <sup>134</sup> Ge meficnuna dederecgeyoacga modackecbade. Ngic yeneng ebicfu fainugec ubaebicgoc kecbaiac hummenuma yeneac witicfunac yungecnuna. <sup>135</sup> Ge ni, kingang ngicga kicmesugango nerarannuma singyoacga kpounenna.

<sup>136</sup> Ngicngac yeneng geac dedeseriyoac mi modacandaeac kickumanango doku isoc made.

### *Dedeseriyoac monde mondea kpac*

<sup>137</sup> O KEBU, ge dindingac nga yoac isinggema foraya desiannecc, imoc dindingac sasawa. <sup>138</sup> Ge dedekperagiyoacgaac sing dindingac modacma yoacga imoc faima modackecma fainemmenec.

<sup>139</sup> Ngabafocna yeneng geac yoac nigecyunuandae herena gerec dzeu kpac ambo anduae.

<sup>140</sup> Geng yoac deserima denec, imoc ngicngac bic tobanggegec fora ande. Nga ni, kingang ngicgango imocac songo negenduae. <sup>141</sup> Ni ngictehec nga sure surea, fora. Nga geac dederecgeyoac imoc naric mi nigecnuude.

<sup>142</sup> Geac dindingac kekec imocngo nasoya nasoya fefeseri feude nga geac dedeseriyoac, imocngo fora. <sup>143</sup> Ebic nga kpendzeng nearu fingeacnde, fora. Nga geac nonoyoacngo ubangerec meficgenenude.

<sup>144</sup> Geac dedekperagiyoac sasawango nasoya nasoya dindingac feengkefude. Ge negen negentegec nenna gbori kecbesare.

### *Dedeseri negensikebade*

<sup>145</sup> O KEBU, ni heregoc kpacguduaeac negennenna. Ge ifi anna ni geac singyoac modacbade. <sup>146</sup> Ni gearu yofi kpacba, “Ni dedekperagiyoacga gombunga modacbadeac, ge ebicfunac mesinuna.”

<sup>147</sup> Negen negenna geac yoacfu faima tomai kecba ama mi wereckemmanu geng meficnuna deac yacma kpacgubade. <sup>148</sup> Ge yoac deserima denec, imoc tofocnac soc hennegeng amma negensikecbadeac naso herea gaugbori kecanduae.

<sup>149</sup> O KEBU, geng yoac dedzege amma imoc modacnade, imocac ubaudumenna negenna. Ge sing dindingac modacma ngic isinnunuma yoacnina desiannecac kekecna onggonggena.

<sup>150</sup> Ngic goa yeneng geac dedeseriyoacac hereau yombong kecma yarefaka megedeac ayemmeu imoc arenggema neac wegenac hama nukporac anenggecde. <sup>151</sup> O KEBU, geng sifu neac wegenac kecne ngoc. Geac nonoyoac imoc sasawa fora ande. <sup>152</sup> Ni geac dedekperagiyoac bicngoc negemma yofi negengkefai, “Geng yoac imoc fainec nga imoc nasoya nasoya feengkefude.”

### *O Kebu, meficnuna*

<sup>153</sup> Ni geac dedeseriyoac imoc mi nigecnuude. Ge imocac kpendzenna hemma imohacnac mesinuna. <sup>154</sup> Ge yoacfu meficnuna nanggenuma bummenna yungecna. Ge yoac deserima denec, imoc modacma kekec monggoc nenna.

<sup>155</sup> Ngic Anutu ngadehema mangana megedeac ayemmeande, yeni geac singyoac meficgegedeac ua mong mi mekecdae. Yeni imocac geac memengerecac hereau kecdae.

<sup>156</sup> O KEBU, geac ubamangang imoc wiac engena. Ge sing dingdingac modacma isinnunuma yoacnina desiannec, imocacsoc anenna kekecgoc ambade. <sup>157</sup> Ngic homacngo nukporac anemma ngaba anengandae, fora. Nga ni geac dedekperagiyoac sifu mong mi wabade. <sup>158</sup> Ngicngac goa yeni negen negensingina kpac kecandae, yeni geac dedeseriyoac mi modacandaeac ni yenemma modzona tide.

<sup>159</sup> Kebu, ni geac dederecgeyoacac songotoa negenduaeac geng imoc negensikecna. Geng yoac dedzege amma imoc modackecne, imocac kekecna onggonggena. <sup>160</sup> Yoacga sasawa imoc fora nga geac dederecgeyoac dindingac imoc sasawa tembus tembus nasoya nasoya feengkefude.

### *Efaima dedeseri hoangebisia*

<sup>161</sup> Ngictauac medacfora yeneng hania kpacfu nukporac anengandae, fora. Nga herenango sifu geac yoac bibiagoc, imoc hengkefude. <sup>162</sup> Ngic mongngo finac hania hania buma kuneng bummema sogaiande, ni ifi isoc geac yoacac sogaiade. <sup>163</sup> Ni ikocfakaac negemba wiac mangana yombong anu imocac modzona tide. Nga geac dedeseriyoac, imocac songo negemma kecduae.

<sup>164</sup> Ni geac dederecegyoac dindingacac amma uamemesoc naso seweng dengereguecbade. <sup>165</sup> Ngicngac yeneng geac dedeseriyoacac songo negengandae, yeni ruae kekec kuneng meficekecma wiac monnu tifotockema naric mi mayunuude.

<sup>166</sup> O KEBU, ni geac memengerecac negensikecba imoc fingerudeac tomai kecma nonoyoacgaac uaya mekecduae. <sup>167</sup> Ubaonganango geac dedekperagiyoac modacma imocac songo kuneng negengkecduae. <sup>168</sup> Wiac sasawa angkecduae, imoc negennecac dederecegyoacga nga dedekperagiyoacga modachade.

### *Kebu, ge meficnuna*

<sup>169</sup> O KEBU, kiacnango gearu hau ge negennenna. Yoacga modacma negen negentegecgoc ambadeac anenna. <sup>170</sup> Ni kpesi kpesi gearu haba geng negemma yoac deserima denec, imoc modacma ebicfunac mesinuna.

<sup>171</sup> Geng singyoacgaac negen negeng kpounengannecac enacbibicnango geac dedengerec yoac homac dekecbeso. <sup>172</sup> Geac nonoyoac imoc fora nga dindingac sasawa, imocac nedzarannango geac yoacac yegec gombunga heibeso. <sup>173</sup> Ni geac dederecegyoac segerema meaiac marigango meficnunadeac efaima kecbesena.

<sup>174</sup> O KEBU, geng ebicfunac mesinunadeac anende nga ni dedeseriyoacgaac songo negenduae. <sup>175</sup> Ge ongonnuna kekecnagoc ambadeac anenna dengereguma kecbade. Geac dederecegyoacngo meficnubeso. <sup>176</sup> Rama sufu sufuyango sing segema kengande, ni ifi isoc sing segema kenai. Ni, kingang ngicngango geac nonoyoac mi nigecnuudeac hama meficnuna.

## 120

### *Ruaengiac nunumu*

Hombannu kekengac yegec.

<sup>1</sup> Ni ebicgoc kecma KEBU kpacba yeng kiacna negemma turunga meren-nembeso.

<sup>2</sup> O KEBU, ngic goa enacbibicngina ikohagoc nga nedzarangnginaunac ngic ogofocngina tobangyunugecdeac yoac maande, ge yenearunac mesinuna.

<sup>3</sup> Nedzarang ge ngicngac tobangyununadeac yoacgoc kecnec, ge yoacna negenna. Ge noc wiac anggembesonga? Amma geac turunga noc wiac gembesonga? <sup>4</sup> Wasaingic yeneac tebemedaha nga icngina gerecyohohagoc, imoc genggecde.

<sup>5</sup> Ni nocac Meseke bangecfu kuric kecduae nga Kedare yeneac kporuced-zoac botucfu kecduae.

<sup>6</sup> Ngicngac ruaeac modzongina tiande, ngic ifia yenigoc naso hereangoc kafaiaac modzona tide. <sup>7</sup> Ni ruaengic nga ruaeyoac deba yeneng ine dzikacac ngic andae.

## 121

### *KEBU ye kasonina*

Hombannu kekengac yegec.

<sup>1</sup> Ni kicna tikiu fiba ende. Ni memefiac obohoduae, imocngo dahacnac haude, ifi kpesiduac. <sup>2</sup> KEBUNGO kurumeng nga bangec meficegec nga memeficna yearunac haude.

<sup>3</sup> Kebu genggareng anggengkecde, yeng gau mi feude, kpac. Ye haniga garenggeu seria nanu wiac mongngo meu goroc goroc naric mi anude.

<sup>4</sup> Negenggec, Kebu Israe habu onggongyunuande, ye gaunec mong mi fe-ande nga gau ebira mong mi feude. <sup>5</sup> KEBUNGO onggongguma marifoigau nanu ge yeac debannu kecna <sup>6</sup> wenacfu wenacngo mi guude nga tofocnac afongo mi memanganeguude.

<sup>7</sup> KEBUNGO onggongguu yarefaka hania hania fede, imocngo naric mi memaguude. Kebu ye kekecga onggonggeude. <sup>8</sup> Ge amaunac manade me amau ennade dena KEBUNGO yofinenggac nga nasoya nasoya onggong-gukefude.

## 122

### *Ge ruaegoc kecbesena*

Hombannu kekenggac yegec. Dawidingo yegec yofi heiec.

<sup>1</sup> “Nenang KEBUAC amau enni.” Yeneng ifi edenugec ubangerec negenai.

<sup>2</sup> O Yerusareng, neni hanininango geac naguusing ekemma odaga manau tinandimbe. <sup>3</sup> Yerusareng imoc taongtoa isoc megec nande. Imoc meserima mocgutoa megec ama nga ama wegenacfu ifi tackendae. <sup>4</sup> Nga ngicngac neni areninasoc modacma imohai engandimbe. Imoc Israe areng neneac dema yoac deserigec fede. KEBUAC ngicngac areng neneng ihai emma KEBUAC kpac kuneng heiwayong meminide.

<sup>5</sup> Ihainoc fora dedeac ngictau tatac faigec homac tacdae, imoc Dawidiac esangabo yeneac ngictau tatac sasawa.

<sup>6</sup> Ngeni ruae Yerusarennu feudeac numubisia. “Geac songo negengandae, yeni naric kecma wiac monggac mi obohobisia. <sup>7</sup> Geac odaga manau ruae febeso. Nga amaherec amaga onggonggekecdae, imocac manau mangang kpanjang mong mi febeso.”

<sup>8</sup> Sactosofocna nga ogofocna yeneng naric kecgecdeac amma yofi debade, “Geac ama manau ruaengo kecbeso.”

<sup>9</sup> KEBU Anutuninaac ama, imocac gombunggac amma ngeneng naric kecgecdeac nunumu uatoa mekecbade.

## 123

### *Ge neneac ubaga manganeu*

Hombannu kekenggac yegec.

<sup>1</sup> KEBU ge kurumenga kurumenga imohai ngictau tatacgau tacna ni kicna gearu fiba erede.

<sup>2</sup> Kingang ngic yeneng ngic kunengnginaac negeung kecandae nga kingang naroang yeni ngac kunengnginaac negeung kecma kic fiandae. Negenna, nenang ifi isocngoc kicnina KEBU Anutunina, yearu fikecmina yeng nenang-gac ubea manganebeso.

<sup>3</sup> O KEBU, ge ubamangang anemmena. Ngicngac yeneng homac deendema anemmegec imocac witiau kecdimbeac ubamangang anemmena.

<sup>4</sup> Ngicngac goa yeneng ebiha kpac kecma desofoc anemmegec naso herea monggoc bic ande. Nga ngic goa yenanggac negenggec engena yombong angkecde, yeni ngadenunuma desusuc anemmekecgec ubaonganinango ebic imoc mekecma gebeckpede.

## 124

### *KEBUNGO ongonnuude*

Hombannu kekenggac yegec. Dawidingo yegec yofi heiec.



<sup>1</sup> Israe ngeni yofi debisia, “KEBUNGO nenanggoc mi kecbacfu neni dafi ambesonga obohobing.”

<sup>2</sup> Ngic yeneng yacma nunubeso anggec, imohai KEBUNGO nenanggoc mi kecbacfu <sup>3</sup> yeneng nenanggac herebu kuneng negemma gboringoc gbokounubau. <sup>4</sup> Tunggbaungo meicnunubac me doku dundungo nebcunubau. <sup>5</sup> Amma dokutoa kucnginagoc yeneng semenunudacbau.

<sup>6</sup> KEBU keneheni.\* Ye ongonnunuu yeneac enacfu mi ening. <sup>7</sup> Uficngic yeneng ufc faigec nga nengngo ufcfunac woraande, ifi isoc woraing. Ufc imoc barackeu ufcfunac woraing.

<sup>8</sup> KEBUNGO kurumeng nga bangec meficgeec. Nga memeficnina imoc yeac pacfu fede.

## 125

### *Israe ye ruaegoc kecbeso*

Hombannu kekengac yegec.

<sup>1</sup> Ngicngac KEBU negenserima kecdimbe, nenang Siong tiki isoc. Wiac mongngo meu goroc goroc mi amma nasoya nasoya nangkefude. <sup>2</sup> Tikingo Yerusareng yerecgema tackendae, ifi isocngoc KEBUNGO ngicngacfora yerecyunuma yofinengac nga nasoya nasoya ifi kefude.

<sup>3</sup> Ngicngac dindingac yeni maringina sinema angammeme mangana ambauac. Ngic Anutu ngadehema mangana megecdeac ayemmeande, Anutungo yeni kpaie heiyemmeu ngictau yasunginango ngic dindingac yeneac bangec naric mi garenggeude.

<sup>4</sup> O KEBU, ngicngac gombunga nga herenginaiu ikoc nga hamangec mong mi fede, geng yeni faka gombunga ayemmena. <sup>5</sup> Ngicngac goa ine efaima sing mangana noboc noboc modacgec KEBUNGO yarengic meicyunuma yeni ifingoc yenigoc meicyunuu kenggec kpermeting ayemmeude.

Ruaengo Israe areng yenearu febeso.

## 126

### *Sionggac kekec mengerena*

Hombannu kekengac yegec.

<sup>1</sup> KEBUNGO Siong monggoc mengereu ngicngacfora naric kecgec, naso imohai nenang negenni imoc gau negendimbe isoc anec. <sup>2</sup> Nenang enacbicicfu dzomocngo wakeu sogac sogaiac yegecngo nedzaranninau feu bangec monnuc ngicngac botucnginau degec, “KEBUNGO yeni wiac kuneng yombong ayemmeec.”

<sup>3</sup> KEBUNGO wiac kuneng yombong anemmeecac nenang sogac sogaingo mewakenunuude.

<sup>4</sup> O KEBU, ge Negewe bangec kisiu dokukperemeng gbangge gbanggea, yeni mengereyununa doku monggoc haande, ge ifi isoc monggoc mengereyununa naric kecni. <sup>5</sup> Ngicngac kickumagoc wiac homecandae, ngeni sogac sogaiac arohoma fora megecde. <sup>6</sup> Ngicngac ngeni kiak ubamanganggoc kemma wit komoha tofohoma ngade wit gbomea bodangagoc tofohoma amanginau dzigene hama sogaima arohogecde.

\* **124:6:** Anutungo meficnunuu nenang bangecngicngacnec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeu. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

## 127

### *Nambarac nemmeude*

Hombannu kekenggac yegec, Soromongngo yegec yofi heiec.

<sup>1</sup> KEBUNGO ama mi meudeu ngic yeneng uatoa mema ama mekecdae, imocngo memefihagoc mong mi anude, kpac. KEBUNGO amabangec mi garenggeudeu ama gareng yeni gaugbori anggec uangina sifu memefihagoc mi anude. <sup>2</sup> Ngeni neneyaka meficgegecdeac asoac bic yacma uatoa mema kecma fefe nasongina ferahakecma uamemeac negengyohocgoc kecma yakangina nekecgecde, imoc ifingoc memefihagoc mi anude. KEBUNGO ngicngac songogoc hoangyunude, yeni gau femagec yaka meficgeyemmeude.

<sup>3</sup> Negenggec, nambarac sasawa yeni KEBUARUNAC maridzoming nga ngac hereaunac fora fingeacande, imoc uanginaac bung. <sup>4</sup> Wasaingiac mariu tebededaha homac femide, ngic sebigboringo medacfocngina meficyunuu kecdae, yeni medacfocnginagoc kecma wasaingic imoc isoc andae. <sup>5</sup> Ngic mong ye medacfora ifia homac kpedzucyunuma meyunukecde, ye kenehagoc.

Ngabafora taong naguu yoacfu nangandae, yeng imohai yenigoc nanu yeneng game kpekpeu naric mi faigecde.

## 128

### *Kebu ewehiheihai ammini*

Hombannu kekenggac yegec.

<sup>1</sup> Ngicngac KEBUAC ewehiheihagoc kecma yeac sing modacandae, yeni sasawango kenecnginagoc. <sup>2</sup> Ge ua marigango mena fora fingeru menec amma sogac sogaigoc kecma naric kecnade. <sup>3</sup> Enenggango amaga manau kecde, ye waing ic fora homac amma nangande, ifi isoc anude. Nga nambaracfogca yeneng oriwa benama, ifi isoc tatacga yerecgema tackengecde. <sup>4</sup> Negenggec, ngic mong KEBU eweheimima kefude, yearu kenec ifnoc feude.

<sup>5</sup> KEBUNGO Sionnu kecma kenecguu. Yerusareng ye naric kecma wiac monggac mi obohoute, imoc hembesena. <sup>6</sup> Ge esafocga fingegec yenenade.

Ruaengo Israe areng yenearu febeso.

## 129

### *Ngicngacfora mefinunuude*

Hombannu kekenggac yegec.

<sup>1</sup> Israengo yofi debeso, “Ni sebigborinaungoc kecbareng ngic yeneng ebic kunennu fainugec.” <sup>2</sup> “Ni sebigborinaungoc kecbareng ngic yeneng ebic kunennu fainukecma firang mong mi anggec. <sup>3</sup> Bangec mendzic mendzic yeneng bangec mendzicgec areng fingeacande, yeni ifi isoc ngade nau kpendzicgec areng herea fingegec.”

<sup>4</sup> KEBU ye dindingac. Ngic Anutu ngadehema mangana megecdeac ayemmeande, yeng yeneac witic herecgema yungecnunuec. <sup>5</sup> Ngicngac Siong ubanganango ukuandae, yeni merengyunugec yeni game kpekpeu faiyunugec monggoc dzigenema kembisia.

<sup>6</sup> Yeni ama witiau kpdizingngoc erema bic homeande, ifi isoc ambisia. <sup>7</sup> Mekpedzuc ngicngo imoc meudeac maria mi sineude nga semeng dedeck-eande, imoc mi abaranggema mekenude. <sup>8</sup> Ngicngac goa yeni kengha

angandae, yeneng yofi naric mi degecde, “KEBUNGO kenecngunuu. Neni KEBUAC kpacfu kenecngunudimbe.”

## 130

### *Kebu, ni kpacguduae*

Hombannu kekenggac yegec.

<sup>1</sup> O KEBU, ni ubaebicnagoc emu keme kemeau isoc kecma kpacguduae.

<sup>2</sup> Kebu, ge enacudumenna negemma kedzac kpena. Kpesi kpesina gearu hade.

<sup>3</sup> O KEBU, ge kopocsicnina kicgau arenggema negenna febacfu ngic mongngo serima naric mi kecbac. <sup>4</sup> Nga gearu sifu kopocsic wawa fedeaec eweheiheigoc hoanggubesonga.

<sup>5</sup> Ni KEBUAC tomái kecduae. Ubaonganango tomái kefu ni yeac yoac negensikecma fora fingerudeac tomái kecduae. <sup>6</sup> Tofocnagareng yeneng asoac haudeac tomái kecandae, ni yeni feracyunuma ubaonganango KEBUAC tomái kecduae. Ni yeac tomái kecduae amma monggoc ferahama tomái kecduae.

<sup>7</sup> KEBUNGO yoac dedzege amma imoc modarude. O Israe, ge KEBU negensima fora fingerudeac tomái kecna. Yeng bummenunudacma ebicfunac mesinunuudeac kuc engena femide. <sup>8</sup> Israe areng yeni ngicngac ogofocngina memanganeyunuma kopocsicnginagoc anggec. Nga yennoc bummeyunuma manganameme fakanginaunac mesiyunuude.

## 131

### *Wiac monggac mi ammdie*

Hombannu kekenggac yegec. Dawidingo yegec yofi heiec.

<sup>1</sup> O KEBU, herenau sebiengeng mi anganduae nga ubakpekpe arennu kicna wi mi meemma fibade. Wiac kuneng me bibiagoc amma ni feracnuma neacsoc mi ande. Ni imocac negen negeng ua mi mebade. <sup>2</sup> Ubaongana menomaneba waicke fede. Sabac mongngo nonggeaac namu nema waicke feande, ubaonganango ifi isoc waickema fekecde.

<sup>3</sup> O Israe, ge yofinenggac amma nasoya nasoya Kebu negensina fora fingerudeac tomái kecbesena.

## 132

### *Dawidi nga Siong meisingyuruec*

Hombannu kekenggac yegec.

<sup>1</sup> O KEBU, Dawidingo ebicfu engkefec, imoc negenna feu yeac negenna ngereebesoo. <sup>2</sup> KEBU, Yakoboac Anutu Kuctoa mingina, ge yomoc negensibesena, yeng geac yoac deserima yofi deec, <sup>3</sup> “Ni amana manau mi embade me fefenau naric mi febade, <sup>4</sup> ni kicna gauac kpetarimima gau naric mi febade <sup>5</sup> kecma KEBU geac amatatac nga Kuctoa mingina Yakobogoc kecande, geac amagerec meficgebade.”

<sup>6</sup> Negenggec, neni Efrata bangecfu Anutuac dzadzahac katapaac siduc negemma Yara manennu imoc meficgeing. <sup>7</sup> “Hagec KEBUAC amau kenni, nenang yeac hanitatahau fafoc heimima numumini.

<sup>8</sup> O KEBU, ge yacma kucgaaac katapagoc tacnegeng amagau hana. <sup>9</sup> Womong garenga, ngeni dindingac kekec heigec kemebeso nga ngicngacfora kpetiac kecandae, ngeneng desogai amma arohobisia.”

<sup>10</sup> Ge kingang ngicga Dawidiac gombungac amma ngicga kerecngo nadzicminec, ye mi ngadehebesena. <sup>11</sup> KEBUNGO yoac deserima Dawidi yoac edeac, imoc naric mi meickeude. Ye yofi deec, “Ni geac bangecyombonga yeneac arenunac medacga mong meisinggema ye ngictautatacgau faiba tacheso. <sup>12</sup> Neac dzadzahac nga dedekperagiyoacna kpouyemmeba geac medacfocga yengeng imoc modacgedeude yeneac medacfocngina ifingoc geac ngictau tatacfu nasoya nasoya takecgede.”

<sup>13</sup> KEBUNGO Siong meisinggema ihai kefudeac ammide. <sup>14</sup> Ye yofi deec, “Ni ama yomocac negensongo negengkecha imocngo nasoya nasoya neac tacnegeng ama seria anu imohai tacyac ambade.

<sup>15</sup> Nga imohai wiac sasawa fede, imoc homac yombong kenehebade. Yeac ngicngac makpekpea semeng gumecyunuba negebac angecde. <sup>16</sup> Ni womong garengfora ebicfunac yungecyunubade, faka imoc ngakpi isoc heiyemmeba kemeu kecgec ngicngacfora kpetiac kecandae, yeni sogac sogaiac yegec heigecde.

<sup>17</sup> Ni imohai Dawidiac arennununac ngic mong faima yeac kuc heigboriba besaiude. Ni ngicna kerecdokungo nadzicmiba kefu yeac kifa mong mengeremiai. <sup>18</sup> Nga yeac ngabafora yeni ine game heiyemmeba kemeude. Ni ngictauac ira pirac pirac heimiba kemeu imocngo ye mekperagiude.”

## 133

### *Kopocsic waemema kecbesonga*

Hombannu kekengac yegec. Dawidingo yegec yofi heiec.

<sup>1</sup> Negenggec, ngicngac daramuna ngeneng negen negengngina kpeturanggema ruaegoc kecandae, imocngo wiac songea yombong. <sup>2</sup> Faka imocngo kerec homuna gombunga nga buma kuneng, imoc orucfu kpakegec mama ngebacdzou momoc nadzicmiande, ifi isoc. Imoc Aronggac ngebacdzou mama ferecgema ngakpia ubiau ifingoc nadzicmiude. <sup>3</sup> Imoc Herimong tikiac songoroc, ifi isoc. KEBUNGO Siong tikiu keneha nga kekeha wisic wisickea kpac kpakenemmeude, imocngo imohai mama kecde.

## 134

### *Maraiac dedengerec yegec*

Hombannu kekengac yegec.

<sup>1</sup> KEBUAC kingang ngic KEBUAC amau tofocnac nangandae, ngeni sawango hadacma KEBU kenehebisia.\* <sup>2</sup> Ngeni maringina miacma amabangec kpetiac, imohaigeng maringina sinema KEBU kenehebisia.

<sup>3</sup> KEBUNGO kurumeng nga bangec meficgeec, yeng Sionnu kecma kenecgubeso.

## 135

### *Kebu ye damu damuyagoc*

<sup>1</sup> KEBU yaiyo kpemini, hallelu Yac. KEBUAC kpac kuneng heiwayong memibesonga. O KEBUAC kingang ngic sasawa, ngeni ye dengerebisia.

<sup>2</sup> KEBUAC amau nga Anutuninaac womong sobengau nangandae, <sup>3</sup> ngeni

\* **134:1:** Anutungo meficnunu nenang bangecngicngacnec yumia kecma Anutac kenecyoac debisina, yoac imoc mitikibi homac fede nga yeng faka imocac negenu ngereude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

KEBU ohec waec memibisia nocac KEBU ye gombunga. Ye wosoefac anem-meandeac yeac kpac kuneng heiwayong memima yegec heimibisia.

<sup>4</sup>KEBUNGO Yakobo yengena areng segerema Israe yengena areng yombong anggedeac meisingyunec.

<sup>5</sup>KEBU ye kuneng, imoc nengenduae. Nenang Kebu yeng anutu hania hania sasawa feracyunudacde.

<sup>6</sup>KEBUNGO wiac mong meudeac songo meficgema imoc naric kurumennu me bangecfu me kondunnu me keme kemea hania hania fekendae, imohai uaya meude. <sup>7</sup>Yennoc bangec tegiau hoeng uayoac yemmeu yacgede. Nga yeng kia nga piratac meficyruru heandape nga firang tohongameaunac memau ngadeau mama fingeandae.

<sup>8</sup>Yennoc Aigita ngic yeneac warac medacfocongina nga rama burumakanginaac warac areng kpebcyunudarec. <sup>9</sup>O Aigita bangec, ye gearu hama geac botucfu negensinggegedeac faka kuhagoc amma kucfaka bibiagoc sueyunuu fingeema Farao nga habufora memanganeyunec. <sup>10</sup>Ye firang amma bangec monnunac ngicngac homac yunuma ngictau kucnginagoc kpebcyunudarec.

<sup>11</sup>Ye Amori yeneac ngictau Sihong kpema Basang bangecac ngictau Ogie kpema Kanaanggac ngictau sasawa yunuma <sup>12</sup>bangec maridzoming dema ngicngacfora Israe yemmeec. Ye maridzominga imoc yemmeec.

<sup>13</sup>O KEBU, geac kpac kuneng imoc nasoya nasoya feengkefu ngicngac esamedacfocongina fingecehae anggede, yeneng geac kpac kuneng neנגeցeс feude. <sup>14</sup>KEBUNGO yoacfu ngicngacfora nanggeyunuu yeni yoacfu firang ambisia. Ye kingang ngicfora yeneac ubea nanganeude.

<sup>15</sup>Bangec monnunac ngicngac yeni nemuongangina siriwa nga gol tegenggo memea. Yeni bangecngic yeneac marikibisac andae. <sup>16</sup>Yeni enacbibicnginagoc nga yoac ine naric mi degede. Yeni kicnginagoc nga kicnginango ine wiac naric mi henggede. <sup>17</sup>Yeni kedzacnginagoc nga kedzacnginango ine wiac mong mi negemma enacnginausing asu mong mi heigede.

<sup>18</sup>Ngic nemuonga meandae, yeneng nemuonga isoc anggede. Ngicngac yeni nemuonga negenseriandae, ngicngac ifia yeni sasawango nemu ongangina isoc andacgede.

<sup>19</sup>O Israeac areng, ngeni KEBU kenehebisia.\* O Aronggac areng ngeni KEBU kenehebisia. <sup>20</sup>O Rewiac areng, ngeni KEBU kenehebisia. Ngicngac ngeneng KEBU ewehelheigoc hoanggema kecandae, ngeni KEBU kenehebisia

<sup>21</sup>Ngicngac Sionnu kecdae, ngeni KEBU Yerusarennu kecande, ye kenehebisia. KEBU erienzong memibesonga, hallelu Yac.

## 136

### *Kebuac wosoefac*

<sup>1</sup>KEBU ye gombunga, imocac ubangerec memibesonga. Yeng yoac dedzege amma imoc modackecde, faka imocngo fefeseri feengkefude.

<sup>2</sup>Anutu hania hania yeneac Anutu ubangerec memibesonga. Yeng yoac dedzege amma imoc modackecde, faka imocngo fefeseri feengkefude.

\* **135:19:** Anutungo meficnunu nenang bangecngicngacnec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeu. (Fingec fingeс 9:26, 14:20, 24:48, Mitiyegec 16:7, 26:12, 103:22 nga goa homac fede.)

<sup>3</sup> Kebu yeneac Kebu ubangerec memibesonga. Yeng yoac dedzege amma imoc modackecde, faka imocngo fefeseri feengkefude.

<sup>4</sup> Kebu kucfaka bibiagoc mekecde, ye ubangerecyoac memibesonga. Yeng yoac dedzege amma imoc modackecde, faka imocngo fefeseri feengkefude.

<sup>5</sup> Kebu wiac sasawa negentegecma kurumenga kurumenga meficyunuec, yeac marikibi gombunga yombong ande nga ye ubangerec memibesonga. Yeng yoac dedzege amma imoc modackecde, faka imoc fefeseri feengkefude.

<sup>6</sup> Kebu doku witiau bangec faiec, ye ubangerec memibesonga. Yeng yoac dedzege amma imoc modackecde, faka imocngo fefeseri feengkefude.

<sup>7</sup> Anutu kperagia kuneng faiyuruec, ye ubangerec memibesonga. Yeng yoac dedzege amma imoc modackecde, faka imocngo fefeseri feengkefude. <sup>8</sup> Ye wenacngo hadzing garenggeudeac faiec. Yeng yoac dedzege amma imoc modackecde faka imocngo fefeseri feengkefude. <sup>9</sup> Ye afo nga asomeng yeneng tofocnac garenggegecdeac faiyunuec. Yeng yoac dedzege amma imoc modackecde, faka imocngo fefeseri feengkefude.

<sup>10</sup> Kebu Aigita bangecfu waracmedacfocngina kpebucyunuec, ye ubangerec edebesonga. Yeng yoac dedzege amma imoc modackecde, faka imocngo fefeseri feengkefude.

<sup>11</sup> Ye Israe areng yeneac botucfunac hesicyunuu kenggec, ye ubangerec edebesonga. Yeng yoac dedzege amma imoc modackecde, faka imocngo fefeseri feengkefude. <sup>12</sup> Ye mariseria nga kuctoayagoc amma maria sinema ua imoc meec. Yeng yoac dedzege amma imoc modackecde, faka imocngo fefeseri feengkefude. <sup>13</sup> Kebu kondung sacsac kpendziru yohockang anec, ye ubangerec edebesonga. Yeng yoac dedzege amma imoc modackecde, faka imocngo fefeseri feengkefude. <sup>14</sup> Ye Israe areng sing faiyemmeu yeneng imocac dzongiau ferecgegec. Ye ubangerec edebesonga. Yeng yoac dedzege amma imoc modackecde, faka imocngo fefeseri feengkefude. <sup>15</sup> Yeng firang amma Farao nga wasai arengfora heimerengyunuu kondung sacsacngo semeyunuec. Yeng yoac dedzege amma imoc modackecde, faka imocngo fefeseri feengkefude.

<sup>16</sup> Ye ngicngacfora meyunuma bangec gbangge gbanggea feec, imohai wangecyunuma kenec, ye ubangerec edebesonga. Yeng yoac dedzege amma imoc modackecde, faka imocngo fefeseri feengkefude. <sup>17</sup> Kebu firang amma ngictau kucnginagoc yunuec, ye ubangerec edebesonga. Yeng yoac dedzege amma imoc modackecde, faka imocngo fefeseri feengkefude. <sup>18</sup> Ye firang amma ngictau kpac kunengnginagoc yunuec. Yeng yoac dedzege amma imoc modackecde faka imocngo fefeseri feengkefude.

<sup>19</sup> Ye firang amma Amori ngic yeneac ngictau Sihong kpeec. Yeng yoac dedzege amma imoc modackecde faka imocngo fefeseri feengkefude. <sup>20</sup> Ye firang amma Basang yeneac ngictau Oge kpeec. Yeng yoac dedzege amma imoc modackecde, faka imocngo fefeseri feengkefude.

<sup>21</sup> Ye yeneac bangecngina maridzoming dema ngicngac areng mong yem-meec. Yeng yoac dedzege amma imoc modackecde, faka imocngo fefeseri feengkefude. <sup>22</sup> Ye maridzoming dema bangec imoc kingang ngiha Israe miec. Yeng yoac dedzege amma imoc modackecde, faka imocngo fefeseri feengkefude. <sup>23</sup> Neni sure surea kecmina yennoc neneac negenu feec. Yeng yoac dedzege amma imoc modackecde, faka imocngo fefeseri feengkefude. <sup>24</sup> Ye ngabafocnina yeneac mariunac mesinunuec. Yeng yoac dedzege amma imoc modackecde, faka imocngo fefeseri feengkefude.

<sup>25</sup> Yennoc wiac sasawa meficyunuma kekecnginagoc anggec semeng yem-meude. Yeng yoac dedzege amma imoc modarude, faka imocngo fefeseri feengkefude.

<sup>26</sup> O, kurumenggac Anutu ubangerec memibesonga. Yeng yoac dedzege amma imoc modackecde, faka imocngo fefeseri feengkefude.

## 137

### *Babirong doku tegiau*

<sup>1</sup> Neni Babirong bangecac doku tegiau tacma Siong negensima kiacma <sup>2</sup> gitanina ic fawau gbedickeing.

<sup>3</sup> Ngic yeneng menunuma kemma ebic meficgenemmegec, yeneng ubangerec meficgegecdeac degec, "Ngeni Sionggac yegec heigec negenni."

<sup>4</sup> Neni ine kuric bangecfu kecma KEBUAC yegec heinideac obohodimbe.

<sup>5</sup> Yerusareng, ni geac nigecnuudeu marifoinango dzanggema kuha kpac ambeso. <sup>6</sup> Yerusareng imoc neac sogac sogaiac enaratoa, ni ifi mi negemma geac nigecnuudeu nedzarannango ngorucbonnau mendanggebeso.

<sup>7</sup> O KEBU, ngic yeneng Yerusareng kpetotiegec, naso imohai Edonggac ngic yeneng degec, "Kpemarackegec, kpemarackegec mama seringau wisickeu." Kebu ge imoc negenna febeso.

<sup>8</sup> O Babironggac naroang, ge kpetotiegugecdeac areng, imoc bic degenggec. Ge mangana anennecac ngic mong ye imocac turunga merenude, ye kenehagoc. <sup>9</sup> Mong ye geac sabac mema hoc peperandziu yunuma kpe-bucyunuude, ye kenehagoc.

## 138

### *Wi yombong kecde*

Dawidingo mitiyegec yofi heiec.

<sup>1</sup> O KEBU, ni heregoc ubangerec megemma anutu hania hania kecdae, yeneac kicfu geac dedengerec yegec heigembade. <sup>2</sup> Ni womongga kpeti-afubigeng ngonducnebade. Geng yoac dedzege amma imoc modacnade amma ge yoac modac modac Kebu, imocac kpac kunenggaac ubangerec dekecbade. Ge kpac kunenggagoc nga geng yoacga deserima denec, ge wiac imoc miacna enu imocngo wiac sasawa feraheude. <sup>3</sup> Ni kpacguai naso imohai geng turunga merennenna kengeha kpac amma serima kecbadeac anenec.

<sup>4</sup> O KEBU, bangecac ngictau sasawa yeneng geac enacgaunac yoac nengenggec dengeregubisia. <sup>5</sup> KEBUAC kuc nga kibikperagitoa, imoc wiac engena. Yeni imocac KEBUAC sing fekende, imocac yegec heigecde.

<sup>6</sup> KEBUNGO wi yombong kecde, fora, amma ye sifu ngictehec nenang nenenggareng anemmekefude. Ngicngac goa yenanggac nengenggec engena angande, yeng herenginang kecma fakangina negenude.

<sup>7</sup> Ni ebic witiu kecduae, fora. Nga geng sifu kekecna onggonggekecne. Ngabafocna yeneng herebu anenggec geng mariga sinema marifoigango ebicfunac mesinunade. <sup>8</sup> KEBUNGO efaima neac kekecareng uayagoc faima imoc sasawa nearu mesidarude.

O KEBU, geng yoac dedzege amma imoc modackecnade, fakaga imocngo nasoya nasoya feengkefude. Ge marikibiga mi ngadehema wana.

## 139

*Kebu ge negennunec*

Yegecgareng yearu. Dawidingo mitiyegec yofi heiec.

<sup>1</sup> O KEBU, ge neac herena hennegeng amma negennunec. <sup>2</sup> Ni takecduae nga yacma nangkecduae, geng imoc sasawa negendacma hereaungoc tacma negen negenna hentegecdacnec. <sup>3</sup> Ni kengha anduae nga fefenau feduae, imoc hennegeng amma sing sasawa kenganduae, imoc negendacnec.

<sup>4</sup> O KEBU, ni yocac debesonga enac mi anggebareng geng yocac imoc bic negendacnec. <sup>5</sup> Ge kicnau nga ngadenau oronnukecma marigau fainuma menunade.

<sup>6</sup> Negen negeng ifia imoc keme kemea nga engenatoa amma kuneng andeac imocac ubangerec negenduae, fora. Nga imoc sifu naric mi negentegecbade.

<sup>7</sup> Ni ihai me ihai kembadesoc geac Asuarunac agac naric mi kecbade. Nga geac kicfu kekec, imoc wama sufubadeacsoc mi anduae. <sup>8</sup> Ni kurumennu embadeu ge ihainoc kecnec. Nga homec amau kemema fefena faima fema naric mi sufubai nocac ge ihai ifingoc kecnec. <sup>9</sup> Ni asoac ama negenggac kpegang kpema kpututuckebade me kondung tegiau edi noboc kemma ihai tacbaisu <sup>10</sup> ge marigango ihai ifingoc hesicnuma marifoigango seria menunade.

<sup>11</sup> Ni yofi gedang debai, “Kundungngo semenuu kperagia nearu fede imoc kundung kpebeso.” <sup>12</sup> ifi deba kundung imoc ine geac kicfu kundung mi anude, kpac. Nga tofocnac imoc wenac isoc kperagiude. Nocac kundung imoc geac kicfu kperagi angkecde.

<sup>13</sup> Geng ubaherena sasawa meficgema nonggo heremanau kecbare geang-gaac sebefusina nga ubaherena kpedzucnema meficnunec. <sup>14</sup> Ge meficnuma menunec imoc faka bibiagoc nga damuyagoc annecac dengeregubade. Geng uaga mekecnec, imoc wiac bibiagoc yombong, imoc negengyombonggeduae. <sup>15</sup> Geng sufuu sufuu menunec, imohai ni forakebannagoc kicgango bic nennec. Sebina imoc emu bangec keme kemeau feu geng kpedzucnunec. <sup>16</sup> Sebinango mi torokpemanungoc kicgango sebinaac hanac hanahea hennec nga uamemena mong mi hamanungoc imoc sasawa tembus tembus geac kibiuh oho ohoya fede.

<sup>17</sup> O Anutu, geng wiac negensiannec, imocac negemba wiac engenatoa ande. Imocac ni imoc kpeturanggeba kpetea engena yombong fingerude. <sup>18</sup> Imoc homac yombong sangi ferahadeac imoc osobesonga osiduae. Nga gborima yabade, imoc gegocngoc kecbade.

<sup>19</sup> O Anutu, ngic Anutu ngadehema mangana megecdeac ayammeande nga ngic sacnina hetinggegecdeac ayammeande, yeni kpebucyununa wanubisia, imocac yombong anende.

<sup>20</sup> Yeni mangana negemma geac yocac deandae nga ikoc fingerudeac ngabafocga nanggeyunugecde. <sup>21</sup> O KEBU, ngic geac modzongina tiande, ni yeneac modzona homac tide. Ngicngac yeneng geac yocac kpeandae, yeni manganaac areng, ifi negemma wayunudacbade. <sup>22</sup> Foracngoc, ni yeneac modzona tiu ngicngac imoc yeni ngabafocna, ifi negemma ubango ukuyunubade.

<sup>23</sup> O KEBU, ge herena isinggema herenaac hania hennegeng amma faitobang anemma negen negenna henna. <sup>24</sup> Ni manganaac sinnu kengkecduae me kpac, imoc hennegeng amma sing feengkefude, imohai hesicnuna.



## 140

*Ngicngac memanganenubauac*

Yegecgareng yearu. Dawidingo mitiyegec yofi heiec.

<sup>1</sup> O KEBU, ge yarengic yeneanunac yungecnuma ngic mangana herebunginagoc yeneanunac onggonnuna. <sup>2</sup> Yeni herenginaiu yarefaka hania hania arenggema nasosoc dzikac kpegecdeac sing meficgekecdae. <sup>3</sup> Yeni nedzarangngina dzomugec boidezocac nedzarang enaragoc, ifi isoc anude. Yeni ngedzarangnginango ikoc ayemmeandae amma bibicnginaiu boidezocac marasing mekecdae. *Selac*

<sup>4</sup> O KEBU, ngic Anutu ngadehema mangana megecdeac ayemmeande, yeneac mariunac onggonnuna. Yarengic yeneng hanina kpesigecdeac negensima areng faigec ge onggonnuna. <sup>5</sup> Ubakpekepe ngic yeneng botac mong mesufuma faima menubeso angkecdae. Yeni witic mema ufc faima suba sing tegiau faima menubeso angkecdae. *Selac*

<sup>6</sup> KEBU yoac yofi ededuae, "Ge neac Anutu." O KEBU, ge neac ubaga manganeudeac kpacguba ge kedzac kpema negembesena.

<sup>7</sup> O KEBU Kuctoa mingina, ge neac yungec yungecna seria. Geng dzikac nasou orucna garenggema onggonnunc. <sup>8</sup> O KEBU, ngic Anutu ngadehema mangana mebeso ayemmeande, yeni yenangac negenggec wiac engena ambaac songongina modacma wiac mong mi meficgeyemmebesena. Yeni yarefaka arenggekecdae, imoc fora mi fingeCBSO. *Selac*

<sup>9</sup> Ngic ni oronnudae, yeni enacbibicnginango yoac dema ngicngac ebicfu faiyunuandae. Ebic imocngo geng negemmana orucngina semeu <sup>10</sup> gerec seriango kia isoc witinginaiu mabeso. Yeni emu tengtoau ukuyunugec kemema monggoc mi erebisia. <sup>11</sup> Ngic ngadeyoac deande, ye bangecfu titiseria faibacac geng imoc kpetarimina. Faka mangana yengenaoc yarengic bic yombong kisamma firang amma ye meickebeso.

<sup>12</sup> Ngicngac ebic witiau kecgec KEBUNGO yeneac yoac henggareng amma nanggeyunuude. Ngicngac iwaiac obohoma kecandae, yeni sing dindingac modacgec yeng isingyunuma yoacngina desiude, imoc negenduae.

<sup>13</sup> Foracngoc, ngic dindingac yeneng geac kpac kuneng heiwayong memima ubangerec degecde. Nga ngicngac ikoc nga hamangecngina kpac kecdae, yeneng geac kicfu kecgecde.

## 141

*Ni manubeso ande*

Dawidingo mitiyegec yofi heiec.

<sup>1</sup> O KEBU, ni kpacguduae. Ge nearu bic hana. Ni kpacguba ge kedzac nearu faima ubaudumenna negenna. <sup>2</sup> Nunumunango geac kicfu hama hosuc homuna gombunga, ifi isoc ambeso nga marina gearu miacba imocngo maraiac sese gombunga, ifi isoc ambeso.

<sup>3</sup> O KEBU, ge enacnau kpaie mong mengerema bibicnaac naguya garenggekebesena. <sup>4</sup> Herenango mangana hoanggebacac nga ngic ngicngac ogofocngina memanganeyunuandae, yenigoc kecma haifaka mangana angkecbaiac ge imocac kpaie heinembesena. Ni yenigoc tama wiac emenec mi ambesare.

<sup>5</sup> Ngic gombungango yoac yumiau edenuma demengere naric anembeso. Imocngo kerec orucnau nadzicnenggec sebinango ireckeande, ifi isoc andeac orucnango imoc naric mi waude. Ni manganameme yeneac negemma numuanduae, imocac turungaac nasoya hau fora fingeCDARUDE. <sup>6</sup> Imohai

ngic Anutu ngadehema mangana megedecac ayemmeande, yeni wi nanggec enarafocngina ukuyunugec hofeu kemegecde. Nga yeni imohai yofi ne-genggecde, KEBUAC yoac imoc fora. <sup>7</sup> Ngicngo bangec mendzicgec hocngo erema fingecande, yarengic yeneac sicngo ifi isoc homec amaac naguu singsararang kpema feemeude.

<sup>8</sup> O KEBU, Israeac Anutu, ni sifu kicna gearu fima geac hoannu hama sufubeso anduaeac ongonnuma mi wanubesena. <sup>9</sup> Ngic mangana yeneng menugecdeac botac faigec nga yarengic yeneng suba faigec ge imohacnac ongonnuma.

<sup>10</sup> Ni gombunga kembare ngic goa Anutu ngadehema mangana megedecac ayemmeande, yeni yenang botacngo meyunubeso.

## 142

### *Nukporac anenggec*

Masiki uba modacma heibesonga. Dawidingo hoc singau tacma numuyegec yofi heiec.

<sup>1</sup> Ni ubana miacma KEBU kpacba yeng neac ubea manganeudeac ubana miacma numubade. <sup>2</sup> Ni ebicyoacna hafaogoc yeac kicfu kpacema kpendzennaac yoacsiduc yeac kicfu deficegade.

<sup>3</sup> Asuna ukuba kpeu geng haniaa bic negennade. Ni sing kenganduae, imohai ngic yeneng menugecdeac botac faima sufuma takecdae. <sup>4</sup> Ni kicna foinaugeng fima hembra mongngo ni mi nengsiude. Nga ni sufu sufuama hofocba kpac anu ngic mongngo nenggareng mi anenude.

<sup>5</sup> O KEBU, ni kpacguma deba, “Ge sufu sufuamana nga ge gbori kekec bangecnginau neac wiac angkecne. <sup>6</sup> Ni memeficac obohoyombonggema keca kiacduaeac kiacna negemma ngic nukporac anengandae, yenearunac yungecnuma. Yeni serima feracnuda. <sup>7</sup> Ge yungecnuma ebicnaac witicamaunac wangecnubesena. Ge ifi anna ni geac kpac kuneng heiwayong memima ubangerecyoac debade. Ge gombunga anengannecac amma ngicngac dindingac yeneng hama oronnugecde.”

## 143

### *Kopocsicninagoc andimbe*

Dawidingo mitiyegec yofi heiec.

<sup>1</sup> O KEBU, ge nunumuna negenna. Ni kpacguma desambic anggema ge kedzac faima yoacna negenna. Ge yoac modac modac Kebu nga ge dindingac kecnecac amma turunga merennenna. <sup>2</sup> Ngic mong kekehagoc ye geac kicfu dindingac naric mi kecde. Nga ni kingang ngicga anduaeac yoacfu mi fainubesena.

<sup>3</sup> Ngabangcango kporacnuma kekecna bangecfcu kpefahau ni kundung manau homecngic bic homegec, yeni isoc tacbadeac fainuec. <sup>4</sup> Imocac asuna herena manau worau herenango ebic meficgema hoc isoc ande.

<sup>5</sup> Ni warac naso, imoc negemba fede nga geng ua mekecne, imoc henegeng amma negensikecduae. Ge marigango marikibi meficgene, imocac ubangerec negemma henegeng angkecduae. <sup>6</sup> Marina gearu miacduae. Bangec dzangge dzanggeango dokuac ammiande, ubaonganango ifi isoc geac ammi. *Selac*

<sup>7</sup> O KEBU, asuna woradeac turunga bic merennenna. Ni keca ngic homema bangecfcu kemeandae, ifi isoc kemebaiaac ge kicmesuga nearunac

mi mesufuna. <sup>8</sup> Ni negenseriguma yofi deba, “Geng yoac dedzege amma imoc modackecne, ge asoacngoc imocac yoac edenubesena. Ubaongana gearu miacba ereudeac sing kpounenna ni imoc modacma kengkecbade.”

<sup>9</sup> O KEBU, ni worama geac hoannu sufubadeac hadua. Ge ngabafocna yeneac mariunac yungecnuna. <sup>10</sup> Ge neac Anutu. Ge imocac songona kpounenna arenggeba geac Asu gombunggango bangec sorongau hesicnubeso.

<sup>11</sup> O KEBU, ge kpac kunengga gombunggaac amma kekecna onggonggena. Nga fakaga dindigacac amma ebicfunac mesinuna. <sup>12</sup> Ni geac kingang ngicga kecduaec geng yoac dedzege amma imoc modackecne, fakaga imocngo ngabafocna nga ngic sasawa ubana kpeandae, meicyunudacna kpac ambisia.

## 144

### *Kebungo meficnunu firang annide*

Dawidingo mitiyegec yofi heiec.

<sup>1</sup> KEBU ye neac hoc peperandzi seria, ye kenehebesonga.\* Yeng marina dzikacac mengerekecma dzikac kpebadeac gbonna meefaiude. <sup>2</sup> Neac Anutungo yoac dzegema imoc modarude. Ye neac hoc peperandzi seria nga amana seria amma ye ebicfunac mesinuude. Ye kasona anenu ni yeac hoannu kemma sufubade. Ye firang amma ngiha ngiha neac bageu faiyunuude.

<sup>3</sup> O KEBU, bangecngic ye gombungaya kpac kecede, fora. Nga geng ngicac medac sifu henggareng anemmema negensinade. <sup>4</sup> Bangecfu ngic neni ine wiac engena kpac. Ngic neneng asu naso mocgu taiandimbe, ifisac. Nga kekecnina imoc wenacfu onganinango hereande, ifi isoc ande.

<sup>5</sup> O KEBU, ge kurumenga kurumenga merarangyunuma yacma mama tiki kpesereyununa hosuc kpebisia. <sup>6</sup> Ge piratac sueyununa ngabafocga yunugec singsararang kpema kendacbisia. Ge tebedemaha kpesaima wedeyunubesena. <sup>7</sup> Ge wi tacma mariga sinema menuma doku tunggbaung kucnginagoc hakecdae, imohacnac mesinuna. Ge kuricngic yeneac mariunac mesinuna. <sup>8</sup> Yeni enacbibicnginangau ikocyoac wakeu deandae nga marifoinginango tobannunuma ua meandae.

<sup>9</sup> O Anutu, ni geac yegec gboria mong heibade. Ni gita witiha teng kpema imocngo udumeng gombunga meficgegembade. <sup>10</sup> Gennoc dzikacfu ngictau kuc yemmena firang angecde. Dzikaac beangngi ni, kingang ngicga Dawidi kpebeso anu geng imohacnac onggonnunec.

<sup>11</sup> Ge dzikac beang mangana yombong, imohacnac onggonnuma kuricngic yeneac mariunac yungecnuna. Yeni enacbibicnginango ikocyoac deandae nga marifoinginango tobanunudeac uatoa meandae.

<sup>12</sup> Medacfocnina yeni sebigbori kecma ic barama gombunga, ifi isoc ambisia nga naraofocnina yeneng ngictauac ama mana tuturunggac sering marikibi gombunga heiandae, ifi isoc siricnginagoc ambisia. <sup>13</sup> Uaninaac tohonnu semeng hania haniango wakema febeso. Nga ramafocnina manennu yeneng fingece sahe kuneng ambisia, imoc taoseng nga taoseng naso teng ifi sahebisia. <sup>14</sup> Nga burumakafocnina yeneng medac heregoc kecma ebiria

\* **144:1:** Anutungo meficnunu nenang bangecngicngacne yumia kecma Anutuac kenecyoac debisina, yoac imoc mitikibi homac fede nga yeng faka imocac negenu ngereude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

yombong amma medac megedce, imohai mongngo mi manganebeso me homebeso, kpac. Taongtoaninaac sinnu ebicac nga kiacac udumeng mong mi fingechede.

<sup>15</sup> Ngicngac sasawa Kebuac kenecgoc ifi kecandae, yeni sogac sogainagoc. KEBUNGO ngicngac ngeneac Anutungina ande, ngeni kenehagoc amma kegedce.

## 145

### *Anutuac marikibi ye afehebisia*

Dawidingo dedengerec yegec yofi heiec.

<sup>1</sup> Anutu nga KEBUNA, ni afeguma geac kpac kuneng nasoya nasoya kenehekecbade. <sup>2</sup> Ni wenacsoc kenecguma\* geac kpac kuneng nasoya nasoya heiwayong memibade. <sup>3</sup> KEBU ye engenatoa amma damu damuyagoc. Ngic mongngo yeac negen negeng nga sirihana naric mi arenggema negentegerude, kpac. Kebu eriendzong memibesonga.

<sup>4</sup> Ngicngac yofinenggac kecdae, yeneng angammemegaac siduc nambaracocngina edeyunugec yeni ngade fingechede, yenearu deyadiyem-mekecma kucfakaga damu damuyagoc dekperagiyemmegecde. <sup>5</sup> Ge kibikperagiagoc nga ngictauac kucgagoc amma ua bibiagoc mekecne, yeni imocac yoac degec ni imoc hennegeng amma negensikecbade. <sup>6</sup> Ngic yeneng uaga damu damuyagoc nga kuhagoc mekecne, imoc dekperagiyemmebisia. Nga ge engenatoa, imoc dekperagibade. <sup>7</sup> Geng gombunga anem-mekecne, imoc wiac efea kpac. Yeneng imocac siduc degec ni fakaga dindingacac desogai amma yegec heibade.

<sup>8</sup> KEBUNGO ubangerec anemna neneac ubea manganeude. Ye ngaba bic mi anemmeude amma yeng yoac dedzege amma imoc modackecde, faka imocngo wiac engena ande. <sup>9</sup> KEBUNGO ngicngac sasawa gombunga anemmema marikibifora neneac ubamangang anemmeude. <sup>10</sup> O KEBU, ge wiac sasawa mefiyununec, yeni geac ubangerec megembisia. Nga ngicngacocga kpetiac yeneng kenecguma <sup>11</sup> eucererengac kibikperagiaac siduc dekperagima kucgaac yoacsiduc dekperagibisia. <sup>12</sup> Ifi anggec ngic sasawango uaga kuhagoc mekecne, imoc negenggedce. Yeni eucererenggaac kuc kibikperagiagoc, imocac siduha negenggedce.

<sup>13</sup> Geac eucerereng imoc nasoya nasoya feengkefu geng ngictauac kucngo garengyunukecne, imoc ngic fingecehahina fekefude, imocacsoc feengkefude.

KEBUNGO yoara sasawa deec, imoc modarude nga faka angammemea imoc ubangerecogoc. <sup>14</sup> Ngicngac manunubeso anu KEBUNGO nenang sasawa nangenunuude. Ye ngicngac tipetangyununuyaya miacyunuude.

<sup>15</sup> Geng nasoya hau yaka yemmenadeac sasawango geac negeung amma kicngina gearu figecde. <sup>16</sup> Wiac kekecnginagoc sasawa yeni wiac monggac ayemmeu geng mariga mekpacgema yemmena soha megedce.

<sup>17</sup> KEBUNGO fakaya dindingac modacma wiac sasawa meande, imoc ubangerecogoc anemmeude. <sup>18</sup> Ngicngac KEBU kpacgec yeng yeneac wengenac kefude. Nga ngicngac ikocngina kpac kecma ye kpacandae, ye yenigoc wegenac kefude. <sup>19</sup> Ngicngac ewehaihei ammiandae, yeni wiac

\* **145:2:** Anutungo meficnunu nenang bangecngicngacne yumia kecma Anutuac kenecyoac debisina, yoac imoc mitikibi homac fede nga yeng faka imocac negenu ngereude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

monggac me monggac ayemmeu yeng imoc yemmeu naric kecgecde. Yeng kpakpacngina negemma ebicfunac mesiyunuude. <sup>20</sup> Ngicngac yeneng KEBU songogoc hoanggekecgec Kebungo onggongyunuude. Anu ngic Anutu ngadehema mangana megecdeac ayemmeande, yeni memanganeyunuu kpac andagecde.

<sup>21</sup> Enacbibicnango KEBUAC dedengerec yoac deude. Ngicngac bangecsebigoc kecdae, ngeni sasawango yeac kpara kpetiac nasoya nasoya kenehebisia.

## 146

### *Yoac modac modac Kebu*

<sup>1</sup> KEBU yoyomo heimini, hallelu Yac. O ubaongana, ge KEBU dengerebe-sena. <sup>2</sup> Ni kekecnau KEBU afehema kekec kecbadesoc Anutunaac dedengerec yegec heibade.

<sup>3</sup> Ngeni ngictauac medacfocongina nga bangecngicac medac sasawa mi negenseriynubisia, imoc negembisia. Yeneng naric mi meficngunugecde.

<sup>4</sup> Asunginango wayunuma kenu yeneng homema emu bangecfu monggoc kemegecde. Nga yeni ua hania hania megecdeac arenggekecgec, imoc uameme imohaingoc kpac andarude.

<sup>5</sup> Yakoboac Anutungo ngic monggac memeficngic anude, imohai ngic imocngo kenehagoc anude. Ngic mong ye KEBU Anutu negensima fora fingerudeac tomai kecande, ye kenehagoc. <sup>6</sup> Anutungo kurumeng nga bangec meficgema kondung nga kondung manau wiac sasawa fede, imoc meficgedarec. Ye yoac modac modac KEBU. Ye ifi kecde nga nasoya nasoya ifi kecengkefude. <sup>7</sup> Ngic goa yeneng ngic ogofocngina ebicfu faiyunugec ubaebicgoc kecgec Kebungo sing dindingac modacma isingyunuma yoacngina desiude. Ngicngac herenginaac homegec yeng yaka gumecyunuude. KEBUNGO ngicngac witicamau tacandae, yeni witicngina yungerude. <sup>8</sup> KEBUNGO ngicngac kicpisis kicngina merecgeude nga ngadehokuc ngadengina mesorongaima miacyunuude. KEBUNGO ngicngac dindingac kecandae, yeni songogoc hoangyunuude. <sup>9</sup> Ngicngac kuric kecgec KEBUNGO yenengareng ayemmema ngac hodzec nga beging nanggeyunuude. Ngic Anutu ngadehema mangana megecdeac ayemmeande, yeneac singngina ine memanganeude.

<sup>10</sup> KEBU Sionggac Anutu, ye nasoya nasoya geac ngictau anggengkefude. Ye fingecsahega fekefudesoc geac ngictau anggengkefude. KEBU erienzong memini, hallelu Yac.

## 147

### *Wiac sasawa nemmekecde*

<sup>1</sup> KEBU erienzong memini, hallelu Yac. Anutunina yegec heimima dengereni, imoc wiac gombunga yombong. Ye ubangerec anemmeandeac amma ye sesehema yegec heimini, imoc ubangerehagoc nga faka imoc ngereede.

<sup>2</sup> Ngic yeneng Israe arenggac ngicngac bic ukuyunugec. Nga KEBUNGO Yerusareng taong ine monggoc mema megboriu yeni monggoc kpedzucyunuma hoangyunuude. <sup>3</sup> Ngicngac herenginau ebic mema manganeyombonggeu yeng mengereyunuma kubecngina sangohoude.

<sup>4</sup> Yeng asomeng kpetengina meserima kpacngina tambuc tambuc kparude.

<sup>5</sup> KEBUNINA ye damu damuyagoc nga ye kuha engena yombong. Ngic mongngo yeac negen negentegecac kpetea naric mi meude, kpac.

6 Ngic yeneng ngicngac ogofocngina memayunugec KEBUNGO monggoc miacyunuma nanggeyunuude. Nga ngic Anutu ngadehema mangana megecdeac ayemmeande, yeni ine meyunuma bangecfu ukuyunuude.

7 KEBU ubangerecac yegec heimima Anutuninaac gita kpema imocngo udumeng gombunga memini.

8 Yeng kurumenga kurumenga hoengngo kperacyunuma kia faiu bangecfu mama fagannu kpindzing meficgeu ereude. 9 Yeng yang hania hania yakangina meficgeyemmeude. Neng yeneac medacngina yakaac derecgegec yeng yaka yemmeude. 10 Yeng becosi kuhagoc henu wiac engena mi ande nga ngic kuhagoc ye haningo sing herea tiu ye imoc henu wiac engena mi ande. 11 Ngicngac ye ewehelheigoc hoangeandae, yeng yememma nengenu ngereeude. Yeng yoac dedzege amma imoc modarude. Nga ngicngac yeneng imocac negensima fora fingerudeac tomal kecandae, ye yeneac negenu ngereu sogaiude.

12 O Yerusareng, ge KEBU yoyomo heimina. Siong, ge Anutuga yaiyo kpmibesena. 13 Ye taongga oda mengerema naguyaac aieng meseriu seria monggoc nanude. Yeng amaga manau medacfocga kenecyunuude. 14 Ye bangecgau ma faima ngicngacfcocga onggongngunuu ruaegoc kecgecde. Ye wit semeng gombunga yombong meficgengemmeu negebec anggecde.

15 Ye dederecgeyoara bangecfu sueu imocngo bic yombong nedzima haude. 16 Ye nomang sueu imoc rama dzoea, ifi isoc amma bangecfu maude. Ye nomang bangecfu haudeac deu imocngo hama isoc bangec semeude. 17 Ye nomanggbomea minginango nomanggbomea imoc wiac kotaha isoc ukuu mau mongngo yeac nomang imohai serima naric mi nanude. 18 Ye nomanggbomea yoac edeyunuu yeni sisingaima doku monggoc anggecde. Ye firang minginango firang sueu bangec fifranggeu doku dzuamagoc hakecgecde.

19 Ye yoara Yakobo mekperagimiu sing nga dederecgeyoara imoc Israe areng mekperagiyemmeec. 20 Ye bangec areng goa yeni faka ifia mong mi ayemmeec. Yeneng yeac dederecgeyoac mi negendae, kpac.

KEBU erienzong memini, hallelu Yac.

## 148

### *Bangec kurumeng Kebu dengerebisia*

1 KEBU heiwayong memini, hallelu Yac. Kurumenga kurumenga areng kecdae, ngeni KEBU ohec memibisia nga sawau kecdae, ngeni Kebu dengerebisia. 2 Kebuac angero sasawa ngeni ye dengerebisia. Kurumennu yeac wasai areng, ngeni ye dengerebisia. 3 Wenac nga afo amma asomeng kperagiagoc, ngeni yoyomo heimibisia. 4 Kurumenga kurumenga wi yombong nga kurumenga kurumenga witinginau doku fedae, ngeni KEBU dengerebisia.

5 Yennoc yoac deu fingecgecac ngeni sasawango KEBUAC kpac kuneng heiwayong memibisia. 6 Yeng tatacnginau seria tacgecdeac faingunuma mangina faiec, imoc naric mi ferahagecde.

7 Ngicngac bangecfu kecdae, ngeni KEBU erienzong memibisia. Kondungac yangtoatoa amma kondung kunenggac dzohongtoa keme kemea, ngeni KEBU dengerebisia. 8 Piratac nga nomanggbomea amma nomang maande nga nomang bangecfu fingecande amma kia firang, ngeni sasawango yeac enac tofobisia. 9 Tiki fagang nga ic foragoc amma yomondzoc ic sasawa, 10 kateu yang nga amaac yang sasawa, gisicgbiriring nga neng kpututuckegecde.

<sup>11</sup> Bangectoa bangecac ngictau nga ngiha ngiha nga ngictauac medacfocong-ina nga bangecac ngic enara kecdae, <sup>12</sup> sebigbori medac nga naroang momoc, ngicngac kpengeng nga nambarac, <sup>13</sup> ngeni sasawango KEBUAC kpac kuneng heiwayong memibisia. Ye kpactoayagoc, imocac ye afehebesonga. Yeac kuc kibikperagiagoc kurumeng nga bangec feracyunuma wi fede. <sup>14</sup> Ye ngicngacfora yeneac amma ngictau mong nangeu kuhagoc amma firang anude. Yeac ngicngacfora kpetiac kecandae, ngeni ye dengerebisia. Kebu ye Israe habufora yeac wegenacfu hama kecdae, ngeneac amma ngictau faiec. KEBU erienzong memibesonga, hallelu Yac.

## 149

### *Ngeni ubangeregcoc kecbisia*

<sup>1</sup> KEBU erienzong memini, hallelu Yac. KEBUAC yegec gboria heimibesonga. Ngicngacfora yeac yoac modackecdae, ngeni kpeketurangnginau yeac yegec gboria heimibisia. <sup>2</sup> Yeng Israe meficngunuu ngeni yeac ubangerec negembisia. Sionggac medacfora, ngeni ngictaunginaac so-gaibisia. <sup>3</sup> Ngeni yegec fedema yeac kpac kuneng heiwayong memibisia. Ngeni tambaring nga gita kpema udumeng gombunga meficgema oeha memibisia.

<sup>4</sup> KEBUNGO ubangeregcoc ngicngacfora ngeneac negenu ngereeude. Yeng ngicngac yumia ebicfunac mesingunuu imocngo wiacngina siriha u anu heingemue kemeude.

<sup>5</sup> Yoac modac modac ngicngac ngeni sogaima fefenginau fema ubangerec negemma yegec heimibisia. <sup>6</sup> Ngeni enacnginango dendzerenggema Anutu dengerema maringinau soe mana ngadea enaragoc mema kecma <sup>7</sup> imocngo bangec monnunac ngicngac yenearu turungngina kpouyemmebisia. Ngeni ngiha ngiha kopocsicnginaac turunga kpouyemmema <sup>8</sup> seng mema imocngo ngictaufocngina witicyunugec ngickunengfocngina aienu mendang-gyunubisia. <sup>9</sup> Yoac yofi bic oho ohoya fede, “Yeneac yoac imoc modacma yoacngina isinggema desibesonga.” Nga imocngo Anutuac ngicngac yeac yoac modacma kecdae, yeneac kuc kibikperagiagoc anude.

KEBU erienzong memini, hallelu Yac.

## 150

### *Kebu dengerebesonga*

<sup>1</sup> KEBU erienzong memini, hallelu Yac. Anutu womongau erienzong memibesonga. Yeac kurumenga kurumenga seria fekendae, ngeni imohai yaiyo kpebibisia. <sup>2</sup> Kebungo kucfaka damu damuyagoc mekecde amma ye engenatoa kpembibihagoc, imocac yoyomo heimibesonga.

<sup>3</sup> Ngeni trampet fifima udumeng meficgema ye dengerema yoming nga gita kpema udumeng meficgema heiwayong memibisia. <sup>4</sup> Ngeni tambaring kpema yegec fedema ye dengerema gitakurere kpema kungac fifima dengerebisia. <sup>5</sup> Ngeni kpeng kpema ye dengerema kpeng udumenga kunengngoc fifima dengerebisia.

<sup>6</sup> Wiac sasawango asu heiandae, ngeni KEBU erienzong memibisia.

KEBU erienzong memini, hallelu Yac.

## Mataio Yeng Yesuac Siduc Gombang Ohoec

<sup>1</sup> Yesu Kristoarunac fingeceahe amma fingecegec, imocac yofi ohogec. Yesu ye Dawidiarunac nga Dawidi ye Abrahanggarunac. <sup>2</sup> Abrahang ye Isakaac mama. Isaka ye Yakoboac mama. Yakoboarunac Yuda nga dacmunafora. <sup>3</sup> Yudaac medahora Perese nga Dzera fingeroc, yereac nonggongira Tama. Anu Perese ye Hesoronggac mama nga Hesoronggo Rang-gac mama. <sup>4</sup> Ranggo Aminadaac mama, Aminadango Nasonggac mama nga Nasonggo Sarmonggac mama, <sup>5</sup> Boas ye Sarmong nga enema Rahabaarunac. Boasi ye Obedac mama nga nonggea, imoc Ruti. Nga Obedngo Isaiac mama. <sup>6</sup> Isaingo ngictau Dawidiac mama, Dawidingo Saromoac mama yeac nonggea ye warac Uriaac enema kefec.

<sup>7</sup> Saromo ye Rehoboanggac mama, Rehoboang ye Abiaac mama nga Abiaarunac Asafa. <sup>8</sup> Asafa ye Yosafataac mama, Yosafatango Yoranggac mama nga Yorang ye Usiaac mama. <sup>9</sup> Usiango Yotanggac mama, Yotang ye Ahasiac mama nga Ahasi yearunac Heskia fingerec. <sup>10</sup> Heskiaarunac Manasse fingerec, Manassearunac Among, Amonggarunac Yosia fingerec. <sup>11</sup> Yosia yearunac Yekonia nga munafora fingegec. Yeni Babirong bangecfu meyunu kenggec, naso imohai fingegec.

<sup>12</sup> Yeneac ngadeu Saratiere fingerec, ye Yekoniarunac. Nga Saratiere yearunac Dzorobabe. <sup>13</sup> Dzorobabearunac Abiudu, Abiuduarunac Eriaking, Eriakinggarunac Asore fingerec. <sup>14</sup> Asorearunac Sadoko, Sadokoarunac Aking nga Akinggarunac Eriudu fingerec. <sup>15</sup> Eriuduarunac Ereasa, Ereasaarunac Matang nga Matanggarunac Yakobo fingerec. <sup>16</sup> Yakoboarunac Yosefe Mariaac ewea fingerec. Nga Maria yearunac Yesu, kpara Kristo degec, ye fingerec.

<sup>17</sup> Fingecehengahina Abrahanggarunac erekecma Dawidi fingeru andenga 14 ande. Nga Dawidiarunac fingecehengahina erekecma andenga 14 amanu Babironnu meyunuma kenggec. Nga imohacnac namma erekecgec andenga 14nu Messia fingerec.

<sup>18</sup> Yomoc Yesu Kristoac fingecec siduc. Maria nga Yosefe yeri eweeneng anecdeac yoac dedzege bic anoc nga Maria yeng ine Yosefegoc feyac mi ammaec Tiri Asuarunac medac kpenanggeec. <sup>19</sup> Nga ewea Yosefengo ifi negemma ngic kpetiac kefecac ngicngac yeneac kicfu enembingeha gamekpekke ammiudeac negenu naric mi anu negen negengua mema tambuhau aikic waudeac negene.

<sup>20</sup> Ye imocac negen negengua mema kecmanu Kebuac angero mongngo ine gauu fingececmima yofi edeac, “Yosefe, Dawidiac kiscifunac, ge enembingecea Maria menadeac mi kengecgubeso. Sabac hereau tacde, ye imoc Tiri Asuarunac. <sup>21</sup> Mariango medac mong meude, yeng kecma ngicngacfora kopocsinginaunac mesiyunuu komoc kpegecde. Imocac ge kpara Yesu mibesena.” <sup>22</sup> Anu Kebungo yoac profete yenearu faiu degec, imocnoc fingececarudeac ifi fingerec.

<sup>23</sup> “Nengengec, ngacnaroangngo medac mong kpenanggema meu yeac kpara Imanuere degecde.”

*(Yesaia 7:14)*

Imocac titiha yofi, Anutungo nenanggoc kecde.



<sup>24</sup> Anu Yosefengo gauunac yacma Kebuac angerongo yoac edeec, imoc modacma kemma Maria hesickema ameau enec. <sup>25</sup> Enu yeri eweeneng kekec bic mi kecmaecngoc medac fingeru kpara Yesu kparoc.

## 2

<sup>1</sup> Yesu Betreheng amau Yudaia prowinsiu fingerec, naso imohai Herodengo ngictau kefec. Kecmanu negen negengngic goa bangec wenac ere ereaunac Yerusarennu hama <sup>2</sup> yofi degec, “Yudangic ngeneac ngictau fingedac, ye dahai? Neni wenac ere ereau tacma yeac asomeng ereu hemma ye eweheiminideac hadimbe.” <sup>3</sup> Ifi degec ngictau Herodengo imoc negemma ubaebic meec. Meu ngicngac Yerusareng taonnu kegec, yeneng ifingoc anggec. <sup>4</sup> Nga ye yudaareng yeneac womong gareng enara nga mitiac negen negengngicfocngina sasawa heitaiyunuma yofi dekpesi ayemmeec, “Messiango dahai fingerudeac dedea?” <sup>5</sup> Ifi kpesiyemmu yofi degec, “Imoc Betreheng taonnu Yudaia prowinsiu. Imocacnoc profetengo yoac yofi ohoc fede, <sup>6</sup> Yuda bangecfu Betrehennac enara mong fingecma is-raengicngacfocna garengyunuudeac taong imoc yudaarenggac taong goa yeneac mamea kpac.” *(Mika 5:2)*

<sup>7</sup> Ifi edegec Herodengo wenac ere ereaunac negen negengngic tembuclu heitaiyunuma asomeng noc nasoac fingerec, imocac naso dindigac negenudeac dekpesi ayemmu edegec. <sup>8</sup> Edegec yeng yofi dema Betreheng amau sueyunuec, “Ngeni kemma sabac dahai fede, imoc hofocma meficgema hama edenugec neng mong ifingoc kemma eweheimibesare.”

<sup>9-10</sup> Ngictaungo ifi deu yeni imoc negemma sinnu kenggec. Kemma asomeng wenac ere ereau henggec, imocngo monggoc fingeru hemma ubangerec toa negemma desogai homac anggec. Nga asomengngo waraiyemmu kengkecma sabac fec, ama imocac witiau heiserima tarec. <sup>11</sup> Taru yeni amau emma sabac nga nonggea Maria yerenggec. Yeremma fafoc heima ngonducnema ye afehegec. Amma finachienginaunac ubangerecaci wiac yofi widicma migec, gol nga hosuc homungkerengagoc amma icsopea homuna gombunga kpara mira. <sup>12</sup> Nga Anutungo yeni Herodearu sing mi dzigenegecdeac gauu goro dema dederecge ayemmu yeni sing monnu sing bangecnginau dzigenegec.

<sup>13</sup> Dzigenema kenggec Kebuac angero mongngo Yosefe gauu fingecmima yofi edeec, “Ge yacma sabac nonggeagoc meyuruma worama Aigita bangecfu kemma kegec. Kecmagec neng edengunubagoc monggoc habisia, nocac Herodengo sabac hofocma meficgema kpehomeudeac dede.” <sup>14</sup> Ifi deu Yosefengo tofocnac imohaingoc yacma sabac nonggeagoc meyuruu Aigita bangecfu kenggec. <sup>15</sup> Kemma ihai kecmagec Herode homeuguc dzigenegec. Nga Anutungo profeteac enacfu yoac faiu yofi deec, “Ni Aigita bangecfunac medacna kpacba haec.” *(Hosea 11:1)*

imoc fora anudeac ifi fingerec.

<sup>16</sup> Anu negen negengngic yeneng Herodeac yoac wagec, ye ifi hemma herebutoa negeneac. Negemma Betreheng nga amabangec imocac weganacfu tarec, imohai wasaingic sueyunuu yeni ngicngac imoc yeneac medac-focngina kifangina yohockang namma made, yeni sasawa yunuhome-dagec. Imoc negen negengngic yeneacunac naso negeneac, imocac sirihau anec. <sup>17</sup> Ifi anu profete Yeremiaaru yoac yofi dedea, imoc fora fingerec.

18 “Raama taonnu kiacsonggong nga ubahodung kuneng fingece. Imoc Rahengo nambaracfora homegec, yeneac kiackecde. Ye nambaracfora homedacgec mong mi kecdaeac demeechai ammigeceac mi negende.”  
(*Yeremaia 31:15*)

19 Anu Herodea homemanuguc Anutuac angero mongngo Yosefe gau fingece yofi edec, 20 “Ge yacma medac nonggeagoc meyuruma Israe bangecfu kenna, medac kpehomebesonga degec, ngic imoc yeni bic homegec.” 21 Ibi deu Yosefengoc efaima yacma medac nonggeagoc meyuruma Aigita bangec wama Israe bangecfu dzigenema kenggec. 22 Kemma Yosefengoc yoacsiduc yomoc meficgeec, “Akeraongo mama Herodeac tatac mema Yudaia prowins, imocac ngictau anec.” Yosefengoc imoc meficgema ihai kecheso kengec kpeec. Nga ye gau goroyoac negeneac Gariraia prowinsiu kenec. 23 Kemma taong mong kpara Nadzaret, ihai emma kegec. Profete yeneng yoac yofi degec, “Ye nadzaretengic, ibi degede.” imoc fora anudeac ibi fingerec.

### 3

1 Naso imohai Yohane dokunadzicngo Yudaia bangec kisiu hama ngicngac mitiyoac edekpou ayemmema 2 yofi deec, “Kurumenggac eucererengngoc bic mewegenengunudeac ngeni ubangina merenggec.” 3 Nga profete Yesaiango Yohaneac yofi ohoec,  
“Bangec kisiu kpakpac mong yofi fingece, ‘Ngeni KEBUAC sing wisima singa heitumeigec.’” (*Yesaia 40:3*)

4 Nga ye wamba kamere dzoeango memea, imoc heima fadenga mong yangseberango memea, imocngo kebangau dzegeec. Amma ye ipua nga kateac kukundzau nekefec.\*

5 Anu Yerusareng ngicngac nga Yudaia prowinsiunac amma Yodang doku wegenacfu bangec tackenec, imohacnac yeni amanene yearu kenggec. 6 Kemma kopocsicngina deficgemagec Yodannu doku nadzicyemmec. 7 Farisaio nga sadukaio homacngo doku nadzicgeceac hagec Yohanengoc yenemma yofi edeyunuec, “Boidzocac gboricfora, ngeni Anutuarunac turunga haudeac ande, imohacnac worageceac merang goroyoac eden-gunuec? 8 Imocac ngeni doku nadzicma ubamerenggac siricfu fora meficgebisia. 9 Nga ge geanggaac yofi mi negengemebesena, ‘Abrahang ye bangecna.’† Anutungoc hoc yomoc naric deu Abrahanggac bangecfora fingeceac, imoc edengunudae.

10 Naka ic haniau bic faigec fede. Nga ic goa fora gombunga mi angandae, imoc sasawa heiu kpeu gerecfu ukugece. 11 Ni uba dzigec dzigeneac doku nadzicngemmede. Nga ngic ngadenau hama kecede, yeng ine Tiri Asu nga gerec nadzicngemmeude. Nga yeac kucngo neac kuc ferahade. Ni ifiangoc yeac hanitabe hesimiba naric mi ngereude. 12 Ye meic meicke saraha mariauw mehama wit seuhagoc meic meicke sobennu feu imoc fima saraha meickeude. Meickema fora mekpedzuc amma ameau faima seuha wanggema gerec piscic pisickea kpac, imohai ukuu dzeude.”

13 Naso imohai Yesungoc Gariraia bangecfunac Yodang dokuu kemma Yohanengoc mitidoku nadzicmiudeac edec. 14 Edeu Yohanengoc imoc negenu naric mi anu deec, “Geng ni naric nadzicennade, imoc ngereede,

\* 3:4: Ngakpia nga fadenga imoc Eriaac ngakpi nga fadeng isoc. 2 Ngictau 1:8 † 3:9: Abrahanggac bangecfora sasawangoc kekecseri megece ibi negensingegec.

ammanu geng nearu hama nadzicgembadeac denec.” <sup>15</sup> Ifi deu Yesungo yofi deec, “Ge yoac imoc wana, faka dindingac sasawa fora fingerudeac yaguc edeguduae, ifi anna ngereuede.” Ifi deu naric dema yoara tofohoc. <sup>16</sup> Nga Yesungo doku nadzicma dokuunac eremanu kurumeng angeec. Anggeu Anutuac Asungo kebesacac siric amma hau hemmanu yearu maec. <sup>17</sup> Mamanu kurumennunac ubaudumeng mongngo yofi deec, “Yomoc songomedacna, ye hensongu ammiduae.”

#### 4

<sup>1</sup> Naso imohai Asungo Yesu wangepma mangana minginango ye to-banggeudeac bangec kisiu hesicke kenec. <sup>2</sup> Kenu Yesungo imohai hadzingto-forec 40 yakasege kecma hereaac homeec. <sup>3</sup> Ifi anu faitobang ngicngo yearu hama deec, “Ge Anutuac Medac fora kecnecfu hoc yomoc dena meremma ic sogong anu.” <sup>4</sup> Ifi deu Yesungo yoac yofi meremmiec,

“Yoac yofi oho ohoya fede, ‘Ngicngo ic sogonggacsac mi kefude, kpac. Ye Anutuac enacfunac yoac ereandesoc, imoc sasawa mema kecbeso.’”  
(*Dedeseri 8:3*)

<sup>5</sup> Ifi deu mangana minginango Yesu hesickema taong kpetiacfu kemma Anutuac womong witiau wi yombong, ihai faiu nanu edeec, <sup>6</sup> “Ge Anutuac Medac fora kecnecfu geanggaoc yomohacnac yuma kemena. Yoac yofi oho ohoya fede,

‘Ye geac amma angerofora uayoac yemmeu yeneng maringina witiau tofo-hogucec hoc mongngo haniga mi herecgeude.’” (*Mitiyegec 91:11-12*)

<sup>7</sup> Ifi deu Yesungo yofi edeec, “Nga monggoc yoac yofi oho ohoya fede, ‘Ge KEBU Anutuga faitobannu mi faibesena.’” (*Dedeseri 6:16*)

<sup>8</sup> Ifi deu mangana minginango Yesu monggoc hesickema tiki buma kuneng monnu emma bangec toa bangec gawamangnginagoc nga kuc kibikperagingina hania hania, imoc edzahema <sup>9</sup> edeec, “Negenna, ge fafoc heima ngonducnema eweheinennadeu yomoc sasawa gembade.” <sup>10</sup> ifi deu Yesungo yofi edeec, “Satang ge meickena. Yoac yofi oho ohoya fede, ‘Ge KEBU Anutuga, ye mocgu eweheimima kingang kpeimbisena.’”  
(*Dedeseri 6:13*)

<sup>11</sup> Ifi deu mangana minginango wama kenu angero yeneng hama Yesu henggareng ammigec.

<sup>12</sup> Ngic yeni yoac yomoc degec, “Yeni Yohane witicamau faigec tacde.” Yesungo imoc negemma Gariraia bangec fu Nadzarete taonnu dzigenec.

<sup>13</sup> Dzigenema Nadzarete wama Seburong nga Naftari yereac bangec Gariraia dzohong tegiau, Kafanaung taonnu tacyac anec. <sup>14</sup> Profete Yesaiango imocac kpefinnu yofi deec,

<sup>15</sup> “Yodang noboc sing doku dzohonnu kende, Seburong nga Naftariac bangec ihai bangec monnunac ngicngac Anutu mi negemmidae, yeneng Gariraia bangec fu kecdae. <sup>16</sup> Ngicngac kundunnu kegcac, yeni kperagi kuneng henggec nga ngicngac homecac bageu bangec fu kegcac, yeneac botuclu kperagia fingerec.” (*Yesaia 9:1-2*)

Yoac imoc fora anudeac ye Kafanaung taonnu tacyac anec. <sup>17</sup> Naso imohai Yesungo ngicngac yoac yofi edekpou ayemmec, “Kurumenggac eucerengngo bic mewegenengudeac ngeni ubangina merenggec.”

<sup>18</sup> Yesungo ifi kpouyemmema kemma Gariraia dzohong tegiau kensikema dacmunac yohockang uficngira dzohonnu ukuma nanec yerene. Imoc

Simong, kpara mong Petoro degec nga munea Anderea. Yeri kondungyang meme ngic kefoc. <sup>19</sup> Yeri yeremma yofi edeyuruec, “Ngeri hama modacnuec. Ngeri kondungyang meandape, ifi isocngoc ngic meyunuecdeac kpoungemechade.” <sup>20</sup> Ifi deu yeri imohaingoc uficngira wama ye modaroc.

<sup>21</sup> Anu imohacnac kemma monggoc dacmunac yohockang, Dzebedaioc madahora, Yohane nga munea Yakobo yerene. Yerenu yeri mangngira Dzebedaioc gombau uficngina memengere amma kecmagec kpacyuruec. <sup>22</sup> Kpacyuruu yeri naso imohaingoc mangngira nga gomba wama ye modaroc.

<sup>23</sup> Yesungo Gariraia ihai bangecsoc yerecema kpekpeturang amanginau kpoukpou ua mema eucererengac siduc gombang dekperagiyemmekefec. Amma ye ngicngac hafei nga kucmamangina hania hania sasawa mengeryunudarec. <sup>24</sup> Ifi anu yeac siducngo kemma Siria prowins sasawa sokodarec. Sokodaru ngicngac yeneng ngicngac hafei hania haniango memanganeyunuec nga kpendzengtoa kpegec amma hadehade nga yafingoc amma goa afonasongina hau ubasufu angandae nga ngicngac hanimaringina homemea, yeni Yesuaru meyunu kendacgec yeng mengeryunuec. <sup>25</sup> Nga Gariraia bangecfunac nga Dekaporisi, imohacnac amma Yerusareng taonnunac nga Yudaia prowins amma Yodang nobocgennac ngicngac habutoango yombong ye modackegec.

## 5

<sup>1-2</sup> Yesungo habutoa yenemma tikiu emma tarec. Tacmanu medacfora yeneng yearu kenggec yeng yoac yofi dema kpouyemmeec. <sup>3</sup> “Ngicngac Asuac songou home homegoc kecandae, yeni kenecnginagoc, nocac kurumenggac eucerereng imoc yeneacnoc. <sup>4</sup> Ngicngac ubahodunggoc kecandae, yeni kenecnginagoc, Anutungo yeninoc meefaiyunuude. <sup>5</sup> Nga ngicngac memaemema kecandae, yeni kenecnginagoc, nocac bangec yomocngo yeneac maridzoming anude. <sup>6</sup> Ngicngac yaka nga dokuac homeandae, ifi isoc dindingac kekecac homeandae, yeni kenecnginagoc, Anutungo yeni imoc gumecyunuu gebecyunuude. <sup>7</sup> Ngicngac ogofocngina yeneac ubamanggang negengandae, yeni kenecnginagoc, nocac Anutungo ifingoc yeneac ubamanggang negenude. <sup>8</sup> Ngicngac ubangina kongaha kecandae, yeni kenecnginagoc, yeni Anutu henggecde. <sup>9</sup> Ngicngac yare menomaneandae, yeni kenecnginagoc, nocac yeni Anutuac nambaracfora deyemmebesonga. <sup>10</sup> Ngicngac faka dindingac angkecdaeac yunumeme ayemmeandae, yeni kenecnginagoc, kurumenggac eucerereng imoc yeneac.

<sup>11</sup> Nga ngeni neac arennu kecdaeac amma ngic yeneng desofoc nga ngunukporac angemmema ikoc amma ngenae negemma yoac mangana hania hania angemmegecde. Yeni ifi angemmegecde, ngeni kenecnginagoc. <sup>12</sup> Bungngina kunengngo kurumennu tomaingina fede. Ngeni imocac ubangerec negemma sogaibisia. Ngicngac yeneng warac profete yunukporac ayemmegec, yeni ifi isoc angemmegecdenoc.

<sup>13</sup> Ngeni bangecngicngac yeneac kondung. Kondungngo kiacma songea kpac anudeu songea monggoc naric mi meficgeude. Kondung ifia, imoc uaya kpac. Imoc eng bangecfu ukuni ngic yeneng haningo tigece. <sup>14</sup> Anu ngeni bangectoa bangec yomocac kperagi. Taong mong tikiu nande, imoc naric mi sufuude. <sup>15</sup> Nga ngic mongngo kifa kpedzereckema pake bageau naric mi faiu tarude. Imoc ine kifa tatahau faiu tacma ngicngac ama manau tacdae, yeni mekperagiyunudarude. <sup>16</sup> Nga ngenae kperagingo

siriha imocngoc amma ngicngac mekperagiyunubeso. Mekperagiyunuu yeni angammemengina gombunga hemma Mangngina kurumennu kecde, ye dengeregedce.

<sup>17</sup> Ngeni yofi mi negembisia, ye dedeseriyoac nga profete yeneac kpoukpouyoac kpeudeac maec. Negenggec, ni yoac kpebadeac mi mayai, kpac. Enacdedea imocngo fora fingerudeac mayai. <sup>18</sup> Foracngoc, bangec nga kurumeng yeri kpac anecde. Nga dedeseriyoacac dzikangabisic mongngo naric mi kpac anude. Dedeseri kibiyoac oho ohoya fede, imoc sasawango foragoc ammanu bangec nga kurumeng wisickeude. <sup>19</sup> Imocac amma yofi ande, mong ye dedeseriyoac yomohacnac wiac kapiabisic mong meickeude amma ogofora ifingoc anggedceac kpouyemmeude, yennoc kurumenggac areng yenearunac ngic mamea yombong demigece. Nga ngic mong ye dedeseriyoac tofohoma ogofora modagecdeac kpouyemmeude, ye kurumennu ngicngac yeneac engena demigece. <sup>20</sup> Ni edengunuba negenggec, ngeni fakangina dindingacngo mitiac negen negengngic nga farisaio yeneac angammeme mi feraheyombonggeudeu ngeni kurumenggac eucererennu naric mi enggedce.

<sup>21</sup> Bangecfocnina nga esangabofocnina yeni yofinoc ede edeyunuya, 'Ge ngicngac mi yunuhomesesena. *(Makekeng 20:13)* Nga mong ye ngic kpehomeude, ye yoacac areng anude.' <sup>22</sup> Neng ine yofi edengunuba, ngic mong ye ogeaac herebu angande, ye yoacfu nambeso. Nga mong ye ogeaac yofi deude, 'Ge ngic irec ireckeac kpac.' Ye yudangic yeneac tutumangtoanginau faibesonga. Nga mong ye ogeaac yofi deude, 'Ge negen negengga kpac.' ye hofeac gerecfu ukugec kemeude. <sup>23-24</sup> Ge imocac amma ubangerecgaac wiac Anutuuru faibeso dema yofi ambesena. Aratau kemma ogoga geac ngaba mekece, imoc negensinadeu ge sesega arata kiwau wana taru kemma ogogagoc yoac mengerena. Mengerena ruae fingerugic hama ubangerecgaac wiac faibesena. <sup>25</sup> Nga ngabagango yoacfu faigubacac ngerahafoc sinnu kemma yegoc dedefic angemema ngaba wabesera. Ge ifi mi annadeu ngabagango desi desingic yearu faiguu yeng keracnatang yeneac mariu faiguu witicamau faigugecde. <sup>26</sup> Ni fora yombong edeguduae, ge witicamau takecma ogogaac turung sasawa hafoangoc kpoumaguc manade.

<sup>27</sup> Anu yoac yofi bic edengunugec fede, 'Ge kaisero mi ambesena.' *(Makekeng 20:14)* <sup>28</sup> Neng ine yofi edengunuba, ngic mongngo ngac mong hemma hensongo ammiude, ye hereango serofaka bic andac. <sup>29</sup> Nga kicga foingo anggenu kopocsic meficgenadeu ge imoc tatahaunac meickema ukuna kembeso. Sebiga tosea kpac anu sebiga hafoangoc hofeu mi ukugecde, imocngo ngereude. <sup>30</sup> Nga marifoigango anggenu kopocsic meficgenadeu ge imoc herecgema ukuna kembeso. Sebiga tosea kpac anu sebiga hafoangoc hofeu mi ukugec kemeude, imocngo ngereude.

<sup>31</sup> Warac yofi dekecgec, 'Ngc mongngo enema wade, ye wawakibi ohoma mibeso.' *(Dedeseri 24:1-4)* <sup>32</sup> Neng ine yofi edengunuduae, enemango serofaka mi ammanu ngic mongngo ye waude, ye serongac anudeac ammiude. Nga ngicngo ifi anu enemango eweenenggac sing ferahema kefude. Amma ngic ye ngac wawaya meude, ye eweenenggac sing ferahema serofaka anude.

<sup>33</sup> Anu bangecfocnina nga esangabofocnina yeni ifingoc yofi bic edeyunuyunuya, 'Ge dedzegegaac dzadzahac mi meickebesena. Nga yoacga Anutuac kicfu seria deserinec, imoc modacbesena.' <sup>34</sup> Neng ine yofi edengunuduae, ngeni yoacngina seriudeac wiac mong kpacma mi

deseribisia. Kurumeng imoc Anutuac amatatac, imocac ngeni kurumeng kpacma yoacngina mi deseribisia. <sup>35</sup> Nga bangec, imoc Anutuac fetec, imocac ngeni yoacngina deserigecdeac bangec mi kpachisia. Nga ngeni Yerusareng imoc ifingoc deserima mi kpachisia nocac imoc Ngictautoa, yeac taong. <sup>36</sup> Nga ge orucdzoga mocgubisic kongac kongac me dzadzu dzadzu menadeacsoc mi annecac orucga kpacma dedeseri dede, imoc ifingoc wabesena. <sup>37</sup> Ngeni yoacngina sasawa yofisac debisia, 'Fora imoc fora nga kpac imoc kpac. Yoacngina yomoc ferahema torokpema degecde, imoc mangana mingina yearunac hade.'

<sup>38</sup> Ngeni yoac mong yofi bic negenggec, 'Ngic mongngo ogeaac kic memanganeudeu yeac kic ifingoc memanganebesonga. Nga mongngo ogeaac enac hetackeudeu yeac enac ifingoc hetackebesonga. Kicac turunga imoc kicngo kpoumibesonga nga enacac turunga imoc enacngo kpoumibesonga.' *(Makekeng 21:24; Sesememe 24:20; Dedeseri 19:21)*

<sup>39</sup> Neng ine yofi edengunuduae, ngicngac mangana angemmegec ngeni turunga mong mi merengyemmebisia. Mongngo munggungga foiu kpeudeu geng munggungga kanau ifingoc sinemibesena. <sup>40</sup> Nga mongngo yoacfu faigubesonga ngakpiga mana meudeu ge ngakpiga witiau ifingoc wamibesena. <sup>41</sup> Nga mongngo igocguma sing kiromita mocgu yegoc kenadeac edeguudeu geng kiromita yohockang yegoc kembesena. <sup>42</sup> Nga ngic mongngo wiac mong minadeac kpesigenu ge imoc mibesena. Nga mongngo gearunac wiac monggac turung ambesonga dema kpesigenu wiacga mi gerebesena.

<sup>43</sup> Yoac mong yofi fede, ngeni imoc warac bic negenggec, 'Ngicngac gegoc wegena kecdae, yeni heresongogoc hoangyunubesena' *(Sesememe 19:18)* amma ge ngabafocga ngadeyunubesena. <sup>44</sup> Neng ine yofi eden-gunuduae, ngeni ngabafocngina heresongogoc hoangyunubisia amma ngicngac ngunukporac angemmeandae, yeneac numubisia. <sup>45</sup> Ngeni ifi amma Mangngina kurumennu kecde, yeac nambarcfora kecgecde. Ye wenaha uayoac miu mocngo ngic gombunga mangana yeneac amma ereude. Nga ye ngic dindingac nga ngic faka dindingac mi angandae, yeni momocngoc kia yemmeude. <sup>46</sup> Nga ngicngac yeneng ngeni heresongogoc hoangngunugec ngeneng yeni heresongogoc hoangyunugecdeu faka imocac buma mong mi fingerude, kpac. Takesimeme ngic yeneng imoc ifingoc angandae. <sup>47</sup> Ngeni dacmunafocngina yeneac edoc bedoc ayemmegecdeu imoc faka engena kpac. Bangec monnunac ngicngac Anutu mi negemmidae, yeni ifingoc imoc angandae. <sup>48</sup> Imocac amma ngeni yofi ambisia, kurumeng Mangngina ye dindingac kecde nga ngeni ifingoc ye isoc dindingac kecbisia."

## 6

1 "Ngeni ngicngac yeneng ngenemma dengerengunugecdeac yeneac kicfu faka gombunga mi angkecbisia, kpac. Ngeni ifi anggecdeu kurumeng Mangngina yearunac faka gombunggaac buma mong mi megecde. Ifi fingebacac henghomema kecbisia. <sup>2</sup> Imocac ngicngac makpekpea ubangerecac wiac yemmenec, imohai ngicngac yeneng trampet udumengtoayagoc geac amma fificgecdeac mi edeyunubesena. Ngic ikoha goa yeni kpekpeturang amau me singtoau ngicngac yeneng dengeryunugecdeac ifi angandae. Ni fora edengunuduae, ngic ifia yeni bungngina hafaoganc bic megec.

\* **5:41:** Yesungo mail deec. Roma yeneac mail imoc kiromita mocgu nga noboha isoc.

<sup>3</sup> Ge ngicngac makpekpea ubangerecac wiac mong yemmenade, imohai ine marifoigango wiac anu kanagango imoc mi negembeso. <sup>4</sup> Ge ifi amma ubangerecac wiac mong yemmenade, imocngo sufuu sufuu femanu Manggac wiac sufuu hengande, yennoc buma genude.

<sup>5</sup> Anu ngeni numubesonga dema ngic ikoha yeneng angandae, ngeni ifi isoc mi ambisia. Yeni kpekpeturang amau nga singtuturunnu numuma nanggec ngic yeneng yenemma dengereyunugecdeac songo negengandae. Foracngoc, yeni bungngina hafoangoc bic megec, imoc edengunuduae. <sup>6</sup> Ge numubesonga dema, imohai ine amaga mana kapiiau emma naguga heima Manggac sufuu sufuu kecde, ye numumibesena. Ifi anna Manggac faka sufuu sufuu hennengeng angande, yeng buma genude. <sup>7</sup> Nga ngeneng numubeso dema, bangec monnunac ngicngac Anutu mi negemmidae, yeneng numuandae, ngeneng ifi isoc mi numubisia, kpac. Yeni nunumu herea negengisinga kpac eng numuandae. Amma yoacngina homac osokecdaeac amma negenggec nunumunginango foragoc anude. <sup>8</sup> Imocac ngeni yeni isoc mi ambisia. Ngeni mi numumimagec Mangngina yeng ngeni noc wiacac kpedadangeandae, imoc bic nengenude.

<sup>9</sup> Ifi anu ngeni yofi numubisia, 'Kurumeng Mannina, geac kpac kpetiac febeso. <sup>10</sup> Nga eucererengga hanemmebeso. Kurumennu geac songo nga negen negeng modacgec fede, siriha imocngoc bangecfu nenearu fingecbeso. <sup>11</sup> Ge yaguc yaka socnina nemmena. <sup>12</sup> Nga neni ngic yeneac kopocsic waandimbe, siriha ifingoc kopocsicninaac turunga wanemmena. <sup>13</sup> Ge faitobannu mi fainununa nga manganaunac mesinunubesena.'

<sup>14</sup> Ngeni ngicngac mangana angemmegec ngeni yeneac kopocsic wagecdeu kurumeng Mangnginango ngeneac kopocsic ifingoc waude. <sup>15</sup> Amma ngeni ngic yeneac kopocsic mi wagecdeu ine Kurumeng Mangnginango ngeneac kopocsic ifingoc mi waude.

<sup>16</sup> Anu ngeni yaka segekecma ikocngic yeneng angandae, ifi isoc mi ambisia. Yeni yakasege kecdae, naso imohai ngicngo yenenggecdeac kicnangengngina huringaiande. Foracngoc, ngic ifia yeni bungngina hafoangoc bic megec, imoc edengunuduae. <sup>17</sup> Ge yakasege kecma orucga kerec nadzicmima kicmesuga dzuacbesena. <sup>18</sup> Ifi anna ngic yeneng ge yakasege kecne, imoc mi negentegecmagec Manggac mi hengena kecde, yengsac nengenude. Amma Manggac angammemega sufuu sufuu hengkecde, yengsac buma genude.

<sup>19</sup> Bangecfu dzaukpadzadzanggo dzofinacngina kirecgeande nga hufengngo wiacngina meande amma hamangecngic yeneng ama hetackema wiacngina meandae. Imocac ngeni bangecfu dzofinacngina mekpedzuc mi ambisia. <sup>20</sup> Ngeni dzofinacngina kurumennu mekpedzuc ambisia. Imohai dzaukpadzadzanggo wiacngina mi kirecgeude nga wiacngina hufengngo mi meude amma hamangecngic yeneng imohai naric mi hetackema wiac megecde. <sup>21</sup> Ge dzofinacga fede, imohai songoga ifingoc feude.

<sup>22</sup> Kicga imoc sebigaac kifa nga kicgango gombunga feudeu sebiga sawa mekperagidarude. <sup>23</sup> Nga ge kickerec me kicmangang me kicgango manganeudeu ine sebiga sasawa kundung kpeude. Nga kperagi gearu fede, imocngo kundung kpeudeu kundungtoa yombong fingecgenude.

<sup>24</sup> Ngic mongngo ngic kuneng yohockang yereac kingang naric mi kpekefude, kpac. Ye monggac songo negemma mong ngadeheude me monggaru



kpeketahema mong waude. Ngeni naso socfungoc Anutu nga dzofinac yereac kingang naric mi kpegecede.

<sup>25</sup> Imocac amma yofi edengunuduac, ngeni nenedokuac dema kekecnginaac defagung amma yofi mi debisia, 'Neni noc yaka nema kecnide?' me sebinginaac negemma, 'Noc wamba heima kecnide?' Negenggec, kekecngo yaka feraheude nga sebingo ine ngakpikporuc feraheude. <sup>26</sup> Ngeni sawau neng yenenggec. Yeni heikpenec me netohong mong mi angkecgec Mangngina kurumennu kecede, yeng yaka eng yemmeude. Nga ngeni isinggema negembisia, ngeneng Anutuac kicfu neng yeneac engena andae. <sup>27</sup> Nga ngenearunac mongngo dewaidzoc amma kefu imocngo kekecnasoya kapianec monggoc naric mi mehereeude, kpac. <sup>28</sup> Anu ngeni nocac negenyohoc amma yofi deandae, 'Neni noc wamba mema mekecni?' Ngeni dzaring amasobennu eng tohoandae yenembisia. Yeni witic mi yumuma uatoa mi mema sifu yadiandae. <sup>29</sup> Nga ngictau Saromo ye warac wamba kibia gombunga gombunga heikefec, yeac kibikperagitoayango ine dzaring yeneac kibi kereng kereng mi feraheec, imoc edengunuduac. <sup>30</sup> Nga dzaring amasobennu eng tohoande, imoc yagucacsac fingeru wereckengau herecgema gerecfu ukugecde. Nga Anutungo dzaringtehec ifia wamba heiyemmeudeu ye ifingoc ngicngac ngeni negen negensingngina kapia fede, ngeni ngakpi kporucngina torokpeu torokpeu ngenemmeude.

<sup>31</sup> Imocac amma ngeni dewaidzoc amma yofi mi debisia, 'Neni noc nenedoku nenide me noc wamba heinide?' <sup>32</sup> Bangec monnunac ngicngac Anutu mi negemmidae, yeneng imoc sasawa megecdeac negen negengngina imohai faigec fekecede. Nga Kurumeng Mangnginango ngeni wiac sasawa kpedadangeandae, imoc bic negenude. <sup>33</sup> Imocac ngeni warac warac yombong Anutuac eucerereng nga yeac faka dindngac meficgegecdeac uatoa mebisia. Ngeni ifi anggec yeng wiac sasawa imocnoc ifingoc torokpeu torokpeu ngenemmeude. <sup>34</sup> Ifi anu ngeni wereckenuac dema negenyohoc mong mi ambisia. Wereckenu ye yengenaoc negenyohoc angemeude. Uameme tambuc tambuc ye yengenaoc ebihac siriha ebihac mebeso, imoc soha ande."

## 7

<sup>1</sup> "Ngic yeneng ngeneac faka isinggema desingunubauac ngeni ngic yeneac faka isinggema mi desiyunubisia. <sup>2</sup> Imoc yofiac, ngeni ngic isingyunuma yoacngina desiandae, siriha ifiangoc yeneng isingngunuma ngeneac yoacngina desigecde. Nga ngeni wiac kpetea isinggema imocacsoc ngicngac wiac yemmeandae, yeni siriha ifiangoc kpetea isinggema turung kpoungemmegecde. <sup>3</sup> Ge ogogaac kicfu gocbisc tacde, imoc henganec amma geangga kicfu ine ic kebanga fede, imoc mi hentegecneac, faka ifia imocngo mi ngereede. <sup>4</sup> Geangga kicfu ic kebanga femanu ogogaac deannec, 'Naric negemmana kicgau goc tacde, imoc meickeba.' <sup>5</sup> Ikocngic, ge geangga kicfu ic kebanga fede, imoc meickemaguc ogogaac kicfu gocbisc tacde, imoc naric hentegecma meickenade.

<sup>6</sup> Ngeni wiac mong kpetiac dedea, imoc kasi mi yemmebisia nga kubungina imoc berec yenuaru mi ukubisia. Kasi yeneng dzigenema nginibauac nga berec yeni imoc haningnango tidzamebauac.

<sup>7</sup> Ngeni turunga fingecngemmeudeac numuma kecbisia nga wiac meficgegecdeac hofocma kecbisia. Amma nagu witingemmeudeac nagu heima kecbisia. <sup>8</sup> Ngic mong ye numukecde, yeng wiac meude



nga hofockecdengo wiac meficgeude amma naguu heikecede, yeac nagu witimigece. <sup>9</sup> Ngenearunac ngic mong medahango yakaac kpesimiu yeng hoc naric mi miude. <sup>10</sup> Me kondungyanggac kpesimiu boidezoc mangana naric mi miude. <sup>11</sup> Ngeni ngic fakangina manganagocngo sifu nambaraefocngina ubangerecac wiac gombunga yemmegecedeac negentegecdae. Imocac ngeni yofi negembisia, Kurumeng Mangnginango ngenac faka gombunga imoc homac ferahaude. Ngeni yearu wiac monggac kpesigec yeng wiac gombunga torokpeu torokpe ngemmeude.

<sup>12</sup> Nga ngic yeneng noc faka angemmegecedeac negensiandae, ngeni faka siriha imocngoc ayemmebisia. Imocnoc dedeseriyoac nga profeteyoacac hania.

<sup>13</sup> Ngeni nagu kapiau emma kengkecbisia. Imoc yofiac, manganaac sing imocac naguya kuneng nga sing imoc singtoa amma ngicngac homacngo sing imoc modacma kengkecgec kecma kpetotieyunugece. <sup>14</sup> Nga kekecac sing imocac naguya kapia nga sing imoc fofonga anu ngicngac efeanecngosac imohai kengkecma kekec fora meficgegece.

<sup>15</sup> Profete ikoha yeneng memanganengunubauac ngeni yeneac henghomema kecbisia. Yeni sebinginango rama sebi nga ubanginango ine katekasi anu yeni godzuac arennu iwaingina wangecngunugecedeac ngenearu hagece. <sup>16</sup> Nga forangina fingectegeru, ngeni imoc hemma negengyemmegece. Ngic yeni kemma witic waeyagoc, imohacnac waing fora naric mi mesigece. Amma fareng nga gberafecfunac fig fora naric mi megece, imoc negendae. <sup>17</sup> Nga ic gombunga sasawa, yenearunac fora gombunga fingerude nga ic manganaunac ine fora mangana fingerude. <sup>18</sup> Nga ic gombunga imohacnac fora mangana fingec fingec mi fede. Nga ic manganaunac fora gombunga naric mi fingerude. <sup>19</sup> Ic mong foraya gombunga mi fingerudeu imoc kperecgema gerecfu ukugece. <sup>20</sup> Ifi anu ngeni profete ikoha yeneac forangina hemma naric negentegecyunugece.

<sup>21</sup> 'Ngicngac Kebuna, Kebuna.' ifi denengandae, yenearunac sasawango kurumenggac eucererennu naric mi enggece. Manna kurumennu kecede nga ngicngac yeac songo nga negen negeng modacma kedcae, yeneng ihai enggece. <sup>22</sup> Nga naso imohai ngicngac homacngo edenugece, 'Kebu, Kebu, neni geac kpacfu profeteyoac deing amma hadehade nga yafing kporacyunuing amma faka kuhagoc homac meing, ge imoc sifu negennec.' <sup>23</sup> Ifi degec yofi yombong edeyunubade, 'Ni ngeni mi negengngunuduae. Dedeseriyoac kpekpengic, ngeni neac kicfunac meickegec.'

<sup>24</sup> Ngic mong ye yoacna yomoc negemma tofohoande, yeng ngic irec ireckea nga ngic amea peperandzi witiau meec, ye isoc. <sup>25</sup> Ye ameaac hania peperandzi witiau nanecac serima taru kiafirangtoa kpeu tungbaungngo hama ama imoc naric mi kpembarackeude. <sup>26</sup> Nga mong ye yoacna yomoc negemma mi tofohoude, yeng ine ngic negen negenga kpac nga ngic amea sangiu meec, ye isoc. <sup>27</sup> Kia kpeu tungbaung nga firangtoa kpema ama imoc kpembarackema medidinggeu makpeude."

<sup>28</sup> Yesungo yoac yomoc deu wisickeu ngicngac habutoa yeneng kpoukpouyaac amma kerectegec anggec. <sup>29</sup> Nocac yeng mitiac negen negengngic yeneac dede isoc mi deec, kpac. Ye ngic uakibi mekecede, yeac siricfu kpoukpou ua kuhagoc meec.

## 8

1 Yesungo tikiunac mamamu habutoa kuneng yombongngo ye modagec.  
2 Modacmagec ngic mong kukuseriagocngo hama fafoc heimima deec,  
“Kebu, ge negenna naric anu medzuacnubang.”\*

3 Ifi deu Yesungo maria sinema ngic kpeserema yofi edeec, “Ge ngereenadeac songona fede.” Deu imohaingoc sebina ngereeu hafeia kpac anec. 4 Nga Yesungo yofi edema deraheec, “Ge sebigau faka fingeccac, imocac ngic mong mi edebesena. Ge womong gareng yearu kemma sebina edzahena. Edzahema Mosengo seseac deec, imoc modacma imocac sirihau faina yeneng sesega imoc hemma negentegecgecde.”

5 Anu Yesungo Kafanaung taonnu emmanu wasaigareng mongngo hama meficgeudeac desambic amma deec,† 6 “Kunenna, enac tofoc tofoho medacna ye hanimaria homemea amma ye amau kpendzengtoa kpema fema kecce.” 7 Ifi deu Yesungo yofi edeec, “Ni naric hama mengerebade.” 8 Ifi deu wasai garengngo yoac yofi meremmiec, “Kunenna, ni noc gombunnaac amawarocnau erenade. Ge yoacgangosac dena enac tofoc tofoho medacna ngereede. 9 Imoc yofi, ni ngic kucnginagoc yeneac bageu keccuae. Nga neac bageu wasaifocna keccae. Yenearunac monggac kenna deba ye kenude. Ni yenearunac monggac hana deba haude. Nga wanacngicnaac ua yomoc mena deba ye imoc meude.”

10 Ifi deu Yesungo imoc negemma kerectegec amma ngicngac modagec, yeni yofi edeyunuec, “Foracngoc, Israe bangeccu ngicngac negen negensingina seria yofia mong mi henai, imoc yeac henduae. 11 Imocac yofi edengunuduae, ngic homacngo wenac ere ereaunac nga wenac keme kemeaunac hama Abrahama nga Isaka amma Yakobo yenigoc kurumenggac eucererenu yenhafoc tacma neneyaca negecde. 12 Nga Anutungo warac warac yengena eucererenggac areng deec, yeni ine ngadeau kundunnu ukuyunuec kemegecde. Kemema ihai kiacma enacngina kisaranggema keccgecde.”

13 Ifi dema wasaigareng yofi edeec, “Ge kenna, negensingenecmoc, imoc fora fingeccenude.” Anu wenac naso imohaingoc enac tofoc tofoho medaha ngereec.

14 Anu Yesungo Petoroac amau emma Petoro sefenango sebigerec ammiu feu henec. 15 Hemma mariahu mema kpesereu sefena hafeia kpac anu yacma yenenggareng ayemmeec.

16 Marai anu imohaingoc ngicngac yeneng ngicngac hadehade nga yafingoc homac Yesuaru meyunuu hagec. Hagec, yeng yoac dema asu mangana kporacyunuma hafeingingoc sasawa mengereyunuec. 17 Profete Yesaiango warac yofi deec, “Yeng nenang kucmamanina meickema hafeinina atickeec.”

(Yesai 53:4) imoc imohai fora fingerec.

18 Ngicngac habutoango Yesu oronggec ye ifi yenemma medacfora edeyunuec, “Nenang dzohong noboc kenni.” 19 Ifi demanu mitiac negen negengngic mongngo hama edeec, “Kpoukpou, ge ihai me ihai kennadesoc ni modacguma gegoc kembadeac negenduae.” 20 Ifi deu Yesungo yofi deec, “Katekasi yeni bangec manau fefengingoc nga sawau neng yeni faecnginagoc nga ngicac Medacngo ine kparicngac kpac, ifi kecce.” 21 Deu

\* 8:2: Mongngo kukuserigoc sebina wonongagoc dekecgec. Ngic homacngo hafei ifia mi megecdeac kukuseriagoc yeni ama ngadeau kecbisia. Imoc Moseac dedeseriyoacfu oho ohoya feece. † 8:5: Wasaigareng yomoc yeac bageau wasaingic 100 isoc keccgec. Wasaingic garengnginagoc yeni bangec monnunac.

medacfora yenearunac mongngo deec, “Kebu, negennemmana kemma manna tonggomaguc modacgubade.” <sup>22</sup> Ifi deu Yesungo ine yofi edeec, “Ge homemea wayununa yeni yenaocngoc tonggoemegec. Nga geng ine ni modacnuna.”

<sup>23</sup> Yesungo gombau enu medacfora yenhafoc gombau emma kenggec. <sup>24</sup> Kemmagec firang kucgoc kpeu siritembongngo gomba feraheu kemebesonga anec nga Yesungo ine gau feec. <sup>25</sup> Feu medac yeneng Yesuaru kemma midima degec, “Kebu ge ongonnununa, neni kemebesoo andimbe.” <sup>26</sup> Ifi degec yeng yofi edeyunuec, “Ngeni negen negensingngina kapiancec fede, ngeni kengec mi ambisia.” Ifi dema firang nga dzohong kpetariyemeru firang kpac anu dzohong ye ning kpema eng feec. <sup>27</sup> Feu ngic yeni kerectegec amma kpesiemegec, “Ye noc ngic? Firang nga dzohongtoa yereng yeac enara tofohodape.”

<sup>28</sup> Anu yeni dzohong noboc gadarancic, yeneac bangecfu kensikemagec ngic yohockang hadehadengiragocngo kicsereunac haoc. Yeri wasai yombong, imocac ngicngac yeni imohacsing susuferegec mi ankecgec. <sup>29</sup> Nga yeri ihai namma kpacma deoc, “Anutuac Medac, neneac wiac imoc geac mi ande. Nasonina mi hamanu ge kpendzeng monnu mi fainunubesena.”

<sup>30</sup> Anu edibigeng berechabu mong kuneng yeni surukpema kecmagec <sup>31</sup> hadehade yeneng yofi dema Yesu desambic ammigec, “Ge kporacnununade isoc, berechabu yenearu suenununa kemebisina.” <sup>32</sup> Ifi degec yeng yofi edeyunuec, “Ngeni meickegec.” Deu yeni meickema erema berechabu yenearu kemegec berec yeni hafaogoc fagannunac nedzima dzohonnu kemema doku nema homedacgec. <sup>33</sup> Homegec berecgareng yeneng kengec worama taonnu kemma faka imocac siduc sasawa ayem-megec. Ayemmedacma ngic hadehadengiragoc yerearu faka fingerec, imocac ifingoc edeyunuec. <sup>34</sup> Edeyunuec taong imocac ngicngac sasawango Yesu meficgegecdeac kemma hemma amabangecngina waudeac edegec.

## 9

<sup>1</sup> Yesungo gombau emma dzohong ferecgecema yengena taonnu kensikeec. <sup>2</sup> Kensikeu yeni ngic mong hanimaria homemea dzakeu faima tofohoma hagec. Hagec Yesungo negen negensingngina hemma ngic puringa yofi edeec, “Medacna, ge ubaga ngereeu, kopocsiga imoc bic wawaya.” <sup>3</sup> Ifi deu mitiac negen negengngic goa yenaocngoc negensigec, “Ngic yomoc ye Anutu emmide.” <sup>4</sup> Ifi negenggec Yesungo negen negengngina hemma yofi deec, “Ngeni ubanginau negen negeng mangana mi negensigec. <sup>5</sup> Yoac damocngo efea ande, ‘Kopocsiga bic kpac ande.’ ifi debesonga me ‘Ge yacma kenna.’ <sup>6</sup> Ngicac Medac ye bangecfu kopocsic wawaac uayoac nga kuc femide. Nga ngeni imoc negengecdeac amma yoac yomoc deduae.” Ifi dema ngicpuring yofi edeec, “Ge yacma dzakega mema amagau kenna.” <sup>7</sup> Ifi deu ngic ye yacma ameau kenec. <sup>8</sup> Kenu ngicngac habutoa nanggec, yeneng imoc hemma kerectegec amma kengecyunuec. Anutungo uayoac kuhagoc ifia ngicngac yemmeec, yeni imoc hemma Anutu dengeregec.

<sup>9</sup> Yesungo imohacnac feregec kemma takesimemengic mong kpara Mataio, ye takesimeme amau taru hemma yofi edeec, “Ge hama modacnuna.” Ifi deu yacma modarec. <sup>10</sup> Anu Yesungo Mataioac amau emma yaka netacmanu takesimeme nga manganameme ngic homacngoc hama Yesu nga medacfora yenigoc tacma yaka yenhafoc negec. <sup>11</sup> Nema tacgec farisaio

yeneng imoc hemma Yesuac medacfora kpesiyemmegec, “Kpoukpoungina ye nocac manganameme ngic nga takesimeme yenigoc tacma yaka nede?”

<sup>12</sup> Ifi degec Yesungo imoc negemma yofi edeyunuec, “Ngicngac kuchafeingina kpac kecdae, yeni dotaac mi ayemmeande. Hafeinginagoc, yeneng ine dotaac ayemmeude. <sup>13</sup> Ngeni kemma yoac yofi fede, imocac negen negeng megec,

‘Ni sesegerec meandae, imocac mi anende. Ngicngac wosoefac angemeandae, imocac anende.’

(*Hosea*  
6:6)

Imoc yofiac, ni ngic dindingac kpacyunubadeac mi mayai, kpac. Ni ine ngicngac kopocsicnginagoc kpacyunubadeac mayai.”

<sup>14</sup> Naso imohai Yohaneac medacfora yeneng hama kpesimigec, “Neni nga farisaio naso homac yakasege angandimbe amma geac medacfocga yeni nocac yaka sege mi angandae?” <sup>15</sup> Ifi degec Yesungo yofi edeyunuec, “Memeturanggac ngicngo ogofora yenigoc kecmanu yeni ubahodung naric mi anggecde, kpac. Nga kecma naso monnu memeturanggac ngic yenearunac meickegecde, naso imohai ine yakasege anggecde. <sup>16</sup> Ngac mong ye ngakpi eseau kporucsusuc gboria mong faima mi kpebiude, kpac. Ye gboria ifi faiudeu gboriango esea taiu dzamema titingtoa fingerude. <sup>17</sup> Nga ngic mongngo waing gboria bokong yangseberango memea eseau mi kpeu kemeude, kpac. Ifi anudeu waing gboriango bokong esea imoc tindziru manganeu dokuya maude. Imocac waing gboriango bokong gboriau kpegec yerahafoc naric tarecde.”

<sup>18</sup> Yesungo yoac imoc edeyunuma tacmanu gareng mongngo yearu hama fafoc heima ewehaiheigoc edeec, “Ni naroanna yaguc homedac. Geng hama mariga witaui faina gboriude.” <sup>19</sup> Ifi deu Yesungo yacma kenu medacfora ifingoc yenhafoc modacma kenggec. <sup>20-21</sup> Kemmagec ngac mongngo ngadenginau modacyunuma kenec. Ye kifa 12 sacherec kefecac amma hama negenec, “Ni Yesuac ngakpiasac kpeserebadeu ngerec ngeree meficgebade.” ifi negemma ngakpihereha susiaac witiha kpesereec. <sup>22</sup> Kpesereu Yesungo dzigene hemma yofi edeec, “Ngac, ge ubaga ngereu. Negen negensingganc mengeregudac.” Ifi demanu ngac ye imohaingoc ngereec.

<sup>23</sup> Anu Yesungo kemma garenggac amau kensikema emma kungac fifi fifi areng amma ngicngac habutoa kpeboronggina negemma yofi edeyunuec, “Ngeni yomohacnac meickegec. Naroang ye mi homedac, ye gau fede.” Ifi deu yeni deendema ammima dzomoremigec. <sup>25</sup> Dzomoremima meickema mamagec, Yesungo naroang feec, ihai emma naroanggac mariaui mema miaru gborima yarec. <sup>26</sup> Yaru siduc imocngo bangec imoc sokodarec.

<sup>27</sup> Yesungo bangec imoc wama kemmanu ngic yohockang kicngira pispic pispickeango Yesu modacma arohoma kpacambic ammima deoc, “Dawidiac bangeha, ge nereacnac ubaga manganeu.”\* <sup>28</sup> Ye amau emmanu kicpispic yohockang yereng yearu kenec yeng yofi kpesiyemerec, “Neng faka ifia mebadacsoc anduae, ngeri imoc negensinggedape me?” Ifi deu yereng deoc, “Oc Kebu, imoc negensinggedipe.” <sup>29</sup> Ifi deec kicngira kpeserema yofi deec, “Negen negensingngiraac fora fingecongemeru.” <sup>30</sup> Ifi deu kicngira tegerec. Tegeru wiac fingeocyemerec, imoc ngic mong mi edeecedac dederac

\* **9:27:** 2 Samue 7:12-16 Anutungo Dawidigoc yoac dedzege yofi anec. Ngic mongngo geac arenunac naso wisic wisickea kpac geac tatacfu tarude. Imocac yeni Yesuac Dawidiac bangeha degec.

ayecmeec. <sup>31</sup> Nga yereng ine kemma siduha imoc deyadiac amasoc negendacgec.

<sup>32</sup> Anu yeri kemmaec ngicngac yeni ngic mong yoara kpac nga hadehadeagoc Yesuaru mehagec. <sup>33</sup> Mehagec yeng hadehade kporacmiu ngic ye yoac deec. Deu ngicngac habutoango imoc hemma kerectegec amma degec, “Israe bangecfu faka ifia warac mong mi fingeru hening.” <sup>34</sup> Ifi degec ine farisaio yeneng degec, “Ye hadehade yeneac ngictaunginaac kucfu hadehade kporacyunuma kecede.”

<sup>35</sup> Yesungo taong nga amabisis sasawau yerecgema kpekpeturang amanginau emma edekpou ayemmema eucererengcac siduc gombung dekperagima hafei hania hania nga ngicngac kucmaminganagoc sasawa mengereyunudarec. <sup>36</sup> Nga habutoa yeni demadzac nga kucmama amma rama garenggina kpac, ifi isoc kecgec. Imocac amma Yesungo yenemma ubea manganeu <sup>37</sup> medacfora yofi edeyunuec, “Semeng fora homacngoc kpauedac fede nga uangic ine efanecsac kecdae. <sup>38</sup> Imocac amma ngeni Kebu, semeng mingina numumima yofi edebisia, ‘Ge ua ngic sueyununa yeneng kemma foraga mekpedzuc ambisia.’”

## 10

<sup>1</sup> Yesungo medacfora 12 kpacyunuu hagec ngicngac yeneanunac asu seuhagoc kporacyemmegecdeac uayoac yemmmeec nga hafei hania hania amma ngicngac kucmaminganagoc sasawa mengereyunugecdeac uayoac kuhagoc yemmeec. <sup>2</sup> Aposoro 12, yeneac kpacgina yofi, Simong kpara mong Petoro nga munea Anderea amma Sebedaioc medahora Yakobo nga munea Yohane. <sup>3</sup> Firipo nga Batoromaio nga Toma amma takesimemengic Mataio, Yakobo Arifaioac medac nga Tadaio <sup>4</sup> Amma Simong Kananaio amma Yuda Kariotonac. Ngic yeng kecma Yesu kerereu megec.\*

<sup>5</sup> Yesungo medacfora 12 imocnoc sueyunuma yoac yofi dema edeyunuec, “Ngeni bangec monnunac ngicngac Anutu mi negemmidae, yeneac bangecfu nga samariangic yeneac taonnu mi kembisia, kpac. <sup>6</sup> Israehabuu ngicngac rama sufu sufuya, ifi isoc kecdae, ngeni yenearu kembisia. <sup>7</sup> Ngeni kemma yofi dekperagiyemmebisia, kurumenggac eucerereng imoc bic mewegenengunude. <sup>8</sup> Ifi dekperagiyemmemma ngicngac hafeigoc mengereyunuma homemea megboriyunubisia nga kukuserigoc sebingina ngereudeac mengereyunuma hadehade nga yafing kporacyunubisia. Ni kuc imoc ubangerecac nga buma kpac ngemmedua, imocac amma ngeni ubangerecac nga buma kpac memefic imoc yemmebisia.

<sup>9</sup> Ngeni dzo gol nga siriwa nga kopango† memea, imoc mi meficgebisia nga wiac ifia fadeng nabehau mi faima mekecbisia. <sup>10</sup> Ngicngac yeneng ua mekecmagec ua imocngo yakangina meficgebese, faka imoc ngereude. Imocac ngeni singgac hie me ngakpi yohockang me hanitabe me yasu mong mi mekembisia. <sup>11</sup> Amma taong me amabangec monnu kenggecde, ngeni imohai ngic mong yegoc tacgecdeac sircic ande, ye meficgebisia. Meficgema yegoc tacyac anggec wisickeu faima kembisia. <sup>12</sup> Ngeni ama imohai emma wenacngerec ruaeyoacgoc debisia. <sup>13</sup> Ifi degec ama imoc ruae naric meudeac siriha anudeu, ruaengo ama imohai hama feude. Nga ama imoc ye ruaea naric mi meudeac siriha anudeu ruae imocngo ngenanggaru

\* **10:4:** Simonggac kpara mong Dzerote. Ruka 6:15. † **10:9:** kopa imoc aieng siriha mong karaya saccsac 1 nga 2 toea isoc.

monggoc dzigenengemmeude. <sup>14</sup> Nga mongngo mi hoangngunuma yoacngina mi negenudeu ngeneng ama me taong imoc wama haninginaunac yube kpegec mau kembisia. <sup>15</sup> Foracngoc, kecma ising ising nasotoau taong imocac ngicngac yeneac ebicngo Sodong nga Gomora taong, yereac ebic fraheude, imoc edengunuduae.

<sup>16</sup> Negendae, rama yeneng katekasi yeneac botucfu kecdae, ni siriha imocacsoc suengunuduae. Imocac ngeni boidzoc isoc negen negentegecnginagoc kecbisia nga kebesac neng, yeni isoc manganangina kpac kecbisia.

<sup>17</sup> Ngeni ngic yeneac negentegecma kecbisia. Yeni yoacfu faingunugecde nga kpekpeturang amanginau dzikacngo ebiria ngunugecde. <sup>18</sup> Nga ngicngac yeni neac amma mengunuma kemma gawana nga ngictau yeneac kicfu faingunugecde. Ifi anggec ngeneng yeni nga bangec monnauac ngicngac Anutu mi negendae, ngic imoc momoc siduc gombung dekperagiyemmebisia. <sup>19</sup> Nga ngicngac yeneac kicfu faingunugec yoacfu nanggecde, imohai ngeni noc yoac degecde me dafi degecde, imocac negengyohoc mong mi ambisia. Kebungo naso imohainoc yoac ngemmeu ngeni imoc debisia. <sup>20</sup> Ngeni naso imohai ngenaoc yoac mi degecde, kpac. Mangnginaac Asungo yoac enacnginau faiu imoc degecde.

<sup>21</sup> Imohai dara mongngo munea enara yeneac mariu faiu yeneng ye homecfu faigecde nga manggac mongngo faka imocngoc medahaac anude. Nga nambarac yeneng nonggo mangfocngina deengdema ayemmema homecfu faiyunugecde. <sup>22</sup> Nga neac kpacac amma ngicngac sasawa yeneng ubango ukungunugecde. Nga ngic mong ye seserigoc kecmanu nasotoa haude, yeng komoc kpeude. <sup>23</sup> Ngeni taong monnu kegcgc ngicngac yeneng ngunukporac angemmegec ngeni taong imoc wama worama monnu kembisia. Foracngoc, ngeni Israe bangecfu taong sasawa fekede, ihai uana mi mesimagec Ngicac Medacngo haude.

<sup>24</sup> Negen negeng medac mongngo kpoukpouya yeac engena mi anude nga wanacngic mong ye mingina yeac engena mi anude, kpac. <sup>25</sup> Negen negeng medac ye kpoukpouyaac siric isoc ambeso nga wanacngic ye minginaac siric isoc ambeso, imocngo naric anude. Nga amaac enara yeac Bedzeburu demigec isoc amafora ngenearu kpac ifia mangana monggoc kpacngunugecde.

<sup>26</sup> Wiac mong sangoyagoc fede, imoc kecma nonongkac fingectegerude nga wiac sufu sufuya fede, imoc negendacgecde. Imocac ngeni yeneac mi kengecngunubeso. <sup>27</sup> Ni tofocnac nasou yoac edengunuduae, ngeni imoc kperagiau debisia. Nga sangicfu kedzacnginau dedea, ngeni ama witiau namma imoc deyadigec negendachisia. <sup>28</sup> Ngicngac yeni sebingina kpehomema ubaongangina naric mi kpehomegecde, ngeni yeneac mi kengecngunubeso. Anutungo sebi nga ubaonga yerahafoc hofeu memanganeude, ngeni yeac ine damungunubeso. <sup>29</sup> Ngicngac yeni nengbiscic yohockang faigec toea mocgu sacsacngo bummeandae. Nga neng yeneacrunac mongngo bangecfu makpeu Mangnginango imoc bic negenude. <sup>30</sup> Nga ngeneac orucdzonginaac kpete, imoc ifingoc osoosodara. <sup>31</sup> Ngeneng nengbiscic homac feracyunudae, imocac amma ngeni mi damungunubeso. <sup>32</sup> Mong ye ngic yeneac kicfu neac deande, 'Ni yeac areng.' Neng yeac ifingoc Manna kurumennu kecde, yeac kicfu yofi debade, 'Ye neac ngic.' <sup>33</sup> Nga mong ye ngic yeneac kicfu neac kpacna busickpeu neng Manna kurumennu kecde, yeac kicfu yeac kpac ifingoc busic kpebade.

<sup>34</sup> ‘Ye bangecfu ruae meficgeudeac maec.’ ngeni neac ifi mi negembisia, kpac. Ni ruae meficgebadeac mi mayai, ni ine yare meficgebadeac mayai.

<sup>35</sup> ‘Medac ye mamagoc tohoemeece nga naroang ye nonggeagoc tohoemeece. Nga ngac ye erangiagoc tohoemeece, ifi fingerudeac mayai.

<sup>36</sup> Ngicngac ngic monggac ameau yombong arengfora kecdae, yenenoc ngabafora anggecde.’ (Mika 7:6)

<sup>37</sup> Ngic mong ye nonggo manghora heresongogoc hoangyuruma neac songo mamea negengande, ye neac areng anudeac siric mi anude. Nga mong ye medaha me naroanga heresongogoc haanggema neac songo mamea negenude, yeng neac areng kefudeac siric mi anude. <sup>38</sup> Ngic mong ye mariponga tofohoma ni mi modacnuude, yeng neac areng kefudeac siric mi anude. <sup>39</sup> Mong ye yengena kekeha meficgema segerede, ye kekeha sufumiude. Nga mong ye neac amma kekeha wade, ye kekeha meficgeude.

<sup>40</sup> Ngic monggo ngeni heitaingunuude, yeng ni heitainuude. Amma ni heitainuude, yeng Anutu suenuec, ye heitaiude. <sup>41</sup> Nga ngic mong ye profete mong hemma ngic imoc ye profete kecede, ifi negemma ye heitaiude, yeng profeteac bung meude. Amma monggo ngic ye dindingac kecedeac amma ngic imoc heitaiude, ye ngicngac dindingac yeneac bung meude. <sup>42</sup> Monggo medac kapia mong hemma neac medac andeac negemma doku nomang kpakeneclu kpremiu neudeu yeng kecima bumaac mi obohode, imoc fora yombong.”

## 11

<sup>1</sup> Yesungo medacfora 12 dederecge ayammedaru wisickeu amabangec imoc waec. Wama taonnginau siduc gombang edekpou ayemmeudeac kenec.

<sup>2</sup> Anu Yohanengo witicamau tacma Kristongo ua meec, siduc imoc negemma medacfora yearu sueyunuu kemma <sup>3</sup> kpesimigec, “Ngic hanemmeudeac dedea, imoc ge me neni monggac tomai kecbisina?” <sup>4</sup> Ifi degec yeng yofi deec, “Ngeni kemma wiac hennegeng andae, imocac siduc Yohane ammibisia. <sup>5</sup> Ngicngac kicpisc yeni kicfifi andae nga hanimangang yeni sing kengkecdae amma ngicngac kukuseringinagoc yeni sebingina ngereeu kecdae. Kedzacfong yeneng yoac negemma kecdae nga homemea yeneng gborima kecdae amma ngic makpekpea yeneng siduc gombang negengkecdae. <sup>6</sup> Nga ngic mong ye neac negemma herea mi buude, ye kenehagoc.”

<sup>7</sup> Anu Yohaneac medacfora yeni kemmagec Yesungo yeac haniaya dekeragima habutoa yofi edeyunuec, “Ngeni bangec kisiu noc wiac henggecdeac kenggec? Komba mong firanggo kpeu kockpac ande, ngeni imoc henggecdeac kenggec me? <sup>8</sup> Imoc kpac. Imocac noc wiac hembesonga kenggec? Ngic mong wambaya kibiagoc me? Nengengec, ngic wambangina kibia gombang heiandae, yeni ngictau yeneac amau kecandae. <sup>9</sup> Ngeni profete mong hembesonga kenggec me? Yennoc profete goa sasawa feracyunude, ifi deduae. <sup>10</sup> Yeacnoc yofi oho ohoya fede,

‘Negenma, ni enacedena sueba yeng waraigemma singga mengeregenude.’ (Marekai 3:1)

<sup>11</sup> Foracngoc, ngic ngacfunac fingegec, yeneacunac monggo Yohane dokunadzic naric mi ferahaec, kpac. Nga kurumeng eucererenggac manau



mamea kecede,\* yeng Yohaneac engena. <sup>12</sup> Nga Yohane dokunadzicngo uaya hanaheecfunac erekecma yaguc ande, ngicngac yeni kurumenggac eucerereng mebesonga ua serima meandae. <sup>13</sup> Profete sasawa nga Moseac dedeseriyoac, imoc yeni kpefingyoac deerekecmagec Yohanearu hasikedede. <sup>14</sup> Nga ngeni yoac yomoc hoanggebeso negengandae isoc yofi deduae, Eriango haudeac degec, imoc yenoc. (*Marekai 4:5*) <sup>15</sup> Kedzahagoc yeng yoac yomoc negembeso.

<sup>16</sup> Nga areng yofinenggac kecdae, yeni fakangina yofi. Nambarac yeni sobennu tacma ogofocngina yeneac kpacandae, <sup>17</sup> 'Neni kungac fifini ngeni ine yegec mi fededau nga ubahodung yegec heini ngeni mong mi kiacdau.' <sup>18</sup> Yohanengo hama nenedoku mi neu yeni hemma degec, 'Ye yafingagoc.' <sup>19</sup> Nga Ngicac Medacngo hama nenedoku neu hemma deandae, 'Henggec, ye nenedoku efea mi nekecde nga ye takesimeme ngic nga manganameme ngic yeneac ogongina.' Anutuac negen negentegec, imoc gombunga ande, imoc uayango dede."

<sup>20</sup> Yesungo guruama goau faka kuhagoc homac meu ngicngac homacngo hemma ubamereng mi anggecac ye dehau ayemmema yofi edeyunuec, <sup>21</sup> "Koradzeng nga Besaida ngicngac, ngeni sowecnginagoc. Ngenearu kucfaka homac bic fingerec, kucfaka ifia Tiro nga Sidong taonnu fingeccac dede ngicngac yeni kopocsicnginaac amma ubamanganggac wamba bic heima hama nadzicma ubamereng ambau. <sup>22</sup> Ni edengunuba, ising ising nasotoau Anutungo Tiro nga Sidong areng yeneac ubamangang negemma turunga efeanec yemmeude amma ngeni ine turunga ebiringang negemmeude. <sup>23</sup> Nga Kafanaung taong, geng kurumennu ennadeac ifi negengannec, imoc kpac yombong. Yeni homecac amau megu keme kemeac siric annec. Faka kuhagoc gearu fingerec, imocngo Sodong taonnu fingeccac dede Sodong ye naso yofinenggac febacngoc. <sup>24</sup> Nga edengunuba negenggec, turung kpoukpou nasou Sodonggac areng yeni turunga efeanec ayemmegecede nga ge ine turunga meebirima anggenggecede."

<sup>25</sup> Naso imohai Yesungo yofi deec, "Manggac, kurumeng nga bangec mingina, ngicngacareng negen negentegecnginagoc nga fitira andae, geng yeni wiacga sasawa yomoc mesufuyemmenec. Amma nambaracbisic bisic, yeni ine wiac yomoc mekperagiyemmenec, imocac dengereguduae. <sup>26</sup> Oc Manggac, ge imoc hemma ubaga ngereede. <sup>27</sup> Mannango wiac sasawa nenu neng imoc mekecduae. Nga ngic mongngo Medac naric mi negemmide, Manggacngosac negemmide. Ifi isocngoc mongngo Manggac naric mi negemmide, Medacngosac ine ye negemmide. Amma Medacngo ngicngac meisingyunuma edzacyunuande, yeneng ifingoc Manggac negemmigecede.

<sup>28</sup> Ngicngac uatoa mema kucmama kecandae nga ebic homac tofohoandae, ngeni nearu hadagcec neng kecnegeng ngemmebade. <sup>29</sup> Ngeni hama tofona miacma tofohoma negen negeng nearunac megec. Ni wosonomang nga memaemema kecduae. Ifi anu ubaonganginango kecnegeng meficgeude. <sup>30</sup> Neac tofona imoc yumea nga tofo witiau wiac dzegeanduae imoc efea."

## 12

<sup>1</sup> Naso imohai Yesungo sabata nasou wit uausing kemmanu medacfora yeni herenginaac homema wit fora goa menec anggec. <sup>2</sup> Ifi anggec farisaio

\* **11:11:** Yesungo yengenaac negemma yofi deec, "Kurumeng eucererenggac manau mamea kecede" Anutungo ye ferahedeac ifi deec.



yeneng imoc hemma edegec, “Henna, medacfoega yeni sabata nasou faka mi angana, imoc andae.” <sup>3</sup> Ifi degec Yesungo yofi edeyunuec, “Dawidi nga uamedacfora yeni herenginaac homema faka anggec, ngeni imoc osonegeng mi angandae gedang.” <sup>4</sup> Ye Anutuac womonnu emma ic sogong Anutuac sese faifaia, imoc mema uamedacfora yenigoc negec. Faka imoc mi angana nga Dawidi yengena nga uamedacfora yeneng imoc anggec. Womong gareng yeneng imoc naric negecde nga ngictehec yeneng imoc mi nebisia. (1

*Samue 21:1-6*) <sup>5</sup> Womong gareng yeni ifingoc sabata nasou ua mema sabata tatac faka wama sifu kopocsic mi meficgegecde. Dedeseriyoac mitikibiui fede, ngeni imoc osoma mi negengandae. <sup>6</sup> Ni yoac yofi edengunuba, wiac yomocngo\* Anutuac womong ferahade. <sup>7</sup> Nga yoac yofi oho ohoya fede, ‘Ngeni wosoefac ayemmedae, imocac anende nga sesegerecac ine mi anende.’ (Hosea 6:6)

Ngeni yoac imoc negentegecbau dede ngeni ngic kopocsiha kpac, ye mangana mi demibau. <sup>8</sup> Ngicac Medac yennoc sabataac Kebu.”

<sup>9</sup> Anu ye wama imohacnac kemma kpekpeturang amanginau enec. <sup>10</sup> Enu ngic mong maria mong homemeango ihaingoc tarec. Taru ngic yeni Yesungo dafi deu negemma yoacfu faigecdeac kpesimigec, “Sabata nasou ngic mengec mengere ua naric mebesonga me kpac?” <sup>11</sup> Ifi degec yeng yofi edeyunuec, “Ngenearunac mongngo ramaya mong sabata nasou teng monnu kemedac isoc, ye ine bic kemma ramaya taiu ereude. <sup>12</sup> Nga ngic ngeneng ine wiac engena amma rama feraheyombonggedae. Imocac sabata nasou mengec mengere uaac kpaea mong mi fede.” <sup>13</sup> Ifi dema ngicac yofi deec, “Ge mariga sinena.” Ifi deu ye maria sineu imohaingoc sorongaima ngereeu maria noboha isoc anec. <sup>14</sup> Nga farisaio yeni mama kemma adzoroma tacma Yesu kpegecdeac dekiric anggec.

<sup>15</sup> Ifi anggec Yesungo negengyemmema imohacnac wama kenec. Kenu ngicngac homacngo modacgec yeng ngicngac hafeingagoc sasawa mengereyunuec. <sup>16</sup> Mengereyunuma ngicngac yeni siduha mi deyadigecdeac goroyoac edeyunuec. <sup>17</sup> Profete Yesaiango kpefinnu yoac bic deec, imoc fora ambeso,

<sup>18</sup> “Negenggec, ni ua ngicna meisinggeai nga heregoc yeac songo negemba ubaonganango yeac sogaide. Nga Asuna yeac witiu faiba yeng neac desi desifaka dindingac bangec monnunac ngicngac, yenearu dekperagiyemmeude. <sup>19</sup> Amma ye ngaba mi anude nga ye kucgoc mi arohoute. Ngicngac yeni amasobennu namma yeac yoac udumenga naric mi negenggecde. <sup>20</sup> Nga yeng komba mong bic manganedac, imoc mi tueude nga kifa mong witiha hosuhagoc, imoc mi mepisickeude. Ifi anu kecma ye desi desi faka dindingac garenggekefu faka imocngo faka mangana feraheude. <sup>21</sup> Nga bangec monnunac ngicngac Anutu mi negendae, yeneng negen negensingngina yeac kpacfu gbedickegecde.” (Yesai 41:1-2)

<sup>22</sup> Yeni ngic mong hadehadeagoc nga kiwa piscic piscickea amma yoara kpac, ye Yesuaru mema kenggec. Kenggec yeng ngic mengereu yoac dede nga kicifui anec. <sup>23</sup> Ifi anu kpebung nandacgec, yeneng imoc hemma kerecetegec amma degec, “Ngic imoc ye Dawidiac kisicfunac gedang.” <sup>24</sup> Ifi degec

\* **12:6:** Yesu ye yengenaac negemma “wiac yomocngo” deec.

Farisaio yeneng ine imoc negemma degec, “Hadehade nga yafing kporacde, imoc hadehade nga yafing yeneac ngictau Bedzeburu, yeac kucfu mede.”

<sup>25</sup> Ifi degec Yesungo negen negengnginau negemma yofi deec, “Bangec monggac ngicngac yeni ngaba angemema tohogecdeu bangec imoc kisi fingerude. Nga taong me amaareng mong yenaocngoc ngaba angemegecdeu taong me amaareng imoc naric mi fekefude. <sup>26</sup> Nga Satang yengenaocngoc kporacemeudeu ye tohou habu yohockang anu yeac amabangeha seria naric mi feude. <sup>27</sup> Neng Bedzeburu yeac kucfu hadehade nga yafing kporacyunubai dede ngeneac medacfocngina yeni ifingoc yeac kucfu hadehade nga yafing kporacyunubau. Ifi anu ngeneac medacfocnginango yoacngina isinggema desigece. <sup>28</sup> Nga neng Anutuac Asugoc hadehade nga yafing kporacyunudaueu imohai Anutuac eucererengno ngenearu bic hadac kecde.”

<sup>29</sup> “Ngic mongngo ngic kuhagoc mong yeac amau naric mi enude nga ye iwaiya sasawa naric mi wangerude, kpac. Ye ngic kuhagoc witickemaguc amea manau emma iwaiya tacde, imoc naric wangerude.”

<sup>30</sup> “Ifi anu yofi edengunuba negenggec, ngic mong ye mi nanggenude ye ngadenuude. Nga mongngo nigoc mekpedzuc ua mi meude, yeng neac wiac megigi anu sinsararang kpeudeac ua meude. <sup>31</sup> Imocac edengunuba negenggec, ngic mong ye kopocsic hania hania meande amma Anutu demanganeande, yeac kopocsic wawaac sing fede. Nga mongngo Asu demanganeude, yeac kopocsic wawaac sing ine mi fede, kpac. <sup>32</sup> Anu ngic mong ye Ngicac Medac emmima yoac deude, yeac kopocsic wawaya fede. Nga mong ye Tiri Asu emmima yoac deude, yeac kopocsic wawaac sing mong mi fede, kpac. Imoc naso yofinenggac kecdimbe me naso ngade haude, imohai ifi feking kecbesande.”

<sup>33</sup> “Ic mong gombunga degec, imohai fora gombunga fingerude nga ic mangana degec, imohai fora mangana fingerude. Forango icac siriha edzacnunuude. <sup>34</sup> Ngeni boidzocac fingeসাheunac. Nga wiac ubaherenginau wakema fede, imocnoc enacnginango dekperagiude. Ngeni ngic mangango yoac gombunga degecdeacsoc mi ande. <sup>35</sup> Ngic gombungango ye tohonga gombunga femide, imohacnac wiac gombunga meu maande. Nga ngic manganango tohonga manganaunac wiac mangana meu maande. <sup>36</sup> Neng yofi edengunuba, ngeni yoacngina sicsauha sasawa deandae, yoac imoc ising ising nasou isinggema foraya degecde. <sup>37</sup> Yoacgaac siricfu yoacga gombunga desigece nga yoacgaac siricfu desima mangana degenggecde.”

<sup>38</sup> Ifi deu mitiac negen negengngic nga farisaio goa yeneng degec, “Kpoukpou, ge faka kuhagoc mong edzacnununadeac anemmede.” <sup>39</sup> Ifi degec yeng ine yofi edeyunuec, “Naso yomocac ngicngac ngeni mangana nga seroareng amma kucfaka mong henggecdeac kpesiandae. Nga ngeni ine faka kuhagoc mong mi ngemmengemmea, kpac. Profete Yona, yearu kucfaka fingerec, ngeni imocsac henggecde. <sup>40</sup> Yona ye hadzing nga tofocnac harebec kondungyangtoaac heremanau feec, ifi isocngoc Ngicac Medacngo bangecac heremanau hadzing nga tofocnac harebec feude, ngeni imocsac henggecde. <sup>41</sup> Anu Niniwe taongtoaac ngic yeni Yonaac dedekperagiyoac negemma ubamereng anggec. Imocac ngicngac yomoc ngeneng ising ising naso Niniwe ngicngac yenigoc yacma nammagec fakangina isinggema ngeneac mangana dengemgecde. Anu negenggec, yomocngo† Yonaac

† 12:41: Yesu ye yengenaac negemma “Yomocngo Yonaac faka ferahade.” deec.

faka ferahade. <sup>42</sup> Nga Seba bangebac ngactaungo Saromoac negen negentegec meudeac bangeb tegiau sautfunac haec. Yeng ising ising nasou ngicngac yomoc ngenigoc yacma nammagec fakangina isinggema ngeneac mangana dengemmeude. Anu negenggec, yomocngo<sup>‡</sup> Saromo ferahade. (*1 Ngictau 10:1-13*)

<sup>43</sup> Asu seuhagoc ye ngicfunac erema bangeb dokuya kpac, ihai kemma tacnegenudeac tatak hofocma yerecgema kecande. Kecma tatak mong mi meficgema <sup>44</sup> yengenaocngoc yofi deude, ‘Amana warac tacma wayai, imohai monggoc dzigenema kembadeac negenduae.’ Ifi dema kemma ama imoc henude. Nga imoc bic wangge wanggea nga mengec mengerea amma mingina kpac eng tacde. Taru asu seuhagocngo imoc hemma <sup>45</sup> monggoc kemma arengfora 7 wangecyunuu hagecde. Arengfora imoc yeneng ye ferahema mangana yombong andae, yeni meyunuma kemma ama imohai enarangina anu kecgecde. Ifi anu ngic ye warac mangana kefec, ye imoc ferahema imocac mangana yombong kefude. Nga ngicngac yofinenggac mangana andae, ngenearu faka ifiangoc fingerude.”

<sup>46</sup> Yesungo ngicngac yoac edeyunumanu nonggo munafora yeneng hama ngadeau namma yegoc yoac denegeng anggecdeac degec enec.

<sup>47</sup> Enu ngic mongngo imoc negemma edeec, “Nonggo munafocga yeni gegoc yoac yoac anggecdeac ngadeau nandae.” <sup>48</sup> Ifi deu Yesungo ye edeec, “Damoc yeneng neac nonggo munafocna?” <sup>49</sup> Ifi dema medacfora nanggec, yenearu maria sinema yofi deec, “Ngicngac yomoc yeneng nonggo munafocna. <sup>50</sup> Imoc yofiac, ngicngac Manna kurumennu kecede, yeac songo nga negen negeng modacma uaya meandae, yenennoc neac nonggonaing nga dacmunafocna.”

## 13

<sup>1</sup> Uameme imohaingoc Yesungo amaunac mama dzohong tegiau kemma tarec. <sup>2</sup> Tacmanu habutoa kunengngo yombong yearu kenggec ye gombau emma tacmanu ngicngac habutoango dzohong tegiau nanggec. <sup>3</sup> Nanggec yeng yoac heima yoac homac edeyunuma yofi deec,

“Gbome kpegi kpegingic mongngo gbome kpegiudeac uau kenec.

<sup>4</sup> Kemma gbome kpegiu gbome goango mama sinnu heiu neng yeneng hama nedacgec. <sup>5</sup> Nga goango harongannu heiu ihai bangeb efeanec feecac imoc bic nemonggema ereec. <sup>6</sup> Amma gbome godea homac mi faiecac wenacngo erema kpeu ururuema homeec. <sup>7</sup> Nga goango haseng manau heima nemonggeu hasenggo yadima gbome heihomeec. <sup>8</sup> Nga gbome goango bangeb gombangau heima fora fingerec. Imohanac goau 100 fingerec nga goau 60 amma goau 30 fingerec. <sup>9</sup> Kedzahagoc yeng yoac yomoc negembeso.”

<sup>10</sup> Anu medac yeneng yearu kemma kpesimigec, “Ge dafiac yoac heima edeyunuannec?” <sup>11</sup> Ifi kpesimigec Yesungo yofi merengyemmeec, “Kurumeng eucererenggac negen negeng sufu sufuya, imoc ngeneng negenggecdeac ngemmengemmea. Nga imoc ine yeni mi yemmeyemmea. <sup>12</sup> Ngic mong wiac goa femide, ye wiac homac monggoc migec mekefude. Nga mong ye wiac mong mi mekecde, yearunac wiabcisic mekecde, imoc ifingoc wangecgecde. <sup>13</sup> Ngicngac yeni kic fima mi hendae nga kedzac kpepa sifu wiac mong mi negentegecgecde. Imocac amma yoac heima

<sup>‡</sup> 12:42: Yesu ye yengenaac negemma “Yomocngo Saromo ferahade.” deec.

edeyunuanduae. <sup>14</sup> Nga profete Yesaiango yoac deec, imoc yenearu fora fingece,

'Ngcngac kedzacngo negen negeng, yeni imoc negemma naric mi negentegecece. Amma kicngo heheng yeni imoc hemma naric mi hentegecece. <sup>15</sup> Ngicngacareng yomoc yeni herengina tondzera nga kedzacnginango yoac negenggeceac ebiridae amma kicnginango wiac henggeceac mepisickegec. Yeni kicnginango wiac mong hembauac nga kedzacnginango negembauac amma negen negengnginango wiac mong negentegecbauac, imoc yeni ubangina dafu dzigeneu mengereyunubade.' (Yesaia 6:9-10)

<sup>16</sup> Nga ngicngac kicpisis nga kedzacfong kpac, ngeneac kickedzacngina kenehagoc. <sup>17</sup> Foracngoc, profete nga ngic fakangina dindingac homacngo warac kegec, yeni wiac ngeni hengandae, imoc hembeso songo negemma sifu mi hengec. Nga ngeni wiac kedzacnginango negengandae, yeni imoc kedzacngo negembeso ayemmu ifingoc mi negenggec."

<sup>18</sup> "Imocac ngic gbome kpegiec, imocac yoac heiheiac hania deba ngeni negenggec. <sup>19</sup> Ngic mongngo eucererenggac yoac kedzahango negemma mi negentegeru mangana minginango hama gbome hereau homec homera, imoc bic meickeude. Imoc wit gbomea sinu heiec, siriha imocacsoc ande. <sup>20</sup> Nga gbomea harongannu heiec, imoc ngic mongngo eucererenggac yoac negemma songogoc bic hoanggeude, ye isoc. <sup>21</sup> Hoanggeu imocngo ubeau godo mi mema naso wegenanecsac feude. Nga Anutuac yoacac amma kpendzeng me yunukporacfaka yearu fingeru ye makpeude. <sup>22</sup> Nga gbomea hasennu heiec, imoc ngic mong ye eucererenggac yoac negemma kefude, ye isoc. Ye yoac negenu kekecac negengyohoc nga dzofinacac faitobangfaka imocngo yadima yoac imoc heihomeu fora mong mi fingerude. <sup>23</sup> Nga gbomea bangec kerehagocfu heiec, imoc ngic mong ye eucererenggac yoac negemma negentegerude, ye isoc. Ngic ifia yearunac goango fora 100 nga goango 60 amma goango 30, ifi fingerude."

<sup>24</sup> Yesungo yoac mong heima yofi edeyunuec, "Kurumenggac eucerereng imoc ngic mongngo uayau kemma witgbomea gombunga kpegiec, siriha imocacsoc ande. <sup>25</sup> Ngic ye kpegima kenu amaareng yeni tofocnac gau fedacmagec ngabango ine hama kpindzing mangana ifingoc wit botuhau kpegima kenec. <sup>26</sup> Nga wit imoc nemonggema erema fora fingeamanu kpindzing manganango ifingoc nesarima ereec. <sup>27</sup> Ifi anu wanacngic yeneng hama mingingngina edegec, 'Kunennina, ge uau gbome gombunga kpeginec anu kpindzing mangana imoc ine damohacnac erede?' <sup>28</sup> Ifi degec yofi edeyunuec, 'Ngabangic mongngo imoc andac.' Ifi deu degec, 'Neni kemma kpindzing mangana imoc taima ukunide, ge ifi negennec, me?' <sup>29</sup> Ifi degec yeng yofi edeyunuec, 'Kpac, ngeni kpindzing taidimbe dema wit ifingoc taibauac amma wagec.' <sup>30</sup> Wit nga kpindzing yerahafocngoc yadimaec kpe-meme naso hau kpe-memengic yofi edeyunubade, 'Ngeni hanahema kpindzing taima dedeckema gerecfu ukugec dzebeso. Nga wit ine mekpedzuc amma semengamanau faigec tacbeso.'"

<sup>31</sup> Yesungo yoac mong heima yofi edeyunuec, "Kurumenggac eucerereng imoc mastet gbomea isoc, ngic mongngo imoc mekemma uayau homerec. <sup>32</sup> Mastet gbomea, imoc gbome sasawa yeneac kapiangina. Amma ye yadima semeng uaac mondzang feracyunuma ic wegana anu sawau neng yeneng hama fawau faec heiandae."

<sup>33</sup> Anu Yesungo yoac mong heima yofi edeyunuec, “Kurumenggac eucerereng imoc yis isoc. Ngac mongngo farawa 20 kg mema uuha yisgoc yerecgema meu hafoangoc yisagoc anude.” <sup>34</sup> Yesungo yoac deec, imoc yoacfu sasawa heima ngicngac habutoa edeyunukefec, ye eng mong mi edeyunuec. <sup>35</sup> Profete mongngo yoac yofi deec, “Ni yoac heima deba, imoc enacnaunac maudeac ande nga wiac warac kundunnu sufu sufuya feec nga wiac ngade fingechebende, imocac yoac debade.” *(Mitiyegec 78:2)*

Yoac imoc fora fingerudeac Yesungo yoac heimasac yoac edeyunukefec.

<sup>36</sup> Anu ye habutoa faiyunuma amau enu medacfora yeneng yearu emma degec, “Ge yoac heima kpingzing mangana uau erede dedang, imocac hania dekperaginemma negenni.” <sup>37</sup> Ifi degec yeng yofi merengyem-mee, “Ngicac Medacngo gbome gombunga kpegima kecde. <sup>38</sup> Semeng uaya imoc bangectoa bangec amma gbomea gombunga imoc eucerereng-gac nambaracfora. Nga kpingzing mangana imocngo mangana minginaac nambaracfora. <sup>39</sup> Nga ngabangicngo gbome uau kpegiec, imoc mangana mingina. Nga fora kmememe naso, imoc naso wisic wisickea, imocac nasotoa. Uangic imoc angero. <sup>40</sup> Yeneng kpingzing mangana taima gerecfu ukugec dzeude, nasotoau ifi isoc fingerude. <sup>41</sup> Imohai Ngicac Medacngo angerofora sueyunuu yeneng yeac amabangehaunac wiac kopocsic meficgeande amma ngicngac kopocsic mekecdae, imoc sasawa kpezucyunudacma <sup>42</sup> gerecyadau ukuyunuu kemegecde. Ihai ngicngac kiacma enacngina kisaranggema kecgecde. <sup>43</sup> Nga ngicngac kpetiac yeni Mangnginaac eucererennu wenackiwa isoc kperagima kecgecde. Kedzahog yeng yoac yomoc negembeso.”

<sup>44</sup> Yesungo monggoc yofi deec, “Kurumenggac eucerereng imoc ngic yeneng dzofinac ua monnu sufugec, ifi isoc. Ngic mongngo ihai kemma imoc meficgema monggoc mesufuec. Mesufuma ubangerec kuneng negemma kemma wiara sasawa suema dzo mema kemma ua imoc bummeec. <sup>45</sup> Anu monggoc yofi, kurumenggac eucerereng imoc kubu gombunga buma kuneng kubu faifaingic mongngo hofocma kefec, ifi isoc. <sup>46</sup> Hofoc keema kubu mong buma kuneng yombong meficgeec. Meficgema kemma iwaiya sasawa sueu dzo kirecgeec. Kirecgeu hama imocngo kubu imoc bummeec.

<sup>47</sup> Ni monggoc deba negenggec, kurumenggac eucerereng imoc ufic mong isoc. Ngic yeni ufic dzohonnu ukugec kemema kondung yang hania hania meande. <sup>48</sup> Ukugec dzohonggac yangngo uficfu wakeu tegiau kpedzigece erec. Ereu ngic yeni kondungyang nenea isinggema otou faigec nga mi nenea, imoc ukugec. <sup>49</sup> Naso wisic wisickea imohai faka ifi isoc fingerude. Angero yeneng kemma ngicngac manganameme areng kecdae, yeni ngicngac dindingac yeneac botucfunac meicyunuma <sup>50</sup> gerecoau ukuyunugec kemegecde. Kemema yeni ihai kiacma enacngina kisaranggema kecgecde.” <sup>51</sup> Yesungo ifi dema kpesiyem-mee, “Ngeni yoac imoc sasawa negengecdae me?” Ifi deu degec, “Oc.” <sup>52</sup> Ifi degec yofi edeyunuec, “Imocac mitiac negen negengngic kurumeng eucererenggac negen negeng mema kecandae, yeninoc ama monggac mingina, ye isoc andae. Yeng tohongaunac wiac esea nga gboria memaude.”

<sup>53</sup> Yesungo yoac heima imoc dedacma amabangec imoc wama <sup>54</sup> yengena amabangehau kenec. Kemma kpekpeturang amanginau emma edekpou ayemmeu ngicngac yeneng imoc negemma kpidohoma degec, “Ngic yomoc ye negen negengec nga kucfaka imoc dahacnac mema mekecde? <sup>55</sup> Ye

amamemengic yeac medacnoc. Nga nonggea kpara Maria amma ye Yakobo nga Yosec nga Simong amma Yuda yeneac dacngina. <sup>56</sup> Nga naingfora sasawa yeni nenanggoc kecdae. Yeng negen negeng imoc dahacnac meec?" <sup>57</sup> Yeni ifi dema Yesuac yoac nga uayaac dehesi amma wagec. Ifi anggec Yesungo edeyunuec, "Profete yeni yenang amanginau nga amabangecnginau, imohaisac kpacngina kpac kecdae." <sup>58</sup> Anu ngicngac yeni mi negensinggecac amma yeng imohai kucfaka efeanecsac meec.

## 14

<sup>1</sup> Naso imohai Yesuac siducngo gawanatoa Herode yeac kedzacfu kemeu <sup>2</sup> yeng negemma uamedacfora edeyunuec, "Imoc Yohane dokunadzic. Ye homecfunac gborima yarecac amma faka kuhagoc meudeac kuc femide."

<sup>3-4</sup> Imoc yofiac, Herodengo warac munea Firipoac enema Herodia hamangec meec. Meu Yohanengo yofi edeec, "Ge ngac imoc mema yegoc kecdae, imoc singngo mi dede." Ifi deecac Herodengo Yohane mema hanimaria kpema witicamau faima <sup>5</sup> kpehomebeso negensiec. Nga ngicngac yeneng ye profete, ifi negenggecac amma kengec anec.

<sup>6</sup> Anu Herodeac fingec fingecnaso hau yeni adzoroma tacmagec Herodiaac naroangngo yeneac botucfu yegec fedeu Herodengo hensongo am-mima <sup>7</sup> naroangngo wiac monggac ammiu imoc naric miudeac nemuya monggac kpacfu deseriec. <sup>8</sup> Deseriu naroang ye nonggeango negen negeng miu Herode edeec, "Ge Yohane dokunadzic oruha terau faima mehama nenna." <sup>9</sup> Ifi deu negemma ngictau ye ubaebic meec. Amma ye ine dedeseriyoac ngicngac tacgec yeneac kicfu deec, imoc negensima naroangngo deec, imoc migeccdeac deserima <sup>10</sup> wasaingic sueu Yohane witicamau tarec, ye ubea herecgebesonga kenec. <sup>11</sup> Kemma Yohaneac ubea kperecgema hatea terau faima mehama naroang miu nonggeaarua mekenec. <sup>12</sup> Anu Yohane medacfora yeni kemma farenga mehama tonggoma kemma Yesu siduc imoc ammigeac.

<sup>13</sup> Ammagec Yesungo siduc imoc negemma amabangec imoc wama gombau emma medacfora yenigoc amabangec mong ngiha kpacfu, ihai ye tembuha tarudeac kenggec. Ammanu ngicngac habutoa yeneng imoc bic negemma taongngina wama hanising ye modacma kenggec. <sup>14</sup> Kenggec Yesungo gombaunac mama ngicngac habutoa ifi yenemba ubea manganeu ngicngac hafeingingagoc mengereyunuec. <sup>15</sup> Mengereyunuma kecmanu ama marai anu medacfora yeneng yearu hama degec, "Bangec yomoc ngiha kpac anu naso bic kendacdeac ngicngac habutoa sueyununa amabangec goau kenggec. Yeni kemma yenaoc yaka hummenec anggec." <sup>16</sup> Ifi degec yeng yofi edeyunuec, "Yeni kenggeccdeacsoc mi ande, ngeni ngenaoc yaka gumecyunuec." <sup>17</sup> Ifi deu degec, "Neni ic sogong marimong nga kondungyang yohockang yoc mekecdimbe." <sup>18</sup> Ifi degec yeng yofi deec, "Neni yaka imoc nearu mehagec." <sup>19</sup> Yesungo ifi dema ngicngac habutoa kpindzinu matacgeccdeac edeyunuec. Edeyunuma ic sogong marimong nga kondungyang yohockang, imoc mema kiwa fiu kurumennu enu yaka keneheec. Kenehema ic sogong imoc tuema medacfora yemmeu yeneng imoc mema ngicngac habutoa yemmegec negec. <sup>20</sup> Nga yeni sasawang negebec amma yaka tosea neti anggec tarec, imoc kpedzucnegec kemema sakac 12 wakeec. <sup>21</sup> Ngicngac yaka negec, ngic yeneac kpete imoc 5 tauseng isoc. Nga ngacnambarac yeneac kpetengina imoc mong mi megec.

<sup>22</sup> Yesungo medacfora sueyunuu yeni gombau emma dzohong nobocgeng waraigecdeac kenggec. Kemmagec ye yengenaoc kecma ngicngac habutoa faiyunuu <sup>23</sup> kendagec. Kendagec ye numuudeac tikiu enu ama toforeu tembuha tarec. <sup>24</sup> Taru gombango dzohong dzongiau kensikemanu firangno kenggecfusing hama siri kpema gomba mekemmeha anec. <sup>25</sup> Ifi anu ama wereckembesonga ammanu Yesungo dzohong witiau titi medacfora yenearu kenec. <sup>26</sup> Ye dzohong witiau titikenu medacfora yeneng hemma yofi degec, “Wosongango hade.” Ifi dema kengec amma arohogec. <sup>27</sup> Arohogec Yesungo negemma imohaingoc yofi edeyunuec, “Ngeni wosongina makiu, imoc ni, ngeni mi kengecngunuu.”\*

<sup>28</sup> Ifi deu Petorongo meremma deec, “Kebu, ge geanggaoc hanec isoc, ni doku witiau tima tima gearu habadeac edenuna.” <sup>29</sup> Ifi deu Yesungo deec, “Ge hana.” Ifi deu Petoro ye gombaunac mama doku witiau tima Yesuaru kenec. <sup>30</sup> Kemmanu firangtoa kpeu hemma kengec amma ine dokuu kemema kpacma deec, “Kebu, ge meficnuna.” <sup>31</sup> Ifi deu Yesungo maria bic sinema Petoroac mari mema miacma yofi edeac, “Ngic negen negensingga kapia, ge nocac negengyohoc andang?” <sup>32</sup> Ifi deu gombau emmaec imohaingoc firang kpac anec. <sup>33</sup> Anu gombau tagcec, yeneng Yesu dengerema yofi degec, “Foracngoc, ge Anutuac Medac.”

<sup>34</sup> Anu yeni dzohong ferecgema Genesarete bangecfu kensikegec. <sup>35</sup> Kensikemagec bangec imocac ngic yeneng Yesu bic hensima yoac imoc faigec bangec imohai yerecgeu yeni ngicngac hafeinginagoc yearu meyunudacma hagec. <sup>36</sup> Hama hafeinginagoc yeni ngakpia susiaac witihasac kpeseregecdeac derecgegec. Amma kpeseregec, yeni sasawango ngereedacgec.

## 15

<sup>1</sup> Mitiac negen negengngic nga farisaio yeneng Yerusarennac Yesuaru hama degec, <sup>2</sup> “Medacfocga yeni nocac bangecfocnina nga esangabofocnina yeneac singyoac kpema maringina mi dzuacma yada menec angandae?” <sup>3</sup> Ifi degec yeng yofi deec, “Ngeni nocac Anutuac dedeseriyoac kpema ngenang singyoac waraima modacandae.” <sup>4</sup> Anutungo yofi dede, “Ge nonggo manghocga seseheyurubesena.” Nga “Ngic mong nonggea me mamaac sowecyoac deude, ye homebeso.” (*Makekeng 20:12; 21:17; Sesememe 20:9; Dedeseri 5:16*)

<sup>5</sup> Ngeni ine yofi deandae, “Mongngo nonggea me mama edema yofi deude, ‘Neng wiac goa gemma nanggegubai dede imoc bic Anutuac sese dedua.’ <sup>6</sup> Ye ifi dema nonggo manghora mi seseheyuruude. Ifi amma ngeni singyoacngina kpabanggema Anutuac yoac semegecde. <sup>7</sup> Ikocngic, ngeneacnoc profete Yesaiano kpefing dema fora yombong yofi deec,

<sup>8</sup> ‘Ngichabu yomoc yeni enacbibicngo sesehenuandae nga herenginango ine neac hereau kecdae. <sup>9</sup> Nga yeni kpoukpou ngicngac kpouyemmeandae imoc ngicac singyoacsac edekpou ayemmeandae amma eng dengerenugec hema fora kpac angkecde.’” (*Yesaia 29:13*)

<sup>10</sup> Anu Yesungo ngicngac kpacyunuu hagec yoac yofi dema edeyunuec, “Ngeni kedzac kpema negentegecbisia. <sup>11</sup> Enacfusing wiac kemede, imocngo ngic ubahere mi heidzadzu kpeude. Nga wiac hereninaunac nga enacfu

\* **14:27:** Grik yoacfu ye “Ego eimi.” deec. Imocac titiha yohockang, “Imoc ni.” e “Ni kecduaengoc.” Imoc Anutuac kpapa mong Anutuac angerongo Mose edeac.



ereande, imocngo ine ngic ubahere heidzadzu kpeude.”<sup>12</sup> Anu medacfora yeneng yearu hama edegec, “Farisaio yeneng yoac imoc negemma negemmangang meficgegec, ge imoc negennec me?”<sup>13</sup> Ifi kpesimigec yeng yofi deec, “Kurumeng Mannango iwai mong mi homerec, imoc godeagoc kpedzigece.”<sup>14</sup> Ngeni imocac wayunuec. Yeni yenaoc kicpisis amma kicpisis yeneac enara kecdae. Amma kicpisis mongngo kicpisis ogea wangerudeu, yeri yerahafoc tennu kemeyuruude.”

<sup>15</sup> Deu Petorongo kpesimiec, “Yoac heidang, imocac hania dena negenni.”

<sup>16</sup> Ifi deu yeng yofi edeyunuec, “Ngeni negen negentegecngina kpac isoc kecdaengoc.”<sup>17</sup> Wiac enacfusing kemeande, imoc sasawangi herenginaiu kemema isinggeu keractennu kemeude. Ngeni imoc mi negentegecdae me?<sup>18</sup> Nga wiac enacfusing ereande, imocngo ine ubahereunac erema ngic ubahere heidzadzu kpeude.<sup>19</sup> Ubahereunac wiac yofia ereande, negen negeng magana nga ewekpekpe amma kaisero faka nga eweeneng mewa amma hamangec faka nga ikoc yoacfu faifaiyunu amma desureyoac.<sup>20</sup> Faka imocngo ngic ubahere heidzadzu kpeude. Nga ngeni maringina mi dzuacma yaka eng negecde, faka imocngo ine ngic ubahere naric mi heidzadzu kpeude.”

<sup>21</sup> Yesungo Genesarete bangec wama Tiro nga Sidong bangec, imohai kenec.<sup>22</sup> Kemmanu imohacnac Kanaang yeneac arenunac ngac mongngo hama Yesu kpacambic ammima deec, “Kebu, Dawidiac bangeha, ge neac ubaga manganeu, hadehadengo naroanna memanganeande.”<sup>23</sup> Deu Yesungo yoac turunga mong mi merenu medacfora yeneng hama igockema degec, “Ngac ye ngadeninaiu homac kpacdeac suena kenu.”<sup>24</sup> Ifi degec, yeng yoac yofi merenec, “Ni Israe amaarenggac rama sufu sufuya kecdae, yeneac amma mayai.”<sup>25</sup> Anu ngacngo ine hama Yesuac fafoc heimima deec, “Kebu, ge meficnuna.”<sup>26</sup> Ifi deu yofi edeac, “Nambarac yeneac yaka wange-cyunuma kasi yenearu ukuyemmemme, imoc faka gombunga mi ande.”<sup>27</sup> Ifi deu ngac ye serima deec, “Kunenna, imoc naric denec. Nga kasi yeni ine mingingfocnginango yaka kisisiskegec tebo bageau mau imocsac neandae.”<sup>28</sup> Ifi deu Yesungo meremna ngac yofi edeac, “Ngac, negen negensingga imoc engena yombong. Negen negenggau negendang, ifi fingecgende.” Ifi demanu naso imohaingoc naroanga ngerec.

<sup>29</sup> Anu Yesungo amabangec, imoc wama Gariraia dzohong tegiau kemma tikiu emma ihai tarec.<sup>30</sup> Tacmanu ngicngac habutoa kuneng yombong hama ngicngac hanimangang nga puring amma kicpisis nga yoacngina kpac amma ngicngac homac ifia meyunuma hagec. Hama Yesuac hoannu faiyunuec yeng mengereyunuec.<sup>31</sup> Mengereyunuu ngicngac yoacngina kpac, yeni yoac degec nga puring yeni ngeregec amma hanimangang yeni sing tigece nga kicpisis yeni kic figec. Ifi anggec ngicngac yeneng imoc hemma kerecegec amma Israeac Anutu dengeregec.

<sup>32</sup> Anu Yesungo medacfora kpacyunuu hagec yofi edeyunuec, “Ngicngac habutoa yomoc yeni yakangina kpac uameme harebec bic nigoc kecdauc yeneac ubana manganede. Yeni sinnu kemma kicgigi ayemmebacac herenginaac homemagec naric mi sueyunubade.”<sup>33</sup> Ifi deu medacfora yeneng meremmigec, “Nenang yei bangec kisiu kecma yaka dahacnac meni ngicngac habutoa kuneng yomocac kpetenginasoc anude?”<sup>34</sup> Ifi degec Yesungo yofi kpesiyemmeec, “Ngeni ic sogong dafiguc mekecdae?” Kpesiyemmeu degec, “Ic sogong seweng nga kondungyangbisis bisic goa.”<sup>35</sup> Degec Yesungo ngicngac habutoa bangecfu matagecdeac edeyunuec.<sup>36</sup> Edeyunuu tacgec,



yeng ic sogong nga kondungyang mema ubangerec dema tuema medacfora yemmeu yeneng mederema ngicngac habutoa yemmegec negec. <sup>37</sup> Yeni sokoma nema negebec andagec yaka tosea neti anggec tarec, imoc kpedzucnegec kemema sakac 7 wakeec. <sup>38</sup> Nga yaka negec, ngic imoc yeneac kpetengina 4 tauseng nga ngac nambarac yeneac kpete imoc mi memea. <sup>39</sup> Yesungo ngicngac habutoa sueyunu kengha anggec ye gombau emma Magadang bangecfu kenec.

## 16

<sup>1</sup> Farisaio nga sadukaio yeni Yesuaru kemma yeac kuha isinggegecdeac negenggec. Ifi negemma ye faka furia mong kurumennunac meu fingeru edzacyunuudeac kpesimigec. <sup>2</sup> Kpesimigec Yesungo meremma yofi edeyunuec, "Ama marai anu ngeni deandae, 'Amabangec sacsac andeac wereckene nasogombunga anude.'" <sup>3</sup> Nga asoac yacma deandae, 'Amabangec sacsac amma kundung kpedeac kiafirang kpeude.' Ngeni sawau faka fingeande, imoc gombunganoc isinggeandae nga nasoac soi fingeande ngeni imoc ifingoc isinggegec ngereebac. <sup>4</sup> Ngicngac areng yomoc ngeni manganameme nga seroareng amma ngeni kucfaka mong henggecdeac kpesiandae. Imocac ngeni faka kuhagoc mong mi ngemmengemema. Yonaaru kucfaka fingerec, ngeni faka imocfiasac henggecdeac." Ifi dema wayunuma kenec.

<sup>5</sup> Yesuac medacfora yeni yegoc dzohong noboc kenggec. Kembeso ic sogong nigecyunuu engsac kenggec. <sup>6</sup> Kensikema Yesungo yofi edeyunuec, "Ngeni farisaio nga sadukaio yeneac yis henghomema kecbisia." <sup>7</sup> Deu medac yeni yenaocngoc denegeng amma degec, "Nenang ic sogong mi mema hading, imocacnoc ifi dede." <sup>8</sup> Ifi degec yeng bic negengyemmema deec, "Ngeni ngic negen negensingngina kapianec, ngeni genaocngoc ic sogong mi mehadauac denegeng andae, yoac imoc wagec. <sup>9</sup> Ngeni negen negengecngina kpac. Ic sogong 5ngo ngic 5 tauseng sokoyunudaru sakac dafiguc mewakegec, imoc mi nigecngunubeso. <sup>10</sup> Amma ic sogong 7ngo ngic 4 tauseng sokoyunudaru sakac imoc dafiguc mewakegec, imoc ifingoc negensibisia. <sup>11</sup> Ni ic sogonggac mi dedua. Ngeni farisaio nga sadukaio yeneac yis, imocac henghomema kecgecdeac dedua nga ngeni imoc mi negengecdau." <sup>12</sup> Ifi edeyunuma yeni ic sogonggac yis garengeme kecgecdeac mi deec, imoc negengecgec. Yeni farisaio nga sadukaio yeneac kpouk pouyoac, imocac garengemema kecgecdeac ine deec.

<sup>13</sup> Yesungo Firipi bangecac Kaisarea taong mewegenema medacfora yofi kpesiyemmeec, "Ngcngac yeni Ngicac Medac yeac merac deandae?" <sup>14</sup> Ifi deu degec, "Ngc goango Yohane dokunadzic deandae nga goango Eria amma goa yeneng ine Yeremia me profete mong deandae." <sup>15</sup> Ifi degec yofi deec, "Nga ngeni genaoc ine neac merac deandae?" <sup>16</sup> Kpesiyemmeu Simong Petorong deec, "Ge Messia, Anutu kekehagoc yeac Medac." <sup>17</sup> Ifi deu Yesungo yofi edeac, "Simong, Yonaac medac, yoac imoc ngic dedeunac mi dedang, imocac ge kenecgagoc. Manna kurumennu kecdde, yennoc imoc mekperagima edeguu dedang. <sup>18</sup> Neng ifingoc edeguba negenna, ge Petoro,\* anu hoc yomocac witiau† kpebungtoana faibade. Nga imocngo serima nanu homec amaac nagungo naric mi hepatanggeude.

\* **16:18:** Petoro imocac titiha, hocbisc. † **16:18:** Yesu ye yengenaac negemma "hoc yomocac witiau kpebungtoana faiba." ifi deec.

19 Ni kurumeng eucererenggac ki gamba geng bangecfu iwai sasawa dzezenade, imoc kurumennu ifingoc dzege dzegea fingerude. Nga ge wiac bangecfu yungecdacnade, imocngo kurumennu ifingoc yungec yungec fingerude.” 20 Ifi dema medacfora yeneng Yesu ye Messia, imoc ngic mong mi edeyunugecdeac deracyunuec.

21 Naso imohai hanahema Yesungo medacfora yofi edeyunuec, “Ni Yerusarennu kamba yudangic enarafocongina nga womong gareng enara amma mitiac negen negengngic yeneng kpendzengetoau fainuma nuhomegecde. Anu uameme harebec ammanu monggoc gborima yachesare.” Faka imoc fingerudeac deec. 22 Ifi edeyunuu Petorongo Yesu ngadeau wangec kemma tembucfu namma deketari ammima deec, “Anutungo meficgumanu faka imocngo gearu naric mi fingecgembeso.” 23 Ifi deu Yesungo dzigenema Petoro yofi edec, “Satang, ngadenau hakenna, ni memanunadeac negennec. Ge wiac negennec, imoc Anutuarunac kpac, imocngo ine ngicac negen negeng ande.”

24 Ifi dema medacfora yofi edeyunuec, “Mong ye ni modacnubeso negendeu ye yengena ubasebiaac songo memama mariponga miacma tofohoma modacnubeso. 25 Ngic mong ye kekeha segereudeac negemma uaya mekecde, ye kekeha sufumiude. Nga mong ye neac amma kekeha waude, ye kekeha fingecmiude. 26 Imocac amma ngic mong ye bangectoa bangec yomocac finac sasawa meficgema yengena kekeha ukuu sufuude, wiac imocngo memefihagoc naric mi anude. Amma mong ye kekeha monggoc meudeac negenside, ye imoc bummemeac osiude. 27 Nga Ngicac Medacngo Mamaarunac kuc nga kibikperagiagoc angerofora yenigoc hama ngicngac sasawa angammemengina angandae, imocac sirihau turunga kpouyemmeude.

28 Foracngoc, ngic yomoc nandae, ngenearunac goa mi homemagec Ngicac Medacngo eucererengagoc hau kicnginango henggecde.”

## 17

1 Uameme 6 wisickemanu Yesungo Petoro nga Yakobo amma munea Yohane hesicyunuu tikitoa herea monnu emma tembucngina kecgec. 2 Ihai kecmağec Yesuac sebua kicnginau heimerenec. Heimerenu kicmesuya imoc wenac isoc anec nga ngakpikporuha imoc kongac kpema ama meaiu kperagia fingecande, ifi isoc anec. 3 Ifi ammanu Mose nga Eria yereng imohaingoc fingecyemmema yegoc denegeng anoc. 4 Nga Petorongo Yesuac deec, “Kebu, nenang yei kecni songea andeac ge negenna naric anu bedzo bedzo harebec meba. Geac mong nga Moseac mong amma Eriac mong.” 5 Anu Petorongo ifi denammanungoc hoeng mong kperagiagocngo mama semeyunumanu hoeng manaunac yoacudumeng mong yofi kpacma deec, “Yomoc neac Songomedacna, ye hensongo ammiduae. Ngeni yeac yoac negembisia.” 6 Nga medac yeni imoc negemma kengec ebiria amma bangecfu makpema kicmesungina sufugec. 7 Ifi anggec Yesungo yenearu kemma midiyunuma yofi edeyunuec, “Ngeni yacgec, kengec mi anggec.” 8 ifi deu yeni kicngina fima ngic mong mi henggec, yeni Yesu yengenasac nanu henggec.

9 Anu tikiunac mama Yesungo deracyunuma yofi deec, “Ngeni onga hendau, imocac ngic mong mi edeyunubisia. Kecma Ngicac Medacngo homecfunac gborima yaruguc ine edeyunubisia.” 10 ifi deu medacfora yeneng kpesimigec, “Mitiac negen negengngic yeni dafiac Eriango waraima haudeac deandae?” 11 ifi degec yeng yofi edeyunuec, “Eriango warai hama

wiac sasawa memengere anudenoc.” <sup>12</sup> Ni yofi edengunuba negenggec, “Eria ye bic hau yeni mi hensima yenang songo modacma faka hania hania ammigec. Nga yeni Ngicac Medac ifingoc kpendzenu faigec kpendzeng kpeude.” <sup>13</sup> Ifi deu medac yeni Yohane dokunadzicac deec, imoc bic irick-egec.

<sup>14</sup> Anu yeni tikiunac mama habutoa yenearu kensikemagec ngic mongngo Yesuaru hama fafoc heimima deec, <sup>15</sup> “Kebu, ge medacnaac ubaga manganeu. Ye afonasoya hau kpendzeng ebiria kpema naso homac gerecfu nga dokuu kemeande. <sup>16</sup> Nga medacna geac medacfocga yenearu mekemba yeneng ye mengeregecdeac obohoma wadau.” <sup>17</sup> Ifi deu Yesungo yofi deec, “Ngicngac areng yomoc ngeni negen negensingngina kpac yombong amma ngeni fakangina sicsauha. Ni naso herea ngenigoc monggoc tacbadeac modzونا tide. Ngeni medac nearu mehagec.” <sup>18</sup> Deu mehagec Yesungo hadehade ngabayoac seria edeu ye medac imoc wama kenec. Kenu naso imohaingoc medac imoc ngereec.

<sup>19</sup> Ifi anu medacfora yeneng Yesuaru hama tembucongina tacma kpesimigec, “Neni dafiac hadehade imoc kporachibieding?” <sup>20</sup> Kpesimigec Yesungo yofi merengyemmeec, “Foracngoc, ngeni negen negensingngina kopianecsac fedecac obohoma wadau. Ngeni negen negensingngina mastet gbomea\* isoc fengemmeu debac ngeni tiki yomoc naric edegecde, ‘Tiki, ge yomohacnac yacma edimoc kenna.’ Ifi edegec ye kenude. Nga ngeni wiac monggac naric mi obohogecde. <sup>21</sup> Hadehade ifia yakasege kecma nunumungosac kporachesonga.”

<sup>22</sup> Yesu nga medacfora yeni yenhafoc Gariraia bangecfu kpedzucnema kecmagec yeng yofi edeyunuec, “Ngic yeneng Ngicac Medac kererema ngicngac yeneac mariu faigecde, imocac naso wegenede. <sup>23</sup> Faigec yeneng ye mema kpegec homeude. Homema uameme harebec ammanu homecfunac monggoc gborima yarude.” ifi deu yeni ubaebic kuneng megec.

<sup>24</sup> Anu Kafanaung taonnu kensikemagec Anutuac womonggac takesimemengic yeneng Petoroaru hama kpesimigec, “Ngeneac kpoukpou ye womonggac takesi faiande me kpac?” <sup>25</sup> ifi degec Petorong deec, “Oc, faiande.” Ifi dema amau emma yoac mi demanu Yesungo kpesimieci, “Simong, ge dafi negennec, bangeha bangeha ngictaungina, yeni takesi meracarunac meandae? Yeni yenang medacfcngina, yenearunac me ngicngac goa yenearunac meandae?” <sup>26</sup> Kpesimiu deec, “Yeni ngicngac goa yenearunac meandae.” ifi deu Yesungo yofi deec, “Ifiac amma medacfora yeni takesi mi faifai eng kecgecde. <sup>27</sup> Nga yeni neranggac negemmangang mi anggecdeac amma geng ine dzohong tegiau kemma kondungyang memecac hawic mong ukuna. Ukuma kondungyang waraima menade, imocac enara mekpacgema siriwadzo mong meficgenade. Meficgema dzo imoc mema neac nga geangga kpacfu takesimemengic yenmebesena.”

## 18

<sup>1</sup> Naso imohai medac yeneng Yesuaru hama kpesimigec, “Kurumeng-gac eucerereng, imocac arennu merang kuneng kecde?” <sup>2</sup> Ifi kpesimigec Yesungo nambarac yenearunac mong kparec. Kparu kenu ye botucnginau faiu nanu yofi deec, <sup>3</sup> “Foracngoc, ngeni ubangina mi merenggecde amma nambarac yeni isoc mi anggecdeu kurumenggac eucererennu naric mi

\* **17:20:** Mastet gbomea imoc homong gbomea isoc kapia yombong.

enggecde. <sup>4</sup> Imocac ngic mong ye memaemema medac yofia, yeac siricfu kefude, yeng kurumenggac eucererennu kuneng kefude. <sup>5</sup> Nga mong ye nambarac yenearunac mong yofia neac kpacfu hoanggeude, yeng ni hoan-nuude.

<sup>6</sup> Nga nambarac kapia yenearunac mong ni negensinnude, ye mongngo ngombonggeu sing segeudeu faka yomocngo yearu ngereebac. Ye yaguc-noc dzamandzingtoa ubiau ubahemima kondung keme kemeau ukugec kemebac. <sup>7</sup> Bangectoa bangec yomocac ngic manganaac ngombonggema ogofocngina kopocsicfu faiyunuandae, yeni sowecnginagoc. Nga faka imoc fingerude, amma ngic mong ye faka imoc fingerudeac ngombonggeude, ye ebihagoc. <sup>8</sup> Ge haniga me mariga mongngo anggenu kopocsic meficgenadeu geng imoc herecgema ukuna kembeso. Hanimariga hafaogoc kecma gerec wisic wisickea kpac, imohai ukugugec kemebanggac, hani mangang me hanimariga tegec tegera kecma kekecseriu ennade, imoc ine ngereeude. <sup>9</sup> Me kicga mongngo anggenu kopocsic meficgenadeu geng kicga meickema ukuna kembeso. Ge kicga yohockanggoc kecma hofeac gerecfu ukugugec kemebanggac kicga nobohagocsac kecma kekecseriu ennade, imoc naric anude. <sup>10</sup> Ngeni nambarac kapia, yenearunac mong ubango mi ukubisia. Ni edengunuba negenggec, nambarac yeneac angerofocngina kurumennu kecdae, yeni nasosoc Manna kurumennu kecde, yeac kicmesuya hengkecdae. <sup>11</sup> Nga Ngicac Medacngo ngicngac sufu sufuya, yeni ebicfunac kpedzucyunuma meyunuudeac maec.

<sup>12</sup> Ngic mong ye ramafora 100 mekecde, imohacnac mong kemma sufuu yofi anude. Ye ramafora 99 tikiu wayunuu nanggec kemma sufudacmoc, imocnoc hoforude. <sup>13</sup> Hofockecma meficgema yeac ubangerec kuneng negenude. Nga 99 mi sufugec, yeneac ubangerec negengande, imoc ferahema sufuec, yeac ubangerec kuneng negenude, imoc fora yombong. <sup>14</sup> Nga Mangngina kurumennu kecde, yeng ifi isocngoc areng kapia yomoc, yenearunac mongngo mi sufuudeac negemma kecde.

<sup>15</sup> Ogoga mongngo gearu kopocsic meficgeudeu ge kenna yegoc tembucngira tacma imoc deficgemina. Nga yeng yoacga negenudeu ge firang anna ye geac ogoga monggoc anude. <sup>16</sup> Nga ye yoacga mi negenudeu geng ine ngic mocgu me yohockang meyruruna ngenahafoc ebic imoc mengeregecdeac tachisia. Ifi amma ngic yohockang me harebec dede sasawa demeseri ambisia.

(*Dedeseri 19:15*) <sup>17</sup> Nga ye yoacngina mi negenudeu ngeni ine kemma kpebung edeyunubisia. Edeyunugec yeng kpebung yeneac yoac ifingoc waudeu ine ngic imoc henggec ye ngic Anutu mi negemmidae nga takesimemengic, yeni isoc ambeso. <sup>18</sup> Foracngoc, ngeni bangecfu wiac sasawa dzegegecde, imoc kurumennu ifingoc dzege dzegea feude. Nga ngeni bangecfu wiac yungecdacgecde, imoc kurumennu ifingoc yungec yungera feude. <sup>19-20</sup> Imoc yofiac, yei bangecfu ngicngac yohockang me harebcngoc neac kpacfu kpeturanggema tacgecdeu ni botucnginau kecbade. Imocac ngenearunac yohockangngo uba mocgu amma wiac monggac me monggac kpesiecdeu Manna kurumennu kecde, yeng negengnecmema imoc ngemerude.”

<sup>21</sup> Anu Petorongo Yesuaru hama kpesimiec, “Kebu, ogonango nearu kopocsic meficgeudeu naso dafiguc kopocsia wabadeac negennec? Atac 7 soha ande me?” <sup>22</sup> Ifi deu Yesungo yofi meremmiec, “Atac 7 kpac, atac 70 namma ende imocac deduae. <sup>23</sup> Imocac kurumenggac eucerereng imoc ngictau mong ngic homac mingingngina kefec, ye isoc. Nga yeng wanacngic yeni

yearu turungngina kpougecdeac nasoya faiec. <sup>24</sup> Faiu hagec turungnginaac ising ising ua hanaheu ngic mong ye turunga kifa 150 tausenggac uabung, imocacsoc feec, ngic imoc yearu mehagec.\*

<sup>25</sup> Nga ye turunga imoc kpoudeac obohoma minginango edeu yengena nga enemmedacfora minging monggaru sueyunuma wiara sasawa suedacma, imocngo dzo kirecgeu turung imoc kpac anudeac deec. <sup>26</sup> Ifi deu wanacngic ye imoc negemma minginaac kicfu makpema deec, 'Kunenna, ge neac ubaga manganeu tomaina kecmana turunna kpoudachade.' <sup>27</sup> Ifi deu minginango yeac ubea manganeu yoara nga turunga momoc waec.

<sup>28</sup> Anu wanacngic ye ngadeau kemeece. Kemema ine wanacngic ogea mong yearu turunga uameme 100ac uabung† feec, ye meficgeec. Meficgema ye mendanggema ubea mendzicma deec, 'Neac turunna gearu fede, imoc bic kpouendacna.' <sup>29</sup> Ifi deu wanacngic ogeango imoc negemma yeac kicfu makpema desambic ammima deec, 'Ge neacneac ubaga manganeu tomal kecmana turungga imoc ngade kpoubade.' <sup>30</sup> ifi deu ogeango yeac yoac wama turunga kpoudacmaguc maudeac mekemma witicamau faiu tarec. <sup>31</sup> Taru wanacngic ogofocngira yeneng faka imoc hemma ubangina homac manganeu negenggec naric mi anec. Nga yeni kemma faka fingerec, imoc sasawa mingingngina edegec. <sup>32</sup> Edegec mingingnginango wanacngic imoc deu hau edeec, 'Ge wanacngic mangac manganea. Geng desambic anenna turungga sasawa wadua. <sup>33</sup> Nga neng geac ubana manganeu turungga wadua, ge ifi isoc wanacngic ogogaac ubaga ifingoc manganeu turunga wabanggacsoc.' <sup>34</sup> Ifi dema minginango herebu negemma ngaba ammima witicamagareng yeneac mariu faiec. Faiu wanacngic ye turung imoc sasawa kpoudacmaguc maudeac deec.

<sup>35</sup> Anu ngeni sasawango ogofocngina tembuc tembuc yeneac kopocsic ubaherenginango yombong mi wagecdeu Manna kurumennu kecde, yeng sirihia ifingoc ngeni angemmeude."

## 19

<sup>1</sup> Yesungo yoac imoc dedaru wisickeu Gariraia bangec wama Yudaia bangecfu Yodang nobocgengau kenec. <sup>2</sup> Kenu ngicngac habutoa kuneng yombong ye modacgec yeng ngicngac hafeinginagoc mengereyunuec.

<sup>3</sup> Anu farisaio yeneng yearu hama faitobannu faigecdeac kpesimigec, "Ngic ye enema wiac haniaac amma waude, singngo imoc dede me?"

<sup>4</sup> Ifi degec Yesungo meremma yofi edeyunuec, "Fingec fingec minginango hanahema deu ngic nga ngac anecde, ifi meficyuruec. Ngeni imocnoc osonegeng angandae.

*(Fingec fingec*

*1:27; 5:2)* <sup>5</sup> Ye meficyuruma yofi deec, 'Imocac amma ngic ye nonggomama wayuruma enemaaru kpeketaheu yegoc sebi mocgu anecde.'

*(Fingec*

*fingec 2:24)* <sup>6</sup> Ifi anecdeac yeri yohockang monggoc mi andape, kpac. Yeri sebi mocgu anecdeac yofi ande, Anutungo wiac dzegeec, imoc ngicngo naric mi herecgebeso."

<sup>7</sup> Deu degec, "Nga dafiac Mosengo dedeseri yofi nemmeec, ngic mongngo ngac wawa kibi ohoma ngac miu ngac ye wau kembeso?" <sup>8</sup> Ifi degec Yesungo yofi deec, "Ngeni ngic ubaseri nga herengina dzege dzegea, imocac Mosengo enengfocngina wayunugecdeac kpaec mi heiec. Nga hanac hanaheaunac

\* **18:24:** Yesu ye 10 tauseng tarantong deec. Tarantong imoc dzotoangina anec. Nga 10 tauseng imoc kpetetoangina anec. Imocac witiau mi osocec. † **18:28:** Ye 100 denari deec.

ereec sing ifia mong mi feec. <sup>9</sup> Ni ine yofi edengunuba, ngic mongngo enema serofaka mi ammanu ye eng wama ngac mong meude, ngic imocngo serofaka anude.”

<sup>10</sup> Ifi deu negemma medacfora yeneng degec, “Eweeneng yereac botucfu faka ifia fedeu eweeneng kecec kecnide, imoc gombunga yombong kpac.”

<sup>11</sup> Ifi degec Yesungo yofi edeyunuec, “Yoac yomoc goa yenearu mi heiude. Yoac imoc ngic yemmeyemmea yenearusac heiude. <sup>12</sup> Ngic goa yeni nonggo heremanaunac kufing fingecegec. Nga goa yeni ngicngo faka ayemmegec kufing anggec amma ngic goa yeni kurumeng eucererenggac amma kufing isoc kecandae. Ngic mong ye yoac imoc yearu heide, yeng imoc mebeso.”

<sup>13</sup> Anu ngicngac yeneng nambaracfocngina kapiabisic Yesuaru meyunu kemma negenggec, “Yeng mariango nambarac witinginau faima numuyem-meude.” ifi anggec medacfora yeneng kpetariyemmegec. <sup>14</sup> Yesungo ine yofi deec, “Nambarachisic bisic yeni nearu naric hagec. Ngeni kpaie mi heiyemmegec. Kurumenggac eucerereng imoc nambarachisic bisic yofia yeneac.” <sup>15</sup> Ifi dema maria witinginau faima kenecyunu wisickeu ye amabangec imoc wama monnu kenec.

<sup>16</sup> Negenggec, ngic mongngo Yesuaru hama deec, “Kpoukpou, ni noc faka gombunga angkecma kekecseri mebai?” <sup>17</sup> Ifi deu yeng yofi deec, “Ge wiac gombunga ni mi kpesinenna. Mocgungo gombunga kecede. Nga ge kekecseri embesonga dema dedeseriyoacnina tofohobesena.” <sup>18</sup> Ifi deu deec,

“Dedeseriyoac damoc tofohobadeac denec?” ifi deu Yesungo yofi deec, “Ge ngicngac mi yunuhomebesena nga kaisero mi ambesena nga hamangec mi mebesena amma enacfu faifai mi ambesena. <sup>19</sup> Ge nonggo manghocga seseyurubesena amma geangga anggengande, siriha imocngoc ogofocga heresongogoc hoangyunubesena.”  
(*Makekeng 20:12-16; Dedeseri 5:16-20; Sesememe 19:18*)

<sup>20</sup> Ifi deu sebigboringic yeng deec, “Ni imoc sasawa modacanduae. Nga noc wiacac monggoc kpedadanggebade?” <sup>21</sup> Deu Yesungo yofi edeec, “Ge ngic dindingac hafoangoc kecbesonga negennec isoc, yofi anna. Kemma wiacga sasawa suedacma hiedzoga mema ngicngac makpekpea yemmebesena. Ifi anna kurumenggac dzofinac fingecegnu hama modacnubesena.” <sup>22</sup> Ifi deu sebigboringic ye dzofinaha homac femieac yoac imoc negemma ubaebic mema kenec.

<sup>23</sup> Kenu Yesungo medacfora yofi edeyunuec, “Foracngoc, ngic mong dzo-finactogoc, ye kurumenggac eucererennu enudeac ambibieude. <sup>24</sup> Amma monggoc deba negenggec, kamerengo bungic singau engeng, imoc ua efea nga ngic dzofinacgoc yeng Anutuac eucererennu engeng, imocngo ine uatoayagoc.” <sup>25</sup> Ifi deu medac yeneng yoac imoc negemma kpidohoma karectegec yombong amma degec, “Ifi anu merang naric komoc kpeude?”

<sup>26</sup> Ifi degec Yesungo yenemma yofi deec, “Ngic ngeni imoc obohoma wagecde nga Anutungo wiac sasawa naric meude.” <sup>27</sup> Ifi deu Petorong deec, “Negen-na, neni wiacnina sasawa wadacma modacguma kecdimbe. Imocac neni noc wiac menide?” <sup>28</sup> ifi deu Yesungo yofi edeec, “Foracngoc, kecma wiac sasawa gboria fingerude, naso imohai Ngicac Medacngo kurumenggac kuc nga kibikperagiaac ngictautatahau tarude. Nga ngic modacnuandae, ngeni ifingoc ngictautatac 12 imohai tacma Israeac kisis 12, yeneac fakangina isinggema desigece. <sup>29</sup> Nga ngicngac kpacnaac amma amafocngina me dacmunafocngina me nonggo mangfocngina me nambaracfocngina

me bangecngina wagec, ngeni sasawango wiac imocac naso 100 monggoc megecde nga kekecseringo maridzomingngina ambesande. <sup>30</sup> Ngic warac warac kecandae, yenearunac ine homacngo ngadea anggecde nga ngadea kecdae, yenearunac homacngo warac warac anggecde.”

## 20

<sup>1</sup> “Kurumenggac eucerereng imoc ngic mong amabangehagoc, sirihia imocacsoc. Ye asoacngoc kemma ngic waing uayau ua megecdeac ngic yagura meyunuec. <sup>2</sup> Meyunuma ua ngic yagura yeni uameme mocguac dzo ifiasoc megecdeac denegeng amma uba mocgu amma sueyunuu uau kenggec.\*

<sup>3</sup> Nga 9 kiroc ammanu waing ua minginango ngic goa kpedzaroc sobennu eng nanggec yenemma <sup>4</sup> yofi edeyunuec, ‘Ngeni ifingoc waing uanau kemma ua megec, imocac sirihau dzo ngenmebade.’ <sup>5</sup> Ifi deu yeni waing uayau kenggec. Nga ye 12 kiroc nga 3 kirocfu faka imocngoc anec. <sup>6</sup> Nga 5 kiroc anu ye monggoc kemma ngic goa ifingoc eng nanggec meficyunuma yofi edeyunuec, ‘Ngeni nocac eng nanggec ama marai ande?’ <sup>7</sup> Ifi deu degec, ‘Ngc mongngo uayoac mong mi denemmedac.’ Ifi degec yofi edeyunuec, ‘Ngeni ifingoc kemma neac waing uau ua mebisia.’

<sup>8</sup> Ama marai anu ua minginango ua gareng yofi edeac, ‘Ge yagurangic kpacyununa hagec uaac bung yemmena. Amma ngic wisic wisickea hagec, yenearunac hanahema yemmekengkecna waraima hadau, yenearu wisickebeso.’ <sup>9</sup> Ifi deu ua garengngo ngic 5 kiroc hagec, yeni hanahema ua meme mocguac bung, ifi yemmeec. <sup>10</sup> Yemmeu ngic waraima hagec yeneng negenggec, ‘Ye dzo meemma nemmeude.’ Nga ua garengngo dzo kpetea imocngoc yemmeec. <sup>11</sup> Yemmeu yeni dzo kpetea imoc hemma negenggec naric mi anu waing ua mingina <sup>12</sup> edegec, ‘Ngc yomoc yeni ngade yombong hama aua mocgusac ua megec. Nga neni ine asoacngoc hama uaac ebic hemma wenaclu namma meerekecni ama marai ande. Nga geng yenigoc sirihia mocgungoc anemmedang.’ <sup>13</sup> Ifi degec yeng yenearunac mong yofi edeac, ‘Ogona, ni kopocsic mong mi meficgengendua. Negenna, nerang waraima uameme mocguac dzo ifiasoc deserima uba mocgu andic. <sup>14</sup> Ge imocac dzoga mema kenna. Nga neng ine yagurangic ngade hadau yeni bung sofungoc yemmebadeac songona ande. <sup>15</sup> Ni neanna hiedzongo ifi me ifi ambesonga negemma imoc naric ambai. Amma fakana gombunga anu imocac negen negengga mi manganebeso.’ <sup>16</sup> Ifi isoc ngadea yeneng warac warac anggecde nga warac warac yeneng ine ngadea anggecde.”

<sup>17</sup> Yesungo medacforagoc Yerusarennu kembeso kemma sinnu tembucnginau yofi edeyunuec, <sup>18</sup> “Negendae, nenang Yerusarennu endimbe. Enni ngic yeneng Ngicac Medac womong gareng enara nga mitiac negen negengngic, yeneac mariu faigece. Faigece yeneng ye homeudeac desigece. <sup>19</sup> Desima ye bangec monnunac ngic Anutu mi negemmidae, yeneac mariu faigece. Faigece yeneng deendema ammima dzikacngo kpema sebia kpekperecge amma mariponnu kpegec homeude. Amma uameme harebec kemmanu homecfunac monggoc yarude.”

<sup>20</sup> Anu Dzebedaioc medahora nonggongirango meyuruu Yesuaru hagec. Hama Yesu fafoc heimima deec, “Ni wiac monggac naric kpesigembai me?” <sup>21</sup> Ifi deu deec, “Ge noc wiacac anggende?” Deu edeac, “Medachocna yomoc

\* **20:2:** Yeni denari mocgu degec. Denari imoc Roma yeneac dzo monggac kpara. Yesuac nasou denari mocgu uameme mocguac bung anec.



yereng eucererenggau mongngo foigau nga mongngo kanagau tarecde, imoc deserinenna.”<sup>22</sup> Ifi deu Yesungo yofi deec, “Ngeni wiac kpesidae, imocac hania mi negenghomedae. Nga neng kpendzenggac kpakenecfu nebeso anduae, ngeri imoc necdeac dedape me?” deu deoc, “Oc, naric nedede.”<sup>23</sup> Yeri ifi deec Yesungo yofi edeyuruec, “Ni kpendzenggac kpakenecfu nebade, ngeri imocngoc necde. Nga ngic merang foinau me kananau tarude, imocac fora ine neng naric mi desibade. Mannango ngic tatac imohai tarecdeac bic mengereec, yereng ihai naric tarecde.”

<sup>24</sup> Anu medacfora 10 yeneng imoc negemma dacmunac yereac negenggec manganeec. <sup>25</sup> Manganeu Yesungo kpacyunuu kenggec yofi edeyunuec, “Bangec monnunac ngicngac, yeneac ngictaufocngina ngicngac yeneac ngicngac siricfu garengyuanandae. Nga ngicngac kunengfocngina yeni ngicngacfocngina yeneng yoacngina modacgecdeac kuc feyemmede, ifinoc negengandae.”<sup>26-28</sup> Nga faka ifia ngeneac botucfu mong mi febeso, kpac. Ngicac Medacngo ngicngac yeneng yeac kingang kpegecdeac mi maec, kpac. Yeng yeneac kingang kpema ngicngac homac ebicfunac yungecyunuma kekeha wau yeneac doudeac maec. Ifi isoc ngeneanunac ngic mongngo engena kecheso ammide, yeng botucnginau kingang kpekpengina kecheso. Nga ngeneac botucfunac warac warac ambeso ammide, yeng botucnginau wanacngicngina kecheso.”

<sup>29</sup> Yesu nga medacfora yeni Yeriko taong wama kemmagec ngicngac habutoa kuneng yombong modacyunuec. <sup>30</sup> Nga sing tegiau kicpisc ngic yohockang taroc. Tarec ngicngac yeneng degec, “Yesungo hama kende.” ifi degec yeri imoc negemma kpacma deoc, “Kebu, Dawidiac bangeha, ge nereacnec ubaga manganeu.”<sup>31</sup> Ifi kparec ngicngac habutoa yeneng waickema tarecdeac kpetariyecmegec. Nga yeri ine monggoc seriangoc kpacma deoc, “Kebu, Dawidiac bangeha, ge nereacnec ubaga manganeu.”<sup>32</sup> Kparec Yesungo namma kpacyuruma yofi deec, “Ngeri noc wiac anecmebadeac negendape?”<sup>33</sup> deu deoc, “Kebu, neri kicnira tegerudeac negendipe.”<sup>34</sup> Deec Yesungo ubea manganeu mariango kicngira kpesereu yeri imohaingoc kicngira fima ye modaroc.

## 21

<sup>1</sup> Yesu nga medacfora yeni Yerusareng mewegenema Betefage amabangec Oriwa tikiu tarec, imohai kensikema Yesungo medahora yohockang yofi dema sueyuruec, <sup>2</sup> “Ngeri dindingac kemma guruama sing enarau tacde, imohai donggi mong bic meficgeecde. Ye medahagoc witickegec nande. Ngeri donggi imoc yungecyuruma nearu mehaec. <sup>3</sup> Nga ngeri ifi anec ngic mongngo ngeremma kpesingemerude isoc ngeri yofi edebesera, ‘Kebungo yerigoc ua meudeac dede.’ Ifi deec yeng donggi nonggomedac bic ngerigoc sueyuruude.”

<sup>4</sup> Profete yoc mong yofi deec, imoc fora anudeac ifi fingerec.

<sup>5</sup> “Ge Sionggac naraong yofi edebesena, ‘Henna, ngictauga hagende. Ye donggiu hade, ye donggi medahaac witiau tacde nga ye fakaya memaemeemea.’”  
(Dzekaraia 9:9)

<sup>6</sup> Nga medac yeri kemma Yesungo edeyuruec, ifi isoc anoc. <sup>7</sup> Ifi amma donggi medahagoc meyruma hama ngakpingira herea hesima donggi nonggomedac yereac witingirau tiameoc. Tiameec Yesungo imocac witiau tarec. <sup>8</sup> Taru ngicngac habutoa nanggec, yeni ngakpingina hesima sinnu tiamegec nga goa yeni ic fawa icfunac herecgema sinnu tiamegec. <sup>9</sup> Nga



ngicngac habutoa kiwau kenggec nga ngadeau modacgec, yeneng kpacma yofi degec,

“Ohec waec, Dawidiac kiscifunac, ohec. Ngic Kebuac kpacfu hade, ye kenehagoc. Wi kurumenu kpara dengeregec, ohec waec, hosanna.”  
(*Mitiyegec 118:26*)

<sup>10</sup> Yesungo Yerusarenu enu taonggac ngicngac sasawa yeni kpidohoma kengha amma degec, “Imoc merac?” <sup>11</sup> Ifi degec ngicngac habutoa yeneng edeyunuec, “Imoc Yesu, profetenoc Gariraia bangecfunac Nadzarete taonunac.”

<sup>12</sup> Anu Yesungo Anutuac womonggac oda manau emma ngicngac wiac emekpesi anggec, yeni imohacnac kporacyunuec. Ye ngic hiedzo emekpesi anggec, yeneac tebo heimeremma kebesac emegec, yeneac tatac ifingoc heimeremma <sup>13</sup> yofi edeyunuec,  
“Yoaç yofi oho ohoya fede, ‘Neac ama imoc nunumuama, kpara ifi kpacbesonga.’  
(*Yesaia 56:7*)

Nga ngeneng ine imoc merenggec,  
hamangec ngic yeneac sufu sufuama ande.” (Yeremaia 7:11)

<sup>14</sup> Anu womonggac odatoaac manau ngic kicpisc amma hanimangang yeneng yearu hagec yeng mengereyunuec. <sup>15</sup> Ye faka kuhagoc ifi meec nga nambarac yeneng womong manau kpacma yofi degec, “Dawidiac bangeha, ohec, hosanna.” Kpacgec womong gareng enara nga mitiac negen negengngic yeneng imoc hemma herebu negemma <sup>16</sup> Yesuaru kemma degec, “Yeni yoac dedaemoc, imoc negennec me?” Ifi degec yeng yofi deec, “Nengenduae amma ngeni yoac yomocnoc osonegeng mi angandae gedang,  
‘Ge nambarac kapia nga sabac namuu kecdae uayoac yemmena yeneng geac kpac kuneng heiwayong memigeçde.’ ” (Mitiyegec 8:2)

<sup>17</sup> Ifi dema wayunuma taong wama Betania amabangeçfu kemma tofocnac ihai kefec.

<sup>18</sup> Amma Yesungo asoac taonnu dzigene kemma hereaac homema <sup>19</sup> sing tegiau kic fima fig ic mong henec. Hemma negenu foragoc isoc anu haniau kemma mariasac hemma ic yofi edeec, “Ic, gearunac fora monggoc mi fingeckebesoa.” Ifi deu fig ic imoc imohaingoc ururuec. <sup>20</sup> Ururuec medacfora yeneng imoc hemma kpidohoma kpesimigec, “Fig ic imoc dafi bic yombong ururuede?” <sup>21</sup> Ifi dema kpesimigec Yesungo yofi edeyunuec, “Forangoc, ngeni negen negensingnagoc keçma negenyohoc mi anggeçdeu icfu faka medua, faka imoc naric megeçde, imoc edengunuduae. Nga imocsac kpac, ngeni ifingoc tiki yomocac yofi naric degeçde, ‘Tiki ge miacemema kondunnu ukuemema kemena.’ Ngeni ifi edegec, ifinoc anude. <sup>22</sup> Nga ngeni wiac monggac me monggac negensinggema nunumunginau kpesigeçdeu ngeni imoc sasawa megeçde.”

<sup>23</sup> Yesungo ifi dema taonnu hama womonnu emma kpoukpou ua meu womong gareng enara nga yudangic enarafocngina, yeneng hama kpesimigec, “Ge noc kucfu ua yomoc menec amma merang uayoac imoc geneç?”

<sup>24</sup> Ifi kpesimigec yeng yofi merengyemmeec, “Neng ngeni wiac monggac ifingoc kpesingemmba ngeni turunga edenugeçdeu ni uakibinaac hania imoc edengunubade. <sup>25</sup> Yohanengo dokunadzic ua mekefec, imoc dahacnac, kurumennunac me ngicfunac?” Deu yeni yenaocngoc denengeng amma degec, “‘Imoc kurumennunac.’ ifi denideu yeng yofi kpesinemmeude, ‘Ifi negemma ngeni nocac ye mi negensinggeç?’ <sup>26</sup> Me ‘Imoc ngicfunac.’ ifi denideu ngicngac sasawa yeni Yohaneac ye profete negendae, imocac

debesonga yeneac kengecnunude.” <sup>27</sup> Yeni ifi denegeng amma Yesu edegec, “Imoc mi negendimbe.” Ifi degec Yesungo yofi deec, “Ifi degec, ni ifingoc noc uayoacac kucfu ua mekecduae, imoc mi edengunubade.”

<sup>28</sup> Negenggec, “Ngiç mong ye medahora yohockang nga ye waracmeda-haaruu kemma edeac, ‘Medacna, ge yaguc waing uau kemma ua mebesena.’ <sup>29</sup> Ifi edeu medahango mereneç, ‘Ni imoc waduae.’ Ifi dema ine ngade ubea dzigeneu uau kenec. <sup>30</sup> Nga manggac ye kemma ngademedaha, yeac ifingoc edeu ngademedahango deec, ‘Manggac, ni naric kembade.’ Ifi dema kemma ihoc bahoc amma uau mong mi kenec.” <sup>31</sup> Ngeni dafi negendae, “Medac yerearunac merang mamaac songo modacma uaya meec?” Ifi kpesiyemueu degec, “Waracmedaha yeng.” degec Yesungo yofi edeyunuec, “Foracngoc, takesimeme ngic nga singtoangac yeneng waraingemmema Anutuac eucererennu enggecde. <sup>32</sup> Yohanengo sing dindingac modacma ngenearu hau ngeni ine mi negensinggec. Nga takesimeme ngic nga singtoangac yeneng ye negensinggec. Ngeni ine imoc henggec amma sifu ubangina mi merenggec nga mi negensinggec.”

<sup>33</sup> Ni yoac mong heiba negenggec, “Ngiç mong amabangehagoc ye waing ua mong homecma oda dzegeec. Dzegema waing tidzoc tidzohoc teng usuma gareng yeneac kicfifiac amaherec meec. Ifi meu wisickeu waing ua garenggegecdeac ngic meficyunuma yenigoc yoac dedzege anggec. Nga yengenaoc ine bangec hereau kenec. <sup>34</sup> Kenu fora kpememe naso hau ye wanacngicfora sueyunuu uagareng yenearu waing fora megecdeac kenggec. <sup>35</sup> Kenggec ua gareng yeneng ine minginaac wanacngicfora meyunuma mong kpema mong kpehomema mong hocngo heigec. <sup>36</sup> Ifi anggec ua minginango wanacngic goa homac monggoc sueyunuu kenggec gareng yeneng faka imocngoc ayemmegec. <sup>37</sup> Nga ngade ua minginango yofi negemma yengena medaha sueec, ‘Yeni medacnaac ewea sifu heigecde.’ <sup>38</sup> Ifi dema sueu kenu ua gareng yeneng medaha hemma yofi denegeng anggec, ‘Yeng kecma ua yomoc tiu enude, imocac ye kpehomema bangeha nga maridzominga sasawa meni nenang ambeso.’ <sup>39</sup> Ifi dema miacukugec oda ngadeau kemeu mema kpehomegec.

<sup>40</sup> Nga ua minginango monggoc hama uagareng dafi ayemmeude?” <sup>41</sup> Ifi deu degec, “Ua minginango hama uagareng mangana memanganeyunuma yunuhomema waing uaya imoc uagareng goa yeneac mariu faiude. Faiu yeneng imoc garenggema foranasou mingina fora migeçde.” <sup>42</sup> Ifi degec Yesungo yofi deec, “Mitikibiyou yoac yofi oho ohoya fede,

‘Amameme ngic yeneng hoc mong mangana dema ukugec. Nga hoc imocngo amaac hoc wotung amma seria nanude. Kebu yengenaoc faka imoc meu ngicngo hensongo ammidimbe.’ *(Mitiyegec 118:22-23)*

Ngeni kibi imoc osonegeng mi angandae gedang. <sup>43</sup> Imocac amma edengunuba negenggec, Anutungo eucerereng ngenearunac meickema areng mong yenemmeude. Nga yeneng eucererenggac uaya mema foraya meficgegecde. <sup>44</sup> Nga ngic mong ye hoc imocac witiu maude, ye sebua tegerude. Nga hoc imocngo yeac witiu makpema hedzameu kapuc kpeude.”

<sup>45</sup> Anu Yesungo yoac heieç, imoc womong gareng enara nga farisaio yeneac deec, imoc bic negentegegec. <sup>46</sup> Yeni ifi negenggec nga habu yeneng yeac profete degecac yeni ine Yesu mendanggegecdeac kengecyunuu osima wagec.

## 22

<sup>1</sup> Yesungo yoa mong heima torokpema yofi edeyunuec, <sup>2</sup> “Kurumenggac eucerereng imoc ngictau mong isoc, ye medahaac memeturang nasoac yakatoa ohoma memengere anec. <sup>3</sup> Amma ngictaungo wanacngicfora suyunuu yeni ngicngac memeturanggac amma bic heitaiyunuec, yeni wangecyunugecdeac kenggec. Kenggec ngicngac yeneng ine modzongina tiu wagec. <sup>4</sup> Wagec ngictaungo wanacngicfora goa monggoc sueyunuma yofi deec, ‘Ngeni kemma ngic bic heitaiyunuai, yeni edeyunuec, “Negendae, burumakana ngiwa nga yang kerectoayagoc imoc bic kpeoho amma yakatoa merumedacdua. Ni wiac sasawa bic memockedua, imocac ngeni hagec.”’

<sup>5</sup> Ifi deu kemma edeyunuec, yeneng ine yoa monggoc hau imoc negemma modzongina tiu eng wama kengha angec. Mong ye uayau kenec nga mongngo kpounec uayau kenec. <sup>6</sup> Nga ngicngac tosea yeneng ngictauac wanacngicfora ngaba ayemmema yunuhomegec. <sup>7</sup> Ifi angec ngictau ye imoc negemma herebu amma wasaifora sueyunuu kemma ngickpepkepic imoc yunuma taongngina faigec dzeec. <sup>8</sup> Amma wanacngicfora yofi edeyunuec, ‘Memeturanggac yaka imoc bic mengec mengerea nga ngic heitaiyunudua, yeni areng mangana ifiango nearu hagecdeacsoc mi ande. <sup>9</sup> Imocac ngeni sing sosocfu kemma namma ngic meficyunugecdesoc, yeni edeyunuec memeturanggac amau habisia.’ <sup>10</sup> Ifi deu wanacngic yeni sinnu kemma ngic meficyunugecsoc gombunga nga mangana momoc hesicyunudacma hama memeturanggac yakaama imoc mewahegec.

<sup>11</sup> Anu ngicngac yeni hadacma tacgec ngictaungo yenenudeac hama ngic mong memeturanggac ngakpi mi heima tarec, <sup>12</sup> ye hemma yofi edeac, ‘Tosona, ge dafi memeturanggac ngakpi mi heima erema tacnec?’ Ifi deu ngic ye yoara kpac waickema taru <sup>13</sup> ngictaungo kingangngicfora yeneac yofi deec, ‘Ngeni hanimaria kpema ngadeau kundunnu ukugec kemeu. Ihai kiacma enara kisaranggema kecbeso.’ <sup>14</sup> Ngicngac kpacyunuyunuya, yeni homac nga meisingyunuyunuya, yeneng ine efeanec.”

<sup>15</sup> Anu farisaio yeneng kemma yoa dafi dema Yesu tobanggeni yoa goa segeu meni dema imocac denegeng angec. <sup>16</sup> Ifi amma medacfocongina nga Herodeac areng goa Yesuaru sueyunuec kemma degec, “Kpoukpou, ge yoa fora dekecnec, imoc negendimbe. Nga Anutuac sing dindingac ngicngac edekpou anemkecnec amma ngic monggac me monggac songo mi negemma engena mamea socfungoc anemmeannec. <sup>17</sup> Imocac dafi negennec, damocngo naric ande, neni takesi ngictau Sisa naric minide me kpac?” <sup>18</sup> Ifi degec Yesungo ngabasiricfu degec, imoc negemma yofi edeyunuec, “Ikongic, ngeni nocac suba idenendae? <sup>19</sup> Ngeni takesi faian-dae, imohacnac dzo mong mehagec hembra.” Ifi deu yeni denarihoc mong mekemma edzahegec <sup>20</sup> yeng imoc hemma yofi kpesiyemmec, “Onga nga kibi yoc, imoc meracac?” <sup>21</sup> Deu degec, “Imoc Sisaac.” Ifi degec yofi edeyunuec, “Imocac ngeni Sisaac wiac Sisa mibisia nga Anutuac wiac Anutu mibisia.” <sup>22</sup> Ifi deu yeni imocac negenggec engena anu wama kenggec.

<sup>23</sup> Sadukaio areng yeni homecfunac yacyac mi fede, ifi dekecdae, yegnearunac ngic goango wenac imohaingoc Yesuaru hama kpesimigec, <sup>24</sup> “Kpoukpou, Mosengo yofi deec, ‘Ngc mongngo ngac meec nga ye gboriha kpac kecma homeu muneango daraac hodzec mema gboric kpefigema daraac kpac miacma kecbeso.’

(*Dedeseri 25:5-10*)

<sup>25</sup> Dacmunac seweng nenigoc kecgec, yegnearunac waracdacnginango ngacfu kemma gboriha kpac kecma homeu muneango hodzaha meec.

<sup>26</sup> Meu munea nga yeac ngadeau munafora 5 kecgec, yenearu faka ifiangoc fingeru yeni sasawango homedacgec. <sup>27</sup> Homedacgec ngac ye ifingoc kecma homeec. <sup>28</sup> Ngic seweng yeni sasawango ngac yeac ewea anggec. Nga yacyac nasou ngac imoc meracac enema anude?”

<sup>29</sup> Ifi degec Yesungo meremma yofi edeyunuec, “Ngeni mitikibi nga Anutuac kuc mi negentegecdaec yoac desufudae. <sup>30</sup> Yacyac nasou ngicngac yeni monggoc mi meemegecde amma manggac mongngo yofi mi deude, ‘Ni naroanna ngic mibade.’ Imohai ngicngac yeni ine kurumenggac angero, yeni isoc anggecde. <sup>31</sup> Nga homecfunac yacyac dema Anutungo yofi bic edengunuec,

<sup>32</sup> ‘Ni Abrahang nga Isaka amma Yakobo, yeneac Anutu.’ (*Makekeng 3:6*) Ngeni imoc osonegeng mi angandae gedang. Nga ye ine ngic homemea, yeneac Anutu kpac. Ye gbori kecdimbe, neneac Anutu.” <sup>33</sup> Nga ngicngac habutoa yeni kpoukpouya imoc negenggec engena anec.

<sup>34</sup> Anu farisaio yeneng yoac yomoc negenggec, “Yesungo sadukaio yeneac yoac merenu yoacngina dugung kpeu engsac nanggec.” Yeni imoc negemma kpedzucnema <sup>35</sup> yeneac botucfunac dedeseriyoacac negen negengngic mongngo Yesu faitobannu faima kpesimiec, <sup>36</sup> “Kpoukpou, dedeseriyoacac manau dedeseriyoac damocngo engena yombong ande?” <sup>37</sup> Ifi kpesimiu yofi edeec,

“‘Ge ubaherega nga ubaongaga amma negen negengga hafaogoc Kebu Anutugaac songo negemma kecbesena.’ (*Dedeseri 6:4-5*)

<sup>38</sup> Imocngo dedeseriyoacac warac warac nga kuneng ande. <sup>39</sup> Nga imocac ngadeau ogea yofi,

‘Ge geangga anggengande, siriha imocngoc gegoc wegena kecdae, yeni heresongoc hoangyunubesena.’ (*Sesememe 19:18*)

<sup>40</sup> Dedeseriyoac nga profeteyoac sasawango dedeseriyoac yohockang yomocac witiau tima nandae.”

<sup>41</sup> Anu farisaio yeni kpedzucnema tacmagec Yesungo yofi kpesiyemmeec,

<sup>42</sup> “Ngeni Messiaac hania dafi negendae, ye meracac kisicfunac?” Kpesiu meremmigec, “Ye Dawidiac bangeha.” <sup>43</sup> Ifi degec Yesungo yofi deec, “Ifi anu Tiri Asungo dafiac Dawidiac enac meefaiu yeac ‘Neac Kebu.’ dema yofi deec,”

<sup>44</sup> “KEBUNGO neac Kebu edeec, ‘Ge foinaugeng tacmana ngabafocga hani-gaac bageau faiyunuba yeni hanititiga anggecde.’” (*Mitiyegec 110:1*)

Ifi deec. <sup>45</sup> Nga Dawidi yengenaoc kpara yofi kparec, “Neac Kebu. Nga Messiang dafiu Dawidiac bangeha ande?” <sup>46</sup> Ifi deu yeni Yesuac yoac turunga merembesonga obohogec. Obohoma naso imohacnac erema yeac kengec amma mongngo dekpesi monggoc mi ammigec.

## 23

<sup>1</sup> Yesungo ngicngac habutoa nga medacfora yofi edeyunuec, <sup>2</sup> “Mitiac negen negengngic nga farisaio yeni Moseac tatacfa tacdaeac <sup>3</sup> yeni yoac edengunudae, ngeni imoc sasawa tofohoma modacbisia. Nga yeni faka angandae, ngeni sirc ifi mi ambisia. Yeni yoac edengunuandae, imoc ine yenaoc mi modacandae. <sup>4</sup> Yeni singyoacac dede ebiria yombong dedeckema ngic ngeneac fuau faigec ebiriude. Nga yenaoc ine dede imoc meefaima meficngunugecdeac gbongnginango miacgecdeac mi ayemmeude. <sup>5</sup> Yeni

ngicngo fakangina henggecdeac mitigbomea kandachisic bisicngina meya-diandae.\* Amma ngakpingina herea heiandae, imohai witic kibi kibi kpatainggema nangande, imoc kuneng yombong meandae.†

6 Yeni yakatoa nasou nga kpekpeturang amau warac warac tatacfu tachesonga ayemmeude. 7 Nga kpedzaroc sobennu ngicngac yeneng 'Wenacngerec.' nga 'Gareng,' ifi dema kpacyunugecdeac homac ayemmeude.

8 Anu ngeni garengngina mocgungo kecde nga ngeni sasawa dacmunac andae. Imocac ngeneac negemma mongngo 'Gareng,' ifi mi kpacngunubeso.

9 Mangngina mocgungo kurumennu kecdeac amma ngeni bangecfu ngic monggac 'Mannina,' ifi mi debisia. 10 Nga kunengngina Messia mocgungo kecdeac amma ngic mongngo 'Kunenna,' ifi mi kpacngunubeso.

11 Nga kunengngina kecde, yeng ine ngeneac kingangkpekpe kecbeso. 12 Ngic mong ye yengenaac negenu engena angkecde, ye mamea anudeac memagecde. Nga mong ye yengenaac negenu mamea angkecde, ye meenggecde.

13 Mitiac negen negengngic nga farisaio, ngeni kurumeng eucererenggac nagu kpebung yeneac kicnginau heiandae. Ngeneng imohai enggecdeac segeandae nga kpebung yengeng embesonga ammagec kpaie ifingoc heiyem-mekecdae. Ngeni ikocfakangina ifia mekecdaeac ngeni sowecnginagoc.

14 Mitiac negen negengngic nga farisaio ngeni sowecnginagoc. Ngeni ngachodzec amangina wangecyunugec engsac kecgecde. Amma ngicngac yeneng negengngerec ngenimegecdeac ngeni nunumu hereangoc numuandae. Ngeni ikocfaka ifia angandaeac turunga ebiriangoc megecde.

15 Mitiac negen negengngic nga farisaio, ngeni ngic mocgu dekerecyoac ammigeccdeac bangeha bangeha nga kondung ferecgema kengandae. Nga yeng ngenearu torokpeu mefahegec, ye ngenang isoc hofeac nambarac amma feracngunuma kemeude. Ikocfakangina ifia mekecdaeac ngeni sowecnginagoc.

16 Sing edzac edzac ngic, ngeninoc kicpisis andae. Ngeni yoac yofi deandae, 'Ngic mongngo Anutuac womong kpacma yoara deseriudeu, imoc yoac kapia. Nga mongngo womong manau gol tacde, imoc kpacma yoara deseriudeu ye yoara imoc naric mi waude.' Ifi deandaeac ngeni sowecnginagoc.

17 Womongngo gol kpanjang kpetiac anude, imoc wiac engena nga gol yengenaoc imoc wiac mamea. Ngeni kicpisis nga negen negengngina mi irec ireckea. 18 Amma ngeni deandae, 'Mong ye arata kpacma yoara deseriudeu, imoc yoac kapia. Nga mongngo sese arata witiau bic faifaia, imoc kpacma yoara deseriudeu yoara imoc naric mi waude.'

19 Aratango sese kpanjang kpetiac anudenoc, imocngo wiac engena nga sese yengenaoc imoc wiac mamea. Ngeni kicpisis areng.

20 Ngic mong ye arata kpacma yoara deseriudeu ye arata nga sese arata witiau fedacde, imoc momocngoc kpacma medarude. 21 Nga mong ye womong kpacma yoara deseriudeu womong yengena amma Anutu imohai kecde, ye momocngoc kpacma medarude. 22 Nga mong ye kurumeng kpacma yoara deseriudeu, ye Anutuac tatac nga yeng ihai mingina amma tarude, ye momocngoc medarude.

23 Mitiac negen negengngic nga farisaio, ngeni sowecnginagoc. Ngeni singyoac kapiabisic modacma dedeseriyoac engena, imoc ine wagecde.

\* 23:5: Yudangic yeni kandachisic bisic yang seberango meme mitigbomea oho ohoya ihai barima mesunginau me fuanginau orohokecgec. Faka imocac hania Dedeseri 6:1-10 oho ohoya fede. † 23:5: Faka imocac hania Bangec kisiu 15:38-41, imohai oho ohoya fede.

20 Ngic mong ye arata kpacma yoara deseriudeu ye arata nga sese arata witiau fedacde, imoc momocngoc kpacma medarude. 21 Nga mong ye womong kpacma yoara deseriudeu womong yengena amma Anutu imohai kecde, ye momocngoc kpacma medarude. 22 Nga mong ye kurumeng kpacma yoara deseriudeu, ye Anutuac tatac nga yeng ihai mingina amma tarude, ye momocngoc medarude.

23 Mitiac negen negengngic nga farisaio, ngeni sowecnginagoc. Ngeni singyoac kapiabisic modacma dedeseriyoac engena, imoc ine wagecde.

\* 23:5: Yudangic yeni kandachisic bisic yang seberango meme mitigbomea oho ohoya ihai barima mesunginau me fuanginau orohokecgec. Faka imocac hania Dedeseri 6:1-10 oho ohoya fede. † 23:5: Faka imocac hania Bangec kisiu 15:38-41, imohai oho ohoya fede.

20 Ngic mong ye arata kpacma yoara deseriudeu ye arata nga sese arata witiau fedacde, imoc momocngoc kpacma medarude. 21 Nga mong ye womong kpacma yoara deseriudeu womong yengena amma Anutu imohai kecde, ye momocngoc kpacma medarude. 22 Nga mong ye kurumeng kpacma yoara deseriudeu, ye Anutuac tatac nga yeng ihai mingina amma tarude, ye momocngoc medarude.

23 Mitiac negen negengngic nga farisaio, ngeni sowecnginagoc. Ngeni singyoac kapiabisic modacma dedeseriyoac engena, imoc ine wagecde.

\* 23:5: Yudangic yeni kandachisic bisic yang seberango meme mitigbomea oho ohoya ihai barima mesunginau me fuanginau orohokecgec. Faka imocac hania Dedeseri 6:1-10 oho ohoya fede. † 23:5: Faka imocac hania Bangec kisiu 15:38-41, imohai oho ohoya fede.

Ngeni ikocfakangina ifia meandae. Ngeni wiac homuna gombunga nga yakaac nga ic sogonggac homuna gombunga fingerude, imocac gbomea kapiabisic 10, imohacnac mocgu hendzicma Anutu miandae. Amma faka dindingac nga ubamangang amma negen negensingngina hafoangoc mekekec, imoc ine ihoc bahoc amma wagecde. Ngeni faka gombungngina imoc naric modachisia amma tosea deduae, imoc ifingoc mi wabisia. <sup>24</sup> Ngeni ngicngac sing edzacyunugecdeac ua, imoc kicpisc siricfu angkecdae. Nga kurungnginau picpic hemma imoc meickema kamere ine mi hemma gbokoandae. *(Sesememe 11:1-2,4,20)*

<sup>25</sup> Mitiac negen negengngic nga farisaio, ngeni ikocfakangina yofia mekecdaeac ngeni sowecnginagoc. Ngeni tera tasengina ngadeasac dzuacandae amma ngenang ubaherengina manau ine kickerec homac fede, imoc nge-naoc mi garengemeandae. <sup>26</sup> Ge tase teraac mana dzuacnaguc ngadea ifingoc kongac kpeude. Farisaio ngeni kicpisc.

<sup>27</sup> Mitiac negen negengngic nga farisaio ngeni yofi negenggec, kicsere imoc homemea seucnginagoc nga sicngo wake wakea fede, imoc kibiagoc anudeac ngeni kicsereac simeng weroc nadzicandae. Nga ngeni ubaherenginau nga sebinginau siriha ifia amma kecdae. <sup>28</sup> Ngeni sebinginango ngickicfu dindingac isoc ande. Nga ubaherenginau ine ikocngo wake wakea amma ngeni ngenaoc dedeseriyoac kpema kecdae. Ngeni ikocfakangina ifia mekecdaeac ngeni sowecnginagoc.

<sup>29</sup> Mitiac negen negengngic nga farisaio, ngeni sebiengeneng amma ikocfakangina mekecdaeac sowecnginagoc andae. Ngeni profete yeneac kicsereu simengngina meyemmema ngic dindingac simengngina kibiagoc anudeac monggoc heigborima mengereandae. <sup>30</sup> Mengerema yofi deandae, 'Neni bangecfocnina yeneac nasou kecbing debac profete naric mi yunuhomebing nga sacngina maudeac faka yenigoc mi ambing.' <sup>31</sup> Ngeni ifi mekecma yofi dekperagiemede, 'Nenang ngic profete yunuhomegec, yeneac medacfocngina.' <sup>32</sup> Ngeni ifi dema bangecfocngina yeneac faka mewakema mekecgecde. <sup>33</sup> Ngeni ngenaoc boidzoc amma boidzocac medac, ngeni yoacfu turunga mema hofeu kemebauac <sup>34</sup> neng profete nga negen negengngic amma mitiac negen negengngic sueyunuba hangemmegecde. Nga ngeneng kecma yenearunac goa yunuhomegecde nga goa mariponnu yunugecde amma goa kpekpeturang amanginau dzikacngo yunuma ngaba ayemmema taong monnunac monnu kporacyunugecde. <sup>35</sup> Ngeni ifi mekecma ngic dindingac yunudacgec sacngina bangecfu madarec, imocac turunga hafoangoc ngenearu feude. Imoc Abeac sacfunac hanahema erekecma Barakiaac medac Dzekaraia, yeac sacfu erede. Ngeni ye kpetiac ama nga arata botucngirau kpehomegec. <sup>36</sup> Foracngoc, faka sasawa imocac turunga, imoc areng yomoc ngenearu fingeclarude, imoc edengunuduae.

<sup>37</sup> O, Yerusareng, Yerusareng, ge profete yunuhomeannec nga ngic ngenearu sueyunuyunuya, yeni hocngo yenereannec. Kokorec nonggeango nambaracfora kpeganga bageau foforacyunuande, ni naso homac ifi isoc nambaracfocga kpedzucyunubadeac negembare ngeneng ine imocac songo mi negenggec. <sup>38</sup> Negenggec, ngeneac amagerec imoc ngiha kpac anu kisi fingerude. <sup>39</sup> Ni edengunuba negenggec, yofinenggac hanahema ngeni

‡ 23:35: Kaing ye hanac hanaheau munea Abe kpehomeec. Fingec fingec 4:1-10. Ngictau Yoasi ye profete Dzekaria kpehomeec. 2 Ngictau siduc 24:17-27. 2 Ngictau siduc imoc Yuda yeneac mitikibiwi wisic wiscikea nande. Imocac Yesungo yofi deec, "Abeac sacfunac erekecma Barakiaac medac Dzekaraia sac imohai erede."

monggoc mi nenggecede. Nga nang enggecede yofi degecede, 'Kebucac kpacfu ngic hade, ye kenehagoc.' (Mitiyegec 118:26) ifi degecede, naso imohai ngeneng monggoc nenggecede."

## 24

<sup>1</sup> Yesungo womonnunac mamamu medacfora yeneng yearu hama womonggac mana kuneng hania hania edzahegec <sup>2</sup> yeng yofi edeyunuec, "Wiac imoc yaguc hendacdae, imoc ine ngade yofi fingerude. Foracngoc, areng mong yeneng hama imoc sasawa hembarkedacgec kendarude. Kendaru hoc mongngo monggac witiu mi wagec tarude." Ifi dema <sup>3</sup> Yesungo Oriwa tikiu kemma taru medacfora tembucngina yearu kemma kpesimigec, "Ge yoac dedang imoc noc nasou fingerude? Nga naso wisic wisickeke amma geangga hahanasogau noc soi fingerude, imoc edenununa."

<sup>4</sup> Ifi degec Yesungo meremma yofi deec, "Ngc mongngo ikocfu wangecngunubacac ngeni henghomema kecbisia. <sup>5</sup> Imoc yofiac, ngic homac yeneng hama neac kpac kpacma degecede, 'Ni Messia.' ifi dema ngicngac homac uba mesufu ayemengecede. <sup>6</sup> Nga ewekpekpetoac siduc bangec wegenaunac nga bangec hereaunac hau ngeni imoc negemma mi kpidohobisia. Wiac ifia fingecheso nga nasongo imohaingoc bic mi wisickeude. <sup>7</sup> Bangec goa yeneng bangec ogofocngina yenigoc ewekpekpe anggecede. Nga ngictau monggac arengngo ngictau monggac areng yenigoc ngaba angemegecede. Nga boditoa bangec goau fingerude nga goau usoctoa meude. <sup>8</sup> Wiac ghoria hanahema fingerudeac gadze kiande, ifi isoc ande.

<sup>9</sup> Ifi fingeru ngicngac yeneng ngeni ngabafocnginaac mariu faingunugecede. Faingunuec ngaba yeneng ngunuma homecfu faingunugecede. Nga bangeha bangehaac ngicngac sasawa yeni neac kpacnaac amma ubango ukungunugecede. <sup>10</sup> Nga ngicngac homac yeni negemmangang amma wanuma yenaocngoc ogofocngina ngaba yeneac mariu faiemegecede nga ubango ukuemegecede. <sup>11</sup> Nga profete ikoha homacngo fingeema ngicngac homac ikocfu wangecyunugecede. <sup>12</sup> Singyoac wawa faka imoc yadiude imocac ngicngac homac yeneac heresongogoc negengemeeme nga hoangemefaka nomaneude. <sup>13</sup> Nga ngic mongngo serima kecmanu naso wisickeude, yeng komoc kpeude. <sup>14</sup> Nga ngicngac yeneng eucererenggac siduc gombung yomoc edeyunuec dedekperagi imoc bangec sasawa sokodaru ngicngac yeni imoc negendacmagec naso wisickeude.

<sup>15</sup> Profete Danierengo wiac mangac manganea imocac yoac warac deec, imocngo ama kpetiacfu nanu henggecede. Ngic mong ye yoac yomoc osoude, yeng imoc negentegecheso. (Danie 9:27; 11:31; 12:11-13) <sup>16</sup> Faka imoc fingeru ngicngac Yudaia bangecfu kecdae, ngeni worama tikiu embisia. <sup>17</sup> Nga mong ye ama witiu nande, ye wiac mong meudeac ama manau mi embeso. <sup>18</sup> Nga mong ye semeng uau nande, ye ngakpi hereha meudeac mi dzigenebeso. <sup>19</sup> Ngac heregoc kecdae nga nenggac sabac namuu meyunukecdae, yeni naso imohai ebicnginagoc anggecede. <sup>20</sup> Nga ngeni woragecdeac naso haude, imoc nomannasou me sabatanasou mi fingerudeac numubisia. <sup>21</sup> Naso imohai kpendzeng kuneng yombong fingerude. Kpendzeng ifia bangec hanac hanaheunacngoc erekema yofinenggac mong mi fingerec amma ngade ifingoc mi fingechesande. <sup>22</sup> Nga uameme imoc mi mewegenegecede isoc ngic mongngo komoc naric mi kpeude. Amma ngicngac isingyunuyunuya, ngeneac amma naso mewegenegecede.



<sup>23</sup> Naso imohai yoac mong yofi fingerude, 'Henggec, Messia yei fingece.' me 'Messia ye edi fingece.' Ifi degecede isoc ngeni mi negensingyunubisia. <sup>24</sup> Imoc yofiac, Messia ikoha nga profete ikoha yeneng fingece ma ngicngac uba mesufu ayemmegecedeac tobangyunuma faka morora nga faka kuhagoc engena megecede. Amma yeni sing meficgegecede ngicngac isingyunuyunuya ifingoc ikocfu wangepyungecede. <sup>25</sup> Negenggec, ni faka imoc fingerudeac bic edengunuba negendae. <sup>26</sup> Ngicngac goa yeneng yofi degecede, 'Henggec, ye bangec kisiu kecede.' Ifi degecede ngeni ihai mi kembisia. Me yofi degecede, 'Ye yei ama manabisicfu tacde.' Ifi degecede ngeni imoc mi negensinggebisia. <sup>27</sup> Piratacngo wenac ere ereaunac heima wenac keme kemeau kpesiande. Nga Ngicac Medac haude, naso imohai siriha imocacsoc fingerude. <sup>28</sup> Koec koec neng yeni fareng fede, imohai eacandae.

<sup>29</sup> Anu kpendzengetoa nasoya wisickeuguc

wenackiwa kundung kpeu afokperagia mi fingerude. Asomeng yeni kurumennunac fotockema magec kurumenga kurumenga yeneac kuc sasawa kpemindahegecede. *(Yesai 13:10; 34:4)*

<sup>30</sup> Imohai Ngicac Medacac soi sawakebangau fingeru bangeha bangeha ngicngac sasawa yeni imoc hemma kiacsonggong anggecede. Ifi ammagec Ngicac Medacngo kurumenggac hoennu kuc nga kibikperagitoagoc hau henggecede. <sup>31</sup> Nga trampet udumengtoa kuneng fingece manu ye angerofora sueyunuu yeneng kurumenga kurumenga noboc noboc amma bangec tegia noboc noboc 4 imohai kemma Kebu yengenaoc ngicngac meisinyunuec, yeni kpedzucyunugecede.

<sup>32</sup> Fig icngo hania edekpou angemueu ngeni imoc negembisia. Fawa firitickema besaiu ngicngac yofi negengandae, wenac naso ande. <sup>33</sup> Nga wiac sasawa dedua, imoc fingeru ngeni imoc hemma ifingoc negembisia, Ngicac Medacac naso imoc bic wegenema hade amma ye nagu ngadeau nande.

<sup>34</sup> Foracngoc, areng yomoc ngeni mi homemagec wiac yomoc fingece darude. <sup>35</sup> Fingeru bangec nga kurumeng kpac anecde nga neac yoac, imoc ine mi kpac anude. <sup>36</sup> Faka imoc noc uamemeu amma aua nofu fingerude, imoc mongno mi negenude. Kurumenggac angero yeni imoc mi negendae nga Medacngo ifingoc mi negende. Manggacngosac naso imoc negende.

<sup>37</sup> Noaac nasou faka fingerec, Ngicac Medacngo hau faka siriha imocngoc fingerude. <sup>38</sup> Kiatunggbaung mi hamanu ngicngac yeneng nenedoku nema ngic yeni ngacfu kenggec nga manggac yeneng yofi degec, 'Ni naroanna ngic mibade.' ifi angkecmagec Noango wageu enec. <sup>39</sup> Enu yeni mi negemma kecmaec kiatunggbaungtoango hama merucyunudarec. Ngicac Medacac hahanasou faka ifiangoc fingerude. <sup>40</sup> Naso imohai ngic yohockang semeng uau kecmaec yerearunac mong mema mong ine wagec uau kefude. <sup>41</sup> Ngac yohockang yeri flawa amau namma flawa medzamema kecmaec yerearunac mong mema mong ine wagec nanude.

<sup>42</sup> Kebunginango noc uamemeac haude, ngeni imoc mi negendaeac amma ubagbori kecbisia. <sup>43</sup> Hamangecngic ye ama hetackema engande. Nga ama mingina mong ye hamangecngic noc nasou haude negenude ye gaugbori kecma a mea garenggekecma hamangecngic imoc kpa eheimiude. <sup>44</sup> Imocac ngeni ifingoc efaima kecbisia. Ngicac Medacac aua ngeni mi negemmagec haude.



<sup>45</sup> Wanacngic mongngo negen negentegehagoc kefec. Nga minginango ye wanacngic ogofora yeneac gareng amma yakangina nasoyau modacma yemmeudeac demiec. <sup>46</sup> Ye ua demi demia imoc medaru minginango hama henu naric anude, ye kenehagoc. <sup>47</sup> Foracngoc, yeac minginango wiara sasawa garenggeudeac demiude. Ngeni siriha imocacsoc kecbisia.

<sup>48</sup> Nga wanacngic mangana, ye ine yengenaoc negensiude, 'Ni minginna naso herea kecmaguc haude.' <sup>49</sup> Ifi dema wanacngic ye ogofora yunuma minggong ngic, yenigoc doku seria neude. <sup>50</sup> Ifi amma tomai mi kecma wanacngic yeng minginaac uamemenaso nga auaya mi negemmanu minginango haude. <sup>51</sup> Hama wanacngic imoc kpema herec kperecge heima ngic ikoha yengigoc faiude. Nga yeni ihai kiacma enacngina kisaranggema kegcgede."

## 25

<sup>1</sup> "Kurumenggac eucerereng imoc yofi isoc anude. Naroang 10 yeni kifangina mema memeturang ngic yegoc meficemegecdeac sinnu kenggec. <sup>2</sup> Yenearunac naroang 5 yeni mi irec ireckea nga 5 yeni negen negengnginagoc. <sup>3</sup> Naroang mi ireckegoc, yeni kifangina mema kirung dokuyagoc mong mi megec. <sup>4</sup> Nga negen negengnginagoc, yeneng kifangina mema dokungina kirunnu kisima megec. <sup>5</sup> Nga memeturang ngicngo bic mi hau naroang sasawango kicngina gau anu gau fegec. <sup>6</sup> Femagec tofocnac dzongiau kpakpac mong yofi fingerec, 'Nengenggec, memeturang ngic hade, ngeni kemma yegoc eacgec.' <sup>7</sup> Ifi fingeru naroang 10 yeni gauunac gborima yacma kifangina memengere amma <sup>8</sup> naroang negen negengngina mi irec ireckea, yeneng negen negengngoc yeneac degoc, 'Kifanina bokobeso andeac ngeni doku mong kisinemmegec.' <sup>9</sup> Ifi degoc naroang negen negengngoc, yeneng merengyemmema yofi edeyunugec, 'Doku yomcngo nenanggacsoc kpac. Imocac ngeni ine kifadokuya faiandae, yenearu kemma bummegec.' <sup>10</sup> Ifi degoc, yeni kifadoku bummebesonga kemmagec memeturang ngicngo haec. Hau naroang efaigecmoc, yeni yegoc memeturangac amau enggec. Emma nagu ukugec kpeu imohai nenesemeng nesogai amma tacgec. <sup>11</sup> Tacmagec ngade ngac tosea yeneng hasikema degoc, 'Kebu, Kebu, nagu witinemmena ereni.' <sup>12</sup> Ifi degoc, yeng edeyunuec, 'Foracngoc, ni kicrurungngunuduac.' <sup>13</sup> Ngeni wenac nga aua mi negendae, imocac amma ngeni ubagbori kecbisia.

<sup>14</sup> Imohai faka siriha yofi fingerude. Ngic mongngo bangec monnu kenudeac wanacngicfora kpacyunuma dzofinaha yeneac mariu faima kenudeac negenec. <sup>15</sup> Ye dzo garenggegecdeac kucnginaac siriha yofi hendzicma yemmeec. Ye ngic mong tarantong dzo 5 nga mong tarantong dzo yohockang amma mong tarantong dzo mocgu,\* dzo ifi yemmema kenec. <sup>16</sup> Kenu ngic tarantong dzo 5 meec, ye imohaingoc kemma emekpesi uaya mema tarantong dzo 5 torokpema meficgeec. <sup>17</sup> Nga ngic tarantong dzo yohockang meec, ye ifingoc kemma emekpesi uaya mema yohockang torokpema meficgeec. <sup>18</sup> Nga ngic tarantong dzo mocgu meec, yeng ine kemma mingina dzo miec, imoc mema bangec usuma tonggoma mesufuec.

<sup>19</sup> Anu mingingnginango naso herea kecma monggoc dzigene hama dzo yemmeec, imocac turunga kpoumigeccdeac kpacyunuec. <sup>20</sup> Kpacyunuu ngic tarantong dzo 5 meec, yeng tarantong dzo 5 mong momoc mekemma deec,

\* 25:15: Tarantong dzo mocgu imoc kifa 15gac uabung.

'Kunenna, ge tarantong dzo 5 nenna ni emekpesi uaya mema 5 monggoc torokpema meficgedua.' Ifi deu <sup>21</sup> minginango yofi edeec, 'Wanacngic gombunga yombong. Ge fakaga dindingac amma yoac modac modac fakaga soronga. Nga geng yoac modacma wiac kapia kpacgoc garenggedangac wiac ebiriangoc garengnadeac faigubade. Hana kunenggaac sogac sogaiu nerahafoc kecdede.' <sup>22</sup> Nga ngic tarantong dzo yohockang meec, yeng ifingoc hama deec, 'Kunenna, ge tarantong dzo yohockang nenna ni emekpesi uaya mema tarantong dzo yohockang monggoc torokpema meficgedua.' Ifi deu <sup>23</sup> minginango yofi edeec, 'Wanacngic gombunga yombong. Ge fakaga dindingac amma yoac modac modac fakaga soronga. Nga geng yoac modacma wiac kapia kpacgoc garenggedangac wiac ebiriangoc garengnadeac faigubade. Hana kunenggaac sogac sogaiu nerahafoc kecdede.'

<sup>24</sup> Nga ngic tarantong dzo mocgu meec, yeng ifingoc hama deec, 'Kunenna, ge ngic gerea, imoc negenduae. Amma uau wiac heihomec mi amma foraya kpedziannec amma gbomea mong mi kpegima sifu foraya mesianec. <sup>25</sup> Imocac kengecnuu kemma tarantong dzoga bangec fu tonggoba feec wiacga imoc monggoc merengenduae.' <sup>26</sup> Ifi deu minginango yoara turunga yofi meremmec, 'Ge wanacngic mangana amma oyonga. Ni uau heihomec mi amma foraya kpedzianduae amma gbomea mi kpegima sifu foraya mesiannduae, geng imoc bic negennec. <sup>27</sup> Ge imoc negemma dzona dzo tohonnu faina heikpegumekecgec saheu neng dzigenema dzona imoc nobohagoc mebai. <sup>28</sup> Imocac ngeni tarantong dzo yearunac wangecma ngic tarantong dzo teng mekece, ye migec. <sup>29</sup> Ngic mong ye wiac mekece, ye monggoc migec homac ebiriangoc anude. Nga mong ye wiac mi mekece, yearunac wiac mekecdemoc, imoc ifingoc wangecgece. <sup>30</sup> Wanacngic uaya gombunga mi medac, ngeni ine ye mema ngadeau kundunnu ukugec kemebes. Ihai kecdae, yeni kiacma enacngina kisaranggema kecgece.'

<sup>31</sup> Kecma Ngicac Medacngo kuc nga kibikperagiagoc nga angero sasawa yenigoc hasikegece, naso imohai ye ngictau tataha kibikperagiagoc ihai emma tacbesande. <sup>32</sup> Amma ye bangeha bangehaac ngicngac sasawa deu hama yeac kicfu kpedzucnedacgece. Kpedzucnegoc garengngo rama nga noning medereyunuande, yeng naso imohai ifi isocngoc medereyunuma <sup>33</sup> rama foiugeng nga noning ine kanaugeng faiyunuude. <sup>34</sup> Ifi amma ngictaungo ngicngac foiugeng yofi edeyunuude, 'Ngicngac Mannaac kecgec, ngeni yei hagec. Ngeni maridzomeng nga amabangecngina mecec, imoc bicngoc bangec hanahema fingerecfunac ngenec negemma faifaia. <sup>35</sup> Ni yakaac homeba ngeni yaka nenggec nga dokuac anenu doku nenggec neai. Nga kuriha kecbare ngeneng nenggareng anenggec. <sup>36</sup> Ni wambaac obohoba ngeneng wamba heinenggec. Amma hafei febare ngeni hama wirinugec. Nga witicamau kecbare ngeneng yugucnugec.' <sup>37</sup> Ifi deu ngicngac dindingac yeneng yoac yofi meremmigece, 'Kebu, ge noc nasou yakaac anggeni gemma gumecguing me noc nasou dokuac anggeni gumecguing?' <sup>38</sup> Amma noc nasou kuric hana genggareng anggening me wambaac obohona gening? <sup>39</sup> Amma noc nasoac hafei me witicamau tacmana gemma yugucguing?' <sup>40</sup> Ifi degoc ngictaungo yofi edeyunuude, 'Foracngoc, ngeni munafocna kapiabisic yenearunac mocgunec ubangerec ammigec, imocac soc ninoc anenggec.' imoc edengunnduae.

<sup>41</sup> Ifi dema kanaugeng nanggece, yeneac yoac yofi edeyunuude, 'Ngicngac sowecngunungunuya, ngeni wanuma gerec wisic wisickea kpac, imohai kemma kecbisia. Imoc mangana mingina nga angerofora, yeneac

amma dzema fede. <sup>42</sup> Ni yakaac homeba ngeni yaka mong mi nenggec nga dokuac anenu ngeni doku mong mi nenggec neai. <sup>43</sup> Nga ni kuric hama kecbare ngeni nenggareng mong mi anenggec nga wambana kpac kecbare mong mi heinenggec. Ni hafei anenec nga witicamau febare ngeni mi yugucnugec.’ <sup>44</sup> Ifi edeyunuu yeneng degecde, ‘Kebu, ge noc nasou nenedokuga kpac me wambaga kpac amma kuric kecmana neni gemma ihoc bahoc aning? Me dahai hafeiamau me witicamau femana gemma ihoc bahoc anggening?’ <sup>45</sup> Ifi degec yeng yofi edeyunuude, ‘Foracngoc, ngeni munafocna kapiabisic yenearunac mocgunec ubangerec mi ammigec, imoc ifingoc ni mi anenggec, imoc edengunuduae.’ <sup>46</sup> Nga yeneng kopocsicac turunga kpendzeng nasoya kpac kpekecbesandaeac kenggecde. Nga areng dindingac yeneng kekecsери enggecde.”

## 26

<sup>1</sup> Yesungo yoaс imoc sasawa dedaru wisickeu medacfora yofi edeyunuec, <sup>2</sup> “Uameme yohockang femanu makekeng naso imocac hombang ammanu imohaingoc ngic yeneng Ngicac Medac mariponnu kpegecdeac demeseri amma suegecde.”

<sup>3</sup> Anu womong gareng enara nga yudangic yeneac enarafocngina, yeneng womong garengtoa kpara Kaifa, yeaс amaodayagocfu endacma <sup>4</sup> Yesu akikic mema kpegecdeac dekiric amma <sup>5</sup> yofi degec, “Ngicngac botucnginau dzikac sicsauc fingeцbacac ye hombang nasou mi mebesonga.”

<sup>6</sup> Anu Yesungo Betania amau Simong kukuseriagoc, yeaс amau yaka netarec. <sup>7</sup> Netacmanu ngac mongngo yearu kemma, kirung mong arabastro hocngo memea, imocac kerecdokuya homung kerengagocngo yeaс orucfu kpakema nadzicmiec. <sup>8</sup> Nadzicmiu medac yeneng imoc hemma kerecdoku buma yada anecac dehesi ammigec, “Ye nocac wiac buma engena imoc kpedzonggede? <sup>9</sup> Imocngo dzo homac kirecgeu ngic makpekpea yemmeni ngereebac.” <sup>10</sup> Ifi degec Yesungo imoc negemma yofi edeyunuec, “Ngeni nocac ngacac ifi dema ubaebic meficgemidae. Ye faka gombunga nearu neu ngereede. <sup>11</sup> Ngic makpekpea yeni nasosoc ngenigoc kecgecde nga neng ine ngenigoc nasosoc mi kecbade. <sup>12</sup> Ni homeba tonggonugecde, ye imocac sebina mengerema bic nadzicnende. <sup>13</sup> Foracngoc, ngic yeni siduc gombung yomoc bangeha bangeha kemma dekperagigecde, imohai yeng ifi anec, imoc ifingoc degec negenggec feude.”

<sup>14</sup> Anu medacfora 12 yenearunac mong Yuda Karioto amaunac degec, yeng womong gareng enara yenearu kemma <sup>15</sup> kpesiyemmeec, “Neng Yesu maringinau faibadeu dzo dafiguc nenggecdeac negendae?” Kpesiyemmeu yeneng siriwa dzo 30 osoma migec. <sup>16</sup> Migec, yeng Yesu naso damohai doc meu megecdeac hemmodacma kefec.

<sup>17</sup> Kecma ic sogong yis kpac, hombang imocac hanac hanaheau medac yeni Yesuaru kemma kpesimigec, “Neni ama dahai kemma makekenggac ramamedaha mengerema ohonenideac negennec?” (*Makekeng 12; Dedeseri 16:1-8*) \* <sup>18</sup> Ifi degec Yesungo yofi deec, “Ngeni taonnu emma ngic imoc hemma yofi edebisia, ‘Kpoukpouninango geac yofi dede, nasona wegeneu gearu hama ni nga medacfocna neni gegoc makekenggac ramamedaha

\* **26:17:** Naso imohai yis mi fec. Yeni flawa esea dokuyagoc homunagoc bic anec imoc flawa gborigoc yeregegec flawa yadiec. Imocngo yisac ua meec.

nenideac negenduae.’ ” <sup>19</sup> Nga Yesungo medacfora yoac edeyunuec, imoc tofohodacma makekenggac ramamedaha ohomengere anggeg.

<sup>20</sup> Ama toforeu Yesungo medacfora 12 yenigoc yaka netacma <sup>21</sup> yofi edeyunuec, “Foracngoc, ngenearunac mongngo ngaba yeneac mariu fainuude.” <sup>22</sup> Ifi deu medac yeni ubangina homac manganeu yenearunac mocgu mocgungo kpesimigec, “Kebu imoc sifu neng mi anduae, me?” <sup>23</sup> Kpesimigec yeng yofi deec, “Ngic nigoc kurungterau ic sogong nemuruckedic, yennoc doc faiu menugecde. <sup>24</sup> Ngic ye Ngicac Medac doc meude, ye sowehagoc. Ye nonggeaac here manaunac mi fingebac dede efaimibac. Nga Ngicac Medac neac negemma mitikibiu yoac yofi oho ohoya fede, yeng wangunuma kenudenoc.” <sup>25</sup> Ifi deu Yudango Yesu docfu faiudeac negenecmoc, yeng ifingoc kpesimiec, “Kpoukpou, ge neac denec me?” Deu Yesungo yofi edeec, “Ge geanggaoc imocnoc denec.”

<sup>26</sup> Anu yeni yaka nemagec Yesungo ic sogong mong mema Anutuac ubangerec dema mendzicma medacfora yofi dema yemmeec, “Ngeni mema negec, yomoc fusina.” <sup>27-28</sup> Ifi dema kpakenec mong mema Anutuac ubangerec ammima numumima yofi dema yemmeec, “Yomocngo dzadzahac gboriaac sacna, imoc ngicngac homac yeneac kopocsic kpac anudeac kpetic kpeatingea, imocac ngeni sasawango imoc negec. <sup>29</sup> Ni edengunaba negengec, waing gbomeaac dokuya monggoc mi nene kecbarengoc Mannaac eucererennu nenahafoc sing gboriaac arennu nenide.” <sup>30</sup> Nga yeni ubangerec yegec heima amaunac mama edibigeng Oriwa tikiu enggeg.

<sup>31</sup> Sinnu kemma Yesungo yofi edeyunuec, “Tofocnac yomohai ngeni sasawango neac negemma makpema wanudacgecde. Faka imocac yofi oho ohoya fede,

‘Ni gareng kpeba ramahabu yeni sinsararang kpegecde.’ (*Dzekaraia 13:7*)

<sup>32</sup> Nga homecfunac yacmaguc waraingemmema Gariraiia bangecfu kemba ngeni ihai habisia.” <sup>33</sup> Ifi deu Petorongo edeec, “Goa yeni sasawa geac ifi dema wagugecde nga neng ine naric mi wagubade.” <sup>34</sup> Ifi deu yofi edeec, “Ni forangoc edeguba, tofocnac yomohai kokorec mi arohomanu geng sebiheinenna atac harebec anude.” <sup>35</sup> Deu deec, “Ge guma ni nubeso degec sebi naric mi heibade.” Petorongo ifi deu medacfora meficgema imocngoc dedacgec.

<sup>36</sup> Anu Yesungo kengkecma ua bangec mong kpara Gedzemane, ihai kensikema medacfora yofi edeyunuec, “Ngeni yei tacmagec ni edi kemma numubade.” <sup>37</sup> Ifi dema Petoro nga Dzebedaio medahora meyunuu kenggeg. Kemma Yesungo ubaebictoa yombong memanu dzonoma fedeu <sup>38</sup> yofi edeyunuec, “Ubaongana ebiryombonggeu homebeso anende, imocac ngeni yei nigoc ubabori tacmina.” <sup>39</sup> Ifi dema kpesima kemma kicmesuya bangecfu hetutuckema yofi numuec, “Manna, negenna angana andeu ge kpakenec yomoc meickena feracnuu. Amma neac songo kpac, geac songo nga negen negeng imocngo seribeso.”

<sup>40</sup> Ye ifi numuma medac yenearu dzigene kemma yenenu gau fegeg. Gau fegeg yenemma Petoro yofi edeec, “Ngeni sifu aua mocguacsoc nigoc gaugbori kecgec. <sup>41</sup> Ngeni faitobannu embauac ubabori kecma numugec. Foracngoc, ongaasungo efaiande nga sebingo ine ebiriude.” <sup>42</sup> Nga ye monggoc kemma yofi numuec, “Manggacna, kpakenec yomocngo feracnuudeac negenna mi ngereeu imoc nebare geac yoac seribeso.” <sup>43</sup> Ifi numuma hama henu medacfora yeni kicngina gaungoc anu fegeg. Femagec yenemma

44 monggoc wayunu kemma numuu atac harebec anu yoac warac deec, imocngoc dema numuec. 45 Numudacma medac yenearu dzigene hama yofi edeyunuec, “Ngeni gaungoc fema kecdae, imoc naric kpac. Naso wegenede, ngic yeni Ngicac Medac kererema kopocsicmeme yeneac mariu faigece. 46 Benukererec ngicngo hadeac amma yacgec kenni.”

47 Ye ifi dema nammanu medac 12 yenearunac ogongina Yuda, yeng ngichabutoa kunengyombong enara waraiyemuehagec. Womong gareng enara nga yudangic enarafocngina yeneng sueyunuec wasaibeang nga gbarucnginagoc hasikegec. 48 Sikegec benukererec ngic yeng waraima faka anudeac derec derecgeyoac yofi bic edeyunuec, “Ngic titikokoc ammbade, ngeni ngic imocnoc mendanggema mebisia.” 49 Ifi dema yeng imohaingoc Yesuaru kemma, “Ohec, kpoukpou.” ifi dema titikokoc ammiec. 50 Ifi ammiu Yesungo yofi edeec, “Ogo, ge noc ua menadeac yei hadang?” Deu yeni hama Yesu maria noboc noboc mema mendangegec.

51 Anu ngic Yesugoc kegec, yenearunac mongngo wasaibeanga kpedz-ima womong garengtoa yeac wanacngic kpema kedzaha noboc herecgeec. 52 Herecgeu mau Yesungo yofi edeec, “Ngic mong ye dzikac kpeude turunga dzikacngoc kiude, imoc fingecegembacac wasaibeangga ameau monggoc faina kemeu. 53 Neac memeficsing mong mi fede, imoc negemma ifi annec. Nga Manna yagucnoc numumbai dede yeng angero kpetengina 6 tauseng arenga 12, angero habutoa ifia naric sueyunuu mama meficnubau. 54 Nga meficnubau dede mitikibiu faka yomoc fingerudeac oho ohoya fede, imoc fora mi fingebac.”

55 Ifi dema ngichabu yofi edeyunuec, “Ngeni mendannuma godzungic meandae, ifi isoc wasaibeang nga gbarucnginagoc hadae. Nga ni wenaha wenaha Anutuac womonnu edekpou angemema kecanduae, imohai ine naric menubau. 56 Amma yoc ine profete yeni mitikibiu yoac ohogec fede, imoc fora fingerudeac imoc sasawa fingeccadce.”

Ifi deu medacfora sasawango Yesu wama woradacgec.

57 Anu mitiac negen negengngic nga yudangic enarafocngina yeni womong garengtoa Kaifa yeac amau bic kpedzucnema tacgec, ihai Yesu wangecma kenggec. 58 Yeni Yesu mendanggema ifi mekemmagec Petorongon gadenginau hereaungoc Yesu modacma kenec. Kensikema, Yesuac yoac desidegec, imoc negenudeac womong garengtoaac ama imocac oda manau kemema uamedac yeneac botucfu matarec.

59 Anu womong gareng enara nga yudangic tutumangtoaac memba yeni hafoangoc tacma Yesu homecfu faigece nga ye enacfu faifai ammima boi anggecdeac negengising anggec. 60 Ifi anggec ngic homacngo hama enacfu faifaiyoac degec, imocngo Yesu homecfu faigeccdeacsoc mi anu hofocman- goc kecma ngic yohockang yereng fingecca boi amma deoc, 61 “Yesungo yofi deec, ‘Ni Anutuac womong hembareckema uameme harebec ammanu monggoc mebade, ni kucna imocacsoc fede.’” 62 Ifi deec womong gareng- toango yacma Yesu kpesimiec, “Geac yoac dedae, imocac noboha mong mi denade me?” 63 Ifi deu Yesungo ine waickema nanec. Nanu womong garengtoango edeec, “Anutu kecek mingina, yeac kicfu kpesigemba ge deserina, geng Messia Anutuac medac me kpac, imoc edenununa.” 64 Ifi deu yeng meremma yofi edeec, “Imoc gennoc denec. Nga edengunuba negenggec, yaguc nga namma enude Ngicac Medacngo Kuctoa Minginaac foiaugeng tarude. Amma ye kurumenggac hoeng witiau hau ngeni imoc

henggecde.”

(*Mitiyegec 110:1; Danie 7:13-14*)

<sup>65</sup> Ifi deu womong garengtoango yovac imoc negemmanganema wambaya membarackema yofi deec, “Ye Anutu bic emmidacac yocacninaac boingicac monggoc mi obohonide. <sup>66</sup> Ngeneng yovac imoc negemma dafi dedae?” Deu yeneng meremmigec, “Ye homeudeac arennoc.”

<sup>67</sup> Ifi dema yeni Yesu kicmesuya sofohoma mari tuema kpekpefac amigec nga goa yeneng dzikacngo kpema <sup>68</sup> degec, “Messia, merang gudac, imocac kpefingyoac edenununa.”

<sup>69</sup> Ifi amma kecmagec Petorongo oda manau ama sobennu tarec. Tacmanu wanac naroang mongngo yearu kemma deec, “Ge gariraiangicnoc Yesugoc kecanne.” <sup>70</sup> Deu ye ngic sasawa tacgec, yeneac kicfu sebi heima deec, “Ge yovac denec, imoc obohoduac.” <sup>71</sup> Ifi dema naguu kemmanu wanac naroang mongngo hemma ngicngac ihai nanggec, yeni edeyunuec, “Ngic imoc ye Yesu Nadzaretenc, yegoc kecandenc.” <sup>72</sup> Edeyunuu Petorongo Anutuac kicfu serima monggoc busickpema deec, “Ni ngic imoc mi negenduae.” <sup>73</sup> Ifi dema nammanu ngic yeneng Petoararu kemma degec, “Neni ubadzidziga nengdimbe, ge foracngoc yeneac arennoc.” <sup>74</sup> Edegec ye yengenaoc sowecemema sopcemema deec, “Ni ngic imoc mi negemmiduae.” Deu imohaingoc kokorecngo arohoec. <sup>75</sup> Nga Yesungo yovac yofi bic edeec, “Kokorecngo mi arohomanu geng ni mi negennunec dema sebiheina atac harebec anude.” Petorongo yovac imoc negensima kemema ubahodung kuneng negemma kiac hodung kiarec.

## 27

<sup>1</sup> Ama wereckenu womong gareng enara nga yudangic enarafocngina yeni uba mocgu amma Yesu homeudeac deserigec. <sup>2</sup> Deserima Yesu maria dedeckema Yudaia bangecac gawana Pirato, yearu mekemma yeac mariu faigec.

<sup>3</sup> Anu Yesu homeudeac deserigec, Yuda benukererec ngicngo imoc hemma deec, “Ni nocac ifi andua?” Ifi dema ubea manganeu siriwa dzo 30 migece, imoc mekemma womong gareng enara nga yudangic enarafocngina yeni monggoc merengyemmemma <sup>4</sup> edeyunuec, “Negenggec, ni kererema ngic kopocsiha kpac, ye sac nadzicmiai.”\* Ifi deu yeneng degec, “Imoc neneac ebic kpac, imoc geac ebic.” <sup>5</sup> Yeni ifi dema dzo wagec, yeng imoc mekemma womonnu ukuu enu wama kemma ubasac neec. <sup>6</sup> Nga womong gareng enara yeneng siriwa dzo imoc kpedzucnema degec, “Dzo imocngo sac bummeec. Imocac amma dzo imoc sesekatapau faifai, imoc singngo mi dede.” <sup>7</sup> Dema yeni yovac dedzege amma dzo imocngo kuric yeneac kicsere fingerudeac enang kudzimecngic yeac ua bangec bummegec. <sup>8</sup> Bummegec bangec imocac kpara Sacbangec hanahema degec nga imoc yaguc fedengoc. <sup>9-10</sup> Profete Yeremiango yovac yofi deec, imoc imohai foragoc anec, “Faka yofi fingerudeac Kebungo edenuc, Israe medacfora yeni ngic imocac buma kpetea faima, “Ye siriwa dzo 30 imocacsoc.” ifi degec. Nga yeni dzo imoc mema imocngo enang kudzimecngic yeac ua bangec bummegec.”†

<sup>11</sup> Anu yeni Yesu mekemma gawanaac kicfu faigec nammanu yeng kpesimic, “Ge yudangic yeneac ngictau me?” Ifi deu Yesungo yofi meremmigec, “Imocnoc geanggaoc denec.” <sup>12</sup> Anu womong gareng enara nga yudangic

\* **27:4:** Dedeseri 27:25 yofi dede, ngic mong ye dzo mema mong kpehomeu sac kpeatingeude, ye sowehagoc anude. † **27:9-10:** Mataio ye Yeremia 32:6-9 nga Dzekaria 11:12-13 kpeturangema deec.

enarafocngina yeneng namma haniaya degec Yesungo yoac turunga mong mi merengyemmeu <sup>13</sup> Piratongo kpesimiec, “Yeni yoacfu faiguma yoac homac yombong dedae, ge imoc mi negennec me?” <sup>14</sup> Deu yeng yoac monnec mong mi merenu gawanango kerectegec yombong anec.

<sup>15</sup> Anu gawanango hobbannu yofi angkefec, yuda ngichabu yeni witicngic monggac kpara kpacgec, yeng ngic imoc yungeru witicamaunac maande. <sup>16</sup> Naso imohai godzungic kpara kekena mong witicamau kefec, kpara Baraba. <sup>17</sup> Nga ngicngac kpedzucnedacma nammagec Piratongo yofi kpesiyemmec, “Merac yungcngemmedeac negendae, Baraba me Yesu, kpara mong Kristo deandae?” <sup>18</sup> Yudangic yeni Yesu eng keracmangang ammima yearu faigec, imoc negemmanoc ifi deec.

<sup>19</sup> Nga Pirato ye desi desi tatahau tacmanu enemango yearu yoac yofi faiu kenec, “Ge ngic kpetiac yomocac yoac mi kpeserema, imoc wana. Ni tofocnac fema gaukpefing hemma yeac amma ubaebic homac medua.” <sup>20</sup> Nga womong gareng enara nga yudangic enarafocngina yeneng habu fenggeyemmegec yeneng Baraba yungcyemmedeac degec nga Yesu ine kpehomegedeac degec. <sup>21</sup> Nga gawanango kpesiyemmec, “Ngic yohockang nandape yerearunac merac yungcngemmedeac negendae?” ifi deu yeni imohaingoc degec, “Baraba.” <sup>22</sup> Ifi degec kpesiyemmec, “Ifi anu Yesu, kpara mong Kristo deandae, yeac dafi ambade?” Kpesiyemmeu yeni sasawango degec, “Ye mariponnu kpena homeu.” <sup>23</sup> Ifi degec, yeng kpesiyemmec, “Imoc dafiac nga noc kopocsicac?” Ifi deu yeni arohomumunggema degec, “Ye mariponnu kpebesonga.”

<sup>24</sup> Ifi dema nanggec hemma Piratongo yoac dindingac deudeac obohoec. Nga yeni ine serima kpacma nanggec kpeborongtoa hanahema fingeru yeng doku mema ngicngac habutoa kicnginau namma maria dzuacma yofi deec, “Ngic yomocac sacac kopocsic, imocngo nearu mi tacbeso, imoc ngenearu febeso.” <sup>25</sup> Ifi deu ngicngac yeni sasawango yoara meremma degec, “Yeac sacac kopocsicngo neni nga nambaracfocnina nenearu febeso.” <sup>26</sup> Nga Pirato ye Baraba yungcyemmema Yesu ine dzikacngo kpema mariponnu kpegedeac wasaingic maringinau wayemmec.

<sup>27</sup> Anu gawanaac wasaingicfora yeneng Yesu ama manaunac memama ama tegiau wasaingic oda manau kecandae, imohai meemma wasaiareng sasawa hafoangoc kpedzucnegec. <sup>28</sup> Kpedzucnedacma Yesu yengena wamba hesimima ngakpi mong kpauc kpauc heimigec kemeu <sup>29</sup> somang bathema oruhau heimigec kemeec. Kemeu yasu mong memigec marifoiano mema nanec. Ifi amma kiwau fafoc heima defagoc ammigec, “Ohec, yudangic yeneac ngictau.” <sup>30</sup> Amma yeni sofohoma yasu wangecma imocngo oruhau kpegec. <sup>31</sup> Defagoc ammikecgec wisickeu yenang ngakpi hesimima yengena wamba monggoc heimigec kemeu mariponnu kpegedeac hesicke kenggec.

<sup>32</sup> Mekemma sinnu ngic mong meficgegec, kpara Simong, Kirene taonnunac, yeng Yesuac maripong tofohoudeac ngombonggegec tofohou kenggec. <sup>33</sup> Kengkecma bangec buma mong kpara Gorigata, kpara mong Hatasic degec, ihai kensikegec. <sup>34</sup> Kensikema waing doku wiac hodungagocngo yerec yerecgea, imoc gumegec ye imoc nenegemma waec. <sup>35</sup> Nga yeni ye mariponnu kpegec nammanu wambaya kpeing kpema mederegec. *(Mitiyegec 22:18)* <sup>36</sup> Ifi amma garena tacgec. <sup>37</sup> Nga ye nanu oruha witiau maripongau kopocsicac haniaya yofi ohogec, “Yomoc Yesu, yudangic yeneac ngictau.”



<sup>38</sup> Anu yeni godzungic yohockang yegoc momoc mariponnu yuruma mong foiugeng nga mong kanaugeng, ifi faiyurugec. <sup>39</sup> Nga ngic ihai kengha anggec, yeni Yesu deengdema ammima orucngina kpatitickema <sup>40</sup> degec, “Ge Anutuac womong hembareckema wenac harebec ammanu medacbesonga de nec, ge geangga onggongemena. Nga Anutuac medac kec-nec isoc mariponnunac mesiemema mana.” <sup>41</sup> Nga womong gareng enara nga mitiac negen negengngic amma yudangic enarafocngina yeneng ifingoc desusuic ammigeç, <sup>42</sup> “Ye ngic goa onggongyunukefec nga yengena ine naric mi onggongemeude. Ye israengic nenang ngictau kecdeu mariponnunac mesiemema mau ye negensingenide. <sup>43</sup> Ye yofi dema negen negensinga Anutuaru faiec, ‘Ni Anutuac medac.’ ifi deu Anutungo yeac ammikecdeu mesibeso.” <sup>44</sup> Nga godzungic yegoc momoc yurugec, yeri yoac siriha ifiangoc deendema ammioç.

<sup>45</sup> Anu wenac dzongiau 12 kiroc ammanu imohai ama kundung kpema kundungngo bangec sokoma fekemmanu 3 kiroc marai anec. <sup>46</sup> Nga 3 kiroc imohai Yesungo ubaudumeng kunengngoc kpacma yofi deec, “Eri, Eri rema sabaktani.” Imocac titiha yofi, Anutuna Anutuna, ge nocac wanudang? (*Mitiyegeç 22:1*)

<sup>47</sup> Anu ngic nanggec, yene arunac goango negemma degec, “Ye Eria kpac-sambic ammide.” <sup>48</sup> Ifi kparu ngic mongngo negemma gereagoc nedzima kemma kondung sobing mong mema waingdoku aengagocfu nemuruck-ema kpinnu faima Yesu gumeec. <sup>49</sup> Nga goango ine degec, “Ngeni imoc wageç, Eria foracngoc hama meficgeu henni.”

<sup>50</sup> Nga Yesungo monggoc ubaudumeng kunengngoc kparu asuya ereec. <sup>51</sup> Ereu homeec, imohaingoc Anutuac womonnu kpoructoa womongmana kpetiac yombong naguyau nanec, imocngo wihacnac botuhaungoc tohoma mama yohockang anec. Amma usoctoa meu fagannu hoctoa toa tohogec. <sup>52</sup> Nga kicsere fekenec, imoc anggeu ngic kpetiac warac homegec, yene arunac homacngo sebigoc gborigec. <sup>53</sup> Yesungo kicsereaunac gborima yaru yeni ngade kicsereinginaunac erema taong kpetiac, imohai hama ngic homac fingecyemmegec. <sup>54</sup> Nga wasaigareng nga ngicfora Yesuac gareng nanggec, yeni usoc nga wiac fingerec, imoc hemma damuyunuu wareckema degec, “Foracngoc, ngic yomoc ye Anutuac medacnoc.”

<sup>55</sup> Nga Yesu kpegec, imohai ngac homacngo araing namma wiac henegeng anggec. Yeni Garirai bangecfunac hanahema Yesu modacma hama kingang kpemigeç, <sup>56</sup> yene arunac ngac goa kpacngina yofi, Maria kpara mong Madara amma Maria mong, Yakobo nga Yosefe, yereac nonggongira amma ngac mong Dzebedaioc medahora, yereac nonggongira, yeneng ngachabu yenigoc nanggec.

<sup>57</sup> Anu Arimataia taonnunac ngic mong finactoayagoc, kpara Yosefe, yeng Yesuac yoac negemma yeac arennu ifingoc kefec. Ye ama toforebeso ammanu <sup>58</sup> Piratoaru kemma Yesuac fareng meudeac kpesimieç. Kpesimiu Piratongo migeçdeac deu wamigeç. <sup>59</sup> Wamigeç Yosefengo Yesuac farenga mema linengkporuc mong kongaha, imoc mema imocngo tembonggema mekenec. <sup>60</sup> Mekemma yengena kicsere gboria dema hocsirau singa usu usuya feec, Yesuac fareng imohai faima hocyada mong kpedidinggeu kicsere naguya imocngo hedzicke taru kenec. <sup>61</sup> Anu Maria Madara nga Maria ogea yereng kicsere naguya nonongkac ihaigeng fieç kenu taroc.

‡ 27:59: Lineng imoc kpindzing mong ambiac ogea, imocngo wamba megeç.

<sup>62</sup> Wereckengau sabata asoac anu womong gareng enara nga farisaio yeni kpeturanggema Piratoaru kemma <sup>63</sup> degec, “Kunennina, ikocngic imocngo gbori kecmanogc, yoc mong deec, neni imoc negensidimbe, imoc edeguni negenna, ‘Ni homema wenac harebec ammanu Anutungo homecfunac megborinuu monggoc yacbad.’ <sup>64</sup> Nga medacfora yeneng kemma farenga hamangec meworagec, ifi debauac, ‘Ye homecfunac yacdac.’ imocac ge kicsere garenggegecdeac edeyununa uameme harebec garenggebisia. Warac ikoc mong anec, imoc femanu ngadeac ikocngo witiau enu yadibacac imoc edegudimbe.” <sup>65</sup> Ifi degec Piratongo yofi edeyunuec, “Naric, wasaingc ngemmeba ngeni wangecyunu kemma kicsere garenggegecdeac kuc mekedae, imocac sirihau garenggebisia.” <sup>66</sup> Ifi deu yeni kemma kicsereac hocnagu mi kpedidinggegecdeac witiau kpae faigec. Faima wasaingc yeneng gareng nanggecdeac edeyunuec.

## 28

<sup>1</sup> Sabata naso wisickeu sonda gboria hanac hanaheau ama werc wereckenggac Maria Madara amma Maria ogea, yeri kicsere hembesonga kenoc. <sup>2</sup> Kemmaec Kebuac angero mongngo kurumennunac mau usoctoa kuchiricngoc meu yeng kicsereac hoc kpedidinggeu kenu witiau emma tarec. <sup>3</sup> Tarec, ye sirihau pirac pirac siric nga wambaya kongac kongac hoeng isoc. <sup>4</sup> Nga gareng yeneng ye hemma kengecyunuu dzonongngina fedeu homebesonga amma fekenggec. <sup>5</sup> Nga ngac yeri kensikemaec angerongo yofi edeyuruec, “Ngeri mi kengecnguruu, ngeri Yesu mariponnu kpekpea, ye hembeso hadape, imoc negenduae. <sup>6</sup> Nga ye ine yei mi fede. Ye edengunuecmoc, ifi yacdac. Ngeri yoc hama fefea henec. <sup>7</sup> Ngereng imoc hemma bic kemma medacfora yofi edeyunuec, ‘Yesungo homecfunac bic yacdac. Ye waraingemmema Gariraia bangecfu kenu ngeni ihai kemma meficgegecde.’ Yoc imoc yagucnoc edenguruba negendape.”

<sup>8</sup> Ifi anu yeri kicsere wama damu nga sogac sogaitoagoc medacfora siduc edeyunuecdeac nedzima bic kenoc. <sup>9</sup> Nedzi kemma Yesugoc ewacgec yeng yofi deec, “Wenacngerec.” ifi deu yeri hoangau ngonducnema haniau mema afeheoc. <sup>10</sup> Nga Yesungo yofi edeyuruec, “Ngeri mi kengecnguruu. Ngeri kemma tosofocna Gariraia bangecfu kengecdeac edeyunuec, yeni ihai kemma nenggecde.”

<sup>11</sup> Anu ngahoc yeri kemmaec wasai ngichabu kicsere garenggec yenearunac goango taonnu emma wiac fingerec, imocac siduc womong gareng enara edeyunudacgec. <sup>12</sup> Edeyunuec yeni yudangic enarafocngina yenigoc adzoragec. Adzoroma yoc deserima wasaingc kicsere garenggec, yeni yoc degecdeac dzo imocacsoc yemmema <sup>13</sup> yofi dema deracyunuec, “‘Neni tofocnac gau femina yeac medacfora yeneng hama farenga hamangec medau.’ ngeni ifi debisia. <sup>14</sup> Nga gawanango yoc imoc negemma wiac mong angemmebac mi kengecngunubeso. Neneng demekiri naric amminide.” <sup>15</sup> Ifi dema edeyunuec wasaingc yeni dzo imoc mema yoc ede edeyunuya, imoc deyadigec. Ikocyoacngina imocngo yudangic yenearu sokoma feecngo fedengoc.

<sup>16</sup> Anu medac 11 yeni Gariraia bangecfu tiki mong Yesungo bic derecgeyemmeec, ihai enggec. <sup>17</sup> Emma yengena hemma afehegec nga ngic mocgu mocgungo ine ubayohoc anggec. <sup>18</sup> Nga Yesungo kicnginau hama yofi edeyunuec, “Nengenggec, bangec nga kurumenggac kuc sasawa ni bic nendac nendara. <sup>19</sup> Imocac ngeni kemma ngicngacareng sasawa

neac sing negemma yoac modac modacareng anggec ngeneng meyunuma yenenggareng ayemmebisia. Amma ngeneng Manggac nga Medac amma Tiri Asu yeac kpacfu doku nadzicyemmebisia. <sup>20</sup> Nga neng yoac sasawa dederecge angemmekefai, ngeni imoc hafoangoc modacdacgecdeac kpouyemmebisia. Amma negendae, ni wenaha wenaha ngenigoc kecbare naso wisickebesande.”

## Mareko Yeng Yesuac Siduc Gombang Ohoec

<sup>1</sup> Yomoc Yesu Kristo Anutuac Medac, yeac siduc gombang hanahema fingerec, <sup>2</sup> imocac siduc. Profete Yesaiango yofi ohoec, “Negnenna, ni siduceddena sueba yeng waraigemma singga mengeregenude.

*(Marekai 3:1)*

<sup>3</sup> Nga bangec kisiu kpakpac mong yofi fingerude, ‘Ngeni KEBUAC sing wisima singa heitumeigec.’ ” *(Yesaia 40:3)*

<sup>4</sup> Yoac imocac sirihau Yohanengo haec. Hama bangec kisiu kecma ngicngac ubangina dzigeneu kopocsicngina kpac anudeac mitidoku nadzicgecdeac edekpou ayemmeec. <sup>5</sup> Nga ngicngac yeni Yudaia prowins nga Yerusareng taonunac amanene yearu kenggec. Kemma kopocsicngina deficgemagec yeng Yodang dokuu namma doku nadzicyemmeec.

<sup>6</sup> Yohane ye ngakpia kamere dzoeango memea, imoc heima fadenga mong yangseberango memea, imocngo kebangau dzegeec. Amma ye ipua nga kateac kukundzau nekefec. <sup>7</sup> Ye ngicngac yoac yofi edekpou ayemmeec, “Ngc neac ngadeu haude, yeac kucngo neac kuc ferahade. Ni ifiango ngonducnema yeac hanitabea witiha yungecba naric mi ngereuede. <sup>8</sup> Ni doku nadzicngemmeduae nga yeng hama Tiri Asungo nadzicngemmeduae.”

<sup>9</sup> Naso imohai Yesungo Nadzarete taong Gariraia bangec wama Yodang dokuu hasikeec. Hasikeu Yohanengo doku nadzicmiec. <sup>10</sup> Nadzicmiu Yesungo dokuunac eremanu imohaingoc kurumeng anggeu Asungo kebesacac siric amma yearu mau henec. <sup>11</sup> Hemmanu kurumennunac enacudumeng mong yofi fingeru negenec, “Ge neac songomedacna, ni gengsongo anggenduae.”

<sup>12</sup> Nga imohaingoc Asungo Yesu sueu bangec kisiu kenec. <sup>13</sup> Kemma uameme 40 kecmanu Satanggo ye tobanggeec. Tobanggeu imohai kateyang yenigoc kecmanu angero yeneng henggareng ammigeec.

<sup>14</sup> Ngic yeneng Yohane witicamau faigec tacmanu Yesungo Gariraia bangecfu kemma Anutuac siduc gombang edekpou ayemmema <sup>15</sup> yofi deec, “Naso bic hau Anutuac eucererenggo mewegenengunudeac ngeni ubangina dzigeneu siduc gombang negensinggeec.”

<sup>16</sup> Anu Yesungo Gariraia dzohong tegiau kengkecma Simong nga munea Anderea yerenu yeri uficngira ukuma nanoc. Nocac yeri kondungyang meme ngic. <sup>17</sup> Yeremma Yesungo yofi edeyuruec, “Ngeri hama modacnuec ngic yeneng kondungyang meandae, ngeri ifi isoc ngicmeme ua meecdeac kpoungemeccade.” <sup>18</sup> Ifi deu yeri imohaingoc uficngira wama Yesu modaroc.

<sup>19</sup> Nga yeni kapianec kemma Yesungo Dzebedaioc medahora Yakobo nga munea Yohane yereneec. Yeri gombau uficngira memengere amma taroc. <sup>20</sup> Tarec yeng yeremma kpacyuruu yeri negenoc. Negenem imohaingoc mangngira Dzebedaioc nga ua ngicfora gombau tacmagec wayunuma Yesu modaroc.

<sup>21</sup> Anu yeni Kafanaung taonnu kensikegec. Kensikemagec sabata naso anu Yesungo kpekpeturang amau emma Anutuac yoac kpouyemmeec.

<sup>22</sup> Kpouyemmeu ngicngac yeneng kpoukpouyoara negemma imoc negenggec engena anec. Ye kpouyemmeec, imoc ngic uakibi mekeccade, yeneac siricfu kuhagoc amma mitiac negen negengngic yeneac dede isoc mi deec.

<sup>23</sup> Anu naso imohaingoc kpekpeturang amau ngic mong asu seuhagocngo tacma arohoec. <sup>24</sup> “Yesu Nadzarete mingina, neneac wiac imoc geac mi ande. Ge memanganenununadeac hanec me? Ni gensiduaenoc, ge Anutuac kpetiac ngic.” <sup>25</sup> Ifi deu Yesungo asu seuhagoc ngaba ammima yofi edeec, “Ge waickema ngicfunac erema kenna!”

<sup>26</sup> Ifi deu asu seuhagocngo ngic mekpefac ammima kucgoc arohoma erema kenec. <sup>27</sup> Kenu ngicngac sasawango kerectegec amma yenaocngoc kpesiemegec, “Imoc noc wiac? Imoc kpoukpou gboria nga yeng ua minginaac kuhagoc kpounemmeu asu seuhagoc ifingoc yoac edeyunuu yeni yoara negemma tofohogec.” <sup>28</sup> Nga siduhango Gariraia prowinsiu bic kemma sokodarec.

<sup>29</sup> Anu yeni kpekpeturang amaunac mama Yakobo nga Yohane yerigoc Simong nga Anderea yereac amau kenggec. <sup>30</sup> Kemma enggec, imohai Simong sefena sebigerec ammiu feec, imoc Yesu edegec. <sup>31</sup> Edegec Yesungo yearu kemma mariaui mema miaru imohaingoc hafeia kpac anu yenenggareng ayemmeec.

<sup>32</sup> Ifi anu wenac kiwa kemeu ama tofore hamanu ngicngac yeneng hafeigoc nga hadehade amma yafingoc sasawa Yesuaru meyunu kenggec. <sup>33</sup> Nga taonggac ngicngac sasawa yeni ama naguyau kpedzucnegec. <sup>34</sup> Kpedzucnemagec Yesungo ngicngac hafeingina hania haniagoc mengereyunuma hadehade nga yafingina homac kporarec. Nga hadehade nga yafing kporacyunuec, yeni haniaya negenggecac yoac degecdeac dederac ayemmeec.

<sup>35</sup> Anu ama mi wereckemmanu Yesungo kundunnungoc yacma ama wama bangec botuc mong ngiha kpacfu kemma numuec. <sup>36-37</sup> Numuu Simong nga tosofora yeni ye hofockemma meficgema edegec, “Ngicngac sasawango ge hofocgudae.” <sup>38</sup> Ifi degec yofi edeyunuec, “Nenang taong goa wegenac tackende, imohai ifingoc kemma yoac edekpou ayemmebade. Nocac ua imocnoc mebadeac hadua.” <sup>39</sup> Ifi deu yeni Gariraia bangec yerecge kenggec. Kemma kpekpeturang amasoc yeng yoac edekpou ayemmema hadehade nga yafing kporacyunuec.

<sup>40</sup> Anu ngic kubecserigoc mongngo yearu hama fafoc heima desambic ammima deec, “Geng negenna naric anu naric medzuacnubang.” <sup>41</sup> Ifi deu Yesungo ubea manganeu maria sinema ngic kpeserema yofi deec, “Ngereenadeac songona fede.” <sup>42</sup> Demanu imohaingoc kubeha mosiu sebia ngereec. <sup>43</sup> Ngereeu Yesungo ngic derahema suema yofi deec, <sup>44</sup> “Negenna, sebigau faka fingeccac, imocac ngic mong mi edebesena. Ge womong gareng yearu kemma sebiga edzahema Mosengo seseac deec, imocac sirihau modacma faibesena! Ge ifi faina yeneng sesega hemma negentegecgecde.” <sup>45</sup> Ifi deu yeng ine kemma siduc imoc sifu deyadie. Imocac amma Yesungo taonnu fingeccac fingeccac monggoc mi enec. Ye ine ngadeau bangec kisiu kecmanu ngicngac noboc nobocnacngo yearu hakecgec.

## 2

<sup>1-2</sup> Uameme goa wisickemanu Yesungo monggoc Kafanaing taonnu kenec. Kenu ngicngac homacngo imoc negemma ama wakema naguya hedzickemagec yeng Anutuac yoac edekpou ayemmeec. <sup>3</sup> Ammanu ngic 4 yeneng ngic mong hanimaria homemea tofohoma yearu mekenggec. <sup>4</sup> Mekenggec ngic homacngo nanggecac hoangau faigeccac obohoma ama witiau enggec. Emma ama bubuya meickegec titinga fingerec. Fingeru yeni

Yesu nanecfu imohai ngicpuring dzakeagoc faigec kemeec. <sup>5</sup> Kemeu Yesungo negen negensingngina hemma ngicpuring yofi edeec, “Medacna, kopocsicga bic wawaya.”

<sup>6</sup> Ifi deu mitiac negen negengngic goa ihai tacgec, yeneng ubanginau yofi negenggec. <sup>7</sup> “Ngic imoc ye nocac yoac ifi dema Anutu emmide! Anutu mocgungo kopocsic naric waude.”

<sup>8</sup> Yeni ifi negenggec Yesungo ongaasuyau negengyemmema yofi edeyunuec, “Ngeni nocac negen negeng ifia ubanginango negensidae? <sup>9</sup> Damocngo efea ande? Ngic puring yeac debesonga, ‘Kopocsicga kpac ande’, me ‘Ge yacma tofoga mema kenna.’ <sup>10</sup> Nga Ngicac Medac, yeng bangecfu kopocsic wawaac uayoac nga kuc femide, ngeni imoc negenggecdeac amma yofi deba.” Ye ifi dema ngicpuring yofi edeec, <sup>11</sup> “Ni edeguduae, ge yacma dzakega mema amagau kenna.” <sup>12</sup> Ifi deu imohaingoc ngic ye yacma dzakea mema ngicngac kicnginau kenec. Kenu ngicngac sasawango imoc hemma kpidohoma kerecgec amma Anutu dengerema degec, “Wiac yomoc mi hehennina yaguc fingeru hendimbe.”

<sup>13</sup> Anu Yesungo ama imohanac mama dzohong tegiau kenec. Kenu ngicngac homacngo yearu kenggec kpoukpou ua meec. <sup>14</sup> Nga kemma Rewi Arifaioac medac takesimeme ameau taru hemma yofi edeec, “Ge hama ni modacnuna!” Ifi deu yeng yacma modarec.

<sup>15</sup> Kecma Yesungo Rewiac amau yaka nema tacmanu takesimeme ngic nga manganameme ngic homacngo Yesu nga medacfora yenigoc yaka momoc negec. Ngic ifia homacngo yeni modacyunuma kenggec. <sup>16</sup> Ifi anu Yesungo takesimeme nga manganameme yenigoc tacma yaka neu farisaio yeneanunac mitiac negen negengngic goa, yeneng imoc hemma medacfora kpesiyemmegec, “Ye nocac takesimeme nga manganameme yenigoc yaka nede?” <sup>17</sup> Ifi degec Yesungo negemma yofi edeyunuec, “Ngicngac hafeingina kpac kecdaa, yeni dotaac mi ayemmeude. Nga hafeingina, yeneng ine dotaac ayemmeude. Nga ni ngicngac dindingac kpacyunubadeac mi mayai, kpac. Ni ine manganameme ngic kpacyunubadeac mayai.”

<sup>18</sup> Yohaneac medacfora nga farisaio yakasege kecandae, yeneanunac goango hama Yesu kpesimigec, “Yohane nga farisaio medacfocngina yeni yakasege angandae. Nga geac medacfocga yeneng nocac yaka sege mi angandae?” <sup>19</sup> Ifi kpesigec Yesungo yofi edeyunuec, “Memeturang ngicngoc tosofora yenigoc taru yeneng yakasege naric mi kecgecde. Monggoc deba, yeng yenigoc tacmanungoc yakasege naric mi kecgecde. <sup>20</sup> Kecma naso monnu ngic yeneng memeturangngac ngic yeneanunac meickegecde, naso imohai yakasege anggecde.

<sup>21</sup> Ngac monggoc ngakpi eseau kporucususuc gboria mong mi kpebiude. Kporucususuc gboriango esea taiu dzamema titingtoa fingebac. <sup>22</sup> Nga ngic monggoc waing gboria bokong yang seberango memea eseau naric mi kpeu kemeude, kpac. Waing gboriango bokong esea tindziru yerahafoc manganebaoc. Imocac waing gboria imoc bokong gboriau kpeu kemeude.”

<sup>23</sup> Naso monnu sabata nasou Yesungo wit ua dzongiau sing modac kemmanu medacfora yeneng wit fora mocgu mocgu merecgema megec. <sup>24</sup> Merecgegec farisaio yeneng degec, “Henna, yeni nocac sabata nasou faka mi angana andae?”

<sup>25</sup> Ifi degec Yesungo yofi merengyemmeec, “Dawidi nga uamedacfora yeni yakaac obohoma herenginaac homema faka anggec, ngeni imoc osonegeng mi angandae gedang. <sup>26</sup> Abiatango womong garentgoa kefec, naso imohai

Dawidingo Anutuac womonnu enec. Emma ic sogong Anutuac sese faifaia, imoc menema uamedacfora ifingoc gumecyunuec. Nga ic sogong imoc womong gareng yenengsac naric negecede, ngictehec yeneng kpac.” (1 *Samue 21:1-6*)

<sup>27</sup> Ifi dema yofi edeyunuec, “Ngicngo sabataac amma mi fingerec, sabatango ine ngicngac ngeneac amma fingerec. <sup>28</sup> Ngicac Medac ye sabataac Kebu kecdengoc.”

### 3

<sup>1</sup> Yesungo naso monnu kpeketurang amau enu ngic mong maria noboc homemea, ye ihai tarec. <sup>2</sup> Nga ngic goa yeni Yesu yoacfu faigecdeac negensigec amma ngic imoc sabata nasou mengereude me kpac, imocac hembikegcec. <sup>3</sup> Hembikegcec Yesungo ngic marimangang yofi edeec, “Ge yacma botucninau nanna.” <sup>4</sup> ifi dema yofi kpesiyemmeec, “Sabata nasou noc faka naric ambesonga, faka gombunga me mangana? Amma homebeso andae, yeni agenggina tinide me yunuhomenide?” Ifi deu yeneng engsac ning kpegec. <sup>5</sup> Ning kpegec yeng ubaseringinaac negenghodungaima herea buu kic fikengfiha amma ngic yofi edeec, “Ge mariga sinena!” deu ngic ye maria sineu ngereec. <sup>6</sup> Ngereeu farisaio yeneng naso imohaingoc Herodeac arengfora yenearu ioha kemma dafiu mema kpegecdeac yoac dedzege angcec.

<sup>7</sup> Anu Yesu nga medacfora yeni amabangec wama Gariraia dzohonnu kemmagec Gariraia bangecfunac habu kunengngo modacyunuec. <sup>8</sup> Ngicngac Yudaia bangecfunac nga Yerusareng taonnunac amma Idumaia bangecfunac nga Yodang edibigeng amma Tiro nga Sidong bangecfunac, habutoa imoc yeni Yesungo faka sasawa meec, imocac siduc negemma yearu hagec.

<sup>9</sup> Nga Ngicngac homacngo hasikema Yesu igockebauac medacfora yeneng wage wegenac faigecdeac edeyunuec. <sup>10</sup> Nga ye ngic homac mengereyunuu hafeigoc yeneng kemma kpeseregecdeac hefacemegec. <sup>11</sup> Nga asu seuhagoc yeneng Yesu hemma ngonducnema yofi dema kpacma degec, “Genoc Anutuac medac.” <sup>12</sup> Ifi degec hania dekperagibauac Yesungo dederac ayemmeec.

<sup>13</sup> Anu ye tikiu emma medac goa ubango negenggosi ayemmeecmoc, deu yearu kengcec. <sup>14-15</sup> Kengcec medac 12 meisingyunuma aposoro kpac yemmeu. Yemmeu yeni yegoc kecmagec yoac edekpou ayemmegecde nga hadehade nga yafing kporacyemmegecdeac uayoac nga kuc yemmeec.

<sup>16</sup> Ngic 12 meisingyunuec, yeneac kpacngina yofi, Simong, kpara mong Petoro miec, ye <sup>17</sup> amma Dzebedaioac medahora Yakobo nga munea Yohane, yereac kpacngira Boanerges yemerec. Imocac titiha, parandangac medac. <sup>18-19</sup> Nga Anderea amma Firipo nga Batoromaio amma Mataio nga Toma amma Yakobo, imoc Arifaioac medac nga Tadaio amma Simong Kananaio nga Yuda Karioto amaunac, yeng kecma Yesu kerereu megec.

<sup>20</sup> Anu Yesungo amau kensikeu habutoango hama kpedzucnegec medacforagoc yakaneneac titing mong mi fingerec. <sup>21</sup> Wiacfora yeneng yofi negenggec, “Ye ubea sufude.” ifi dema megecdeac kengcec.

<sup>22</sup> Nga mitiac negen negengngic Yerusarennac hagec, yeneng degec, “Ye hadehade nga yafing yeneac ngictaungina Bedzeburu, yeac kucfu hadehade nga yafing ngicngac yenearuac kporacande.” <sup>23</sup> Ifi degec Yesungo kpacyunuma yoac heima yofi edeyunuec, “Satang yengenaocngoc dafi kporacemeude? <sup>24</sup> Bangec monggac ngicngac yeni ngaba angemema tohogecdeu



bangec imocngo naric mi fekefude, kpac. <sup>25</sup> Nga amamana mocgungo tohoma ngaba angemeudeu amamana imocngo kpac anude. <sup>26</sup> Nga Satangno tohoma yengenaocngoc kporacemeudeu ye ifingoc kpac anude.

<sup>27</sup> Ngic mongngo ngic kuhagoc, yeac amau emma iwaiya naric mi wangerude, kpac. Ye ngic kuhagoc imoc witickemaguc amea manau emma iwaiya tacde, imoc naric wangerude.

<sup>28</sup> Foracngoc, ngicngac yeni kopocsic hania hania angandae nga wiac hania haniaac deendema nga dedenggbaring angandae, kopocsic ifia sasawa, imocac wawa fede, imoc edengunuduae. <sup>29</sup> Nga ngic mongngo Tiri Asu denggbaringgeude, yeac kopocsic ine wawaya mi fede. Kopocsihaac turunga imoc fekengkecbesande.” <sup>30</sup> Yeneng degec, “Ye asu seuhagoc.” imocac amma yeng ifi edeyunuec.

<sup>31</sup> Anu Yesuac nonggo munafora yeneng sobennu kensikema ngic mong suema degec, “Yesu ye mabeso.” ge ifi edena. <sup>32</sup> Ifi degec Yesungo habu yeneac botucfu tacmanu ngicngac yeneng edegec, “Nonggo munafocga ngadeau namma ge hofocgudae.” <sup>33</sup> Ifi degec yeng merengyemmeec, “Damoc yeneng neac nonggo munafocna?” <sup>34</sup> Ifi dema yegoc momoc tacgec, kiwa yenearu fima yofi deec, “Nonggo munafocna imoc ngicngac ngeni yomoc tacdae. <sup>35</sup> Nga ngic Anutuac songo nga negen negeng modacma yeac ua mekecdae, yeneng neac nonggo naing nga dacmunafocna.”

## 4

<sup>1</sup> Yesungo dzohong tegiau monggoc kemma ngicngac edekpou ayemmeu homacngo yearu kpedzucnema hagec. Imocac yeng gomba monnu emma ihai tacma edekpou ayemmeec. <sup>2</sup> Amma ye yoac heima yoac homac kpouyemmema yofi deec,

<sup>3</sup> “Nenggec, gbome kpegi kpegingic mongngo gbomea kpegiudeac uau kenec. <sup>4</sup> Kemma kpegiu gbome goa mama sinnu heiu neng yeneng hama nedacgec. <sup>5</sup> Nga goa harongannu heiu ihai bangec efeanec feecac gbome imoc bic nemonggema ereec. <sup>6</sup> Erema godea ine homac mi faiecac wenacngo erema kpeu gbome imoc ururuema homeec. <sup>7</sup> Nga gbome goa haseng manau heiu hasengngo yadima heihomeu fora kpac anec.

<sup>8</sup> Nga gbome goango bangec gombungau heima kpea nemonggema fora gombunga anec. Monggac imoc gbomea 30 nga monggac 60 amma monggac 100, ifi fingerec.” <sup>9</sup> Yesungo ifi dema yofi edeyunuec, “Kedzahagoc yeng yoac yomoc negembeso.”

<sup>10</sup> Anu ngicngac habutoa kenggec medacfora 12 nga ngicngac goa yegoc kecgec, yeneng yoac heihei imocac hania Yesu kpesimigec <sup>11</sup> yeng yofi edeyunuec, “Anutuac eucererenggac negen negeng sufu sufuya, imoc ngeni bic ngenngemmea. Nga ngicngac ngadeau kecdae, yeni ine yoac hei-heiusingsac yoac sasawa nengengecde. <sup>12</sup> Ifi anu

‘Yeni kicnginango hemma wiac mong ine mi henggecde nga kedzacnginango negemma wiac mong sifu mi negentegecgecde. Imocac yeni ubangina mi dzigeneu kopocsicngina kpac ambacac kopocsic wawa mi anggecde.’”

(Yesaia 6:9-10)

<sup>13</sup> Anu Yesungo yofi edeyunuec, “Ni yoac heima deduae, ngeni imocac hania mi negendaeu yoac heiheiac hania goa monggoc deba imoc ifingoc dafi negentegecgecde. <sup>14</sup> Gbome kpegi kpegi ngicngoc Anutuac yoac kpegiec. <sup>15</sup> Gbome sinnu heiec, imoc ngic goa yeni yoara nengengec nga Satang ye ine bic hama gbome ubanginau kpegi kpegia meickeude.

<sup>16</sup> Nga gbome harongannu heiec, imoc ngic goa Anutuac yoac negemma heresongogoc bic hoanggegede. <sup>17</sup> Amma yoac ubanginau godea mi meecac naso wegenanec sac taru Anutuac yoacac amma kpendzeng me yunukporac faka fingeru yeni makpegede.

<sup>18</sup> Nga gbome hasennu heiec, imoc goa yeni Anutuac yoac negenggec. <sup>19</sup> Negemma bangectoa bangec yomocac kekecac fagung nga dzofinacac faitobang nga wiac goaac hensongo angandae, imoc sasawango ubanginau kemema yoac heihomeu fora mong mi fingerude.

<sup>20</sup> Nga gbome goa bangec kerehagocfu heiec, imoc ngic goango Anutuac yoac negemma mekecgec fora fingerude. Goango 30 nga goango 60 amma goango 100 meficgeude.”

<sup>21</sup> Yesungo monggoc yofi edeyunuec, “Ngic mongngo kifa kpiacma pake bageau faima mi kperahaude me tatic bageu faiu tarude, imoc kpac. Kifa imoc tatahau faini tacande. <sup>22</sup> Wiac sufuu sufuu fede, imoc kecma didiu fingetegerude nga wiac seme semea, imoc kecma kperagiau fingetegerude. <sup>23</sup> Mong ye kedzahagocngo yoac yomoc negembeso.”

<sup>24</sup> Amma Yesungo yofi edeyunuec, “Ngeni yoac yomoc negentegecbisia. Ngeni wiac kpetea isinggema ngicngac yemmeandae, ngic yeneng kpete siriha ifiangoc isinggema turung kpoungemmegecde. Yeni kpoungemmema imocac siriha meemma monggoc ngemmegecde. <sup>25</sup> Imoc yofiac, mong ye wiac goa femide, ye wiac monggoc migegecde. Nga mong ye wiac mong mi femide, yearunac wiabcisic femide, imoc ifingoc wangecgecde.”

<sup>26-27</sup> Amma monggoc yofi deec, “Anutuac eucererenggac siriha, imoc ngic mongngo gbome kpegiec, ifi isoc. Kpegiau hadzing toforec feyac ammanu gbome imoc nesarima ereude. Nga imoc dafiac erede, imoc ngicngo mi negentegecde. <sup>28</sup> Nga bangec yengenaoc wiac meyadiu erema tebang angkecde. Amma fora amma wadzima kpaueude. <sup>29</sup> Kpaueu fora kpememe naso anu ye semeng bic kperecgeude.”

<sup>30</sup> Yesungo monggoc yofi deec, “Nenang Anutuac eucererenggac siriha yofi heima deni naric anude. <sup>31-32</sup> Anutuac eucerereng imoc mastet gbomea isoc. Mastet gbomea imoc gbome sasawa yeneac kapiangina. Nga imoc bangecfcu faini erema yadima semeng uaac mondzang feracyunuma fawa kuneng angande. Nga sawau neng yeneng imocac nokumucfu hama faec heima tacgecde.”

<sup>33</sup> Yesungo yoac heima yoac ifia homac dema ngicngac negen negengnginaac siriha Kebuac yoac edeyunuec. <sup>34</sup> Amma yoac deec, imoc ine yoac heimasac edeyunukefec. Edeyunuma medacfora meyunuma tembucfu kemma hania dekperagima edeyunukefec.

<sup>35</sup> Anu ama marai anu Yesungo medacfora yofi edeyunuec, “Nenang dzohong noboc kenni.” <sup>36</sup> Ifi deu yeni ngicngac habutoa wayunuma Yesu gombau bic tacmanu yeni ye wangecma kenggec. Kemmagec gomba goango ifingoc modacyunugec. <sup>37</sup> Nga imohai firang engena kpeu tembong kucgoc kpeu dokungo gomba manau erema gomba mewakebeso anec. <sup>38</sup> Anu Yesungo gomba ngadeau kparicgang heima gau femanu medacfora yeneng midima degec, “Kpoukpou, kemebesonga andimbe, ge imocac fagung mong mi annec me?” <sup>39</sup> Ifi degec ye gaunac yacma firang kpetarimima dzohong yofi edeec, “Ge waickema fena!” ifi deu firang kpac anu dzohong imoc ning kpema eng fec.

<sup>40</sup> Feu Yesungo medac yeneac yofi deec, “Ngeni nocac kengec andae, negen negensingnina mong mi fede me?” <sup>41</sup> Ifi deu yeni kengec nga damutoa yombong amma kpesiemegec, “Ye noc ngic, firang nga dzohongtoa yereng yeac enac tofohodape.”

## 5

<sup>1</sup> Anu dzohong ferecgema Gerasene bangecfu edigeng kenggec. <sup>2</sup> Kensikema Yesungo gombaunac mamamu ngic mong asu seuhagocngo kicsereunac hama Yesu meficgeec. <sup>3</sup> Ngic imoc ye kicsereu feyac angkefu ngic mongngo ye witickeudeacsoc mi anec. Nga yeni sengngo witickegec ifingoc obohogec. <sup>4</sup> Ngic yeni naso homac hanimaria sengngo witickegec yeng seng kperegedarec nga hania aiengngo witickegec, imoc ifingoc kperegedarec. Nga ngic sasawa yeni ye mendanggegecdeac obohogec.

<sup>5</sup> Ngic imoc ye hadzing toforec kicsereu nga fagannu arohoma yengenaoc sebia hocfu heiherece angemekefec. <sup>6</sup> Amma ye hereaugoc Yesu hemma nedzikemma haniau makpeec. <sup>7</sup> Makpema serianguc arohoma deec, “Yesu Anutu engenatoac Medac, neac wiac imoc geac mi ande. Ni Anutuac kicfu edeguduae, ge kpendzenu mi fainuna.” <sup>8</sup> Yesungo asu seuhagoc kporaru yearunac erema kenudeac edeac, imocac amma ngicngo ifi deec. <sup>9</sup> Ifi deu Yesungo yofi kpesimiec, “Ge kpacga merac?” kpesimiu deec, “Ni kpacna habutoa, nocac neni homac.”\* <sup>10</sup> Ifi deu ye kporacyunuu bangec imoc mi wagecdeac seriyombonggema derecgeec.

<sup>11</sup> Anu bangec botuc imohai berechabutoa mong fagang wegenacfu surukpea kengec. <sup>12</sup> Kengec asu seuhagoc yeneng yofi dema desambic ammige, “Ge suenununa berecfu kementi.” <sup>13</sup> Ifi degoc Yesungo negengyem-meu yeni ngicfunac erema berechabu yenearu kemegec. Kemegec berec yeni fagannunac nedzima dzohonnu kemema doku nema homedacgec. Nga berec homegec, yeneac kpetengina imoc 2 tauseng isoc.

<sup>14</sup> Anu berecgareng yeneng kengec worama taonnu nga amabisicfu ngic kegec, yenearu kemma faka fingerec, imocac siduc edeyunugec yeneng imoc hengecdeac hagec. <sup>15</sup> Nga yeni Yesuaru hasikema henggec ngic hadehadehabugoc warac kefec, yeng negentegecma wamba heima taru yeni ye hemma kengecyunuec. <sup>16</sup> Nga ngic kicnginango faka imoc henggec, yeneng ngic hadehadegoc, yearu faka fingerec nga berec yeneac siduc momoc ngicngac ayemmegec.

<sup>17</sup> Nga yeni yoac imoc negendacma Yesungo amabangecngina waudeac edegec. <sup>18</sup> Ifi edegec ye gombau emmanu ngic hadehadegoc ngereec, yeng yegoc kenudeac derecgeec. <sup>19</sup> Derecgeu Yesungo ine kpetarimima yofi deec, “Ge amagau kemma Kebungo geac ubea manganu wiac sasawa anggendac, imocac siduc tosofocga ayemmebesena.” <sup>20</sup> Ifi deu ye kemma Yesungo faka sasawa yearu meec, imocac siduc Dekaporisi bangecfu ngicngac yoac dekperagiyem-meu yeni imoc negemma kerecetegec anggec.

<sup>21</sup> Anu Yesungo gombau emma monggoc dzohong ferecgema hasike nammanu ngicngac homacngo yearu heockema kemma kpedzucnegec. <sup>22</sup> Kpedzucnamagec kpeketurang amaac gareng mong kpara Yairo, yeng hama Yesuac haniau makpema desambic amma deec, <sup>23</sup> “Naroanna homebeso ande. Ge hama marigango witiau faina ngereeude.” <sup>24</sup> Edeu negemma kemmaec ngicngac habutoango hefacemema yearu hagec.

\* 5:9: “Kpacna Region” deec. Region imoc ami areng mong kpetea 5 tauseng me 6 tauseng.

<sup>25</sup> Anu ngac mong ihaingoc nanec, ye sacherec amma kecmanu kifa 12 bic anec. <sup>26</sup> Amma ye kpendzeng kpema dota homac yenearu kemma hiedzoya eng kpedzonggeu sebiau ngerec ngeree mong ine mi fingecmiu eng monggoc manganeec. <sup>27-28</sup> Amma ngac imoc ye Yesuac siduc negemma ngicngac ngadenginausing kemma yofi negenec, “Ni ngakpia kpeserema ngereebadec.” ifi negemma Yesuac ngakpihereha kpesereec. <sup>29</sup> Kpesereu imohaingoc sawa ghanggeu sebia nomanu kpendzenga kpac anu nenegemeec.

<sup>30</sup> Nga Yesungo yofi negenec, kucna tosea ferecedac, imocac amma habutoa yenearu dzigenema yofi kpesiyemmeec, “Merang ngakpina kpeseredac?” <sup>31</sup> Ifi deu medacfora yeneng degec, “Ngicngac homac yeneng hefagcumagec geng merang kpeserenude dema kpesinec, imoc mi heide.” <sup>32</sup> Nga Yesu ye ine ngacngu kpesereec, ye hentegeudeac fikengfiha anec. <sup>33</sup> Ammanu ngac ye kengec kpeu dzonoma fedeu Yesuac haniau makpema haniaya hafoangoc deficgedarec, nocac sebiau faka fingerec, imoc negenec. <sup>34</sup> Deficgeu Yesungo yofi edeec, “Naroang, negen negensinggango mengeregudac. Ge sebiga ngereeu ruaegoc kenna!”

<sup>35</sup> Anu Yesungo yoc denammanungoc ngic goa yeneng kpebung garengac amaunac hama Yairo edegec, “Naroangga bic homedac, kpoukpou monggoc ebic mi minal!” <sup>36</sup> Ifi degec Yesungo yocngina wama gareng yofi edeec, “Ge mi kengecguu, eng negensinggena.” <sup>37</sup> Ifi dema habu kpetariyem-mema Petoro nga Yakobo amma munea Yohane, yeni meyunuu kenggec. <sup>38</sup> Kemma garengac amau kensikema henu ngicngac habu yeni ubahodung amma kpeborongtoa kpema kiascongong anggec.

<sup>39</sup> Nga Yesungo ine ama manau emma ngicngac yofi edeyunuec, “Ngeni nocac kpeborong kpema kiacdae? Naroang ye mi homedac, ye gau fede.” <sup>40</sup> ifi deu yeni dzomoremigec. Yeng ine ngicngac sasawa kporacyunuu ngadeau madacgec. Magec naroanggac nonggomama nga medacfora harebec meyunuu naroang fec, ihai enggec. <sup>41</sup> Emma mariaui mema yofi edeec, “Tarita koumi!” imocac titiha yofi, “Ngacbisic, ni edeguduae, ge yacna.” <sup>42</sup> Ifi deu naroang ye imohaingoc yacma kengha anu yeneng hemma kpidohoma negenggec imoc wiac engena anec. Naroang imoc ye kifaya 12 anec. <sup>43</sup> Nga Yesungo faka fingerec, imoc mi deficgegecdeac seria deracyunuma naroang yaka migec neudeac edeyunuec.

## 6

<sup>1</sup> Yesungo bangec imoc wama yengena amabangehau kenu medacfora yeneng modacgec. <sup>2</sup> Nga sabata naso anu ye kpekpeturang amau emma ngic edekpou ayemmeu ngicngac negemma tacgec yeneng kerectegec amma degec, “Negen negeng imoc merang kpoumiec nga uayoac merang miecac mariango faka kuhagoc ifia mekecde? <sup>3</sup> Ye Mariaac medac nga amamemengic. Ye Yakobo nga Yosec amma Yuda nga Simong yeneac dacngina nga naingfora yeni nenanggoc kecdac.” Yeni ifi dema dehesi amma wagec.

<sup>4</sup> Nga Yesungo yofi edeyunuec, “Profeteac amafora nga sactosofora amma arengfora, yenengsac yeac ewea mi heiandae.” <sup>5</sup> Nga ye faka kuhagoc mong yenearu meudeacsoc mi anec. Ye ngic hafeigoc mocgu mocgusac mariango kpesereyunuu ngeregec. <sup>6</sup> Nga yeni mi negensinggegec negenu naric mi anec. Amma ye guruama tackenec, imohai yerecgecma edekpou ayemmeec.

<sup>7</sup> Yesungo medacfora 12 kpacyunuma yohockang yohockang hendzicyunuma asu seuhagoc kporacgecdeac uayoac nga kuc yemmema

sueyunuec. <sup>8</sup> Amma yeng yofi dema dederecege ayemmeec, “Ngeni singgac mefic mong mi mema yasusac mebisia. Ngeni yaka me hie mi mebisia amma dzo mong fadeng nabehau mi baribisia. <sup>9</sup> Ngeni hanitabe faima ngakpi yohockang ine mi mekembisia.” <sup>10</sup> Ifi dema yofi edeyunuec, “Ngeni kemma ama monnu kensikegec ngic yeneng ama heingemmegec ngeni ama imohai tacyac angkegec wisickeu wama amabangec monnu kembisia.

<sup>11</sup> Nga amabangec monnu kenggec ngic yeni mi hoangnungucecde amma yoacngina mi negenggecdeu ngeni haninginaunac yube kpegec mau amabangec imoc wabisia. Nga ngic yeni imoc hemma haniangina negentegecbisia.” <sup>12</sup> Yesungo ifi deu yeni kemma ngicngac ubangina merenggecdeac Anutuac yoac edekpou ayemmegec. <sup>13</sup> Amma yeni hadehade nga yafing homac kporacyunugec nga ngicngac hafeigoc kerecngo nadzicyemmema mengereyunugec.

<sup>14</sup> Yesuac siduc imoc bangeha bangeha sokoma kenu ngictau Herodengo yoac imoc negemma yofi negenec, “Yohane dokunadzicngo homecfunac gborima yarecac amma faka kuhagoc meudeac kuc femide.” <sup>15</sup> Ifi degec ngic goa yeneng degec, “Imoc Eria.” nga goango degec, “Ye profete. Profete warac kecgec, yeni isoc.” <sup>16</sup> Anu Herodengo ine yoac imoc negemma deec, “Yohane ubea kperecgeai, yennoc gboriec kecede.”

<sup>17-18</sup> Nga Herodengo munea Firipoac enema kpara Herodia, ye hamangec mema mekefec. Faka imocac amma Yohanengo Herode yofi edeec, “Ge munagaac enema menec, imoc singngo mi dede.” Ifi deu Herodengo ngicfora edeyunuu Yohane mema witickema witicamau faigec. <sup>19</sup> Anu Herodiango Yohaneac herebu negenec. Negenu Herode ye ine Yohaneac kengec kpeu garenggecac amma Herodiango kpeudeac sing obohoec. <sup>20</sup> Imoc yofiac, Yohane ye ngic dindingac nga kpetiac, Herodengo imoc negentegecma hengareng ammikefec. Amma ye yeac yoac negemma naso homac negengyohoc mefigema sifu yoara negenudeac ammiec.

<sup>21</sup> Kecma Herodiaac naso gombunga mong yofi fingerec. Herodengo fingec fingec nasoyau ngickuneng yeac bageau kecgec nga wasaingicforaac enara amma Gariraiac bangecfunac ngicenara, yeni heitaiyunuma neneyaka ohoyemmegec. <sup>22</sup> Ohoyemmema tacmagec Herodiaac naroangngo hama kicnginau yegec fedeec. Fedeu Herode nga ngic yegoc yaka negec, yeneng imoc hemma songo negenggec. Imocac amma ngictaungo naroanggac deec, “Ge wiac monggac negemma derecgenenna imoc naric gembade.” <sup>23</sup> Dema nemuya monggac kpacfu yofi deseriec, “Ge wiac sasawa derecgenenna gengyombonggebade nga bangecna nobohaac dena mendzicma gembade.”

<sup>24</sup> Ifi deu naroang ye kemma nonggea kpesimiec, “Ni noc wiacac debade?” deu nonggeango deec, “Ge Yohane dokunadzicac oruha dena.” <sup>25</sup> Ifi deu naroang ye imohaingoc ngictau yearu kemma deec, “Yohane dokunadzicac oruha yagucngoc terau faima nennadeac anende.” <sup>26</sup> Ifi deu ngictaungo ubaebic meec. Amma ngic tacgec, yeneac kicfu yoac bic deseriecac amma ine imoc wabesonga negenu naric mi anec. <sup>27</sup> Nga ye imohaingoc wasaingic mong sueu Yohaneac hatea mehaudeac witicamau kenec. Kemma Yohaneac ubia kperecgema <sup>28</sup> hatea imoc terau faima mehama naroang miu naroangngo imoc mekemma nonggea miec. <sup>29</sup> Anu Yohaneac medacfora yeneng siduc imoc negemma kemma farenga mehama tonggogec.

<sup>30</sup> Apororo yeni monggac Yesuaru kpeturangge hama wiac sasawa anggec megec nga edekpou ayemmegec, imocac siduc ammigec. <sup>31</sup> Nga ngicngac homac yeneng kengha anggecac tacnegeng nga yakaneneac titing mong

mi fingerec. Imocac Yesungo medacfora yofi edeyunuec, “Ngeni hagec tembucnina kecnideac nigoc bangec kisiu kemma kecnegembisia.”<sup>32</sup> Ifi deu yeni tembucngina gombau emma bangec mong ngiha kpacfu kenggec.

<sup>33</sup> Kemmagec ngicngac homacngo ine yenemma yenentegecma taong tackenec, imohacnac nedzima warac warac ihai kensikegec. <sup>34</sup> Kensikema Yesungo gombaunac mama ngicngac habutoa ifi yenemma yeneac ubahodung negenec. Nocac yeni rama garengngina kpac kecdae, ifi isoc kecgec. Ifi negemma wiac homac edekpou ayemmeec. <sup>35</sup> Ayemmema kefu marai anu medacfora yeneng yearu hama degec, “Bangec yomoc ngiha kpac anu naso bic kendacde. <sup>36</sup> Imocac ge ngicngac sueyununa ama tackende, imohai kemma yaka bummenec ambisia.” <sup>37</sup> ifi degec yeng yofi deec, “Ngeneng yaka yemmegec negec.” Ifi deu merenggec, “Neni kemma 200 denarigo\* yaka bumme hama yemmeni negecdeac denec me?” <sup>38</sup> Ifi degec Yesungo yofi kpesiyemmeec, “Ngenearu ic sogong dafiguc fede, ngeni kemma henggec.” Ifi deu kenghemma edegec, “Ic sogong marimong nga kondungyang yohockang metacdimbe.”

<sup>39-40</sup> Ifi degec yeng ngicngac kpindzinnu matacgecdeac edeyunuec. Edeyunuu yeni mama goa 100 nga goa 50 ifi habu mema kpindzinnu tackenggec. <sup>41</sup> Tacmagec Yesungo ic sogong marimong nga kondungyang yohockang imoc meec. Mema kiwa kurumennu fiu enu kenehema ic sogong tuema medacfora ngicngac gumecyunugecdeac yemmeec. Yemmema kondungyang ifingoc mederema yemmeu medacgec. <sup>42</sup> Mema ngicngac sasawango negebec amma <sup>43</sup> ic sogong nga kondungyang tosea neti anggec feu kpedzucnegec kemema sakac 12 wakeec. <sup>44</sup> Ngic yaka negec, imoc yeneac kpetengina 5 tauseng.

<sup>45</sup> Nedacgec wisickeu Yesungo ngicngac faiyunuudeac namma medacfora sueyunuu yeni waraima gombau emma Besaida taonnu kenggec. <sup>46</sup> Kemmagec ye ngicngac faiyunuma numuudeac tikiu enec. <sup>47</sup> Nga ama toforeyemmeu gombango dzohong dzongiau kemmanu Yesungo tembuha yeigeng kefec. <sup>48</sup> Kefu medacfora kemmagec ama werac wereckenggac firanggo kenggecfusing haecac puri kpebibiegec. Ifi anggec Yesungo yenemma yeneangeng dzohong witiau titi kemma feracyunubeso anec.

<sup>49</sup> Ye dzohong witiau titi kenecac yeni hemma ine wosongango hade, ifi negemma kengec amma arohogec <sup>50</sup> yeng yofi bic edeyunuec, “Ngeni wosongina makiu, imoc ni, ngeni mi kengecngunuu.” <sup>51</sup> ifi dema gombau emma yenigoc taru firang kpac anec. Nga yeni ongangina worau kerectegec anggec. <sup>52</sup> Amma yeni herengina dzege dzegea feecac amma yakau faka fingerec, imoc mi negentegecgec.

<sup>53</sup> Anu yeni dzohong ferecgema Genesarete bangecfu kensikema gombangina dzegegec tarec. <sup>54</sup> Taru gombaunac mamagec ngicngac yeneng Yesu bic hensigec. <sup>55</sup> Hensima amea amea nedzikemma ngicngac hafeigoc tofou faiyunuma, “Ye ihai me ihai kecde.” imoc negemma ihai meyunu hakecgec. <sup>56</sup> Yesungo taonnu nga amabisicfu endaru ngicngac yeneng ngicngac hafeigoc meyunuma didiu faiyunugec ngakpia susiaac witiha kpeseregecdeac derecgegec. Amma kpeseregec, yeni sasawango ngeregec.

\* 6:37: 200 denari imoc burumaka 6ac bungngina isoc ande.

## 7

<sup>1</sup> Farisaio nga Yerusarennac mitiac negen negengngic goa yeneng Yesuaru hama kpeturanggema kegec, <sup>2</sup> imohai Yesuac medacfora goa yeni maringina mi dzuac dzuac yaka menec anggec yenenggec. <sup>3</sup> Imoc yofiac, farisaio nga yudangic sasawango bangefcocnginaac singyoac modacma maringina dzuacmaguc yaka neandae.\*

<sup>4</sup> Amma yeni emenefunac hama doku nadzic nadziha kpac yaka eng mi menec amma faka goa ifia momoc kpabanggema angandae. Yeni kpakenec nga sokoc amma birikeng ifingoc dzuacmaguc neandae. <sup>5</sup> Ifi anu farisaio nga mitiac negen negengngic yeneng Yesu kpesimigec, “Medacfocga yeni nocac bangefcocnina nga esangabofocnina yeneac singyoac mi modacma maringina mi dzuac dzuac yaka eng menec angandae?” <sup>6</sup> ifi degec yeng yofi edeyunuec, “Profete Yesaiango ngic ikoha ngeneacnoc kpefing fora yombong yofi ohoc,

‘Ngichabu yomoc yeni enacbibicngo sesehenuandae nga herenginango ine neac hereau kecdae. <sup>7</sup> Yeni ngicngac wiac kpouyemmeandae, imoc ngicac singyoac edekpou ayemmeandae amma ni eng dengerenugec hembra fora kpac angkecde.’ *(Yesaia 29:13)*

<sup>8</sup> Ngeni Anutuac dedeseriyoac meickema ngic yeneac singyoac hoanggeandae.”

<sup>9</sup> Amma monggoc yofi edeyunuec, “Ngeni ngenang singyoac hoanggeandaeac Anutuac dedeseriyoac meickeyombonggegecde. <sup>10</sup> Mosengo yoac mong yofi deec,

‘Ge nonggo manghocga seseheyurubesena.’ nga ‘Ngic mong ye nonggea me mamaac sowecyoac deude, ye homebeso.’ ” *(Makekeng 20:12; 21:17; Sesememe 20:9; Dedeseri 5:16)*

<sup>11</sup> Ngeneng ine yofi deandae, “Ngic mongngo nonggea me mama yofi edema deude, ‘Wiac gamba nanggegudeac dedua, imoc bic Anutuac sese† dedua.’

<sup>12</sup> Ifi deu ngeni ngic nonggea me mama meficgeudeac dekpetari ammigecde.

<sup>13</sup> Amma ngeni singyoacngina kpabanggema Anutuac yoac semema faka goa ifia homac angandae.”

<sup>14</sup> Yesungo ifi dema ngichabu monggoc kpacyunuu hagec yofi edeyunuec, “Ngeni kedzac kpema negentegecdagec. <sup>15</sup> Wiac mongngo ngadeaunac kemeande, imocngo ngic ubahere naric mi heidzadzu kpeude, kpac. Nga ngic heremanaunac wiac ereande, imocngo ine ngic heidzadzu kpeude.

<sup>16</sup> Ngic kedzahagoc kecde, yeng yoac yomoc negembeso.”

<sup>17</sup> Ye ifi dema ngicngac wayunuma amau enu medacfora yeneng yoac heima deec, imocac kpesimigec yofi edeyunuec, <sup>18</sup> “Ngeni negen negentegecngina kpac, ifi isoc kecdaengoc. Ngadeaunac wiac mong heremanaunac kemeande, imocngo naric mi heidzadzu kpeude, ngeni imoc mi negentegecdae me? <sup>19</sup> Wiac imocngo ubanginau mi kemeandae hereu kemema isinggeu keractennu kemeude.” Yesungo ifi dema yaka sasawa nenideac desorongaiec. <sup>20</sup> Amma torokpema yofi deec, “Wiac mong ngic ubahereunac ereande, imocngo ine heidzadzu kpeude.

<sup>21-22</sup> Nga ngic ubahereunac wiac yofia ereande, negen negeng mangana nga Kaiserofaka amma hamangecfaka nga ngickpekke amma eweeneng mewa nga kic hodung amma manganaac areng meme nga ikoc faka amma

\* **7:3:** Ge imocac hania “Yoac goaac dedekperagi” imohai hennade. Hafac 1130 † **7:11:** Sese imoc Hebraio yoacfusing Korban



faka sicsauha nga keracmangang amma desureyoac nga sebiengeng amma ubafong, <sup>23</sup> imoc sasawango ubahereunac erema ngic heidzadzu kpeude.”

<sup>24</sup> Anu Yesungo yacma imohacnac kenec. Kemma Tiro nga Sidong amabangecfu kensikema ama monnu enec. Enu ngicngac yeni taong imohai siduha mi negenggecdeac, ifi negenec amma ye ine sufuma tarudeac obohoec. <sup>25-26</sup> Ammanu imohaingoc Sirofoinikia bangecfunac griknagac mongngo haec. Hama Yesuac haniu makpema naroanga asu seuhagoc kporacmiudeac derecgemiec. <sup>27</sup> Derecgemiu Yesungo yofi edeec, “Nambarac yeni yaka warac warac nema gebecyunubeso. Nambarac yeneac yaka wangepyunuma kasi yenearu ukunide, imocngo faka gombunga kpac.”

<sup>28</sup> Ifi deu ngacngo meremmiec, “Kebu, imoc negenduae, amma kasi yeni sifu nambarac yeneng yaka kisisickegec tebo bageau maande, imocsac neandae.” <sup>29</sup> ifi deu Yesungo yofi edeec, “Ge yoac ifi denecac kenna, hadehade ye naroanga bic wadac.” <sup>30</sup> Ifi deu ngac ye ameau kemma henu hadehadengo naroanga bic wau naroang ye fefeau waickema feec.

<sup>31</sup> Yesungo Tiro bangecfunac dzigenema Sidong taong ferecgema Dekaporisi<sup>‡</sup> bangecfu sing kemma Gariraia dzohonnu kensikeec. <sup>32</sup> Kensikemanu ngicngac yeneng ngic mong kedzacfong nga yoac dedeac enara ebiria, ye mehama Yesu mariango kpesereudeac desambic ammige. <sup>33</sup> Ifi degec negemma ye ngichabu yenearunac meickema ngic ngadeau faiu nanu gbongango kedzahau faima mariau sofohoma nedzaranga kpesereec. <sup>34</sup> Kpeserema kurumennu fiu enu asu heima deec, “Effata!” Imocac titiha yofi, “Ge sarinal!” <sup>35</sup> Ifi deu ngic kedzaha bic sariu nedzaranga monggoc merenu yoac tongganang deec.

<sup>36</sup> Ifi deu Yesungo faka fingerecmoc, imoc ngicngac yeneng mi deyadigecdeac seria yombong deracyunuu yeni ine imoc monggoc deyadiyombonggema degec. <sup>37</sup> Ifi degec ngicngac yeni homac wareckema kerecgec amma degec, “Ye wiac sasawa mema kecde, imoc ngereeyombonggedacde. Ye ngicngac kedzacfong yeneac kedzac mesariude nga yoacngina kpac, yeni yoac meficgeyemmeude.”

## 8

<sup>1</sup> Naso imohai ngicngac habutoa yeni monggoc Yesuaru hama kpeturanggegec. Nga yakangina kpac anu Yesungo medacfora kpacyunuma yofi edeyunuec, <sup>2</sup> “Ngicngac yomoc yeni yakangina kpac uameme harebec bic nigoc kecdauac ubana manganede. <sup>3</sup> Goa yeni amabangec hereaunac hagecac yakaya kpacfu sueyunuba amanginau kengkecma kicgigi ayemmebacac.” <sup>4</sup> Ifi deu medacfora yeneng degec, “Nenang bangec kisi yofiau yaka dafiu meficgema habutoa yemmeni gebecyunuude?” <sup>5</sup> ifi degec Yesungo kpesiyemmeec, “Ngeni ic sogong dafiguc mekecdae?” deu yeni “Seweng” degec.

<sup>6</sup> Ifi degec negemma Yesungo habu bangecfu matagecdeac edeyunuec. Edeyunuma ic sogong seweng mema Anutuac ubangerec dema tuema medacfora yemmeu yeneng mederema ngicngac arennu yemmegec. <sup>7</sup> Amma ye kondungyangbisis bisic goa metagecmoc, imoc ifingoc Anutu ubangerec edema faiyemmegecdeac edeyunuec. <sup>8</sup> Faiyemmegec yeni negec gebecyunuu yaka tosea tarec, imoc mema kpedzucnegec sakac 7 anec. <sup>9</sup> Nga ngic 4 tauseng ihai tacgec, yeni negec wisickeu sueyunuu kengha anggec.

<sup>‡</sup> 7:31: Dekaporisi imoc titiha taong 10.

<sup>10</sup> Nga Yesu ye imohaingoc medacforagoc gombau emma Darimanuta bangecfu kenggec.

<sup>11</sup> Farisaio yeneng hama Yesugoc yoacngina engemmama anec. Yeni kuha isinggegedeac faka kuhagoc mong kurumennunac meu henggecedeac derecgemigec. <sup>12</sup> Ifi degec yeng ongaasuyau ebic meficgema yofi deec, “Naso yomocac ngicngac ngeni nocac faka kuhagoc henggecedeac derecgeandae? Foracngoc, ngicngacareng yomoc ngenearu faka kuhagoc mong naric mi fingecngemmeude, imoc edengunuduae.” <sup>13</sup> Ifi dema ngic imoc wayunuma gombau monggoc emma dzohong nobocgeng kenggec.

<sup>14</sup> Naso imohai medac yeni ic sogong nigecyunuu mocgusac gombau taru mekenggec. <sup>15</sup> Nga Yesungo gorongina kpema yofi edeyunuec, “Ngeni farisaio nga Herode yeneac yis, imocac henghomema kecbisia.” <sup>16</sup> ifi deu yenaocngoc denegeng amma degec, “Nenang ic sogonnina kpac, imocac amma ifi dede.” <sup>17</sup> Ifi denegeng angec ye imoc negemma edeyunuec, “Ngeni ic sogong mi mehadauac denegeng andae nga ngeni yoac imoc wagec. Ngeni herenegen negengngina dzege dzegeaac amma wiac mong mi negentegedae. <sup>18</sup> Ngeni kicnginagocngo wiac mi hengandae nga kedzacnginagoc ammanu wiac mi negengandae.

<sup>19</sup> Ni ic sogong 5 tuema ngic 5 tauseng gumecyunuba tosea taru sakac dafiguc kpedzucnegec wakeec, imoc bic nigecngunuec me?” Kpesiyem-meu yeni 12 degec. <sup>20</sup> “Anu monggoc ic sogong 7 tuema ngic 4 tauseng gumecyunuba tosea taru sakac dafiguc kpedzucnegec wakeec?” kpesiu yeni 7 degec. <sup>21</sup> Ifi degec yeng yofi edeyunuec, “Ngeni yaguc ifingoc negen negengngina mi iredkedengoc.”

<sup>22</sup> Anu yeni Betsaida amabangecfu kensikemagec ngicngac yeneng ngic kicpisis mong Yesuaru mehama mariango kpesereudeac desambic am-migec. <sup>23</sup> Ifi angec ye kicpisis mariaua mema guruama ngadeau hesicke kemma kiwau sofohoma mariango witiau faima kpesimiec, “Ge wiac mong hennec me?” <sup>24</sup> Kpesimiu kicpisis yeng kic fima deec, “Ngic yeni siricngina ic isoc yenemba kengha andae.” <sup>25</sup> Ifi deu Yesungo kiwau maria monggoc faiu ngerema wiac sasawa gombunga nga dindingac henec. <sup>26</sup> Henu suema yofi edeac, “Ge amagau kemma taonnusing mi embesena.”

<sup>27</sup> Amma Yesungo medacfora yenigoc Kaisarea Firipo taonnu kenggec. Sinnu kemmagec yeng medacfora yofi kpesiyemmeec, “Ngicngac yeni neac merac deandae?” <sup>28</sup> Ifi deu degec, “Ngic goango Yohane dokunadzic deandae nga goango Eria amma goa yeneng ine profete mong esa deandae.” <sup>29</sup> Ifi degec yofi kpesiyemmeec, “Anu ngeni ngenaoc ine neac merac deandae?” deu Petoronggo deec, “Ge Messia.” <sup>30</sup> Ifi deu yeng yoac imoc ngic mong mi edeyunugedeac deracyunuec.

<sup>31</sup> Anu Yesungo yofi edekpou ayemmeec, “Ngicac Medac ye kpendzeng homac kpebeso. Yudangic enarafocngina nga womong gareng enara amma mitiac negen negengngic yeneng ye ubango wama kpegec homebeso. Homeu uameme harebec ammanu monggoc gborima yacheso.” <sup>32</sup> Yoac imocac didiu yombong edeyunuu Petoronggo ngadeau wangec kemma tem-bucfu namma kpetarimiyombonggeec. <sup>33</sup> Kpetarimiu Yesungo dzigenema kiwa medac yenearu fima Petoro kpetarimima edeac, “Satang, ge ngadenau hakenna. Ge wiac negennec, imoc Anutuarunac kpac, imocngo ine ngicac negen negeng ande.”

<sup>34</sup> Yesungo habu nga medacfora kpacyunuma yofi edeyunuec, “Ngic mong ye ni modacnubeso negendeu ye yengena ubasebiaac songo memama

mariponga miacma tofohoma modacnubeso. <sup>35</sup> Imoc yofiac, ngic mong ye kekeha segereudeac negemma uaya mede, ye kekeha sufumiude. Nga ngic mong ye neac amma nga siduc gombunggac amma kekeha waude, ye ine kekeha fingecmiude. <sup>36</sup> Imocac ngic mongngo bangectoa bangec yomocac wiac sasawa meficgeecac kekeha ukuu sufuude, imocngo ngic naric mi meficgeude. <sup>37</sup> Ngickekec monggoc memeaac sing mong mi fede. <sup>38</sup> Imoc yofiac, ngic mongngo neac negenu gameagoc anude amma neac yoacnaac negenu gameagoc ande, yearu yofi fingerude, Ngicac Medacngo Mamaac kuc nga kibikperagiau angero kpetiac yenigoc haude, yeng ngic imoc yeac ifingoc negenu gameagoc anude.”

## 9

<sup>1</sup> Yesungo torokpema yofi edeyunuec, “Foracngoc, ngic yomoc nandae, ngeneanunac goa mi homemagec Anutuac eucerereng kuhagoc fingectegeru henggecde, imoc edengunuduae.”

<sup>2</sup> Anu uameme 6 wisickemanu Yesungo Petoro nga Yakobo amma Yohane meyunuu tikitoa herea monnu tembucongina kecgecdeac enggec. Emma sebia kicnginau heimeremma siraha mong yombong anec. <sup>3</sup> Ngakpia hereha kperagima kongac koporacac yombong anec. Bangecfu ngic mongngo wamba kongac kongac ifia naric mi meficgeude. <sup>4</sup> Anu imohaingoc Mose nga Eria fingecyemmema Yesugoc yoac denegeng anoc. <sup>5</sup> Ifi anggec Potorongo Yesu edeac, “Kpoukpou, yei kecni songea andeac bedzo harefa men. Geac mong nga Moseac mong amma Eriaac mong.” <sup>6</sup> Yeni homac kengecyunuecac ye noc wiac debeso, imoc obohoec. <sup>7</sup> Ifi nammagec hoeng mongngo hama semeyunumanu hoeng manaunac yoacadumeng mong yofi fingerec, “Yomoc neac Songomedacna, ngeni yeac yoac negembisia!” <sup>8</sup> Yoac wisickeu imohaingoc yeni fikengfiha amma Yesungosac yenigoc nanu henggec nga ngic mong mi henggec.

<sup>9</sup> Nga yeni tikiunac mamagec Yesungo deracyunuma yofi deec, “Ngeni wiac hendaumoc, imocac siduc ngic mi edeyunubisia. Kecma Ngicac Medac homecfunac gborima yaruguc ine debisia.” <sup>10</sup> Edeyunuu medac yenaocngoc kpesiemegec, “Homecfunac gborima yacyac, imocac hania dafi?”

<sup>11</sup> Yeni yofi dema kpesimigec, “Mitiac negen negengngic yeni dafiac Eriango waraima haudeac deandae?” <sup>12</sup> Ifi degec yofi edeyunuec, “Eriangonoc hama wiac sasawa memengere anude. Nga mitikibi yofi oho ohoya fede, ‘Ngicac Medac ye kpendzeng homac kpeu desure ammigecde.’ imoc dafiac negensidae?” <sup>13</sup> Amma yofi edengunuba, “Eria ye bic haec nga ngic yeni songonginaac arennu faka hania hania ammigec, imoc yeacnoc oho ohoya fede.”

<sup>14</sup> Yeni tikiunac mama medacfora goa yeneng yenearu hama henggec ngicngac homac yeneac botucfu mitiac negen negengngic yenigoc yoacngina engemmama anec. <sup>15</sup> Nga ngicngac nanggec, yeneng Yesu hemma kpidohoma bic nedzikemma wenacngerec demigec. <sup>16</sup> Ifi anggec Yesungo kpesiyemmeec, “Ngeni nocac yoacngina engemmama ande?” <sup>17</sup> Ifi deu habu yenearuac ngic mongngo deec, “Kpoukpou, hadehade mong yoara kpacngo medacnaac enac mema medzickeu gearu mehadaue.

<sup>18</sup> Nga hadehadengo naso homac ye mema kpekpefac ammiande. Ammiu ye hanimaria goru enaraunac nambang sofororoc ereu enara kirandziande. Imocac medacfocga yeneng asu mangana kporacmigeceac deba yeni kporacbiema wadau.” <sup>19</sup> Ifi deu Yesungo yofi mereneac, “Areng

yomoc ngeni negen negensingngina kpac yombong. Ni ngenigoc naso herea monggoc tacbadeac modzona tide. Ngeni medac imoc megec hau.”<sup>20</sup> Ifi deu mekenggec hadehadengo Yesu hemma medac kpefahau bangecfu makpeec. Makpeu enaraunac nambang nga sofororoc ereec.

<sup>21</sup> Ereu Yesungo mama kpesimiec, “Hafei yomoc noc nasoac hana-hema finge cmiec?” deu mamango deec, “Imoc sabahaungoc finge cmiec.<sup>22</sup> Finge cmiu hadehadengo naso homacngoc medac kpehomeudeac gerecfu me doku kpefahau kemeande. Nga ge meficnurunadeacsoc andeu sifu ubaga manganu meficnuruna.”<sup>23</sup> Ifi deu Yesungo yofi edeec, “Imoc ambadeacsoc, denec. Ngic mong ye negensinggede, yearu wiac sasawa naric fingerude.”<sup>24</sup> Ifi deu imohaingoc medac mamango arohoma deec, “Ni negensingguba negen negensinna wegenedeac geng meficnuna.”

<sup>25</sup> Ifi deu ngicngac homacngo Yesuaru nedzima kenggec yeng yenemma asu seuhagoc yoac seria ammima yofi edeec, “Asu kedzacfong amma yoacga kpac, ni edeguduae, ge medac imoc wama erema kemma monggoc dzigenema yearu mi kembesena.”<sup>26</sup> Ifi deu hadehadengo kucgoc yombong arohoma tima erema kenu medac ye homemea isoc feec. Feu ngic yeneng imoc hemma bic homedac degec.<sup>27</sup> Ifi degec Yesungo ine mariaua mema miaru yarec.

<sup>28</sup> Yaru Yesungo amau enu medacfora yeneng tembu cfu yegoc tacma kpesimigec, “Neni dafi ac hadehade imoc kporacnideac obohoding?”<sup>29</sup> Ifi degec yeng yofi edeyunuec, “Hadehade ifia yakasege kecma nunumungo kporacbesonga.”

<sup>30</sup> Yesu nga medacfora yeni ama imoc wama yofi negemma Gariraia bangec ferecgema kenggec, “Ngicngac yeneng imoc mi negembisia.”<sup>31</sup> Nga ye imohai kemma medacfora yofi edekpou ayemmeec, “Ngicngac yeni Ngicac Medac kererema ngic yeneac mariu faigecde. Faigec yeneng ye kpegec homeude. Homeu uameme harebec ammanu gborima monggoc yarude.”<sup>32</sup> Ifi deu yeni ine imoc mi negentegecma kpesigecdeac kengecyunuec.

<sup>33</sup> Anu Yesungo Kafanaung taonnu kensikema amau emma medacfora yofi kpesiyemmeec, “Ngeni sinnu noc wiacac denegeng andau?”<sup>34</sup> Kpesiyemmeu waickema tacgec nocac yeni sinnu yananggarunac merang engena kecde, imocac denegeng anggec.<sup>35</sup> Tacgec Yesungo medacfora 12 kpacyunuma yofi edeyunuec, “Ngic mong ye enara kecbeso negende, yeng ngic tosofora sasawa, ngeneac ngadeu kecma ngeneac kingangkpekke ambeso.”<sup>36</sup> Ifi dema nambarac yene arunac mong mema botucnginau faima hoanggema yofi edeyunuec,<sup>37</sup> “Ngic mong ye nambarac yene arunac mong yofia neac kpacfu hoanggeude, ye ni hoannuude. Nga ngic mong ni hoannuude, yeng nisac mi hoannuude, kpac. Yeng Anutu suenuec, ye ifingoc hoanggeude.”

<sup>38</sup> Anu Yohanengo Yesu yofi edeec, “Kpoukpou, ngic mong ye geac kpacfu hadehade nga yafing kporacyemmeu hending. Amma ye nenangoc mi kecdeac kpetarimiding.”<sup>39</sup> Ifi deu Yesungo yofi deec, “Ngeni mi kpetarimbisia. Ngic mong ye neac kpacfu ua mong kuhagoc meude, yeng kpacna bic mi demanganeude.<sup>40</sup> Ngic mong ye neneac ngaba mi ande, yeng ogonina anude.<sup>41</sup> Nga ngic mong ye ngeni Kristoac medac dema doku kpakene cfu kpengemmu negecde, foracngoc, yeng wiac imocac buma mi obohode, imoc edengunuduae.”

<sup>42</sup> “Amma nambarac kapia mongngo ni negensinnukecde, ngic mongngo nambarac ifia faka mangana kpoumibacac amma ye yagucnoc dzamandz-  
ingtoa ubeau ubahemima kondungtoau ukugec kemeu, imocngo ngic yearu  
ngereebac. <sup>43</sup> Nga mariga mongngo anggenu kopocsic meficgenadeu ge  
imoc herecgema ukubesena. Mariga yohockanggoc kecma hofeac gerec  
piscic pisickea kpac, imohai kemebanggac maritegec kecma kekecseriu enna  
ngereeu de.”

<sup>44</sup> ‘Hofeu kamangina mi homeude nga gerecngo mi pisickeude.’ (Yesaia  
66:24)

<sup>45</sup> Amma haniga mongngo anggenu kopocsic meficgenadeu imoc herecge  
ukubesena. Haniga yohockanggoc kecma hofeu kemebanggac hanitegec  
kecma kekecseriu enna ngereeu de.”

<sup>46</sup> ‘Hofeu kamangina mi homeude nga gerecngo mi pisickeude.’

<sup>47</sup> Me kicga mongngo anggenu kopocsic meficgenadeu imoc mesiuukubesena.  
Kicga yohockanggoc kecma hofeu kemebanggac kicga mocgusagoc kecma  
Anutuac eucerereng manau enna ngereeu de.”

<sup>48</sup> ‘Hofeu kamangina mi homeude nga gerecngo mi pisickeude.’

<sup>49</sup> Ngicngac kondung hosoandae, ifi isoc ngicngac sasawa gerecngo  
hosoyunubesonga. <sup>50</sup> Kondung imoc wiac gombunga nga imocngo ine  
kiacma songea kpac anudeu geng songea monggoc naric mi meficgenade.  
Ngeni kondung songea ubaherenginau mekecma ruaefaka angemmebisia.”

## 10

<sup>1</sup> Yesungo bangec imoc wama Yudaia bangecfu Yodang nobocgengau  
kenec. Kensikeu ngicngac habutoango yearu monggoc kemma kpetu-  
ranggegec. Kpeturanggegec ye fakaya modacma edekpou ayemmeec. <sup>2</sup> Nga  
farisaio goa yeni ye tobanggegecdeac negemma kpesimigec, “Ngic mong  
ye enema naric waude, imoc singngo dede me kpac?” <sup>3</sup> ifi degec yofi  
merengyemmeec, “Mosengo imocac dedeseriyoac dafi ngemmeec?” <sup>4</sup> ifi deu  
yeneng degec,

“Mosengo yofi naric annideac deec, ‘Mong ye ngac wabeso dema yeng  
wawakibi mima wau kembeso.’” (Dedeseri 24:1-4)

<sup>5</sup> Ifi degec Yesungo yofi edeyunuec, “Ngeni ngic ubaseri nga herengina  
dzege dzegea, imocac Mosengo dedeseriyoac imoc ohongemmeec. <sup>6</sup> Nga  
hanac hanaheau Anutungo siricngira ngic nga ngac anecdeac, ifi meficyu-  
ruec. (Fingec fingec 1:27;

5:2)

<sup>7</sup> Imocac amma ngicngo nonggomama wayuruma enemaaru kpeketau  
<sup>8</sup> yegoc sebi mocgu anecde. Ifi anecdeac yohockang monggoc mi  
andape, yeri sebi mocgu anecde. (Fingec fingec 2:24)

<sup>9</sup> Anutungo wiac dzegeec, imoc ngicngo naric mi herecgebeso.”

<sup>10</sup> Nga yeni amau monggoc emma medacfora yeneng imocac kpesimigec

<sup>11</sup> Yesungo yofi edeyunuec, “Ngic mongngo enema wama ngac mong meude,  
ye serofaka enema esea ammiude. <sup>12</sup> Nga ngac mongngo ewea wama ngic  
mong meude, ye serofaka ammiude.”

<sup>13</sup> Ngicngac goa yeni Yesungo nambaracfocngina mariango  
kpesereyunuudeac meyunu hagec. Hagec medacfora yeneng ine  
kpetariyemmeec. <sup>14</sup> Ifi anggec Yesungo imoc hemma negenu homac  
manganau yofi edeyunuec, “Nambaracbisic yeni nearu naric hagec, ngeni  
kpac mi heiyemmegec. Kurumenggac eucerereng imoc nambaracbisic

yofia yeneac. <sup>15</sup> Foracngoc, ngic mong ye nambarac kapia yeni isoc mi anudeu ye Anutuac eucererennu naric mi enude, imoc edengunuduae.”  
<sup>16</sup> Ifi dema nambarac tabucyunuma maria witinginau faima kenecyunuec.

<sup>17</sup> Yesungo kembesonga kemmanu ngic mongngo yearu nedzikiemma yeac kicfu fafoc heima kpesimiec, “Kpoukpou gombunga, ni dafi amma kekecseriac maridzoming mebade?” <sup>18</sup> Ifi deu Yesungo yofi edeec, “Ge nocac gombunga denennec? Anutu mocgungo gombunga kecde.

<sup>19</sup> Ge dedeseriyoac bic negennec,

‘Ge ngicngac mi yunuhomesena, kaisero mi ambesena, hamangec mi mebesena, enacfu faifai mi ambesena, ngic yeneac wiac mong mi wangecyunubesena, nonggo manghocga seseheyurubesena.’”  
*(Makekeng 20:12-16; Dedeseri 5:16-20)*

<sup>20</sup> Ifi deu yeng meremma edeec, “Kpoukpou, ge denec, imoc sasawa se-bighorinaungoc angereai.” <sup>21</sup> Ifi deu Yesungo yearu kic fima yeac songo negemma yofi edeec, “Ge wiac mocguac kpedadangenec. Ge kemma finaca sasawa fegende, imoc suena dzo kirecgeu imoc ngicngac makpekpea yemmebesena. Ifi anna kurumenggac dzofinac fingecgenu hama modacnubesena!” <sup>22</sup> Ifi deu ngic ye ubea manganeu negengebirima kenec nocac ye dzofinaha homac femiec.

<sup>23</sup> Kenu Yesungo fikengfiha amma medacfora yofi edeyunuec, “Ngic dzofinactoanginagoc yeneng Anutuac eucerereng manau enggedeac ambibieyombonggegede.” <sup>24</sup> Ifi deu medac yeneng yoac imoc negemma kerectegec anggec monggoc yofi edeyunuec, “Nambaracfocna negenggec, ngic finactoayagocng Anutuac eucerereng manau engeng, imoc uatoayagoc.”  
<sup>25</sup> Kamerengo bungic singau engeng, imoc ua efea nga dzofinactoagoc yeng Anutuac eucererennu engeng, imocngo ine uatoayagoc.” <sup>26</sup> Ifi deu yeni kerectegec yombong amma degec, “Ifi anu merang naric komoc kpeude?”

<sup>27</sup> Ifi degec Yesungo kiwa yenearu fima yofi deec, “Ngicngac yeni imoc ambibiema wagecde nga Anutungo wiac sasawa naric mema wiac monggac mi obohoude.” <sup>28</sup> Ifi deu Petorongo deec, “Negennecc, neni wiacnina sasawa wadacma ge modacguma kecdimbe.”

<sup>29</sup> Ifi deu Yesungo yofi deec, “Ni fora yombong edengunuba, ngic mong ye amabangeha me daramunea me nonggomama me nambaracfora me amauaya, imoc neac nga siduc gombungac amma waude, <sup>30</sup> yeng turunga mi obohoude. Amma ye wiac wadac, imocac turunga naso 100 monggoc meude. Ngicngac yeni naso yomohai ama nga daramuna amma nonggonasia nga nambaracfora amma amaua migeccde, imoc sisic ammima kpekporac ammimagec mekefude. Nga ngade bangec siriha mong haude, imohai Kebungo kekecseri ifingoc miude. <sup>31</sup> Anu ngic warac warac kecdac, yenearunac homacngo ngadea anggeccde nga ngadea kecdac, yenearunac homacngo warac warac anggeccde.”

<sup>32</sup> Anu yeni sing modacma Yerusarennu kengkecmagec Yesungo waraiu medacfora yeni ye modacma negenggec wiac kuneng anec nga goa ye modacgec, yeneng kengec anggec. Nga Yesungo medacfora 12 ngadeau meyunuma wiac fingecmiude, imocac yoac edeyunuec. <sup>33</sup> “Negenggec, nenang Yerusarennu endimbe. Enni ngic yeneng Ngicac Medac womong gareng enara nga mitiac negen negengngic yeneac mariu faigec, yeneng ye homeudeac desigecde. Desima ye bangec monnunac ngic Anutu mi

negemmidae, yeneac mariu faigecde. <sup>34</sup> Faigec, yeneng faifagoc ammima sofohoma dzikacngo kpema kpehomegecde. Nga uameme harebec ammanu ye monggoc gborima yarude.”

<sup>35</sup> Anu Dzebedaioac medahora, Yakobo nga Yohane, yereng Yesuaru kemma deoc, “Kpoukpou, neri wiac monggac deregede anecmenadeac negendipe?” <sup>36</sup> Ifi deec kpesiyemerec, “Ni noc wiac anegcmebadeac negendape?” <sup>37</sup> Kpesiyemeru deoc, “Kecma kibikperagigau nerearunac mongngo foigau nga mongngo kanagau tacedede, imoc deserinemecna.”

<sup>38</sup> Ifi deec Yesungo yofi edeyuruec, “Ngeri wiac kpesidape, imocac hania mi negenghomedape. Neng kpendzenggac kpakenecfu nebade, ngeri imoc ifingoc neecdeac dedape nga doku nadzichade, ngeri imohai nadzirecde me?” <sup>39</sup> Ifi deu yereng deoc, “Oc, naric andede.” ifi deec Yesungo yofi edeyuruec, “Ni kpakenecfu nebade, imoc ngeri ifingoc neecde nga doku nadzichade, imoc ngeri ifingoc nadzirecde. <sup>40</sup> Nga merang foinau me kananau tarude, imocac fora ine neng naric mi desibade. Tatac imoc ngic damoc yeneac mengec mengerea fede, yeneng ihai tacgecde.”

<sup>41</sup> Anu medacfora 10 yeneng imoc negemma Yohane nga Yakobo yereac negenggec manganeec. <sup>42</sup> Manganeu Yesungo kpacyunuu kenggec yofi edeyunuec, “Bangec monnunac ngicngac enarafocngina deyecdeyem-mea, yeni ngicngac yeneac ngickuneng siricfu yenicoc kecandaeac kuc feyemme. Nga kunengfocngina yeni kuc feyemuec ngicngacfocngina yeneng yoacngina modagecde, ngeni imocnoc negendae. <sup>43</sup> Nga ngenearu faka ifia ine mi fingecheso, kpac. Ngenearunac ngic mongngo engena kecbeso ammidde, yeng ine botucnginau kingang kpekpengina kecbeso. <sup>44</sup> Amma ngeneac botucfunac mongngo warac warac ammidde, yeng tosofora sasawa, yeneac wanacngic kecbeso. <sup>45</sup> Imoc yofiac, ngicngac yeneng Ngicac Medac kingang kpemigeccdeac mi maec, kpac. Yeng ine yeneac kingang kpema ngicngac homac yungecyunuma kekeha wau yeneac doudeac maec.”

<sup>46</sup> Yesu nga medacfora yeni Yeriko taonnu kensikegec. Ihai kecma ngicngac habutoa yenhafoc Yeriko monggoc wagec. Wamagec ngic kicipisic mong kpara Batimaio, imocac titiha Timaioac medac, yeng sing tegiau tacma iwaiac dereggekefec. <sup>47</sup> Dereggekefcu Yesu Nadzaretu taonunac, yeng hama kende, yeni yoac ifi degec ye imoc negemma kucgoc kpacma deec, “Yesu, Dawidiac bangec, ge neacnec ubaga manganeu.” <sup>48</sup> Ye serima ifi kparu ngicngac homacngo waicke tarudeac edegec. Edegec yeng ine seria monggoc kparec, “Dawidiac bangec, ge neacnec ubaga manganeu.”

<sup>49</sup> Kparu Yesungo namma yofi deec, “Ngeni kpacgec ye nearu hau.” deu ngic yeneng ngic kicipisic kpacma degec, “Ye kpacgude, ge ubaga ngereeu yacma kenna.” <sup>50</sup> Ifi degec ngic ye ngakpihereha ukuma futucke yacma Yesuaru kenec. <sup>51</sup> Kenu Yesungo kpesimiec, “Ni noc wiac anggembadeac negennec?” deu ngic kickundungngo deec, “Kpoukpou, kicfifi ambadeac negenduae.” <sup>52</sup> Ifi deu Yesungo yofi edeac, “Negen negensinggango mengeregudac imocac naric kenna!” Ifi deu ye imohaingoc kicfifi amma Yesu sinnu modacma kenec.

## 11

<sup>1</sup> Anu yeni kengkecma Yerusareng taong mewegenebeso amma Oriwa tikiu Betefage nga Betani amabangec tarocfu kensikegec. Kensikemagec Yesungo medacfora yenearunac ngic yohockang sueyuruma yofi deec,



<sup>2</sup>“Ngeri dindingac kemma guruama sing enarau tacde, imohai emma donggi medaha mong ngicngo witiau mi tatara, imoc witickegec nande, ngeri imoc meficgema witic yungecma mema haec. <sup>3</sup>Yungerec ngic mongngo kpesingemecma deude, ‘Ngeri dafi anecdeac andape?’ ifi deu yofi edebesera, ‘Kebungo imocgoc ua meudeac dede.’ ifi deec minginango donggi bic faiu haude.”

<sup>4</sup>Ifi deu yeri kemma donggi medaha sinnu ama naguyau witic witickea nanec, imoc hemma yungeroc. <sup>5</sup>Yungerec ngic goa ihai nanggec, yeneng yeremma degec, “Ngeri dafi negemma donggi medaha yungecedape?” <sup>6</sup>Ifi degec yeri Yesungo yoac edeyuruec, imoc edeyunuec yeni negemma wayuruec kenoc. <sup>7</sup>Kemma donggi Yesuaru mekemma ngakpingira herea hesima donggi medaha witiau tiameec Yesungo imocac witiau tarec. <sup>8</sup>Taru ngicngac homacngo ngakpingina herea hesima sinnu tiamegec goango ua tegiaunac ic fawa herecgema sinnu faikenggec.

<sup>9</sup>Nga ngicngac kiwau kenggec nga ngadeau modacgec, yeneng kpacma yofi degec,

“Ohec, ngic Kebuac kpacfu hade, ye kenehagoc, hosanna. (*Mitiyegec 118:26*)

<sup>10</sup>Mannina Dawidiac eucrereng hade, imoc kenehagoc. Wi kurumennu kpara dengeregec, ohec waec, hosanna.”

<sup>11</sup>Yesungo ifi Yerusarennu emma Anutuac womonnu enec. Emma heneng andacma ama marai anecac medacfora 12 meyunuu Betania amau kenggec.

<sup>12</sup>Wereckengau yeni Betania wama mama Yesungo hereaac homeec. <sup>13</sup>Homema hereau fima fig ic mong maria tengging tengging henec. Hemma negenu foragoc isoc anu ic haniau kensikema maria meficgeec. Fig nasoya mi anecac ifi anec. <sup>14</sup>Nga ye fora hofocma ic yofi edeec, “Gearunac ngic mongngo fora monggoc mi nebeso.” ifi deu medacfora yeneng yoac imoc negenggec.

<sup>15</sup>Yesungo Yerusarennu kensikema Anutuac womonggac oda manau enec. Emma ngic wiac emekpesi anggec, yeni imohacnac kporacyunuec. Ye ngic hiedzo emekpesi anggec, yeneac tebo heimerenec nga kebesac emegec, yeneac tatic heimeremma <sup>16</sup>Anutuac womong manau wiac ifia meenggecdeac kpetariyemmeec. <sup>17</sup>Kpetariyemmemma yofi edekpou ayem-mec, “Yoac yofi oho ohoya fede,

‘Amana imoc bangeha bangeha ngicngac sasawa yeneac nunumuama, kpara ifi kpachesonga.’ (*Yesaia 56:7*)

Nga ngeneng merenggec imoc ine hamangecngic yeneac sufu sufuama ande.” (*Yeremaia 7:11*)

<sup>18</sup>Ifi deu womong gareng enara nga mitiac negen negengngic yeneng imoc negemma ye kpegecdeac sing hofocgec. Nga habu sasawango yeac kpoukpouyaac negenggec engena anec nga yeni ine yeac kengecyunuec.

<sup>19</sup>Nga ama marai anu Yesu nga medacfora yeni taong wama kenggec.

<sup>20</sup>Wereckengau yeni sinnu kemma henggec fig ic imoc godeaunacngoc sokuema nanec. <sup>21</sup>Nanu Petorongo imoc hemma negensima Yesu edeec, “Kpoukpou ge henna, ge fig ic soweckedang, imoc bic ururuema nande.” <sup>22</sup>ifi deu Yesungo yofi merennec, “Ngeni Anutu negensinggebisia.

<sup>23</sup>Foracngoc, ngic mong ye ubeau negengyohoha kpac kecma wiac mong me mong dema imocac fora fingerudeac negensiudeu yeng tiki edimoc yacma kondunnu kemeu deu imoc foranoc fingerude, imoc edengunuduae.

<sup>24</sup>Ni imocac amma yofi edengunuduae, ngeni wiac imocac me imocac

negensima menide, ifi negemma negensinggema numugec wiac imoc finגעגעמעude.

<sup>25</sup> Anu ngeni namma numuandae, imohai ngic monggac wiac me monggac ngaba mekecdau kopocsiha wabisia. Ifi anggec kurumeng Mangnginango ngeneac kopocsi ifingoc waude. <sup>26</sup> Nga ngeni ngic yeneac kopocsi mi wagecdeu ine Kurumeng Mangnginango ngeneac kopocsi ifingoc mi waude.”

<sup>27</sup> Yesu medacforagoc yeni Yerusarennu dzigene enggec. Emma Yesungo Anutuac womong manau yerecgemanu womong gareng enara nga mitiac negen negengngic amma enarafocngina, yeneng yearu hama kpesimigec, <sup>28</sup> “Ge noc kucfu ua yomoc menec nga merang ua imoc menadeac uayoac genec?” <sup>29</sup> Ifi degec Yesungo yofi merengyemmeec, “Ni yoac mong kpesingemba turunga edenugecguc ni ifingoc uakibinaac hania imoc edengunubade.

<sup>30</sup> Yohanengo dokunadzic ua mekefec, ua imoc kurumennunac me ngicfunac, ngeni imoc edenugec negemba.” <sup>31</sup> Ifi deu yeni yenaocngoc denegeng amma degec, “‘Imoc kurumennunac.’ ifi denideu yeng yofi kpesinemeude, ‘Ifi negemmaguc ngeni nocac ye mi negensinggegec?’ ” <sup>32</sup> Nga ngicfunac, imoc debesonga ngic yeneac amma kengecyunuec. Nocac ngic yeni sasawango Yohane ye profete fora, ifi negenggec. <sup>33</sup> Imocac yeni Yesu meremmigec, “Imoc mi negendimbe.” degec Yesungo yofi merengyemmeec, “Ifi degec, ni ifingoc noc uayoacac kucfu ua mekecduae, imoc mi edenunubade.”

## 12

<sup>1</sup> Yesungo monggoc yoac heima yofi edeyunuec, “Ngc mongngo waing ua gboria mong homecma oda dzegeec. Dzegema waing tidzac tidzameac teng usuma gareng yeneac kicfifiac amaherec meec. Meu wisickeu waing ua garenggegecdeac ngic meficyunuma yenigoc yoac dedzege anggec nga yengenaoc ine bangec hereau kenec. <sup>2</sup> Kemma kecmanu fora kpememe naso hau wanacngiha mong sueu waingngic yeneacrunac waing uaac fora noboha yeac anec, imoc meudeac kenec. <sup>3</sup> Kensikemanu waingngic yeni wanacngic mema dzoboya kpema entegeng suegec kenec. <sup>4</sup> Kenu minginango wanacngic mong yenearu sueu kenu yeneng ye kpefuhama desofoc ammigec.

<sup>5</sup> Ifi ammigec ua minginango serima wanacngic monggoc mong sueu yenearu kenu ye kpehomegec. Kpehomegec ua minginango wanacngic homac sueyunuu kenggec ua ngic yeneng medac goa dzoboyunugec nga goa ine yunhomegec. <sup>6</sup> Wisic wisickeau ua minginango songomedacyombonga mocgu kefec, ye yofi negemma sueec, ‘Yeni sifu medacyombonna eweheimigecde.’ <sup>7</sup> Ifi negemma sueu ua ngic yeneng ine medacyombonga hemma denegeng amma edeemegec, ‘Yeng kecma ua yomoc tiu enude, imocac ngeni hagec kpeni bangeha nga maridzominga imoc nenang ambeso.’ <sup>8</sup> Yeni ifi dema ua minginaac medacyombonga mema kpehomema farenga waing ua ngadeau ukugec kemema feec. <sup>9</sup> Anu ua minginango dafi anude? Ye hama waing ua ngic yunuhomema waing uaya imoc ua ngic areng mong yemmeude.

<sup>10</sup> Mitikibiu yoac yofi oho ohoya fede, ‘Amameme ngic yeneng hoc mong mangana dema ukugec. Nga hoc imocngo amaac hoc wotung amma seria nanude. <sup>11</sup> Nga faka imoc Kebu

yengenaoc meu ngicngo hensongo ammidimbe.' Ngeni yoac imoc osonegeng angandae." *(Mitiyegec 118:22-23)*

12 Nga Yesungo enara yeneac negemma yoac imoc heima deec, yeni imoc bic negenggec. Nga yeneng ye mendanggegecdeac sing ine hofocgec. Nocac yeni ngicngac yeneac kengecyunuu wama kenggec.

13 Ngicenara yeneng Yesu tobangegec yoacdedeau makpeu yoacfu faigecdeac negemma yofi anggec. Yeni farisaio nga Herodeac arenunac ngic goa yearu sueyunugec<sup>14</sup> yeneng Yesuaru hama degec, "Kpoukpou, yoac fora dema ngic engena me mamea yeneac mi negensiannec. Ge ngicngac areng socfungoc ayemmekecne, imoc negendimbe. Nga ge Anutuac sing dindigac edekpou anemmekecne. Ifi anu ngictau Sisa takesi mibesonga me mi mibesonga, singngo dafi dede? Nenang ngictau Sisa takesi naric minide me kpac?"

15 Ifi degec Yesungo ikocfakangina negentegecma yofi edeyunuec, "Ngeni nocac faitobannu fainudae? Ngeni dzo mong mefigema edzacnugec hembra." 16 Ifi deu yeni dzo mong migec yeng imoc hemma yofi kpesiyem-meec, "Onga nga kibi yoc, imoc meracac?" kpesiyemuec degec, "Imoc Sisaac." 17 Ifi degec Yesungo yofi edeyunuec, "Imocac ngeni Sisaac wiac, imoc Sisa mibisia nga Anutuac wiac, imoc Anutu mibisia!" Ifi edeyunuu negemma kpidohogec.

18 Sadukaio areng yeni homecfunac yacyac mi fede, ifi dekecdae. Nga yenearunac ngic goa Yesuaru hama kpesimigec, 19 "Kpoukpou, Mosengo dedeseriyoac yofi ohonemmeec, 'Ngic mong ye ngac mema gboriha mong mi kpeficge kecma homeudeu ngac ye kefu muneango daraac hodzec mema gboric kpeficgema daraac kpac miacbeso.' *(Dedeseri 25:5-10)*

20 Naso monnu daramuna seweng yeni kecgec. Nga waracdacnginango ngac mong mema gboriha kpac kecma homeec. 21 Homeu muneango ngac imoc mema ye ifingoc gboriha kpac kecma homeec. Homeu munea mongngo faka imocngoc anec. 22 Nga daramuna seweng yeni ngac imocngoc mema gboricfocngina kpac kecma homedacgec. Homedacgec hodzecngina kecma ngade homeec. 23 Homeu ngic seweng yeneng ngac imocngoc mege-cac kecma yacyac nasou homecfunac yacgecde, imohai ngac imoc meracac enema anude?"

24 Ifi degec Yesungo meremma yofi edeyunuec, "Ngeni mitikibi nga Anutuac kuc, imoc mi negentegecdae, imocac amma yoac desufudae.

25 Kecma homegec yeneng homecfunac yacgecde, imohai ngicngac yeni mi meemegecde. Nga manggac mongngo 'Ni naroanna ngic mibade.' imoc naric mi deude. Yeni imohai kurumenggac angero, yeni isoc anggecde.

26 Nga homecfunac yacyac deba, ngeni yoac yomoc Moseac kibi imoc osoandae, Mosengo icfu gerechorang fingeru hemma ihai kenu Anutungo yofi edeac,

'Ni Abrahang nga Isaka amma Yakobo, yeneac Anutu.' *(Makekeng 3:6)*

27 Nga ye ngic homemea yeneac Anutu kpac. Ye ngic gbori kecdae, yeneac Anutu. Ngeni sing homac yombong segema kecdae."

28 Anu Yesugoc demereng anggec, yeng turunga gombunga merengyem-meu mitiac negen negengngic yenearunac mongngo imoc hemma Yesuaru hama kpesimiec, "Dedeseriyoac damocngo engena yombong ande?" 29 Ifi kpesimiu Yesungo yofi deec, "Dedeseriyoac engenangina yofi fede,

'Israengic ngeni negenggec, Kebu Anutunina ye mocgu nga <sup>30</sup> ge ubaherega nga ongaga amma negen negengga nga kucga sasawa, imoc hafoangoc Kebu Anutugaac heresongo negemma kecbesena.' (Dedeseri 6:4-5)

<sup>31</sup> Nga mong yofi, 'Ge geangga anggengande, siriha imocngoc ngicngac gegoc wegena kecdae, yeni heresongogoc hoangyunubesena.' (Sesememe 19:18)

Dedeseriyoac imoc yereac engena mong mi fede."

<sup>32</sup> Ifi deu mitiac negen negengngicngo meremmiec, "Gombunga kpoukpou, ge fora yombong denec. Anutu ye mocgu, mongngo ye isoc mi kecdae.\* <sup>33</sup> Nga ubaherega hafoangoc nga negen negengga hafoangoc amma kucga hafoangoc yeac songo heregoc negemma kecbesena amma geangga anggengande, siriha imocngoc ngicngac gegoc wegena kecdae, yeni heresongogoc hoangyunubesena, wiac imocngonoc Anutuac hosuc heihei amma sese hania hania ferahade."

<sup>34</sup> Ngic ye gombunga yombong merenu Yesungo negemma yofi edeec, "Ge Anutuac eucererengac hereau mi kecne." Ifi deu yeni Yesu monggoc kpesimigecdeac kengecyunuu wagec.

<sup>35</sup> Yesungo Anutuac womonnu edekpou ayemmema yofi kpesiyemmeec, "Mitiac negen negengngic yeneng Messia ye Dawidiac kiscifunac nocac deandae?" <sup>36</sup> Dawidi ye Asungo meefaiu yengenaoc yofi deec,

"KEBUNGO neac Kebu edeec, 'Ge foinaugeng tacmana ngabafocga yeni hanigaac bageu faiyunubade.' (Mitiyegec 110:1)

<sup>37</sup> Dawidi yengenaoc 'Neac Kebu', kparec. Nga Messia ye dafiu Dawidiac bangeha ande?" Ifi deu ngicngac habutoa yeneng negendzidziegac.

<sup>38</sup> Ifi anggec Yesungo edekpou ayemmema yoac yofi torokpema edeyunuec, "Ngeni mitiac negen negengngic yeneac henghomema kecbisia. Yeni songonginaac amma ngakpi herea heima kegec ngicngac yeneng wenacngerec deyemmegecdeac emeneclu kenghaandae. <sup>39</sup> Amma kpekpeturang amau nga yakatoa nasou warac warac tatacfu tacbesonga songongina angkecde. <sup>40</sup> Amma yeni ine ngachodzec yeneac ama wangecyunuandae. Amma negen ngereengunugecdeac nunumu herea here numuandae. Yeni ikocfaka ifia angandaeac turunga ebiriangoc megecde."

<sup>41</sup> Anu Yesungo womonggac sesekatapa nobohau tacma henu ngicngac homacngo dzo imohai faigec kemeu ngic finactoagoc homacngo hama dzo ebiriangoc faigec kemeec. <sup>42</sup> Anu ngac hodzec mongngo ifingoc hama peni sacsac yohockang faiu kemeec, imoc toea mong kapiancecsac. <sup>43</sup> Faiu Yesungo medacfora deu hagec yofi edeyunuec, "Foracngoc, ngac hodzec hiedzoya kpac yombong dzo faidacmoc, yeng ngicngac sasawa sese faidau, yeni feracyunude, imoc edengunuduae. <sup>44</sup> Ngicngac tosea sasawa, yeneng finactoangina wakema made, imohacnac sesengina faidau. Nga ngac ye ine wiac femidac, imocnoc hafoangoc faidacma entegeng kecdae."

## 13

<sup>1</sup> Anu Yesungo Anutuac womonnunac mama kemmanu medacfora yenearunac mongngo edeec, "Kpoukpou, hoc gombunga gombunga nga ama kuneng kuneng tackende, imoc henna." <sup>2</sup> Ifi deu Yesungo yofi edeec, "Ama kuneng kuneng tackenu hennec, imoc kecma naso mong haude, imohai

\* 12:32: Yesaia 45:21

wasaingic yeneng imoc sasawa hembarackegecede. Hembarackegec hoc mongngo monggac witiau wagec mi tarude.”

<sup>3</sup> Yesungo Oriwa tikiu Anutuac womong kiwa dindingacfu tacmanu Petoro nga Yakobo amma Yohane nga Anderea, yeneng yegoc tembuclu kecma kpesimigec, <sup>4</sup> “Ge yoac dedang, imoc noc nasoac fingerude nga naso imohai noc noi fingermanu yoac sasawa imoc seriude?”

<sup>5</sup> Ifi degec Yesungo yofi edeyunuec, “Ngic mongngo ikocfu wangecn-gunubacac ngeni henghomema kecbisia. <sup>6</sup> Ngic homac yeneng hama neac kpac kpacma degecede, ‘Ni Messia.’ ifi dema ngicngac homac uba mesufu ayemmegecede.

<sup>7</sup> Dzikactoaac siduc bangec wegenaunac nga bangec hereaunac hau ngeni imoc negemma mi kpidohobisia. Foracngoc, faka ifia fingecebeso. Nga naso wisic wisickea ine imohai bic mi haude. <sup>8</sup> BANGECARENG goa yeneng bangecareng ogofocnginagoc dzikac kpema kecegecede. Nga ngictau monggac arengngo ngictau monggac areng yenigoc ngaba angemegecede. Bangec monnu nga monnu usoc meude amma bodinaso fingeckenude. Nga faka yomoc, imoc wiac gboria fingecebeso andeac ngac gadze kiude ifi isoc ande. <sup>9</sup> Imocac ngeni ngenacngoc garengemema kecbisia. Ngic yeni yoacfu faingunugecede amma kpekpeturang amau dzikacngo ngunugecede. Amma yeni neac amma ngictau nga gawana yenearu yoacfu faingunugec ngeneng ihai namma ni deperaginubisia.

<sup>10</sup> Ngeni bangeha bangeha ngicngac siduc gombung edekpou ayemmegec negendaceguc <sup>11</sup> ngic mengunuma ngic goa yeneac mariu faingunugecede, ngeni naso imohai, ‘Dafi denide?’ dema ni negengebiribisia. Tiri Asungo naso imohai yoac enacnginau faiude, ngeni imoc debisia. Ngeni yoac imohai degecede, imoc Tiri Asuarunac ambeso. <sup>12</sup> Anu dac mongngo munea enara yeneac mariu faiu yeneng homeclu faigecde nga manggac mongngo medahaac imocngoc anude. Nga nambarac yeneng nonggo mangfocngina deendema ayemmema homeclu faiyunugecede. <sup>13</sup> Nga ngicngac sasawa yeneng neac kpacnaac amma ngeni ubango ukungunugecede. Nga ngic mong ye seserigoc kecmanu nasotoa haude, yeng komoc kpeude.

<sup>14</sup> Anu ngic mong ye yoac yomoc osoude, yeng imoc negengecebeso. Wiac mangac manganea wiac sasawa kpetotieude, imocngo ama kpaegocfu emma nanu henggecede,\* faka imoc fingeru ngicngac Yudaia bangeclu kecdae, ngeni worama tikiu embisia. <sup>15</sup> Nga mong ye ama witiau tacde, ye kemema ama manau emma wiac mong mi mebeso. <sup>16</sup> Nga mong ye semeng uau nande, ye ngakpi hereha meudeac mi dzigenebeso. <sup>17</sup> Amma ngac heregoc kecdae nga nenggac sabac namuu meyunukecdae, yeni naso imohai ebictoanginagoc anggecede.

<sup>18-19</sup> Naso imohai kpendzeng kuneng siraha mong yombong figerude. Anutungo hanac hanaheaunac bangec sasawa meficgeecfunacngoc erema yaguc kecdimbe, naso imocac manau kpendzeng ifia mong mi fingerec amma ngade naric mi fingecebesande. Imocac amma ngeni wiac imoc nomannasou mi fingerudeac numubisia. <sup>20</sup> Kebungo naso imoc mi mewegenbac dede ngic mongngo komoc naric mi kpebac. Ngic meis- ingyunuyunuya, yeneac amma naso imoc bic herec herecgea fede.

<sup>21</sup> Naso imohai yoac yofi fingerude, ‘Henggec, Messia yei fingecede.’ me, ‘Ye edi fingecede.’ Ngicngac ifi degecede ngeni mi negensingyunubisia.

\* **13:14:** Imoc ama kpetiac. (Danie 9:27; 11:31; 12:11-13)

<sup>22</sup> Imoc yofiac, ngicngac fingeema ikoc amma degecede, 'Ni Messia.' yeni nga profete ikoha yeneng fingeema ngicngac uba mesufu ayemmegecedeac ngicngac tobangyunuma faka kuhagoc nga morora megecede. Amma yeni sing meficgegecede ngicngac meisingyunuyunuya ifingoc ikocfu wange-yunugecede. <sup>23</sup> Faka sasawa imoc mi fingeemanu imoc bic edengunuduae. Ngeni imocac negemma henghomebisia.

<sup>24</sup> Anu kpendzeng imoc wisickemanu imohai 'wenackiwa kundung kpeu afokperagia mi fingerude. <sup>25</sup> Nga asomeng yeni kurumennunac fotockema magec kurumenga kurumenga yeneac kuc sasawa kpemindzahegecede.' (Yesaia 13:10; 34:4)

<sup>26</sup> Naso imohai ngeni Ngicac Medac henggec yeng kuctoaya nga kibikper-agitoayagocngo hoennu haude.† <sup>27</sup> Hama angerofora sueyunuu bangec nga kurumeng tegia noboc noboc wisickede, imohai kenggec yengenaoc ngicngac meisingyunuec, yeni kpedzucyunugecede.

<sup>28</sup> Fig icngo hania edekpou angemmeu ngeni imoc negenghomebisia. Fawaya doku doku amma besaiu ngic ngeni yofi negengandae, wenac naso ande. <sup>29</sup> Nga ngeni wiac dedua, imoc fingeru hemma ifingoc yofi negem-bisia, Ngicac Medac nasoya bic wegenema hama nagu ngadeau nandenoc. <sup>30</sup> Foracngoc, areng yomoc ngeni mi homemagec wiac yomoc fingeedarude, imoc edengunuduae. <sup>31</sup> Foracngoc, bangec nga kurumeng yeri kecma kpac aneade nga neac yoac ine mi kpac anude.

<sup>32</sup> Nga faka imoc noc uamemeu amma aua nofu fingerude, imoc mongngo naric mi negenude. Kurumenggac angero yeni imoc mi negenggecede nga Medacngo ifingoc mi negenude. Manggacngosac naso imoc negende. <sup>33</sup> Ngeni garengngina mema ubagbori kecbisia. Nocac ngeni naso mi negen-dae.

<sup>34</sup> Imohai faka yofi isoc fingerude, ngic mongngo amea wama bangec monnu kenudeac negenec. Ifi amma ye amagareng wanacngicfora amaac wiac uanginaacsoc garenggegecedeac uayoac deyemmema nagugareng nagu kicfifi nanudeac edeac. <sup>35</sup> Imocac ngeni ubagbori kecbisia. Ming-inango ama toforemanu me tofocnac dzongiau me ama werec wereck-enggac me asoac nasou dzigeneude, ngeni imoc mi negendae. <sup>36-37</sup> Ngeni gaufemagec hama ngenembacac yoac yomoc ngeni nga ngicngac goa sa-sawa edengunuduae. Ngeni imoc negemma ubagbori kecbisia."

## 14

<sup>1</sup> Makekenggac naso nga ic sogong yisya kpac nene, imocac hombang-gac uameme yohockang feec. Femanu womong gareng enara nga mitiac negen negengngic yeni Yesu nofusing kic mesufu ammima mema kpegec homeudeac sing hofocma <sup>2</sup> yofi degec, "Ngicngac yenearu dzikac sicsauc fingebacac amma ye hombang nasou mi mebesonga."

<sup>3</sup> Anu Yesungo Betania amau ngic mong kpara Simong kubecserigoc, yeac amau yaka netarec. Netacmanu ngac mongngo alabastros kirung\* mong kerecdoku homung kerengagoc metarec, imoc mehaec. Doku imoc narda foranac memea amma buma engena yombong. Ngacngo imocnoc nehama kirung ubea kpetackema Yesuac oruhau kpakema nadzicmiac.

<sup>4</sup> Nadzicmiu ngic goa ihai tacgec, yeneng imoc hemma dehesi amma degec, "Ye nocac wiac buma engena ifi kpedzonggede"

† 13:26: Danie 7:13 \* 14:3: Alabastros kirung imoc hocngo memea nga ubahereagoc amma tapea kpac.

<sup>5</sup> Doku homuna gombunga ifiango kifa mocguac uabung<sup>†</sup> ferahema kirecgeu yeni imoc ngicngac makpekpea yemmegec ngereebac.” Ifi dema ngac yoac gereagoc ammigec.

<sup>6</sup> Ifi ammigec Yesungo yoacngina negemma yofi edeyunuec, “Ngeni nocac ngacac ifi degec ubaebic meficegeude? Ngeni faka imoc wagec. Ye faka gombunga yombong anende.” <sup>7</sup> Ngic makpekpea yeni nasosoc ngenigoc kecgec ngeni meficyunubeso angemmeu naric meficyunukecgecde. Nga neng ine ngenigoc nasosoc mi kecbade.

<sup>8</sup> Ngac yomocngo sebina doku homunagocngo nadzicmiu ngeni farena tonggogecde, imocacnoc yeng hanahema meefainude. Meefainuma yeac uaareng fede, imoc bic mesiuude. <sup>9</sup> Foracngoc, ngicngac yeng siduc gombung bangectoa bangec, imohai kemma ngicngac edekpou ayemmegecde, imohai ngac yomocngo faka anec, imoc ifingoc degec negenggec feude, imoc edengunuduae.”

<sup>10</sup> Anu medacfora 12 yeneanunac mong kpara Yuda Karioto amaunac, yeng Yesu meyemmeudeac dema womong gareng enara yenearu kecec. <sup>11</sup> Kenu yeni ubangerec negemma dzo migecdeac degec. Ifi degec Yudango naso gombung damohai Yesu doc mema yereac mariu faiude, imocac kicfifi kefec.

<sup>12</sup> Ic sogong yis kpac, hombang imocac hanac hanaheau makekengcac ramamedaha kpeherecge angandae, naso imohai Yesuac medacfora yengeng Yesu kpesimigec, “Neni dahai kemma makekengcac ramamedaha nenideac memengere annideac negennec?” <sup>13</sup> Ifi kpesimigec yeng medac yohockang yofi dema sueyuruec, “Ngeri taonnu emma ngic mong dokuenanga tofohoma hau yegoc ewacma ye modacbesera. <sup>14</sup> Modarec kemma amau enude, ama imohai ama mingina yofi edebesera, ‘Kpoukpoungoc yofi kpesigende, ‘Ama mana damohai mngerennena ni medacfoacngoc makekengcac ramamedaha nenide?’” <sup>15</sup> Ifi deec yeng ama witiau amamana mong kuneng ihai wiac bic mengec mengerea tacdacde, imoc edzacnguruu ngeri imohai iwainina mengerebesera.” <sup>16</sup> Ifi deu medac yeri ama wama taonnu enoc. Emma Yesungo edeyuruec, imocac sirihau wiac meficgedacma makekengcac ramamedaha ohomengere anoc.

<sup>17</sup> Anu ama toforemanu Yesu nga medacfora 12 yenigoc kensikegec. <sup>18</sup> Kensikema yaka netacma Yesungo yofi deec, “Foracngoc, ngeneanunac mongngo ni ngaba yeneac mariu fainuude, yennoc nigoc yaka nede, imoc edengunuduae.” <sup>19</sup> Ifi deu medac yeni negengebirima tembut tembut kpesimigec, “Ge imoc neac denec me?” <sup>20</sup> Ifi degec, yeng yofi merengyem-meece, “Imoc medac 12 ngeneanunac mong anu yeng nigoc ic sogong terau nemuruckede.

<sup>21</sup> Ngicac Medac ye wangunuma kenude, imoc neac negemma oho ohoya bic fede. Nga ngic ye Ngicac Medac doc meude, ye ine sowehagoc. Ye nonggeaac here manaunac mi fingeccacfa efaibac.”

<sup>22</sup> Anu netacmagec Yesungo ic sogong mong mema Anutu ubangerec edema ic sogong imoc mendzicma medacfora yemmema yofi deec, “Ngeni yomoc megec, imoc fusina.” <sup>23</sup> Ifi dema kpakenec mong mema Anutuac ubangerec dema sasawa yemmeu negec. <sup>24</sup> Negec yofi edeyunuec, “Yomoc neac sac, imocngo dzadzahac amma imoc ngicngac homac yeneac amma kpetic kpetinggea. <sup>25</sup> Foracngoc, ni waing gbomeaac dokuya monggoc mi nene kecbarengoc Anutuac eucrereng manau waing gboria nebade, imoc

<sup>†</sup> 14:5: Ye 300 denari deec.



edengunuduae.”<sup>26</sup> Anu yeni Anutuac yegec heigec,<sup>‡</sup> Heima taong wama Oriwa tikiu enggec.

<sup>27</sup> Emma Yesungo yofi edeyunuec, “Ngeni sasawango neac negemman-gang amma wanugecde, imoc yofi bic oho ohoya fede. ‘Ni ramagareng kpeba yeni sasawango sinsararang kpegecde.’ (Dzekaraia 13:7)

<sup>28</sup> Anu neng ine gborima yacma waraingemmema Gariraia bangecfu kem-bade.”<sup>29</sup> Ifi deu Petorongo deec, “Ngicngac sasawango negemman-gang amma wagugecdeu neng ine imoc naric mi ambade.”<sup>30</sup> Ifi deu Yesungo yofi edeac, “Foracngoc, yaguc tofocnac kokorecngo arohau atac yohockang mi ammanu geng neac wisickpena harebec bic anude, imoc edeguduae.”<sup>31</sup> Ifi deu Petorongo serimangoc deec, “Ni gegoc homebade isoc sebi ine naric mi heibade.” Ifi deu ogofora yeni sasawango imocngoc degec.

<sup>32</sup> Yesu nga medacfora yeni ua bangec mong kpara Gedzemane, imohai kenggec. Kensikema yeng medacfora yofi edeyunuec, “Ngeni yei tacmagec ni numubade.”<sup>33</sup> Ifi dema Petoro nga Yohane amma Yakobo meyunuu kenggec. Kemma negen negenga fonggou negengebirima<sup>34</sup> yofi edeyunuec, “Ubaonganango ebiriyombonggeu homebeso anende, imocac ngeni yei garengngina meemema tacgec.”<sup>35</sup> ifi dema kpesima kemma bangecfu makpefema yofi numuec, “Imoc naric anu naso imocngo feracnubeso.” ifi<sup>36</sup> numuma yofi deec, “O Manggac manna, gearu wiac sasawa imoc efea. Ge kpakene yomoc wangecnuna. Anu neac songo ine mi seribeso, kpac. Geac songo nga negen negeng imoc seribeso.”

<sup>37</sup> Ifi numuu wisickeu dzigenema medacfora yenearu hama yenenu yeni gau fegec Petoro yofi edeac, “Simong, ge gau fenec, ge naric aua mocguac manau gaugbori kecbang me?”<sup>38</sup> Nga faitobannu embauac ngeni ubagbori kecma numugec. Ongaasungo efaide nga sebingo ine ebiride.”

<sup>39</sup> Ye ifi dema monggoc kemma nunumu imocngoc numuec.<sup>40</sup> Numuma hama yenenu yeni monggoc gau fegec. Nocac yeni kicngina ebiriec. Nga ye yoac deu yeni meremngicedeac obohogec.<sup>41</sup> Nga ye atac harebecfu dzigene hama yenemma yofi deec, “Ngeni gau femangoc kecdac, imoc naric mi ande. Yaguc ine wisickede nga naso bic hadac. Negengec, ngic yeni Ngicac Medac kererema kopocsicmeme yeneac mariu faigecde.<sup>42</sup> Benukererec ngicngo hadeac amma ngeni yacgec kenni!”

<sup>43</sup> Anu Yesu ye ifi demanungoc medac 12 yeneanunac mong Yuda, yeng hau habu kunengngo wasaibeang nga gbarucnginagoc ye modacgec. Anu yeni womong gareng enara nga mitiac negen negengngic amma yudan-gic enarafocngina sueyunuec, yeneanunac hagec.<sup>44</sup> Hagec benukererec ngicngo yofi derecgeyemmeec, “Ni ngic muduckebade, ngeni yenoc mendang-gema garenggeyombonggema mekembisia.”

<sup>45</sup> Anu Yuda ye hama Yesuaru bic kemma, “Kpoukpou.” dema muduckeac.<sup>46</sup> Muducke yeni Yesu maria noboc noboc mema mendanggegec.

<sup>47</sup> Mendanggegec medac yeneanunac mongngo ine wasaibeang kpedzima womong garengtoaac wanacngic kpema kedzaha noboc herecgec.<sup>48-49</sup> Nga Yesungo yofi edeyunuec, “Ni wenacsoc ngenigoc kecma womonnu edekpou angemmba ngeni imohai ine mi menugec. Nga yaguc ine godzungic meandae, ngeni ifi isoc wasaibeang nga gbaruc mema menugecdeac hadae.” Yoac mitikibi yofi fede, imoc sasawango ine fingeacdabeso.

<sup>50</sup> Yesungo ifi deu yeac areng sasawango ye wama kengec woragec.

<sup>‡</sup> 14:26: Yegec, imoc Mitiyegec 115-118.

<sup>51</sup> Anu sebigborimedac mongngo kporuc linengngo memea imocsac kpeec, yeng Yesu modaru megec. <sup>52</sup> Memagec, yeng kporuc kpesima seng-gang worama kenec.

<sup>53</sup> Anu yeni Yesu mema womong garengtoa yenearu mekenggec. Mekenggec womong gareng enara sasawa nga enarafocngina amma mitiac negen negengngic, yeni kpeturangema hagec. <sup>54</sup> Nga Petoro ye ngadenginau hereaungoc modacyunu kemma womong garengtoa yeac amaac oda manaungoc enec. Emma imohai uamedac yenigoc gerec dzeunegemma tarec.

<sup>55</sup> Anu womong gareng enara nga yudangic yeneac tutumangtoa memba sasawa adzorogec. Adzoroma yeni Yesungo faka mangana dafi anec dema kpehomegecdeac manganaac kopocsicac yoac anggecdeac obohogec. <sup>56</sup> Nga ngic homacngo ikoc amma yeac enacfu faifaiyoac degec nga gubeyoacng-inango socfungoc mi anec. <sup>57</sup> Ngic goa yeneng kicnginau emma namma yofi dema enacfu faifai ammigec, <sup>58</sup> "Ye yoac mong yofi deu negening, 'Ni womong yomoc ngicmaringo memea, imoc hembarackema uameme harebecac manau mong ngicmaringo mi memea mebade.'" <sup>59</sup> Nga kopocsicac yoacngina imocngo ine ifingoc socfu mi anec.

<sup>60</sup> Anu womong garengtoango yacma botucnginau namma Yesu yofi kpesimiec, "Geac yoac dedae, imocac noboha mong mi denade me?" <sup>61</sup> Ifi deu Yesungo ine waicke namma turunga mong mi merennec. Nga womong garengtoango mongoc kpesimiec, "Ge Messia, Kenec keneheac medac me?"

<sup>62</sup> Ifi deu Yesungo deec, "Ni imocnoc." <sup>§</sup> Anu kecma ngeni Ngicac Medac Kuctoa mingina yeac foiaugeng tacma kurumenggac hoennu kicnginau hau henggecde." *(Mitiyegec 110:1; Danie 7:13)*

<sup>63</sup> Ifi deu womong garengtoa yeng ngakpihereha membarackema deec, "Yoacninaac boingicac monggoc mi obohonide. <sup>64</sup> Ye Anutu emmima deu bic negendau, imocac dafi negendae?" Ifi deu sasawango ye kopocsihagoc negemma homeudeac deserigec.

<sup>65</sup> Ifi deserigec ngic goa yeneng sofohoma kiwa kporucngo biranggema maribung gbungngo heima degec, "Ge kpefingyoac dena!" degec gareng nanggec, yeneng ye mema kpegec.

<sup>66</sup> Anu Petorongo oda manau nammanu womong garengtoaac wanac naroang mongngo ihai haec. <sup>67</sup> Hama henu Petoro ye gerec dzeunegemma taru kiwa yearu fima deec, "Ge ifingoc Yesu Nadzaretenc, yegoc kefoc." <sup>68</sup> Ifi deu Petorongo ine sebi heima deec, "Ye mi negemmiduae nga yoac denec, imoc mi negentegecduae." Ifi dema ama naguyau kemeu kokorec arohoec. <sup>69</sup> Arouhou wanac naraangngo Petoro hemma ngic wegenac nanggec, torokpema yeni monggoc edeyunuec, "Ngic yomoc ye yenearunac mong." <sup>70</sup> Ifi deu Petorongo ine monggoc busickpeec.

Nga naso mi hereemanu ngic imohai nanggec, yeneng monggoc degec, "Foracngoc, ge yenearunac mong. Ge Gariraia bangecfuncngoc." <sup>71</sup> Ifi degec ye yengenaoc sowecemema desopec amma deec, "Ngeni ngic dedae, ye mi negemmiduae." <sup>72</sup> Ifi deu imohaingoc kokorecngo arohou yohockang anec. Anu Petoro ye Yesungo yoac edeac, imoc negensiec, "Kokorecngo arohou atac yohockang mi ammanu geng neac busickpena harebec bic anude." Petorongo imoc negensima ubahodung kuneng mema kiachodung kiarec.

§ 14:62: "Ni imocnoc." imoc Anutuac kpara mong. Ge "Yoac goaac dedekperagi." henna. Hafac 1128.

## 15

<sup>1</sup> Asoacngoc yombong womong gareng enara nga yudangic enarafocngina amma mitiac negen negengngic nga yudangic yeneac tutumangtoa memba sasawa, yeneng yoac deserigec. Deserima Yesu maria dedeckema Piratoaru mekenggec. <sup>2</sup> Mekenggec Piratongo Yesu kpesimiec, “Ge yudangic yeneac ngictau me?” ifi deu merenec, “Imocnoc geangaoc denec.”

<sup>3</sup> Nga womong gareng enara yeneng Yesu yoacfu faima yeac haniaya homac degec. <sup>4</sup> Ifi degec Piratongo monggoc kpesimiec, “Yeni geac yoac homac yombong dedaemoc, imoc negemma turunga mong mi merennade me?” <sup>5</sup> Ifi deu Yesungo turunga monggoc mi merenu Piratongo negen negeng ua homac meec.

<sup>6</sup> Anu makekeng nasousoc ngic mong witicamau takefu yudangic yeneng yeac kpara kpacgec Piratongo yenoc witicamaunac wau makefec. <sup>7</sup> Amma ngic goa warac ngicngac here miac miac faka amma ngic goa yunuhomegec witicamau faiyunugec, yenearunac ngic mong kpara Baraba. <sup>8-10</sup> Nga womong gareng enara yeni Yesuac keracmangang amma yeac mariu mekenggec, Piratongo imoc bic negenec. Ifi negenu habutoa yeneng hama Piratongo angkefec, ifi isoc anudeac kpesimigec yeng meremma yofi kpesiyemmeec, “Yudangic ngeneac ngictau yungecngemmedeac negendae me?” <sup>11</sup> Ifi deu womong gareng enara yeneng habu fenggeyemmegec yeneng Yesu wama ine Baraba naric yungecyemmegecdeac degec.

<sup>12</sup> Ifi degec Piratongo monggoc meremma kpesiyemmeec, “Anu ni yudangic ngeneac ngictau dedae, yeac dafi ambade?” <sup>13</sup> Kpesiyemmeu yeneng arohogec, “Ge ye mariponnu kpena homeu.” <sup>14</sup> Ifi degec Piratongo monggoc kpesiyemmeec, “Nga ye noc kopocsic meec?” deu ine yeneng monggoc seriangoc arohogec, “Ye mariponnu kpebesena.” <sup>15</sup> Ifi degec Piratongo habu yeneac negen negeng modarudeac negemma Baraba wau kenec. Nga yeni Yesuac sebia dzikacngo kpemaguc mariponnu kpegecdeac wasai maringinau wayemmeec.

<sup>16</sup> Anu wasaingic yeneng Yesu mema gawamang yeneac amaoda manau emma wasaingic sasawa hafoangoc kpedzucnegec. <sup>17</sup> Kpedzucnedacma ngakpiherec mong giweng giweng heimima somang batiHEMA ira isoc oruhau heimigec kemeec. <sup>18</sup> Kemeu ewehelhei siricfu kpacma edegec, “Ohec, yudangic yeneac ngictau.” <sup>19</sup> Dema yasungo oruhau kpema sofohoma haniau fafoc heima numumigec. <sup>20</sup> Anu yeni defagoc ammigec wisickeu ngakpiherec saccac imoc hesima yengena wamba heimigec kemeu mariponnu kpegecdeac mema ngadeau kenggec.

<sup>21</sup> Kemmagec Kirene taonunac ngic mong kpara Simong, ye Aresande nga Rufu yereac mangngira, yeng semeng uaunac sinnu hamanu wasaingic yeneng Yesuac maripong tofohoudeac ngombonggegec tofohoec. <sup>22</sup> Tofohou yeni bangec buma mong kpara Gorigata, titiha hatasic, imohai Yesu mekenggec. <sup>23</sup> Mekemma sopo mong aengagoc kpara mira, imoc wainggoc yerecgema migec nga yeng ine imoc waec.

<sup>24</sup> Anu yeni ye mariponnu kpema wambaya mederema wiac mong me mong merang meude, imocac kpeing kpegec. <sup>25</sup> Yeni asoac 9 kirocfu Yesu mariponnu kpegec. <sup>26</sup> Kpema ye yoacfu faigec, imocac hania tafebisicfu yofi ohogec, “Yudangic yeneac ngictau.” <sup>27-28</sup> Anu yeni godzuncig yohockang, mong foiau nga mong kanayau yegoc mariponnu momoc yunugec. Ifi anggec yoac mitikibiu oho ohoya yomoc seriec,

“Ye manganameme yenearunac mong, ifi negenggec.”

(*Yesaia 53:12*)

<sup>29</sup> Anu ngic ihai kengha anggec, yeni Yesu deendema ammima orucngina kpatitickema degec, “Ngeni ngic imoc henggec, yeng womong hembarackema wenac harebecac manau monggoc meudeac deec. <sup>30</sup> Ge geanggaoc onggongemema mariponnunac mesiemema mana!”

<sup>31</sup> Anu womong gareng enara nga mitiac negen negengngic, yeneng ifingoc ye desusuc ammima denegeng amma degec, “Ye ngic goa ongongyunukefec nga yengena ine naric mi onggongemeude. <sup>32</sup> Ye Messia, Israe neneac ngictau kecdengo yaguc mariponnunac mau hemma negensingende.” Nga ngic yohockang mariponnu ifingoc yurugec, yereng ifingoc deendema ammioc.

<sup>33</sup> Wenac dzongiau 12 kiroc ammanu imohai ama kundung kpema kundungno bangec sokoma fekemmanu 3 kiroc marai anec. <sup>34</sup> Imohai Yesungo ubaudumeng kunengngoc kpacma yofi deec, “Eroi, Eroi rama sabaktani.” Imocac titiha yofi, “Anutuna Anutuna, ge nocac wanudang.” *(Mitiyegec 22:1)*

<sup>35</sup> Ye ifi kparu ngic wegenac nanggec, yenearunac goango imoc negemma degec, “Negenggec, ye Eria kpacsambic ammide.”

<sup>36</sup> Ifi degec ngic mongngo nedzikkemma kondung sobing mong mema waing aengagocfu nemuruckema yasuu faiu Yesuac enarau enu deec, “Tomai namma henni, Eriango hama mesiude me kpac!” <sup>37</sup> Ifi demanu Yesungo ine ubaudumeng kunengngoc kparu asuya ereec. <sup>38</sup> Ereu womonggac kporuc kuneng\* imoc dzongiausung wihacnac tohoma mau yohockang anec.

<sup>39</sup> Anu wasaigareng yeac kicfu nanec, yeng Yesungo kpavec nga homeec, imoc hemma yofi deec, “Foracngoc, ngic yomoc ye Anutuac medacnoc.”

<sup>40</sup> Nga ngac goa ifingoc hereau namma faka fingerec, imoc henggec, yeneac botucfu Maria kpara mong Madara nga Maria, Yakobo mong munea deandae, ye nga Yosec yereac nonggongira amma Sarome, yeni yena-hafoc nanggec. <sup>41</sup> Yesungo Gariraiia bangecfu kefu ngac imoc yenennoc ye modacma meficgekecgec. Amma ngac tosea homac, yeni Yerusarennu yegoc bic kemma ihai ye hemma nanggec.

<sup>42</sup> Marai bic anu hombanggac memengereac naso wegene hau sabataac naso femanu <sup>43</sup> Yosefe Arimataia taonnunac, yeng ihai haec. Ngic ye kpactoayagoc yudangic yeneac tutumangtoa, imocac membangina mong amma ye Anutuac eucererenggac tomai kefec. Yeng kengeha kpac Piratoaru kemma Yesuac fareng meudeac kpesimiec. <sup>44</sup> Kpesimiu Pirato ye Yesungo bic homeec, imocac kpidohoma wasaienara kpacma Yesu bic homedac me kpac, imocac kpesimiec. <sup>45</sup> Kpesimiu Yesu bic homedac deu Yesuac fareng Yosefe desimiec.

<sup>46</sup> Desimiu Yosefengo linengkporuc mong bummema Yesuac farenga mariponnunac mesiu mau kporucngo tembonggema kicsereu mekenec.† Kicsere imoc hocsirau singa usu usuya, imohai farenga faima hoctoa mong kpedidinggeu singa hedzickeec. <sup>47</sup> Anu Maria Madara nga Maria Yosec nonggea, yereng Yesuac farenga dahai faiec, imoc henoc.

## 16

<sup>1</sup> Sabata tatak naso wisickeu imohai Maria Madara nga Maria Yakoboac nonggea amma Sarome, yeneng kemma Yesuac fareng nadzicmigeccdeac

\* **15:38:** Kporuc imoc ama kpetiac nga ama kpetiac yombong, yereac botucngirau faifaia. † **15:46:** Lineng imoc kpingding mong ambiac ogea, imocngo wamba mekecgec.

kerec homunagoc bummegec. <sup>2</sup> Bummema sonda gboria hanac hanaheau asoacngoc ama wereckenu kicsereu kemmagec wenac ereec.

<sup>3</sup> Anu kemma yenaocngoc denegeng amma degec, “Merang hocsingaac naguya imohacnac hoc kpedidinggenemmeude?” <sup>4</sup> Ifi dema kic fima henggec hoctoa imoc ine bic kpedic kpedidinggea. Nga hoc imoc kunengtoa yombong. <sup>5</sup> Hemma kicsereu emma henggec medac mongngo ngakpihereha kongac kongac mong heiec, yeng foiugeng taru hemma kpidohoma kerectegec anggec. <sup>6</sup> Ifi anggec yeng yofi edeyunuec, “Ngeni mi kengecngunu. Yesu Nadzaretenc mariponnu kpegecmoc, ngeni ye hembeso hadae nga ye bic gborima yacdac, yei mi fede. Faigec fedac, fefea imoc henggec. <sup>7</sup> Ngeni kemma medacfora nga Petoro yofi edeyunuec, ye waraingemmema Gariraia bangecfu kende. Anu ngeni imohai kemma ye meficgegec, yengenaoc edengunuec, ifi isoc.”

<sup>8</sup> Ifi edeyunuu yeni kpidohoma dzonongngina fedeecc kicsereunac worama kenggec. Amma yeni homac yombong kpidohoma kengecyunuecac amma ngic mong mi edeyunuec.

<sup>9</sup> Yesungo sondau yarec, naso imohai hanahema Maria Madara fingecmiec. Ye warac hadehade 7 yearunac kporarec, ngac imocnoc fingecmiec. <sup>10</sup> Fingecmiu Mariango kemma ogofora yegoc momoc kecgec, yeni ubahodung negemma kiac kecmagec yofi edeyunuec, <sup>11</sup> “Yesungo bic yacdac kecede, ni hendua.” ifi deu yeneng ye mi negensinggegec.

<sup>12</sup> Anu imocac ngadeau ngic yohockang yeri amabangec monnu kembesonga kemmaec ye siriha mong amma fingecyemerec. <sup>13</sup> Fingecyemeru yeri dzigenema goa edeyunuec, yeneng ine mi negensinggegec.

<sup>14</sup> Anu medacfora 11 yeni yaka nema tacmagec Yesungo fingecyemmeec. Nga ye yarec hemma edeyunuec, imoc mi negensinggegec nga ubangina seriecac amma ngaba siricfu yoac edeyunuec. <sup>15</sup> Edeyunuma yoac yofi deec, “Ngeni bangectoa bangec, imohai kemma wiac sasawa Anutungo deu fingerec, yeni siduc gombung edekpou ayemebisia.

<sup>16</sup> Anu ngic me ngac mong negensinggema mitidoku nadziru Anutungo ye ebicfunac mesiu komoc kpeude. Nga mong ye mi negensinggeude, yeng ine yoacfu makpeude. <sup>17</sup> Nga negensinggecede, ngenearu faka kuhagoc yofi fingerude. Ngeni neac kpacfu hadehade nga yafing kporacyunuecede amma nedzarangyoac uba gboriausing degecede. <sup>18</sup> Ngeni boidezoc maringo megecede nga doku hodungagoc ngic memanganeyunuande, ngeni imoc negecdeu, imocngo mi memanganengunuude. Nga ngeni ngicngac hafeigoc yenearu mari faigec, yeni ngeregecede.”

<sup>19</sup> Kebu Yesungo yoac ifi edeyunuu wisickeu Anutungo ye kurumennu meenu yeac foiau tacde. <sup>20</sup> Anu medac yeni noboc noboc kemma siduc gombung ngicngac edekpou ayemmegec. Nga Kebungo yenigoc kefu yeni ua megec faka kuhagoc fingerec, imocngo yoara meseriec.

## Ruka Yeng Yesuac Siduc Gombang Ohoec

1-3 Kunenna Teofiro, profete yeneng yoaac degec, imocngo botucninau fora fingerec, imocac siduc ohogenduae. Ngicngac yeni hanac hanaheaunacngoc erema kicnginango faka fingerec, imoc hemma yeni siduc gombang kingangkpekpefora anggec. Yeni faka fingerec, imocac siduc edenunugec homacngo imoc hanahema ohogec. Imocac siduc edenunugec amma ohogec, imoc isinggema hanac hanaheaunac erema fingerecmoc, imoc dindingac arenggema ohogemba naric anudeac negensiai. <sup>4</sup>Ge yoaac yomoc osoma yoaac kpougenggec, imocac fara ande, imoc naric negennade.

<sup>5</sup>Yuda bangebac ngictau Herode yeac nasou Abia ua arenunac womong gareng mong kefec, kpara Dzekaria. Yeac enema kpara Erisabete ye Aronggac fingeceahe, imohacnac.\* <sup>6</sup>Ngicngahoc imoc yeri Anutuac kicfu dindingac yombong kecma dedeseriyoac nga singyoac sasawa modacma ikocngira kpac amma kpetiac kefec. <sup>7</sup>Yeri kufing kefecac amma Erisabetengo sabaha kpac kefu yeri kecma ngicngac yada bic anoc.

<sup>8</sup>Nga naso botuc ihai Dzekariango Anutuac kicfu uaarengfora yenigoc ua megeg <sup>9</sup>yeni fakangina modacma merang sesegerec homuna gombunga kpedzereckeude, imocac kpeing kpegec Dzekaria heficgeec. *(Makekeng 30:7-8)* <sup>10</sup>Heficgeu sesegerec imoc kpedzereckebesonga nasoya hau ye Anutuac womong manau enec. Enu ngicngac habutoa yeni ngadeau numuma nanggec. <sup>11</sup>Ifi ammagec Kebuac angero mongngo hosuc heiheiac arata, imohai Dzekaria fingecmiec. Fingecmima foiaugeng nanec.

<sup>12</sup>Nga Dzekariango hemma kpidohoma kengec ebiria anu <sup>13</sup>angerongo yofi edeec, “Dzekaria, ge mi kengecguu, Anutungo nunumuga bic negendac nga enengga Erisabetengo medac mong kpenanggema megenude. Ge kpara Yohane, ifi kpachesena. <sup>14</sup>Yeng geac ubangerec nga sogac sogai anude. Nga ngicngac homacngo ye fingerecac amma ifingoc ubangerec negenggecde. <sup>15</sup>Imoc yofiac, yeng Kebuac kicfu kuneng anude. Amma waing doku me doku seria mong naric mi neude. Ye nonggo heremanaunacngoc Tiri Asu wake wakeagoc amma <sup>16</sup>Israe ngicngacfora homac wangecyunuu yeni ubangina Kebu Anutungina, yearu merenggecde. <sup>17</sup>Amma medac ye manggac wangecyunuu ubangina meremma heregoc nambaracfcngina yeneac songo negenggecde. Amma yoackpekpe yeni negen negeng dindingac meficgeyemmeudeac ua meude. Nga yeng Kebuac kicfu kecma Eriaac onga nga kucfu uaya mekefude. Ifi mekecma ngicngac meefaiyunuu yeni Kebuac kicfu efaima yeac ngicngacfora anggecde.”

<sup>18</sup>Ifi deu Dzekariango angero yofi edeec, “Ni neanna ngicyada nga enenna ifingoc, ye kifaya bic homac ammanu geac yoaac dafiugeng negemba fora anude?” <sup>19</sup>Ifi deu angerongo deec, “Ni Gabirie. Anutuac kicfu nanganduae nga ye yengenaoc yoaac edegubadeac suenuu hama siduc gombang yomoc edeguduae. <sup>20</sup>Negennec, yoaac deduae, imocac nasoya hau foraya fingerude. Nga ge yoaacna imoc mi negensingedanggac ge yoaacga kpac anu ifi kecmana

---

\* **1:5:** Womong gareng sasawa yeni Moseac dara Aronggac bangebora. Yeni Aronggac fingeceahe-unacsac ngac naric megeg.

wiac deduaemoc, imocac nasoya hama fingerude. Fingeru wenac imohain-goc yoacgagoc monggoc annade.”

<sup>21</sup> Anu ngicngacareng yeni Dzekariaac tomai namma ye Anutuac womonnu naso herea yombong nanecac kerectegec anggec. <sup>22</sup> Ifi anggec ye ngadeau mau yoara kpac anu yoac edeyunuudeac obohoy yeni bic negen-tegecgec, “O, ye womonnu emma onga mong hendac.” Kecma ye yoara kpac anu mariangosac faka anec. <sup>23</sup> Anu Dzekariaac womong garenggac ua nasoya wisickeu ye mama ameau monggoc dzigenema kenec. <sup>24</sup> Kenu naso mi hereemanu enema Erisabete ye hereagoc amma afo 5 sufu sufuu kefec. Kecma yofi negenec, <sup>25</sup> “Yomoc Kebuac faka mong, yeng neac negensima naso yomohai gamena mesawerema faka yomoc anendac. Nga ngicngac yaneng neac deendema monggoc mi anggecde.”

<sup>26</sup> Anu Erisabeteac afoya 6 ammanu Anutungo angero mong kpara Gabirie sueu Gariraiia prowinsiu taong mong kpara Nadzarete, ihai kenec. <sup>27</sup> Kemma ngac naroang kpara Maria, ye fingecmiec. Maria ye ngic mong kpara Yosefe, yeac enema anude, imoc bic deserigec amma Yosefe ye Dawidiac kisicfunac. <sup>28</sup> Angerongo Mariaac yofi deec, “Ohec, Kebungo gegoc kecde, wosoefac-toayango gearu fedeac ubangerec negembesena.” <sup>29</sup> Ifi deu Maria ye imoc negemma kerectegec kuneng anec, “Angerongo noc wiacac negemma ifi edenude?” imoc negenu obohoy negen negeng ua homac meec.

<sup>30</sup> Memanu angerongo yofi edeac, “Maria, ge mi kengecguu, Kebungo geac negenu ngereeande. <sup>31</sup> Amma negenna, ge sabac mong kpenanggema menade. Amma ge medac yeac kpara Yesu kpacbesena. <sup>32</sup> Medac imocngo engena yombong anude. Yeng Anutu Engenatoaninaac Medac, yeac kpara ifi kpacgecde. Nga Kebu Anutungo ye kisiha Dawidi yeac ngictauac tatac miu ihai tarude. <sup>33</sup> Amma yeng Yakoboac kisicfora yeneac ngictau amma nasoya kpac kefude nga amabangeha garenggeude, imoc wisic wisickea kpac feeng kefude.” <sup>34</sup> Ifi deu Mariango angero edeac, “Ni ngicgoc mong mi fedua nga imoc dafugeng fingerudeac denec?” <sup>35</sup> Ifi kpesimiu yofi deec, “Tiri Asungo gearu mau Engenatoaac kucngo geac nokumuc amma kperacguude. Imocac amma sabacga kpetiac fingerude, yeac kpara Anutuac Medac degecde.

<sup>36</sup> Negenna, geac areng mocgu Erisabete, ye ngacyada amma sifu medac kpenanggeec. Ngicngac yeni ye kufing kecde, ifi degec nga yeng hereagoc anu afoya 6 bic ande. <sup>37</sup> Anutuaru faka kpungge kpunggea mi fede.” <sup>38</sup> Ifi deu Mariango deec, “Negenna, Anutu ye neac minginna imocac ge yoac dedang, imoc naric fingecnembeso.” Ifi deu angerongo wama kenec.

<sup>39</sup> Naso mi hereemanu Mariango efaima Yudaiaac sifec bangecfu taong monnu kenec. <sup>40</sup> Kemma Dzekariaac amau emma Erisabete wenacngerec demiec.

<sup>41</sup> Nga Erisabetengo Mariaac yoac negenu sabac hereau tarec, imocngo kpidohoc. Kpidohoy Tiri Asungo Erisabetearu wakeu <sup>42</sup> ye kunengngoc kpacma deec, “Ge ngac botucninau kenecgagoc nga sabac heregau tacde, ye kenehagoc. <sup>43</sup> Kebunaac nonggeango nearu hau faka yomoc fingecnende, imoc faka kuneng. <sup>44</sup> Negenna, ge wenacngerecyoacga dena kedzacnango negembare sabacngo herenau sogaima yuengyuma andac. <sup>45</sup> Ngac ye Kebungo yoac edeu imocngo fora fingerudeac negensinggeude, ngac imoc ye kenehagoc.”

<sup>46</sup> Ifi deu Mariango deec, “Anutu, ge kicga fima nenna wanac naroangga mamea yombong amma kefai. Imocac amma ubaonganango Kebu heiwayong anggenu <sup>47</sup> Anutu memengerecna, ongaasunango geac amma sogaide.



48 Yeng kingang naroang mamea kecde, imoc hentegecdac nga yofinenggac namma feengkefude, ngicngacareng sasawango negennemma yofi degecde, 'Ye kenehagoc.' 49 Kuctoa Minginango fakatoaya kuneng yombong anendac nga yeac kpara kpetiac. 50 Kisicfunac kisic yeac ewea heimiandae, yeneac witiu yeac ubamanganggo feengkefude. 51 Nga ngicngac yenang uba negen negenginaac negenggec engena ande, yenearu kucfakaya mema maria sinema medereyunuu singsararang kpegecde."

52 "Ye ngictau kucnginagoc, yeni tataknginaunac meicyunuma ngic kpac kuneng mong mi mekecgec, yeni memiacyunuec. 53 Nga ngicngac here home homegoc kecdae, yeng yeni yengena wiac gombunga yemmema mewakeyunuec amma finactoangingagoc, yeni ine maringinau wiac mong mi faima eng sueyunuu kengec. 54-55 Anutungo yoara bangecnina Abraham nga fingeasaheyaac edeyunuec, imoc mi nigeckpeec, kpac. Ye kingangkpekpefora Israe sirihi ifiangoc meficyunuma wosoefac ayem-meude."

56 Amma Mariango afo harebec isoc Erisabetegoc kecma monggoc ameau dzigene kenec.

57 Kenu Erisabete ye sabac finge finge nasoya wegenu medac meec. 58 Meu amafora nga yengena arengfora yeneng Kebungo yearu wosoefactoa ammiac, imocac negemma yegoc momoc sogaigec. 59 Anu uameme 8 ammanu yeni medac sebi tosea herecgegecdeac hama ngic yeneng yeac kpara Dzekaraia, mamaac wase megecdeac degec. 60 Ifi degec nonggea Erisabetengoc kpetarima deec, "Yeac kpara Yohane kpacbesonga." 61 Ifi deu yeneng degec, "Geac arengfocga yenearunac kpac ifia mong mi kpacgec fede." 62 Ifi dema yeni maringo faka amma medac kpara merac kpacnide, imocac mama kpesimigec. 63 Kpesimigec Dzekariango kibi oho ohoac tafe, imocac kpesiyemmu migec yofi ohoec, "Medac yeac kpara Yohane." Ifi ohou yeni sasawango kerectegoc anggec. 64 Nga naso imohaingoc Dzekariaac enara anggeu nedzaranga heimerenu ye monggoc yoacdede amma Anutu dengerema kefec.

65 Anu amafora yeni sasawango kengec anggec nga ngicngac Yudaia sifec bangectoau kecgec, yeni faka fingerec, imocac deneng amma kecgec.

66 Nga ye Kebuac kucngo sabacgoc kefec, imocac amma ngicngac siduc negenggec, yeneng yoac imoc negen negenginau faima yofi negemma kpesiemegec, "Sabac imocngo kecma dafi ambesande?"

67 Anu Tiri Asungo sabacac mama Dzekariaaru wakeu, yeng kpefingyoac yofi deec, 68 "Kebu Israeac Anutu kenehebisina. Yeng ngicngacfora nenannu hama witicfunac bic yungecnuuec. 69-70 Amma ye bicngoc yombong profete yeneac enacfu yoac faiu degecmoc, imoc modacma kingangngiha Dawidi, yeac fingeasaheunacngo ngic mong ebicfunac yungecnuuuu komoc kpenide, ye meficgenemmeec.

71 Yeng ngabafocnina kecdae nga ubango ukununuandae, yeneac mariunac mesinunuudeac negenec. 72-73 Nga Anutungo kisicnina Abrahanggoc yoac deserima deec, imoc negensima dzadzahac kpatanina modacma kisicfocnina wosoefac ayemmema 74 ngabafocnina yeneac mariunac mesinuuu kecma kengeha kpac eweheimima kecnide. 75 Kecni kekecnasonina fedesoc, imohai yeac kicfu kpataning nga dindingac kecnideac ifi anemmeec. 76 Anu sabacna gennoc waraima Kebuac sing mengerema singa heitumeinadeac amma Engenatoa yeac profete, ifinoc kpacgugecde. 77 Ge yeac ngicngacfora

kopocsicngina kpac anudeac kpouyemmenade nga yeni ebicfunac mesi mesi nga komoc kpegecdeac sing, imoc naric negentegecgecde. <sup>78</sup> Nga Anutuninango songo nga wosoefac engena yombong anemmekecdeac ifi fingerude. Yeac songotoayaac kuc imoc wenac isoc erema nenanggaru mama ngicngac <sup>79</sup> kundung manau nga homecac nokumucfu kecdae, yeni mekperagiyunuu nenang ruaeac sinnu kennideac hanianina garenggema sing imoc edzacnunuude.”

<sup>80</sup> Anu sabac ye sebiugeng nga asuu yadiseri amma bangec kisiu kecma Israe ngicngac yeneac kicfu fingetegerudeac nasoac tomai kefec.

## 2

<sup>1-2</sup> Kwiriniungo Siria bangecac gawana kefec, naso imohai Roma bangecac ngictau Sisa Agustongo bangeha bangeha kpacarengngina mengeregecdeac yoac faiu kendarec. Nga osokporeng ua ifia warac mi feec. <sup>3</sup> Ifi anu ngicngac sasawango kpacarengngina mengeregecdeac taongngina fekenec, imocacsoc kendacgec. <sup>4</sup> Yosefe ye Dawidiac kiscifunac, imocac amma yang Gariraia prowinsiunac erema Nadzarete wama Yudaia prowinsiu Dawidiac taongbisic kpara Betereheng, ihai kenec. <sup>5</sup> Nga enembingeha Maria ye hereagoc anu yegoc yerahafoc kpacngira kpacarennu ohogecdeac kenoc. <sup>6</sup> Yeri ihai kecmaec sabacac fingec fingecnaso haec. <sup>7</sup> Anu yeri amatatacfu titinga mong mi feecac yeri ngadeau tacmaec morocmedacngira fingeru Mariango sangohoma ramaburumaka otou ihai faiu keema feec.

<sup>8</sup> Anu toforecfu ramagareng goa yeni Betereheng ama wegenacfu rafafocngina garengyunuma kecgec. <sup>9</sup> Kecmagec Kebuac angero mongngo fingecyemmeu Kebuac kibikperagitoayango mekperagiyunuu yeni kengec ebiria anggec. <sup>10-11</sup> Ifi anggec yeng edeyunuec, “Ngeni kengec mi anggec. Imoc yofiac, yaguc yombong ngeneac amma Dawidiac taonnu Messia Kebungina fingecdac, ye ebicnginaunac mesingunuude. Nga ngicngac sasawa yeac amma ebiriangoc sogaigecde, ni siduc gombung imoc dekperagingemmeduae. <sup>12</sup> Sabac ye merac imoc negenggecdeac ma yomoc ngemebade, ngeni kemma ramaburumaka otou sabac mong kporucngo birac biranggea feu meficgegecde.” <sup>13</sup> Ye ifi demanu imohaingoc kurumenggac angerohabu kuneng, yeneng fingecma yegoc namma Anutu dengerema yofi degec, <sup>14</sup> “Anutu ohec, wi kurumennu febeso nga bangecfu ruae fingecbeso. Anutungo ngicngac wosoefac ayemmede.”

<sup>15</sup> Ifi dema angero yeni kurumennu dzigenema enggec ramagareng yeni yenaocngoc denengeng amma degec, “Betereheng taonnu faka fingeru Kebungo edenunudac, imoc bic kemma henni.” <sup>16</sup> Ifi dema yeni bic kemma Maria nga Yosefe amma sabac oto manau feec, yeni mefiyunuma yenenggec. <sup>17</sup> Yenemma angerongo sabac yeac yoac deecmoc, imoc edeyunugec negendacgec. <sup>18</sup> Nga ramagareng yeneng siduc anggec nga ngicngac imoc negenggec, yeni kerectegec andacgec. <sup>19</sup> Mariango ine faka fingechaec, imoc hereau faima negensima kefec. <sup>20</sup> Nga angerongo yoac ramagareng edeyunuec, yeni imoc sasawa fora hemma negemma dzigenema Anutu afec afehu kenggec.

<sup>21</sup> Uameme 8 wisicke sabac sebi tosea herecgegecdeac nasoya hau yeni kpara Yesu kpacgec. Kpac imoc ye nonggeango mi kpenanggemanu angerongo bic kparec.

<sup>22</sup> Kecma Moseac dedeseriyoac modacma dzuac dzuacnasoac mitikibiui oho ohoya nande, nasongina imoc wisickeu yeni sabacngo Kebuac kicfu fingerudeac Yerusarennu meenoc. <sup>23</sup> Kebuac dedeseriyoacfu yoac yofi oho ohoya fede, “Waracmedac fingeckegcedesoc yeni Kebuac kpataning areng.” <sup>24</sup> Nga sese faibesonga, imoc kebesac yohockang me gomoc gomocmedaha yohockang faibesonga, imoc Kebuac dedeseriyoacfu fede nga yeri imoc modacma mekenoc. (*Makekeng 13:1-2,10-13; Sesememe 12:1-8*)

<sup>25</sup> Naso imohai ngic mong Yerusarennu kefec, kpara Simeong. Ye ngic dindingac amma Anutu eweheimima Tiri Asugoc kefec. Amma ye Israengic yenearu memeseri fingerudeac tomai anec. <sup>26</sup> Nga Asungo warac yofi deficgema edeec, “Ge mi homemana Anutuac Messia fingeru hennade.” <sup>27</sup> Nga Yesuac nonggomama yereng dedeseriyoac feec, imoc modacma sabacngira Anutuac womonnu meenoc. Meenec Asungo Simeong bic wangeru womong manau emma <sup>28</sup> sabac menamma Anutu dengerema yofi deec, <sup>29-30</sup> “Kebu minginna, ni wanacngicga kicnango Memengerecga hem-badeac denec, imoc bic henduaac ruaegoc kekecna mewegenena kembade. <sup>31</sup> Ge ngicngac sasawa yeneac kicfu sing imoc bic mengeredang. <sup>32</sup> Nga yeng bangeha bangeha ngicngac ge mi negensinggudae, yeni mekperagiyunuma kperagingina anude amma ye israengicngacfogga yeneac kibikperagitoa.”

<sup>33</sup> Ifi deu sabac nonggomama yeri yeac yoac imoc negemma kerecgec anoc. <sup>34</sup> Nga Simeongngo kenecyunuma sabac nonggea Maria yofi edeec, “Negenna, Israengic homacngo medac yomocac amma mayunuude nga homacngo yeac amma yacma nanggecde, ifi fingerudeac Anutungo meis- inggeec. Nga ngic homac yeni ye hemma yeac ngaba amma deen- dema ammgicde. <sup>35</sup> Ammigeac geac ubaherega ifingoc dzikacac beangng hherecgeude. Ifi anu ngicngac homac yeneac negen negeng sufuma feec, imoc didiu fingerude.”

<sup>36</sup> Anu profete ngac mong kpara Hanna, ye ifingoc womonnu kefec. Ye Fanuereac naroang Aseac kiscifunac. Amma ye ngic mema yegoc kifa 7 kecmanu ewea homeec. <sup>37</sup> Homeu ye hodzec kecmanu kifaya 84 anec. Amma yeng womong mi wawa hadzing toforec yaka segekecma Anutu numumikefec. <sup>38</sup> Kecma naso imohaingoc yenigoc wegena namma Anutu dengereec. Dengerema ngic Yerusarenggac tembuckekekngina fingerudeac tomai kecdacgec, yeni sabacac siduc dekperagiymmeec.

<sup>39</sup> Yosefe nga Maria yeri Kebuac dedeseriyoacngo dede, imoc sasawa andarec wisickeu Gariraiia prowinsiu dzigenema Nadzarete amanginau kemma kecgec. <sup>40</sup> Kecgec medacngo yadiu Anutuac ubangerecngo yearu feu yeng kuc nga negen negentegec wake wakea meec.

<sup>41</sup> Yesuac nonggomama yeri makekenggac hombang henecdeac kifasoc Yerusareng taonnu engkefoc. <sup>42</sup> Amma yeni hombanggac faka modacma Yesungo kifaya 12 ammanu yenhafoc hombangng kenggec. <sup>43</sup> Kemma kecmagec hombang naso wisickeu dzigene hagec Yesungo Yerusarennu tarec. Taru nonggomama yereng imoc mi negemma hama <sup>44</sup> yofi negenoc, “Ye habu yenigoc sinnu kecde.” Ifi negemma yeri uameme mocgu sinnu eng kenggec wisickeu Yesu hoforoc. Hofocma tosofocngina nga arengfoc- ngina yenearu yerecema <sup>45</sup> mong mi meficgeocac monggoc dzigenema Yerusarennu meficgeecdeac kenoc.

<sup>46</sup> Uameme harebec wisickeu Anutuac womong manau emma Yesu mefic- geoc. Meficgeec yeng kpoukpou yeneac botucfu womonnu tacma ne-

gengyemmema dekpesi ayemmeec. <sup>47</sup> Amma Yesungo negen negenggoc yombong ngic sasawa yoacngina merenecac yeni kpidohoma imoc wiac engena ande, ifi negenggec. <sup>48</sup> Nga nonggomama yereng ye hemma kpidohoma nonggeango yofi edeec, “Medac, ge nocac faka ifia anecmenec? Manggagoc nereng negengyohoc amma hofocgukecdic.” <sup>49</sup> Ifi deu yeng edeyuruec, “Ngeri nocac hofocnudape? Mannango ua mekecde, ua imoc mebadeac denenec, imoc mi negendape me?” <sup>50</sup> Ifi deu yeri yoac imocac obohooc.

<sup>51</sup> Nga ye nonggomama yerigoc dzigenema Nadzarete taonnu kemma imohai enacngira tofohoma kefec. Nga nonggeango faka sasawa fingerec, imoc negen negengau faiu feec. <sup>52</sup> Nga Yesungo negen negeng nga kifayaac arennu yadiseri anu Anutu nga ngic yeni yenhafoc hendzidziegoc.

### 3

<sup>1</sup> Ngictau Sisa Tiberiongo kifa 15 tatau bic tackefec. Nga Pontio Piratongo Yudaia bangecac gawana kefec. Kecmanu Herodengo Garirai bangecac gareng anec nga munea Firipongo Ituraira nga Trakoniti bangecac gareng anec amma Risaningo Abireneac gareng, ifingoc kecgoc. <sup>2</sup> Ifi kecmagec Hannas nga Kaifa yereng womong garengtoa kefoc. Naso imohaingoc Dzekariaac medac Yohanengo bangec kisiu kefu Anutuac yoacngo yearu haec. <sup>3</sup> Yohanengo Yodang doku noboc noboc bangec fekende, imohai yerecgema ngicngac yofi dekperagiyemmeec, “Ngeni kopocsicngina kpac anudeac ubangina dzigeneu mitidoku nadzicbisia.” <sup>4</sup> Profete Yesaiango yoac imoc deec, yeac kibi u yofi oho ohoya fede,

“Bangec kisiu kpacpac mong yofi fingece, ‘Ngeni Kebuac sing wisima singa heitumegec. <sup>5</sup> Yeni kperemeng sasawa semegecde nga tikifagang sasawa imoc heitumegecde amma sing gbaring gbaring mengeregec dindingac anude nga sing kopocsiragoc heisorongaigec <sup>6</sup> Anutungo ngicngac manganaunac mesinunuude, imoc ngiha ngihango hendagecde.’” (Yesaiac 40:3-5)

<sup>7</sup> Ifi anu ngicngac homacngo Yohanearu kenggec. Kemma doku nadzicyemmeudeac edegec Yohanengo yofi edeyunuec, “Boidzocac gboricfora, Anutuarunac turunga habeso ande, ngeni imohacnac woragecdeac sing fede, merang goroyoac imoc edengunuec? <sup>8</sup> Imocac ngeni doku nadzicma ubamerenggac siricfu fora meficgebisia. Nga ngeni yofinenggac ngenanggac yofi mi negengemebisia, ‘Abraham ye bangecnina.’ Anutungo hoc yomoc yenearu faka me u yenearunac Abrahamgac bangecfora naric fingegecde.\* <sup>9</sup> Naka ye bic ic haniau tacdeac ic goa fora gombunga mi angecde, imoc sasawa heiu kpeu gerecfu ukuyunuude.”

<sup>10</sup> Ifi deu ngicngac yeneng kpesimigec, “Ifi anu neni dafi annide?” <sup>11</sup> Ifi degec yofi merengyemmeec, “Ngic mongngo ngakpia yohockang mekecde, ye mong hesima ngakpia kpac kecde, ye meficgebese. Nga nenesemengagoc kecde, yeng faka imocngoc ambeso.” <sup>12</sup> Nga takesimeme goa yeneng ifingoc hama doku nadzicyemmeudeac hama degec, “Kpoukpou, neni dafi annide?” <sup>13</sup> Ifi degec Yohanengo edeyunuec, “Ngeni hiedzo megecdeac dengemmegec, imoc mi ferahema sirihausac mebisia.” <sup>14</sup> Nga wasaingic goa yeneng ifingoc kpesimigec, “Anu neni dafi annide?” Ifi degec deec, “Ngeni godzufaka me

\* **3:8:** Abrahanggac bangecfora sasawango kekecseri megecde, israengic yeneng ifi negensinggegec.

ikocfu amma degbedicfu monggarunac hiedzo mi mebisia. Ngeni uanginaac bummekecdae, hiedzo imocsac fengemmebeso.”

<sup>15</sup> Anu ngicngac yenì Messiaac tomài kecgecac amma ubaherenginau negenggec, “Yohane yenoc Messia gedang.” <sup>16</sup> Ifi negenggecac Yohanengo yofi merengyemmeec, “Ni doku nadzicngemmeduae nga ngic ngadenau hade, yeng ine Tiri Asu nga geregcoc nadzicngemmeude. Nga yeac kucngo neac kuc ferahade, ni ifiango yeac hanitabea witiha yungecba naric mi ngereeude. <sup>17</sup> Ye meic meicke saraha mariaù mehama wit seuhagoc meic meicke sobengau feu, imoc fima seuha meickema fora mekpedzuc amma ameau faiude. Faima seuha wanggema gerec piscic piscickea kpac, imohai ukuu dzeude.” <sup>18</sup> Yohanengo yoac siriha homac dema ngicngac dederecge ayemmema siduc gombang edeyunukefec.

<sup>19</sup> Anu ngictau Herodengo ine muneaac ngac kpara Herodia hamangec mema faka mangana goa homac angkefecac Yohanengo faka mangana imocac nonoyoac ededarec. <sup>20</sup> Edeu Herodengo yoara negemma monggoc Yohaneac ngaba amma witicamau faiec.

<sup>21</sup> Ngicngac sasawango mitidoku nadzicmagec Yesungo ifingoc mitidoku nadzirec. Nadzicma numuma nammanu kurumeng anggeu <sup>22</sup> Tiri Asungo kebesacac sirc amma yearu maec. Mau kurumennunac enacudumeng mong yofi fingerec, “Ge songomedacna, ni gungungo anggengkecduae.”

<sup>23</sup> Yesungo kifaya 30 ammanu uaya hanaheec. Nga ngicngac yeneng yofi negenggec, ye Yosefeac medac. Nga Yosefe ye Heriac medac <sup>24</sup> nga Heri ye Matataac medac. Matata ye Rewiac medac nga Rewi ye Merikiac medac. Meriki ye Yanaiac medac nga Yanai ye Yosefeac medac. <sup>25</sup> Yosefe ye Matataac medac nga Matatia ye Amosiac medac. Amosi ye Nahunggac medac nga Nahung ye Esiriac medac. Esiri ye Nagaiac medac <sup>26</sup> nga Nagai ye Mahataac medac. Mahata ye Matataac medac nga Matatia ye Semeinggac medac. Semeing ye Yosekeac medac nga Yoseke ye Yudaac medac.

<sup>27</sup> Yuda ye Yohananggac medac nga Yohanang ye Resaac medac. Resa ye Dzorobabeac medac nga Dzorobabe ye Saratiereac medac. Saratiere ye Neriac medac <sup>28</sup> nga Neri ye Merikiac medac. Meriki ye Adiac medac nga Adi ye Kosanggac medac. Kosang ye Erimadanggac medac nga Erimadang ye Erieac medac. <sup>29</sup> Eri ye Yesouac medac nga Yesou ye Eriedzeac medac. Eriedze ye Yoringgac medac nga Yoring ye Matataac medac. Matata ye Rewiac medac <sup>30</sup> nga Rewi ye Simeonggac medac. Simeong ye Yudaac medac nga Yuda ye Yosefeac medac. Yosefe ye Yonanggac medac nga Yonang ye Eriakinggac medac.

<sup>31</sup> Eriaking ye Mereaac medac nga Merea ye Menaac medac. Mena ye Matataac medac nga Matata ye Natanggac medac. Natang ye Dawidiac medac <sup>32</sup> nga Dawidi ye Isaiac medac. Isai ye Obedeac medac nga Obede ye Boasiac medac. Boasi ye Saraac medac nga Sara ye Nasonggac medac. <sup>33</sup> Nasong ye Aminadaac medac nga Aminada ye Adaminggac medac. Adaming ye Araniac medac nga Arani ye Hesoronggac medac. Hesorong ye Pereseac medac nga Perese ye Yudaac medac. <sup>34</sup> Yuda ye Yakoboac medac nga Yakobo ye Isakaac medac. Isaka ye Abrahanggac medac nga Abraham ye Taraac medac. Tara ye Nahoreac medac <sup>35</sup> nga Nahore ye Seruguac medac. Serugu ye Ragauac medac nga Ragau ye Peregeac medac. Perege ye Ebereac medac nga Ebere ye Seraac medac.

<sup>36</sup> Sera ye Kenanggac medac nga Kenang ye Arapakisaac medac. Arapakisa ye Senggac medac nga Seng ye Noaac medac. Noa ye Rametac medac,

<sup>37</sup> nga Ramec ye Metuseraac medac. Metusera ye Enokoac medac nga Enoko ye Yaredeac medac. Yarede ye Maharareac medac nga Maharare ye Kenanggac medac. <sup>38</sup> Kenang ye Enosiac medac nga Enosi ye Seteac medac. Setengo Adanggac medac nga Adang yeng ine Anutuac medac.

#### 4

<sup>1</sup> Anu Tiri Asungo Yesu mewakeu Yodang dokuunac dzigene eremanu yeng bangec kisiu wangeru kenoc. <sup>2</sup> Yesungo ihai kemma kecmanu uameme 40ac manau mangana minginango ye tobanggeec. Tobanggeemanu imohai Yesungo yakaya kpac kecmanu uameme 40 wisickeu hereaac homeec. <sup>3</sup> Hereaac homema kecmanu mangana minginango edeec, “Ge Anutuac medac kecnecfu hoc yomoc dena imoc ic sogong anu.” <sup>4</sup> Ifi deu Yesungo meremmiec, “Yoac yofi oho ohoya fede, ‘Ngicngo ic sogonggacsac mi kefude, kpac.’ ” *(Dedeseri 8:3)*

<sup>5</sup> Ifi deu yeng Yesu bangecbuma monnu wangec enu piratac isoc fingeru bangeha bangeha gawamangninganog edzahema <sup>6</sup> deec, “Bangeha bangeha yomoc kibikperagia nga imoc garenggebadeac kuc bic nenggec. Nga ni imoc ngic mong me mong mibadeac kuc fenende. <sup>7</sup> Imocac ge eweheinennadeu ni imoc sasawa waba geac andarude.” <sup>8</sup> Ifi deu Yesungo yofi meremmiec, “Yoac yofi oho ohoya fede, ‘Ge Kebu Anutuga mocgu eweheimima kingang kpemibesena.’ ” *(Dedeseri 6:13)*

<sup>9</sup> Ifi deu yeng Yesu monggoc wangecma Yerusarennu kemma Anutuac womong imocac oda herea wi yombong nande, imocac bumau faiu nanu edeec, “Ge Anutuac Medac fora kecnecfu geanggaoc yomohacnac yuma kemena. <sup>10</sup> Yoac yofi oho ohoya fede, ‘Ye angerofora uayoac yemmeu yeneng ge sing sasawa kengkecnec, imohai garenggecede.’ ”

<sup>11</sup> amma  
‘Ge haniga hocngo heibacac yeneng maringina witiau faiguma sesehegugecede.’ ” *(Mitiyegec 91:1,12)*

<sup>12</sup> Ifi deu Yesungo deec, “Yoac yofi dedea fede, ‘Ge Kebu Anutuga faitobannu mi faibesena.’ ” *(Dedeseri 6:16)*

<sup>13</sup> Ifi deu mangana minginango faitobang ammidaru wisickeu wama kemma naso monggac tomal kefec.

<sup>14</sup> Anu Tiri Asungo Yesuaru wakema feu ye Gariraia bangecfu monggoc dzigeneu bangec fekende, imocac ngicngac sasawango siduha negendacgec. <sup>15</sup> Nga yeng kpekpeturang amanginau emma kpouyemmeu ngicngac sasawango dengeregec.

<sup>16</sup> Anu Yesungo yadi yadibangeha Nadzarete, imohai kemma kpekpeturang amau engande, faka imoc modacma ihai enec. Emma mitikibi osoudeac nanu <sup>17</sup> yeni profete Yesaiaac kibi kpou kpouya migec ye imoc yungecma kibiyo yoac yofi feec, imoc meficgeec.

<sup>18</sup> “Kebuc Asungo nigoc kecede nga neng ngicngac makpekpea siduc gombung edeyunubadeac Kebungo dzimbonga nadzicnenec. Ngic witicfu kecdae, yeni witicngina kpac anude nga kicpisingo kicfifi anggecede, imoc edeyunubadeac yeng suenuc. Senuu hama ebicgoc kecdae, yeni ebicngina meickema wangecyunubade. <sup>19</sup> Nga Kebuarunac naso gombunga hangemmeude, imoc ifingoc dekperagibade.”

(Yesaia 61:1-2)

<sup>20</sup> Yesungo kibi imoc monggoc kpouma kibigareng miec. Mima mataru kpekpeturang amau ngicngac tacgec, yeni kicngina yearu sasawa fidagec. <sup>21</sup> Figece yeng yofi edeyunuec, “Yoac mitikibiu osoba negendau, imocac fora yaguc hafoangoc fingecongmede.” <sup>22</sup> Nga yeac enacfunac yoac dedea imocngo wosoefac nga kuhagoc anecac ngicngac sasawango yeac negenggec naric anu keretegec amma yeac kpesiemegec, “Ngic yomoc ye Yosefeac medacngo ifi dede.”

<sup>23</sup> Ifi degce Yesungo yofi edeyunuec, “‘Dota, ge geanggaoc mengereemena.’ Yoac heihei imoc fede nga ngeni imoc bic edenubeso andae. Amma monggoc yofi, ‘Ge Kafanaung taonnu ua mena siducga negengandimbe, imoc yei bangecgau ifingoc mena henni.’” <sup>24</sup> Dema monggoc torokpema deec, “Foracngoc, profete mong ye yengena bangecfu kenu ngicngac yeneng naric mi hoanggegede, imoc edengunuduae. <sup>25</sup> Eria bic kefec, naso imohai Israe bangecfu ngac hodzec homacngo kefec. Kecmagec kurumeng nagu heiu kia mi kpeec, kifa harebec nga afo 6 bangec imohai boditoea fingerec. <sup>26</sup> Fingeru Anutungo Eria sueu Israe ngac yenearu mong mi kenec. Nga ye Sidong bangecac Sarepac taonnu ngac hodzec mong kefec, yearu suec. <sup>27</sup> Nga profete Erisango Israe bangecfu kefec, naso imohai ngicngac homacngo kukuserigoc kefec, yenearunac mongngo mi ngereec, kpac. Nga Siria bangecfunac ngic mong kpapa Naimang, yengsac ine ngereec.”

<sup>28</sup> Ifi deu ngicngac sasawa kpekpeturang amau tacgec, yeni imoc negemma herengina buu <sup>29</sup> yacma Yesu igockema meickema taong ngadeau kemegec. Kemema taongngina tikiu tarec ihai hofe mong nanec, imohai kemma ukugec kemeudeac negemma wangepema kenggec. <sup>30</sup> Kenggec, yeng ine ngicngac botucnginau nedereyunuma kenec.

<sup>31</sup> Yesungo Gariraia bangecac taong mong kpapa Kafanaung, ihai kemema sabata nasou ngicngac Anutuac yoac kpouyemmeece. <sup>32</sup> Nga yeac kpoukpoungoc ngicngac uakibi mekecdae, yeneac siricfu kuhagoc yombong ngicngac yeneng imoc negenggec engena anec. <sup>33</sup> Amma kpekpeturang amau ngic mong yafing seuhagoc kefec, yeng yoac kuhagoc kpacma deec, <sup>34</sup> “Ah, Yesu Nadzaretanac, neneac wiac imoc geac mi ande. Ge memanganenunadeac hanec me? Gensiduaenoc, ge Anutuac kpetiac ngic.” <sup>35</sup> Ifi deu Yesungo yafing yoac seria ammima yofi edeac, “Ge waickema ngicfunac erema kenna!” Ifi deu yafing ye ngic kpefaheu botucnginau makpeu yearunac erema kenec. Nga ye ngic imoc mong mi memanganeece. <sup>36</sup> Ngicngac sasawango imoc hemma keretegec amma denegeng amma degce, “Ye noc yoac mekecde? Ngic yomoc ye kuc mimia nga kuhagoc yombong, yeng asu seuhagoc edeyunuu erema kendae.” <sup>37</sup> Ifi fingeru Yesuac siducngo bangec imocac tegia noboc noboc amasoc kendaru negenggec.

<sup>38</sup> Yesungo kpekpeturang ama wama Simonggac amau kenec. Nga Simong sefena sebigerectoac ammiu feu Yesungo sefena mengereudeac edegec. <sup>39</sup> Edegec Yesungo namma ngac feu hemma sebigerec yoac seria edema kpetarimiu sebigerecngo ngac wama meickec. Meickeu ngac ye naso imohaingoc yacma yenengareng anec. <sup>40</sup> Anu wenackiwa keme kemeac ngicngac sasawango ogofocngina hafei hania hania ayemmeec, yeni meyunuma Yesuaru hagec. Hagec Yesungo ngicngac hafeingingoc sasawa maria witinginau faima mengereyunudarec. <sup>41</sup> Mengereyunuu yafing nga



hadehade ifingoc ngicngac homac yenearunac erema yofi kpacgec, “Ge Anutuac Medac.” Nga ye Messia, imoc negenggecac yeneng yoac imoc mi degecdeac deracyunuec.

<sup>42</sup> Wereckengau Yesungo taong wama bangec botuc mong ngiha kpacfu kenu ngicngac yeneng ye hofocgec. Hofocma meficgema yeng yenigoc kefudeac negemma ye monnu mi kembeso degec. <sup>43</sup> Ifi degec ine edeyunuec, “Taong goa fekendae, ni imohai ifingoc kemma Anutuac eucererenggac siduc gombang dekperagiyemmesare. Anutungo imocacnoc suenuc.” <sup>44</sup> Ifi dema Yudaia bangecfu kpekpeturang amangina fekenec, imohai Anutuac yoac dekpou ayemmema kefec.

## 5

<sup>1</sup> Naso monnu Yesungo Genesarete dzohong tegiau nammanu ngicngac yeneng Anutuac yoac negenggecdeac hama igocemema oronggecec botucnginau nanec. <sup>2</sup> Namma kic fima henu gomba yohockang dzohong tegiau taroc. Nga kondungyang memengic yeneng gombangina faigec taru uficngina dzuacma nanggec. <sup>3</sup> Nanggec Yesungo gomba mong, Simonggac gomba, imohai emma tacma Simong edeu yeng gomba kapianec kpesiu dzohonnu kenu ngicngac edekpou ayemmeec.

<sup>4</sup> Wisickeu Simong yofi edeec, “Kondungyang mebesonga dzohonnu doku keme kemea fede, ngeni ihai kemma uficngina ukuma kondungyang megec.” <sup>5</sup> Ifi deu Simongngoc meremmiec, “Kunenna, neni tofocnac yomohai hafoanoc uatoa mema kondungyang mong mi meding nga geng denecac ine kemma ufic ukubade.” <sup>6</sup> Ifi deu yeni uficngina ihai ukuma kondungyang homac yombong megecac uficngina wakema barackebesonga anec. <sup>7</sup> Ifi anu yeni ogofocngina gomba monnu tacgec, yeni marikarac heiyemmegec hama meficyunugec. Meficyunuma kondungyang gomba yohockang mewakegecac gomba yereng kondunnu kemebesonga anoc.

<sup>8</sup> Simong Potorongo faka imoc hemma Yesuac haniu makpema fafoc heimima deec, “Kebu, ni ngic kopocsinagoc anduaeac wanuma kenna.” <sup>9</sup> Simong nga ngic yegoc kecdacgec, yeneng kondungyang homac yombong megecac amma kerectegec anggecac ifi deec. <sup>10</sup> Nga Sebedaioc medahora, Yakobo nga Yohane, yeri Simonggoc kondungyang mema kecma ifingoc imoc hemma negeneac wiac engena yombong anec. Nga Yesungo Simong edeec, “Ge mi kengecguu. Ge kondungyang meme nga yaguc ngicmeme annade.” <sup>11</sup> Ifi deu yeni gombangina mema tegiau faima wiac sasawa wama Yesu modacgec.

<sup>12</sup> Anu Yesungo taong monnu kecmanu ngic mong kukuseringo sebiam samedaru manganeyombonggeec, yeng ihai kecma Yesu hemma makpema kiwa bangecfu hetutuckema kpacsambic ammima deec, “Kebu, ge negenna naric anu medzuacnubang.” <sup>13</sup> Ifi deu Yesungo maria sinema kpeserema deec, “Ge ngereenadeac songona fede.” Ifi deu imohaingoc kukuseringo ngic imoc waec. <sup>14</sup> Wau Yesungo derahema deec, “Sebigau faka fingeccac, imocac ngic mong mi edebesena. Ge womong gareng yearu kemma sebiga edzahena. Amma Mosengo seseac deec, imocac sirihau sese faina ngicngac yeneng sesega imoc hemma negentegecgecde.” <sup>15</sup> Nga Yesuac siduc, imoc ine kuneng yombong yadima kenu ngicngac habutoa homac yeneng yeac yoac negenggecde nga yeng hafeingina mengereudeac hagec. <sup>16</sup> Ifi anggec Yesungo naso homac kpercge tegecma bangec goa ngiha kpacfu kemma numukefec.

<sup>17</sup> Kecma naso monnu Yesungo Anutuac yoac edekpou ayemmemanu fari-saio nga dedeseriyoacac kpoukpoungic goa Gariraiia nga Yudaia amabisis sasawa amma Yerusarennac hama tacgec. Nga hafei mengec mengereac kuc Kebuarunac, imocngo Yesuaru feec.

<sup>18</sup> Ifi femanu ngic goango hama ngic mong hanimaria homemea dzakeu faima tofohoma ama manau Yesuac kicfu faigecdeac negemma mekenggec. <sup>19</sup> Mekenggec ngicngac homacngo hedzickema nangeccac yeni Yesuac kicfu faigecdeac sing hofocma ngic imoc amabubuyau tofoho emma ama bubuya hesarima ihacsing ngic botucnginau Yesuac hoannu dzakeagoc faigec kemec. <sup>20</sup> Kemeu Yesungo negen negensingngina hemma yofi deec, "Ngic, kopocsicga imoc bic wawaya."

<sup>21</sup> Ifi deu mitiac negen negengngic nga farisaio yeni yenaocngoc yofi negenggec, "Ngic imoc noc ngicngo Anutu emmide? Anutu mocgungo kopocsic naric waude." <sup>22</sup> Ifi negenggec Yesungo wiac ubanginau negensigec, imoc hemma yofi edeyunuec, "Ngeni nocac ubanginau ifi negensidae? <sup>23</sup> Yoac damocngo deni efea ande, 'Kopocsicga kpac ande.' me yofi, 'Ge yacma kenna.'" <sup>24</sup> Ngicac Medac ye bangecfu kopocsic wawaac uayoac nga kuc femide, ngeni imoc negenggecdeac amma yofi deba." Ye ifi dema ngic puringgae yofi deec, "Ni edeguduae, ge yacma dzakega mema amagau kenna."

<sup>25</sup> Ifi deu yeng imohaingoc ngicngac sasawa yeneac kicfu yacma fefea feande, imoc mema Anutu dengerema ameau kenec. <sup>26</sup> Kenu ngicngac sasawango homac yombong kpidohoma kerectegec amma Anutu dengeredacgec. Nga kengecngo mewakeyunuu degec, "Neni faka morora mi hengennina yaguc kicinango hending."

<sup>27</sup> Anu Yesungo imohacnac mama kemma takesimeme ngic mong kpara Rewi, ye takesimeme amau tacmanu hemma yofi edeec, "Ge hama ni modacnuna." <sup>28</sup> Ifi deu Rewingo yacma wiac sasawa wadacma Yesu modarec. <sup>29</sup> Nga Rewi ye Yesuac amma ameau yaka kuneng ohou takesimeme nga ngicngac homacngo yenigoc tacma yaka negec. <sup>30</sup> Ifi anggec farisaio nga miti negen negengngicfocngina yeneng negenggec naric mi anu Yesu medacfora yeneac yoackpekpengina kpema degec, "Ngeni nocac takesimeme nga manganameme yenigoc nenedoku nedae?" <sup>31</sup> Ifi degec Yesungo yofi merengyemmec, "Ngicngac sebingina hafeia kpac kecandae, yeni dotaac mi ayemmekecde. Hafeingagoc, yeneng ine dotaac ayemmekecde. <sup>32</sup> Ni ngicngac dindingac kpacyunubadeac mi mayai, kpac. Ni ine manganameme yeni ubangina merenggecdeac kpacyunubesonga mayai."

<sup>33</sup> Ngicngac goa yeneng Yesu kpesimigec, "Yohaneac medacfora nga fari-saio yeneac medacfocngina yeni naso homac yakasege kecma nunumu ua meandae. Nga geac medacfocga yeneng ine nenedoku nekecdae."

<sup>34</sup> Ifi degec Yesungo yofi merengyemmec, "Memeturang ngicngo ogofora yenigoc kecma yakasege anggecdeac naric mi deude. <sup>35</sup> Kecma naso monnu memeturangngac ngic yenearunac meickegecde, naso imohai ine yakasege anggecde."

<sup>36</sup> Yesungo torokpema yoac mong heima yofi edeyunuec, "Mongngo kporuc gboriaunac sintaha herecgema mema eseau naric mi faima kpebiude. Ifi anudeu kporuc gboria manganeude amma gboria nga esea kpeturangyuruu siriha naric mi fingerude. <sup>37</sup> Nga ngic mongngo waing gboria bokong yangseberango memea eseau naric mi kpeu kemeude, kpac. Ifi anudeu waing gboriango bokong esea imoc tindziru manganeu dokuya

maude. <sup>38</sup> Imocac waing gboriango bokong gboriau kpeni kemeu naric ande. <sup>39</sup> Amma ngic mongngo waing esea bic neec, yeng waing gboria neudeac songo naric mi negenude, kpac. Ye yofisac deude, 'Waing esea imoc gombunga yombong.'

## 6

<sup>1</sup> Yesungo sabata naso monnu wit uausing kemmanu medacfora yeneng wit fora merecgema sebera kpetima asasaHEMA negec <sup>2</sup> farisaio goango yenemma kpesiyemmegec, "Ngeni sabata nasou faka mi angana imoc nocac andae?" <sup>3</sup> Kpesiyemmegec Yesungo yofi merengyemmeec, "Dawidingo uamedacforagoc herenginaac homema faka anggec, ngeni imoc mi osonegeng angandae gedang. <sup>4</sup> Ye Anutuac womonnu emma ic sogong Anutuac sese faifaia, imoc mema yengena nema uamedacfora ifingoc yemmeec. Nga ic sogong imoc womong gareng yenengsac naric neandae, ngictehec yeneng kpac." *(1 Samue 21:1-6)* <sup>5</sup> Ifi dema yofi edeyunuec, "Ngicac Medac ye sabataac Kebu."

<sup>6</sup> Sabata naso monggac Yesungo kpeketurang amau emma Anutuac yoac kpouyemmeec, imohai ngic mong marifoia homemeango yenigoc tarec. <sup>7</sup> Nga Yesungo sabata nasou hafeigoc memengerecua mong meu yeni haniaya mong meficgema yoacfu faigecdeac miti negen negengngic nga farisaio, yeni garemmema nanggec. <sup>8</sup> Yesungo ine negen negengngina hemma ngic yeac yofi deec, "Ge yacma erahama botucninau nanna." Ifi deu ngic ye yacma ekemma botucninau nammanu <sup>9</sup> Yesungo yofi edeyunuec, "Wiac mong kpesingemmeba, sabatanasou damocngo angana ande? Faka gombunga me faka mangana ayemmebesonga amma homebeso andae, agengngina tigeceac dede me goa memanganeyununideac dede?" <sup>10</sup> Ye ifi dema kiwa fikengfiha amma yenendacma ngic yeac deec, "Mariga sinena." Ifi deu ngic ye maria sineu maria ngereeu <sup>11</sup> yeni herebutoa yombong negemma yenaocngoc Yesu dafi ammigeceac denegeng anggec.

<sup>12</sup> Yesungo naso imohai numuudeac tikiu emma tofocnac hafoa Anutu numumima kecmanu <sup>13</sup> ama wereckenu medac kpacyunuu kengec medac 12 meisingyunuma aposoro kpac imoc yemmeec. Nga aposoro yeneac kpacngina yofi: <sup>14</sup> Simonggac kpara mong Peto kparec nga yeac munea Anderea, Yakobo nga Yohane, Firipo nga Batoromaio. <sup>15</sup> Mataio nga Toma amma Arifaioac medac Yakobo nga Simong, yeac kpara mong Dzerote. <sup>16</sup> Amma Yuda, Yakoboac medac nga Yuda Karioto taonnunac, yeng kecma Yesu kerereu megec.

<sup>17</sup> Anu Yesungo tikiunac medacfora 12 yenigoc mama bangec tumia monnu medacfora homac yenigoc nanec. Nanu ngicngac habu kunengngo Yudaia bangec noboc noboc nga Yerusarennac amma Tiro nga Sidonggac kondunnu amabangec fekende, imohacnacngo hagec. <sup>18</sup> Hama Yesuac yoac negenggecde nga yeng hafeingina mengereudeac hagec. Amma ngicngac asu seuhagoc hama yengeng ifingoc ngeregec. <sup>19</sup> Nga kucngo yearunac yenearu kemma ngicngac sasawa mengereyunuecac yeni sasawango ye kpeseregecdeac negenggec.

<sup>20</sup> Ifi anggec Yesungo kiwa medacfora yenearu fima deec, "Ngicngac wanac kecdae, ngeni kenecnginagoc, nocac Anutuac eucerereng imocnoc ngeneac. <sup>21</sup> Nga ngicngac yaguc herenginaac homedae, ngeni kenecnginagoc, ngeni yaka nema gebeccngunuude. Amma kiac ubahodunggoc yaguc kecdae, ngeneng kenecnginagoc, ngenennoc kecma dzomoregecde. <sup>22</sup> Nga

ngicngac yeneng Ngicac Medacac amma ngeni ubango ukungunuma demanganengunuma ngadeau faingunuma kpac mangana kpacngunugecde, imoc ngeni kenecnginagoc. <sup>23</sup> Ngeni naso deduaemoc, imohai ubangerec negemma yuengyuma amma sogaibisia, nocac kurumennu bungngina kuneng tomaingina fede. Nga ngic yeneac bangefcnginango warac profete faka imocngoc profete ayemmegec.

<sup>24</sup> Ngicngac dzofinacgoc kecdae, ngeni sowecnginagoc, nocac ngeni wiacngina songeagoc hafoa bic megec wisickeec. <sup>25</sup> Nga ngicngac semeng negebec yaguc angkecdae, ngeni sowecnginagoc. Ngeni kecma herenginaac homegecde. Nga yaguc dzomocgoc kecdae, ngeni sowecnginagoc. Ngeni kecma ubamangang negemma kiacgecde. <sup>26</sup> Amma ngicngacngo dengerengunukecdae, ngeneac deduae, ngeni sowecnginagoc, nocac yeneac bangefcnginango warac profete ikoha ifingoc dengereyunukegcec.

<sup>27</sup> Ngicngac yoacnaac kedzac kpeandae, ngeni ine yofi edengunuduae, ngeni ngabafocngina heresongogoc hoangyunubisia amma ngic ubango ukungunuandae, yeni faka gombunga ayemmebisia. <sup>28</sup> Nga ngic sowe-cyoac edengunuandae, ngeni yeni kenecyunubisia amma memanganengunuandae, ngeni yeneac numubisia. <sup>29</sup> Nga ngic mongngo munggungga noboc kpeudeu ge munggungga noboha ifingoc wamibesena nga mongngo ngakpiga witiau meudeu ngakpiga mana ifingoc wana mebeso. <sup>30</sup> Nga ngic yeneng gearunac wiac monggac derecgeandae, ge wiac imoc yemmebesena amma mongngo geangga wiac wangecguu monggoc meremma genudeac mi hatahemibesena.

<sup>31</sup> Ngic yeneng noc faka angemmegecdeac negensiandae, ngeni faka siriha imocngoc ayemmebisia. <sup>32</sup> Nga ngic goa yeneng ngeneac songo negenggec ngeneng yeneac songo negenggecdeu ngeneac ubangerecyoac homac mi debesonga. Kopocsicmeme ngic yeneng ifingoc ngic damoc yeneac songo negengandae, yeneac songo negenggecde. <sup>33</sup> Nga ngicngac goa faka gombunga angemmekecgec ngeni faka gombunga ayemmegecdeu ngeneac ubangerecyoac homac mi debesonga. Kopocsicmeme ngic yeni imoc ifingoc angandae. <sup>34</sup> Anu ngic ngenearu turung anggec ngeni turunga ifiangoc kpoungemmegecdeac negensigecdeu ngeneac ubangerecyoac homac mi debesonga. Ngic kopocsicnginagoc yeni ifingoc manganameme ogofocngina wiacngina turungagoc yemmeandae. <sup>35</sup> Anu ngeni ine ngabafocngina heregoc yeneac songo negemma faka gombunga ayemmebisia. Amma ngeni turungngina wagec yenearu febeso nga kpougecdeac mi negembisia. Ngeni ifi anggecdeu faka gombungaac bungngina kuneng feude nga ngeneng Mangngina Anutu Engenatoa yeac nambarcfora anggecde. Yeng ngicngac ihoc bahoha nga kichodungnginagoc nga ngic mangana faka gombunga ayemmeude.

<sup>36</sup> Mangnginango ngicngac wosoefac ayemmekecde, ngeneng ifi isocngoc wosoefac ayemmebisia.”

<sup>37</sup> “Ge ngicngac mi demanganeyunubesena, yoac imoc modacnadeu ngic yeneng ifingoc mi demanganegugecde. Amma ge ngicngac mi isingyununa nga mi desiyunubesena, yoac imoc modacnadeu ngic yeneng ifingoc mi isinggugecde nga mi desigugecde. Nga ngicngac kopocsicngina wana. Ifi anna yeni ifingoc geac kopocsic wagecde. <sup>38</sup> Ngeni wiacngina ngicngac naric yemmebisia, ifi anggecdeu, Kebungo wiacngina turunggeu kemeu kpemindzaiude. Amma monggoc kpaheu wakema kpetinggeu noboha

tabunginau mau megecde. Nocac ngeni wiac kpetengina isinggema ngicngac yemmeandae, kpete siriha ifiangoc yeni isinggema turung kpoungem-gecde.”

<sup>39</sup> Yesungo monggoc yocac heima yofi edeyunuec, “Ngic kicpisis monggo kicpisis ogea mong naric mi wangerude, yeri ifi amma yerahafoc tennu kemeece. <sup>40</sup> Nga negen negengmeme medac monggo kpoukpouyaac engena mi anude. Kpoukpoungoc medacfora hafoangoc kpouyemmedaru wisickeu yeni yeac siric andacgecde. <sup>41</sup> Anu ge tosogaac kicfu gocbisic mong tacdemoc, imoc hemma geangga kicfu ic kebanga fede, imoc ine mi negensiannec, faka imoc naric mi ande. <sup>42</sup> Ifi amma ogogaac yofi mi debesena, ‘Toso, ge negemmana kicgau gocbisic tacde, imoc meickebadeac negenduae.’ Ikoncngic, geangga kicfu ic kebanga kuneng fede mi hemma imoc naric mi annade. Ge geangga kicfunac ic kebanga meickemaguc ogogaac kicfu gocbisic tacde, imoc hentegecma naric meickenade.

<sup>43</sup> Ic mong gombungau fora mangana naric mi fingerude nga ic manganau fora gombunga naric mi fingerude. <sup>44</sup> Ic sasawa yeni foranginango hani-angina mekperagigecde. Ge witic waeyagoc, imohacnac fig icac fora naric mi mesinade nga waingac fora imoc fareng nga gberafecfunac naric mi mesinade. <sup>45</sup> Wiac gombunga ngic gombungac ubatohong gombungaunac ereude. Nga ngic mangana yeac tohong manganaunac wiac mangana ereude. Wiac ngic ubahereau wakema fede, enarango imocnoc dekperagiude.

<sup>46</sup> Ngeni nocac Kebuna Kebuna kpacnuandae nga yoacna wama mi modacnugecde? <sup>47</sup> Ngic mong ye hama yoacna negemma imoc modacma uaya ifingoc meudeu, ye ngic dafia, imoc edzacngunubade. <sup>48</sup> Ngic mong ye ama meudeac dema bangec usuu peperandzi fingeru imocac witiau wotunga ukuu kemeece, ngic imoc ye isoc. Ye ama seria meecac kia tunggbaungtoango hama ama imoc memanganuendeacsoc mi anec. <sup>49</sup> Nga ngicngac goa yoacna negemma uaya mi meandae, yeni ngic mong ye ama meudeac dema wotunga bangec pereckeau ukuu kemeude, ye isoc. Kia kpeu doku yadima ama imoc kpeu ama imocngo bic barackema mama kpedzamedarec.”

## 7

<sup>1</sup> Yesungo yocac imoc sasawa ngicngac edeyunudaru negenggec wisickeu Kafanaung taonnu kenec. <sup>2</sup> Kemma ihai wasai gareng monggac wanacngic ye homebesonga amma feec. Amma ye ngic gombungango mingina yeac ewea heimiande.\*

<sup>3-4</sup> Nga wasai garenggo Yesuac siduc negemma yudangic enarafocngina goa Yesuaru sueyunuu kemma ngombonggema degec, “Ge wasai garenggac wanacngic mong mengerenadeac hana. Wasai gareng ye ngic gombunga, ye naric meficgena. <sup>5</sup> Ye israengic nenanggac songea negengande nga yeng kiwa amma kpekpeturang amanina meec.”

<sup>6-7</sup> Edegec Yesungo yenigoc kemma ama mewegenemanu wasai garenggo ogofora goa sueyunuu yofi edegecdeac kenggec, “Kunenna, nasoga homac mi wana. Ge noc gombunnaac amawarocnau erenade, ni ifiango gearu naric mi habade, imocac ge ihai namma yocac dena medacna ngereeu. <sup>8</sup> Imoc yofi, ni ifingoc ngic kucnginagoc yeneac bageu kecbadeac

\* **7:2:** Wasai gareng yomoc yeac bageau wasaingic 100 isoc kecgec. Wasaingic garengnginagoc yeni israengic kpac, yeni bangec monnunac.

fainugec. Amma neac bageu wasaifocna kecandae. Nga monggac kenna deba kenude nga monggac hana deba haude. Amma wanacngicnaac yomoc mena deba meudenoc.”<sup>9</sup> Ifi deu Yesungo imoc negemma kerectegec amma dzigenema habu modacgec, yeni yofi edeyunuec, “Ni wiac mong edengunuba negenggec, Israe bangecfu negen negensingina kuhagoc yofia mong mi henai.”<sup>10</sup> Nga ngic sueyunuyunya, yeni garenggac amau dzigenema kemma henggec wanacngiha ye hafeia kpac anec.

<sup>11</sup> Anu Yesungo taong mong kpara Naing, ihai kenu medacfora nga ngicngac homacngo ye modacgec. <sup>12</sup> Kemma taongodaac nagutoayau ken-sikemanu ngic yeni medac mong homeec, yeac farenga tofohoma magec. Medac imoc ye ngac hodzec monggac medaha mocgusac anu ngicngac habu homacngo ye modacma taonnunac magec. <sup>13</sup> Ifi magec Kebungo ngac imoc hemma ubea manganeu deec, “Ge mi kiacna.” <sup>14</sup> Ifi dema kemma katapa imoc kpesereu ngic tofohogec, yeni wama nanggec Yesungo deec, “Medac, ni edeguduae, ge yacna.” <sup>15</sup> Ifi deu homemeango yacma yoac deec. Nga Yesungo medac imoc nonggea monggoc miec. <sup>16</sup> Nga ngicngac yeneng imoc hemma kpidohoma homac kengecyunuu Anutu dengerema degec, “Profete kuneng mongngo nenannu fincema kecde nga Anutungo ngicngacfora nenang yugucnunuma kecde.” <sup>17</sup> Siduc imocngo Yudaia bangecfu nga bangec goa nobohau tacdae, ihai kenu sasawango yoac imoc negenggec.

<sup>18-19</sup> Yohaneac medacfora yeneng kemma siduc imoc ammigece Yohanengo medahora yohockang kpacyuruu haec yeri Kebuaru kemma yofi dema kpesimiecdae sueyuruuec, “Hanemmeudeac dedea, imoc ge me neni ngic monggac tomal kecbisina?” <sup>20</sup> Ifi dema sueyuruu yeri Yesuaru kensikema yofi dema kpesimio, “Hanemmeudeac dedea, imoc ge me neni ngic monggac tomal kecbisina? Yohane dokunadzicngo imoc kpesigendedeac suenurude.” <sup>21</sup> Sueyuruuec, naso imohaingoc Yesungo ngicngac homac hafeinginagoc nga kucmama amma asu manganagoc mengereyunuec amma kicpisc homac mengereyunuu kicfifi anggec. <sup>22</sup> Nga ngihoc yereng ifi edeac Yesungo deec, “Ngeri kemma wiac hennengeng andaoc, imocac siduc Yohane ammibesera. Ngic kicpisc yeni kicfifi andae nga hanimangang yeni sing kendae amma kukuseringinagoc yeni sebingina ngereede. Nga kedzacfong yeni yoac negendae amma homemea, yeneng gboridae nga ngicngac makpekpea yeneng siduc gombung negendae. <sup>23</sup> Nga mongngo neac amma negemmangang mi angande, ye kenehagoc.”

<sup>24</sup> Anu Yohaneac medahora kemmaec Yesungo yeac yofi dema habu edeyunuec, “Ngeni bangec kisiu noc wiac henggecdae kenggec? Komba mong firangngo kpeu kockpac anu, imoc henggecdae kenggec me? <sup>25</sup> Imoc kpac anu noc wiac hembesonga kenggec? Ngic mong wambaya kibiagoc me? Negenggec, ngic wambangina kibia gombunga gombunga heiandae nga bangecac songotoagoc kecandae, yeni ngictau amau kecandae. <sup>26</sup> Ngeni profete mong hembesonga kenggec me? Yeng profete goa sasawa feracyunude, ifinoc deduae. <sup>27</sup> Yeacnoc yofi oho ohoya fede, ‘Negenec, ni enacdedena sueba yennoc waraigemma singga mengeregenude.’ (Marekai 3:1)

<sup>28</sup> Ni yofi deba negenggec, ngic ngacfunac fincegec, yeneurunac mongngo Yohane naric mi ferahaec. Anu Anutuac eucererenggac manau mamea,† yeng ine Yohaneac engena.”

† 7:28: Yesungo yengena negemma Anutuac eucererenggac manau mamea deec.

<sup>29</sup> Ngicngac sasawa nga takesimemengic momoc, yeni imoc negemma yofi negenggec, Anutu ye yoac fora nga dindingacac mingina, ifi dema Yohanearu kemma mitidoku nadzicgec. <sup>30</sup> Nga Farisaio amma dedeseriyoacac negen negengngic yeni ine Anutungo sing deyemmeec, imoc ngadehema Yohanearu mitidoku mong mi nadzicgec.

<sup>31</sup> Anu Yesungo yofi deec, “Ngicngac yofinenggac kecdac, ngenec fakangina yofi. <sup>32</sup> Ngeni nambarac sobenu takecdac isoc. Yeni tacma yenaocngoc yofi dema kpacemeandae, ‘Neni kungac fifini ngeni nocac yegec mi fededau nga ubahodung yegec heini nocac mi kiadac?’ <sup>33</sup> Yohane dokunadzicngo hama ic sogong nga waing mong mi neec, imohai ngeni yofi degec, ‘Ye yafingagoc.’ <sup>34</sup> Nga Ngicac Medac ye hama nenedoku neande, imohai yofi deandae, ‘Henggec, ye nenedoku efea mi nekecdac nga takesimeme nga manganameme yeneac tosongina.’ <sup>35</sup> Nga Anutuac negen negentengec imoc gombunga ande imocac nambaracfora yeneac fakanginau ireckeude.”

<sup>36</sup> Farisaio mong kpara Simong ye Yesugoc yaka neudeac ameau heitaiu yeac amau emma taroc. <sup>37</sup> Tarec manganamemengac mongngo taong imohai kefec, ye yoac yofi degec negenec, “Yesungo Simonggac amau tacde.” ifi degec negemma kirung mong arabastro hocngo memea kerecdokuyagoc homuna gombunga, imoc mekenec. <sup>38</sup> Mekemma Yesuac ngadeaugeng haniau namma kiaru kickumiango mama Yesuac hani heiu urucusiango imoc mekerenggema hania titikokoc ammima kerecdoku homuna gombunga imocngo hania nadzicmiec. <sup>39</sup> Nadzicmiu farisaio Yesu heitaiec, yeng imoc hemma yengenaocngoc yofi negenec, “Ngac hadac ye manganamemengac. Nga ngic yomocngo profete fora ambac dede ye dafiugeng kpeserema faka yomoc ande, imoc negemmibac.”

<sup>40</sup> Ifi negenu Yesungo yofi edeec, “Simong, ni yoac mong edegubeso negenduae.” ifi deu deec, “Oc, kpoukpou dena.” <sup>41</sup> Ifi deu yofi edeec, “Ngic yohockang yeri dzogareng mong yearunac turung anoc, mongngo 500 denari nga mongngo 50. <sup>42</sup> Amma yeri turung imoc kpoumiecdeac osima kefecac turungngira waec. Wau yerearunac damocngo dzogarenggac songo homac negenude?” <sup>43</sup> Kpesimiu Simongngo merenec, “Dzo homac wamiec yeng, ifi negenduae.” deu Yesungo deec, “Negenggosi amma yoac dindingac denec.”

<sup>44</sup> Anu yeng ngac yearu dzigenema Simong yofi edeec, “Ge ngac yomoc henna. Ni amagau ereba ge haninaac doku mong mi nendang, yeng ine kickumiango hanina dzuacma yengena orucusiango hanina mekerenggedac. <sup>45</sup> Nga amagau haba geng ubangerecac titikokoc mong mi anendang nga yeng hadua, imohacnacngoc haninau titikokoc anendac. <sup>46</sup> Nga geng orucna kerecdokungo mong mi nadzicnendang nga yeng hanina kerecdoku homunagocngo nadzicnendac. <sup>47</sup> Imocac edeguba negenna, ye heresongoya hafoangoc edzacnudacac kopocsiha hafoangoc ifingoc wamiba kpac andacde. Mong ye kopocsiha kapianc wawaya, ye ine songo kapiancsac femide.” <sup>48</sup> Ifi dema ngac yofi edeec, “Kopocsigga imoc bic wawaya.” <sup>49</sup> Ifi deu ngicngac goa tatacfu tacgec, yeni yenaocngoc denengeng amma degec, “Yomoc merac ngic? Ye kopocsic ifingoc wayemme.”

<sup>50</sup> Nga Yesungo ngacac yofi deec, “Ge ruaegoc kenna. Negen negensingango ebicfunac mesigudac.”

## 8

<sup>1</sup> Yesungo taong nga amabisicfu yerecge kemma Anutuac eucererenggac



siduc gombang edeyunukefec. Ifi kenu medacfora 12<sup>2-3</sup> nga warac ngac goa asu mangana nga hafeinginagoc mengereyunuec, yeneng yegoc momoc kengkecmagec dzofinacnginango meficyunugec. Ngac homac ifi anggec yene-runac mong kpara Maria kpara mong Madara, Yesungo warac yearunac hadehade 7 kporacmiec. Nga mong Yoana, ye Herodeac gareng Kusaac enema amma mong kpara Susana.

<sup>4</sup> Ngicngac homac yeni taong tackenecsoc, imohacnacngoc Yesuaru hama habu kuneng anggec yeng yoc mong heima yofi edeyunuec, <sup>5</sup> “Gbome kpegi kpegingic mongngo gbome kpegiudeac uau kenec. Kemma gbome kpegiu gbome goango mama sinnu ngic yeneng witiau tigece nga neng yeneng hama nedacec. <sup>6</sup> Nga goa harongannu heima nemonggema ereu bangec dokuya kpac anecac sokuema homeec. <sup>7</sup> Amma gbome goa haseng manau heiu haseng nga gbomea yerahafocngoc yadieac hasengngo imoc heihomeec. <sup>8</sup> Nga gbome goango bangec gombangau heima kpea nemonggema fora 100 sasawa fingecearec.” Ifi dema kunengngoc yofi kpacma edeyunuec, “Kedzahagoc yeng yoc yomoc negembeso.”

<sup>9</sup> Anu medacfora yeneng yoc heiheiac hania, imocac kpesimigec <sup>10</sup> yofi merengyemeece, “Anutuac eucererenggac negen negeng sufu sufuya, imoc ngeneng negentegececeac bic ngemmengemee. Amma goa yeni kicngina fikecma mi henggecede nga kedzacnginango negengkecma naric mi negentegececede, imocac yoc heiheiausing yoc sasawa yemmeyemee.” (*Yesaia 6:9*)

<sup>11</sup> “Yoc heiheiac hania imoc yofi, gbome imoc Anutuac yoc. <sup>12</sup> Nga gbome sinnu heiec, imoc ngicngac goa yeni yoara negenggec. Nga mangana minginango hama yoc imoc ubanginaunac meickeu yeni negensinggebeso obohoma komoc mi kpegecede. <sup>13</sup> Gbome harongannu heiec, imoc ngic goango Anutuac yoc negemma heresongogoc bic hoanggececede nga yocngoc ubanginau godea mong mi meecac naso wegenaneccac taru faitoban-naso hau yeni wagecede. <sup>14</sup> Nga gbome hasennu heiec, imoc ngic goango Anutuac yoc negenggec, yeni kekecnginaac negengyohoc nga dzofinacac faitobang amma bangecac kekec hensongo angkecegec, imocngo yoc heihomeu fora mangana amma kpac angkecede.”

<sup>15</sup> “Anu gbome bangec kerehagocfu heiec, imoc ngic goa yeneng Anutuac yoc negemma ubaherenginau faima sing dindingac nga gombunga mekecegecede. Mekecma seserigoc kecma fora meficegecede.”

<sup>16</sup> “Ngic mongngo kifa kpedzereckema tera bageau faima mi kperahaude nga fefe bageau faiu mi tarude. Imoc kpac, ye kifa tatahau faiu tacma ngicngac amau eregecede, yeneng kperagi hendacegecede. <sup>17</sup> Imoc yofiac, wiac sasawa sufu sufuya fede, imoc didiu fingecegerude nga wiac seme semea fede, imoc kecma kperagiau fingecegerude. Imoc sufu sufu mi kengkefude. <sup>18</sup> Ngic mong ye wiac goa femide, ye wiac monggoc migececede nga mong ye wiac mong mi femide, yearunac wiac fenende dema negende, imoc ifingoc wangecegec eng kefude. Imocac amma ngeni yoc negendae, imoc henghomema negemma kecbisia.”

<sup>19</sup> Anu Yesuac nonggo munafora yeneng yearu kenggec ngicngac homacngo hedzicegecac amma naric mi henggec. <sup>20</sup> Ifi anggec goa yeneng Yesuaru yofi degec enec, “Nonggo munafocga yeni hama genggececeac ngadeau nandae.” <sup>21</sup> Ifi degec Yesungo deec, “ngicngac Anutuac yoc negemma modackecdae, yeneng nonggo munafocna andae.”

<sup>22</sup> Naso monnu Yesungo medacfora yenigoc gombau emma yofi edeyunuec, “Nenang dzohong noboc kenni.” Ifi deu kemmagec <sup>23</sup> Yesungo gau feu kia firangtoango hama dzohongtoa kpeu dokungo gomba mewakebeso anu yeni kemebeso anggec. <sup>24</sup> Amma medac yeneng Yesuaru kemma midima degec, “Kunennina, Kunennina, neni kemebesonga andimbe.” Ifi degec Yesungo yacma firang nga dokuac siritembong dekpetari ayecmeu firang kpac anu dzohongngo ning kpema fec. <sup>25</sup> Feu medacfora yeneac deec, “Ngeni negen negensingngina kpac, ifi isoc ande.” Ifi deu medac yeni kengecyunuu kerectegec amma yenaocngoc denegeng amma degec, “Ye noc ngic? Yeng firang nga dzohong yoac edeyuruu yeac enac tofohodape.”

<sup>26</sup> Yesu nga medacfora yeni dzohong ferecgema Gerasene bangecfu kenggec. Bangec imoc Gariraia dzohong noboc. <sup>27</sup> Kensikema Yesungo gombaunac mama taong imocac ngic mong hadehadeforagoc meficgeec. Ngic imoc ye naso herea bic senggang kecma amau ngisitataha kpac kicsereu kecande. <sup>28</sup> Ngic imocngo Yesu hemma seriangoc arohoma Yesuac hoannu makpema yofi kparec, “Yesu Anutu engenatoaac Medac, neac wiac imoc geac mi ande. Ni desambic anggenduae, ge kpendzenu mi fainubesena.”

<sup>29</sup> Nga Yesungo asu seuhagoc yearunac kporaru erema kenudeac bic edeac, imocac ifi deec. Asu seuhagoc imocngo naso herea ammiu ngic yeneng mema sengngo hanimaria kpema garenggegec. Nga ye seng kperegedacma asu seuhagocngo wangecma bangec kisiu kengkefec. <sup>30</sup> Nga Yesungo kpesimiec, “Ge kpacga merac?” Kpesimiu deec, “Habutoa.” Hadehade homacngo yeac hereu kemema kecgecac amma yeng ifi deec. <sup>31</sup> Nga hadehade yeneng Yesu desambic ammigeac, “Ge hofeu suenununa mi kementi.”

<sup>32</sup> Nga bangec imohai berechabu kunengngo fagannu surukpema kecgec. Anu yeni kporacyunuu berecfu kemegecdeac desambic ammigeac yeng ifi anggecdeac negengyemmeec. <sup>33</sup> Negengyemmeu yeni ngicfunac erema berec habu yenearu kemegec berec yeneng fagannunac nedzima dzohonnu kemema doku nema homedacgec.

<sup>34</sup> Homedacgec berecgareng yeneng faka fingerec, imoc hemma kengec worama siduc deyadigec taonnu nga bedzou kenec. <sup>35</sup> Kenu ngicngac yeneng imoc negemma faka fingerec, imoc henggecdeac Yesuaru hagec. Hama ngic hadehadeagoc kefec, ye henggec. Yeng negentegecma wamba heima Yesuac haniu tarec. Ifi taru yeni hemma kengecyunuec. <sup>36</sup> Nga ngic hadehadeforagoc kefcengo dafu ngereedac, imoc ngic kcinginango faka fingeru henggec, yeneng siduc ayemmegec. <sup>37</sup> Ayemmegec gerasenengic yeneac amabangec, imocac ngicngac sasawango kengec homac yunuecac amma Yesungo wayunuudeac edegec. Edegec Yesungo dzigenema kenudeac gombau enec. <sup>38</sup> Enu ngic hadehade kporacmiec, yeng Yesugoc kenudeac derecgeu Yesungo ine suema yofi edeac, <sup>39</sup> “Ge amagau dzigene kemma Anuntungo fakatoa anggendac, imoc dekperagibesena.” Ifi deu ngic ye kemma Yesungo yearu fakatoa meec, imoc taong hafoangoc dekperagiyemmedarec.

<sup>40</sup> Yesungo dzohong noboc kensikemanu ngicngac yeneng ye heitaigec. Yeni sasawango yeac tomai kecgec. <sup>41-42</sup> Nga kpekpeturang amaac gareng mong kpara Yairo, yeng haec. Ye naraanga mocgusac, kifaya 12 ammanu homebesonga anecac amma ngic ye hama Yesuac haniau makpema ameau kenudeac desambic ammiec. Ammiu yeni kemmagec ngicngac habutoango noboc noboc hedzickegac.

<sup>43</sup> Anu ngac mong ye sacherec amma kecmanu kifaya 12 anu ye dzofinaha sasawa dota hania hania yemmeu mongngo ye mengereudeac sing mi meficgeec. <sup>44</sup> Ngac imoc ye habu yeneac botucfu Yesuac ngadeausing kemma ngakpiherehaac witic susia kpesereu sawa bic gbanggeec. <sup>45</sup> Gbanggeu Yesungo kpesiec, “Merang kpeserenudac?” Ifi deu yeneng degec, “Imoc mi negendimbe.” nga Petorongo edeac, “Kebu, ngicngac homacngo orongguma hedzicgudae.” <sup>46</sup> Ifi deu Yesungo yofi deec, “Mongngo kpeserenudac, kuc wanuma monggaru kenu negendua.” <sup>47</sup> Ifi deu ngac ye yofi negenec, “Ye bic meficgedac.” Ifi negemma sufu sufu worabeso osima dzonoma fedeu hama Yesuac haniau makpeec. Amma ye Yesu kpeseredac nga dafu ngerec ngeree bic yombong fingecmidac, ngicngac yeneac kicfu imoc dekperagidarec. <sup>48</sup> Dedaru Yesungo yofi edeac, “Naroanna, ge ruaegoc kenna. Negen negensinggango mengeregudac.”

<sup>49</sup> Amma ye yoac denammanungoc kpebung gareng, yeac amaunac yoac yofi haec, “Naroangga bic homedac, ge kpoukpou monggoc ebic mi mina.” <sup>50</sup> Ifi degec Yesungo imoc negemma Yairo edeac, “Ge mi kengecguu eng negensinggena. Ye kecek monggoc meficgeude.” <sup>51</sup> Yesungo ifi dema amau kensikema ngic mongngo amau mi enudeac kpetarima Petoro nga Yohane amma Yakobo nga naroanggac nonggomama, yenigocsac enudeac deec. <sup>52</sup> Dema ngicngac hafoangoc yeni naroanggac kiacsonggong anggec yofi edeyunuec, “Ngeni kiac wagec, naroang ye mi homedac, ye gau fede.” <sup>53</sup> ifi deu yeni dzomoremigec. Naroang ye bic homedac, ifi negenggec. <sup>54</sup> Nga ye ine naroanggac mariau mema kpacma deec, “Naroang, ge yacna.” <sup>55</sup> Ifi deu asuya monggoc kpoduu imohaingoc yacma taru Yesungo yaka migeceac edeyunuec. <sup>56</sup> Nga nonggomama yereng kerectegec anec Yesungo ine ngic mong mi edeyunuecdeac kpaec haiyemerec.

## 9

<sup>1</sup> Yesungo medacfora 12 kpacyunuu hadacgec hadehade nga yafing sasawa kporacyunugecdeac nga hafei hania hania mengeregecdeac uayoac nga kuc yemmeec. <sup>2</sup> Yemmema Anutuac eucerereng dekperagigecdeac nga hafeigoc mengereyunugecdeac sueyunuma <sup>3</sup> yofi edeyunuec, “Ngeni singgac mefic mong mi mekembisia, hie nga yaka amma yasu nga dzo mong mi mebisia nga ngakpi yohockang mi mekembisia. <sup>4</sup> Nga ama monnu kensikegec, ngic yeneng ama heingemmegec ngeni ama imohai tacyac angkecgec wisickeu taong monnu kembisia. <sup>5</sup> Nga taong mong imocac ngicngac yeneng mi hoangngunugecdeu ngeni taong imoc wama haninginaunac yube kpegec mau yeni imoc henggec faka imocngo manganangina edzacyunubeso.” <sup>6</sup> Ifi deu yeni amea amea kemma siduc gombung dekperagicyema hafeinginagoc mengereyunugec.

<sup>7</sup> Ifi anu Gariraia bangecac gawanatoa kpara Herode, yeng wiac sasawa fingerec, imocac siduc negenu obohoec. Nocac ngic goa yeneng yofi degec, “Yohane dokunadzicngo homecfunac gborima yacma kecde.” <sup>8</sup> Ifi degec goango yofi degec, “Eriango fingecma kecde.” nga goa yeneng degec, “Profete bicngoc yombong kecgec, yenearunac mongngo hadac.” <sup>9</sup> Nga Herodengo deec, “Neng Yohane ubea bic kperecgeai nga yomoc ine merac ngicac siduc negengkecudae.” Dema Yesu henudeac kicfifi kefec.

<sup>10</sup> Anu aposoro yeni dzigenema ua megec, imocac siduc Yesu ammidacgec. Ammigecc yeng meyunuma meickema tembuha tacbesonga taong mong kpara Betsaida, imohaigeng kenggec. <sup>11</sup> Kenggec habutoa yeneng

imoc negemma ye modacgec. Modacgec, yeng hoangyunuma Anutuac eucerereng dekperagiyemmema ngerec ngereac ayemmeec, yeni mengereyunuec.

<sup>12</sup> Ama marai anu medacfora 12 yeneng Yesuaru hama degec, “Bangec yomoc ngiha kpacfu kecmiina ama marai andeac habu sueyununa amabangec tackende, imohai kemma yaka meficge nema imohai febisia.” <sup>13</sup> Ifi degec deec, “Ngeneng yaka yemmegec negec.” Ifi deu merenggec, “Neni ic sogong marimong nga kondungyang yohockangsac mekecdimbe. Neni yaka mong mi bummebing dede habu sasawa yeneacsoc naric mi ambac.”

<sup>14</sup> Ngic imoc yeneac kpetengina 5 tauseng, ifi isocngo kecgecac amma ifi degec Yesungo medacfora yofi edeyunuec, “Ngeni ngicngac edeyunuec, yeni 50 habusoc ifi kpedzucnema tackenggec.” <sup>15</sup> Ifi deu medac yeneng ngicngac ifi anggecdeac edeyunuec sasawango matacgec. <sup>16</sup> Matacgec Yesungo ic sogong marimong nga kondungyang yohockang, imoc mema kiwa kurumennu fiu enu kenehema mendzirec. Mendzicma ngicngac mederema yemmegecdeac medacfora yemueu <sup>17</sup> yeneng imoc mederema ngicngac yemmegec. Yemmegec ngicngac sasawango negebec amma yaka tosea neti anggec, imoc kpedzucnegec kemema sakac 12 wakeec.

<sup>18</sup> Yesungo naso monnu yengenaocngoc numuudeac kecmanu medacfora yegoc kecgec yeni kpesiyemmeec, “Ngicngac yeni neac merac deandae?”

<sup>19</sup> Ifi deu degec, “Goango Yohane dokunadzic nga goango Eria amma goa yeneng ine profete mong esea, yeng gborima kecede deandae.” <sup>20</sup> Ifi degec deec, “Nga ngeni ngenaoc ine neac merac deandae?” Ifi deu Petoronggo deec, “Ge Anutuac Messia.” <sup>21</sup> Ifi deu, yeni yoac imoc ngic mong mi edeyunuecdeac deracyunuec.

<sup>22</sup> Nga Yesungo yofi deec, “Ngicac Medac ye kpendzeng homac kpebeso. Yudangic enarafocngina nga womong gareng enara amma mitiac negen negengngic yeneng ye ubango wama kpegec homebeso. Homeu uameme harebec ammanu monggoc gborima yachbeso.”

<sup>23</sup> Yesungo habu sasawa yofi edeyunuec, “Ngic mong ye ni modacnubeso negendeu ye yengena ubasebiaac songo memama wenacsoc mariponga miacma tofohoma modacnubeso. <sup>24</sup> Ngic mong ye yengena kekeha segereudeac negemma uaya mekecde, ye kekeha sufumiude. Nga mong ye neac amma kekeha waude, ye ine kekeha fingecmiude. <sup>25</sup> Imoc yofiac, ngic mong ye bangecac wiac sasawa meficgema mekecde, ye ine kekeha sufumidarude nga yengena memanganeemeu kekeha imoc fora kpac anude. <sup>26</sup> Nga ngic mongngo neac negenu gameagoc ande amma neac yoacnaac negenu gameagoc anude, yeac siduc yofi, Ngicac Medac ye Mamaac nga angeroforaac amma yengena kibikperagitoagoc haude, naso imohai yeng ngic imoc yeac ifingoc negenu gameagoc anude. <sup>27</sup> Nga ngic yomoc nandae, ngeneanunac goa yeni mi homemagec Anutuac eucerereng hau henggecde, imoc forangoc edengunuduae.”

<sup>28</sup> Anu yoac imoc deec, imocac sonda mocgu isoc wisickemanu Yesungo Petoro nga Yakobo amma Yohane meyunu numugecdeac tikiu enggec.

<sup>29</sup> Emma numumanu kicmesuya heimerenu siriha mong anu wambaya kperagima kongac koporarac yombong anec. <sup>30</sup> Ifi ammanu imohaingoc ngic yohockang, Mose nga Eria yereng fingecma yegoc denegeng anoc. <sup>31</sup> Yeri kibikperagitoangiragocngoc fingecma Yesungo Yerusarennu kemma kekeha mesima wayunuma enudeac denegeng anggec.

<sup>32</sup> Nga Petoro ogohoragoc, yeni gautoa fegec. Fegecfunac gborima yacma Yesuac kibikperagitoa nga ngic yohockang yegoc nanec yenenggec. <sup>33</sup> Nga ngic yohockang yeri Yesu wama kemmaec Petorongu Yesu edeec, "Kunenna, yei kecni songea andeac bedzo bedzo harebec meni, geac mong, Moseac mong nga Eriaac mong." Ye wiac imoc mi negentegecma eng ifi deec.

<sup>34</sup> Yoac denammanu hoeng mongngo fingecma mama semeyunuu kengec amma hoeng manau kemmagec <sup>35</sup> hoeng manaunac ubaudumeng mong yofi kpacma deec, "Yomoc neac Meisingmedacna, ngeni yeac yoac negembisia." <sup>36</sup> Ubaudumeng imoc kpac anu yeni kic fima Yesu tembuha nanu henggec. Hemma medac yeni yoacngina waickema nanggec. Nga naso imohai wiac henggec, imocac ngic mong mi edegec.

<sup>37</sup> Wereckengau Yesungo medacfora harebec yenigoc tikiunac kememagec ngicngac habu kunengngo meficgegec. <sup>38</sup> Anu habu yeneac botucfunac ngic mongngo Yesuac kpacma derecema deec, "Kpoukpou, ge hama medacna henna, ye medacna mocgusac. <sup>39</sup> Hadehade mongngo medac mendanggeu ye arohau asu manganango mema kpekpefac ammima sebia mekuc kpekutung meu enaraunac sofororoc ereande. Asu imocngo medac mi wama naso homac memanganeyombonggeande. <sup>40</sup> Nga medacfocga yeneng kporacmigeceac edeyunuba yeni kporacbibiemma wadau." <sup>41</sup> Ifi deu Yesungo yofi deec, "Ngcngac areng yomoc ngeni negen negensingngina kpac amma fakangina sicsauha. Naso herea ngenigoc monggoc tachadeac modzona tide. Ge medacga nearu mehana." <sup>42</sup> Ifi deu medac ye wegena kemmanu asu seuhagocngo medac kpefaheu bangecfu makpeu yeac sebia mekuc kpekutung meu Yesungo asu seuhagoc yoac seria ammima medac mengerema mama monggoc miec.

<sup>43</sup> Miu ngicngac yeneng Anutuac kuctoa imoc hemma kerectegec amma negengec wiac engena anec. Amma yeni Yesuac ua sasawa hemma kerectegec anggec. Ifi ammagec yeng medacfora yofi edeyunuec, <sup>44</sup> "Ngeni kedzac kpema yoac yomoc negenggec. Naso mi hereemanu yeni Ngicac Medac kererema ngicngac yeneac mariu faigec kpegecde." <sup>45</sup> Ifi deu medac yeni yoac imoc mi negentegecgecdeac Anutungo uba negen negengngina hedzickeec. Hedzickeu yeni Yesuac yoac obohoma imocac hania kpesimigeceac kengecyunuec.

<sup>46</sup> Anu medac yenearunac merang engena ande, imocac yenaocngoc yoacngina engemmama anec. <sup>47</sup> Ifi anggec Yesungo negen negeng ubanginau fec, imoc bic negemma medacbisic mong mema yegoc faiu nanu <sup>48</sup> yofi edeyunuec, "Ngc mong ye kpacna negemma medac yomoc hoanggeude, yeng ni ifingoc hoannude. Nga ni hoannude, yeng Kebu suenuec, ye ifingoc hoanggeude. Imoc yofiac, ngeneac botucfunac ngic mong mamea kecande, yeng engena ande." Ifi deu <sup>49</sup> Yohanengo deec, "Kebu, ngic mongngo geac kpacfu hadehade nga yafing kporacyemmeu neni imoc hemma nenanggoc mi kecdeac amma kpetarimiding." <sup>50</sup> Ifi deu yofi deec, "Ngc mong ye uanginaac ngaba mi ande, yeng ogongina ande. Imocac ngeni ye mi kpetarimbisia."

<sup>51</sup> Yesungo kurumennu enudeac nasoya wegene hau negen negenga Yerusarennu suew kenec. <sup>52</sup> Kenu ngic goa sueyunuu yeni waraima nenesemeng nga amagerec mengeregecdeac Samariaac guruama monnu kensikegec. <sup>53</sup> Kensikegec Yesungo Yerusarennu kenude, ngicngac yeneng imoc negenggecac Yesu ama mong mi heimigec. <sup>54</sup> Ifi anggec medahora

Yakobo nga Yohane yereng imoc hemma yofi deoc, “Kebu, neni kuru-mennunac gerec deni mama ngic yomoc yonohodaru, imoc naric ambing me?” <sup>55</sup> Deec Yesungo dzigenema yoa ifia negembesonga kpaе heiyemeru <sup>56</sup> medacforagoc guruama monnu kenggec.

<sup>57</sup> Sinnu kemma ngic mongngo Yesu edeoc, “Ge ihai me ihai kennadesoc modacguma gegoc kembadeac negenduae.” <sup>58</sup> Ifi deu yeng yofi meremmiec, “Katekasi yeni bangec manau fefenginagoc nga sawa neng yeni faecnginagoc amma Ngicac Medacngo ine kparicganga kpac.” <sup>59</sup> Ye ngic mong yofi edeoc, “Ge hama ni modacnuna.” Ifi deu yeng deec, “Kebu, negennemmana kemma manna tonggomaguc habade.” <sup>60</sup> Ifi deu meremmiec, “Homec yeni yenaocngoc tonggoemegec nga geng ine wayunuma kemma Anutuac eucerereng dekperagama kecbesena.” <sup>61</sup> Nga ngic monggo deec, “Kebu, ni modacgubadeac negenduae nga kemma arengfocna edeyunumaguc ine habade, imoc naric me?” <sup>62</sup> Ifi deu Yesungo yofi edeoc, “Ngic mong ye negen negenga bic suemaguc dzigenekpe ande, ngic ifiango Anutuac eucerereng-gacsoc mi ande.”

## 10

<sup>1</sup> Imoc wisickeu Kebungo ngic <sup>72</sup> meisinyunuma yohockang yohockang hendzicyunuec. Hendzicyunuma yengena taong nga amabisc kembesonga negensiec, imohai yeneng waraimigecdeac sueyunuma yofi edeyunuu kenggec, <sup>2</sup> “Semeng fora homacngoc kpauedac fede nga ua ngic ine efeanec-sac kecdae. Imocac ngeni semeng mingina numumigec yeng ua ngic sueyunuu yeneng kemma foraya mekpedzuc ambisia.

<sup>3</sup> Negenggec, ramamedahango katekasi yeneac botucfu kecdae, siriha imocacsoc suengunuba kembisia. <sup>4</sup> Ngeni dzobirang me hie nga hanitabe mi mema kembisia. Amma sinnu ngic mong meficgema yoaс mi mebisia. <sup>5</sup> Amma ngeni ama imohai me imohai enggecde imohai emma yofi debisia, ‘Ruae ngenearu febeso.’ <sup>6</sup> Ifi degec ruaengic mong imohai kecdeu ngenearuaeng ye hoanggeude nga mi kecdeu ruae imoc monggoc ngenau dzigeneude. <sup>7</sup> Ngicngac ama ngemmegec ngeni imohaingoc tacbisia. Nga yeni yaka nga doku ngemmegec ngeni imocnoc nebisia. Ngeni amayuguc mi kembisia. Uango ua ngic uabungngina meficgeyemmebeso, imocngo ngereude.

<sup>8</sup> Ngeni taong monnu kenggec ngic yeneng ama heingemmema wiac mong negecdeac ngemmedae, ngeni imoc nebisia. <sup>9</sup> Ngeni taong imohai ngicngac hafeinginagoc mengereyunuma yofi edeyunubisia, ‘Anutuac eucererengngo ngenearu bic mewegenengunuma hama fede.’ <sup>10</sup> Nga ngeni taong monnu enggec ama mi heingemmegecdeu ngeni ine amasingnginau kemma yofi edeyunubisia, <sup>11</sup> ‘Taongnginaac yubengo hanininau mendangedac, neni imoc ifingoc kpeni mama imocngo manganangina edzacgunubeso. Nga ngeni ine yofi negembisia. Anutuac eucererengngo yei bic mewegenengunuma hama fede.’ <sup>12</sup> Amma nasoya hau taong imocac turunga ebiria yombong haude, imoc Sodong amabangec ferahema fingerude, imoc edgunuduae.

<sup>13</sup> Korasing nga Besaida ngicngac, ngeni sowecnginagoc. Ngenearu kucfaka homac bic fingerec. Amma kucfaka ifia Tiro nga Sidong taonnu fingebacfu yeni kopocsicnginaac ubahodunggac wamba bic heima hama nadzicma tacma ubamereng ambau. <sup>14</sup> Nga ising ising nasotoau Anutungo Tiro nga Sidong areng, yeneac ubamangang negemma turunga efeanec

yemmema ngeni ine turunga ebiriangoc ngemmeude. <sup>15</sup> Amma Kafanaung, geng kurumennu ennadeac ifi negengkecnecc nga kpac yombong. Ge homecamau megu keme kemea siriha annec. <sup>16</sup> Ngic mong ye kedzaha ngenearu faide, yeng kedzaha nearu faide. Nga ngeni ngadengunuude, yeng ni ngadenuude nga Kebu suenucc, ye ifingoc ngadeheude.”

<sup>17</sup> Anu ngic 72 yeni sogac sogaigoc dzigenema degcc, “Kebu, neni kpacga kpacni hadehade nga yafing yengng yoacnina tofohoma woragecde.” <sup>18</sup> Ifi degcc Yesungo yofi merengyemnecc, “Ni Satang hembra yeng piratac isoc heima kurumennunac maec. <sup>19</sup> Negenggecc, ni uayoac nga kuc bic ngemmeai. Ngemmeba ngeni boudzoc nga wemeweme witinginau naric tigecc amma ngabanina nga yeac arengfora sasawa yeneng ngeneac bageu kegcde. Nga wiac mongngo ngeni naric mi memanganungunuude, kpac. <sup>20</sup> Nga hadehade nga yafingng enacngina tofohoma woraandae, ngeni imocac homac mi sogaibisia. Nga kpacarengngina kurumennu oho ohoya fede, ngeni imocac homac yombong sogaibisia.”

<sup>21</sup> Naso imohaingoc Tiri Asungo Yesu ammiu sogac sogai songongo mewakemiu yoac yofi deec, “Manggac, kurumeng nga bangcc mingina, geng wiacga sasawa yomoc mesufuyemmenec ngicareng negen negengnginagoc nga fitira keccdae, yeni imoc mi hennegeng andae. Amma nambaracbisic bisic, yeni wiac yomoc mekperagiyemmenec, imocac dengereguduade. Manggac, ge imoc hemma ubaga ngereede, imoc fora.

<sup>22</sup> Mannango wiac sasawa nenec imoc mekeccduae. Nga mongngo Medahaac hania naric ni negende, Manggacngosac negemmide. Ifi isocngoc mongngo Manggacac hania naric ni negende, Medacngosac ye negemmide. Amma Medacngo ngicngac meisingyunuma Manggac edzacyunude, yeneng ifingoc ye negemmigeccde.”

<sup>23</sup> Anu Yesungo medacfora yenearu dzigenema yeneacsac yofi dema edeyunuec, “Faka yomoc fingeru kicnginango hengkeccdae, ngeni kenecnginagoc. <sup>24</sup> Ni edengunuba negenggecc, warac profete nga ngictau homac yeneng ngeni wiac hengandae, imoc hembeso negemma sifu mi henggecc. Nga ngeni wiac yomoc kedzacnginango negengandae, yeneng imoc ifingoc negembeso ayemmeu mong mi negenggecc.”

<sup>25</sup> Anu dedeseriyoac negen negengngic mongngo hama Yesu faitobannu faiudeac negemma deec, “Kpoukpou, ni faka dafi amma kekeccseriac maridzoming mebade?” <sup>26</sup> Ifi deu Yesungo yofi meremmiecc, “Dedeseriyoacfu yoac oho ohoya fede, ge kibi imohai dafi osonegeng angannec?” <sup>27</sup> Ifi deu ngicngo meremmiecc,

“Ge ubaherega nga ubaongaga nga kucga amma negen negengga hafaongoc Kebu Anutuga heresongogoc hoanggebesena.” *(Dedeseri 6:5)*

Amma,

“Ge geangga anggengande, siriha imocngoc gegoc wegena keccdae, yeni heresongogoc hoangyunubesena.” *(Sesememe 19:18)*

<sup>28</sup> Ifi deu Yesungo yofi edeccc, “Ge yoac dindngac dema merennendang. Ifi amma kecengkeccbesannec.” <sup>29</sup> Nga ngic ye Yesungo yeac ngic dindngac debeso, ifi negemma kpesimiecc, “Nga ngicngac neac wegena keccdae, imoc merac yombong?” <sup>30</sup> Kpesimiu Yesungo meremmiecc,

“Ngc mongngo Yerusarennac Yeriko taonnu kemeudeac kemma godzungic yeneac mariu heiecc. Heiu yeneng wambaya hesima kpegecc homebeso anu ukugecc feu woragecc. <sup>31</sup> Femanu womong gareng mongngo imohacsing kemema ngic feec, ye hemma kpegegenggema nobocsing



kenec. <sup>32</sup> Kenu womong gareng yeneac memefic ngic mongngo ifingoc imohai kemeec. Kemema ngic imoc henu feu ye ifingoc kpegegengema nobocsing kenec.

<sup>33</sup> Anu samariangic mongngo sing imocngoc modacma kemema ngic feec, ye hemma yeac ubea manganee. <sup>34</sup> Manganu yearu kemma kerec doku nga waing dokuya kubehau kpakema kubeha biranggemiec. Biranggema yengena donggi witiau faima kiangamau mekemma henggareng ammiec. <sup>35</sup> Amma wereckengau siriwa dzo yohockang kiangamaac gareng mima yofi edeec, 'Ge ngic yomoc henggareng ammima kecbesena. Ni monggoc dzigeneba dzo imocngo mi heiuide isoc, imohaingoc imocac turunga gembade.' <sup>36</sup> Ifi dema Yesungo dedeseriyoac negen negengngic yofi kpesimiec, "Ge dafi negennec? Ngic ye godzungic yeneac mariu manganee. Nga ngic harebec yenearunac ngic merang yeac ogo amma wegena kefec?"

<sup>37</sup> Ifi kpesimiu yeng meremmiec, "Yeac ubamangang negemma meficgeec, yeng." Ifi deu Yesungo yofi edeec, "Ge geangaoc kemma ye anec, ifi isoc angkecbesena."

<sup>38</sup> Yesu nga medacfora yeni kengkecma guruama monnu kensikegec. Kensikema ngac mong kpara Mata, yeng Yesu ameau enudeac heitaiec. <sup>39</sup> Heitaiu Mataac munea kpara Maria, yeng Kebuac haniu matacma yoara negenec. <sup>40</sup> Negemmanu Matango ine dzandzung namma yenigoc mi tacma ha namma Yesu edeec, "Kebu, ge neac negengyohoc mi annec. Ni tembucna ngenenggareng ua mebadeac munana wanudac, ye edena meficnuu." <sup>41</sup> Ifi deu Kebungo yofi meremmiec, "Mata Mata, ge wiac homacac negengyohoc amma ebic mekecne. <sup>42</sup> Amma wiac mocusac imoc megec ngereuede. Maria ye wiac gombunga isinggema mekecde, imoc mongngo yearunac naric mi meickeude."

## 11

<sup>1</sup> Yesungo naso monnu kemma botuha monnu numuu wisickeu medacfora yenearunac mongngo deec, "Kebu, Yohane ye medacfora numugecdeac sing kpouyemmeec, ge ifingoc ifia goa kpounemmena." <sup>2</sup> Ifi deu Yesungo yofi deec, "Ngeni yofi dema numubisia, 'Manggac, geac kpac kpetiac febeso. Anu eucererengga imocngo hanemmebeso. <sup>3</sup> Ge wenacsoc yaka socnina nemmebesena. <sup>4</sup> Kopocsicnina wanemmena. Neni ifingoc ngic yeneac kopocsicnginaac turung kpoukpouac wayemmekecdimbe. Faitobannu mi fainunubesena.'"

<sup>5</sup> Ifi dema yofi edeyunuec, "Ngenearunac mongngo tofocnac dzongiau ogea monggac amau kemma debac, 'Ogona, ge ic sogong harebec meficnuna turunga ngade gembade. <sup>6</sup> Ogona mongngo sing hereaunac hama tofocnac amanau hau yakana kpac anu noc gumbadeac obohoduae.' <sup>7</sup> Ifi deu ogea ama manau tacma debac, 'Ge ebic mi nenna. Nagunina bic meserima nambaracfocnagoc gaufedimbeac naric mi yacma megembade.' <sup>8</sup> Ni eden-gunuba, ye ogeaac amma ic sogong mi mibac dede yeng ngombonggema engngoc kpesimibac, imocac amma ye sifu yacma ic sogong miude.

<sup>9-10</sup> Ngic mong ye numukecde, yeng wiac imoc meude nga hofockecdeno wiac imoc meficgeude amma naguwiande, yeac nagu witimigece. Imocac ngeni numugec turunga ifi ngemmeude nga ngeni hofocma foraya meficgegecde amma naguwiande heigec nagu witingemmegecde. <sup>11</sup> Ngenearunac botucfu manggac monggac medahango kondungyanggac kpesimiu yeng boidzoc mangana naric mi miude. <sup>12</sup> Nga ye kokorec gbomeaac kpesimiu

weme weme naric mi miude. <sup>13</sup> Ngic ngeni mangana angandaengo sifu nambaracfocongina ubangerecac wiac gombunga yemmegecdeac negentegecdae. Imocac yofi negenggec, kurumeng Mangnginango fakangina gombunga imoc homac feraheu ngicngac Tiri Asuya yemmeudeac kpesimidae, yeni Tiri Asuya naric yemmeude.”

<sup>14</sup> Naso monnu Yesungo hadehade mong yoara kpac, imoc ngicfunac kporarec. Kporaru hadehadeng ngicfunac erema kenu ngic yoara kpac kefec, yeng yoac deu ngicngac yeneng kerectegec anggec. <sup>15</sup> Nga ngicngac goa yeni ine yofi degec, “Ye hadehade nga yafing yeneac ngictaungina Bedzeburu yeac kucfu ngicngac yeneacunac kporacande.” <sup>16</sup> Anu goa yeneng ine Yesu kuha isinggegecdeac negemma kurumennunac faka kuhagoc mong meudeac edegec.

<sup>17</sup> Edegec Yesungo negen negengngina bic negemma yofi edeyunuec, “Bangec monggac ngic yeneng ngaba angemema tohogeceude bangec imoc kisi fingeru ama mongngo ama monggac witiau makpema kpac anude. <sup>18</sup> Nga Satangngo tohoma yengenaocngoc kporacemeudeu ye nga arengfora naric mi serima nangecde, kpac. Nga ngeni neac ine deandae, “Ye Bedzeburungo ammiu yeac kucfu hadehade nga yafing kporacyunuande, imoc obohode.” <sup>19</sup> Neng Bedzeburuac kucfu hadehade nga yafing kporacyunubai dede ngeneac medacfocongina yeni ifingoc yeac kucfu hadehade nga yafing kporacyunubau. Ifi anu ngeneac medacfocongina yoacngina isinggema desigece. <sup>20</sup> Nga Anutungo gbonga faiu ni imocngo hadehade nga yafing kporacyunuduau Anutuac eucererengngoc ngenearu bic hadac kecce, ngeni imoc negenggec.”

*(Makekeng 8:16-19)*

<sup>21</sup> “Ngc kuhagoc mongngo dzikacac iwaiya mema ameaac gareng kecmanu finaha gombunga feude. <sup>22</sup> Nga ngic mong kuha monggoc, yeng yearu hama yegoc ewema firang anudeu yeng ngic yeac dzikacac iwaiya wangecmidarude. Wangeru ama minginango dzikac wiac, imocac kucfu seria kefec, imoc kpac anu ngic kuha monggocngoc yeac finaha hamangec mema hendzicma ngicngac goa yemmeude. <sup>23</sup> Ifi anu mong ye neac ogona mi ande, ye ubeango wanude. Nga mong ye nigoc mekpedzuc ua mi meude, yeng neac wiac sinsararang kpeudeac ua meude.”

<sup>24</sup> “Asu seuhagoc yeng ngicfunac erema bangec dokuya kpac, ihai kemma tacnegenudeac tatak hofocma yerecgema kecande. Kecma tatak mong mi meficgeudeu yengenaocngoc yofi deude, ‘Amana warac tacma wayai, imohai monggoc dzigenema kembadeac negenduae.’ <sup>25</sup> Ifi dema kemma ama imoc wangge memengere angana henude. <sup>26</sup> Hemma monggoc kemma arengfora 7 wangecyunuu hagecde. Arengfora imoc yeneng ye ferahema mangana yombong andae, yeni meyunuma kemma ama imohai enarangina anu tacgecde. Tacgec ngic ye warac mangana kefec, imoc ferahema imocac mangana yombong kefude.”

<sup>27</sup> Yesungo yoac ifi demanu ngac mongngo habu yeneac botucfunac kpacma deec, “Ngac meguma namuu garengguec, ye kenehagoc.” <sup>28</sup> Kparu Yesungo imoc wama yofi deec, “Ngcngac Anutuac yoac negemma hoanggeandae, yeni kenecongnganoc.”

<sup>29</sup> Ngicngac habu yeni engngoc hamangoc fegec Yesungo yoac torokpema yofi deec, “Naso yomocac ngicngac ngeni areng mangana yombong. Ngeni kucna isinggegecdeac faka kuhagoc fingecongmeudeac derecgeandae. Nga ngeni faka kuhagoc mong mi ngemmengemmea, Yonaaru kucfaka

fingerec, ifiasac henggecede. <sup>30</sup> Niniwe taonggac ngicngac yeneng negens-inggegecedeac Kebungo Yonaaru faka kuhagoc meec. Nga siriha imocngoc Ngicac Medac yengenaoc ngicngac yomocngo negensinggegecedeac fakaya kuhagoc meude.

<sup>31</sup> Seba bangebac ngactau ye Saromoac negen negentegec meudeac bangeb tegiau sautfunac haec. Imocac amma yeng ising ising nasou ngicngac yomoc yenigoc yacma nammagec fakangina isinggema yeneac mangana deyem-meude. Anu negenggec, yomocngo\* Saromoac negen negeng ferahade. (1 Ngictau 10:1-13) <sup>32</sup> Niniwe taonggac ngic yeni Yonaac dedekperagiyoac negemma ubamereng anggecac amma yeneng ising ising nasou ngicngac yomoc yenigoc yacma nammagec yeneac fakangina isinggema yeneac mangana deyemgecede. Negenggec, yomocngo† Yonaac faka ferahade.

<sup>33</sup> Mongngo kifa kpezereckema sufu sufuu me pake bageau naric mi faiude, ye kifa imoc tatahau faiu tacma kperagiun gicngac yeni erema kperagia henggecede. <sup>34</sup> Kicga imoc sebigaac kifa amma kicga gombunga fema sebiga sasawa mekperagidarude. Nga ge kickerec me kicmangang mekecma kicgango manganeudeu ine sebiga sasawa kundung kpeude. <sup>35</sup> Imocac amma ge kperagia fegende, imoc kundung kpebacac amma garengemema kechesena. <sup>36</sup> Ge sebiga sasawango kundunga kpac kperagigoc feudeu sebiga kperagiango sokoma feude. Imoc kifa mong kperagitoayagoc mekperagiguande, ifi isoc.”

<sup>37</sup> Anu Yesungo yoac demanungoc farisaio mongngo yegoc yaka neudeac heitaiu yeac amau emma taroc. <sup>38</sup> Matacma maria mi dzuacma yaka eng neudeac anu farisaiongo imoc hemma kpidohou <sup>39</sup> Kebungo ine yofi edeec, “Farisaio ngeni teratasengina ngadeasac dzuacandae nga ngeni ubaherengina manau ine kickerec amma wiac manganango wake wakea fede. <sup>40</sup> Ngeni negen negengtegecngina kpac. Kebungo ngadeau wiac meec, yeng manaac ifingoc meec. <sup>41</sup> Ngeni imocac amma ngicngac makpekpea wiac heregoc yemebisia. Ifi anggec wiacngina sasawa dzuac dzuara anude.

<sup>42</sup> Farisaio, ngeni rombac nga gime amma mondzangngina sasawa imocac kpete mama 10 imohacnac mocgu hendzicma Anutu miandae. Nga faka dindingac nga heregoc Anutuac songo negembesonga, imoc ine ihoc bahoc amma waandae, imocac ngeni sowecnginagoc. Ngeni faka gombunga imoc modachisia amma tosea mi wabisia.

<sup>43</sup> Farisaio, ngeni kpekpeturang amau tatac warac warac imohai tacgecedeac angemmeande nga ngicngac yeneng kpezaroc sobennu ewehaihei faka angemmegecedeac songo negengandae, imocac ngeni sowecnginagoc. <sup>44</sup> Kicsere esea mong wiaha kpac ngic yeneng mi negemma eng witiau kengha andae, ngeni kicsere ifia isoc kecdae, imocac ngeni sowecnginagoc.”

<sup>45</sup> Ifi deu dedeseriyoacac negen negengngic yenearunac mongngo edeec, “Kpoukpou, ge ifi dema neni ifingoc denggarinnununc.” <sup>46</sup> Ifi deu Yesungo yofi merenec, “Dedeseriyoacac negen negengngic, ngeni ifingoc sowecnginagoc. Ngeni ngic yeneac ngadenginau finac ngicngo memecsoc kpac, imoc faiandae nga ngenang ine ngicngac ebicngina efeaa anude, imoc meficyunugecedeac gbongngina mong mi sinegecede.

<sup>47</sup> Bangecfocnginango profete esea yunuhomegec homegecmoc yeneac kicsereu simengngina miacandae, imocac ngeni sowecnginagoc. <sup>48</sup> Yeneng

\* 11:31: Yesungo yengenaac imoc deec. † 11:32: Yesungo yengenaac negemma “yomocngo” deec.

profete yunuhomegec nga ngeneng kicserengina simenggoc miackeandae, ngeni ifi amma yofi dekperagidae, 'Neni fakaninau uba mocgu kecdimbe.'<sup>49</sup> Ngeneac amma Anutuac negen negentegecngo bicngoc yofi deec, 'Ni profete nga aposoro yenearu sueyunuba yeneng goa yunuhomegecde nga goa yunukporac ayemmegecde.'<sup>50</sup> Imocac amma bangec hanac hanaheau-nacngoc erekema profete yunuhomegec sacngina maec, imocac turunga yagucac ngicngac kecdae, ygenearunacngo kpoudacgecde.<sup>51</sup> Turung imoc Abeac sacfunac hanahema erekema Dzekariaac sacfu erede. Yeni Dzekaria arata nga kpetiac ama botucngirau kpehomegec. Oc, ngicngac areng yomoc ngeneng turunga imoc kpoudacbisia, imoc edengunuduae.

<sup>52</sup> Dedeseriyoacac negen negengngic, ngeni Anutu negemmigecdeac ki, imoc ngicngac yenearunac meicgec. Amma ngenang imohai mi emma ngicngac yeneng embesonga ammagec ine kpae bic faiandae, imocac ngeni sowecnginagoc."

<sup>53</sup> Anu Yesungo wama ngadeau kemeu mitiac negen negengngic nga farisaio, yeneng yeac negemmangang amma kpesi kpesi hania hania kpesimigec.<sup>54</sup> Yeni, "Yoaç goa segeu meni." dema yeac gareng mema kecgec.

## 12

<sup>1</sup> Ngicngac homac yombong, teng tauseng nga noc ifiacsoc yeni kpezuc-nema nanggecac yenaocngoc timbimbingemegec. Nga Yesungo medacfora, yeneac negemma yofi deec, "Ngeni farisaio yeneac ikoc fakangina imocac henghomema kecbisia, imoc yis isoc ic sogonnu sokoude."<sup>2</sup> Wiac mong sangoyagoc fede, imoc kecma nonongkac fingctegerude nga wufu sufuya fede, imoc negendacgecde.<sup>3</sup> Imocac ngeni kundunnu yoac sasawa deandae, imoc kperagiau negenggecde nga ama mana kapiau kedzacnginau sangic sangic deandae, yeni imoc ama witiau namma dekperagigecde.

<sup>4</sup> Nga tosofocna, ngic goa yeni sebingina kpehomegecdeac kuc mekecma monggoc memanganengunugecdeac kuc hofocandae, ngeni yeneac mi kengecngunubeso, imoc edengunuduae.<sup>5</sup> Ngeni ine Kebu monggac-sac damungunubeso. Yeng gunuhomema gerechofeu ukungunuu kemegecdeac uayoac nga kuc mekecde. O, yofi deduae, ngeni yeac ine damungunubeso.<sup>6</sup> Ngicngac yeni nengbisic 5 faigec peni yohockang sacsacngo bummeandae nga Anutungo neng imoc yenearunac mong naric mi nigeck-peude.<sup>7</sup> Amma ngeneac orucdzongina kpete, imoc ifingoc oso osodara. Nga ngeneng sawaac nengarengtoa yeni feracyunudae, imocac ngeni mi kengecngunubeso.

<sup>8</sup> Ngic mong ye ngic yeneac kicfu Ngicac Medac yeac deande, 'Ni yeac areng anduae.' ifi deu Ngicac Medacngo yeac ifingoc Anutuac angero-fora yeneac kicfu yofi deude, 'Ye neac ngic.'<sup>9</sup> Nga ngic mong ye ngic yeneac kicfu ine ni basicnuude, neng ye ifingoc Anutuac angero-fora yeneac kicfu basic kpebade.<sup>10</sup> Ngic mong ye Ngicac Medac emmiude, yeac kopocsic wamigece nga mongngo Tiri Asu denggbaringgema emmiude, imocac kopocsic wawaya ine mi fede.<sup>11</sup> Ngic yeneng mengunuma kpekpeturang amau nga yoacgarenggac enara nga ngickuneng, yeneac kicfu faingunugecde, ngeni naso imohai negengyohoc amma yofi mi debisia, 'Neni turunga dafi merennide nga noc yoac denide?'<sup>12</sup> Naso imohaingoc Tiri Asungo yoac enacnginau faiu ngeni imoc debisia."

<sup>13</sup> Anu ngicngac habu yeneac botucfunac ngic mongngo Yesuac deec, "Kpoukpou, dacna ye mannaac maridzoming tembuha mekecde, imocac

geng dena noboha ni mederema nenu.” <sup>14</sup> Ifi deu Yesungo yofi meremmiec, “Ngic, ngereac iwai mederema gareng ambadeac mongngo mi fainuec.” <sup>15</sup> Ifi dema torokpema yeneac yofi deec, “Ngeni dzofinactoaac kichodung ambauac garengngina mebisia. Ngic monggac dzofinactoa, imocngo yengena kekehaac siriha mi heficgeude.”

<sup>16</sup> Ifi dema yoac mong heima yofi edeyunuec, “Ngic dzofinactoaogoc mongngo uayau semeng fora homac anu <sup>17</sup> semenga dahai faiudeac negengemema <sup>18</sup> yofi ambade negenec, ‘Ni semengama dafiguc mekecduae, yeni hembarackema monggoc meyadiyunuma mema semeng nga wiacna gombunga sasawa kpedzucnema ihai kpeturanggebade. <sup>19</sup> Kpeturanggeba wisickeu neanna ubaonganaac yofi debade, ni kifa homacacsoc wiac gombunga bic kpedzucnedua, imocngo kekecna meefaiu menec amma sogac sogaigoc kecbade.’ <sup>20</sup> Ifi deu Anutungo yeac yofi deec, ‘Kapangic, tofocnac yomohaingoc kekecga wangecgugecde. Nga wiacga mekpedzuc amma wanade, imoc goa yeneng megecde.’”

<sup>21</sup> Nga Yesungo monggoc torokpeec, “Ngic mong ye yengenaac amma bangecac dzofinactoa mekpedzuc amma Anutuac kicfu ine dzofinaha kpac kecde, yeac kekeha imocacsoc anude.”

<sup>22</sup> Imocac amma Yesungo medacfora yofi edeyunuec, “Neni noc yaka nenide nga sebininau noc wamba heima kecni. Ngeni imocac kekecnginaac defagung mi ambisia. <sup>23</sup> Kekecngo yaka ferahaude nga sebingo ngakpikporuc ferahaude. <sup>24</sup> Ngeni wondong yenenggec. Yeni heikpenec nga netohong mong mi negenggec Anutungo sifu eng semeng yemmekecde. Nga Anutuac kicfu ngeneng neng yeneac engena andae. <sup>25</sup> Ngeneanunac mongngo dewaidzoc amma kefu imocngo kekecnasoya kapianec monggoc naric mi mehereude. <sup>26</sup> Ngeni wiac kapia ifiaac obohoma tosea goaac ifingoc negengyohoc mi ambisia.

<sup>27</sup> Dzaring eng tohoandae, ngeni yenembisia. Yeni witic mi yumuandae amma uatoa mi mema sifu yadiandae. Ngictau Saromongo warac wamba kibia gombunga gombunga heikefu kibikperagitoayango ine dzaring yeneac kibi kereng kereng mi ferahaec. <sup>28</sup> Nga dzaring amasobennu eng tohoandae, yeni yagucac fingeadae nga ngic yeni wereckenu herecgema gerecfu ukuyunugecde. Nga Anutungo dzaringtehec ifia wamba heiyem-meudeu yeng ifingoc ngicngac negen negensingngina kapia mekecdae, ngeni ngakpikporucngina torokpeu torokpe imoc monggoc ngenmeude.

<sup>29</sup> Imocac ngeni noc yaka nga doku dahacnac fima negecdeac negengyohoc nga demadzac imoc wabisia. <sup>30</sup> Nga bangeha bangeha ngicngac yeneng imoc megecdeac negen negengngina imohai faigec fekecde. Nga ngeni wiac imocac obohoandae, Mangnginango imoc bic negende. <sup>31</sup> Ngeni yeac eucerereng meficgegecdeac ua mebisia nga wiac imocnoc ifingoc torokpeu torokpe megecde.”

<sup>32</sup> “Habubisic, ngeni mi ebiribisia. Mangngina ye eucererenga ngenmeudeac negenu ngereede. <sup>33</sup> Ngeni finacngina suegec ngicngac yeneng imoc bummedacgec ngeni dzo imoc mema ngicngac makpekpea kecdae, yeni ubangerecac wiac imoc yemmebisia. Ngeni dzobirang mi barackeudeac meficgebisia. Nga ngeni dzofinac kuha mi maude, imoc kurumennu kpedzucnebisia. Ihai hamangecngic yeni mi hagecde nga dzaukpadzadzangngo wiac mi memanganeude. <sup>34</sup> Imoc yofiac, ngeni dzofinacngina nofu faigec fede, imohaingoc ubasongongina ifingoc feude.”

<sup>35</sup> “Ngeni kporucngina seria kpema kifangina kpedzereckema efaima kecbisia. <sup>36</sup> Ngic kuneng ye memeturang amaunac hama naguu heiu ua ngihango yeac tomai kecma nagu bic witimiude, ngeni ifi isoc tomai kecbisia. <sup>37</sup> Nga mingingnginango hama uamedacfora yeni gaugbori kecgec meficyunuude, yeni kenecnginagoc. Foracngoc, ye yengenaoc yeneac kingang kpeudeac kporuha mewegenema ‘Ngeni tacmagec.’ deu tacgac yaka meha yemmeu negecde, imoc edengunuduae. <sup>38</sup> Ye tofocnac dzongiau me ama werec wereckenggac gaugbori kecmagec hama yenenudeu uamedac imoc yeni kenecnginagoc. <sup>39</sup> Hamangecngic ye ama hetackema engande. Nga ama mingina mong ye hamangecngic noc nasou haude nengendeu ye hamangecngic kpae heimiude. <sup>40</sup> Nga ngeni Ngicac Medacac aua mi negemmagec ye haude, imocac amma ngeni ifingoc efaima kecbisia.”

<sup>41</sup> Anu Petorongo deec, “Kebu, ge yoac heima dedammoc, imoc neneac me ngicngac sasawa yeneac denec?” <sup>42</sup> Ifi deu Kebungo yofi merenec, “Amagareng gombunga mong negen negentegehagoc minginaac yoac dede modacande, minginango amagareng ifia uayoac miu ye uamedacfora yeneac enarangina amma yaka nasou hendzicma deecfu negecdeac yemmekefude. <sup>43</sup> Yemmekefu minginango dzigene hama henu uamedacngo ua imoc medarudeu uamedac ye kenehagoc. <sup>44</sup> Foracngoc, minginango wiara sasawa garenggeudeac demiude, imoc fora yombong. <sup>45</sup> Anu wanacngic mong ye yengenaocngoc ine yofi negensiudeu, ‘Minginnango bic mi haude.’ Ifi dema ua ngicngac goa yunuma minginaac wiac nedacma doku seria nema ubea sufuude. <sup>46</sup> Ifi anudeu wanacngic ye tomai mi kecma minginaac uamemenaso nga auaya mi negemmanu minginango haude. Hama uamedac imoc herecge meickeu kemema negen negensingngina kpac, yenigoc kefude. <sup>47</sup> Nga wanacngic mong ye minginaac yoac negemma mi efaima kecde, yeng dzikac ebiria kiude. <sup>48</sup> Nga wanacngic mong ye minginaac uayoac nga songo mi negemma dzikacac arennu faka goa angande, ye dzikac efeaneacsac kiude. Ngicngac yeneng ngic mong wiac ebiria migec mekecde, yearu wiac ebiriangoc fingecmiudeac negenggecde. Nga yeni ngic mong wiac homac garenggeudeac uayoac migec mekecde, yeng wiac monggoc negen negengtegecgoc garenggeu imoc mi memanganeudeac negenggecde.

<sup>49</sup> Ni bangecfu gerec habuya habuya fiba dzeudeac mayai. Amma gerec imoc bic dzebacfu ubana ngereeac. <sup>50</sup> Amma ni dokunadzic siriha mong nadzicbesare. Ni imoc negemma herenango ebiriu kecma uana imoc hafaogoc wisickeu herena ngereeude. <sup>51</sup> Ni bangecfu ruae meficgebadeac mayai, ngeni imoc mi negembisia, imoc kpac. Ni ine tohoemegecdeac mayai, imoc edengunuduae. <sup>52</sup> Nga yofinenggac nga hamma enude, imohai ngicngac 5 ama mana monnu kecdac, yeni tohoma kecgecde. Harebec yeneng yohockang yerigoc nga yohockang yeri harebec yenigoc ngaba ngaba angemegecde. <sup>53</sup> Yeni tohoma manggacngo medac yegoc ngaba anude nga medac yeng mamagoc ngaba anecde. Nenggac ye naroangagoc ngaba anude nga naroangngoc nonggeagoc ngaba angemeecde. Nga erangi yeri tohoemema ngaba angemeecde.”

<sup>54</sup> Anu Yesungo ngicngac yeneac yofi deec, “Ngeni wenac keme kemeau hoeng mong hemma yofi bic deandae, ‘Kia kuneng kpeude.’ ifi degec kia kpeude. <sup>55</sup> Nga sautfunac firang kpeu negemma yofi deandae, ‘Bangec gerea anude.’ degec ifi angkecde. <sup>56</sup> Ikcngic, ngeni bangecfu nga sawau

wiac fingecande, imoc hemma naric isinggegede. Nga naso yofinenggac kecdimbe, imocac faka hemma isinggebau dede imocngo naric ambac.

<sup>57</sup> Amma ngeni faka damocngo dindingac ande, imoc ngenaoc isinggebau dede imoc naric ambac. <sup>58</sup> Anu ngabaga mongngo yoacfu faiguudeac meguu ngerahafoc sinnu kengkecdape, ge imohai yoangira dengerecedeac uatoa mebesena. Ifi mi annadeu ye desi desingc yearu faiguude. Nga desi desingcngo keracnatanggaru faiguu keracnatangngo witicamau faiguude. <sup>59</sup> Faiguu ge ihai takecma ngabagaac turung hafoangoc nga dzo wisic wisickea yombong kpoumaguc witicamaunac manade, imoc edeguduae.”

## 13

<sup>1</sup> Naso imohaingoc ngic goa yeneng Yesu siduc yofi ammigec, “Garirai-angic goa yeni sesenginaac yang Anutuac hosuc heimagec Piratongo deu ngicfora yeneng kemma yunuhomema sacngina imoc sesenginaac yang sawagoc meturanggegec.” <sup>2</sup> Ifi degec Yesungo yofi kpesiyemmeec, “Ngic homegec, yeneac kopocsicngo gariraiangic sasawa yeneac kopocsic ferahacac ifi fingecyemmeec, ngeni imoc negensidae me? <sup>3</sup> Nga imoc kpac yombong. Ngeni ubangina mi merenggecedeu ngeni sasawango yeni homegec, ifi isocngoc homedacgecede, imoc edengunuduae. <sup>4</sup> Nga Siroang amaherecngo barackema ngicngac 18 witinginau mama yunuhommeec. Imocac ngeni dafi negensidae, yeneac kopocsicngo Yerusarennu ngicngac sasawa kecdae, yeneac ferahade me? <sup>5</sup> Imoc kpac yombong. Nga ngeni ine ubangina mi merenggecedeu ngeni sasawango yeni homegec, ifi isocngoc homedacgecede, imoc edengunuduae.”

<sup>6</sup> Anu Yesungo yoac mong heima yofi edeyunuec, “Ngic mong ye fig ic mong waing uayau homeru nanec. Nanu ye kemma fora hofocma <sup>7</sup> waing uac gareng edeec, ‘Ic yomocac fora hofocma kebarec kifa harebec bic ande nga ye nocac eng namma bangec kereha nedarude? Imocac ic imoc herecgema ukuna.’ <sup>8</sup> Ifi deu waing uagarengngo deec, ‘Kunenna, ge imoc wana kifa yomohai ifingoc nammanu haniau usuma bangec goa kerehagoc heikeyebesare. <sup>9</sup> Ifi amba ngadeguc fora gombunga anude gedang. Nga fora mi anudeu ge naric herecgema ukubesena.’”

<sup>10</sup> Sabata naso monnu Yesungo kpeketurang ama monnu emma kpoukpou ua meec. <sup>11</sup> Meu ngac mong imohai tarec, ye hafeiac hadehade mongngo ngadea mendanggeu ngadehokuc kefu kifaya 18 bic anu naric mi kpehengaibac. <sup>12</sup> Nga Yesungo ye hemma yearu haudeac kpacma edeec, “Ngac negenna, ni hafeiga meickeba kpac ande.” <sup>13</sup> ifi dema maria witiau faimanu ngac ye ngadea bic kpehengahaima sorongaiu yacma namma Anutu dengerec.

<sup>14</sup> Ifi anu kpeketurang amaac gareng yeng ine Yesungo sabatau mengec mengere ua meecac herebu negemma ngicngac edeyunuec, “Uameme 6 fede, imohai ua mebesonga. Ifi anu ngeni naso imohai hagec mengerengunugecede nga sabata nasou ine kpac.” <sup>15</sup> Ifi deu Kebungo merem-miec, “Ikocngic, ngeni sasawa burumaka nga donggicfocngina doku yem-megecedeac sabata nasou yungecyunugec, yeni amanginaunac magec meyunu kengandae, imocngo ngereede. <sup>16</sup> Nga ngac yomoc Abrahamngac naroannoc, ye ine Satangngo kifa 18 bic dzegeu kecmanu sabata nasou yungec yungera anude, imoc negenggec ifingoc ngereede.” <sup>17</sup> Yesungo ngabafora turunga ifi merengyemmeu yeni gameyunudarec. Nga ngicngac



tosea yeni ine faka engena sasawa meu henggec, imocac sogac sogai andagec.

<sup>18</sup> Imocac Yesungo yofi deec, “Ni noc wiacfusing yoac heiba ngeni Anutuac eucererenggac siriha naric negentegecgecde? <sup>19</sup> Imoc mastet gbomea isoc, ngic mongngo mastet gbomea mema uayau homeru yadima ic wegena anu sawau neng yeneng hama fawau faec heigec.”

<sup>20</sup> Ifi dema Yesungo monggoc deec, “Anutuac eucerereng, imoc noc wiacfusing yoac heiba negenggecde, <sup>21</sup> Imoc yis isoc, ngac mongngo farawa 20 kiroacsoc meu uuha yisgoc yerecgema meu hafoangoc yisagoc anude.”

<sup>22</sup> Yesungo taong nga amabisicfu yerecgema ngicngac yenearu kpoukpou ua mema Yerusarennu kenudeac kenec. <sup>23</sup> Kemmanu ngicngac goa yeneng kpesimigec, “Kebu, ngicngac efeanec, yenengsac komoc kpegecde me?” ifi degec Yesungo yofi merenec, <sup>24</sup> “Ngeni nagu kapiau enggecdeac ua seserigoc mekecbisia. Ni edengunuba, ngicngac homac yeni Anutuac eucererennu enggecdeac uatoa mema obohogece.”

<sup>25</sup> Nga ama minginango yacma nagu heiu ngeni ngadeau namma naguu heima degecde, ‘Kebu, nagu witinemmena ereni.’ Ngeni ifi degec yeng merengngemmema yofi deude, ‘Ngeni dahacnac? Ni mi negengngunudu-uae.’ <sup>26</sup> Ifi deu ngeneng degecde, ‘Neni gegoc nenedoku neing nga geng neneac sinnu namma edekpou anemmenec.’ <sup>27</sup> Ifi degec, yeng ine monggoc edengunuude, ‘Ngeni dahacnac? Ni mi negengngunudu-uae. Manganameme, ngeni neac kicfunac meickegec.’

<sup>28</sup> Ngeni Abrahang nga Isaka amma Yakobo nga profete sasawa Anutuac eucererennu tacgec yenenggecde. Nga ngeni ine ngadeau ukungunugec kemegecde. Ihai ngeni kiacma enac kisaranggema kecgecde. <sup>29</sup> Nga ngicngac yeni wenac ere ereaunac nga keme kemeaunac amma nort amma sautnacngo hama Anutuac eucererennu tacma neneyaka negecde. <sup>30</sup> Amma goa ngadea kecandae, yeni warac warac anggecde nga warac warac kecandae, yeneng ngadea anggecde.”

<sup>31</sup> Naso imohaingoc farisaio goa yeneng hama Yesuac degec, “Herodengo gubeso andeac bangec yomoc wama kenna.” <sup>32</sup> Ifi degec Yesungo yofi merengyemmec, “Ngeni kemma katekasi imoc yofi edegec, ‘Negenec, ni yaguc nga wereckenu hadehade nga yafing kporacyunuma hafeigoc mengereyunuba uameme harebecfu uana wisickeude. <sup>33</sup> Ni yaguc nga wereckenu amma wereu kengkecbade. Profete yeni bangec goau naric mi yunuhomebesonga, kpac. Yeni Yerusarennusac yunuhomebesonga, faka ifi fede.’

<sup>34</sup> Yerusareng Yerusareng, ge profete yunuhomeannec nga ngic gearu sueyunuyunuya, yeni hocngo yenereannec. Nga Kokorec nonggeango nambaracfora kpeganga bageau fororacyunuande, ni ifi isoc naso homac nambaracfogca kpedzucngunubadeac negembare ngeneng ine imocac songo mi negenggec. <sup>35</sup> Negendae, amangina kisi nanude nga ngeni monggoc mi nenggecde kecma yofi degecde, ‘Kebuc kpacfu ngic hade, ye kenehagoc.’ ifi degecde, imohai ngeneng monggoc nenggecde.” *(Mitiyegec 118:26)*

## 14

<sup>1</sup> Yesungo sabata naso monnu farisaio yeneac enarameme monggac amau yaka neudeac enu farisaio yeneng yeac haifaka hennegeng amma tacgec. <sup>2</sup> Imohai ngic mong sebua yadi yadia, yeng hama Yesuac kicfu nanu

<sup>3</sup> Yesungo dedeseriyoacac negen negengngic nga farisaio yofi kpesiyem-meec, “Sabatau ngic mengec mengereyunuac sing mong fede me kpac?”

<sup>4</sup> Ifi deu yeni turunga mong mi merenggec Yesungo ine ngic imoc maringo mema mengerema sueu kenu <sup>5</sup> yofi edeyunuec, “Ngenearunac monggac medac me burumaka mongngo dokuteng monnu kemeu sabata naso anu ye sifu bic kemma kpedziu ereude.” <sup>6</sup> Ifi deu yeneng yoac imocac turunga meremmigecdeac obohogec.

<sup>7</sup> Anu imohai ngic heitaiyunuyunuya goa yeneng tatac warac warac isinggema ihai tacgec Yesungo yenensima yoac heima yofi dema edeyunuec,

<sup>8</sup> “Ngic mongngo memeturanggac yakau heitaiguude, imohai ge yakaac tatac warac waracfu bic mi tacbesena. Ngic heitaiyunuyunuya, yenearunac mongngo gedang geac engena anu <sup>9</sup> ngic ye nga ge ngerahafoc heitainguruec, yeng hama yofi edeguude, ‘Ge meickemana ngic yomocngo taru.’ Ifi deu gameguu tatac wisic wisickeau yombong kemma tacnade. <sup>10</sup> Ngic mong heitaiguu ge ine kemma tatac wisic wisickeau tacbesena. Ifi anna ngic heitaiguuec, yeng hama gemma yofi gedang deude, ‘Tosona, ge tatac warac waracfu ekemma tacna.’ Ifi deu ngicngac bic tacdae, yeneac kicfu ewehaihei anggenude. <sup>11</sup> Ngic mong ye yengena sebi meengande, ye memagecde nga mong ye sebia memameande, ye meenggecde.”

<sup>12</sup> Nga Yesungo ngic heitaieic, yeac ifngoc yoac mong yofi deec, “Ge wenacfu me marai yakaneneac areng goa heitaiyununade, imohai ogofocga me dacmunac me arengfocga me dzofinacnginagoc geac wegenacfu kecdae, yeni mi heitaiyunubesena. Yeneng turunga gedang monggoc kpougenggec sing imohai turungga bic menade, imoc mi ngerede. <sup>13</sup> Ge heitaiyununadeac yaka mengereneac, naso imohai ine ngic makpekpea nga sebilangang nga hanimangang amma kicpisc heitaiyunubesena. <sup>14</sup> Ge ifi amma kenecgagoc annade. Imoc yofiac, ngic imoc yeni turunga kpougenggecdeacsoc mi anggecde. Nga geng yaka imocac turunga imoc ngicngac dindingac gborima yacgecde, naso imohai menade.”

<sup>15</sup> Ifi deu yeni yaka netacma yoara negenggec yenearunac ngic mongngo Yesu edeec, “Mong ye Anutuac eucererennu emma yaka netarude, ye kenehagoc.” <sup>16</sup> Ifi deu Yesungo yofi edeec, “Ngic mongngo nenesemeng kuneng mengereudeac negemma ngicngac homac yeneac yoac faima heitaiyunuec. <sup>17</sup> Heitaiyunuu yakaneneac naso hau ye wanacngiha sueu yeng ngic heitaiyunuec, yeni edeyunuudeac kemma deec, ‘Hagec, wiac sasawa bic mengereding tacde.’ <sup>18</sup> Ifi deu ngic sasawango degbedic amma ngic warac warac yeng deec, ‘Ni bangec mong bummedua, imoc hambadeac kembeso negenduae, imocac negenna mi manganebeso.’ <sup>19</sup> Nga mongngo deec ‘Ni burumaka ngiwa 10 uaac amma bummedua, imocac kemma uau tobangyunubeso negenduae, imocac negenna mi manganebeso.’ <sup>20</sup> Ifi deu obangira mongngo deec, ‘Ni ngac medua, imocac amma naric mi habade.’ <sup>21</sup> Nga wanacngic ye kemma yoac imoc sasawa mingina edeu minginango herebu negemma wanacngic yofi edeec, ‘Ge taonggac sinnu nga singbiscfu bic kemma ngicngac makpekpea nga sebilangang amma kicpisc nga hanimangang, yeni hesicyununa hagec.’

<sup>22</sup> Ifi deu wanacngicngo kemma deec, ifi isoc amma dzigenema yofi edeec, ‘Kunenna, ge dedang, imoc bic andacdua nga ama manau ine tatec fedengoc.’ <sup>23</sup> Ifi deu minginango deec, ‘Ge singtoa nga singbisc fedacde, imohai kemma ngicngac yenemma hagecdeac serima dema hesicyunuma hana yeni amana mana yomoc mewakebisia. <sup>24</sup> Ngic heitaiyunuyunuya,

yenearunac mongngo yakana ohoai, imoc naric mi nehembesande, imoc edengunuduae.’”

<sup>25</sup> Yesungo kenu ngicngac habutoango ye modacma kenggec dzigenema yenemma deec, <sup>26</sup> “Ngic mong ye hama modacnubeso negenside, ye yengena nonggomama nga eneng nambaracfora amma dacmunac nga yengena kekeha ifingoc mi ngadeheudeu ua medacna naric mi anude. <sup>27</sup> Nga mong ye yengena mariponga mi tofohoma modacnuudeu ye medacna naric mi anude. <sup>28</sup> Ngenearunac ngic mongngo kicfifiac amaherec mebesonga negende, ye ama naric medarude me kpac, imocac waicke tacma hanahema iwaiac buma osoareng andarudeu ngereeude. <sup>29</sup> Nga ye hanahema ifi mi amma eng simenga yerecgema faima ama tosea mi medzickebac dede ngicngac yeneng imoc hemma deendema ammima <sup>30</sup> yofi degecde, ‘Ngic yomoc ye ama mebesonga amma kuha mong mi feecac ama ua mi mesiec.’

<sup>31</sup> Anu ngictau mongngo ngicfora 10 tauseng eng meyunuma kemma ngictau mong ye ngicfora 20 tauseng, yenigoc ewegecde, imoc mi ngereeude. Ye matacma yofi isinggemaguc anude, neac ngicfocna 10 tauseng yeneng ngabafocna hagecde naric yunugecde me kpac. <sup>32</sup> Imoc naric mi anudeu yen hereaungoc kecmagec yeng gubekisang ngic ruae dafi fingerudeac sueni kenude. <sup>33</sup> Imocac ngenearunac mongngo yengena wiac sasawa mi ngadehedarudeu ua medacna naric mi anude.

<sup>34</sup> Kondung imoc wiac gombunga. Nga kondungngo kiacma songea kpac anudeu ine ye songea monggoc naric mi meficgeude. <sup>35</sup> Kondung ifiango yaka sereau ukuni memefic mi anude nga bangec kereha semeng uau faian-dae, imocgoc kpeturanggenideac siric ifingoc mi ande. Imoc eng ukuandae. Kedzahagoc yeng yoac yomoc negembeso.”

## 15

<sup>1</sup> Takesimeme ngic nga manganameme sasawa yeneng Yesuac yoac negembesonga yeac hoannu kendacgec. <sup>2</sup> Nga farisaio nga mitiac negen negengngic yeneng negenggec imoc naric mi anu nasosoc yofi dekecgec, “Ngic yomoc ye manganameme hoangyunuma yenigoc yaka neande.” <sup>3</sup> Ifi degec Yesungo yoac mong heima yofi edeyunuec, <sup>4</sup> “Ngenearunac ngic mong ye ramafora 100 femide. Ifi femiu yenearunac rama mong sufuudeu minginango dafi anude? Ye rama 99 wayunuu bangec kisiu nangec kemma mocgu imoc hofockecma meficgeude. <sup>5</sup> Meficgema ubangerec negemma fuayau faima tofohoma mekenude. <sup>6</sup> Mekemma ameau kensikema ngic ogofora nga tosofora wegenac kecdae, yeni kpacyunuma yofi edeyunuude, ‘Ngeni hagec nenahafoc sogaini. Ni ramana sufuec, imoc meficgedua.’ <sup>7</sup> Ifi isoc ngic kopocsihagoc mocgungosac ubamereng anu sogac sogai siriha imocngoc kurumennu fingerude, imoc edengunuduae. Nga ngicngac 99 yeni ubamerenggac sing mi obohoma kpetiac bic kecdae, yeneac amma sogac sogai ifia mi fingerude.

<sup>8</sup> Me ngac mong ye siriwa dzoya 10 mekecma mong ukuu sufuudeu ye dafi anude? Ye kifaya kpedzereckema ama wanggema serima hofockengkecma meficgeude. <sup>9</sup> Meficgema ngac ogofora nga tosofora wegenac kecdae, yeni kpacyunuma yofi edeyunuude, ‘Ngeni hagec nenahafoc sogaini. Ni dzona ukuba sufuec, imoc meficgedua.’ <sup>10</sup> Nga ngic kopocsihagoc mongngo ubea merenu Anutuac angero yeni yenahafoc ifingoc sogaignecde, imoc eden-gunuduae.”

<sup>11</sup> Yesungo torokpema deec, “Ngc mong ye medahora yohockang kefoc. <sup>12</sup> Nga medaha kapiango mama edeec, ‘Manggac, ge dzofinac goa hendzicma neac nobohana nenna neannaoc mekecbade.’ Ifi deu mangngirango iwaiya hendzicma medahora yemerec. <sup>13</sup> Yemeru naso mi hereemanu medaha kapia ye dzofinaha kpedzucnedacma mema bangec hereau kenec. Kemma imohai bangecac sicsauckekecfu dzofinactoya mekefec, imoc ukudarec. <sup>14</sup> Ukudaru kpac ammanu bangec imohai bodittoa fingeru ye yaka nga wiac sasawaac obohoec. <sup>15</sup> Obohoma bangec imocac mingina mong yearu kemma ogo ammiu yeng bereha garenggeudeac berecodau sueu kenec. <sup>16</sup> Kenu berec yeneng yaka sebera negec, imoc neudeac ammiac nga mongngo ine yaka mong mi gumegec.

<sup>17</sup> Ifi anu ye yengenaoc kekeha hentegecma deec, ‘Mannaac uamedacfora yaka negebec angandae. Nga neng ine yei yakaac homema homebeso anduae. <sup>18</sup> Imocac ni yacma mannaaru kembadeac negenduae. Kemma yofi edebade, “Manggac, ni kurumeng arenggac nga geac kicfu momoc kopocsic meficgeai, <sup>19</sup> imocac monggoc medacga kpacnugecde, imoc mi ngereude. Ge sifu menuna yagurangicfocga yenearunac mong isoc amma kecbesare.”’ ifi negemma kenec.

<sup>20</sup> Amma medac ye hereaugoc kemmanu mamango bic hemma yeac ubea manganeu yearu nedzima kemma tofohoma titikokoc ammiu <sup>21</sup> medacngo deec, ‘Manggac, ni kurumeng arenggac nga geac kicfu momoc kopocsic meficgeai, imocac medacga monggoc kpacnugecde, imoc mi ngereude.’ <sup>22</sup> Nga manggacngo ine wanacngicfora yofi bic edeyunuec, ‘Ngeni bicbic kemma ngakpiherec gombunga yombong mehama heimigec kemeu gbonggac ring heimima hanitabe haniau heimigec kemeu. <sup>23</sup> Ngeni kemma burumakamedaha gbofoma, imoc mehagec kpema nenahafoc nesogai anni. <sup>24</sup> Medacna yomoc ye bic homeec, ifi negening ammanu ye kekec monggoc meficgedac. Ye sufuecfunac monggoc meficgeding.’ Ifi deu yeni nesogaitoa anggec.

<sup>25</sup> Ifi ammagec medaha kunengngo semeng uau kecma ihacnac ama mewegenema hama ine musi nga yegec fede fedeac udumeng negemma <sup>26</sup> uamedac mong kparu hau kpesimiec, ‘Noc faka fingece?’ <sup>27</sup> Ifi deu uamedacngo turunga yofi merenec, ‘Munagango kpesipiriha kpac gombunga amau monggoc dzigenedacac amma manggango deu burumakamedaha gbofoma kpeding.’

<sup>28</sup> Ifi deu dara ye herebu meficgema ngadeau namma amau enudeac mi ammiu mamango mama amau enudeac demekiri ammiu <sup>29</sup> darango mama edeec, ‘Negenna, ni kifa dafiguc geac wanac ua mema kecma yoacga mong mi kpeai. Ifi mekecba ogofocna yenigoc noningmedaha mong nenideac mong mi nennec, kpac. <sup>30</sup> Nga medacga imoc ye iwaiga singtoangagoc kecma ukuma hau geng ine yeac amma burumakamedaha busia kuneng kpenec.’

<sup>31</sup> Ifi deu mamango deec, ‘Medacna, ge nasosoc nigoc kecannecc nga neac wiac sasawa imoc geacnoc. <sup>32</sup> Nga nenang yaguc ubangerec negemma nesogai ambisina. Munaga yomoc ye bic homeec, ifi negening ammanu ye kekec monggoc meficgedac. Ye sufuecfunac monggoc meficgedingac ifi anni.’”

## 16

<sup>1</sup> Yesungo medacfora yoac yofi edeyunuec, “Ngic mong dzofinacgoc yeng dzogareng ngic mong meec. Meu yeng yegoc kecma yeac dzofinac garenggekefec. Garenggekefu goa yeneng yeac yofi dema edegec, ‘Dzogarengga imoc ye dzofinacga mi garenggema sicsauk faiande.’ Imocac amma yeng dzogareng kparu hau <sup>2</sup> edeec, ‘Geac fakaga mangana degec negengkecduae. Dzogarengna monggoc naric mi kecnade. Ge imocac dzofinacac nga uagaac siduc hafoangoc ohoma nenna.’ <sup>3</sup> Ifi deu dzogareng yengenaocngoc yofi negenec, ‘Ngickunennango dzogareng ua nearunac meickeude. Nga ni ama uamemeac osiduae amma kucna mi fede, derecgenecngic ambadeac gamenude, imocac dafi ambade?’

<sup>4</sup> ‘O, yaguc nengenduae. Uaunac meicnugec kpac anu goa yeneng amanginau heitainugecdeac faka mong ambade.’ <sup>5</sup> Ifi negemma ngic sasawa kunengaac turung mekegec, yeni tembuc tembuc kpacyunuec. Kpacyunuu ngic warac enec, ye kpesimiec, ‘Ge kunenna yearunac turungga dafiguc annec?’ <sup>6</sup> Ifi deu meremmiec, ‘Oriwa kereha kes 600.’ Ifi deu edeec, ‘Ge turungkibiga mema bic tacma kes 300sac ohona.’ <sup>7</sup> Dema ngic mong kpesimiec, ‘Nga ge turung dafiguc annec?’ Kpesiu meremmiec, ‘Wit toru 800, imocacsoc.’ Ifi deu edeec, ‘Ge turungkibiga mema 640sac ohona.’ <sup>8</sup> Anu dzogareng mangana ye negengising amma anecac dzofinac minginango dengereec. Nocac bangectoa bangec yomocac medacfora yeni kperagiaac medacfora ferahema ebiringoc meficemeandae.

<sup>9</sup> Neng ine yofi edengunuduae, dzofinac yengenaocngoc fakaya dindingac kpac, ngeni wiac imoc mema ogo gboria meficgebisia. Ifi anggec dzofinacac naso kpac anude, imohai ogofocnginango bangec feengkefude, ama imohai heitaingunugec enggecde. <sup>10</sup> Ngic mong ye yoac modacma wiac kapianec gombunga garenggeande, ye ifingoc yoac modacma wiac kuneng garenggema kefude. Nga mong ye yoac mi modacma ikoc amma wiac kapianec gombunga mi garenggeande, ye ifingoc yoac mi modacma ikoc amma wiac kuneng gombunga mi garenggeude. <sup>11</sup> Nga ngeni yoac mi modacma bangecac dzofinac mangac manganea gombunga mi garenggegecde isoc ngic mongngo dzofinac fora garenggegecdeac maringinau naric mi faiude. <sup>12</sup> Nga ngeni yoac mi modacma ngic monggac dzofinac gombunga mi garenggegec isoc, imohai wiac ngeneac desi desia imoc ngemmegecdeac osiude. <sup>13</sup> Uamedac mocgungo ngic kuneng yohockang yereac kingang naric mi kpeude. Ye monggac songo negemma mong ngadeheude me monggaru kpeketahema mong waude. Ngeni, Anutu nga dzofinac yereac kingang sofucngoc kpegecdeacsoc mi ande.”

<sup>14</sup> Yesungo yoac imoc deu farisaio yeni hiedzoac songo kuneng feyem-meeac amma imoc negemma detenic ammigec. <sup>15</sup> Ammigec Yesungo yofi edeyunuec, “Ngic yeneng dindingac dengemmegecdeac ngeni imoc yeneac kicfu faka dindingac angkecdae. Nga Anutungo ine wiac ubaherenginang fede, imoc negendacde. Imoc yofiac, ngic yeneng wiac monggac negenggec engena angkecde, imoc Anutungo henu faka mangana yombong ande.

<sup>16</sup> Moseac dedeseriyoac nga profete yeneac yoac dekperagigec erema Yohane fingeru naso imoc wisickede. Nga imohacnac erema ngicngac yeneng Anutuac eucerereng dekperagigecde. Dekperagigec ngicngac yeni serima ihai endae. <sup>17</sup> Bangec nga kurumeng meickeu kpac anude, imoc efeac nga Anutuac dedeseriyoac imohacnac dzikangabisic meic meicke imoc ine

naric mi fingerude. <sup>18</sup> Ngic mong ye enema wama ngac mong meude, ye serofaka anude nga mong ye ngac wawaya meude, yeng ifingoc serofaka anude.”

<sup>19</sup> Anu Yesungo monggoc deec, “Ngic mong kefec, ye dzeingakpia gombunga linengno memea\* amma ngakpia witiau sacsac siriha gombunga heima wenacsoc nenesemengtoagoc nga ondzonggboc amma songo witiau takefec. <sup>20</sup> Nga yeac amasinnu, oda ngadeau ine ngic mong makpekpea kpara Radzaro kefec. Ye sebiau kubecngo wake wakea nga ngic yeni ihai faigec fekefec. <sup>21</sup> Fema ngic dzofinacgoc yeac tebounac yaka tosea maande, imoc neudeac ammikefec. Nga kasi yeneng ine hama kubeha aberekegoc.

<sup>22</sup> Kecma ngic makpekpeango homeu angero yeneng ye mekemma Abrahngac hoannu faigec kefu ngic dzofinacgocngo ifingoc homeu tonggogec.

<sup>23</sup> Tonggogec ye homecamau kecma ihai kpendzeng kuneng kpekefec. Ifi kpekecma kic fima henu Abrahngngo hereau yombong tarec nga Radzaro henu yeac hoannu tarec. <sup>24</sup> Ifi hemma kpacma deec, ‘Abrahng manna, ni yei gerec manau kpendzeng kuneng kpeduae, imocac amma ge ubaga neac manganeu Radzaro suena kemma gbonga susiango dokuu nemurucke hama nedzaranna menomanau.’ <sup>25</sup> Ifi deu Abrahngngo yofi deec, ‘Medacna, ge wiac mong negensibesena. Ge bangecfu kecmana ngicngac yeneng iwai gombunga gombunga genggec mekecna Radzaro ine manganasac migec. Yaguc Radzaro yei menomanedae nga geng ine kpendzeng kpekecnec. <sup>26</sup> Nga monggoc torokpema deduae, botucninau tufatoa faifaia fede. Ifi anu mongngo yeihacnac ferecgema gearu haude me ihacnacngo yei haha, imoc osiosia.’

<sup>27</sup> Ifi deu dzofinacgocngo deec, ‘Ifi anu manggac derecegembu, ge Radzaro suena mannaac amau kenu. <sup>28</sup> Dacmunafocna 5 ihai kecdae, yeneng kpendzengbancgoc yomohai habauac ye kemma gorongina kpema edeyunubeso.’ <sup>29</sup> Ifi deu Abrahngngo ine yofi deec, ‘Yeni Mose nga profete yeneac yoac mekecma negengkecbisia.’ <sup>30</sup> Ifi deu dzofinacgoc kefecngo deec, ‘Abrahng manna, imoc kpac. Ngic mongngo homecfunac gborima kemma edeyunuu ine ubamereng anggecde.’

<sup>31</sup> Ifi deu Abrahngngo yofi deec, ‘Yeni Mose nga profete yeneac yoac mi negemma wagecdeu ngic mongngo homecfunac gborima deu ye ifingoc naric mi modacgecde.’”

## 17

<sup>1</sup> Anu Yesungo medacfora yeneac yofi deec, “Ngicngac faka mangana anggecdeac faitobang, imocngo bangecfu fingerude. Nga ngic mongngo ngicngac ogofora faitobang ifia ayemmeude, ye ine sowehagoc. <sup>2</sup> Ye nambarac kapia yenearunac mong mangana mi kpoumiudeac ye yagucnoc dzamandzing ubeau ubahemina kondunnu ukugec kemeu, imoc yearu ngereebac.

<sup>3</sup> Ngeni ngenaocngoc garengemema kecbisia. Tosoga mongngo kopocsic meficgeudeu ge goroyoac edena. Nga ye ubea merenudeu kopocsiha wabesena. <sup>4</sup> Nga ye uameme mocguac manau atac 7ngoc ge memanganeguu naso 7 ifingoc gearu dzigenema hama yofi deude, ‘Kopocsic yomoc anaiac ubahodung negenduae.’ Imoc deudeu kopocsiha wakecbesena.”

<sup>5</sup> Anu aposoro yeneng Kebuac degec, “Ge negen negensinnina meyadinemmena.” <sup>6</sup> Ifi degec Kebungo yofi merengyemmeec, “Negen negensingnina kapia mastet gbomea isoc fengemmeudeu ngeni fig ic

\* **16:19:** Lineng imoc dzaring mong dzuama imoc ambi feranga isoc.

yomoc ye yengenaoc godeagoc fukema kondunnu kemema nanudeac edegec ye enacngina tofohoma naric kemema nanude.”

<sup>7</sup> “Anu ngeneacunac mongngo wanacngiha bangec mendzic mendzic kefude me ramaburumaka garenggekefude, yeng semeng uaunac hama amau ereu minginango matacma yaka neudeac mi deude. <sup>8</sup> Ye ine yofi edeude, ‘Ge ngakpikporucga mewegenema yakana mengerema henggareng anemma tomal nanna. Tomal nammana neba wisickeuguc ge yaka naric nenade.’ <sup>9</sup> Minginango wanacngic uayoac ifi miu yeng yoara tofohoma ua medacdac, imocac ubangerecyoac mi edeude. <sup>10</sup> Ngeni ifingoc wiac anggecdeac dengedengemnea, imoc mesidacma yofi debisia, ‘Neni wanacngic amma uaninasac meding.’”

<sup>11</sup> Yesungo ifi dema Yerusarennu kenudeac sing modacma Samaria nga Gariraia botucngirau kenec. <sup>12</sup> Kemma guruama monnu emmanu ngic 10 kukuseringinagoc sinnu hamagec meficyunuec. Anu yeni hereaungoc namma <sup>13</sup> kpacma degec, “Yesu, kunennina, ge neneac ubaga manganeu.”

<sup>14</sup> Ifi degec Yesungo yenemma edeyunuec, “Ngeni kemma womong gareng fingecyemmema sebingina edzacyunuec.”

(*Sesememe 14:1-32*)

Ifi deu yeni sinnu kemmagecngoc sebingina ngereec. <sup>15</sup> Ngeregec yeneacunac mongngo sebia ngereeu hemma dzigene hama seriagoc arohoma Anutu dengereec. <sup>16</sup> Dengerema Yesuac haniau kicmesuya hetutuckema makpe fema yeac ubangerec yoac deec. Amma ngic imoc ye Samariangic. <sup>17</sup> Ye ifi anu Yesungo kpesimiec, “Ni negemba ngic 10 yeneng ngerec ngeree meficgedau nga ngic 9 yeni damoc? <sup>18</sup> Ngic yomoc ye areng monnunacngo yeneac botucfunac yengsac Anutu afeheudeac dzigenema hade nga goa yeni ifingoc anggec naric ambac.” <sup>19</sup> Dema Yesungo yeac yofi deec, “Ge yacma kenna, negen negensingango mengeregudac.”

<sup>20</sup> Farisaio goa yeni Anutuac eucerereng noc nasoac haudeac Yesu kpesimigec yofi merengyemmeer, “Anutuac eucerereng hau ngeni imoc kicngo naric mi henggecde. <sup>21</sup> Amma yofi naric mi degecde, ‘Ngeni henggec, ye yoc me ngeni henggec, ye edimoc.’ Negengec, Anutuac eucerereng imoc ubaherenginau fede.” <sup>22</sup> Ifi dema medacfora yeneac yofi deec, “Kecma naso mong hau ngeni Ngicac Medacac uameme mocgusac henggecdeac angemmeude amma naric mi henggecde. <sup>23</sup> Nga ngicngac yeni ngeneac yofi degecde, ‘Ngeni henggec, ye edi.’ me ‘Ngeni henggec, ye yei.’ Ifi degec ine mi modacyunubisia nga ihai bic mi kembisia. <sup>24</sup> Imoc yofiac, sawau piratac heiu kperagiango nobocnac ferecgecma noboc kengande, Ngicac Medac ye ifi isocngoc hahanasoyau fingectegerude. <sup>25</sup> Hanahema ine naso yomocac kisis yeneng ye ngadehegec kpendzeng homac kpeude.

<sup>26</sup> Noaac nasou faka fingerec, Ngicac Medacac haha nasou faka ifiangoc fingerude. <sup>27</sup> Ngicngac yeni nenedoku nema ngic ngacfu kenggec nga manggac yeneng degec, ‘Ni naroanna ngic mibade.’ Ifi angkecmagec Noango wageu enu doku yadima wiac sasawa semedaru manganeu kpac andarec.

<sup>28</sup> Nga Rotiac nasou faka ifiangoc fingerec. Ngicngac yeni nenedoku nema iwai bummema suema neneyaka mehomeckecma ama mekecgec. <sup>29</sup> Nga wenac mong ifi amma kecmagec Rotingo Sodong waec, wenac imohaingoc Anutungo negenu kurumennunac gerec nga sarafa hoc\* imoc ine kia isocngo mama wiac sasawa dzedaru kpac andarec. <sup>30</sup> Nga Ngicac Medac fingectegerudeac nasoyau faka ifia isoc fingerude.

\* **17:29:** Sarfa hoc imoc hoc mong dzagec dzagec. Gerecfu dzeu gereha gerecyohoc ande.



<sup>31</sup> Naso imohai ngic me ngac mong ye ama witiau tarude nga iwaiyango ama manau taru ye imoc meudeac ama manau mi embeso. Nga mong ye semeng uau nanude, ye ifingoc ameau dzigene mi kembeso. <sup>32</sup> Roti enemaaru faka fingerec, ngeni imoc negensibisia. <sup>33</sup> Ngic mong ye kekeha segereudeac ua mekede, ye kekeha ukuu sufumiude nga mong ye kekeha ukuu sufuude, ye kekeha fingeciude. <sup>34</sup> Tofocnac imohaingoc yohockang yeri fefe mocguac witiau femaec Kebuac areng yeneng yerearunac mong mema mong ine wagec feude. <sup>35</sup> Nga ngac yohockang yerahafoc imohaingoc namma flawa medzamema kecmaec Kebuac areng yeneng yerearunac mong mema mong ine wagec nanude. <sup>36</sup> Nga ngic yohockang yeri semeng uau kecmaec Kebuac areng yeneng yerearunac mong mema mong ine wagec uau kefude, imoc edengunuduae.” <sup>37</sup> Ifi deu medacfora yeneng kpesimigec, “Kebu, faka imoc dahai fingerude?” Kpesimigec Yesungo yofi merengyemmeec, “Koec koec neng yeni fareng fede, imohai eacgede.”

## 18

<sup>1</sup> Medac yeneng nasosoc modzotitia kpac nunumu ua megecdeac Yesungo yoac mong heima yofi edeyunuec. <sup>2</sup> “Yoac isic isingge ngic mong ye taong monnu kefec. Ye Anutuac kengec mi angkefec nga ngicngac yeneac ewehelhei mong mi angkefec. <sup>3</sup> Nga taong imohaingoc ngac hodzec mong kefec, ye nasosoc yearu hama yofi dekefec, ‘Ngabafocna yeneng memanganenubeso amma kecdaeac neac yoac dindingac dema meficnubesena.’ <sup>4</sup> Ngac ye ifi dekefu yoac isic isinggengo meficgeudeac mi negenec. Amma ngade ngac imocac modzea tiu yengenaocngoc ine yofi negenec, ‘Ni Anutuac kengec mi anduae nga ngic yeneac ewehelhei mong mi negenduae. <sup>5</sup> Nga ngac hodzec yomoc ye nasosoc nearu hama hatahenengkecde, imocac amma yoara mengeremibesare. Ifi mi ambadeu ye nasosoc hakefu modzona tiyombonggeude.’”

<sup>6</sup> Anu Kebungo yofi deec, “Ngeni yoac isic isinggengo faka dindingac mi modacande, yeng yoac deec, imoc negensibisia. <sup>7</sup> Anutungo ngicngacfora meisingngunuec, ngeneac amma modzea mi tiude. Ngeni hadzing toforec ye meficngunuudeac kiacnginango yearu kenu ye ngeneac amma faka dindingacfu meficngunuudenoc. <sup>8</sup> Nga nasongina mi mehereema faka dindingac fingecngemeudeac ua bic meude, imoc edengunuduae. Nga Ngicac Medacngo haude, imohai ngicngac ye negensinggedae, ngicngac ifia negemba homac kecgede.”

<sup>9</sup> Ngic goa yeni yenanggac negenggec dindingac anu goa ngadeyunuma kegec, yeneac negemba Yesungo yoac mong heima yofi deec, <sup>10</sup> “Ngic yohockang, farisaio mong nga takesimeme mong, yereng numuecdeac Anutuac womonnu enoc. <sup>11</sup> Emma farisaiongo yacma namma yengenaac negemba yofi dema numuec, ‘Anutu ni ngic goa, godzungic nga faka mangana me kaisero angandae, yeni isoc kpac. Nga takesimeme ngic edimoc, ni ifingoc ye isoc kpac, imocac ubangerec edeguduae. <sup>12</sup> Amma sondasoc uameme yohockang yakasege kecanduae nga wiac sasawa mekecduae, imoc 10nunac mocgu genganduae.’ <sup>13</sup> Anu takesimeme ngic yeng farisaioac hereau namma kpehengahima kurumennu fiu enudeac negengebirima ine ngonducnema mokuhausu kpema yofisac dema numuec, ‘Anutu, ni kopoc-sicmeme, ge neac ubaga manganeu.’ <sup>14</sup> Nga takesimemengo ifi deecac Anutuac kicfu ngic dindingac amma amau kenec, imoc edengunuduae.

Nga farisaio ye ine kpac. Ngic mong ye yengena sebi meende, yeni ye memagecde nga mong ye yengena sebi memaemeude, ye meenggecde.”

<sup>15</sup> Ngicngac goa yeni Yesungo sabacfoengina mariango kpesereyunuudeac yearu meyunu hagec. Hagec medac yeneng yenemma ine kpetariyem-megec. <sup>16</sup> Kpetariyemmegec Yesungo ine kpacyunuma deec, “Nambaracbisic yeni nearu naric hagec, ngeni kpac mi heiyemmegec. Anutuac eucerereng imoc nambaracbisic yofia yeneac. <sup>17</sup> Foracngoc, mong ye nambarac kapia angkecdae, ifi isoc mi angkecde, ye Anutuac eucererennu naric mi enude, imoc edengunuduae.”

<sup>18</sup> Ngic enara mongngo Yesu kpesimiec, “Kpoukpou gombunga, ni dafi amma kekecseri mebade?”

<sup>19</sup> Ifi deu Yesungo yofi meremmiec, “Ge nocac gombunga denendang? Anutuac mociungo gombunga kecde. <sup>20</sup> Ge dedeseriyoac yomoc bic negennec, ‘Ge kaisero mi ambesena, ngicngac mi yunuhomesesena, hamangec mi mebesena, enacfu faifai mi ambesena nga nonggo manghocga seseheyurubesena.’” *(Makekeng 20:12-16; Dedeseri 5:16-20)*

<sup>21</sup> Ifi deu ngicngo merenec, “Ge denec, imoc sasawa sebigborinaungoc angereai.”

<sup>22</sup> Ifi deu Yesungo imoc negemma edeec, “Ge wiac monggac engngoc kpedadangenec, imoc yofi ambesena. Finacga sasawa fegende, imoc suena hiedzo kirecgeu imocngo ngicngac makpekpea medereyemmebesena. Ifi anna kurumenggac dzofinac fingeccenu hama modacnubesena.” <sup>23</sup> Ifi deu ngic ye yoac imoc negemma ubaebic kuneng meec, nocac ye dzofinactoa homac femiec.

<sup>24</sup> Yesungo ngic henu ubaebic meu yofi deec, “Ngic dzofinactoaogoc yeneng Anutuac eucerereng manau enggecdeac uatoa yombong ande. <sup>25</sup> Kamerengo bungic singau engeng imoc ua efea nga ngic dzofinactoaogocngo Anutuac eucererennu engeng, imocngo ine uatoayagoc.” <sup>26</sup> Ifi deu ngicngac yeneng yoac imoc negemma kpesimigec, “Ifi anu merang naric komoc kpeude?” <sup>27</sup> Ifi degec Yesungo deec, “Ngic ngeni faka goa megecdeac obohodaec, imoc Anutungo naric meude.”

<sup>28</sup> Ifi deu Petorong deec, “Negennec, neni ama nga iwainina wama ge modacguma kecdimbe.” <sup>29-30</sup> Ifi deu Yesungo yofi deec, “Ni foracngoc eden-gunuduae, ngic mong ye Anutuac eucererenggac amma amea me enema me nambaracfora nga dacmunafora amma nonggomama wayunuma kecde, yeac yofi fingerude, ye warac iwaiagoc kefec, imoc ferahema kecec nasoyau iwaia monggoc homac meficgeude. Amma wisickeu bangec siraha mong haude, imohai kekecseri ifingoc meficgeude.”

<sup>31</sup> Anu Yesungo medacfora 12 ngadeau meyunuma yofi edeyunuec, “Nengendaec, nenang Yerusarennu ennide. Enni imohai profete yeneng warac Ngicac Medacac yoac kibinginau ohogecmoc, imocac fora fingeccardude. <sup>32</sup> Nga ngic yeni ye mema faigec bangec monnunac ngic Anutu mi negemmidae, yeneac mariu enu yeneng detenic nga meenti memati ammima desofoc ammigeccde. <sup>33</sup> Amma dzikacngo ye kpekecma kpehomegeccde. Nga ye uameme harebec ammanu ine monggoc gborima yarude.” <sup>34</sup> Ifi deu medac yeneng yoac imoc negemma mong mi negengireckegec. Yoac imocac hania imoc yenearu sufu sufuya feu Yesungo yoac deec, imoc mong mi negengireckegec.

<sup>35</sup> Yesungo Yeriko taong mewegenemanu ngic kicpisis mongngo sing tegiau tacma iwaiac derecgekefec. <sup>36</sup> Amma negenu ngicngac habutoango ferahema kengha anggec kpesiec, "Imoc dafi andae?" <sup>37</sup> Kpesiu edegec, "Yesu Nadzaretenc, yeng ferecgema kende." <sup>38</sup> Ifi degec yeng kunengngoc kpacma deec, "Yesu Dawidiac bangec, neacnec ubaga manganeu." <sup>39</sup> Kparu ngicngac kiwau kenggec, yeneng kpetarimima waickema tarudeac edegec yeng ine monggoc arohoec, "Dawidiac bangec, neacnec ubaga manganeu." <sup>40</sup> Kparu Yesungo namma kicpisis yearu mekenggecdeac edeyunuu yeni wegenac mekenggec Yesungo yofi kpesimiec, <sup>41</sup> "Ni noc wiac anggembadeac negennec?" deu merenec, "Kebu, kicfifi ambadeac negenduae." <sup>42</sup> Ifi deu Yesungo edeec, "Negen negensingango mengeregudeac, ge monggoc kicfifi anna." <sup>43</sup> ifi deu ngic ye imohaingoc kicfifi amma Yesu modacma Anutu dengereu ngicngac sasawa yeneng imoc hemma Anutu dengeregec.

## 19

<sup>1</sup> Yesungo Yeriko ferecge kemmanu <sup>2</sup> takesimeme ngic yeneac enara mong dzofinactoyagoc, kpara Sakaio, ye ihai kefec. <sup>3</sup> Yeng Yesu ye ngic dafia dema hembesonga negenec. Amma ye ngic wegena anu ngicngac homac yeneac botucfu nanecac Yesu naric mi henec. <sup>4</sup> Ifi anu Yesungo sing kenudeac kenec, ye ngicngac yeneac botucfunac ihai waraima nedzi kemma fig ic mong nanec, imocac witiau emma kic fima tarec. <sup>5</sup> Taru, Yesungo imohai kensikema kiwa fiu enu edeec, "Sakaio, ni yaguc amagau hama tacbade, ifi negenduaeac ge bic mana."

<sup>6</sup> Ifi deu Sakaiongo icfunac bicbic mama Yesu ubangerecgcoc hoanggeu ameau kenoc. <sup>7</sup> Kenec ngicngac sasawa yeneng imoc hemma negenggec naric mi anu degec, "Yesungo manganamemengic yeac amau nocac kendac?" <sup>8</sup> Ifi degec Sakaiongo ine ihai namma Kebuac deec, "Kebu negenna, finacna mekecduae, imocac noboha ngicngac makpekpea yemmebade nga goa ikoc ayemmema wiac meai, yeneac turung atac fo meemma monggoc yemmebade."

<sup>9</sup> Ifi deu Yesungo yofi deec, "Anutungo yaguc ama mana yomocac mingina ebicfunac mesiyunuu komoc kpegecde. Ngic yomoc ye ifingoc Abrahanggac kiscifunac. <sup>10</sup> Imoc yofiac, Ngicac Medac ye ngicngac sufu sufuya hofoyunuu nga kpedzucyunuude amma ebicfunac meyunuudeac maec."

<sup>11</sup> Ye ifi dema kemma Yerusareng taong mewegeneec, imocac yeneng yofi negenggec, "Anutuac eucerereng imoc kicinaiu yombong bic fingectegerude." Ifi negenggecac amma Yesungo yoac mong heima torokpema yofi edeyunuec,

<sup>12</sup> "Ngic mongngo ngickunenggac arenunac fingec fingera, yeng yofi negenec, 'Ni bangec hereau kemba yeneng ngictau kpac nenggec dzigenema bangec yomocac ngictau ambade.'" <sup>13</sup> Nga ye kembesonga dema wanacngicfora 10 kpacyunuma dzo mong kpara mina mocgu tembus tembus yemmema deec, 'Ni kembareng ngeni dzo yomocngo emekeng emeha amma kpetea meyadibisia.\*' <sup>14</sup> Nga ngic yeac ama mocgufora, yeneng ine ye ubango ukugec. Ifi anu ye kenu ngic goa yofi dema edeyunuma sueyunugec kenggec, 'Yeng neneac ngictau kefudeac songo mi negendimbe.'

<sup>15</sup> Nga ye ihai kefu yeneng ngictau kpac migecc kecma monggoc dzigenema bangehau haec. Hama wanacngicfora dzo yemmeec, imoc dafi meyadigec,

\* 19:13: Mina mocgu imoc wenac 100ac uabung.

imoc negenudeac kpacyunuec. <sup>16</sup> Kpacyunuu wanacngic warac warac yeng hama deec, 'Kebu, ni dzo nennec, imoc meyadima dzo 10 monggoc meficgeai.' <sup>17</sup> Ifi deu ngictaungo yofi deec, 'Ge wanacngic gombunga amma ua gombunga medang. Ge yoac dedena modackecma wiac kapia gombunga garenggedangac taong 10 garengyununadeac uayoac nga kuc genduae.' <sup>18</sup> Nga wanacngic ngade, yeng hama deec, 'Kebu, dzo nennec, imocngo dzo 5acsoc monggoc meyadiac.' <sup>19</sup> Ifi deu ngictaungo edeac, 'Ge taong 5 imocac gareng faiguduae.'

<sup>20</sup> Anu ua ngic mongngo hama deec, 'Kebu, dzoga yomoc kporuc manau sufuba tarec, imoc henna. <sup>21</sup> Ge ngic gerea amma kpekpeturang uaac hiedzo mi faima sifu meannec. Nga uau heihomec mi amma sifu foraya kpedziannec, imocac geac kengecnuu ifi anai.' <sup>22</sup> Ifi deu ngictaungo deec, 'Ge wanacngic mangac manganea, yoacga meremba imocngo giude. Ni ngic gerea amma kpekpeturang uaac hiedzo mi faima sifu meanduae. Nga uau heihomec mi amma sifu foraya kpedzianduae, imoc bic negennec. <sup>23</sup> Nga ge nocac dzona yomoc dzo tohonu mi fainec? Ifi ambannu dzigenema dzona imoc nobohagoc mebai.'

<sup>24</sup> Ifi dema ngicngac goa ihai nanggec, yeneac deec, 'Ngeni dzo imoc wangepma wanacngic minadzoya 10 femide, ye migec.' <sup>25</sup> Ifi deu yeneng degec, 'Kebu, ye dzoya 10 bic fede.' <sup>26</sup> Ifi degec yofi merengyemmeec, 'Ngic mong wiac goa femide, ye wiac monggoc migecde nga mong ye wiac mong mi femide, yearu wiac fedemoc, imoc ifingoc wangepgecde, imoc edengunuduae. <sup>27</sup> Anu ngabafocna yomoc yeni neng ngictaungina kecma garengyunubadeac wagec, ngeni ngic imoc yei meyunu hama kicnau yunuhomegec.' "

<sup>28</sup> Yesungo yoac ifi deu wisickeu ye waraima Yerusarennu enec. <sup>29</sup> Emma tiki kpara Oriwa, imocac wegena hama Betefage nga Betania amabangec mewegenema medac yohockang, yofi dema sueyuruec. <sup>30</sup> "Ngeri dindingac kemma amabangec sing enarau tacde, imohai enec donggi medaha mong ngicngo witiau mi tatara, imoc witickegec nande. Nanu ngeri imoc meficgema witic yungecma mema haec. <sup>31</sup> "Ngeri nocac donggi yungecdape?" Ifi kpesigecdeu ngeri yofi debesera, 'Kebungo imocgoc ua meudeac dede.' " <sup>32</sup> Yesungo ifi dema ngic sueyuruu kemma yeng deec, imoc sasawa meficgedaroc. <sup>33</sup> Meficgema donggi medaha yungerec minginango deec, "Ngeri nocac donggi medaha yungecdape?" <sup>34</sup> Ifi deu yereng deoc, "Kebungo imocgoc ua meudeac dede." <sup>35</sup> Ifi dema yeri donggi medaha imoc Yesuaru mema kenoc. Amma Yesungo emma tarudeac yeri ngakpingira herea hesima donggi medahaac witiau kpesorohoma Yesu enudeac meficgeoc. <sup>36</sup> Meficgeec ye emma tacma kenec, imohai ngicngac yeneng ngakpiherecngina hesima sinnu tiamegec.

<sup>37</sup> Nga Yerusareng wegenac Oriwa tikiac sing keme nande, imohai yeac arengfora habu kuneng yeneng kucfaka hengkecgecac amma ubangerec negemma udumengyadango Anutu dengerema yofi degec,

<sup>38</sup> "Ngictau Kebuac kpacfu hade, ye kenehagoc. Kurumennu ruae feu sawau wi dedengerec febeso." *(Mitiyegec 118:26)*

<sup>39</sup> Ifi kpacma dengeregec farisaio goa habu yeneac botucfu nanggec, yeneng Yesuac degec, "Kpoukpu, ge arengfocga dena waickebisia." <sup>40</sup> Ifi degec Yesungo merengyemmeec, "Yeni waickegecdeu hoc yeneng arohogece, imoc edengunuduae."

<sup>41</sup> Yesungo Yerusareng mewegenema taong imoc hemma kiacma <sup>42</sup> yofi deec, “Geng yofinenggac ruaegoc kecnadeac sing hentegecna ngereebac. Nga sing imoc ine yaguc sufu sufu fema kicgau mi fingctegecde. <sup>43</sup> Geac nasoga haude, imohai ngabafocga yeneng noboc noboc orongguma bangec usuma heiemma igocgugecde. <sup>44</sup> Igocguma yeneng memanganeguma nambaracfogga geac botucfu kecdae, yeni yunuhomedacgec bangecfu fegecde. Amma geac manau hoc mong wagec mongngo manggac witiu mi tarude, nocac Kebugango hadac, ge imoc mi hentegecdang.”

<sup>45</sup> Amma Yesungo Anutuac womonggac oda manau emma ngicngac yeneng wiac emekeng emeha amma nanggec, yeni kporacyunuma <sup>46</sup> yofi edeyunuec, “Yoaç oho ohoya yofi fede,

‘Ni womonna yomocngo nunumuac ama ambeso.’ *(Yesaia 56:7)*  
 Nga ngeneng ine imoc merenggec hamangecmeme yeneac sufu sufuama ande.” *(Yeremaia 7:11)*

<sup>47</sup> Anu Yesungo wenacsoc womonnu kpoukpou ua meu womong gareng enara nga mitiac negen negengngic amma habu yeneac enarafocngina yeneng ye kpegecdeac nasoyombonga hofocma kecgec. <sup>48</sup> Nga ngicngac yeni yeac yoaç negenyombonggema kecgec nga yoara mong wagecdeac mi negenggec. Imocac amma ngaba yeneng ye meickegecdeac sing mong mi meficgegec.

## 20

<sup>1</sup> Yesungo naso monnu Anutuac womonnu ngicngac edekpou ayemmema siduc gombung edeyunuu womong gareng enara nga mitiac negen negengngic amma yudangic enarafocngina yeni yenhafoc hama kicnginau namma <sup>2</sup> kpesimigec, “Ge noc kucfu ua yomoc menec nga merang uayoac imoc genec? Imoc edenununa.” <sup>3</sup> Ifi degec yeng yofi merengyemmeec, “Ni ifingoc kpesingemmeba wiac mong edenugec, <sup>4</sup> Yohanengo dokunadzic ua mekefec, imoc kurumennunac me ngicfunac?” <sup>5</sup> Ifi deu yeni yenaocngoc denegeng amma degec, “‘Imoc kurumennunac.’ Ifi denideu yeng yofi kpesinemmeude, ‘Anu ngeni nocac ye mi negensinggegec?’ <sup>6</sup> Amma ‘ngicfunac’ ifi denideu ngicngac sasawa yeneng hocngo neneregecde nocac yeni Yohane ye profete, imoc ubaherenginango negensidae.” <sup>7</sup> Ifi dema meremmigec, “Dahacnac haec, imoc mi negendimbe.” <sup>8</sup> Ifi degec Yesungo yofi merenec, “Ifi degec, ni merang uayoac nenu ua mekecduae, imoc ifingoc mi edengunubade.”

<sup>9</sup> Ifi dema Yesungo yoaç mong heima ngicngac yofi edeyunuec, “Ngic mongngo waing uayau waing homerec. Homeru wisickeu waing ua garenggegecdeac ngic meficynuma yenigoc uayoac dedzege anggec nga yengena ine naso herea bangec monnu kefudeac kenec. <sup>10</sup> Kemma kecmanu fora kpememe naso hau wanacngiha mong sueu waing uaac gareng yenearu kenu yeneng waing fora imohacnac yeac noboha migegecdeac kenec. Kenu waing uaac gareng yeneng wanacngic imoc dzoboya kpema entegeng suegec kenec. <sup>11</sup> Kenu minginango ifi hemma ngic mong sueec. Sueu kenu waing uaac gareng yeneng ye ifingoc kpema faka mangana yombong ammima entegeng suegec kenec. <sup>12</sup> Kenu wanacngiha atac harebec sueu kenu yeneng ye ifingoc kpegec sawa mau kporacgec kenec.

<sup>13</sup> Ifi anu ua minginango yofi deec, ‘Dafi ambade? Ni medacyombonna songo negemmianduaemoc, ye sueba kenu ye sifu eweheimigece.’ <sup>14</sup> Dema medacyombonga sueu waing uaac gareng yeneng ye hemma yenaocngoc

denegeng amma degec, ‘Yeng kecma ua yomoc tiu enude. Nenang ye kpehomeni yeac bangec nga maridzoming imoc nenang anude.’ <sup>15</sup> Ifi dema medac imoc kporacgec oda ngadeau kemeu kpehomegec.”

Ifi dema Yesungo kpesiyemmec, “Ua mingina imocngo waing uaac gareng yeni dafi ayemmeude? <sup>16</sup> Yeng hama waing uaac gareng yunuhomema waing ua imoc uagareng goa yeneac mariu faide.” Ifi deu yeneng imoc negemma yofi degec, “Ifi naric mi fingebeso.” <sup>17</sup> Ifi degec Yesungo yenemma yofi deec, “Yoac yofi oho ohoya nande, imoc titiha negensibisia,

‘Amameme ngic yeneng hoc mong mangana dema ukugec. Nga hoc imocngo amaac hoc wotung amma seria nanude.’ *(Mitiyegec 118:22)*

<sup>18</sup> Ngicngac sasawa hoc imocac witiau mayunude, yeni sebingina tegerude. Nga hoc imocngo yeneac witiu makpema hedzameyunuu kapuc kpegecde.”

<sup>19</sup> Mitiac negen negengngic nga womong gareng enara yeni imohaingoc ye mebeso anggec. Yesungo yeneac yoac heima deec, imoc bic negenggec amma ngicngac yeneac kengecyunuu ine wagec.

<sup>20</sup> Anu yeni Yesu hembima ngicfocngina sueyunugec, yeneng yoara negendimbe siric yearu kenggec. Kemma noc yoac dafi deu negemma ine prowinsiac desi desingc yeac mariu faigeceac negenggec. <sup>21</sup> Nga ngic imoc yeneng Yesuac degec, “Kpoukpou, ge yoac denec nga wiac kpounemmenec, imoc fora sasawa. Amma ge Anutuac sing ngicngac edekpou ayemmema yoac monde monde mi angkecnecc, geac ifi negendimbe. <sup>22</sup> Imocac ede-nununa, neni takesi ngictau Sisa naric minide me kpac?” <sup>23</sup> Ifi degec Yesungo ikocngina hentegecma yofi edeyunuec, <sup>24</sup> “Ngeni dzo mong edzacnugec hembra. Onga nga kibi yoc, imoc meracac?” deu degec, “Imoc Sisaac.” <sup>25</sup> Ifi degec Yesungo deec, “Imocac ngeni Sisaac wiac, imoc Sisa mibisia nga Anutuac wiac, imoc Anutuac mibisia.” <sup>26</sup> Ifi deu yeni ngicngac yeneac kicfu enacfu faifai ammima meme, imoc obohogecc. Amma yoacngina turunga merenecc, imocac kerecgec amma yoac mong mi degec.

<sup>27</sup> Anu Sadukaio yeneng homecfunac yacyac mong mi fede, ifi deandae. Amma yeneacunac goa Yesuaru hama kpesimigecc, <sup>28</sup> “Kpoukpou, Mosengo dedeseriyoac yofi ohonemmec,

‘Ngic mong ye ngac mema gboriha kpac kecma homeu ngic imocac muneango daraac hodzec mema gboric kpeficgema daraac kpac mi-acma kecbeso.’ *(Dedeseri 25:5-10)*

<sup>29</sup> Naso monnu dacmunac seweng kegcgc nga waracdacnginango ngac mema gboriha kpac kecma homeec. <sup>30</sup> Homeu muneango daraac hodzec mema <sup>31</sup> eng kecma homeec. Anu munangirango hodzec imoc mema ifingoc sabaha kpac kecma homeu dacmuna seweng yeni ngac imocngoc mema gboricfocngina kpac kecma homedacgecc <sup>32</sup> amma ngac ye wisickeu ifingoc homeec. <sup>33</sup> Amma yeng ngic seweng yeneac enengngina amma kecma yacyac nasou ye dacmunac seweng yeneacunac meracac enema anude?”

<sup>34</sup> Ifi degec Yesungo yofi merengyemmec, “Bangec yomocac kekecc nasoac medacfora yeneng ngac meandae nga manggac yeneng yofi deandae, ‘Ni naroana ngic mibade.’ <sup>35</sup> Nga ngicngac homecfunac gborima yacyac nga kekeseri megecdeacsoc andae, yeni ihai eweeneng mi anggecde. <sup>36</sup> Yeni homecfunac yacyac, imocac kisis anggecde. Amma yeni Anutuac nambaracfora kecma angero isoc anggecdeac yeni monggoc naric mi homegecde.

<sup>37</sup> Homecfunac yacyac fede, imoc Mosengo ifingoc ohoma dekperagiec. Imoc yofi, icfu gerec dzeu ye hemmanu Kebuac dede yoacfu yofi fingerec, ‘Ni Abrahang nga Isaka amma Yakobo yeneac Anutu.’ *(Makekeng 3:6)*

<sup>38</sup> Yeac hehennu yeni sasawango kekecnginagoc. Ye gbori kecdimbe, neneac Anutu, homemea yeneac Anutu kpahac.” <sup>39</sup> Ifi deu mitiac negen negengngic goa yeneng yofi degec, “Kpoukpou, ge yoac gombunga yombong denec.”

<sup>40</sup> Anu imocac ngadeau yeni kengecyunuu mongngo kpesi kpesi monggoc mi kpesimigec.

<sup>41</sup> Ifi anu Yesungo yofi deec, “Ngeni yoac yofi negembisia, yoac mong yofi fede, ‘Messia ye Dawidiac arenunac fingerude.’” <sup>42</sup> Nga Dawidi ye yengenaoc Mitiyegecfu yofi deec fede,

‘KEBUNGO neac Kebuna yofi edeac, “Ge foinaugeng tacmana <sup>43</sup> ngabafocga hanigaac bageau faiyunuba yeni hanititiga anggecde.”’ *(Mitiyegec 110:1)*

<sup>44</sup> Imocac Dawidi ye ‘Neac Kebu’ kparecngo dafu yeac arenunac ande?”

<sup>45</sup> Yesungo ngicngac sasawa yeneac kicfu medacfora yofi edeyunuec,

<sup>46</sup> “Ngeni mitiac negen negengngic yeneac henghomema kecbisia. Yeni ngakpi herec gombunga faima amayuguc anggecdeac songo negengandae nga suenefu kemma ngicngac yeneng yeneac wenacngerec deyem-megecdeac songongina kuneng fede. Amma yeni kpekpeturang amau nga yakatoa nasou warac warac tatacfu tachesonga songongina angkecde.

<sup>47</sup> Amma yeni ngac hodzec yeneac amangina wangecyunuandae. Amma yeneac negengngeree fingerudeac nunumu hereangoc numuandae. Yeni ikocfaka ifia angandaeac turunga ebiriangoc megecde.”

## 21

<sup>1</sup> Anu Yesungo kic fima henu ngicngac dzofinacgoc yeni sesengina Anutuac womonggac sesekatapau faigec kemeu <sup>2</sup> ngac hodzec makpekpea mongngo peni sacsac yohockang, ifisac faiu kemeu hemma <sup>3</sup> yofi deec, “Foracngoc, ngac hodzec yomoc ye hiedzoya kpac kecna dzo faima ngic sasawa sese faidau, imoc feracyunuma faidarec, imoc edengunudae.” <sup>4</sup> Imoc yofiac, yeni finactoangina wakema fede, imohacnac tosea mema sesengina faidau. Ngac ye ine noc wiac femidac imocnoc hafoangoc faidacma entengeng kecde.”

<sup>5</sup> Anu ngic goa yeneng Anutuac womong hoc kibia gombungango memea amma sese nga ubangerec hania haniango Anutu mikecgec, imocngo womong kibiagoc anudeac memengerec anggec, imoc hemma siduc degec Yesungo yofi edeyunuec, <sup>6</sup> “Ama yomoc hensongo homac andae, imoc naso herea mi tarude. Naso mong haude, imohai ngic yeneng imoc sasawa hembarackegecde. Hembarackegec hoc mongngo monggac witiau wagec mi tarude.”

<sup>7</sup> Ifi deu yeneng kpesimigec, “Kpoukpou, ge faka denec, imoc noc nasoac fingerude nga naso imohai noc soi fingeru hemma naso wegenede negennide, imoc edenununa.” <sup>8</sup> Ifi degec Yesungo deec, “Ngic yeneng ikocfu wangecngunubauac ngeni henghomema kecbisia. Ngic homac yeneng hama neac kpac kpacma yofi degecde, ‘Ni Messia.’ nga ‘Naso bic hadac.’ ifi degec ngeni mi modacyunubisia, kpac. <sup>9</sup> Nga ewekpekpetoa amma ubakpekpe udumengtoagoc fingeru ngeni imoc negemma kengec mi ambisia. Wiac ifia hanahema fingeCBSO nga naso ine imohaingoc yombong mi kpac anude.” <sup>10</sup> Amma monggoc torokpema yofi deec, “Bangec goa



yeneng ogofocngina yenigoc ewekpekpe anggecde nga ngictau monggac arengngo ngictau monggac areng yenigoc ngaba angemegecde. <sup>11</sup> Usoctoa meude nga bodinaso nga hafei kuneng bangec monnu nga monnu ifiangoc fingeckenude. Fingeckenu bangecfu nga sawau soi hania hania fingeru hengecde.”

<sup>12</sup> “Faka ifa mi fingeamanugoc yeni kpacnaac amma ngeni ngunukporac angemmema mengunuma kpekpeturanggac amaareng yeneac mariu faingunugecde. Nga yeneng witicamau faingunugec ngeni ngictau nga gawana yenearu mengunuma kengecde. <sup>13</sup> Nga naso imohainoc neac dedekperagi yoac edeyunugecdeac sing fingecongmeude. <sup>14-15</sup> Ni negen negentegec ngemmema yoac enacnginau faibade. Ifi amba ngabafocngina yeneac botucfunac mongngo yoac ngemmebade, imoc naric mi demaude me kpeude. Imocac amma ngeni yeneac kicfu noc yoac deni dema mi arenggekecbisia. <sup>16</sup> Kecma nonggo mang nga dacmunafocngina amma sactoso nga ogofocngina yeneng kererengunuma ngaba yeneac mariu faingunugec ngeneanunac goa yunuhomegecde. <sup>17</sup> Neac kpacnaac amma ngicngac sasawango ubango ukungunugecde. <sup>18</sup> Nga ngeneac orucnginaunac orucdzongina mongngo ine naric mi sufuude. <sup>19</sup> Ngeni seriangoc namma kekecngina onggonggegecde.

<sup>20</sup> Wasaingic habu yeneng hama Yerusareng oronggegecde, naso imohai ngeni yofi bic negenggecde, taong manganeudeac naso bic hade. <sup>21</sup> Imohai ngicngac Yudia bangecfu kecdae, yeni worama tikiu embisia nga Yerusareng taong manau kecdae, yeni worama ngadeau kemebisia amma ngadeau kecdae, yeneng Yerusareng manau mi embisia. <sup>22</sup> Naso imoc turung kpoukpou naso anude. Imohai yoac sasawa oho ohoya fede, imocac fora fingerude. <sup>23</sup> Naso imohai ngac heregoc kecdae nga nenggac sabac namuu meyunukecdae, yeni ebicnginagoc anggecde. Bangec yomohai ebic kuneng fingerude nga bangecac ngicngac witinginau ngaba fingerude. <sup>24</sup> Nga ngaba yeneng dzikacac beangngo ngic noboha yunuhomema noboha witicyunuma bangeha bangeha meyunuma kemma faiyunugecde. Amma bangeha bangeha ngicngac areng Anutu mi negemmidae, yeneng hama Yerusareng haninginango tima kecmagec nasongina dedea, imoc wisickeu kengecde.

<sup>25</sup> Naso imohai wenac nga afo amma asomeng yenearu soi fingerude. Nga bangeha bangeha ngicngac yeni ubaebic mema kondunnu namma kondung tembonggac udumeng negemma negengyohoc amma dafi ambesonga obohogece. <sup>26</sup> Ebic imocngo bangecfu fingerudeac ngicngac yeni imoc negemma negengyohoc nga kengec amma homecgboric anggecde. Sawau kuc sasawa yeni kockpac anggecde. <sup>27</sup> Anu naso imohai yeni Ngicac Medac hengec ye kuctoayagoc nga kibikperagitoayagocngo hoeng witiau haude. <sup>28</sup> Faka imoc fingecheso ammanu ngeni kpehengaima yacma orucngina miacma nambisia. Naso imohai ebicfunac mesingunugec enggecdeac naso wegeneude.”

<sup>29</sup> Anu Yesungo yoac mong heima yofi edeyunuec, “Ngeni fig ic nga ic sasawa hemma negembisia. <sup>30</sup> Ic yeni maringina besaiudeu wenac naso wegenede, imoc ngenaoc bic negenggecde. <sup>31</sup> Ngeni wiac sasawa deduae, imoc fingeru hemma ifingoc yofi negembisia, Anutuac eucerereng bic mewegenengunude.

<sup>32</sup> Foracngoc, ngicngac areng yomoc, yeni mi homemagec wiac yomoc fingeclarude, imoc edengunuduae. <sup>33</sup> Bangec nga kurumeng, yeri kpac

anecde nga neac yoc imoc naric mi kpac anude.

<sup>34</sup> Ubasufu nga dokunene amma bangecac negengyohoc imocngo mee-biringunubauac ngeni garengngina meemebisia. Wenac imoc utac fingec-ngemmebacac. <sup>35</sup> Wenac imohai subango yang kpeande, ifi isoc bangectoa bangec imohai hama ngicngac sasawa yenearu fingecdarude. <sup>36</sup> Imocac ngeni nasoc garengemema kecma nunumu ua mekecbisia. Mekecma wiac sasawa yomoc fingecbeso ande, imohacnac woragedeac kuc mema Ngicac Medac, yeac kicfu serima nanggecde.”

<sup>37</sup> Yesungo naso imohai wenacsoc Anutuac womonnu kpoukpou ua meec. Mema kecmanu ama marai anu tiki mong kpara Oriwa, imohai kenu toforeu takefec. <sup>38</sup> Wereckenu ngicngac sasawa yeneng Anutuac womonnu yeac yoc monggoc negenggecdeac kengkegcec.

## 22

<sup>1</sup> Hombang mong, ic sogong yisya kpac nene, kpara mong makekeng deandae, imoc wegeneec. <sup>2</sup> Wegeneu womong gareng enara nga mitiac negen negengngic yeni Yesu homecfu faigecdeac sing mong meficgegecdeac negensigec. Amma yeni obohogec nocac yeni ngicngac yeneac kenge-cyunuec. <sup>3</sup> Yuda kpara mong Karioto ye medacfora 12 yenearunac mong. Nga Satanggo yeac ubahereau kemeu <sup>4</sup> yeng kemma womong gareng enara nga womonggac keracnatang garengngina, yenigoc tacma Yesu sing dafu mema yeneac mariu faiudeac yoc denengngangec. <sup>5</sup> Nga yeni ubangerec negemma dzo kpetea mong dema migecdeac yoc dedzege angcec. <sup>6</sup> Yudango yenigoc uba mocgu amma sing dafu meficgema habu yegoc mi kecmagec Yesu sufu sufu yeneac mariu faiudeac kicfifi kefec.

<sup>7</sup> Kecma ic sogong yisya kpac nene, imocac hambannu ramamedaha kpeandae, uameme imoc hau <sup>8</sup> Yesungo Peto nga Yohane yofi dema sueyuruec, “Nenang makekenggac ramamedaha nenideac ngeri kemma yac mengerec.” <sup>9</sup> Ifi deu kpesimic, “Dahai mengerededeac negensinec?” <sup>10</sup> Deec merengyecmema yofi deec, “Ngeri kemma taonnu enecde, imohai ngic mong dokuenanga tofohoma hau ngeri yegoc ewacma modacma kemma ye ama monnu enu ngeri yegoc emma <sup>11</sup> ama mingina yofi edebesera, ‘Kpoukpoung yofi kpesigende, amamana damohai medacfocnagoc makekenggac ramamedaha nenide?’ <sup>12</sup> Ifi deec yeng ama witiau amamana mong kuneng edzacnguruude. Nga ihai wiac bic faifaia tacdacde, ngeri imohai iwai mengerebesera.” <sup>13</sup> Ifi deu yeni kemma Yesungo edeyuruec, imocac sirihau wiac meficgema makekenggac ramamedaha ohomengere anoc.

<sup>14</sup> Anu yakanene naso hau Yesungo medacfora yenigoc yaka nebeso tacma <sup>15</sup> yofi edeyunuec, “Ni makekenggac ramamedaha yomoc ngenigoc nebesonga homac yombong anende. Amma imoc nemaguc kpendzenu embade. <sup>16</sup> Imoc yofiac, ni yaka yomoc monggoc mi nene kecbarengoc Anutuac eucererennu foraya fingerude.” <sup>17</sup> Ifi dema kpakenec mong mema Anutu dengerema yofi deec, “Ngeni yomoc mema ngenaoc emema negec. <sup>18</sup> Ni waing gbomeaac dokuya monggoc mi nene kecbarengoc Anutuac eucerereng haude.” <sup>19</sup> Ifi dema ic sogong mong mema Anutu dangge edema mendzicma yemmema yofi deec, “Yomoc fusina, imoc ngeneac amma faifaia. Ngeni neac negensima imoc negec.” <sup>20</sup> Yaka negec wisickeu ye kpakenec ifingoc mema deec, “Kpakenec yomoc sacnaac dzadzahac gboria, imoc ngeneac amma kpetic kpetingea.

21-22 Ngicac Medac ye Anutungo sing demiecfu kenudenoc nga ngic docfu fainuude, ye maria neac marinagoc yakatebou tacdape, ngic imoc ye ine sowehagoc.” 23 Ifi deu medacfora yeni merang yeneac botucfunac faka imoc anude, ifi dema yenaocngoc kpesiemegec.

24 Anu medac yeni yenang botucfunac merang engena kecde, imocac yoacngina engemmama anu 25 Yesungo edeyunuec, “Bangec monnunac ngicngac Anutu mi negensinggeandae, yeni ngictaufocnginango ngicngac garengyunuma enac tofoc tofohofocngina meyunuandae. Ifi meyunuma ine yofi deandae, ‘Neni memefcngina kecdimbe.’ ”

26 Ngeneng ine ifi mi ambisia. Mong ye engena ande, ye ngadea ambeso nga enarangina kecde, yeng tosofora yeneac kingangkpekpengina siricfu kecbeso. 27 Imocac yofi kpesiduae, ngic merang engena ande? Ngic yaka eng tacma neude me yakau kingangkpekke ua mema kecde? Yaka eng tacma neude, ngeni yeac negenggecde. Nga neng ine sifu ngeneac botucfu kingangkpekke siricfu kecduae. 28 Amma ni faitobang manau kecbareng ngeni mi wanuma nigoc kegcac. 29 Mannango eucererenggac kuc neac mariu faiec, ifi isocngoc neng eucererenggac kuc ngeneac mariu faibade. 30 Faiba ngeni imocgoc kecma eucererennau yaka nga doku nema tacgecde. Amma ngeni ifingoc ngictautatac mema Israe kisis 12 yeneac fakangina isinggema desigecde.

31 “Simong, Simong, negenna, Satang ye ngic yeneng wit seuha kpegec maudeac kpemindaheandae, ifi isoc gombungaunac merengngunuu manganegecdeac bic arenggema derecgenendac. 32 Nga Simong ge ine negen negensingga ukuna mi maudeac, neng geac amma nunumu ua bic medua. Amma ubaga meremma nearu monggoc dzigenema dacmunafocga meseriyunubesena.” 33 Ifi deu Petorongu merenec, “Kebu, ni gegoc witicamau kembade amma homebadeac bic efaidua.” 34 Ifi deu Yesungo edeec, “Petoro, ni edeguba yaguc tofocnac yomohaingoc kokorec mi arohomanu geg neac sebiheina atac harebec anude.”

35 Anu Yesungo yofi edeyunuec, “Ni warac suengunuba kenggec, imohai dzobirang me hie me hanitabe mi mekecgec ngeni wiac monggac kpedadanggegec me?” Ifi deu yeneng degec, “Kpac.” 36 Ifi degec Yesungo yofi deec, “Nga yaguc ine yofi deduae, Ngic mong ye dzobirangagoc me hieagoc kecde, yeng imoc mebeso. Amma wasaibeanga kpac kecde, ye ngakpitoaya sueu hiedzo kirecgeu imocngo wasaibeang bummebeso. 37 Mitikibiui yoac ohoya fede, imocngo nearu fora fingeCBSO, imoc edengunuduae. Yofi, ‘Yeni yeac godzungic degec.’ (Yesaia 53:12)

Neac negemma yoac degec fede, imoc yaguc fora fingeCDarude.” 38 Ifi deu medac yeneng degec, “Kebu henna, neni wasaibeang yohockang mekecdimbe.” degec Yesungo deec, “Imoc soha.”

39 Dema Yesungo faka angkefec isoc amma taong wama Oriwa tikiu kenu medacfora modacma kenggec. 40 Kensikema yofi edeyunuec, “Ngeni faitobannu embauac numugec.” 41 Ifi dema medacfora wayunuma kapianec kpesima kemma fafoc heima 42 yofi dema numuec, “Manggac, ge negenna naric anu kpakeneC yomoc nearunac meickena. Amma neac songo mi fingeCBSO, kpac. Geac songo nga negen negeng imocngo seribesO.” 43 Ifi numumanu angero mongngo kurumennunac fingeCmima mama meseriu 44 Yesungo ine negengebirima seriangoc numuu sengerangango sac isoc

amma bangecfu maec. <sup>45</sup> Numuu wisickeu yacma medacfora yenearu dzi-gene kemma yenenu yeni ubahodung negemma gau fegec <sup>46</sup> yofi edeyunuec, “Ngeni nocac gau fedae? Ngeni faitobannu embauac yacma numugec.”

<sup>47</sup> Yesungo yoac denammanungoc habutoa mong yearu hagec. Hama medac 12 yenearunac mong kpara Yuda, yeng waraiyemmema Yesu muduckeudeac yearu mewegeneu <sup>48</sup> Yesungo deec, “Yuda, ge Ngicac Medac muduckema doc menec, ec.” <sup>49</sup> Ifi deu ngic Yesu oronggema nanggec, yeneng faka mangana imoc fingechesonga anu hemma kpesima degec, “Kebu, neni wasaibeango yununide me?” <sup>50</sup> Nga yenearunac mongngo womong garengtoa yeac wanacngic kpema kedzaha foiugeng herecgeec. <sup>51</sup> Herecgeu Yesungo yofi deec, “Ngeni faka imoc wagec.” Ifi dema wanacngicac kedzaha kpeserema mengereec.

<sup>52</sup> Anu ngic Yesu mebesonga hagec, imoc womong gareng enara nga womonggac keracnatang enaramemengina amma yudangic enarafocngina yeneac yofi deec, “Ngeni godzungic meandae, ifi isoc wasaibeang nga gbarucnginagoc hadae. <sup>53</sup> Ni Anutuac womonnu wenacsoc ngenigoc kecbareng ngeni sifu imohai mi menugec. Nga yaguc ine ngeneac naso anu kundunggac kucngo garenggac tatac mekecede.”

<sup>54</sup> Ifi anu yeni Yesu mema womong garengtoaac amau mekengec Petoro ye ngadenginau hereaungoc modacyunuma kenec. <sup>55</sup> Kenu ngic goa yeni amaac oda manau sobeng dzongiau gerec figec dzeu dzeunegemma tacgec Petorongo yeneac botucfu mataru <sup>56</sup> wanac naroang mongngo Petoro gerecfu taru kic fima hemma deec, “Ngc yomocngo yegoc kecande.” <sup>57</sup> Ifi deu Petorongo ine sebi heima deec, “Ngac, ge denec, ni ye mi negemmiduae.” <sup>58</sup> Ifi deu naso mi hereemanu ngic mongngo Petoro hensima deec, “Ge ifingoc yenearunac mong.” Ifi deu Petorongo deec, “Ngc, ge negennec ni kpac.”

<sup>59</sup> Nga aua mocgu isoc nammanu ngic mongngo monggoc serima deec, “Fora yombong, ngic yomoc ye gariraiangic, ye ifingoc yeac arenunoc kecande.” <sup>60</sup> Ifi deu Petorongo ine merenec, “Ngc negenna, ge denecmoc, imoc mi negentecduae.” Dema yoac imoc mi desimanungoc kokorecngo arohoc. <sup>61</sup> Arouhou Kebungo dzigenema Petoro henu Petoro ye Kebungo yeac yoac deec, imoc negensiec, “Kokorecngo tofocnac yomohaingoc mi arohomanu geng neac sebiheina atac harebec anude.” <sup>62</sup> Imoc negemma Petorongo ngadeau kemema ubahodung kuneng mema kiac hodung kiarec.

<sup>63</sup> Ngic Yesuac gareng kegec, yeneng Yesu dedzomoc ammima kpema <sup>64</sup> kiwa kporucngo biranggema degec, “Merang gudac, geng imocac kpefin-gyoac dena.” <sup>65</sup> Ifi dema yeni faka hania hania ammima desusuic ammigec.

<sup>66</sup> Ama wereckenu yudangic enarafocngina, imoc womong gareng enara amma mitiac negen negengngic yenhafoc kpeturanggemagec Yesu yudangic yeneac tutumangtoau mekemma <sup>67</sup> yofi degec, “Edenununa, ge Messia me?” Ifi degec yeng yofi merengyemmeec, “Edengunuba naric mi negensinggecede. <sup>68</sup> Nga kpesi kpesi kpesingemebadeu turunga naric mi merenggecde. <sup>69</sup> Nga yofinenggac nga namma enude Ngicac Medacngo Anutu Kuctoa minginaac foiaugeng tarude.”

(*Mitiyegec 110:1*) <sup>70</sup> Ifi deu yeneng degec, “Ifi anu ge Anutuac Medac me?” Ifi degec, yeng merengyemmeec, “Ni imocnoc, ngeneng ine imoc dedae.”\* <sup>71</sup> Ifi deu yeneng

\* 22:70: “Ni imocnoc” imoc Anutuac kpara mong. Ge “Yoac goaac dedekperagi.” henna. Hafac 1128.

degec, “Yoacninaac boingiac monggoc mi obohodimbe. Ye imoc yengena enarango deu bic negending.”

## 23

<sup>1</sup> Dema kpeturanggema tacdadgec, yeni sasawa yacma Yesu mema Piratoaru mekemma <sup>2</sup> imohai yoacfu namma haniaya yofi degec, “Ngic yoc ye ngicngacfocnina yenearu singngina mesufuma takesi Sisa minideac kpetarinemmema yengenaac ifi dekecde, ‘Ni Messia, ngictau mong.’” <sup>3</sup> Ifi degec Piratongo kpesimiec, “Ge yudangic yeneac ngictau me?” Ifi deu meremmiec, “Imocnoc geanggaoc denec.” <sup>4</sup> Anu Piratongo womong gareng enara nga habu yeneac deec, “Ngic yomocngo singyoac mong mi kpeec, ni kopocsiha hofocduae.” <sup>5</sup> Ifi deu yeneng ine serima degec, “Ye ngicngac kpouyemmema here miac miac Gariraianac hanahema ayemme hakecma Yudaia bangecfu sokoma ihai wisickede.”

<sup>6</sup> Ifi degec Piratongo imoc negemma kpesiyemmeec, “Ngic yomoc Gari-raia ngic me?” <sup>7</sup> Amma ye Yesuac hania negemma Herodengo bangec garenggede, ye ihacnac, ifi negenec. Negemma Herodengo naso imohai Yerusarennu ifingoc kefecac Yesu sueu yearu kenec. <sup>8</sup> Kenu Herodengo Yesuac siduc bic negenec. Ye Yesungo faka kuhagoc goa meu henudeac negengefec. Ifi negemma naso herea Yesu hofockefecac amma Yesu yearu mekenggec ubangerec yombong negenec. <sup>9</sup> Negemma Yesu kpesi kpesi homac kpesimiu yeng ine imocac turunga mong mi merenec. <sup>10</sup> Nga womong gareng enara nga mitiac negen negengngic yeneng hama namma yeac hania seriangoc yombong degec. <sup>11</sup> Nga Herode nga wasai arengfora yeneng ye ngadehema dedzomoc ammima ngakpi mong kibiagoc heimigec kemeu Piratoaru monggoc suegec mekenggec. <sup>12</sup> Herode nga Pirato yeri warac ngaba ngaba kefoc nga wenac imohaingoc ogo ogo anoc.

<sup>13</sup> Anu Piratongo womong gareng enara nga enarameme amma ngicngac kpacyunuu hadacgec <sup>14</sup> yofi dema edeyunuec, “Ngic imoc ye ngicngacfoc-nina herengina miacande, ifi dema mehadau. Nga neng ngeneac kicfu kpesimiba wiac negemma yoacfu faidae, imoc kpac anu kopocsiha hofocduae. <sup>15</sup> Nga Herodengo ifingoc negemma eng merenu mema hadau. Ifi anu ngic yomocngo mangana mong mi memanu neng homecfu faibadeacsoc mi ande, ngeni imoc negentegecbisia. <sup>16</sup> Ifi anu ye memeting goa mima waba kenudeac negenduae.” <sup>17</sup> Anu hombang nasou gawanango ngic mocgu witicamaunac yungecbeso, faka imoc fec.

<sup>18</sup> Imocac habutoa sasawa yeneng arohogec, “Ye meickema Baraba yungecnemmena.” <sup>19</sup> Baraba ye warac taonnu ngicngac yeneac here miac miac faka amma ngic kpehomeec, imocac amma witicamau faigec. <sup>20</sup> Nga Piratongo ine ngicngac yenearu monggoc serima deec nocac ye Yesu yungeru kenudeac negenec. <sup>21</sup> Ifi deu yeni arohogec, “Ge mariponnu kpena homeu, mariponnu kpena homeu.” <sup>22</sup> Arohogec naso harebec anu Piratongo deec, “Ngic yomoc ye noc kopocsic yombong meficgeec? Ni kopocsiha mong mi meficgema homecfu faibadeacsoc mi anduae. Ifi anu memeting mima waba kenudeac negenduae.”

<sup>23</sup> Ifi deu yeni mariponnu homeudeac serima seriangoc arohoma Piratoac yoac ferahema udumengtoa meficgema yeneng firang anggec. <sup>24</sup> Ifi anggec Piratongo yeneac yoac negemma negengyemmema Yesu desiyemmeec. <sup>25</sup> Amma ngic ye here miac miac faka angkecma ngic kpehomeu witicamau

faigec tarec, ye yungegcedec degec, imoc yungecyemmema Yesu ine maringinau faiu songongina modacgedec wayemmeec.

<sup>26</sup> Wayemmeu wasaingic yeneng Yesu mekemma henggec ngic mong Kirene taonunac, kpara Simong, ye semeng uaunac hau sinnu meficgema yeng Yesuac maripong tofhoudeac ngombonggegec tofahoma Yesu modarec. <sup>27</sup> Nga ngicngac habu kunengngo modacgec, yeneac botucfu ngac homac yeneng yeac dekiac amma ubamangang kuneng anggec. <sup>28</sup> Ifi anggec Yesungo dzigenema edeyunuec, “Yerusarennac ngacnaroang, ngeni neac mi kiacgec. Ngeni ngenang nga nambaracfocongina, yeneac amma ine kiachisia. <sup>29</sup> Naso mong haude, imohai ngicngac yeneng yofi degecde, ‘Ngac kufing nga sabac mi megec amma namu mi gumeocyunuec, yeni kenecnginagoc.’ <sup>30</sup> Naso imohai ngicngac yeneng tikiac degecde, ‘Tiki ge witininau mama ferandzinununa.’ Nga fagangac yofi degecde, ‘Fagang ge tohoma kperacunununa.’ (Hosea 10:8) <sup>31</sup> Yeni ic sabayagoc nande, imohai faka ifia andaeu ic bic ururuedacfu, imoc memanganeyombonggegecde.”

<sup>32</sup> Anu yarengic yohockang yeri Yesugoc yurugecdec ifingoc meyuru kemma <sup>33</sup> bangec buma mong kpara Hataasic degec, imohai kensikema Yesu mariponnu kpegec amma yarengic mong foiugeng nga mong kanaugeng, ifi yurugec. <sup>34</sup> Yunugec Yesungo deec, “Manggac, yeni ua medae, imoc mi negentegecma andaeac kopocsingina wana.” Nga yeneng wambaya kpeing kpema mederegec. <sup>35</sup> Ngicngac yeni wiac fingerec, imoc ifi hennammagec yudangic enarafocnginagoc yeneng ifingoc desusuic ammigece, “Ye Messia, Anutuac meisingmedaha andeu yeng ngicngac goa onggongyunuec, ifi isoc yengena ifingoc onggongmeu.” <sup>36</sup> Nga wasaingic yeneng ifingoc defagoc ammima yeac wegenacfu hama waing aengagoc yearu sinemima <sup>37</sup> degec, “Ge yudangic yeneac ngictau kecnecfu geangga onggongemena.” <sup>38</sup> Nga oruha witiau yoac yofi oho ohoya nanec, “Yomoc yudangic yeneac ngictau.”

<sup>39</sup> Anu yarengic yohockang yerearunac mong nanec, yeng Yesu desusuic ammima deec, “Ge Messia anecfu geangga onggongemema neri ifingoc onggonnuruna.” <sup>40</sup> Ifi deu ogeango kpetarimima deec, “Ge ifingoc yoacfu firang mi andang amma Anutuac kengecguu ngereebac. <sup>41</sup> Nerang kopocsiniraac turunga faka ddingacfu ifi anecmedae nga ngic yomoc ye ine kopocsic mong mi meficgeec.” <sup>42</sup> Ifi dema Yesuac deec, “Yesu, ge eucererenggau kensikema ngictau tatac mema ni negensinubesena.” <sup>43</sup> Ifi deu Yesungo yofi edeac, “Foracngoc, yagucngoc nigoc eucererennu kecdede, imoc edeguduae.”

<sup>44</sup> Anu wenac dzongiau 12 kiroc ammanu imohai ama kundung kpema kundungngo bangec sokoma fekemmanu 3 kiroc marai anec. <sup>45</sup> Nga we-nackiwa kundung kpeec, naso imohaingoc Anutuac womonnu kpoructoa womongmana kpetiac yombong naguyau nanec, imoc tohou yohockang anec. <sup>46</sup> Nga Yesungo ubaudumeng kunengngoc kpacma deec, “Manggac, ongaasuna marigau faiduae.” (Mitiyegec 31:5) Ifi deu asuya ereec.

<sup>47</sup> Anu wasai garengngo imoc hemma Anutu eweheimima deec, “Ngic yomoc ye kopocsia kpac, imoc fora.” <sup>48</sup> Nga ngicngac sasawa yeni faka fingerec, imoc hennegeng ambesonga hagec, yeneng faka imoc fingeru hemma mokucnginau kpema kiacma amanginau kenggec. <sup>49</sup> Nga Yesuac arengfora sasawa nga ngac goa Yesu modacma Gariraiianac hagec, yeni ine hama hereau namma faka fingerec, imoc henggec.

<sup>50-51</sup> Ngic mong kefec kpara Yosefe, ye Yudaia bangecfu Arimataia taonunac. Amma ye yudangic yeneac tutumangtoaac memba kefec. Ye ngic yumea nga fakaya dindingac amma Anutuac eucererenggac tomái kefec. Nga yeac ogoforango yoac degec nga faka anggec, yeng imocac negenu mi ngereec. <sup>52</sup> Ifi anu yeng Piratoaru kemma Yesuac fareng meudeac kpesimiec. <sup>53</sup> Kpesiu negemmiu ye Yesuac fareng mesima linengkporuc imocngo tembonggema mekemma kicsere mong gboria, imohai faiec.\* Kicsere imoc gboria amma hoc sirango mengec mengerea nga ngic mong imohai mi tonggo tonggoya. <sup>54</sup> Anu wenac imoc sabataac efac kpefac naso anu sabata naso hanahebeso anec.

<sup>55</sup> Nga Gariraia bangecfunac ngac goa Yesu modacgec, yeneng Yosefe modacma kicsereu kemma Yesuac fareng faigec, imoc hennegeng amma <sup>56</sup> monggoc dzigenema amanginau kemma fareng imocac kerecdoku homuna gombunga memengere amma sabatanasoac singyoac fede, imoc modacma tomái kecma tacnegenggec.

## 24

<sup>1</sup> Sonda gboria hanahema asoac ama negemma ngac yeni kerecdoku homuna gombunga memengere anggec, imoc mema kicsereu kenggec. <sup>2</sup> Kemma hengec hoctoa kicsere sing hedzic hedzickeamoc, imoc bic kpedic kpedidinggea feu kicsere naguya eng nanec. <sup>3</sup> Nanu ngac yeni kicsere manau emma Kebu Yesuac farenga ine mi meficgegec. <sup>4</sup> Amma yeni noc wiac fingeac dema obohoma nammagec imohaingoc ngic yohockang ngakpingira kongac koporarac yombong, yereng hama kicnginau fingeacma nanoc. <sup>5</sup> Nanec ngac yeni kengec amma ngonducnema nammagec ngic yohockang yereng yofi edeyunuoc, “Ngeni ngic gboridac kecde, ye nocac kicsereu hofocdae? <sup>6</sup> Yenoc Anutungo homecfunac bic megboriu yacma yei mi kecde. Amma yeng Gariraia kecmanogoc yoac edengunuoc, imoc negensibisia. <sup>7</sup> ‘Ngicac Medac ye kopocsicmeme yeneac mariu faigec, yeneng mema mariponnu kpegec homeude.’ imoc fingerudeac deec, ‘Nga uameme harebec ammanu monggoc gborima yarude.’ ” <sup>8</sup> Ifi deu ngac yeni yeng yoac bic deec, imoc negensigec.

<sup>9</sup> Negensima kicsereunac monggoc dzigene kemma medac 11 nga tosofocngina faka sasawa fingerec, imoc edeyunudacgec. <sup>10</sup> Ngac kenggec, yeneac kpacngina Maria Madara nga Yohana amma Maria Yakobo nonggea nga ngac goa yenahafoc kenggec, yeneng siduc imocngoc aposoro edeyunugec. <sup>11</sup> Nga ngac yeneng yoac imoc edeyunugec, imocac medac yeneng negenggec sicsauc anu yoacngina mi negensinggec. <sup>12</sup> Nga Petorongo ine yacma nedzima kicsereu kenec. Kemma kicsereu okarima henu kporucsusu tembonggegec imocngosac tarec. Ye imoc hemma negenu wiac engena anu monggoc dzigene kenec.

<sup>13</sup> Anu wenacnaso imohaingoc ngic yohockang Yesu modacandape, yereng ama mong kpara Emausi, imohai kembesonga kenoc. Bangec imoc Yerusarenggac hereau 11 kiromita, imocfi tarec. <sup>14</sup> Nga yeri faka sasawa fingerec, imocac denegeng amma kenoc. <sup>15</sup> Yeri yoac imocac denegeng amma negen negeng ua mema kemmaec Yesu yengenaoc ngadengirau kemma meficyuruu yerigoc kenggec. <sup>16</sup> Amma yeri kic mesufuu ayecmeu mi hensioc.

\* **23:53:** Lineng imoc kpindzing mong ambiac ogea, imocngo wamba megec.



17 Ifi anu Yesungo yofi kpesiyemerec, “Ngeri sinnu noc wiacac ngeraocngoc denegeng andape?” Ifi deu yeri ubahodung siric amma waickema nanoc. 18 Namma mong kpara Kereopa, yeng kpesimiec, “Ge kuricngic mocgungosac Yerusarennu kecmi sonda yomocac manau ihai faka fingecdac, imoc mi negendang me?” 19 Ifi deu yeng deec, “Noc faka fingecdac?” Ifi deu yereng edeoc, “Yesu Nadzaretenc yearu faka fingerec. Ye profete mong amma Anutu nga ngic yeneac kicfu yoac deec nga faka sasawa meec, imoc kuhagoc yombong anec. 20 Nga womong gareng enara nga isaengic enarafocnina, yeneng ye homeudeac dema gamang yeneac mariu faigec yeneng mariponnu kpegec homeec. 21 Nga neni yofi negensinggeing, yennoc isaengicngac mesinunuude. Faka fingerec, imocac uameme yaguc harebec ande. 22-23 Anu ngac goa neneac habuunac, yeni yaguc asoac yombong kicsereu kemma farenga hofocdau. Hofocma dzigenema hama yofi edenunudau, ‘Angero yereng ongau fingecnemema yofi deec, “Yesu ye bic gboridac kecde.” ifi dedau.’ Ifi degec kpidohoding. 24 Amma nenearunac ngic goango kicsereu kemma ngac yeneng dedau, ifi isoc yombong meficgedau nga yengena ine mi hendau.”

25 Ifi deu Yesungo yofi edeyuruec, “Ngeni negen negengngina kpac nga wosongina nomana yombong. Profete yeneng bicngoc yoac sasawa degec, imoc bic mi negensinggedae. 26 Imoc yofi fingerudeac degec, ‘Messia ye kpendzeng kpekefu wisickeugic kibikperagiatoaac ameau naric enude.’” 27 Yengena siduc imoc mitikibiu oho ohoya fedacde, imoc Moseac kibiunac hanahema kengkecma profete sasawa yeneng yeac siduc ohogec, ye imocac hania deireckeyemerec.

28 Anu yeri ama kembesonga kenoc, imoc mewegenema Yesungo fercegema kembeso siric isoc anu 29 yereng kpetarimima deoc, “Ama marai anu kundung kpebeso andeac ge nerigoc kenni.” Ifi deec yerigoc amau emma tacgec. 30 Yesungo yerigoc tacma yaka nebesonga ic sogong mema kenecyoac dema mendzicma yemerec. 31 Yemeru kicngira tegeru Yesu hensimaec yeng imohaingoc aockeu 32 yeraocngoc denegeng amma deoc, “Yeng sinnu mitikibiac hania edekpou anecmema deireckenemeru herenirango yacyombonggedac, imoc fora yombong.” 33 Nga yeri imohaingoc yacma dzigenema monggoc Yerusarennu kemma medacfora 11 ogofocnginagoc kpeturanggema tacmagec meficyunuoc. 34 Meficyunuec yeneng edeyuruma yofi degec, “Kebungo fora homecfunac gborima yacdac, ye Simong bic fingecmidac.” 35 Ifi degec yereng sinnu yerearu faka fingerec nga Yesungo ic sogong mendziru hensioc, imocac siduc andaroc.

36 Siduc ifi andarec yeni yoac imoc negemma tacmagec Yesu yengenaoc botucnginau namma deec, “Ruae ngenearu febeso.” 37 Ifi deu yeni kpidohoma kengec amma negensigec, “Wosonga hendimbe.” 38 Ifi negensigec yeng yofi deec, “Ngeni nocac kpidohoma negengyohoc andae? 39 Imoc ni neanaoc, ngeni hanimarina henggec. Wosonga yeni sicfusingina kpac. Ngeni imocac hama kpeserenuma nenggec.” 40 Ifi dema hanimaria edzacyunuu 41 yeni kerectegec amma ubangerectoa negemma sifu mi negensinggeec yeng yofi kpesiyemmeec, “Ngeni yaka mong faigec tacde me?” 42-43 Ifi deu yeni kondungyang dzedzea noboha migec mema kicnginau neec.

44 Nema yofi edeyunuec, “Ni ngenigoc kefai, imohai yofi bic edengunuai, wiac sasawa neac negemma Moseac dedeseriyoacfu nga profete yeneac kibiunac amma Mitiyegecfu oho ohoya fede, imoc sasawa fora fingecbeso.” 45 Ifi

dema ye imohaingoc negen negengngina meireckeyemmeu yeni mitikibiac yoac negentegecgec <sup>46</sup> yofi torokpema deec, “Imocac amma yofinoc oho ohoya fede, Messiango kpendzeng kpema homema uameme harebecfu monggoc gborima yarude. <sup>47</sup> Yaru ngicngac yeni yeac kpacfu ubamereng nga kopocsic wawaac sing imoc Yerusareng taonnusing hanahema bangeha bangeha ngicngac sasawa yenearu yoac dekperagigec kenude. <sup>48</sup> Faka yomocnoc kicnginau fingeacdacmoc imoc dekperagibisia. <sup>49</sup> Nga Mannango wiac ngemmeudeac deec, neng imoc suengemmeba mebisia. Negenggec, ngeni taong yomohai tacma imoc mi wabisia kecma wihacnac kuc heingemebade. Ngeni kuc imoc memaguc naric kengha ambisia.”

<sup>50</sup> Anu Yesungo waraiyemmeu taong wama ngadeau Betania amabangec, imohai kemma maria miacma kenecyumanu <sup>51</sup> Anutungo meu wayunuma kurumennu enec. <sup>52</sup> Enu yeni afehema songo kuneng meficgema Yerusarennu monggoc dzigenema kenggec. <sup>53</sup> Nga yeni nasosoc womonnu kecma Anutu ubangerec edekecgec.

## Yohane Yeng Yesuac Siduc Gombang Ohoec

<sup>1</sup> Hanac hanaheaunacngoc enacyoacngo kefec nga enacyoac ye Anutugoc kefec amma enacyoac ye Anutu. <sup>2</sup> Amma yennoc hanac hanaheau Anutugoc kefec. <sup>3</sup> Nga Anutungo enacyoacfu deu wiac sasawa fingecearec, wiac sasawa fingecearec fekende imoc yea kpac mong mi fingerec. <sup>4</sup> Yearunoc kefec feec nga kefec imocngo ngicngac yeneac kperagi anec. <sup>5</sup> Nga kperagingo kundung mekperagi kundungngo kperagi imoc semeudeac ambibiema waec.

<sup>6</sup> Anutungo ngic mong sueu haec, yea kpara Yohane. <sup>7</sup> Yeng kperagi imoc cac hepucngic amma dedekperagi imoc ngicngac mekperagiyemmeudeac haec. Yeng ifi hau ngicngac sasawango kperagia imoc negensingegeceac negenec. <sup>8</sup> Ye yengenaoc kperagi imoc mi kefec, kpac. Ye ine kperagi imoc mekperagiudeac haec.

<sup>9</sup> Anu kperagi fora yombang, yeng bangecfu ngicngac sasawa mekperagiyemmebeso haudeac anec. <sup>10</sup> Anutu ye kperagiango bangec nga wiac sasawa meficgedaru kperagia imocngo bangecfu kefu ngicngac yeneng ine ye mi hensigec. <sup>11</sup> Ye bangehau dzigenemanu arengfora yeneng ama mi heimigec. <sup>12</sup> Nga ngicngac ama heimima kpara negensingegec, yeni Anutuac nambaracfora anggeceac deymemeec. <sup>13</sup> Deyemueu ngicngac imoc yeni ngic sacfusiunac me sebiac songounac me ngic monggac songounac mong mi fingecearec, kpac. Yeni Anutu yengenaarunac fingecearec.

<sup>14</sup> Anu enacyoacngo sebifusiagoc amma botucninau kefec. Kefu medac mocungo fingecearec Manggacarunac kuc nga kibikperagia mekefec, kuc nga kibikperagia imocnoc hening. Henni yearu danggunuc nga yoac fora wake wakea fede.

<sup>15</sup> Yohanengo yea hepuc amma dekperagima kpacma yofi deec, “Ni yea-noc yofi deai, ngadenau hama kecede, ye kunenna, nocac ni mi fingecearengoc ye kechakefec.” <sup>16-17</sup> Dedeseriyoacngo Mosegoc hau yearunac meing nga danggunuc amma yoac fora imoc Yesu Kristogoc haec. Amma ye danggunuc hafoangoc femide, imocngo nenannu wisickea kpac hakecede. <sup>18</sup> Ngic mongngo Anutu mong mi henec, kpac. Medaha mocgusac Mamaac hoannu kecande, ye Anutungoc. Yeng Manggac dekperaginemeec.

<sup>19-20</sup> Yudangic Yerusareng taonnu kecearec, yeneng womong gareng nga womong gareng yeneac memefic sueyunugec Yohaneareu kemma kpesimigec, “Ge merac?” kpesimigec, yeng haniaya mi hesonggema yofi dekperagiyemmeec, “Ni Messia kpac.” imocngo Yohaneac dedekperagi. <sup>21</sup> Ifi deu yeneng monggoc kpesimigec, “Ge merac, ge Eria me?” kpesimigec yeng deec, “Ni ye kpac.” deu degec, “Ge profete yombang me?” degec merenec, “Kpac.” <sup>22</sup> Ifi deu degec, “Anu ge merac? Suenunuda, yenearu yoac turunga dafi mekemma edeyununide? Ge geanggaac dafi deannec?” <sup>23</sup> Ifi degec Yohanengo yofi merenec,

“Bangec kisiu ubaudumeng fingerec imoc nennoc yofi kpacduae, ‘Ngeni KEBUAC sing heitumeigec.’  
Profete Yesaiango neac ifi deec.” (Yesai 40:3)

<sup>24</sup> Anu farisaio yeneng ngic goa sueyunugec kemma <sup>25</sup> Yohane kpesimigec, “Ge Messia kpac nga Eria kpac amma profete kpac. Ge nocac ngic doku

nadzicyemmeannec?" <sup>26</sup> Ifi degec Yohanengo yofi merengyemmeec, "Ni doku nadzicngemmeanduae. Nga botucnginau ngic mong kecde, ngeni ye mi negemmidae. <sup>27</sup> Yeng ngadenau hama kecde nga ni ifiango yeac hanitabe witiha yungecba naric mi ngereeude." <sup>28</sup> Yohanengo Betania amau Yordang doku nobocgengau doku nadzicyemmekefec, imohai faka imoc fingerec.\*

<sup>29</sup> Wereckengau Yohanengo namma henu Yesungo yearu hau ngicngac yofi edeyunec, "Henggec, imoc Anutuac ramamedaha, yeng bangectoa bangec imocac ngicngac sasawa yeneac kopocsic meickeude." <sup>30</sup> Yeacnoc negemma yofi deai, "Ngic mong ngadenau hama kecde, yeng ni mi fingebare bicngoc yombong kefecac ni feracnude. <sup>31</sup> Neng ye mi negemmiai. Nga israengicngac ngeneng ye hentegecgecdeac neng hama doku nadzicngemebade."

<sup>32</sup> Yohanengo yofi dekperagiec, "Ni Tiri Asu hembra yeng kebesacac siric isoc kurumennunac mama yeac witiau taru henai. <sup>33</sup> Nga ni ye mi negemibare suenuec, yeng yofi edenuc, 'Asungo mama ngic yearu taru hennade, yeng Tiri Asungo nadzicngemmeude.' <sup>34</sup> Ni imocnoc hemma hepuc amma yofi dekperagai, ngic yomocngo Anutuac medac."

<sup>35</sup> Anu wereckengau Yohane ye medacfora yenearunac yohockang yerigoc imohai monggoc nanggec. <sup>36</sup> Nammagec Yesungo kenu hemma medahora yofi edeyuruc, "Henec, imoc Anutuac ramamedaha." <sup>37-38</sup> Ifi deu negemma medahora yereng Yesu modacma kenec Yesungo dzigene yeremma yofi kpesiyemerec, "Ngeri noc wiacac angecmede?" kpesiyemeru deoc, "Rabbi, (imocac titiha kpoukpou) ge dahai kecne?" <sup>39</sup> Deec yofi edeyuruc, "Ngeri hama henec." ifi deu yeni yenhafoc kemma ama kefec, imoc hemma wenac imoc yegoc taroc. Faka yomoc marai 4 kiroc fingerec.

<sup>40</sup> Anu Yohaneac yoc negemma Yesu modaroc, yerearunac mong Anderea, Simong Petoaroc munea. <sup>41</sup> Yeng Yesu hemma dzigenema warac warac yengena munea Simong meficgema yofi edeec, "Neri Messia meficgedic." (Messia imocac titiha Kristo.) <sup>42</sup> Ifi dema Simong hesickeu Yesuaru kenec Yesungo ye hemma yofi deec, "Ge Simong Yohaneac medac, geac kpacga Kefa debesonga." (Imocac titiha hoc amma grikyoacfu Petros.)

<sup>43</sup> Wereckengau Yesungo Gariraia bangecfu kembesonga negemma Firipo meficgema yofi edeec, "Ge hama modacnuna." <sup>44</sup> Nga Firipo nga Anderea amma Petoro yeni Besaida taonunac.

<sup>45</sup> Anu Firipongo Natanae meficgema yofi edeec, "Mosengo dedeseriyoac kibiu ohoec nga profete yeneng ifingoc ohogec, neni ngic imoc meficgeding. Imoc Yesunoc, Yosefeac medac, Nadzarete taonunac." <sup>46</sup> Ifi deu Natanaengo deec, "Nadzarete taonunac wiac gombunga mong mi finge-cande." ifi deu Firipongo deec, "Ge hama henna."

<sup>47</sup> Nga Yesungo Natanae henu yearu kenu yofi deec, "Henggec, ngic yomoc israengic fora, yearu ikoc nga faitobang faka mong mi fede." <sup>48</sup> Ifi deu Natanaengo kpesimiec, "Ge dafi negennunec?" Ifi deu Yesungo yofi edeec, "Firipongo mi kpacgumanu fig ic haniau tacmana bic gendua." <sup>49</sup> Ifi deu Natanaengo yofi edeec, "Rabbi, ge Anutuac medac, Israe neneac Ngictau."

<sup>50</sup> Ifi deu Yesungo yofi meremmiec, "Ge fig ic haniau tacna gendua deduaeac negensinnunec. Kecma faka yofia monggoc ferahema fingeru hennade. <sup>51</sup> Negenggec, kurumeng anggeu ngeni Anutuac angferofora yeneng Ngicac

\* 1:28: Betania ama yohockang feoc. Mong Yerusareng wegena nga mong Yordang wegena.

Medac yearu engemmama anggec yenenggecde, imoc fora yombong eden-gunuduae.”

## 2

<sup>1</sup> Uameme yohockang wisickeu Gariraia bangecfu Kana taonnu memeturang fingerec. Nga Yesuac nonggea ihai kecmanu <sup>2</sup> Yesu nga medacfora momoc heitaiyunugec. <sup>3</sup> Nga yeni waingngina kpac anu nonggeango Yesu edeec, “Waingngina kpac ande.” <sup>4</sup> Ifi deu Yesungo yofi edeec, “Ngac, neac wiac imoc geac mi ande, nasona mi hadacngoc.” <sup>5</sup> Ifi deu nonggeango uamedac edeyunuec, “Yeng wiac monggac edengunu ngeni imoc sasawa tofobobisia.”

<sup>6</sup> Anu yudangic yeni dzuac dzuac fakangina modacma enang dokuyagoc faigec tacande. Imocac amma imohaingoc enang hocngo memea 6 faigec tarec. Enang mocgu mocgu imoc 100 lita, ifingo tackenec. <sup>7</sup> Nga Yesungo uamedac yofi edeyunuec, “Ngeni doku fima enannu kpacegec kemema wakeu.” ifi deu yeni doku figec kemema wakedarec. <sup>8</sup> Figec wakeu yeng yofi edeyunuec, “Ngeni yaguc fima imoc yakagarenggaru mekenggec.” Ifi deu fima mekenggec. <sup>9</sup> Mekemmagec dokungo waing anu yakagarengo imoc nehemma waing dahacnac dema obohau uamedac doku fima mekenggec, yenengsac negenggec. Ifi nehemma yakagarengo memeturangngic, ye deu haec. <sup>10</sup> Hau edeec, “Fakanina yofi fede, hanahema waing gombunga ngic gumecyununi nekecma ubasufu anggec waing songea kpac gumecyunuandimbe. Anu geng ine waing gombunga mesufuna tacdacac yaguc meficgenec.”

<sup>11</sup> Yesungo Gariraia bangecfu Kana taonnu kecma negensinggegecdeac faka kuhagoc imoc hanahema meec. Mema kuc nga kibikperagia ifi mekperagi medacfora yeneng imoc hemma ye negensinggegec.

<sup>12</sup> Kecgec wisickeu Yesu nga nonggo munafora amma medacfora yena-hafoc Kafanaung taonnu kemema ihai wenac goa kecgec. <sup>13</sup> Kecgec yudangic yeneac makekenggac naso wegene hau Yesungo Yerusareng taonnu enec. <sup>14</sup> Emma henu ngic yeneng womonggac oda manau ramaburumaka nga kebesacneng faigec nga goa tatacnginau tacma hiedzo emekecmagec Yesungo yenene. <sup>15</sup> Yenemma indzuru mong mudze mudzea mema imocngo ngic sasawa ramaburumakanginagoc womonnunac yunukisang ayem-meu kemegec. Kememagec ngic hiedzo emekecgec, yeneac dzongina megigi amma tebongina heimerenec. <sup>16</sup> Heimeremma ngic kebesacneng suegec, yeni yofi edeyunuec, “Ngeni wiacngina imoc meickegec! Ngeni Mannaac ama anggec emekpesi ama mi ambeso.” <sup>17</sup> Faka imoc fingeru medacfora yeneng yoac mong oho hoyo feec, imoc negensigec,

“Geac amaac amma herenango gerec dzema dzendandannuude.” *(Mitiyegec 69:9)*

<sup>18</sup> Amma yudangic yeneng meremma edegec, “Ge faka imoc andaggac noc faka kuhagoc mena hemma negensinggenide?” <sup>19</sup> Ifi degec Yesungo meremma yofi edeyunuec, “Ngeni womong yomoc hembareckegec ni uameme harebecfu imoc miacbade.” <sup>20</sup> Ifi deu yudangic yeneng degec, “Ngic yeneng womong yomoc kifa 46 mekecma medzickegec. Anu geng uameme harebecfusac naric miacnade me?”

<sup>21</sup> Yesungo ine yengena sebiaac womonnu yoac heima deec. <sup>22</sup> Kecma homecfunac megboriu yaru medacfora yeneng Yesungo yoac ifi deec, imoc

negensigec. Negensima mitikibiu yoac oho ohoya fede nga Yesuac yoac momoc negensinggecec.

<sup>23</sup> Anu Yesungo Yerusarennu makekenggac hombang naso femanu ihai kecma faka kuhagoc meu ngicngac homacngo hemma yeac kpara negensinggecec. <sup>24</sup> Nga Yesu yengenaoc ngicngac haifakangina hentegecdarecac amma ubakeraha mong mi edeyunuec. <sup>25</sup> Imoc yofiac, ye yengenaoc ngic yeneac ubaherenginau wiac sasawa fede, imoc negenecac ngic monggac haniaac ngic mong mi kpesimiec.

### 3

<sup>1</sup> Farisaiongic mong kpara Nikodemio, ye yudangic yeneac ngickiwa mong kefec. <sup>2</sup> Nga yeng tofocnac dzongiau Yesuaru hama deec, "Rabbi, geng Anutuarunac mama kpoukpou ua mekecneec, imoc negendimbe. Geng faka kuhagoc meanneec, ua ifia ngic mongngo Anutuya kpac kecma naric mi mebac." <sup>3</sup> Ifi deu Yesungo yofi meremmiec, "Foracngoc, ngic mong ye fingec fingec gboria mi fingerude, yeng Anutuac eucerereng naric mi henude, imoc edeguduae."

<sup>4</sup> Ifi deu Nikodemongo deec, "Ngic bic yadi yadiyango dafi monggoc fingerude? Ye nonggeaac heremanau naric mi enude nga monggoc naric mi fingerude." <sup>5</sup> Nga Yesungo yofi meremmiec, "Foracngoc, ngic mong ye dokuu nga Asuu gboria mi fingerude, yeng Anutuac eucererennu naric mi enude, imoc edeguduae. <sup>6</sup> Nga ngicfunac fingec fingera, yeng ngic siricngoc nga Asuunac fingec fingera, ye Asu siricngoc. <sup>7</sup> Ngeni fingec fingec gboriau fingecgecdeac edeguba mi kpidohona. <sup>8</sup> Firangngo yengena songo modacma kpeu udumenga negennec. Nga ye dahacnac hade amma dahai kenude, imoc ine mi negennec. Ngicngac Asuunac fingec fingera, yeni sasawango siricngina ifia."

<sup>9</sup> Ifi deu Nikodemongo meremmiec, "Yoaac sasawa denec, imoc dafi fingecdarude?" <sup>10</sup> Ifi deu Yesungo meremma yofi edeec, "Ge isaengic yeneac kpoukpoungoc wiac imoc dafi mi negentegecneec? <sup>11</sup> Foracngoc, neni wiac hengandimbe nga negengandimbe, neni imocac hepuc nga dedekperagingic amma dekperagingemmandimbe, imoc edeguduae. Anu ngeni yoac imoc mi mema honggeandae. <sup>12</sup> Ni bangecac wiacac yoac dema edengunuba ngeni mi negensinggegecede. Nga kurumenggac wiacac edengunubadeu ngeni imoc dafi negensinggegecede? <sup>13</sup> Ngic mongngo kurumennu mi enec. Ngicac medac kurumennunac maec, ye mocgungo kurumennu enec."

<sup>14</sup> Mosengo bangec kisiu boudzoc miaru nanec, ngic yeneng ifi isoc Ngicac Medac miagec nambeso. <sup>15</sup> Anu ngicngac ye negensinggegecede, yeni sasawango kekecseri megecede. <sup>16</sup> Imoc yofiac, Anutungo bangectoa bangecfu ngicngac ngeneac noc isoc ammiecac Medaha mocgu faiu bangecfu maec. Imocac ngic mongngo ye negensinggeude, ye manganau mi kemeude yeng ine kekecseri meude. <sup>17</sup> Anutungo Medaha bangecngic manganangina isinggema desiudeac sueu mi maec, kpac. Ye bangecngic ebicfunac mesiyunuu komoc kpegecdeac bangecfu sueu maec. <sup>18</sup> Amma ngic mong Medaha negensinggede, ye yoacfu mi faiude. Nga mong ye Anutuac Medaha mocguac kpara mi negensinggede, yeng ine mi negensinggecac amma yoacfu bic makpeec.

<sup>19</sup> Yoacninaac desi desiac hania imoc yofi, kperagingo bangecfu hau ngicngac angammengina manganaac amma kundunggac songo monggoc

negemma kperagia wagec. <sup>20</sup> Ngicngac faka mangana angandae, yeni fakangina mangana didiu mi fingectegerudeac sasawango kperagia ngadehema kperagiau naric mi hagecde. <sup>21</sup> Nga ngic mong ye faka fora meande, yeng kperagiau naric haude. Amma ye Anutuac kucfu uaya meande, imoc fingectegerude.”

<sup>22</sup> Kecma Yesu nga medacfora Yudaia bangecfu kemma ihai yenigoc kecma ngicngac doku nadzicyemmegec. <sup>23</sup> Naso imohai Saring taong wegenacfu Ainong taonnu doku homac feec. Imocac Yohane ye ifingoc ihai kecmanu ngicngac yearu kenggec yeng ifingoc doku nadzicyemmekefec. <sup>24</sup> Faka imoc Yohane witicamau mi faimagec fingerec.

<sup>25</sup> Anu Yohane medacfora nga yudangic mong, yeni yuda yeneac dzuac dzuac fakanginaac amma yoacngina engemmama anec. <sup>26</sup> Anu medac yengeng Yohanearu kemma edegec, “Rabbi, ngic gegoc Yordang nobocgeng kefec geng yeac hania edenununec, yennoc ngicngac doku nadzicyemmeu sasawango yearu kendacdae.” <sup>27</sup> Ifi degec Yohanango yofi merengyemmeec, “Anutungo kurumennunac wiac mi miudeu ngicngo imoc naric mi meude. <sup>28</sup> Ni Messia kpac. Ni ine yeac singwarac ambadeac Anutungo suenuu hayai. Imocacnoc bic edengunuai, ngeni dedena imoc negendaeac hepucna naric angecde.

<sup>29</sup> Ngic enembingehagoc yeng ngacfu kenude. Anu ngicac ogeango yeac enacfunac memeturangac siduha negemma ubangerecnea negenude. Nga ni ifi isoc yaguc ubangerec hafaogoc negenduae. <sup>30</sup> Yeac kpacsiducngo yadiu neacngo mamea ambeso.

<sup>31</sup> Wihacnac maec, yeng wiac sasawaac engenatoa ande. Nga ngic bangecfunac fingec fingera, yeng bangecfunac, imocac amma bangecac yoac deude. Kurumennunac maecngo wiac sasawaac buma anec kecde. <sup>32</sup> Amma yeng wiac wi fede, imoc hennegeng angkefec, imocac hepuc amma dekperagiu ngic mongngo yeac yoac mi hoanggeude. <sup>33</sup> Anu ngic mong ye yoac imoc mema hoanggeude, yeng Anutu ye fora, imoc deseriuide.

<sup>34</sup> Anutungo ngic sueec ye Anutuac yoac deude. Imoc yofiac, Anutungo Tiri Asu hendzicma nobohasac kpeteagoc mema mi yemmeude, kpac. <sup>35</sup> Mangacngo heregoc Medahaac songo negemma wiac sasawa mariau faiec. <sup>36</sup> Imocac Medaha negensingede, ye kekecserigoc kefude. Nga Medahaac yoac kpeude, ye kekec mi henu Anutuac turung ine yearu fekefude.”

## 4

<sup>1</sup> Farisaio yeni Yesuac yofi negenggec, “Yeng habu meyunuma doku nadzicyemmeu Yohaneac habu kpetea ferahede.” <sup>2</sup> Nga Yesu yengenaoc ngicngac doku mi nadzicyemmeu medacfora yeneng doku nadzicyemmegec. <sup>3</sup> Nga Yesungo yoac ifi negemma Yudaia bangec wama Gariraia bangecfu monggoc dzigenec.

<sup>4-5</sup> Ihai kemma Samaria bangec ferecgebeso amma Samariaac taong mong kpapa Sika, ihai kensikeec. Sika taong imoc Yakobongo medaha Yosefeac bangec desimiec, imocac wegenac tarec. <sup>6</sup> Anu Yesungo Yakoboac dokuteng tarecfu, imohai sing kengkecma kuha kpac anu dokuteng imocac tegiau mama tarec. Tacmanu 12 kiroc isoc anec.

<sup>7-8</sup> Anu medacfora yeni yaka bummegecdeac taonnu kemmagec samariangac mongngo doku fiudeac hau Yesungo yofi edeac, “Doku mehana neba.”

<sup>9</sup> Ifi deu ngacngo deec, “Ge yudangicngo dafi samariangac nearu dokuac



denec?” Yudangicngac yeni samariangicngac yenigoc emenecngina mi feecac ngacngo ifi deec.

<sup>10</sup> Ifi deu Yesungo yofi edeec, “Ge Anutu haringaac hania nga merang dokuac kpesigende, imoc negentegecma kpesimbang debac yeng doku kekehagoc gembac.” <sup>11</sup> Ifi deu ngacngo deec, “Kebu, ge doku finadeac wiacga kpac nga dokuteng imoc herea anu doku kekehagoc dahacnac finade? <sup>12</sup> Baneagnina Yakobongo dokuteng yomoc menemmeec. Geng ye ferahenec me? Ye yengena nga medacfora amma ramaburumakafora, yeni doku yomohanac nekecgec.”

<sup>13</sup> Ifi deu Yesungo yofi meremmiec, “Ngicngac doku yomoc neandae, yeni sasawango dokuac monggoc ayemmeande. <sup>14</sup> Nga mong ye neng doku miba neude, yeng dokuac monggoc mi mimibesande. Nga doku mibade, imocngo yearu dokukiwa sike sikea fingecma kekeceri meficgemiude.” <sup>15</sup> Ifi deu ngacngo deec, “Kebu, ge doku imoc nenna nema dokuac monggoc mi anembeso nga doku fibadeac yomohai monggoc mi habesare.”

<sup>16</sup> Ifi deu Yesungo yofi meremmiec, “Ge kemma ewega dena haec.” <sup>17</sup> Ifi deu ngacngo deec, “Ni ewena kpac.” deu Yesungo yofi edeec, “Ni ewena kpac, ge fora denec. <sup>18</sup> Ge ngic 5 bic meyununec nga ngic yofinenggac mena ngerahafoc kecdape, ye geac ewega kpac.” <sup>19</sup> Ifi deu ngacngo deec, “Kebu, ge profete, imoc gentegecduae. <sup>20</sup> Kisicfocnina yeneng tikibuma yomohai Anutu afehekecgec. Anu ngeneng yofi deandae, ‘Yerusareng, imohaisac Anutu afehebesonga.’”

<sup>21</sup> Ifi deu Yesungo yofi edeec, “Ngac negensinnuna, naso mong wegeneude, imohai ngicngac ngeneng tikibuma yomohai nga Yerusarennu Anutu monggoc mi afehegecde. <sup>22</sup> Ngeni wiac hania mi negentegecdae, imoc numumidae. Ebicfunac mesi mesi nga komoc kpegecdeac kuc, imoc yudangic nenearunac fingerec nga Anutu negengireckema numumima kecdimbe.

<sup>23</sup> Naso mong hama kecede nga bic hadac, imohai ine dedengerec ngicngac fora, yeni ongaasungina forango Manggac dengeregecde. Manggacngo nunumu areng ifia yeneac negenu ngereeude. <sup>24</sup> Anutu ye Asu. Imocac amma ngicngac dengerebesonga dema ongaasungo nga faka forau dengerebisia.” <sup>25</sup> Ifi deu ngacngo deec, “Messia, kpara mong Kristo deandae, ye fingerudeac dedea, imoc negenduae. Yeng hama wiac sasawa dekperaginemmeude.” <sup>26</sup> Ifi deu Yesungo yofi edeec, “Yoaac edeguduae, imoc ni.”

<sup>27</sup> Ifi demanu medacfora yeneng amaunac dzigene hagec. Hama Yesungo ngacgoc yoaac denegeng anocac hemma kerectegec angec. Amma mongngo yofi mi kpesimiec, “Ge noc wiacac kpesiminec me yegoc noc wiacac dedape?” <sup>28</sup> Anu ngacngo Yesuac yoaac negemma enanga wama amau dzigene kemma amafora edeyunuec, <sup>29</sup> “Ngeni hama henggec. Ngic mong ni faka anai meai, imoc seng deficnudacde. Ye Messia gedang?” <sup>30</sup> Ifi deu yeneng taong wama Yesuaru hagec.

<sup>31</sup> Anu medacfora yeneng yaka neudeac yofi degec, “Rabbi, ge yaka nena.” <sup>32</sup> Ifi degec yeng yofi edeyunuec, “Yaka fenende, imoc ngeni mi negendae.” <sup>33</sup> Ifi deu medacfora yenaocngoc denegeng amma degec, “Ngic mongngo yaka meha migec nedac gedang.”

<sup>34</sup> Ifi degec Yesungo yofi edeyunuec, “Suenuec, yeac enac tofohoma uaya mekecma mesibade, imocngo yakana ande. <sup>35</sup> Ngeni yofi deandae, ‘Afo 4 wisickeuguc semeng fora anude.’ Neng yoaac mong deba negenggec, ngeni kicngina fima uau henggec, yaka bic fora amma kpekpauc fede. <sup>36</sup> Ifi

anu heihomec nga kmememengic yeri yerahafoc ubangerec negeneceac kmememengicngo uayaac bung mema kekecseriac fora ifingoc mekpedzuc anude.

<sup>37</sup> Nga, 'Ngic mongngo wiac homeru mong ye fora mekpedzuc anude.' yoac ifi deandae, imocac foranoc fingecde. <sup>38</sup> Ngic goa yeneng ua megec ua imocac fora fingerec. Nga ngeni heihomec mi ammagec ni suengunuba fora mekpedzuc ambisia. Ngeneng yeneac ua torokpema tigeac enec."

<sup>39</sup> Samariangacngo Yesuac yofi dekperagiyemmeec, "Yeng ni faka anai meai, imoc seng deficnudacde." ifi deecac taong imohacnac samaria ngicngac yeneanunac homacngo Yesu negensinggegec. <sup>40</sup> Imocac amma samariangicngac Yesuaru kemma yeng yenigoc kefudeac heitaigec. Heitaigec yeng negengymmema wenac yohockang yenigoc kefec. <sup>41</sup> Yesungo ihai kecmanu homacngo yombong yeac yoacac amma negensinggema <sup>42</sup> ngac edegec, "Neni warac geac siducac amma negensinggeding. Nga yaguc nenaoc yeac enacfunac yoara negemma negensinggedimbe. Amma gennoc bangecngic sasawa neneac memengerec ngic, imoc negendingimbe."

<sup>43</sup> Anu uameme yohockang wisickeu Yesungo Samaria bangec wama Gariraia bangecfcu kenec. <sup>44</sup> Ye ihai kemma yengenaac yofi dekperagiemee, "Profete mongngo yengena bangecfcu kefu ngicngac yeneng ewehaihei mong mi ammigece."

<sup>45</sup> Anu gariraianigic yeni makekenggac nasou Yerusareng taonnu kenggec Yesungo faka sasawa meu henggecac amma Gariraia bangecfcu kenu amafora yeneng ubangerecgcoc heitaigec. <sup>46</sup> Heitaigec Yesungo Kana taong Gariraia bangecfcu doku merennu waing anec, ihai monggoc dzigene kenec. Kenu ihai ngictauac kia mong haec, yeac medacngo Kafanaung taonnu hafei feec. <sup>47</sup> Nga kiango Yesu Yudaia bangecfcunac dzigenema Gariraia bangecfcu hade, ifi negemma yearu kemma medaha mengereudeac edeec, nocac medaha homebeso anec. <sup>48</sup> Ifi deu Yesungo yofi edeec, "Ngeni faka kuhagoc nga faka morora mi hemma eng mi negensinggegecde." <sup>49</sup> Ifi deu kiango deec, "Kebu, ge bic hana, medacna homebeso ande." <sup>50</sup> Ifi deu Yesungo yofi edeec, "Ge kenna, Medacga bic ngereedac kecede." ifi deu ngic ye Yesuac yoac negensinggema dzigene kenec.

<sup>51</sup> Dzigene kememanungoc wanacngicfora yeneng hama sinnu meficgema edegec, "Medacga bic ngereedac kecede." <sup>52</sup> Ifi edegec, ye ngereec, imocac nasoyombonggac kpesiyemmeu yeneng degec, "Worang hadzing 1 kiroc, imohai sebua nomanedac." <sup>53</sup> Ifi degec mamango negensiec, "Yesungo naso imohainoc suenuma dedac, 'Medacga ye bic ngereedac kecede.'" Ifi negemma siduc edeyunuu ye nga wiacfora yeni Yesu negensinggegec. <sup>54</sup> Yesungo Yudaia bangecfcunac Gariraia bangecfcu dzigene hama negensinggegecdeac faka kuhagoc meu imocngo naso yohockang anec.

## 5

<sup>1</sup> Imocac ngadeau yudangic yenang hombang mong hau Yesungo Yerusarennu enec. <sup>2</sup> Emma Yerusareng taonnu nagutoa mong kpara Ramaac nagu, imocac nobohau dzohong mong feec. Imoc hebraiao yoacfu Betesida deandae, imocac tegiau firangama 5 tackenec. <sup>3-4</sup> Anu firangama imocac manau ngicngac hafeingingagoc nga kicpisc amma goa hanimangang nga puringa ifia homacngo fekenggec, yeni doku kockpac anudeac tomai fegec. Imoc yofiac, naso goau Kebuac angero mongngo doku

imohai haande. Hau doku kockpac anu mong ye waraima dokuu kemedede, yeng hafeia sasawa kpac angande.

<sup>5</sup> Anu ngicngac fekenggec, yeneac botucfunac ngic mong puringa kefu kifa 38 bic anec, yeng ihai fekefec. <sup>6</sup> Nga naso herea ihai fekefecac Yesungo hemma imoc negemma yofi kpesimiec, “Ge ngereebesoo anggende me?” <sup>7</sup> Ifi deu puringngo meremmiec, “Kunenna, doku kockpac ammanu merac ngicngo meficnuma dzohonnu fainubac. Ni kemebesoo ambare mongngo hefacnuma kemeande.” <sup>8</sup> Ifi deu Yesungo yofi edeec, “Ge yacma fefega mama kenna.” <sup>9</sup> Ifi deu ngic ye naso imohaingoc sebua ngereeu yacma fefea mama kenec.

Nga naso imoc ine sabata naso anec. <sup>10</sup> Anu yudangic yeneng ngic ngereec hemma edegec, “Yaguc sabatanasou fefega mama kenna, imoc singngo mi dede.” <sup>11</sup> Ifi degec merengyemmeer, “Ngic mengerenudac, yeng suenuma dedac, ‘Ge fefega mama kenna.’” <sup>12</sup> Ifi deu kpesimigec, “Merac ngicngo fefega mama kenna.” dedac? <sup>13</sup> Nga ngic ngereec ye merang mengereec, imoc mi negenec nocac Yesungo ngichabutoa nanggecac, ihai kemma kperucgeec.

<sup>14</sup> Anu imocac ngadeau Yesungo ngic imoc womong manau meficgema yofi edeec, “Ge sebiga bic ngereedac. Nga ebic womong kunengngoc fingecgem-bac kopocic monggoc mi meficgebesena.” <sup>15</sup> Ifi deu ngicngo kemma yudangic edeyunuec, “Ngic mengerenudac, imoc Yesu.”

<sup>16</sup> Yesungo sabata nasou ua ifia mekefecac yudangic yeneng ngaba seria ammigec. <sup>17</sup> Yesungo yofi merengyemmeer, “Mannango uaya mehakefec nga yofinenggac medengoc imocac amma neng ifingoc ua mekecduaengoc.” <sup>18</sup> Ifi amma Yesungo sabatanasouac singyoac memanganeeec nga torokpema Anutuac Manna dema ye isocngoc anec, imocac amma yudangic herengina monggoc yaru Yesu kpehomebesoo anggec.

<sup>19</sup> Ifi anggec Yesungo yofi merengyemmeer, “Foracngoc, Mamango ua mong meu Medacngo imoc hemma yengenaoc ua imocsac naric meude, imoc edengunuduac. Mamango ua mede, Medahango ua imocngoc meude. <sup>20</sup> Imoc yofiac, Manggac ye Medaha songogoc hoanggema ua mede, imoc sasawa edzahekecede. Nga ua sasawa meu hengandae, imocac engenatoa edzaheu meu ngeni imoc hemma kerecgec anggecede. <sup>21</sup> Manggacngo ngic homemea midiyunuma megboriyunukecede, ifi isocngoc Medacngo ngic megboribesoo negemmiu ngereeu megboriude. <sup>22-23</sup> Manggacngo ngic angammengina mi desiude, kpac. Ngic sasawango Manggac eweheimiandae, ifi isoc Medac eweheimigecdeac yeng desi desiua Medahaac mariu faidarec. Nga ngic mong ye Medahaac eweheihei mi ammiande, yeng Manggac sueec, ye ifingoc eweheihei mi ammiude.

<sup>24</sup> Foracngoc, ngic mong ye neac yoac negemma Manggac suenuc, ye negensingeude, yeng kekecserigoc kecma yoacfu mi enude, imoc edengunuduac. Yeng homec wama kekecfu bic endac. <sup>25</sup> Foracngoc, ngicngac bic homegec, yeneng Anutuac Medacac ubaudumeng negemma kekec megecede. Naso imoc haude nga yaguc bic hadac, imoc edengunuduac. <sup>26</sup> Manggac yengenaaru kekec fede, siriha imocngoc yeng kekec Medac miu Medacaru ifingoc kekec fede. <sup>27</sup> Nga Medaha ye Ngicac Medac, imocac amma Manggacngo ngic isingyunuma desiyunuudeac kuc miec.

<sup>28-29</sup> Ngeni yoac imocac kerecgec mi ambisia. Imoc yofiac, ngicngac kicseru fedae, yeni sasawango naso mong hau ubaudumenga negemma kicseruunac eregecede. Faka gombunga angkecma homegec, yeni kekec megecdeac yacgecede. Nga faka mangana angkecma homegec, yeneng

yoacfu nanggecdeac yacgecde. <sup>30</sup> Ni wiac mong neanna ubaac naric mi mebade, kpac. Ni wiac kedzacnango negemma negenganduae, imocac sirihau fakangina isinggema desibade. Neanna songo mi modacanduae, kpac. Suenuec yea songo modacbade. Imocac amma neac desi desiuango dindingac ande.

<sup>31</sup> Ni neannaoc haniana dekperagibadeu dedekperagina imocngo fora mi anude, kpac. <sup>32</sup> Mongngo neac hepuc amma haniana dekperagiande. Nga yeng neac hanianaac wiac dekperagiande, imocngo fora ande, imoc negenduae.

<sup>33</sup> Anu ngeni ngic goa sueyunugec Yohanearu kenggec, yeng yoac foraac hepuc amma imoc dekperagiyemmeer. <sup>34</sup> Ngic mongngo neac dedekperagi naric mi deude, kpac. Ngeni ebicfunac mesingunuba komoc kpegecdeac yoac yomoc edengunuduae. <sup>35</sup> Yohane ye sirihau yofi, kifa mong dzema mekperagingunuaude, ye ifi isoc anec. Mekperagingunuu ngeni naso wegenanec kperagi imocac songo negemma kperagia imohai kegcac.

<sup>36</sup> Ni neannaoc dedekperagi metacduae, imocngo Yohaneac dedekperagi ferahede. Nga Manggacngo uaya mema mesibadeac nenec. Amma ua mekecduaengo hepucna amma Manggacngo suenuec imoc dekperagiude. <sup>37-38</sup> Amma Manggac suenuec, yennoc hepucna amma haniana bic dekperagiec. Ye ngic sueu ngeneng ye mi negensinggedae amma Manggac ubaudumeng mi negemma yengena dafia mi henggec nga enacyoarango ubaherenginau mi fede. <sup>39</sup> Mitikibingo kekecseri meficgengemmeude, ngeni ifi negensinggema kibi imoc osoneng angkecdae. Kibi imocngonoc neac hepuc amma neac hania dekperagiude. <sup>40</sup> Nga ngeni ine nearu hama kekec megecdeac mi angemmede.

<sup>41</sup> Ni ngic yeneac dedengerec mi hoanggebade, kpac. <sup>42</sup> Nga Anutuac songo imoc ngeneac ubahereu mi fede, imoc negenduaengoc. <sup>43</sup> Nga ni Mannaac kpacfu haba ngeni mi hoannugecde. Nga ngic mong yengena kpacfu haudeu ngeni ye bic hoanggegecde.

<sup>44</sup> Ngeni ngenaocngoc dengereemema Anutu mocgu yearunac dedengerec haande, imocac mi angemmeudeu ngeni ye negensinggegecdeac obohogegecde. <sup>45</sup> Neng kecma Manggacaru yoacfu faingunubade, ngeni ifi mi negembisia. Ngeni Mosearu heirima kegcac yeng yoacfu faingunuude. <sup>46</sup> Mosengo neac negemma ohoec. Imocac amma ngeni imoc negensinggebau dede ni ifingoc negensinnubau. <sup>47</sup> Ngeni Moseac mitikibi mi negensinggedaeu neng yoac deduae, imoc ifingoc naric mi negensinggegecde.”

## 6

<sup>1</sup> Yesungo yoac imoc dedacma Garirai dzohongtoa, imocac kpara mong Tiberia dzohongtoa, imoc ferecgema edibigeng enec. <sup>2</sup> Nga yeng hafeigoc yenearu faka kuhagoc meu ngicngac yeneng imoc henggecac amma ngicngac habutoango ye modacgec. <sup>3</sup> Modacgec Yesungo medacfora yenigoc tikibumau emma tacgec. <sup>4</sup> Anu yudangic yeneac makekeng hombang naso wegeneec.

<sup>5</sup> Nga Yesungo kic fiu kenu ngicngac habutoango kuting kuting yearu kenggec, yenemma Firipo yofi kpesimiec, “Nenang yaka dahacnac bumema ngicngac habutoa yomoc yemmeni negecde?” <sup>6</sup> Yeng noc faka meude, imoc bic negemma Firipo eng tobanggema kpesimiec. <sup>7</sup> Kpesimiu Firipongo

meremmiec, “Nenang afo 8ac uabung, imocac socfu yaka bummema hesicke yemmeni yeneacsoc mi anude.”\*

<sup>8</sup> Ifi deu medacfora yeneac botucfunac Anderea, Simong Petoroac muneango deec, <sup>9</sup> “Medacbisic mong yei nande, ye ic sogong 5 bari gbomeango memea† nga kondungyang yohockang mekecde, imocngo ine habutoa dafi yemmeni sokoyunuude?”

<sup>10</sup> Ifi deu Yesungo yofi deec, “Ngeni ngicngac matacgecdeac edeyunugec.” Ifi deu edeyunugec kpindzingtoa feec, imohai matacgec. Ngic tacgec, yeneac kpetengina 5 tauseng isoc anec. <sup>11</sup> Tackenggec Yesungo ic sogong imoc mema Anutu ubangerec edema mederema ngicngac ihai tacgec, yeni yem-meec. Yemmeu wisickeu kondungyang ifingoc mema medereu songongi-naac areng menec anggec.

<sup>12</sup> Negec gebecyunuu Yesungo medacfora yofi edeyunuec, “Yaka tosea neti anggec fema manganebacac ngeni imoc kpedzucnedacgec sakacfu kemedaru.” <sup>13</sup> Ifi deu yeni ic sogong 5 bic negec, imocac tosea kpedzucnedacgec kemema sakac 12 wakeec.

<sup>14</sup> Wakeu ngicngac yeng faka kuhagoc meec, imoc hemma degec, “Foracngoc, ngic yocnoc profete bangecfu haudeac dedea.” <sup>15</sup> Nga ngic yeneng hama Yesu mendanggema ngictaungina faibesonga degec Yesungo negengyem-mema meickema monggoc tembuha tikiu enec.

<sup>16</sup> Enu ama kundung kpemanu medacfora yeni dzohongtoa tegiau ke-megec. <sup>17</sup> Kememagec ama kundung kpeu Yesungo yenearu mi hamanu yenaocngoc gombau emma dzohongtoa ferecgema Kafanaung kembesonga kenggec. <sup>18</sup> Kemmagec firangtoa kpeu dzohonggac tambong kuneng yarec. <sup>19</sup> Nga yeni 5 me 6 kiromita, imocacsoc puri kpema kemmagec Yesungo doku witiau titi kemma gomba mewegeneu yeni hemma kengec anggec. <sup>20</sup> Ifi anggec ine Yesungo yofi edeyunuec, “Imoc ni, neannaoc haduae, ngeni kengec mi anggec.” <sup>21</sup> Ifi deu negemma Yesu gombau taiembeso ammagec gombango bangec kembeso degec, imohai bic kensikeec.

<sup>22</sup> Werekengau ngicngac habutoa yeneng dzohong noboc namma degec, “Gomba mocngosac yoc taru hending. Nga Yesungo ine medacfora yenigoc imohai mi enu yeni tembucngina emma kendau.” <sup>23</sup> Ifi dema nammagec gomba goa Tiberia taonnunac kemma, Kebungo Anutu dange dema ic sogong gumecyunuecfu, ama imoc mewegenema hagec. <sup>24</sup> Hama yeni Yesu nga medacfora ihai mi yenenggecac habutoango Yesu hofocbesonga Kafanaung taonnu kenggec.

<sup>25</sup> Hofocma dzohong edibigeng kemma meficgema kpesimigec, “Rabbi, ge noc nasoac yei hadang?” <sup>26</sup> Ifi degec Yesungo yofi edeyunuec, “Foracngoc, neng faka kuhagoc meba hendau, imocac amma mi hofocnudae, imoc eden-gunuduae. Ngeni yaka negebec andauac hofocnudae. <sup>27</sup> Yaka mong hoama kpac angande, ngeni imocac uatoa mi mebisia. Nga Ngicac Medacngo kekecseriac yaka ngemmeude, imocac uatoa mebisia. Imoc yofiac, yeac witiu Anutu Manggacngo yengena dedeseriac dzic faiec.”

<sup>28</sup> Ifi deu yeni kpesimigec, “Anutuac ua mebeso dema noc ua meni ngereeude?” <sup>29</sup> Ifi degec turunga yofi merengyemmeec, “Anutuac ua yomoc-noc. Anutungo ngic sueu haec, ngeni ye negensinggegec.”

\* 6:7: Ye denari 200 deec. † 6:9: Bari flawa imoc wit flawa siriha ifia.

<sup>30</sup> Ifi deu yeneng degec, “Hemma negensinggunideac noc faka kuhagoc menade nga ge noc ua naric menade? <sup>31</sup> Kisicfocnina bangec kisiu manayaka<sup>§</sup> nekegec, imocacnoc yofi oho ohoya fede, ‘Ye kurumennunac yaka yemmeu negec.’” (*Makekeng 16:4; Nehemia 9:15; Mitiyegec 78:24*)

<sup>32</sup> Ifi degec yofi edeyunuec, “Foracngoc, Mose ye yengenaoc kurumenggac yaka mi mema ngemmeec, imoc edengunuduae. Mannango kurumenggac yaka fora ngemmeude. <sup>33</sup> Anutuac yaka, ngic yennoc kurumennunac mama bangecngic yeneac kekec meficgemyemmeude.”

<sup>34</sup> Yeng ifi deu degec, “Kebu, ge yaka imoc nasosoc nemmekechesena.” <sup>35</sup> Ifi degec Yesungo yofi edeyunuec, “Ni neannaoc yaka kekehagoc, imocac ngic mong ye nearu haude, yeng yakaac mi homeude nga mong ye ni negensinnuude, yeng dokuac monggoc mi ammiude. <sup>36</sup> Neng ine yofi bic edengunuai, ngeni bic nenggec nga sifu mi negensinnuandae. <sup>37</sup> Mannango ngicngac sasawa nenec, yeneng nearu hagec ngadeau naric mi kisangyunubade. <sup>38</sup> Ni neanna ubanaac kurumennunac mi mayai. Suenuec, yeac negen negeng modacbadeac mayai. <sup>39</sup> Nga suenuec, yeac songo nga negen negeng yofi, ye yengenaoc ngicngac nenec, yeni marina titingaunac mi mabisia nga yeni kecma naso wisic wisickeau midiyunuba yacdacegcede. <sup>40</sup> Mannaac negen negeng imoc yofi, ngicngac Medaha hemma negensinggegecde, yeni sasawango kekecseri megecde. Nga naso wisic wisickeau neng midiyunubesanduae.”

<sup>41-42</sup> Nga yeng yofi deec, “Ni neannaoc yaka fora amma kurumennunac mayai.” Imocac amma yudangic yeneng negenggec naric mi anu degec, “Ngic yomoc Yesu, i. Ye Yosefeac medac nga neni nonggomama negengyurudimbe. Ammanu yeng dafi yofi dede, ‘Ni kurumennunac mayai.’” <sup>43</sup> ifi degec Yesungo yofi deec, “Ngeni negemmangang wagec. <sup>44</sup> Mannango ngic mong mi heitaiudeu yeng nearu naric mi haude. Manggac suenuec, yeng ngicngac heitaiyunuec nga neng naso wisic wisickeau midiyunubesanduae.

<sup>45</sup> Profete yeneac kibiyoac yofi oho ohoya fede, ‘Anutungo kpouyemmedarec.’

(*Yesaia 54:13*)

Imocac amma ngicngac sasawa Manggacac yoacfu kedzac faima yearunac negen negeng medae, yeneng nearu hadacgecde. <sup>46</sup> Ngic mongngo Manggac mi henec, kpac. Ngic mocgungo Manggacgoc kefec, yeng Manggac henec. <sup>47</sup> Foracngoc, ngic mongngo ye negensinggede, yeng kekecserigoc anude.

<sup>48</sup> Ni neannaoc kekecac yaka. <sup>49</sup> Kisicfocnina yeneng bangec kisiu manayaka<sup>§</sup> nema homedacgec. <sup>50</sup> Ngeni yaka kurumennunac maec, yocnoc nema mi homegecde. <sup>51</sup> Ni neannaoc yaka kekehagoc amma kurumennunac mayai. Ngic mong ye yaka imoc neudeu ye kekecseri meficgema kechereema kefude. Yaka imoc fusina. Ngicngo kekec meficgegecdeac yemebade.”

<sup>52</sup> Ifi deu yudangic yoacngina manganeu degec, “Ngic yomoc ye dafi sebifusia nemmeu nenideac dede?” <sup>53</sup> Ifi degec Yesungo yofi edeyunuec, “Foracngoc, ngeni Ngicac Medac sacfusia mi negecdeu kekecngo ngenearu mi feude, imoc edengunuduae. <sup>54-55</sup> Imoc yofiac, neac fusi, imocngo yaka fora nga neac sac, imocngo doku fora, imocac amma ngic mong ye sacfusina

<sup>§</sup> **6:31:** Anutungo bangec kisiu yaka mong meficgemyemmeu asoacsoc sobing isoc kpedzucnekegec, imoc kpara manayaka **§ 6:49:** Anutungo bangec kisiu yaka yemmekefec, imoc asoacsoc sobing isoc bangecfu fingeckefu ngicngac yeneng imoc kpedzucnema nekegec, imoc kpara manayaka.

neude, yeng kekecserigoc anu neng naso wisic wisickeau ye meghoribade. <sup>56</sup> Anu mong ye neac sac nga fusi neude, yeng neac heremanau kefu neng yeac heremanau kecbade. <sup>57</sup> Manggac suenuc, ye kekec mingina nga ni yeac amma kecduae. Nga mong ye fusina neude, ye ifi isocngoc neac amma kefude. <sup>58</sup> Yaka yomocngo kurumennunac maec kecde, imoc bangecfocni-nango yaka nema homegec, ifi isoc kpac. Mongngo yaka yomoc neude, yeng kecma kekecseri meude.” <sup>59</sup> Yesungo yoac imoc Kafanaung kpekpeturang amau ngicngac edekpou ayemmeec.

<sup>60</sup> Ifi deu negemma medacfora yenearunac homacngo degec, “Kpoukpou imoc ebihagoc, mongngo imoc negemma naric mi modarude.” <sup>61</sup> Ifi degec Yesungo edekpou ayemmu medac yeni yoac homac osogecac yengenaoc negengymmema yofi edeyunuec, “Yoac imocngo memanganungunde me? <sup>62</sup> Nga Ngicac Medac ye warac kefecfu dzigene enu ngeni imoc hemma dafi anggecde? <sup>63</sup> Asungo kekec meefaiude nga sebiac kekec, imocngo memefiha kpac. Ni yoac edengunudua, imoc Asu nga kekec. <sup>64</sup> Anu ngeneac botucfunac goango ine yoacna mi negensinggedae.” Imoc yofiac, ngicngac damoc yeneng ye mi negensinggegec nga ngic merang Yesu doc mema ngaba yeneac mariu faiude, Yesungo imoc bic negenec. <sup>65</sup> Ifi anu yofi torokpeec, “Ngic goa ngeneng mi negensinggedae, imocac amma waraima bic edengunudua, Manggacngo ngic mong mi meefaiudeu, yeng nearu naric mi haude.”

<sup>66</sup> Ifi deu medac homacngo Yesu wama amanginau kemma yegoc monggoc mi yeregec. <sup>67</sup> Kenggec Yesungo medacfora 12 yofi kpesiyemmeec, “Ngeni ifingoc wanuma kembeso angemme me?” <sup>68</sup> Ifi deu Simong Petorongu yofi meremmiec, “Kebu, gearu kekecseriac yoac fora fedecac neni ngic monggaru naric mi kennide. <sup>69</sup> Neni bic negentegecma negensing-gudimbe, genoc Anutuac Kpetiacngic.”

<sup>70</sup> Ifi deu Yesungo yofi deec, “Neng medac 12 meisingngunuai nga nge-nearunac ine mongngo hadehade ande.” <sup>71</sup> Ye yoac imoc Simong, Karioto taonnunac yeac medaha Yudaac negemma deec. Ngic imocngo medac 12 yenearunac amma yeng Yesu doc meudeac anec.

## 7

<sup>1</sup> Imocac ngadeau yudangic Yudaia bangecfu kecgec, yeni Yesu kpe-homebesonga sing hofocgec. Imocac amma yeng ihai mi kengha amma Gariraia bangecfu yerecgema kefec. <sup>2</sup> Anu yudangic yeneac bedzo 40ac hombang wegene haec.\* <sup>3</sup> Nga Yesu munafora yeneng edegec, “Ge bangec yomoc wama Yudaia bangecfu kemma fakaga imoc ihai mena medacfocga henggecde. <sup>4</sup> Mong ye habu yeneac kicfu fingebeso negende, ye sufu sufuu ua mi mebeso. Ge fakaga imoc annadeu ngicngac yeneng fakaga hentegecdeac didiu kecma mebesena.” <sup>5</sup> Nga munafora yeneng ifingoc ye mi negensinggegec.

<sup>6</sup> Ifi anggec Yesungo yofi edeyunuec, “Neac naso mi hadac nga ngeneac naso, imoc ine nasosoc feude. <sup>7</sup> Ngicngac yeni ubango naric mi ukun-gunugecde. Nga neng ine angammemengina mangana dekperagianduaeac ubango ukunugec. <sup>8</sup> Ngeni hombannu kenggec nga ni ine bic mi kembade nocac neac nasoyombong mi ande.” <sup>9</sup> Ye ifi dema wama Gariraia bangecfu tarec.

\* **7:2:** Hombang imoc Anutungo bangec kisiu kifa 40 garengyunuu bedzonginau kecgec, yeni imoc negensima hombang tacandae.



10 Taru munafora hombanggac kemmagec ye ifingoc kemma fingetegecma mi keng keng sufu sufuu kenec. 11 Ifi anu yudangic yeneng hombannu Yesu hofocma kpesiemegec, “Ngic imoc dahai?”

12 Kpesiemegec ngicngac habutoango yeac sangic kpema homac denegeng amma degec, “Ye ngic gombunga.” ifi demagec goa yeneng degec, “Kpac, ngic imocngo ngicngac habutoa ikoc ayemmeande.” 13 Amma yudangic yeneac kengcenyuu mongngo Yesuac yoac didiu mi deec.

14 Anu hombang imoc bic dzonginemanu Yesungo womonnu emma ngicngac edekpou ayemmec. 15 Kpouyemmu negemma yudangic yeneng kerecetegec amma degec, “Ngic imoc ye dafi, ye negen negeng mong mi mema sifu mitikibiu yoac oho ohoya fede, imoc negende.” 16 Ifi degec Yesungo yofi merengyemmec, “Ni yoac kpoungemmeduae, imoc neanna yoac kpac. Imoc suenuc, yeac yoac. 17 Ni yoac kpoungemmeduae, imoc Anutuarunac me neanna ubanaac deduae, imoc ngic mongngo Anutuac enac tofohobeso negende, yeng negentegerude. 18 Ngic mong ye ubeaac yoac deande, ye yengena dedengerec fingerudeac negensima imoc deude. Nga mong ye ngic suec, yeac dedengerec fingerudeac ua meande, yeng ngic fora, yearu faka dindngac fede. Faka segesegea yearu mong mi fede.

19 Mosengo dedeseriyoac ngemmec, fora. Nga ngeneanunac ngic mongngo imoc ine mi modackecde, kpac. Amma ngeni nocac nuhomebeso negendae?”

20 Ifi deu habutoa yeneng merenggec, “Ge yafingagoc. Merang gubeso dede?” 21 Ifi degec Yesungo yofi edeyunuec, “Ni faka kuhagoc meba ngeni henggecac sasawango kerecetegec andae. 22 Negenggec, Mosengo ngeni sebi tosangina, imoc herecgecdeac uayoac ngemmec. Mose ye yengenaoc imoc mi hanahemanu yeac bangecfora yeneng ine hanahegec. Imocac amma ngeni faka imoc modacma sabata nasungoc ua imoc megecde. 23 Amma ngeni Moseac dedeseriyoac mi ferahegecdeac sabata nasungoc ngic yeneac sebi tosangina herecgeandae. Ngeni faka ifia mekecdaeu neng sabata nasou ngic mong sebia hafoangoc mengerebare nocac ngaba anendae? 24 Ngeni kicnginango sebiu heheng imohai mi isinggema debisia. Ngeni ine yoac dindngac negengising amma debisia.”

25 Ifi deu Yerusareng taonggac ngic goango kpesiemegec, “Ngic imoc kpehomebeso dedae me? 26 Nga ngic ye yoac didiu demanu nocac turunga mong mi merendae? Yeni ye Messia, imoc bic ireckedae gedang. 27 Nga Messia haudeu ye dahacnac haude imoc ngic mongngo mi negenude nga ngic yoc ye dahacnac, imoc ine negendacdimbe.”

28 Ifi degec Yesungo imoc negemma womong manau namma yoac kucgoc dema yofi edekpou ayemmec, “Ngeni ni negennuma dahacnac hayai, imoc negendaengoc. Ni neanna negen negennu wiac mong mebesonga mi hayai. Suenuec, yeng fora anu ngeneng ye mi negendae. 29 Nga suenuc, ye negemmiduae, nocac yearuacnoc hayai.”

30 Ifi deu yeni mendanggema witicamau faibesonga negenggec. Nga nasya mi haecac mongngo mi kpeserema megec. 31 Nga habutoa yeneanunac ngicngac homacngo ye negensinggema degec, “Messiango haude, imohai yeng faka kuhagoc meude, imoc ngic yocngo faka kuhagoc homacngoc meande, imoc mi ferahema meude.”

32 Habutoa yeneng ifi dema sangicfu yoac denengeng anggec. Anggec farisaio yeneng imoc negemma womong gareng enarafocngina yenigoc kpedzucnema keracnatang sueyunugec Yesu mendanggema witicamau

faigecdeac kenggec. <sup>33</sup> Ifi anggec Yesungo yofi deec, “Ni naso wegenanecsac ngenigoc kecbade. Kecma suenuec, yearu monggoc dzigenema embade. <sup>34</sup> Ngeni ni hofocnubibiema naric mi meficnugecde nga ni kembade, imohai ngeni naric mi hagecde.”

<sup>35</sup> Ifi deu yudangic yenaocngoc denegeng amma degec, “Ngic yomoc ye dahai kenu hofocma mi hennideac dede. Ye arengfocnina grik bangecfu sinsararang kpema kecbade, ihai gedang kemma grikgicngac yoac edekpou ayemmeude. <sup>36</sup> Ngeni ni hofocnubibiema naric mi meficnugecde nga ni kembade, imohai ngeni naric mi hagecde. Yoac imocac hania mi negengecdeimbe.”

<sup>37</sup> Hombang wisic wisickea, imocac nasoyadau Yesungo mama yoac kucgoc yofi deec, “Ngic mong ye dokuac homeandeu ye nearu naric hama nebeso. <sup>38</sup> Nga mongngo ni negensinnude, yeacnoc mitikibiu yofi oho ohoya fede, ‘Yeac hereunac kekecac dokukiwa tohoma kenude.’ ” <sup>39</sup> Ngicngac ye negensinggema kecbade, yeneng Tiri Asu ngade megecde, imocac ifi deec. Yesungo naso imohai kurumennu emma kuc nga kibikperagiagoc mi anecac amma Asu imoc mi yummeyemnea.

<sup>40</sup> Anu ngicngac habutoa yeneng yoara imoc negemma goango degec, “Ngic yomocngo profetenina fora yombong.” <sup>41</sup> Amma goa yeneng degec, “Ngic imoc ye Messia.” nga goa yeneng degec, “Kpahac, Messiango Gariraia bangecfunac mi haude.” <sup>42</sup> Mitikibiu yoac yofi oho ohoya fede, “Ye Dawidiac dzominga Beterehennunac, imoc Dawidiac ama yombong.” <sup>43</sup> ngic yeni ifi dema Yesuac amma tohoemmegec. <sup>44</sup> Tohoma goango ye mendanggema witicamau faibesonga, ifi degec amma mongngo ine sebiau mi kpesereec.

<sup>45</sup> Keracnatang yeni womong gareng enara nga farisaio yenearu eng dzigenema kenggecac kpesiyemmegec, “Ngeni nocac Yesu mi mehadae?” <sup>46</sup> Kpesiyemmegec degec, “Ngic mongngo yoac ifia deu mi negenning.” <sup>47</sup> Ifi degec farisaio yeneng merengyemmegec, “Ngeni ifingoc yeac ikocfu makpedau me? <sup>48</sup> Enarameme nga farisaio neneac botucfunac mongngo ye naric mi negensinggedimbe, kpac yombong. <sup>49</sup> Nga sicsauc areng yomocngo deseriyoac mi negengecdae, ngeni sowec medae.”

<sup>50-51</sup> Ifi degec, yenearuac mong kpara Nikodemo, ye warac Yesuaru kenec, yeng yofi deec, “Dedeseriyoacinango yofi dede, ‘Ngic monggac yoara nga angammemea mi hennegeng amma isinggema tactacngoc yoacfu mi faibesonga.’ ” <sup>52</sup> Ifi deu turunga yofi meremmigec, “Ge ifingoc Gariraia bangecfunac me? Mitikibiu hennegeng amma yofi bic hennade, profete mongngo Gariraia bangecfunac mi fingerude.” <sup>53</sup> Ifi dema yacma amanginasoc kendacgec.

## 8

<sup>1-2</sup> Yesungo oriwa tikiu emma taru ama wereckembeso ammanu mama monggoc Anutuac womonnu enec. Enu ngicngac yearu hadacgec tacma miti kpouyemmeec. <sup>3</sup> Ifi amma tacmanu mitiac negen negengngic nga farisaio yeneng ngac mong sero anu hemma Yesuaru mehama kicnginau faigec nanec.

<sup>4</sup> Nanu Yesu kpesimigec, “Kpoukpou, ngac yomocngo sero kicninau anu hending. <sup>5</sup> Nga dedeseriyoacfu Mosengo ngac ifianoc hocngo yenerenemideac deserinemmeec. Geng yaguc dafi denec?” <sup>6</sup> Yeni Yesungo yoac mong dafi deu negemma yoacfu faini dema faitobang ammigec.

Ifi ammigec Yesungo ngonducnema gbongango bangecfu kibi ohoec. 7 Ohoma nammanu kpesima kpesi anggec kpehengaima yofi edeyunuec, “Ngenearunac ngic mong kopocsiha kpac kecde, yeng waraima hoc ukuu ukubisia.” 8 Ifi dema monggoc ngonducnema bangecfu kibi ohoec. 9 Anu yeni Yesuac yoac imoc negemma kifanginaac sirihau yadango waraima Yesu wama kendaceg ngac ye botucnginau tembuha nanec.

10 Ifi nanu Yesungo kpehengai hemma yofi kpesimiec, “Ngac, ngic yeni dahai kendau? Ge manganaac areng, imoc mong dedau me?” 11 Kpesimiu deec, “Kebuna, kpac.” Ifi deu Yesungo yofi edeec, “Neng ifingoc ge mangana areng mi debade. Ge kemma kopocsic monggoc mi meficgebesena.”

12 Yesungo monggoc torokpema yoac yofi edeyunuec, “Ni bangectoa bangec imocac ngicngac ngenec kperagi. Mong ye ni modacnude, yeng kundunggac sing mong mi modarude. Amma ye kekecac kperagiu kefude.” 13 Ifi deu farisaio yeneng merenggec, “Ge geanggaocngoc dekperagiemenec, imoc singno mi dedeac yoacga fora mi ande.”

14 Yesungo meremma yofi edeyunuec, “Ni neannaocngoc haniana dekperagiemeduae, imoc fora. Ni dahacnac hayai nga dahai kembade, imoc neannaoc negenduae. Ngeni ine dahacnac hayai nga dahai kembade, imoc mi negendae. 15 Ngeni bangecngic siricnginau ngicngac fakangina isinggema haniangina deandae. Neng ngic mong isinggema hania dede ua mi mebade. 16 Ni tembuca ua imoc mi mekecduae. Manggac suenuec, yegoc ua mekecdipe. Imocac neng desi desiu meduaeu imocngo foragoc ande. 17 Dedeseriyoacnginau yoac yofi oho ohoya fede, ‘Ngic yohockang dedengira mocgu anu yoacngira fora anude.’ 18 Imocac amma neannaocngoc dekperagiemeba Manna suenuec, yeng ifingoc hepucna amma dekperagin-uude.”

19 Ifi deu farisaio yeneng kpesimigec, “Geac Mangga dahai kecde?” degec Yesungo meremma yofi edeyunuec, “Ngeni ni mi negennudae nga Manna ifingoc mi negemmidae. Ngeni ni negennubau debac Manna ifingoc negem-mibau.” 20 Yoac imoc, womonggac mana monnu soikia katapa tarecfu, imohai ngic edekpou ayemmeec. Nga ngic mongngo mendanggema witicamau mi faigec nocac ye ifi ammigecdeac naso mi anec.

21 Amma Yesungo monggoc yofi edeyunuec, “Ni kamba ngeni hofocnuma kopocsicnginagoc kecima homegecde. Nga ni kembade, imohai ngeneng naric mi hagecde.” 22 Ifi deu yudangic yeneng degec, “Ni kembade, imohai ngeni naric mi hagecde. Ye nocac ifi dede? Yengena sebia eweude me?” 23 Ifi degec yofi edeyunuec, “Ngeneng emu bangecfunac nga ni bangecfunac kpac, ni wihacnac. 24 Imocacnoc edengunuduae, ngeni kopocsicnginagoc kecima homegecde. Ngeni ‘ni kecduaengoc’, imoc ni negensinggedaeu kopocsicngina fekefu homegecde.”

25 Ifi deu kpesimigec, “Anu ge merac?” degec yeng yofi edeyunuec, “Ni haniana bic edengunudua. 26 Ni ngenec haifakangina homac hennegeng amma isinggema desibadeac fede. Anu suenuec, ye yoac foraac mingina nga wiac yearunac negenduae, imoc bangecfu dekperagibade.”

27 Yesungo Mamaac negemma edeyunuu yeni obohogec. 28 Obohogec Yesungo yofi edeyunuec, “Ngeni Ngicac Medac nangegec nanude, ngeni naso imohai ‘ni kecduaengoc’, imoc negentegecde. Ni wiac mong neannaoc mi angkecduae, Mannango kpounenec, imoc debade. 29 Suenuec, yeng nigoc kecde. Ni yeac songo modacma ua mekecduae. Imocac amma ye

wanuu tembucna mi kecbade.” <sup>30</sup> Yesungo yoac ifi deu ngicngac homacngo ye negensingegec.

<sup>31</sup> Yesungo yudangic ye negensingegec, yeni yofi edeyunuec, “Ngeni neac yoac hoanggema kecgeddeu neac medacfofna fora anggedde. <sup>32</sup> Ifi amma yoac fora negentegecgedde nga yoac forango witicfunac yungecngunuude.”

<sup>33</sup> Ifi deu meremmigec, “Neni Abrahanggac kiscifunac, mongngo wanac mi menunuec. Nga merang wanac menunuecac geng yungecnununadeac denec?”

<sup>34</sup> Ifi degec Yesungo yofi deec, “Ni fora yombong edengunuba, mongngo kopocsic meande, ye kopocsicngo wanac meub wanacngiha kecde. <sup>35</sup> Wanac meu kecade, ye ama imocac manau hombonanga naric mi kefude. Nga Medacngo ama imocac manau hombonanga kefude. <sup>36</sup> Imocac Medacngo yungecngunuudeu ngeni witicngina kpac kecgedde. <sup>37</sup> Ngeni Abrahanggac kiscifora, imoc negenduae. Neac yoacac titinga mong ine ngeneac ubahereu mi nandae nuhomebeso efadae. <sup>38</sup> Ni Mannaac hoannu kecma wiac hennegeng anai, imocnoc edengunuduae. Nga ngeni ine mangnginaarunac wiac nga faka negengandae, imocnoc amma kecdae.”

<sup>39</sup> Ifi deu degec, “Neneac mannina Abrahang.” degec Yesungo yofi merengyemmeec, “Ngeni Abrahanggac nambaracfora ambau debac yeac kecec nga faka modacbau. <sup>40</sup> Ni ngic mongngo Anutuarunac yoac fora negemma edengunubare ngeni nocac nuhomebeso andae? Abrahang ye faka ifia mong mi angkefec. <sup>41</sup> Ngeni ine mangnginaac kecec nga faka modacandae.” Ifi deu yeneng degec, “Neni sicsaucfunac mong mi fingering, kpac yombong, Mannina mocgu Anutu.”

<sup>42</sup> Ifi degec Yesungo yofi deec, “Ni Anutuarunac fingeema neanna ubanaac mi mayai. Yennoc suenuec, imocac ngeni Anutu mangngina ambac dede heregoc neac songo negemma hoannubau. <sup>43</sup> Nga ngeni ine yoacnaac kedzac kpegecdeacsoc mi ande, imocac amma ngeni yoac deanduae, imoc mi negentegecdae.

<sup>44</sup> Nga mangana mingina, yennoc ngeneac mangngina nga faka yeac songou fede, ngeni imoc megecdeac angemmeude. Ye hanahemangoc ngic yunuhomeande nocac yeac ubahereau faka fora mi feu faka fora mi mema nangkecde. Ye ikocngic nga ye ikocac mama kecdenoc. Imocac amma ye yoac ikoc dema yengenaoc nangeeeme kefude. <sup>45</sup> Nga ni yoac fora deduaeac ngeni neac yoacna mi negensingegecde. <sup>46</sup> Ngenearunac mongngo neac kopocsic mong negendaeu naric mi hefcigebac. Nga ni yoac fora deduae isoc ngeni nocac mi negensinnudae? <sup>47</sup> Anutuac arengfora yenennoc yoara negenggecde. Ngeni ine Anutuac arengfora kpac, imocac yeac yoac mi negenggecde.”

<sup>48</sup> Anu yudangic yeneng meremmigec, “Ge samariangicnoc amma ge hadehadegagoc, ifi deandimbe nga imoc yoac fora.” <sup>49</sup> Ifi degec Yesungo meremama yofi edeyunuec, “Ni hadehadena kpac. Ni Manna ewehihehi ammiba ngeneng ine ewehihehi mong mi anengandae. <sup>50</sup> Ni neanna kpac kuneng mebadeac ua mi meanduae nga mongngo neac kpac miacma desiude. <sup>51</sup> Foracngoc, ngic mong ye neac yoac mekefudeu, ye naric mi homebesande, ni edengunuduae.”

<sup>52</sup> Ifi deu yudangic yeneng degec, “Ge hadehadegagoc, neni yaguc negeng-gudimbe. Abrahang ye homeec nga profete yeni ifingoc homegec. Geng ine denec, ‘Mong ye neac yoac mekefude, yeng mi homebesande.’ <sup>53</sup> Anu ge kiscinina Abrahanggac engena mi annec. Ye homeec nga profete yeni

ifingoc homegec. Amma ge geanggaac negenna engena ande, imocngo naric mi ande.”

<sup>54</sup> Ifi degec Yesungo yofi edeyunuec, “Ni neannaoc dengereemebadeu imocngo fora mi ambac. Nga Manna ngenear Anutungina kecde, yeac ifi deanda, yeng ewehihei anende. <sup>55</sup> Ngeneng mi negemmidae, neannaoc ine ye negemmiduae. Neng ye mi negemmiduae debadeu, ngic ikoha amma ngeni isoc ambade. Ni negemmiduaengo yoara mekecduae. <sup>56</sup> Bangecngina Abrahang ye neac naso fingeru imoc hembeso negemma songotoa femiec. Fernu hemma songo negenec.”

<sup>57</sup> Ifi deu yudangic yeneng degec, “Ge kifaga 50 mi andacngoc nga ge Abrahang hennec, imoc naric mi heide.” <sup>58</sup> Ifi degec Yesungo yofi deec, “Foracngoc, Abrahang mi fingecmanu ‘ni kecduaengoc’, imoc edengunuduae.” <sup>59</sup> Ifi deu yeni hoc mema heibeso anggec yeng sufu sufuu womong ngadeau kemeec.

## 9

<sup>1</sup> Yesungo sinnu kemma ngic mong kicpisc fingec fingera henec. <sup>2</sup> Henu medacfora yeneng kpesimigec, “Rabbi, ngic yoc meracac kopocsicac amma kicpisc fingerec? Yengenaac me nonggomama yereac kopocsicac?”

<sup>3</sup> Ifi degec Yesungo yofi edeyunuec, “Ngic yengena me nonggomama yeneng kopocsic mefcgegec, imocac kpac. Anutuac ua mong yearu fingectegeru henggecdeac ifia fingerec. <sup>4</sup> Suenuec, nenang yeac ua wenacfungoc mekecbisina. Nga ama toforemanu mongngo ua naric mi meude. <sup>5</sup> Ni bangecfu kecmabangecac kperagi anduae.”

<sup>6</sup> Ifi dema bangecfu sofohoma imoc bangecngoc yerecgeu goteng fingeru ngic kicpisc yeac kiwau hosoec. <sup>7</sup> Hosoma yofi edeec, “Ge Siroang dzohonnu kemma doku nadzicna.” (Siroangcac titiha imoc “Sueec.”) Ifi deu kemma nadzicma kicfifi amma dzigeneec.

<sup>8</sup> Ifi amma dzigene hau amafora nga ngicngac goa warac iwaiac derecgekefu henggec, yeneng degec, “Ngic yomocngo tacma derecgekefec me?” <sup>9</sup> Goango degec, “Imoc yennoc.” Nga tosea yeneng ine degec, “Imoc ye kpac, imoc ye isoc mong.” nga yengenaoc deec, “Ni ngic yomocnoc.” <sup>10</sup> Ifi deu kpesimigec, “Ge dafi amma kicga fidang?” <sup>11</sup> Ifi degec deec, “Ngic kpara Yesu, yeng goteng yerecgema kicnau hosoma suenuma deec, ‘Ge kemma Siroannu doku nadzicna.’ ifi deu kemma nadzicma kicfifi andua.” <sup>12</sup> Ifi deu kpesimigec, “Nga ngic imoc damoc?” degec deec, “Ni mi negenduae.”

<sup>13</sup> Ifi deu yeni ngic warac kicpisc kefec, imoc farisaio yenearu hesicke kenggec. <sup>14</sup> Nga Yesungo goteng yerecgema ngic kiwa merecgeu kicfifi anec, imoc sabata nasou ifi anec. <sup>15</sup> Nga farisaio yeneng ifingoc ngic hemma kpesimigec, “Ge dafi amma kicfifi andang?” degec deec, “Ye gotengngo kicnau hosou imoc nadzicma kicfifi andua.”

<sup>16</sup> Ifi deu farisaio goango degec, “Ngic imoc ye sabata tatacnaac sing mi modacde, imocac ye Anutuarunac kpac.” Ifi degec goango degec, “Ngic kopocsihagocngo dafi faka kuhagoc ifia mebac?” Ifi dema yenaocngoc tohogec. <sup>17</sup> Tohoma kicpiscngoc kicfifi anec, ye monggoc kpesimigec, “Ge ngic kicga merecgeec, yeac dafi denec?” degec deec, “Ye profete mong.”

<sup>18</sup> Ifi deu yudangic yeneng ngic imoc kicpisc kefecfunac ngereema kicfifi anec, imoc mi negensinggegecac nonggomama kpacyuruma <sup>19</sup> kpesiyecmegec, “Ngic yomoc ye ngereac medac me? Ye kicpisc fingerec,

ifi dedape me? Nga ye dafiu yaguc kicfifi ande?" <sup>20</sup> Ifi degec nonggomama yereng yofi merennoc, "Ngic yomoc nereac medac. Ye kicpisc fingerec, imoc negendipe. <sup>21</sup> Nga dafiu yaguc kicfifi ande nga merang kiwa merecgedac, imoc neri mi negendipe. Ye bic yadi yadiaac amma yengena kpesimigec, yengenaoc haniaya edengunubeso." <sup>22</sup> Yeri yudangic yeneac kengecyuruu ifi deoc. Yudangic yeneng yoac mong bic yofi dedzege anggec, "Mongngo Yesu ye Messianoc ifi dema deficgeudeu neni ye kpebung yeneac ngadeau faini kefude." <sup>23</sup> Imocac amma nonggomama yereng deoc, "Ye bic yadi yadiaac yengena kpesimigec."

<sup>24</sup> Ifi deec yeni monggoc ngic kicpisc kefecmoc, ye naso yohockang kpacma edegeb, "Ge Anutu afehena. Ngic dedang, ye kopocsihagoc, imoc negemmidimbe." <sup>25</sup> Ifi degec, yeng merengyemmeec, "Ngic imoc kopocscimeme me kpac, imoc mi negenduae. Nga wiac mocgu negenduae, ni warac kicpisc kefaingo yaguc kicfifi anduae." <sup>26</sup> Ifi deu kpesimigec, "Ye noc wiac anggendac? Ye siriha dafiu kicga merecgedac?"

<sup>27</sup> Ifi degec yeng merengyemmeec, "Ni imoc bic edengunudacdua nga ngeni ine nearu kedzac mi faidau. Ngeni nocac monggoc negembeso andae? Ngeni ifingoc yeac medacfora ambeso negensidae me?" <sup>28</sup> Ifi deu yeni desusuic ammigec, "Genoc ngic imocac medac nga neni Moseac medacforango kecdimbe. <sup>29</sup> Anutungo Mose edeu yoara deec, imoc negendimbe. Nga ngic yomoc ye dahacnac, imoc ine mi negemmidimbe."

<sup>30</sup> Ifi degec yofi merengyemmeec, "Ngic imoc kicna merecgedac. Nga ye dahacnac haec, imoc ngeni mi negendae. Ni imocac warecngunuduae. <sup>31</sup> Nenang yofi negendimbe, Anutungo kopocscimeme yeneac yoac naric mi negengyemmeude. Anu ngic mongngo eweheimima dedea tofohoande, Anutungo ye negemmiude. <sup>32</sup> Bicngoc yombong hanahema feerekefecfu siduc mong yofia mi negenning, 'Ngic mong kicpisc fingecma kecmanu ngic mongngo kiwa merecgeec.' <sup>33</sup> Ngic imoc Anutuarunac mi mabac dede, ye ua mong ifia naric mi mebac." <sup>34</sup> Ifi deu yofi meremmigec, "Ge hafoangoc manganaunac fingecnecngo yoac kpounemmenec, i." Ifi dema kucgoc kisanggec maec.

<sup>35</sup> Anu Yesungo ngic kisanggec maec, imoc negemma hofockemma mefcigema edeec, "Ge ngicac medac negensingenec me?" <sup>36</sup> Ifi deu ngic imocngo deec, "Kunenna, ye merac? Edzacnuna hemma negensinggeba." <sup>37</sup> Ifi deu Yesungo yofi edeec, "Ge bic hendang. Ngic imocngonoc gegoc yoac yoac ande." <sup>38</sup> Ifi deu deec, "Kebu, ni negensingduae." Ifi dema ye afeheec.

<sup>39</sup> Nga Yesungo yofi deec, "Ni fakanginaac ising ising fingerudeac bangecfu mayaiac ngic kicpiscngo kicfifi anggecde nga kicfifi yeni kicpisc anggecde." <sup>40</sup> Yoac ifi deu farisaio goa yegoc nanggec, yeneng imoc negemma degec, "Neni ifingoc kicpisc me?" <sup>41</sup> Ifi degec Yesungo yofi deec, "Ngeni kicpisc kecbau debac kopocscic mi fengemmebac amma ngeneng ine yaguc dedae, 'Neni kicfifi kecdimbe.' imocac amma kopocscingina fengemmekefude."

## 10

<sup>1</sup> Ni fora yombong edengunuduae, "Ngic mongngo rama yeneac oda manau embeso dema oda naguya wama monnusing enudemoc, ye hamangec nga godzungic. <sup>2</sup> Ngic naguusing engande, yeng rama yeneac gareng. <sup>3</sup> Nga nagugarengngo yeac amma odanaguya naric witiude. Witiu rama yeneng ubea negenggec, yengenaoc rama kpacnginau kparu hagec waraiyemmeu yenhafoc ngadeau kemegecde.

<sup>4</sup> Ye ramafora hesicyunuu kemedagec waraiyemmeu ramafora yeni yeac ubea negendaeac ye modagecde. <sup>5</sup> Amma yeni ngic furia naric mi modagecde. Yeneng yeac ubea mi negendaeac kengec amma woragecde.”

<sup>6</sup> Yesungo yoac yomoc heima deu yeneng ine imocac obohogec.

<sup>7</sup> Obohogec Yesungo monggoc yofi edeyunuec, “Foracngoc, neng rama yeneac nagu, imoc edengunuduac. <sup>8</sup> Ngic goa ni mi fingebare hagec, yeneng hamangec nga godzungic. Nga rama yeneng ine yenearu kedzac mi faigec. <sup>9</sup> Ni neannaoc nagu. Mongngo nearu ferecgema oda manau enudeu Anutungo ye ebicfunac mesiu komoc kpeude. Amma ye naguusing engemmama amma nenesemeng meficgeude. <sup>10</sup> Hamangecngic yeng wiac hamangec meudeac nga yunuhomema kpetotieyunuudeac haude. Nga neng kecec monggoc nga monggoc mekegecdeac hayai.

<sup>11</sup> Neannaoc ramagareng gombunga. Gareng gombungango rama yeneac amma kekeha waude. <sup>12</sup> Nga ngic mong ye yagura kemma ngic monggac ramagareng kecdc, yeng rama yeneac mingingngina mi amma kecmanu katekasi hau ine hengkpatema woraude. Worau katekasingo rama yininegic ayemmeude. <sup>13</sup> Ngic imoc ye yagurau mekecdeac rama yeneac negenyohoc mi anude. <sup>14-15</sup> Neannaoc ramagareng gombunga. Mannango ni negennude nga neng Manna negenduae, ifi isoc neannaoc ramafozna negengyunuduac nga ramafozna yeneng negennudae. Neng rama yeneac amma kekecna wabade.

<sup>16</sup> Amma ramafozna goa kecdac, yeni oda yomohanac kpac. Nga neng hesicyunuba ubana negenggecde. Ifi anggec ramakpebung mocgu nga ramagareng mocgu anude. <sup>17</sup> Ni kekecna wama monggoc mebadeac amma Manggacngo neac songo negende. <sup>18</sup> Ngic mongngo nearunac kekecna naric mi meickeu ni neannaoc kekecna wabade. Amma kekecna wama monggoc mebade, imocac uayoac nga kuc nearu fede. Imoc Mannango deserinene.”

<sup>19</sup> Yoac imocac amma yudangic yeni monggoc tohogec. <sup>20</sup> Tohoma ngic homac yeneng degec, “Ye yafingagoc kecdcac ubasufu ande. Ngeni nocac yearu kedzac faidac?” <sup>21</sup> Nga ngic tosea yeneng degec, “Yoac ifia ngic yafingnginagoc, yeneac yoac kpac. Yafing yeni kicpisc kiwa naric mi merecgecde.”

<sup>22</sup> Yerusarennu nomang naso anu womong naguya bicngoc desigec, imocac hombannaso anec. <sup>23</sup> Imohai Yesungo womong manau firangmemeac mana mong fec, kpara Saromoac firangmeme mana, ihai kengha anec. <sup>24</sup> Ifi anu yudangic yeneng oronggema edegec, “Ge noc nasou haniaga dekperaginemma nengema monggoc mi obohonide? Ge Messia kececncfu imoc deireckenemma.”

<sup>25</sup> Ifi degec Yesungo yofi merenec, “Imoc bic edengunuai anu ngeni mi negensinggedae. Ni Mannaac kpacfu ua mekecduae, imocngo haniana mekperagiude. <sup>26</sup> Ngeni ine mi negensinnudae, nocac ngeni neac ramafozna, yenearuac kpac. <sup>27</sup> Ramafozna yeni ubanaac kedzac faigec ni negengyunuba yeneng modacnugecde. <sup>28</sup> Modacnugec kekecseri yemmeba yeni wiac mongngo naric mi memanganeyunubesande. Nga ngic mongngo marinaunac naric mi mesiyunuude. <sup>29</sup> Mannango yeni neneac, yeng wiac sasawa yeneac engena. Imocac Mannaac mariunac mongngo naric mi mesiyunuude. <sup>30</sup> Ni nga Manggac neri mocgu.”

<sup>31</sup> Ifi deu yudangic yeneng hocngo heigecdeac hoc monggoc megec. <sup>32</sup> Ifi anggec Yesungo yofi edeyunuec, “Manggacac ua gombung homac edzacngunuai. Anu hania damocac ngeni ngaba amma hocngo nerebesonga



andae?" <sup>33</sup> Ifi deu yudangic yeneng merenggec, "Ua gombungaac amma hocngo gerebeso mi andimbe. Ge bangecngicngo geangaac Anutu dema Anutu emminec, imocac amma ine hocngo gerebeso andimbe."

<sup>34</sup> Ifi degec Yesungo yofi merenec, "Dedesiyoacnginau yoac yofi oho ohoya fede, imoc mi negendae me? Anutu yengenaoc deec, 'Ni deba, ngeni sasawango anutuareng.' (Mitiyegec 82:6)

<sup>35</sup> Nga ngic Anutuac enacyoac bicngoc mekecgec, yeneac Anutungo deecfu, 'Ngeni anutuareng.' ifi anu Anutuac yoac mitikibiu fede, imoc netohonideac singa mong mi fede. <sup>36</sup> Anu Anutungo ngic meisinggema desima sueu bangecfu maec, imoc ni. Ni yofi bic dedua, 'Ni Anutuac medac.' Ifi deaiac ngeni nocac yofi dedae, 'Ge Anutu emminec.'

<sup>37</sup> Ua mekecduae, imoc Mannaarunac mi andeu ngeni mi negensinnubisia. <sup>38</sup> Nga Mannaac ua mebadeu ngeneng ine mi negensinnuma sifu faka kuhagoc mekecduae, imoc negensingebisia. Ifi amma Mannango nearu kecde nga neng yearu kecduae, imoc negemma negengecgecde." <sup>39</sup> Ifi deu yeneng monggoc mendanggebeso anggec, yeng maringinaunac hesima woraec.

<sup>40</sup> Anu Yesungo Yodang doku ferecgema doku noboc Yohanengo doku nadzic ua hanahema meec, ihai kemma kefec. <sup>41</sup> Ihai kecmanu ngicngac homacngo yearu hama degec, "Yohanengo negensingegecdeac faka kuhagoc mong mi mekefec. Amma ye ngic yomocac hania deec, imoc sasawa sifu fora ande." <sup>42</sup> Ifi dema bangec imohai ngicngac homacngo Yesu negensingegec.

## 11

<sup>1</sup> Ngic mong kpara Radzaro, ye Betania amau hafei ammiu feec. Nga Maria nga dara Mata yereng ama imohai kefec. <sup>2</sup> Nga Maria yennoc Kebuac haniu kerec homuna gombungango nadzicmima yengena orucusiangoc mekerenggeec. Nga Mariaac naina Radzaro yenoc hafei ammiac.

<sup>3</sup> Hafei ammiu nainghora yereng Yesuaru yoac faiec kenu deoc, "Kebu negenna, ngic hensongo ammiannec, ye hafei ammiu fede." <sup>4</sup> Ifi deec kenu Yesungo imoc negemma yofi deec, "Ye homeudeac hafei mi ammiide. Hafei imoc Anutuac kuc nga kibikperagi hefcigeucdeac fingece. Fingeru Medahaac kuc nga kibikperagi ifingoc fingecegerude." <sup>5</sup> Nga Yesungo Mata muneagoc amma Radzaro yeni heresongogoc hoangyunukefec.

<sup>6</sup> Anu yeng ine siduc imoc negemma uameme yohockang bangec ihaingoc torokpema kefec. <sup>7</sup> Ifi kecmaguc medacfora yofi edeyunuec, "Nenang Yudaia bangecfu dzigenema kenni." <sup>8</sup> Ifi deu medacfora yeneng degec, "Rabbi, yudangic yeneng hocngo gerebeso anggec nga geng naso mi hereemanu monggoc ihai kennade." <sup>9</sup> Ifi degec Yesungo yofi merenec, "Uameme mocguac manau aua 12 fede nga ngic mongngo wenacfu sing kengande, ye naric mi fopockeu makpeude nocac ye bangectoa bangec imocac kperagi henude. <sup>10</sup> Nga mong ye kundunnu kengande, ye fopockeu makpeude nocac yearu kperagia mong mi fede."

<sup>11</sup> Ifi dema yoac monggoc torokpema edeyunuec, "Nenang ogonina Radzaro gau feu ni midiba yarudeac ihai kembade." <sup>12</sup> Ifi deu medacfora yeneng degec, "Kebu, ye gau fedeu fekecma ngereude." <sup>13</sup> Yesungo Radzaroac homecac deu, yeneng ine negenggec gautehec feu dede isoc anec.

<sup>14</sup> Imocac ye tongganang yofi edeyunuec, "Radzaro ye bic homedac." <sup>15</sup> Nga ngeni negensingegecdeac amma ni imohai mi kafaiaac ubangerec

negenduae. Ngeni yaguc hagec yearu kenni. <sup>16</sup> Ifi deu Toma kpara mong Tombosonga\* yeng medac ogofora edeyunuec, “Nenang ifingoc yegoc home-nideac kenni.”

<sup>17</sup> Yesungo Betania taonnu kensikeu Radzaro ye kicsereu wenac yohoc nga yohoc bic ferahemanu edegec negenec. <sup>18</sup> Yerusareng nga Betania botucngirau kiromita harebec, imocacoc wegeng wegeng taroc. Imocac <sup>19</sup> Yudangic homacngo naingngiraac amma demeeafai ayecmebesonga dema Mata nga Maria yerearu hatacgec. <sup>20</sup> Tacmagec Yesu hade degec Matango imoc negemma meficgeudeac kenu Mariango ine amau tarec.

<sup>21</sup> Taru Matango kemma Yesu edeec, “Kebu, geng yei nenigoc kecbang debac nainna mi homebac. <sup>22</sup> Nga geng yaguc iwai monggac Anutu kpesimina ye naric genude, imoc negenduae.”

<sup>23</sup> Ifi deu Yesungo yofi edeec, “Nainggango gborima yarude.” <sup>24</sup> Ifi deu Matango deec, “Ye naso wisickeau homecfunac yacyac fingeru yarude, imoc negenduae.” <sup>25</sup> Ifi deu Yesungo yofi edeec, “Homecfunac yacyac nga kekec, imoc ninoc. Mong ye ni negensinnude, ye homeude nga sifu kefude. <sup>26</sup> Nga ngicngac yei kecma negensinnudae, yeni sasawango mi homebesandae, imoc negensinggenec me kpac?” <sup>27</sup> Ifi deu deec, “Oc Kebu, ge Messia Anutuac Medac bangecfu mabeso dedeanoc, imoc bic negensingguduae.”

<sup>28</sup> Ifi dema dzigene kemma munea Maria kparu kenu sangicfu edeec, “Kpoukpoung hatacma geac dede.” <sup>29-30</sup> Anu Yesungo taonnu mi hasikemangoc Matagoc ewaroc ihaingoc nanecac Mariango yoac imoc negemma bic yacma kenec. <sup>31</sup> Kenu yudangic yeneng demeefaiac hama tacgec, yeni Mariango gereagoc yacma kenu hemma ye kicsereu kiarudeac kende dema modacgec.

<sup>32</sup> Anu Mariango Yesu nanec, imohai kensikema Yesuac haniau makpema edeec, “Kebu, ge yei tacbang debac nainna naric mi homebac.” <sup>33-35</sup> Ifi dema kiaru yudangic yegoc hagec, yeni yenhafoc kiacgec Yesungo yenenu ubahodungngo ongaasuya meebiriu negenghodungaima kickumea mamamu deec, “Dahaigeng faigec?” deu degec, “Kebu, hama henna.” <sup>36</sup> Ifi anu yudangic yeneng hemma degec, “Henggec, ye Radzaroac heresongo kuneng femiec.” <sup>37</sup> Nga goa yenearunacngo degec, “Ye warac kicpisc kiwa merecgec. Nga ye ngic yomoc gombunga garenggeu mi homebac.”

<sup>38</sup> Yesungo monggoc ubaebic mema kicsereu kenec. Kicsere imoc hockedzebe anu hoc mongngo singa hedzickema feec. <sup>39</sup> Feu kensikema edeyunuec, “Ngeni hoc imoc meickegec.” ifi deu ngic homeec, yeac naina Matango deec, “Kebu, ye homunagoc bic andac nocac ye uameme yohoc nga yohoc bic kendac.” <sup>40</sup> Ifi deu Yesungo edeec, “Ge negensinggenadeu Anutuac kuc kibikperagiagoc hennade, ifi bic edegudua.”

<sup>41</sup> Ifi deu hoc meickegec Yesungo kic fiu enu yofi deec, “Manggac, ge yoacna bic negendang, imocac geac dangge deduae. <sup>42</sup> Ge nasosoc nunumuna negengannec, imoc bic negendua. Anu geng ni suenunec, imoc ngichabu yoc nandae, yeneng negensinggegecdeac ifi edegudua.” <sup>43</sup> Ifi dema Yesungo kucgoc kpacma deec, “Radzaro, ge yacma ngadeau mana.” <sup>44</sup> Ifi deu ngic homemea hanimaria nga kicmesuya kporucsusucngo kpefusema biranggea, imocngo yacma maec. Mau Yesungo edeyunuec, “Ngeni yungcemigec kenu.”

\* 11:16: Ye ogeagoc foratombosonga fingeroc.

<sup>45</sup> Yudangic homacngo Maria hembeso hagec, yeni Yesungo ua meec, imoc hemma ye negensinggegec. <sup>46</sup> Ifi anggec, yenearunac goango ine farisaio yenearu kemma Yesungo faka meec, imocac siduc ayemmegec. <sup>47</sup> Ayemmegec womong gareng enarafocngina amma farisaio, yeni tutumangtoaac memba kpedzucyunuma yofi degec, “Ngc yomoc ye negensinggegecdeac faka kuhagoc homac medeac nenang dafi anni?” <sup>48</sup> Ye wani kecma faka ifia torokpema meudeu ngic sasawango ye negensinggegec Roma yeneng hama amawomonnina nga ngicngacfofnina wangecnunubauac.”

<sup>49</sup> Ifi degec, yenearunac mong kpara Kaifa, ye kifa imohai womong gareng enara kefec, yeng yofi edeyunuec, “Ngeni wiac mong mi negentegecdae. <sup>50</sup> Ngicngac areng sasawa mi kpac anggecdeac ngic mocgungo bangec areng yeneac amma homeu ngereede, ngeni imoc mi negentegecdae me?” <sup>51</sup> Yoac imoc yengena ubeaac negemma mi deec. Yeng kifa imohai yudangic yeneac womong garengtoa kefec, imocac kpefing deec. Yesungo bangec areng yeneac amma homeudeac ifi anec. <sup>52</sup> Ye yeneacsac homeudeac mi maec. Ye Anutuac nambaracfora sinsararang kpegec kecdae, yeni kpedzucyunuu areng mocgu anggecdeac ifi deec.

<sup>53</sup> Ifi deu naso imohaingoc Yesu kpegecdeac hanahema dekiric anggec. <sup>54</sup> Ifi anggec Yesungo negemma yudangic yeneac botucfu monggoc nonongkac mi yeregekefec. Ye ine worama Eferaing ama bangec kisi wegenacfu fec, ihai medacfora yenigoc kemma kefec.

<sup>55</sup> Yudangic yeneac makekeng hombang naso wegene hamanu ngicngac homacngo Anutuac kicfu kpetiac anggecdeac dzuacemegecde, imocac amma amangina wama Yerusarennu kenggec. <sup>56</sup> Kemma womong manau namma Yesu hofocma yenaocngoc kpesiemegec, “Ye hambanninau haude me dafi negendae?” <sup>57</sup> Nga womong gareng enarafocngina nga farisaio yeneng deserima ngicngac yofi edeyunuec, “Yesu dahai kecde, imoc mongno meficgema edenunuec mendanggema mebisina.”

## 12

<sup>1</sup> Makekenggac hombang imocac wenac 6 femanu Yesungo Radzaroac taonnu Betania, ihai kenec. Yesungo ngic yenoc homecfunac megboriec. <sup>2</sup> Yeni imohai Yesuac amma yaka gombunga ohogec Matango yaka faima arenggeu negec. Nga ngic Yesugoc tacma yaka negec, yenearunac mong Radzaro. <sup>3</sup> Tacmagec, imohai Mariango sebiac kerec lita noboha, kpete imocacsoc mema Yesuac haniau kpakema nadzicmiec. Kerec, imoc narda foranac memea\* amma imocac buma kuneng. Nadzicmima orucdzoeango hania meuranggeec. Ifi anu kerec imocac homunango fima ama mana sokodacma fec.

<sup>4</sup> Anu medacfora yeneac botucfunac medac mong Yuda Kariotonac, yenoc ngade Yesu doc meudeac anec amma yeng deec, <sup>5</sup> “Nenang kerec imoc faini kifa mocguac uabunggac dzo kirecgeu† ngic makpekpea yemmebing, imocngo ngereebac.” <sup>6</sup> Yuda ye imoc ngic makpekpea yeneac negensima mi deec, kpac. Ye ine hamangecngicac amma dzohiengina garenggekecma dzo hamangec menec angkefec. <sup>7</sup> Ifi deu Yesungo deec, “Ge ngac imocac yoac wana. Ye kerec imoc faiu femanu homeba naso imohai eng tonggonubauac

\* **12:3:** Narda imoc dzaring mong marikomoc. Dokuya homunagoc imocngo kerec, imoc memea.

† **12:5:** Ye denari 300 deec.

amma nadzicnende. <sup>8</sup> Ngic makpekpea yeni nasosoc ngenigoc kecgcede nga neng ine ngenigoc nasosoc mi kecbade.”

<sup>9</sup> Anu yudangic homacngo Yesungo Betania taonnu kecede, ifi negemma Yesuacsac mi kenggec. Yeni Yesungo Radzaro homecfunac megboriec, ye momoc hembeso kenggec. <sup>10-11</sup> Ifi fingeru yudangic homacngo Radzaroac amma enara yeneac dede wama Yesu negensingegec. Imocac womong gareng enara yeneng Radzaro ifingoc kpegecdeac yoacua megec.

<sup>12</sup> Wereckengau ngicngac habutoango hombanggac Yerusarennu kenggec. Kemma Yesungo Yerusarennu haudeac wegenanec hade, ngicngac yeni ifi negemma <sup>13</sup> ic maria dzuamagoc mema Yesugoc ewacgecdeac sinnu kenggec. Kemma yofi kpacgec,

“Ohec, ngic KEBUAC kpacfu hade, ye kenehagoc. *(Mitiyegec 118:26)*  
Yeng Israe neneac Ngictau.”

<sup>14</sup> Ifi kpacgec Yesungo donggi medaha mong meficgema imohai emma tarec. Imocacnoc yofi oho ohoya fede,

<sup>15</sup> “Sionggac naroang ge mi kengecguu. Henna, ngictaugango donggi medahaac witiau tacmanu haude.” *(Dzekeraiia 9:9)*

<sup>16</sup> Faka fingerecfunac medacfora yeneng imocac hania mi negenghomegec. Kecma Yesungo kuc nga kibikperagiagoc anec, naso imohai ine faka ammigec nga yoac yeac negemma oho ohoya fede, imoc negengireckegec.

<sup>17</sup> Anu ngichabu yeni Yesugoc kemma Radzaro kicsereunac kpacma homecfunac megboriu henggec, yeneng siduc imoc desahegec. <sup>18</sup> Ye faka kuhagoc imoc megcac amma habutoango yegoc ewacgecdeac kenggec. <sup>19</sup> Ifi anggec ine farisaio yeni yenaocngoc denengeng amma degec, “Negenggec, nenang wiac mong anganggac sirilha kpac. Ngicngac kpedzongacngo ye modacma kendacdae.”

<sup>20</sup> Anu ngicngac hombanggac Anutu afehegecdeac Yerusarennu kenggec, yeneac botucfu grikgic goa momoc kecgce. <sup>21</sup> Kecma Firipoaru hama degec, “Ngickuneng, neni Yesu hembeso negendimbe.” nga Firipo ye Gariraia bangec Besaida taonnunac. <sup>22</sup> Ifi degec Firipongo hama Anderea edeu yerahafoc kemma Yesu edeoc.

<sup>23</sup> Edeec Yesungo yofi meremma edeyuruec, “Ngicac medac ye kuc nga kibikperagiagoc anudeac nasoya hade. <sup>24</sup> Foracngoc, wit gbomea mong bangecfu mi kemema tohoudeu imoc yengenaocsac tarude, imoc edengunuduae. Nga bangecfu kemema tohoudeu imocngo fora homac meficgeude. <sup>25</sup> Ngic mong ye sebiaac kekecac songo negengande, ye kekeha sufumiude. Nga sebiaac kekec bangec yomohai ubeango waande, yeng kekeha mekecma kekecseri meficgeude. <sup>26</sup> Nga ngic mong ye kingang kpekpena ambeso negendeu ye ni modacnubeso. Nga ni kecbade, ye imohai ifingoc nigoc kefude. Nga ngic mong ye neac kingang kpeudeu, Mannango ye seseheude.”

<sup>27</sup> Amma Yesungo monggoc deec, “Yaguc ubaongana ebiriu dafi debade? Manggac, ge naso yomohacnac onggonnuna. Nga neng ine imocac amanoc naso yomohai hasikeduae. <sup>28</sup> Manggac, ge kpacga mekperagina.”

Ifi demanu kurumennunac udumeng mong yofi fingerec, “Ni kpacna bic mekperagaii amma monggoc mekperagibade.” <sup>29</sup> Yoac ifi fingecmanu ngicngac habutoa nanggec, yeneng udumeng imoc negemma degec, “Parandangngo heide.” Nga toseango ine degec, “Angero mongngo yegoc yoac dede.” <sup>30</sup> Ifi degec Yesungo yofi deec, “Udumeng imoc neac amma mi hadac,

kpac. Imoc ngeneac memeficac fingeacdac. <sup>31</sup> Yaguc bangectoa bangec imocac ngicngac fakangina ising isinggenaso nga yoacngina desigeacde. Amma bangec yomocac ngictau meickegeacde. <sup>32</sup> Anu ngic yeneng bangecfunac miacnugec ni emma ngicngac sasawa kpedziyunuba nearu hadacegeacde.” <sup>33</sup> Yengena siric dafiu homeude, imocac dekperagima edeyunuudeac ifi deec.

<sup>34</sup> Ifi deu ngic habutoango meremmigec, “Dedeseriyoacfu yofi degec negengandimbe, ‘Messiango fingeacma nasoya kpac, kechereema kefude.’ Anu ge dafi denec, ‘Ngic yeneng Ngicac Medac miacgec embeso.’ Nga Ngicac Medac imoc merac?” <sup>35</sup> Ifi degec Yesungo deec, “Kperagingo naso wegenanecnac ngenigoc kefude. Kundungac kucngo semengunubacac ngeni kperagi fengemmemanu kperagigoc kecbisia. Ngic mong ye kundunnu kengkeacde, ye sing dafiu kende, imoc naric mi negentegerude. <sup>36</sup> Imocac amma ngeni kperagingo ngenigoc femanungoc kperagi imoc negensinggebisia. Ifi angkecma kperagiac nambaracfora anggeacde.” Yesungo ifi dema wayunuma yeneanunac meickeec.

<sup>37</sup> Yesungo faka kuhagoc homac kicnginau meu yeni ine ye mi negensinggegec. <sup>38</sup> Profete Yesaiaac yoac yomoc fora fingeacbeso, “Kebu, yeni yoac dekperaginemmegec, imoc ngic merac negensinggeec amma meracaru KEBUAC mariseri fingeacmiec.” *(Yesaia 53:1)*

<sup>39</sup> Imocac amma yeni naric mi negensinggegec. Amma Yesaiano yoac mong yofi torokpema deec,

<sup>40</sup> “Yeni kicnginango mi hengegeacdeac kicngina mekundung kpeec amma faka meu ubangina dzingfong anu mekundung kpeyunuec nga ubadzigeac dzigene mi fingeacyemmemanu mengereyunubaiac.” *(Yesaia 6:10)*

<sup>41</sup> Yesaiano Yesuac kuc kibikperagiagoc henecac yeac negemma yoac yomoc deec.

<sup>42</sup> Ammanu ngickiwa botucnginaunac homacngo Yesu negensinggegec nga farisaio yeneng ine kpebungac ngadeau faiyunubauac yeni imoc mi dekperagiyemmegec. <sup>43</sup> Ngic yeneng dedengerec ayemmegecdeac songotoa feyemmeec nga Anutungo dedengerec ayemmeudeac wagec.

<sup>44</sup> Anu Yesungo kucgoc kpacma yofi deec, “Ngic mong ni negensinnude, ye nisac kpac, ye suenuc, ye ifingoc negensinggeude. <sup>45</sup> Nga mong ye nende, yeng suenuc ifingoc henude. <sup>46</sup> Nga ngicngac negensinnudae, yeni sasawango kundunnu monggoc mi kecgeacdeac nocab bangecfu kperagia mama fingectegerec, imoc ni. <sup>47</sup> Ngic mong ye yoacna negemma mi tofhoudeu neng fakaya mi isinggema desibade, kpac. Ni ngicngac fakangina isinggema desibadeac mi mayai. Neng ine ngicngac ebicfunac mesiyunubade nga yeni komoc kpegeacdeac mayai.

<sup>48</sup> Anu mong ye ngadenuma yoacna mi hoanggeude, wiac mongngo fakaya isinggema desimiude. Yoac deai, imocngonoc naso wisickeau fakaya isinggema desiude. <sup>49</sup> Ni neanna ubanaac yoac mi deanduae, kpac. Manggac suenuc, yeac yoac debadeac dederecge anenec. <sup>50</sup> Yeac dedeseriyoac imoc kekecseri, imoc negenduae nga imocac amma Manggac yoara edenuc, imocngoc debade.”

## 13

<sup>1</sup> Makekenggac hombang nasoac tofocnac mocgu femanu Yesungo bangec yomoc wama Manggacaru dzigeneudeac nasoya wegeneec, imoc bic ne-

gengemeec. Ifi negemma bangecfu wiacfora yeneac heresongoya fekefec, imoc hafoangoc edzacyunumaguc kekeha wisickebeso, ifi negenec. <sup>2</sup>Yeni maraiac yaka nema tacgec. Nga mangana minginango negen negeng Yuda, Simong Kariotoac medac ubeau bic yofi faiec, yeng Yesu docfu faiu ngaba yeneng mebisia.

<sup>3</sup>Nga Mamango wiac sasawa Yesuac mariaui bic faiec nga ye Anutuarunac mama monggoc dzigene enude, ye imoc bic negenec. <sup>4</sup>Negemma tataha wama yacma ngakpi hereha hesima keremmeme mong mema kebangau dzegeec. <sup>5</sup>Dzegema tera yadaosong, imohai doku kpeu kemeu medacfora yeneac hani dzuacyemmema keremmeme kebangau dzegeec, imocngo haningina mekerenggeyemmec.

<sup>6</sup>Ifi amma Simong Petoroaru kenu Petorongo kpesimiec, “Kebuna, ge dafiac hanina dzuacnade?” <sup>7</sup>Ifi deu Yesungo yofi edeec, “Ni faka anduae, ge yaguc imocac hania mi negentegecneac amma ngadeguc hania negentegecnae.” <sup>8</sup>Ifi deu Petrongo deec, “Kpac yombong, ge neac hani mi dzuacnade.” deu Yesungo meremmiec, “Ni haniga mi dzuacbadeu, ge nearu mi tahockenade.” <sup>9</sup>Ifi deu Simong Petorongo deec, “Kebuna, ge haninasac kpac, orucna nga marina momoc dzuacnenna.”

<sup>10</sup>Ifi deu Yesungo yofi deec, “Ngic mong ye doku bic nadzirec, ye hafoangoc kongac kpeecac monggoc mi nadzicma haniasac dzuachesonga. Ngeni kongac bic kpegec amma imoc ngeni sasawa ngeneac ine mi deduae.” <sup>11</sup>Nocac ngic merang ye doc meu megecde, imoc bic negenec. Imocac yofi deec, “Ni sasawa ngeneac imoc mi deduae.”

<sup>12</sup>Yesungo haningina dzuacdaru wisickeu ngakpi hereha heiu kemeu monggoc matacma yofi kpesiyemmec, “Ni faka ngenearu medua, imocac hania negentegecdae me? <sup>13</sup>Ngeni neac kpoukpou nga Kebu kpacnuandae, imoc naric deandae, nocac ni imocnoc. <sup>14</sup>Ni Kebu nga kpoukpounginango haningina dzuacduaeu ngeni ngenaoc ifingoc haningina dzuacemebisia. <sup>15</sup>Ni faka gombungaac ongea edzacngunuma angemmeduae, siriha imocngoc ngenaocngoc modacma mebisia.

<sup>16</sup>Foracngoc, wanacngicngo mingina mi feraheude nga sue sueango ngic suec, ye mi feraheude, imoc edengunuduae. <sup>17</sup>Ngeni yomoc negemma modacgecdeu Anutuac ubangerecngo ngenearu feude.

<sup>18</sup>Ni sasawa ngeneac mi deduae. Meisingngunuai, ngeni ine negengngunuduae. Amma yoac mitikibiui oho ohoya fede, imoc fora fingerudeac yoac yomoc heficgeec,

‘Ngic nigoc yaka neande, ye gofoc gofohango tifacnuudeac bic hania mi-acde.’

*(Mitiyegec*

*41:9)*

<sup>19</sup>Faka imoc fingerude nga, ‘Ni kecduaengoc.’ ngeni imoc negensinggegecdeac amma yaguc faka imoc mi fingecmanu imocac siriha edenngunuduae. <sup>20</sup>Foracngoc, ni ngic me ngac mong sueba hau mongngo ama heimiude, yeng ni ama heinende ande. Anu ngic mong ye ni ama heinenude, yeng suenuc, ye ama heimiudengoc.”

<sup>21</sup>Yesungo yoac imoc demanu ongaasuya ebiriu yoac yofi dekperagiec, “Ni fora yombong edengunuba, ngeneac botucfunac mongngo docfu fainuu menugecde.” <sup>22</sup>Ifi deu medacfora yeni yenaocngoc kicngo engemma degec, “Imoc meracac dede?” ifi dema obohogec. <sup>23</sup>Nga medacfora yeneac botucfunac songomedaha yeng Yesuac hoannu tarec. <sup>24</sup>Ifi taru Simong Petoro ye hatango sosoc yofi anec, “Ge kpesimina, imoc meracac dede?”

<sup>25</sup> Ifi deu medac imoc Yesuac mokucfu heifema kpesimiec, “Kebu, ge imoc meracac denec?” <sup>26</sup> Ifi deu Yesungo deec, “Ni ic sogong tosea yomoc nemuruckema ngic mong mibade, ngic imocnoc.” Ifi dema ic sogong mema nemuruckema Yuda, Simong Kariotoac medac mic.

<sup>27</sup> Miu ic sogong meu Satangngo hereau kemeec. Kemeu Yesungo yofi edeac, “Ge ua mebeso negennec, imoc kemma bic mebesena.” <sup>28</sup> Ifi deu medacfora tagec, yeneng noc wiacac edede, imocac obohogec. <sup>29</sup> Imoc yofiac, Yuda ye dzohie mekefecac hombangac wiac mong bummeudeac edede me ngic makpekpea wiac mong yemmeudeac dede, ifi negenggec. <sup>30</sup> Nga Yudango ic sogong tosea memanu imohaingoc yacma kemeec. Nga tofocnac naso yombong bic anec.

<sup>31</sup> Anu Yesungo yofi deec, “Yaguc Ngicac Medacngo kuc nga kibikperagiog fingectegecde. Fingectegeru ngicngac yeni Ngicac Medac uayaac amma Anutuac kuc nga kibikperagia negenggecde. <sup>32</sup> Ngicngac yeni Medac hemma Anutuac kuc nga kibikperagia negenggecdeu Manggacngo Medahaac kuc nga kibikperagia ngicngac mekperagiyemmeude, imocac naso wegenede. <sup>33</sup> Nambaracfocna, ni naso wegenanec ngenigoc kecmangoc kemba ngeni ni hofocnugecde. Anu yudangic edeyunuai, imocngoc yaguc eden-gunuduae. Ni kembade, imohai ngeneac hahaac sing mong mi fede, kpac. <sup>34</sup> Singyoac gboria mong ngenmeduae, ngeni ngenaocongoc heresongogoc hoangemebisia. Neng ngeni heresongogoc hoangngunukecduae, ngeni ifi isoc ngenaocongoc heregoc tembus tembus songogoc hoangemebisia. <sup>35</sup> Ngeni ngenaocongoc heresongogoc hoangemegecdeu ngicngac sasawango ngeni neac medacfocna kecdae, imoc negenggecde.”

<sup>36</sup> Ifi deu Simong Petorongo kpesimiec, “Kebu, ge dahai kennade?” ifi deu Yesungo yofi deec, “Ge yaguc ni kembade, imohai naric mi modacnunade, kecma ngadeguc modacnunade.” <sup>37</sup> Ifi deu Petorongo monggoc kpesimiec, “Kebu, ni nocac yaguc naric mi modacgubade? Ni geac amma kekecna naric waba doude.” <sup>38</sup> Ifi deu Yesungo meremma yofi edeac, “Ge naric neac amma kekecga wana doude, ifi denec me? Foracngoc, ni edegubade, kokorecngo mi arohomanu geng atac harebec neac busic kpenade.”

## 14

<sup>1</sup> Ngeni ubaebic mi mebisia. Ngeni Anutu negensinggema ni ifingoc negensinnubisia. <sup>2</sup> Neac Mannaac amau amamana homac fekende. Imoc mi febac dede yofi bic edengunubai, “Ni ngeneac ama mana mengerebadeac kembade. <sup>3</sup> Amma ngeneac amatatac heitumeibadeac kemma dzigene hama hesicngunubade. Ni kecbade, ihai nenahafoc kecnideac negenduae. <sup>4</sup> Amma dahai kembade, ngeni imocac sing bic negendae.”

<sup>5</sup> Anu Tomango kpesimiec, “Kebu, ge dahai kennade, imoc mi negendimbe. Imocac sing dafi negentegecnide?” <sup>6</sup> Kpesimiu Yesungo yofi deec, “Ninoc sing nga yoac fora amma kekec. Ngic mongngo nia kpacfu Manggacaru keng keng imocac sing mong mi fede. <sup>7</sup> Ngeni ni negennudaeu Manna ifingoc negemmigegecde. Amma ngeni yaguc namma enude imohai ye negemmima bic hendae.”

<sup>8</sup> Ifi deu Firipongo deec, “Kebu, ge Manggac edzacnununa henni soc-nunuude.” <sup>9</sup> Ifi deu Yesungo yofi edeac, “Firipo, ni naso herea ngeneac botucfu kecbare ge mi negennunec. Ngic mong ye nenec, yeng Manna henec. Nga dafi Manggac edzacngunuba henggecdeac denec? <sup>10</sup> Ni Manggacac



hereu kecduae nga Manggacngo neac hereu kecede. Ge imoc mi negensinggenec me? Yoac edengunuanduae, imoc neanna ubaac mi debade, kpac. Manggacngo neac hereu kecma ua imoc mekecede. <sup>11</sup> Ngeni yoacna yomoc negensinggegec, ni Manggacac hereu kecduae nga Manggacngo neac hereu kecede. Ifi deba obohogecdeu uana meanduae, imoc negensinggebisia.

<sup>12</sup> Foracngoc, mong ye ni negensinnude, ye ni ua meanduae, imocngoc meude, imoc edengunuduade. Amma ua mekefai, yeng imoc ferahema monggoc meude, nocac ni Manggacaru kembade. <sup>13</sup> Medacngo Manggacac kuc nga kibikperagi heficgeudeac amma ngeni wiac sasawa neac kpacfu kpesigec, imoc ambade. <sup>14</sup> Amma wiac monggac neac kpacfu kpesinenggecdeu ni imoc ambade. <sup>15</sup> Ngeni heregoc neac songo negenkecdaeu singyoacna modacgece.

<sup>16</sup> Anu neng Manggac kpesimiba yeng memeseringina mong ni isoc ngem-meu yeng ngenigoc nasosoc kefude. <sup>17</sup> Amma ye yoac foraac Asu. Nga bangecfunac ngicngac yeni ye naric mi megecede. Yeni ye mi hengandae nga ye mi negemmigece. Nga ngeneng ye negemmidaae, ye ngeneac botucfu amma herenginaunoc kefude. <sup>18</sup> Nga wangunuba beging isoc mi kecegece, kpac. Ni ngenearu habade. <sup>19</sup> Naso wegenanec wisickeuguc bangectoa bangec imocac ngicngac yeneng ni monggoc mi nenggecede nga ngeneng ine nenggecede, nocac ni kecduaeac amma ngeni kecegece.

<sup>20</sup> Ni Mannaac hereu kecduae nga ngeni neac hereu kecdae amma ni ngeneac hereu kecduae, ngeni naso imohai imoc negentegecegece. <sup>21</sup> Ngic mong ye neac singyoac hoanggema modacande, ye heregoc neac songo negenude. Nga mong ye heregoc neac songo negenudeu Mannango yeac songo ifingoc negenude. Amma neng yeac songo negemma fingecmibade.”

<sup>22</sup> Ifi deu Yuda Kariotoac waseango Yesu kpesimiec, “Kebu, ge nenisac fingecnemmesongna negensinec nga bangectoa bangec, imocac ngicngac yenearu kpac, imoc dafiac?” <sup>23</sup> Ifi deu Yesungo yofi meremmiec, “Ngic mong ye heregoc neac songo negendeu ye enacyoacna modarude. Modaru Mannango yeac songo negenu nereng yeac hereu amatatacnira mema kecdede. <sup>24</sup> Nga mong ye heregoc neac songo mi negenude, ye enacyoacna mi modarude. Nga ni yoac deba negengandae, imoc neac yoac kpac, imoc Manggac suenuac yeac yoacnoc.

<sup>25</sup> Ni ngenigoc kecma yoac yomoc edengunuduade. <sup>26</sup> Nga Manggacngo memeficngina Tiri Asu neac kpacfu sueu mama yeng wiac sasawa kpoungemmema yoac edengunuai, imoc heigboringemmeude. <sup>27</sup> Ni faingunu kembade nga ruaena faiduae, imocngo ngenearu fekefude. Bangectoa bangecac ngicngac yeneng ruae yemmeandae, ruaena imoc ifi isoc kpac. Imocac ngeni kengec mi ambisia amma ubaebic mi mebisia.

<sup>28</sup> Ni Manggacaru kemma monggoc ngenearu dzigene habade, ifi deba negendau. Amma ngeni heregoc neac songo negendae isoc sogaibau nocac Manggac yennoc neac engena. <sup>29</sup> Nga kembadeac fora ngadeguc fingectegeru ngeni negensinggegecdeac amma kembadeac fora mi fingecmanungoc siduha yaguc edengunuduade.

<sup>30</sup> Ni naso herea monggoc ngenigoc yoac yoac mi ambade. Bangectoa bangec yomocac ngictau haude. Nga yeac wiac mong neac hereu mi fede. <sup>31</sup> Ni Manggacac songo negengkecduae. Amma yeng uayoac deserinene, imocac sirihau ua mekecduae, bangectoa bangec yomocac ngicngac yeneng imoc negentegecegecdeac amma deduae, ngeni yacgec wama kenni.”

## 15

<sup>1</sup> Ni waing ic fora nga Mannango wainguaac mingina. <sup>2</sup> Ic fawa goa nearu fema fora mi angkecgec ye imoc sasawa kperecgema ukuyunuude. Nga fawa fora angandae, imoc sasawa foraya homac anudeac ye imoc kperecgema memengere anude. <sup>3</sup> Ni enacyoac edengunuaiac ngeni bic kongac kpegec kecbade. <sup>4</sup> Amma ngeni nigoc kpeketahema kecbisia. Ifi anggec neng ngenigoc kpeketahema kecbade. Ic fawango waing icfu mi kpeketaheudeu, ye fora naric mi anude. Ifi isocngoc ngeni nearu mi kpeketahema kecgecdeu fora mong mi anggecde.

<sup>5</sup> Ni neannaoc waing ic nga ngeni fawafocna. Ngic mong ye nearu kpeketahema kecde, neng yearu ifingoc kpeketahema kecba yeng fora homac anude. Ngeni nia kpacfu ua mong naric mi megecde. <sup>6</sup> Mong ye nearu mi kpeketahema kefudeu ye ngicngo fawa heregema ukuu dzanggeande, ifi isoc ye ukugecde. Nga fawa ifia kpedzucnema gerecfu ukugec dzeude. <sup>7</sup> Ngeni nearu kpeketahema kecgecde nga neac yoac ngenearu kpeketahema feudeu wiac monggac angemueu kpesigec, imoc fingecngemmeude. <sup>8</sup> Nga ngeni fora homac meficgemagec Manggacngo faka imocac kpac kuneng meu ngeni medacfocna fingectegecgecde.

<sup>9</sup> Manggacngo ni songogoc hoannukefec, neng ifi isocngoc ngeni songogoc hoangnunudefai. Ngeni neac songo manau kpeketahema kecbisia. <sup>10</sup> Ni Mannaac dederecge yoac modacma yeac songo manau kpeketahema kecbisia. Ifi isoc ngeneng neac singyoac modacgecdeu neac songoac manau kpeketahema kecgecde. <sup>11</sup> Neac ubafeacngo ngenearu fede nga ubangerecngna hafoangoc fengemmeudeac yoac yomoc edengunuudae.

<sup>12</sup> Yomoc neac singyoac, neng ngeneac songo negengkecbisia, siriha imocngoc ngeni ngenaocngoc heresongogoc hoangemema kecbisia. <sup>13</sup> Mong ye ogofora yeneac amma kekeha waude, yeac heresongo imoc engena yombong. <sup>14</sup> Nga ni singyoac ngemmeai, imoc sasawa modacgecdeu ngeni neac ogofocna anggecde.

<sup>15</sup> Kingangmedac ye minginango wiac angkecde, imoc mi negenude. Imocac ni ngeneac kingangmedac monggoc mi debade, kpac. Ni ngeneac ogofocna deduae, nocac ni Manggacrunac yoac negennai, imoc sasawa edengunudarai. <sup>16</sup> Anu ngeni neac kpacfu wiac monggac kpesigec Manggacngo imoc ngemmeudeac amma neng meisingngunuai. Ngeneng ine ni mi meisinnugec, kpac. Meisingngunuma fora meficgegecdeac uau faingunuai. Nga ngeni kemma fora meficgebisia. Meficgegec fora imocngo fefeseri feengkefude. <sup>17</sup> Anu ni singyoac yofi ngemmeduae, ngeni ngenaocngoc heregoc songo negengemekecbisia.

<sup>18</sup> Bangectoa bangec yomocac ngicngac yeneng ubango ukungunudaueu ngeni yofi negembisia. Yeni ubango ngeni mi ukungunugec imohai ni ubango bic ukunugec. <sup>19</sup> Ngeni bangectoa bangec yomocac ngicngac kecbau yeni yenang ayammeande, ifi isocngoc ngeneac songo negembau. Nga ngeni ine bangec yomohanac kpac, neng ine ngeni bic meisingngunuma bangec yomocac ngicngac yenearuac meicngunuai. Imocacnoc yeneng ngeni ubango ukungunugecde. <sup>20</sup> Ni yoac warac edengunuai, imoc mi nigecongubeso, wancngicngo mingina naric mi feraheude. (Yohane 13:16) Imocac amma ngicngac nukporac anenggec, yeni ifi isocngoc ngeni ngunukporac angemmegecde. Nga neac yoac hoanggeandaeu ngeneac yoac

ifingoc hoanggegede. <sup>21</sup> Yeni suenuec, ye mi negemmdiae. Imocac yeni neac kpacnaac amma ngeni ifi angemmedacgede.

<sup>22</sup> “Ni mama yenearu yoacna mi debai dede yeni kopocsicngina kpac kecbau. Amma yaguc ine kopocsicnginaac amma degbedic anggecdeac sing mong mi fede. <sup>23</sup> Ngic mong ye ubango wanude, ye ifingoc Manna ubango waude. <sup>24</sup> Ni ua mekecduae ngic mongngo faka kuhagoc ifia bicngoc mi meec, imoc yeneac botucfu mi mebai dede, yeni kopocsicngina kpac kecbau. Nga yeni ine imoc yaguc hemmaguc Mannagoc neri ubango ukunurugec. <sup>25</sup> Anu yoac yomoc,

‘Yeni hania kpacfu ubango ukunugec.’ *(Mitiyegec 35:19; 69:4)*  
imoc dedeseriyoacnginau oho ohoya fede nga imocngo hafaogoc fingerudeac ifi anggec.

<sup>26</sup> Memeficngina haude, ye Manggacarunac suengemmeba haude amma yennoc yoac foraac Asu nga yeng hama ni dekperaguude. <sup>27</sup> Nga ngeneng hanac hanaheaunacngoc nigoc kecgec, imocac ngeni ifingoc naric dekperaguude.”

## 16

<sup>1</sup> Ngeni negemmangang amma mi wanugecdeac yoac yomoc bic eden-gunudua. <sup>2</sup> Ngic yeni kpekpeturang amaac kpaec heingemmema ngadeau faingunugecde. Nga naso mong haude, imohai ngic yeni Anutuac ua medimbe dema ngunuhomegede. <sup>3</sup> Yeni Manggac nga ni mi negennurudaec ifi anggecde. <sup>4</sup> Ni hanac hanaheaunacngoc yoac imoc mi edengunuai nocac ni naso imohai ngenigoc kefai. Nga naso mong haude, imohai ni yoac eden-gunudua, imoc mi nigecongunuudeac amma yaguc monggoc edengunuduae.

<sup>5</sup> “Ni suenuec, yearu dzigenebadeac naso wegene hade. Nga ngenearuac mongngo yofi mi kpesinende, ‘Ge dahai kennade?’ <sup>6</sup> Neng yoac yomoc edengunuduaac ine ngeni ubahodungngo mewakengunuude. <sup>7</sup> Ni yoac fora edengunuduae, ni kembade, imocngo ngenearu ngereeude. Ni ni kembadeu memeficngina naric mi haude. Neng kemma ye sueba ngenearu haude. <sup>8</sup> Yeng hama bangectoa bangec yomocac ngicngac kopocsicngina nga faka dindingac amma desi desiuac imoc edzacyunuma heficgemyemue negenggec fora anude. <sup>9</sup> Kopocsicac hania yofi, yeni ni mi negensinudae. <sup>10</sup> Nga faka dindingacac hania yofi, ni Manggacaru emba ngeni mi nenggecde. <sup>11</sup> Amma desi desiac hania yofi, bangectoa bangec yomocac ngictau ye yoacfu bic makpeec.

<sup>12</sup> Nga nearu ngeneac yoac homacngoc fede. Nga ngeni ine yaguc imoc tofohoma mekecgecdeacsoc mi ande. <sup>13</sup> Yoac foraac Asu maude, yeng yoac forau mekpedzuc angemmedarude. Amma ye yengena ubeaac yoac mi deude. Ye Anutuarunac yoac negengande, imoc deude nga faka ngadeu fingecebesande, imocac momoc edengunuude. <sup>14</sup> Ye ni dekperagingemmema kpac kuneng nenude, nocac ye neanna ubatohonnunac yoac imoc meude. <sup>15</sup> Manggacaru wiac sasawa fede, imocac mingina ni. Imocac amma yofi deduae, wiac sasawa Asungo mema dekperagingemmeude, imoc nearunac. <sup>16</sup> Ngeni naso wegenanec mi nenggecde nga naso wegenanec monggoc fede, imohai nenggecde.”

<sup>17</sup> Ifi deu medacfora goa yenaocngoc kpesiemegec, “ ‘Naso wegenanec fede, imohai mi nenggecde nga naso wegenanec monggoc fede, imohai

nenggecde.’ yoac imocac hania dafi? Amma monggoc dedac, ‘Ni Manggacaru kembade.’ ” <sup>18</sup> Anu negenggec obohou degec, “Naso wegenanec fede, imocac hania dafi? Neni yoac imocac hania obohodimbe.”

<sup>19</sup> Medacfora yeneng kpesimibeso anggec Yesungo imoc bic negemma yofi edeyunuec, “Naso wegenanec fede, imohai mi nenggecde nga naso wegenanec monggoc fede, imohai nenggecde. Imocac ngenacngoc kpesimedae me? ” <sup>20</sup> Foracngoc, ngeni kiac songgong ammgoc bangectoa bangec yomocac ngicngac yeneng sogaigecde, imoc edengunuduae. Nga ngeni ubahodung anggec ubahodungngina imocngo merennu ngeni ubangerec monggoc meficgegecde. <sup>21</sup> Ngac mong ye medacmeme nasoya wegene hau kpendzeng kpema sabac meude. Sabac mama ye kpendzeng imoc nigeckpeude. Ye sabac bangecfu bic fingeccac, imocac amma sogaiude. <sup>22</sup> Ngeni imocacsoc yaguc ubaebicgoc keccdae. Amma monggoc ngenemba imohai ngeni ubangerec negemma sogaigec ngic mongngo sogac sogaingina imoc naric mi meickeude.

<sup>23</sup> Anu naso imohai ngeni wiac monggac mi kpesinenggecde, kpac. Foracngoc, ngeni wiac monggac neac kpacfu Manggac numumigec yeng imoc ngenmeude, imoc edengunubade. <sup>24</sup> Ngeni warac neac kpacfu wiac monggac mi numukegcec. Nga sogac sogainginango hafoangoc fengemmeudeac ngeni wiacac numuma mebisia.

<sup>25</sup> Ni yoac heima yoac edengunukefai. Kecma nasoya hau ni yoac heima ngenearu monggoc mi debade, kpac. Ni didiu yombong Manggacac wiac dekperagibade. <sup>26</sup> Naso imohai ngeni neac kpacfu numugecde. Nga neng ngenec amma Manggacaru numubade, imoc mi deduae. <sup>27</sup> Ngeni heregoc neac songo negendae nga ni Manggacaru hayai, imoc negensinggecde. Imocac Manggac yengenaoc ngeneac songo negende. <sup>28</sup> Ni Manggacaru hama bangecfu mayai nga monggoc bangec wama Manggacaru dzigene kembade.”

<sup>29</sup> Ifi deu medacfora yeneng degec, “Negenna, ge yaguc yoac mi heima didiu denec.” <sup>30</sup> Amma wiac sasawa negendacnec, imoc yaguc negendimbe. Ge mongngo kpesigenggecdeac mi obohonecac amma ge Anutuarunac hanec, imoc negensinggedimbe. <sup>31</sup> Ifi degec Yesungo medacfora yofi edeyunuec, “Ngeni yaguc negensinggedae.

<sup>32</sup> Negenggec, naso mong hade nga bic hadac imohai ngeni ni tembucna wanuma tipac tohoma sinsararang kpema tembuc tembuc amanginasoc kenggecde. Nga tembucna mi kecbade, nocac Manggacngo nigoc kefude. <sup>33</sup> Ngeni nearu ruaegoc keccgecdeac yoac yoc edengunuduae. Nga ngeni bangectoa bangec yomohai kpendzeng kpema keccgecde. Nga ni bangec yomoc bic feraheaiac ngeni ubangina kuha mi mabeso.”

## 17

<sup>1</sup> Yesungo yoac imoc dema kiwa kurumennu fiu enu yofi numuec, “Manggac, naso bic hadac. Ge medacgaac kuc nga kibikperagi ngicngac mekperagiyemmena. Ge ifi anna Medacngo ifingoc geac kuc nga kibikperagi ngicngac mekperagiyemmeude. <sup>2</sup> Geng bangecngicngac sasawa yeac kuc bageau faiyununec. Nga yeac areng denec yeng kekecsari yemmeudeac yeni yeac bageau keccgecdeac uayoac nga kuc ye minec. <sup>3</sup> Anu yeni Anutu mocgungo fora kecce amma yeng Yesu Kristo sueu maec negennurugecde, imocngo kekecsariac hania. <sup>4</sup> Ni ua mebadeac denennec, imoc mesiai amma geac kuc nga kibikperagi bangecfu mekperagiyemmeai. <sup>5</sup> Manggac, bangec

nga kurumeng mi fingecmaecngoc ni geac kicfu kuc nga kibikperaginagoc kefai, ge kuc nga kibikperagina imoc nenna.

<sup>6</sup> Manggac, ge geanggaoc ngicngacfoega bangec yomohacnac meisingyuna geac kpacga mekperagiyemmeai. Yeni geac ngicngac kecegec geng yeni nennec nga yeneng yoacga tofohoma kecegec. <sup>7-8</sup> Amma enacyoac nennec, imoc bic yemmeba megec. Imocac yeni wiac sasawa gearunac hau nennec, imoc negendae. Nga geng suenuna gearunac hayai, imoc ifingoc yaguc fora yombong negendae.

<sup>9</sup> Imocac yeneac numugenduae. Bangectoa bangec yomocac ngicngac yeneac mi numuduae, kpac. Ni geng ngicngac nennec, yeneac amma numugenduae nocac yeni geac ngicngac areng <sup>10</sup> nga neac wiac sasawa imoc geac nga geac imoc neac. Nga ni yeneac kekecfu kuc kibikperagigoc mema kecduae. <sup>11</sup> Kekecnasona bangecfu wisickebeso ammanu yeni bangecfu kecmagec neng gearu habade. Kpetiac Manggac, nerang mocgu nga ifi isoc yeneng mocgu anggecdeac geng kpacga nennec, imoc arennu yenenggareng ambesena. <sup>12</sup> Neng yenigoc kefai, naso imohai kpacga nennec, imocngo garengyunuma onggongyunuba ngic mongngo mi sufuec. Yenearunac mocgusac, hofeac medac, yeng manganeec. Mitikibiu yoac fede, imoc hafoangoc fora fingerudeac ifi fingerec.

<sup>13</sup> Anu neac feac feacngo yenearu sokodarudeac amma yoac sasawa yomoc bangec yomohaingoc dekperagima yaguc gearu habade. <sup>14</sup> Ni enacyoacga yemmeai. Amma yei kuriha kecduaeac bangectoa bangec yomocac ngicngac yeneng ubango ukunugec nga siriha imocngoc yeni kuric kecdaeac bangectoa bangec yomocac ngicngac yeneng yeni ubango ukuyunugec. <sup>15</sup> Ge bangecfunac meicyununadeac mi numugenduae, kpac. Manganaac minginango memayunubacac geng kaso ayemmebesena, imoc numugenduae. <sup>16</sup> Ni bangectoa bangec yomohanac kpac nga yeni ifi isocngoc yomohanac kpac. <sup>17</sup> Geac yoac imoc fora amma imocngo kpetiac kekecfu meyadiyunubeso. <sup>18</sup> Nga geng ni bangectoa bangec yomohai suenunec, ifi isocngoc neng yeni bangecfu sueyunuduae. <sup>19</sup> Yeni yoac forau kecma kpetiac kecegecdeac neng yeneac amma kpetiac kekecfu kecduae.

<sup>20</sup> Anu ni yeneacsac mi numugenduae. Nga enacyoacga degec ngicngac yeneng imoc negemma negensinnugecde, yeneac momoc numugenduae. <sup>21</sup> Yeni sasawa mocgungoc anggecde nga geng suenunec, imoc ngicngac bangectoa bangec yomohai negensingegecdeac yeneac yofi numugenduae, Manggac, ge neac hereu kecnec nga neng geac hereu kecduae, siriha ifingoc yeneng nerang here manau kecbisia. <sup>22</sup> Nerang mocgu kecdipe, ifi isoc yeni mocgu kecegecdeac amma geng kuc kibikperagiagoc nennec, imoc bic yemmeai. <sup>23</sup> Yeni mocgu yombong kecegecdeac neng herenginau kecba geng neac hereu kecnade. Ifi fingeru bangectoa bangec yomocac ngicngac yeni geng suenuna mayai, imoc negentegecgecde. Nga ge neac songo negennec, ifi isoc yeneac songo negengkecnec, imoc ifingoc negentegecgecde.

<sup>24</sup> Manggac, bangec nga kurumeng mi fingecmaec ge bic heresongogoc hoannuma kuc nga kibikperagi nennec. Nga ngicngacfoena nennec, yeni neac kuc kibikperagiagoc imoc henggecdeac neng kecbade, imohaingoc nenahafoc kecnideac anende. <sup>25</sup> Faka dindingacac Manggac, bangecngic yeneng ge mi negengugoc neng ine negenguai. Nga geng ni suenuna mayai, neac ngicngacfoena imoc bic negendae. <sup>26</sup> Geng ni songogoc hoanunec, songo imocngo yeneac hereu feude nga ni herenginau kecbadeac neng geac kpac bic dekperagiyemmeai amma dekperagiyemmebade.”

## 18

<sup>1</sup> Nunumu wisickeu Yesungo medacfora yenigoc mekemma Kidrong doku ferecema noboc yufu ua mong feec, ihai kemma enggec.

<sup>2</sup> Nga Yesungo medacfora yenigoc naso homac imohai kpeturanggekecgecac Yuda ye Yesu docfu faiu megedce, yeng ifingoc yufuua imoc negenec. <sup>3</sup> Ye ifi negemma womong gareng enara nga farisaio yeneac wasaingec amma keracnatang meyunuu haec. Hama yenhafoc kifa hania hania nga yareac wiac goa momoc mekenggec.

<sup>4</sup> Anu Yesungo faka fingecmiude, imoc bic negendarecac amma yenearu wegenac kemma yofi kpesiyemmeec, “Ngeni merac hofocdae?” <sup>5</sup> Kpesiyemueu degec, “Yesu Nadzaretengic, ye hofocdimbe.” ifi degec Yesungo yofi deec, “Imoc ni.”\* Ifi demanu Yuda Yesu doc meec, yeng yeneac botucfu nanec. <sup>6</sup> Nga Yesungo yofi deec, “Imoc ni.” imohai yeni ngade ngade kemma bangecfu makpegec. <sup>7</sup> Kpefemagec monggoc kpesiyemmeec, “Ngeni merac hofocdae?” deu degec, “Yesu Nadzaretengic.” <sup>8</sup> Ifi degec Yesungo yofi merenec, “Ni bic edengunudua, imoc ninoc. Ngeni ni hofocnudaueu naric medac yomoc wayunugec kembisia.” <sup>9</sup> Nga Yesungo yoad bic deec, imocngo hafoangoc fora anudeac torokpema yofi deec, “Ge ngic nennec, yenearunac mong mi waba sufuec.” *(Yohane 6:39)*

<sup>10</sup> Anu Simong Petoro yeng wasaibeang mong ameagoc mekefec, imoc kpedzima imocngo womong gareng enaraac wanacngiha kpara Mariku, ye kpema kedzaha foiaugeng herecgeec. <sup>11</sup> Herecgeu Yesungo Petoro yofi edec, “Ge beangga ameau faina kemeu. Manggacngo kpendzenggac sokoc neneec, imoc nedachesare.”

<sup>12</sup> Anu wasaingic nga enara amma yudangic yeneac keracnatang yeneng Yesu mendanggema maria dzegema <sup>13</sup> hanahema Hanasiaru mekenggec. Nga Hanasi kpegea Kaifa ye kifanaso imohai womong garengtoa kefec. <sup>14</sup> Nga “Ngic mocgungo ngicngac areng yeneac amma homeude, imocngo ngereeude.” Imoc Kaifango yudangic bic dederecge ayemueu feec.

<sup>15</sup> Yeni Yesu mekemmagec Simong Petoro nga medac ogea mong, yeri Yesu modaroc. Modarec medac imocngo womong garengtoa negemmiecac yeri Yesu modacma womong garenggtoaac ama imocac oda manaungoc enec. <sup>16</sup> Enu Petoro ye ine oda naguac ngadeau nanec. Nammanu medac ogeango womong garengtoa negemmiecac, yeng mama nagugareng ngac nagu nanec, ye edema Petoro hesickeu oda manau enoc. <sup>17</sup> Emmaec wanac narolang nagugareng nanec, yeng Petoro kpesimiecac, “Ge ifingoc ngic mehadau, yeac medac me?” deu Petoronggo deec, “Ni imoc kpac.” <sup>18</sup> Nga ama nomang anecac wanacngic nga keracnatang yeneng hama gerecmosora kpedzucnema figec wewengaima feu sebingina megec gereeu nangec. Nammagec Petoro ye ifingoc sebia meu gereeudeac hama botucnginau nanec.

<sup>19</sup> Anu womong garengtoango Yesu medacforaac nga yengena kpoukpou uayaac dekpesi ammiec. <sup>20</sup> Ifi ammiu Yesungo yofi meremmiecac, “Ni didiu bangecfu ngicngac yoac edeyunukecma yoacna nasosoc kpeketurang amanginau amma womongtoanginau dekefai. Nga yudangic sasawa kpeturanggeandae, imohai dema sufu sufuu mong mi deai. <sup>21</sup> Nga geng nocac imoc kpesinennec? Ngicngac yoac deba negenggec, yeni kpesiyemmena. Negenghenna, yoac deai, yeneng negendae.” <sup>22</sup> Ifi deu keracnatang

\* **18:5:** “Imoc ni” imoc Anutuac kpac mong Miti esaeu yemmeyemnea. Ge yoac goaac dedekperagi imohai henna. Hafac 1128.

yenearunac mong wegenac nanec, yeng Yesu kpepatanggema yofi edeec, “Ge noc sinnu namma womong garengtoaac yoac turunga ifi meremminec?”  
<sup>23</sup> Ifi deu Yesungo yofi meremmiec, “Ni yoac mong mangana deduae, imoc dekperagina me fora deduae nocac nudang?”  
<sup>24</sup> Ifi deu Hanasingo Yesu witihaogoc sueu womong garengtoa Kaifa, yearu mekenggec.

<sup>25</sup> Anu Simong Petorongo sebia meu gereeu nammanu yeni kpesimigec, “Ge medacfora yeneac arenunac mong me?” ifi degec, yeng sebi heima deec, “Ni kpac.”  
<sup>26</sup> Ifi deu womong garengtoaac wanacngic mong, ye Petorongo kedzaha herecgeec, yeac arenunac, yeng deec, “Ge yufu uau yegoc tacna neng genai.”  
<sup>27</sup> Ifi deu Petorongo monggoc busic kpeu imohaingoc kokorecngoc arohoc.

<sup>28</sup> Wereckengau yeni Yesu Kaifaarunac wasaingic oda manau kecandae ihai mekenggec. Nga womong gareng yeni Anutuac kicfu wonongnginagoc amma makekenggac ramamedaha mi nebinggac dema ine oda manau mi enggec.  
<sup>29</sup> Ifi anggec Piratongo sobennu mama kpesiyemmeec, “Ngeni ngic yomoc noc haniaac yoacfu faidae?”  
<sup>30</sup> Ifi deu yeneng turunga meremmigec, “Ye faka mangana mi ambac dede gearu mi faibing.”  
<sup>31</sup> Ifi degec Piratongo yofi edeyunuec, “Ifi anu ngeni mekemma ngenang singngina modacma fakaya isinggema desigec.” Ifi deu yudangic yeneng degec, “Neni ngic mong kpeni homeudeac kuc mi metacdimbe.”  
<sup>32</sup> Yesungo warac yengena home homeac sing deec, imoc hafoangoc fora anudeac faka imocnoc fingerec.

<sup>33</sup> Nga Piratongo oda manau monggoc emma Yesu kpacma kpesimiec, “Ge yudangic yeneac ngictau me?”  
<sup>34</sup> Ifi deu Yesungo yofi meremmiec, “Ge yoac imoc geanggaoc denec me goango neac edegudauac denec?”  
<sup>35</sup> Ifi deu Piratongo yofi meremmiec, “Ni yudangic kpac. Geangga ngicngacfogca amma womong gareng enara yeneng nearu faigudau. Nga geng noc faka anne?”

<sup>36</sup> Ifi deu Yesungo yofi merennec, “Neac eucerereng imoc bangectoa bangec yomohacnac kpac. Imoc yomohacnac ambac dede ni yudangic yeneac mariu mi fainugecdeac enac tofoc tofohofocna yeneng neac amma yenigoc ewekpekpe ambau. Nga neac eucerereng imocngo bangec yomohacnac kpac.”  
<sup>37</sup> Ifi deu Piratongo deec, “Fora, ge ngictau mong me?” ifi deu Yesungo yofi merenec, “Geng neac ngictau mong denec. O, ni ua imoc mebadeac fingecma yoac fora imocac hepuc amma imoc dekperagibadeac bangectoa bangec yomohai mayai. Nga ngic mong ye yoac foraac arennu kecde, yeng neac ubaudumennaac kedzac kpeude.”  
<sup>38</sup> Ifi deu Piratongo deec, “Nga nocngo yoac fora ande?”

Ifi dema monggoc Yuda yenearu dzigene mama yofi edeyunuec, “Ni yeac kopocsic mong mi meficgeduae.”  
<sup>39</sup> Ni ngic mocgu makekenggac hombannu witicamaunac faingemmeba maande, faka ifi fedeac yudangic ngictaungina faingemmeba maudeac angemmede me?”  
<sup>40</sup> Ifi deu yeni monggoc kugoc yombong arohogec, “Ngic ye kpac, Baraba ine faina mabeso.” Nga Baraba ye ine yarengic.

## 19

<sup>1</sup> Anu Piratongo deu wasaingic yeneng dzikacngoc Yesu kpema sebia kperec merecge kpegec.  
<sup>2</sup> Kpema somang batihema ngickunenggac ira isoc mengerema oruhau gborockegec. Nga yeni ngakpi mong herea giweng



giweng heimigec kemeec. <sup>3</sup> Ifi amma hoangau hama degec, “Ohec, yudangic yeneac ngictau.” Ifi dema kpekpepetang ammigec.

<sup>4</sup> Anu Piratongo monggoc ngadeau mama deec, “Negenggec, ni ngic yeac kopocsic mong mi meficgeduae, imoc negenggecdeac amma wangepma maduae.” <sup>5</sup> Ifi deu Yesungo ngakpia giweng giweng nga iraya waeagoc, imoc tacmanungoc mama nanu Piratongo deec, “Ngeni ngic yomoc henggec.” <sup>6</sup> Ifi deu womong gareng enara nga keracatang yeneng ye hemma kpacgec, “Mariponnu kpegec, mariponnu kpegec!” ifi degec Piratongo deec, “Ni yeac kopocsic mong mi meficgeduaeac amma ngenaoc wangepma kemma mariponnu kpegec.” <sup>7</sup> Ifi deu yudangic yeneng meremma degec, “Ye yengena sebua meemma ni Anutuac medac deec, imocac neni dedeseriyoacnina fede, imohai namma ye homebeso, ifi dedimbe.”

<sup>8</sup> Ifi degec Piratongo negemma monggoc damukpeec. <sup>9</sup> Damukpeu ye oda manau monggoc emma Yesu kpesimiec, “Ge dahacnac yombong?” ifi deu Yesungo turunga mong mi merenec. <sup>10</sup> Ifi anu Piratongo monggoc kpesimiec, “Ge neac yoac turunga nocac mi merennec? Ni naric mesigubade nga mariponnu naric gubade, imocac uayoac nga kuc nearu fede, ge imoc mi negennec me?” <sup>11</sup> Ifi deu Yesungo meremma yofi edeac, “Ge kuc imoc wihacnac mi genggena dede geanggaoc naric mi memanubang. Imocac yofi ande, ngic geac mariu fainudac, yeac kopocsicngo geac ferahede.”

<sup>12</sup> Ifi deu imohaingoc Piratongo Yesu dafi kenudeac negensimanu yudangic yeneng kpacgec, “Ge ngic imoc wana kenudeu Sisaac ogea mi kecnade. Mong ye yengena meemma yofi dede, ‘Ni ngictau.’ ye Sisa emmiude.” <sup>13</sup> Ifi degec Piratongo imoc negemma Yesu wau kenudeac sing hoforec. Hofocma Yesu wangeru ama ngadeau mama bangecbisic botuha mong kpara Hocdzake, ihai desi desitatacfu emma tarec. Bangecbisic imoc hebiraio yoacfu kpara Gabata.

<sup>14</sup> Anu makekeng nasoac efac kpefac amma yaka kpedzucnegec femanu 12 kirowegeneu Piratongo yudangicngac yofi edeyunuec, “Ngeni ngictaungina henggec.” <sup>15</sup> Ifi deu yeni kpacgec, “Meickena, meickema mariponnu kpenu homeu!” Ifi kpacgec edeyunuec, “Ni ngictaungina mariponnu kpeba homeudeac negendae me?” Ifi deu womong gareng enara yeneng meremma degec, “Ngictaunina imoc Sisa, mong mi kecce, kpac.”

<sup>16</sup> Ifi degec Piratongo mariponnu kpegecdeac maringinau faiec. <sup>17</sup> Faiu Yesu yengenaoc mariponga tofohou bangec buma mong kpara Hatacic degec nga hebiraio yoacfu Gorigata, imohai mekenggec. <sup>18</sup> Imohai kemma Yesu mariponnu kpegec. Nga yegoc ngic yohockang noboc nga noboc Yesu botucngirau, ifi yunugec.

<sup>19</sup> Anu Piratongo yoacbuma mong yofi ohoma mariponnu faiu nanec, “Yesu Nadzaretenc, yudangic yeneac ngictau.” <sup>20</sup> Anu Yesu mariponnu kpegec, bangecbisic imoc amatoa wegenacfu fecac amma yudangicngac homacngo kibi imoc osogec. Kibi imoc hebiraio yoacfu nga latinyoacfu amma grikyoacfu oho ohoya nanec. <sup>21</sup> Ifi oho ohoya femanu yudangic yeneac womong gareng enarafocngina yeneng Pirato yofi edegec, “Yudangic yeneac ngictau, ifi mi ohona. Ngic yomoc yengenaoc deec, ni yudangic yeneac ngictau, ge ifi ohobesena.” <sup>22</sup> Ifi degec Piratongo deec, “Yoaac ohoduae, imoc ohoduanoc.”

<sup>23</sup> Anu wasaingic yeni Yesu mariponnu kpegec nanu wambaya mema mederegec, yohoc nga yohoc anu sokoma megec. Nga ngakpia imoc susuic

dzuhura kpac, <sup>24</sup>yeni imoc hemma denengeng amma degec, “Nenang yomoc mi mesuckema meracac anudeac kpeing kpeni.” Anutuac yoac hafoangoc fora fingerudeac wasaingic yeni ifi anggec. Yoac yofi oho ohoya fede, “Yeneng wambana mederema ngakpina megecdeac kpeing kpegec.” (*Mitiyegec 22:18*)

<sup>25</sup>Anu Yesuac nonggonasia yeri nga Keropaac enema Maria amma Maria kpara mong Madara, yeneng Yesuac mariponnu wegenac kemma nanggec. <sup>26</sup>Nammagec Yesungo songomedaha henu nonggeagoc wegenac nanec yeremma nonggea yofi edeac, “Nenggac, imoc geac medacyombongga.” <sup>27</sup>Ifi dema medac, ifingoc edeac, “Medac, imoc geac nonggoga.” Ifi deu medac ye imohaingoc Yesu nonggea yegoc kefudeac wangeru ameau kenoc.

<sup>28</sup>Uana mesidacdua, Yesungo imoc negemma yoac mitikibiu oho ohoya fede, imoc hafoangoc fora fingerudeac yofi deec, “Ni dokuac anende.” <sup>29</sup>Ifi deu bokong mong waing aengagoc wake wakea nanec, yeni kondung sobing mong imohai mema wainnu nemuruckema babacmeacfu dzegema faigec Yesuac enarau enec. <sup>30</sup>Enu Yesungo waing imoc nema yofi dema arohoec, “Ni uana bic mesidacdua.” Ifi demanu ubea sorohoma mau asuya yaru homeec.

<sup>31</sup>Uameme imoc makekenggac efac kpefacac naso anec. Nga yudangic yeneng ngic mariponnu yunugec, yeneac farengngina sabata nasou mariponnu mi nambeso negenggec. (Sabata naso imocngo hombang kuneng yombong.) Imocac amma wasaingic yeneng mariponnu ngic haningina kpetackema mesiyunugecdeac Pirato kpesimigec. <sup>32</sup>Kpesimigec wasaingic yeneng hama ngic Yesugoc mariponnu yurugec, yereac haningira monggac hanahema kpetackema monggac ifingoc kpetackegec. <sup>33</sup>Kpetackema Yesuaru hama henggec, ye bic homeec, ifi anu hania mi kpetackegec. <sup>34</sup>Nga wasaingic mongngo ine sangarango Yesuac pandzenga nembareackeu sac nga doku imohacsing maec. <sup>35</sup>Ngeni ifingoc faka fingerec, imoc negensingegecdeac amma ni kicnango hendarai nga imoc dekperagiduae. Amma ni wiac dekperagiduae, imocngo fora ande, imoc genduae.

<sup>36</sup>“Yeni sira mong mi kpetackegecde.” (*Makekeng 12:46; Bangec kisiu 9:12; Mitiyegec 34:20*)

Yoac yomocngo mitikibiu oho ohoya fede, imoc hafoangoc fora fingerudeac ifi fingerec.

<sup>37</sup>Mitikibiu yoac mong yofia fede, “Nembareackegec, ngic imoc yeni kicnangango henggecde.” (*Dzekaraia 12:10*)

<sup>38</sup>Imoc wisickeu ngic mong kpara Yosefe Arimatianac, yeng Piratoaru kemma Yesuac fareng mesiudeac kpesimiec. Kpesimiu Piratongo desiu Yosefengo kemma Yesuac farenga mesiec. Imoc yofiac, ye Yesuac medac anu ye yudangic yeneac kengec kpeu fingectegecma mi kefec. <sup>39</sup>Nga Nikodemo, ye warac tofocnac Yesugoc yoac yoac anoc, yeng ic sopea homuna gombunga ebiha 30 kiroacsoc, imoc mehaec. Sopo yereac kpacngira mira nga aroe, imocngo yerec yerecgea. <sup>40</sup>Yeri imoc mehama yudangic yeneac fareng tonggo tonggoac faka modacma farenga mema spongo kpedanggema lineng kporucngo tembonggeoc.\* <sup>41</sup>Anu yeri Yesu mariponnu kpegec, bangec botuc imohaingoc ua mong fec, ua imocac manau kedzebe mong

\* **19:40:** Lineng imoc kpingzing mong ambiac ogea, imocngo wamba mekecgec.

gboria ngicngo memea nanec. Nanu kicsere ngic mong warac mi faigec, imohai faioc. <sup>42</sup> Yudangic yeni imohai hombanggac efac kpefac anggec nga kicsere imoc wegenac feecac Yesuac farenga imohai faioc.

## 20

<sup>1</sup> Sonda gboria uameme hanac hanaheau ama werec wereckenggac Maria Madarango kicsereu kemma kedzebe naguac hoctoa, imoc meic meickea henec. <sup>2</sup> Ifi hemma monggoc nedzikemma Simong Petoro nga medac mong, Yesuac songomedaha, yeri edeyuruec, “Yeni Kebu kicsereunac meickema dahaieng faidau, imoc mi negendimbe.”

<sup>3</sup> Ifi deu Petoro nga medac ogea yeri kicsereu kemma <sup>4</sup> yerahafoc sinnu nedzikemma medacogeango kucgoc nedzima Petoro ferahema yeng bic kicsereu kensikeec. <sup>5</sup> Kensikema okarima henu kporucusu tembonggegec, imocngosac tarec. Nga ye manau ine mi enec. <sup>6</sup> Simong Petoro ye ngade hama kicsereu emma henu kporucusu imoc tarec. <sup>7</sup> Kporucusu oruhau kperahagec, imocngo tembuha kporuc tosea kpou faifaiango imocgoc mi tarec, ifi henec. <sup>8</sup> Ifi hemma nammanu medacogea waraima kicsereu kenec, yeng ifngoc kicsereu emma imoc hemma negensinggeec. <sup>9</sup> Imoc yofiac, Yesu homecfunac yacheso, imocac mitikibiu oho ohoya fede, yeri imoc warac mi ireckemangoc <sup>10</sup> dzigenema amangirau kenoc.

<sup>11</sup> Anu Mariango kicsere ngadeau namma kiarec. Kiacmangoc okarima kicsereu kic fima henec. <sup>12</sup> Henu angero yohockang yeri ngakpiherecngira kongac kongac yerenec. Yerenu Yesuac farenga feecfu, mongngo oruhaugeng nga mongngo haniaugeng, ifi taroc. <sup>13</sup> Tacma kpesimio, “Ngac, ge nocac kiacnec?” kpesimiec Mariango merenec, “Yeni Kebunaac farenga meickema dahai faidauac obohoma kiacduae.” <sup>14</sup> Ifi dema dzigene henu Yesungo ngadeau nanec. Nanu Yesungo nande, imoc mi hentegeru <sup>15</sup> Yesungo yofi kpesimiec, “Ngac, ge merac hofocma kiacnec?” deu negenec, “Ua minginango kpesinende.” ifi negemma deec, “Kunenna, geng Yesuac farenga meickema monnu faidang isoc edenuna kemma meba.”

<sup>16</sup> Ifi deu Yesungo yofi deec, “Maria.” ifi deu dzigenema “Rabbouni.” deec. (Arama yoacfu Rabbouni, imocac titiha kpoukpouna.) <sup>17</sup> Nga Yesungo yofi edeec, “Mannaaru mi enduangoc, imocac mi kpeserenuna. Ge kemma tosofocna yofi edeyununa, ‘Ni Manna nga ngeneac Manggac amma neac Anutuna nga ngeneac Anutu, yearunoc embade.’” <sup>18</sup> Ifi deu Maria Madarango medac yenearu kemma Yesu henec nga yoac edeec, imoc edeyunuec.

<sup>19</sup> Uameme imohaingoc ama bic toforemanu Yesu medacfora yeni yudangic yeneac kengecyunuu amangina nagu heima kpetinggema tacgec. Tacmagec Yesungo hama botucnginau namma yofi edeyunuec, “Ruae ngenearu febeso.” <sup>20</sup> Ye ifi dema maria nga pandzenga edzacyunuec. Edzacyunuu medacfora yeni Kebu hemma sogaigec. <sup>21</sup> Nga Yesungo monggoc yofi edeyunuec, “Ruae ngenearu febeso. Mannango suenu hayai, neng ifi isocngoc ngeni suengunuduae.” <sup>22</sup> Ye ifi dema enacasuya fifiyemmema yofi deec, “Ngeni Tiri Asu megec.” <sup>23</sup> Ngeni ngic yeneac kopocsic wayemmegecdeu kopocsicngina kpac anude. Nga ngeni kopocsicngina witickegecdeu kopocsicnginaac witicfu kecgcedengoc.

<sup>24</sup> Medac 12 yeneac botucfunac mong kpara Toma, Tombosonga degec, yeng Yesungo medacfora fingecyemmeec, naso imohai mi tarec. <sup>25</sup> Imocac medac ogofora yeneng edegec, “Neni Kebu hending.” degec Tomango deec, “Ni kicnango biringngo kpegec mi hembade nga gbonnango maria titingau

mi faibade amma pandzengau marinango mi faiba enudeu imoc naric mi negensingebade.”

<sup>26</sup> Ifi deu uameme 8 imocac ngadeau Yesu medacfora nga Toma yenhafoc monggoc emma tacgec. Yeni nagungina heima kpetinggema tacmagec Yesungo botucnginau fingeema namma yofi deec, “Ruae ngenigoc febeso.”

<sup>27</sup> Ifi dema Tomaac yofi deec, “Toma, gbongga sinena marinaac titingau enu nga kicgango henna. Amma mariga sinena pandzennau enu negengyohoc wama negensinggena.” <sup>28</sup> Ifi deu Tomango deec, “Ge Kebuna amma Anutuna.” <sup>29</sup> Ifi deu Yesungo yofi edeec, “Ge kicngo nendaggac negensinggenec. Nga ngic mong ye kicngo mi hemma negensinggeude, ye kenehagoc.”

<sup>30</sup> Yesungo medacfora yeneac kicfu ngicngac yeneng negensinggecedeac faka kuhagoc homac mekenec, imoc kibi yomohai mi ohodarai. <sup>31</sup> Nga Yesu ye Messia Anutuac medac, ngeni imoc negensinggema kekec yeac kpacfu mekecgecedeac kibi yomoc oho ohoya fede.

## 21

<sup>1</sup> Imocac ngadeau Yesungo Tiberia dzohonnu medacfora monggoc finge yemmeec. Imoc yofi fingerec, <sup>2</sup> Simong Petoro nga Toma Tombosonga dekecgec amma Natanae Gariraia bangecfu Kanang taonunac nga Dzebedaioc medahora amma Yesuac medacfora yeneacrunac ngic yohockang, yeni yenhafoc tacgec. <sup>3</sup> Tacma Simong Petorongo ogofora edeyunuec, “Ni kondungyanggac kembadeac negenduae.” Ifi edeyunuu degec, “Neni gegoc momoc kennide.” Ifi dema yenhafoc gombau emma kemma tofocnac imohai kondungyang mong mi megec.

<sup>4</sup> Wiac mong mi mekecmagec ama wereckenu Yesungo dzohong tegiau nanec. Nanu yeni Yesungo nande, imoc mi hensigec <sup>5</sup> Yesungo yofi kpesiyemmeec, “Medacfocna, ngeni kondungyang mong medau me kpac?” deu yeni degec, “Kpac.” <sup>6</sup> Ifi degec yeng yofi edeyunuec, “Ngeni uficngina gomba foiaugeng ukugec kemeu goa meficgegecde.” Ifi deu yeni deec imoc modacma uficngina ukugec kemeu kondungyang ebiriango yombong uficfu kemegecac kpedzibibiema wagec. <sup>7</sup> Nga Yesuac songomedacngo Petoro edeec, “Imoc Kebunoc.” ifi deu Simong Petorongo negemma sebiasac nanecac ngakpia heima gombaunac yuma dzohonnu kemema waraiyemmeec. <sup>8</sup> Nga medacfora goa dzohong tegiaugeng 100 mitaacsoc hereau mi tacgecac yeni gombau namma uficngina kondungyangagoc kpedzi kpedzi kengec.

<sup>9</sup> Kensikema tegiau emma henggec ic sogong goa nga kondungyang gerecyohocfu tarec. <sup>10</sup> Ifi taru Yesungo yofi deec, “Ngeni kondungyang goa yaguc medau, imoc mehagec.” <sup>11</sup> Ifi anggec Simong Petorongo tembuha gombau emma ufic kpedziu tegiau enec. Nga imoc kondungyang kuneng kunenggo wakema kpetengina 153 imocacsoc anec nga uficngo sifu mi tegerec. <sup>12</sup> Nga Yesungo yofi edeyunuec, “Ngeni hama menegec.” ifi deu medacfora kengecyunuu yeneacrunac mongngo, ge merac dema, mi kpesimigec. Imoc Kebunoc, yeni ifi bic negenggec. <sup>13</sup> Nga Yesungo gerec kiwau hama ic sogong mema yemmema kodungyang ifingoc mema yemmeec. <sup>14</sup> Yesungo homecfunac yarec, naso imohai medacfora finge yemmeec, imoc atac harebec anec.

<sup>15</sup> Anu yaka negec wisickeu Yesungo Simong Petoro yofi kpesimieci, “Simong Yohaneac medac, ge neac songo heregoc negennec, imocngo tosofocga yeneac ferahede me?” ifi deu Petorongo deec, “O, Kebu ni geac heresonggo

negenduae, ge imoc bic negennec.” Ifi deu Yesungo yofi deec, “Ge ramafozna medaha yaka gumecyunubesena.” <sup>16</sup> Dema Yesungo monggoc deu atac yohockang anec, “Simong Yohaneac medac, ge foracngoc neac songo heregoc negennec me?” deu Simongngoc deec, “O, Kebu ni geac heresongo negenduae, imoc bic negennec.” ifi deu Yesungo yofi deec, “Ge ramafozna yeneac gareng kecbesena.” <sup>17</sup> Dema Yesungo monggoc kpesimiu atac harebec anec, “Simong Yohaneac medac, ge neac songo heregoc negennec me?” Yesungo kpesimiu atac harebec anu Petoro ye negengebirima Yesu yofi edeac, “Kebu, ge wiac sasawa negendacnec. Ni geac heresongo negenduae, imoc bic negennec.” ifi deu Yesungo yofi edeac, “Ge ramafozna meyunuma yaka gumecyunubesena.”

<sup>18</sup> “Ni fora yombong edeguduae, ge sebigbori kecma geanggaoc wambaga faima songoga modacma kengha angannec. Nga ge kpengeng annade, naso imohai mariga miacna ngic mongngo wamba heigemma songoga mi fede, imohai megu kemma faigugecde.” <sup>19</sup> Petorongoc homehau siric dafi homema Anutu dengereude, Yesungo imocac heabima deec. Amma monggoc edeac, “Ge hama modacnuna.”

<sup>20</sup> Yesungo ifi deu, Petorongoc dzigenema Yesuac songomedaha henu yeng yeri modacyuruec. Ngic modacyuruec, yeng warac yaka negec, naso imohai Yesuac mondacfu heima merang doc meudeac kpesimiec. <sup>21</sup> Nga Petorongoc medac imoc hemma Yesu kpesimiec, “Kebu, ge yeac dafi negennec?” <sup>22</sup> Ifi deu Yesungo yofi edeac, “Ni songona andeu yeng kecmanungoc dzigene habade, imocngo ine geac wiac mi ande. Ge eng hama modacnuna.”

<sup>23</sup> Ifi deu tosofora botucnginaunac yofi netohogec wakeec, “Medac imoc mi homeude.” Nga Yesungo mi homeudeac mi deec, kpac. Ye yofisac deec, “Ni songona andeu yeng kecmanungoc dzigene habade, imocngo geac wiac mi ande.” Yoac wisic wisickea

<sup>24</sup> Medaha imoc ninoc. Ni wiac yomocac hepuc amma dekperagima ohoai. Nga yoacna imoc fora, imoc negendimbe. <sup>25</sup> Yesungo wiac goa homac meec, ngic mongngo wiac imocac yoac sasawa kibiuh ododacbac imoc bangectoa bangec yomohai faifaiac titinga negemba mi fingebac.

## Aposoro Yeneac Siduc

<sup>1</sup> O Teofiro, ni warac yoac ohogenai, imoc Yesungo hanahema ua meec amma enacyoara kpounemmec, imocac yoacsiduc seng anggendarai. <sup>2</sup> Ye uaya mekengkefu nasoya wegene haec imohai Tiri Asuac kucfu aposoro warac meisinyunuec, yeni uaareng dederecge ayemmema kurumennu enec, imocac siducnoc ohodarei.

<sup>3</sup> Yeng kpendzeng kpekecma homema monggoc gborima yacma uameme 40ac manau yengenaoc fingeccsufu ayemmema faka hania hania mema Anutuac eucererenggan hania edekpou ayemmeec. Ayemmeu yeni faka imoc hemma ye fora kecde, imoc negentegecgec. <sup>4</sup> Amma yenigoc tacyac amma yoac yofi edeyunuec, “Ngeni Yerusareng bic mi wabisia. Manggacac dedeseriyoac edengunuba negenggec, imoc fora kpeudeac tomai kecbisia. <sup>5</sup> Imoc yofiac, Yohane ye doku bic nadzicngemmec nga yoc ine naso mi hereemanu Tiri Asu nadzicngemmeude.”

<sup>6</sup> Ifi deu kpedzucnema tacgec yeneng kpesimigec, “Kebu, ge naso yomohai Israe ngicngac monggoc kpedzucnununa neni nenang bangec ngictauninagoc amma kecnide me?”

<sup>7</sup> Ifi degec yofi edeyunuec, “Manggac ye kuc minginango yeng wenac me yabungnaso hania hania faiec fede, imoc negentegecgecdeac kuc mi ngemme ngemnea. <sup>8</sup> Negenggec, Tiri Asungo ngenearu mama kuc ngemmeu ngeni siducdedefocna anggecde. Nga ngeni Yerusareng amma Yudaia nga Samaria bangec sasawa yerecema yoacna dekenggec bangeha bangeha sokodacbeso.”

<sup>9</sup> Yesungo ifi edeyunuma kicngina witiau efaima enec. Emmanu hoengngo kicnginaungoc merucgema meenec.

<sup>10</sup> Meemanu yeni fimodacma hofocgec ngic yohockang ngakpingira kongac kongacngo mi yenearu fingeccma nambesera i. <sup>11</sup> Namma yofi edeyunuoc, “Gariraia bangecfnac ngic, ngeni kicngina sawau fimangoc mi nambisia. Anutungo Yesu kurumennu meenu ye wangunuma endac. Amma ngic enu hendau, yennoc kecma siriha ifiangoc habesande.”

<sup>12</sup> Anu aposoro yeni Oriwa tikibumaunac dzigenema mama Yerusarennu enggec, imoc sing wegenac anu sabata nasou sing imoc naric kengha angkecgec.\* <sup>13</sup> Yerusarennu kemma ama tacyac angkecgec, imohai emma tacgec. Tacgec, yeneac kpac yofi: Petoro nga Yohane amma Yakobo, Anderea nga Firipo amma Toma, Batoromaio nga Mataio amma Yakobo Arifaioac medac, Simong Dzerote nga Yuda Yakoboac medac. <sup>14</sup> Ngic imoc yenennoc uba mocgu amma nunumu ua tatahoc mekecgec. Ifi anggec Yesuac nonggea Maria nga ngac goa amma Yesuac munafora, yeneng yenigoc yenhafoc kecma nunumu ua momoc mekecgec.

<sup>15</sup> Anu Yesuac arengfora 120 nganoc ifingo kpedzucnema tacmagec Petorongo botucnginau namma yofi edeyunuec. <sup>16</sup> “Negen negensinggoc tosofocna, negenggec, Yudango ngic hesicyunuu kemma Yesu mendangegec, yeaacno Tiri Asungo bicngoc Dawidiac enacfu yoac faiu ohoec, imoc fora fingeccbeso, imocac ifi anec. <sup>17</sup> Yuda warac nenang arennoc amma kefec, ye nenahafoc Kebuac uamemeac denecdenemnea.”

\* 1:12: Imoc 800 mitasac anec.

<sup>18</sup> “Amma ngic yeng faka manganaac dzo mema ua bangec mong bum-meec, ihai kemma oruhango kpemeremma kekpeu wosea kpendziru keracbawa madarec. <sup>19</sup> Amma imocac siduc Yerusareng ngicngac sasawa negendacma bangec, imocac kpara Akedama degec, titiha yofi, ‘Bangec sac maefu.’”

<sup>20</sup> “Mitiyegecfu yoac yofi oho ohoya fede, ‘Ye amabangeha kisi fingeru ngic mongngo yeac kporucedzou mi tacheso.’”

(*Mitiyegec 69:25*)

Amma monggoc yofi,

‘Ngc mongngo yeac ngicenaraac tatac mebeso.’ (*Mitiyegec 109:8*)

<sup>21-22</sup> Imocac amma ngic mong yeac turunga meisinggebesonga. Yohanengo Yesu mitidoku nadzicmiu uaya hanahema mema nenanggoc kengha kecma kurumennu enec, naso imohai ngic nenanggoc kecegec, ngic imoc yeneac botucfunac ngic mong isinggeni yeng nenanggoc Yesu homecfunac yarec, imocac siduc nenahafoc debisina.”

<sup>23</sup> Petorongo ifi deu ngic yohockang meficyrugec: Mong kpara Yosefe Basaba dekecegec, yeac kpara mong Yusto, amma ogea Matia. <sup>24</sup> Meficyuruma yofi dema numugec, “O, Kebu ubaheheng mingina, ge ngic yohockang yoc yerearunac daoc meisinggema edzacnununa henni. <sup>25</sup> Henni yeng aposoro kpac mema Yudaac tatac mebeso. Yuda ye tataha imoc wama yengena sing monnu kenec.” <sup>26</sup> Ifi dema numuma meisinggeudeac kpeing kpegec Matia heficgeu aposoro 11 yenearu torokpegec.

## 2

<sup>1</sup> Pentekos tacyacac naso wegenemanu yenahafoc ama mocguu kpedzuc-nema engensicfu tacgec.\* <sup>2</sup> Tacmagec kurumennunac udumengtoa mong firang kucgoc kpeande, imocac udumeng isoc ioha yombong fingecma maec. Mama ama tacgec, ihai emma wakeu <sup>3</sup> yeni siriha yofi henggec: Nedzarang gerechorang isoc fingecma ngicngac orucnginasoc tohoma tackenec. <sup>4</sup> Anu Tiri Asungo ubanginau kemema wakeec. Wakeu yoac siriha mong mong degec. Asungo minginasoc meficgeyemmeu yoac dekenggec.

<sup>5</sup> Anu yudangic homac bangec noboc nobocnac hahayango Yerusareng taonnu tacgec, yeni Anutuac yoac modacma kecegec. <sup>6</sup> Nga udumengtoa fingeru habu homacngo imoc negemma hama kpedzucnema kerectegec anggec. Imoc yofiac, Tiri Asugoc yeneng ngicngac yeneac yoacnginausing tembus tembus degec negenggec. <sup>7</sup> Negemma kerectegec amma warecyunuma degec, “Ngc yomoc yoac andae, yeni sasawango gariraiangic. <sup>8</sup> Nga yeni dafu nenang yoacninausing yombong tembus tembus degec negendimbe?”

<sup>9</sup> Neni yoc patangic nga medengic amma erangngic, me Mesopotamia bangecfunac nga Yudaia bangecfunac amma Kapadokia bangecfunac, neni Ponto bangecfunac nga Asia bangecfunac, <sup>10</sup> amma monggoc Firigia bangecfunac, neni Pamfiria bangecfunac nga Aigita bangecfunac amma Ribia bangecfu Kirene ama tegia tegia, imohacnac amma Roma taongtoaunac hading. <sup>11</sup> Amma yudangic nga bangec monnunac ngic yudangic yenigoc

\* **2:1:** Pentekos tacyacac naso imoc Yuda yeneac hombang mong anec. Imocac oho ohoya yomohai fede: Makekeng 23:16; Sesememe 23:15-16; 34:22; Bangec kisiu 28:26-31; Dedeseri 16:9-12.



torokpegec, kretangic amma arabiangic. Nenang ifingoc kecma yoac-ninasoc Anutu fakatoayaac yoacsiduc degec negendimbe.” <sup>12</sup> Ifi dema kerecdegec amma obohoma denegeng amma degec, “Faka fingece, imoc wiac siriha mong yombong, imoc mi negentegecdimbe.”

<sup>13</sup> Goango ine yeneac deendema amma yofi degec, “Yeni waingdoku homac nedauac ubangina sufude.”

<sup>14</sup> Ifi degec Petoro ye tosofora 11 yenigoc namma ubea meyadima yofi edeyunuec, “Yudangicngac amma ngicngac sasawa Yerusarennu kecdae, ni faka yomocac hania dekperagingemmeba negenggec. <sup>15</sup> Ngeni ngic yomoc yenemma yofi negensidae, ‘Waingdoku nema ubangina sufude.’ ifi kpac. Yaguc asoac 9 kirocsac andeac waingdoku mi nedau, kpac. <sup>16</sup> Nga faka yomocacnoc, profete Yoelengo yoac yofi deec,

<sup>17</sup> ‘Kebungo yofi dede, “Naso wisickebeso ammanu ni Asuna kpakeba mau ngicngac sasawango medagecde. Amma naroang medacfoengina yeni profeteyoac degecde nga sebigborifocngina onga henggecde amma yadafocngina gaukpefing henggecde. <sup>18</sup> Amma naso imohainoc ni enac tofoc tofoho ngicngacfozna, yenearu Asuna kpakeba mau yeni profeteyoac degecde. <sup>19</sup> Amma deba wi sawau soi fingerude. Nga emu bangecfu faka bibiagoc siria hania hania fingerude. Naso imohai sac nga gerec amma hosucto fingerude. <sup>20</sup> Kebuac nasotoaac kuc kibikperagiagoc mi fingezmanu wenackiwa meremma kundung kpeude nga afokiwa sac isoc anude. <sup>21</sup> Anu Ngicngac yeneng KEBUAC kpac kpacgec Anutungo yeni sasawa kopocsinginaac ebicfunac mesiyunuu komoc kpegecde.”’ (Yoele 2:28-32)

<sup>22</sup> Israengic, ni edengunuba negenggec, Yesu Nadzaretenc, ye Anutungo meefaima nonggo tacmimanu botucnginau faka kuhagoc nga negensinggecdeac faka kuhagoc nga faka mi hengena meec. Imoc bic irecireck-eaac hania hentegecgec. <sup>23</sup> Yeacnoc Anutungo bicngoc negenu feec, imocac sing desima ngenec mariu faiec. Ngeneng ye bangec monnunac ngic, dedeseria kpac kecdae, yeneac mariu faima edeyunuec yeni ye mariponnu kpegec homeec. <sup>24</sup> Anu homecngo ye naric mi segerec. Imocac Anutungo homecac kpendzennunac megboriu yarec. <sup>25</sup> Dawidingo yeac enac mema yofi deec,

‘Ni nasosoc kicna KEBUARU fikecduae. Yeng foinaugeng kecdeac wiac mongngo menuu goroc goroc naric mi ambade. <sup>26</sup> Imocac ubaherenango ubangerec negemma nedzarannango sogaiu sebina ifingoc ruaegoc anude. <sup>27</sup> Geng ubaongana wana homec amau naric mi kemeude. Ge enac tofoc tofohongicga onggonggena kicsere naric mi henude. <sup>28</sup> Geng kekecac sing kpounennec. Geac kicfu sogac sogai hafoangoc fede nga foigaugeng ubangerec feengkefude.’ (Mitiyegec 16:8-11)

Yoac imoc Dawidingo dekperagiec.

<sup>29</sup> Tosofocna, bangecnina Dawidiac hania dema enacefac yofi edenunuba, ye homeu tonggogec. Anu kicserea feecngo yaguc fede. <sup>30</sup> Ye profete kefecac yofi negeneac, ‘Anutungo yeac bangecyombonga yeneac arenunac medaha mong meisinggema ye ngicautatahau faiu tarudeac deseriec.’ (Mitiyegec 132:11)

<sup>31</sup> Imoc kpefing hemma negemma Kristo yacyahaac yofi deec,

'Anutungo enac tofoc tofohongiha onggonggeu kicsere naric mi henude.'  
(*Mitiyegec 16:10*)

<sup>32</sup> Anu Yesu yenoc Anutungo homecfunac midiu yaru neni kicinango fora hendaring. <sup>33</sup> Ye yacma dzigene enu Anutu marifoiango seseheec. Nga Mamango warac Tiri Asu miudeac deec, ye imoc mema kpakeu maec, imoc yaguncoc hennegeng andae. <sup>34</sup> Dawidi ye kurumennu mi enec, kpac. Yeng ine yoac yofi deec,

'KEBUNGO neac Kebuna yofi edeec, "Ge foinaugeng tacmana <sup>35</sup> ngabafocga hanigaac bageau faiyunuba yeni hanititiga anggedce." ' (*Mitiyegec 110:1*)

<sup>36</sup> Imocac amma israengicngac sasawa, ngeni yofi negengyombonggebisia: Ngeni Yesu mariponnu kpegec, ngic imocnoc Anutungo Kebu nga Messianina fainemmeec kecdc."

<sup>37</sup> Petorongo yoac ifi edeyunuu herengina yaru, yengena nga aposoro arengfora yofi kpesiyemmegec, "Tosofoc, neni dafi anni, ngereeude?"

<sup>38</sup> Ifi degec Petorongo yofi edeyunuec, "Kopocsicngina kpac anudeac ngeni tembus tembus Yesu Kristoac kpacfu ubangina dzigeneu doku nadzicgec. Ifi anggec Anutungo wosofahaac Tiri Asuya ngemmeude. <sup>39</sup> Nga dedeseriyoac imoc ngenang nga nambaracfcngina amma hereau kecdae, Kebu Anutun- inango kpacngunuma heitaingunuudesoc, ngeni naric megedce."

<sup>40</sup> Petoro ye ifi dema gorongina kpema yoac homac torokpema edeyunuec, "Kebungo ngic mangac manganea yeneac faka imohacnac mesingunuu ngeni komoc kpebisia! Yenigoc manganema kpac ambauac." <sup>41</sup> Anu wenac ihai ngicngac 3 tauseng yeni Petoroac yoac negensinggema doku nadzicma Yesuac habuu torokpegec.

<sup>42</sup> Anu aposoro yeneng siduc gombung kpouyemmegec imoc negenggedeac yenang singngina meserima kecma ubango dedzege amma uba urecfu yaka nema nunumu ua mekecgec. <sup>43</sup> Nga aposoro yenearu faka kuhagoc nga faka morora hania fingctegerecac ngicngac sasawango kerectegec anggec. <sup>44</sup> Anu Yesu negensinggec, yeni uba urecfu wiac sasawangina imoc mekecgec. <sup>45</sup> Amma yeni bangec nga hiefinacngina suegec dzo kirecgeu tosofocngina wiac hofocgecsoc medereyemmegec. <sup>46</sup> Nga ngicngac wenacsoc Anutuac womonnu uba mocgu amma kpedzucnekecgec, yeni uba urecfu amaya amaya yaka nekcma yakangina imoc ubangerecgec mederema emenec angkecgec.

<sup>47</sup> Ifi amma Anutu dengerema kecgec ngicngac habutoango yeneng dzidziema ewehihehi ayemmegec. Anu Kebungo wenaha wenaha ngicngac kopocsicfunac mesiyunuu komoc kpegec yengena arennu torokpeyunuec.

### 3

<sup>1</sup> Wenac monnu 3 kiroc marai nunumunaso anu Petoro nga Yohane yeri Anutuac womonnu enoc. <sup>2</sup> Anu ngic mong hanimangang nonggo herem- anaunac ifia fingerec, ye Kebuac womonnu nagu mong kpara Nagukereng, ihai wenaha wenaha tofoho emma faigec takefec. Ye ngicngac wom- onnu engemmama anggec, yenearu ubangerecac wiaccac derecgeudeac ifi anggec. <sup>3</sup> Ngic imocngo Petoro nga Yohane yeri womonnu embeso ammaec yeremma ifingoc ubangerecac wiaccac derecgeyemerec. <sup>4</sup> Derecgeyemeru yereng ye henserioc. Henserima Petorongo yofi edeec, "Ge nerenna!" <sup>5</sup> Ifi deu "Yereng wiac mong nembesonga dedape." ifi negemma kic fima yerene.

<sup>6</sup> Yeremmanu Petorongo yofi edeec, “Ni hiedzona kpac nga wiac mocgu fenende, imoc ine gamba mena! Yesu Kristo Nadzaretenc, yeac kpacfu yacma kenna.” <sup>7</sup> Ifi dema marifoiau mema miaru imohaingoc hania ubea seriec. <sup>8</sup> Seriu kucbiric yacma namma yerigoc womonnu enggec. Emma yeng yu engemmama nga sing kengha amma Kebu dengereec. <sup>9</sup> Kebu dengerema kengha anu ngicngac hafoangoc yengeng hemma degec. <sup>10</sup> “Yennoc womonggac nagu kpara Nagukereng, ihai hiedzoc derecgeyemmeudeac takefec.” Ifi dema hensima kpidohoma dzonong fede fede anggec.

<sup>11</sup> Ngic ye Petoro nga Yohane yerearu kpeketaheu ngicngac homacngo Anutuac womong mana kakasang mong feec, kpara Saromo, imohai yerearu kemma kpedzucnedacma kerectegec anggec. <sup>12</sup> Ifi anggec Petorongo yemema ngicngac yofi edeyunuec, “Israe ngicngac, ngeni ngic yomoc hemma kerectegec mi ambisia. Amma ngeni neri mi nerenserbisia. Faka imoc nereac kucac mi fingeccac nga imoc nereng Kebuac kicfu gombunga kecdipeac mi fingeccac. <sup>13</sup> Imoc kpahac, kisicfocngina Abrahang nga Isaka amma Yakobo, yeneac Anutu yennoc enac tofoc tofohoa Yesu ngickunenggac kuc kibikperagiagoc miec. Ngeni ine ye ngadehema bangec monunac ngic Anutu mi negemmdae, yenearu faigec. Foracngoc, Piratongo yoara isinggema yungechesonga desiec. Nga ngeneng ine wagec. <sup>14</sup> Yenc ngic kpetiac nga faka dindingac mekecde nga ngeneng ine ye wagec. Amma godzungicngo ngic mong kpeu homeec, ngeni yenc yungecngemmeudeac serima dema <sup>15</sup> kekecac enarameme kpegec. Nga Anutungo ye homecfunac meboriu yarec, neni imocac hepuc aning.

<sup>16</sup> Nga neri Yesuac kpac kpacma negensinggediac ngic yomoc hendae, ye kuc medac. Nga Yesuac kpacfu negen negensinggoc kecdipe, imocac amma ye ngereehomedac. Ngeni sasawango faka imoc hendae.

<sup>17</sup> Tosofocna, ngeni nga garengfocngina Yesuac hania mi negemma ifi anggec, imoc yaguc negentegeduae. <sup>18</sup> Foracngoc, Anutungo Messia meisingeec, yeng kpendzeng kpekecma homeudeac profete sasawa yeneac enacfu yoac faiu degec, imoc sasawa Anutu deecfu fingeccarec. <sup>19</sup> Imocac ngeni kopocsicngina kpac anudeac ubangina dzigeneu Anutu hoanggebisia. <sup>20</sup> Ifi anggecdeu Anutuac hoannunac kenec kuhagoc haude. Amma bicngoc Messia meisinggengemmeer, ye suengemmeude, imoc Yesunoc. <sup>21</sup> Ye kurumennu emma kecmanungoc, wiac sasawaac mengec mengere naso hau dzigeneude. Imocac yoac Anutungo bicngoc yombong kpetiac profetefora enacnginau faiu dekperagigec. <sup>22</sup> Mosenjo yofi deec,

‘Kebu Anutunginango ngeneac arenunac profete mong ni isoc, ifia meficgengemmu yeng yoac sasawa deude, imoc negendacbisia. <sup>23</sup> Anu monggo profete imocac yoac mi tofohoudeu ye arengnginaunac meickema kpehomebesonga.’ *(Dedeseri 18:15,18-19)*

<sup>24</sup> Naso yomohai faka fingeccac, imoc Samuearunac profete sasawa nangeregec, yengeng bic dekperagigec. <sup>25</sup> Anutungo kisicfocngina yenigoc dzadzahac mema Abrahang yofi edeec,

‘Bangecfocga yeneac arennu ngicngac bangeha bangeha keneheyunudacbade.’ *(Fingec fingec 22:18; 26:4)*

Ngeni dzadzahac imoc nga profete yeneac yoac maridzoming imoc mekecdae. <sup>26</sup> Ngeneacnoc bic negensima Anutungo medaha sueu mama fingerec, imoc ngeni sasawa kpenggodzuac sinnunac merengngunudacma kenecnunuudeac ifinoc anec.”

## 4

<sup>1</sup> Petoro nga Yohane yeri ngicngac yoac ifi edeyunuma nammaec womong gareng amma womonggac tebengic enara nga sadukaio yeni yenhafoc yerearu kemma ihai nanggec. <sup>2</sup> Nga ngic nanggec yereng yoac edekpou ayemmema Yesu ye enaranina mema homecfunac yarec, imocac yoac siduc desaheyemmedarec yeni herebu negemma ngaba ayecmegec. <sup>3</sup> Ifi ayecmema mendangyuruma ama bic marai anecac witicamau faiyurugac tacmaec ama wereckenec. <sup>4</sup> Anu habutoango Petoro yoac deu negenggec, yeneacunac homacngo imoc negensinggema Yesuac habuu torokpegec. Anu ngicngac imoc kpetengina <sup>5</sup> tauseng anec.

<sup>5</sup> Wereckengau yudangic yeneac tutumangtoaac memba nga enarafocngina amma mitiac negen negengngic, yeni Yerusarennu kpeturanggec. <sup>6</sup> Kpeturanggema womong garengtoa Hanasi nga Kaifa amma Yohane nga Aresande amma womong gareng enara kecdae, yeneac arengfocngina sasawa yenhafoc kpedzucnema tacgec. <sup>7</sup> Tacma Petoro nga Yohane meyuru hama kicnginau faiyurugac. Faiyuruma yofi dekpesi ayecmegec, “Ngeri noc kucfu nga meracac kpacfu faka yomoc medaoc?”

<sup>8</sup> Kpesiyecmegec Petoro ye Tiri Asungo ubeau wakeu yofi edeyunuec, “Enarameme nga Israe garengfocnina deba negenggec. <sup>9</sup> Ngeni ngic hanimangang ye dafi ngeredac amma yearu faka gombunga dafi fingecmidac, imohaingoc kpesinecmebau. <sup>10</sup> Ngeni nga isaengic sasawa negenggecdeac yoac yofi deireckeba, ngeneng Yesu Kristo Nadzaretenc mariponnu kpegec homeu Anutungo ye homecfunac megboriu yarec kecde. Nga yeac kpacfu ngic imoc ngerema kicnginau nande.

<sup>11</sup> ‘Amameme ngic yeneng hoc mong mangana dema ukugec. Nga hoc imocngo amaac hoc wotung amma seria nanude.’ (*Mitiyegec 118:22*)

<sup>12</sup> Ngic monggaru kpeketahegec yeng kopocsicac ebicfunac naric mi mesiyunuude, komoc kpegecdeac sing mong mi fede, kpac. Bangeha bangeha nenang Yesuac kpacfu kecni yeng kopocsicac ebicfunac mesinunu komoc kpenide.”

<sup>13</sup> Anu Petoro nga Yohane yeri kibiyama yadau mong mi tarocngo kengeha kpac enacefacngoc yoac deocac yeni imoc negemma kerecetegec anggec. Amma yeri Yesugoc kefoc, imoc yerensigec. <sup>14</sup> Anu ngic sebia ngereec, yeng yerigoc nanu henggecac yoac merengyecmegecdeac obohogec. <sup>15</sup> Obahoma tutumangtoaunac ayecmegec sobennu mama nammaec yenaocngoc yoac yofi dema denegeng anggec. <sup>16</sup> “Nenang ngic yohockang dafi ayecmenideac obohode. Yeri negensinggecdeac faka kuhagoc yombong meec fingectegeru Yerusarennac ngicngac yeneng siduha bic negendacdau, imocac basic naric mi kpenide. <sup>17</sup> Nga yoac imoc amasoc kenu negendacbauac yeri Yesuac kpacfu yoac monggoc mi edekpou ayemmecdeac dekengec ayecmeni.”

<sup>18</sup> Ifi dema kpacyuruma yofi edeyurugac, “Ngeri Yesuac kpac ngic monggoc edekpou mi ayemmebesera.” <sup>19-20</sup> Ifi degec Petoro nga Yohane yereng yoac yofi merengyemmeoc, “Wiac kicninango hening amma kedzacninango negening, imoc basic naric mi kpenide. Ngeni ngenaoc negenghenggec, ngeneac yoac me Anutuac yoac tofohobesonga. Damocngo Anutuac kicfu ngereede?”

<sup>21</sup> Ifi deec yeni dekengec yoac monggoc ayecmema eng faiyurugac kenoc. Imoc yofiac, faka fingerecac ngicngac sasawa Anutu dengeregec. Imocac aposoro dafi ayemmebeso, imocac obohogec. <sup>22</sup> Nga ngic faka kuhagoc

sebiau fingeru ngereec, ye ngicyada kifaya 40 feraheecac yeni aposoro eng wayurugec.

<sup>23</sup> Wayurugec Petoro nga Yohane yeri arengfocngira yenearu dzigenema kenoc. Kemma womong gareng enara amma garengfocngina yoc edeyurugec, imocac yoacsiduc edeyunudarec negenggec. <sup>24</sup> Negemma yeni uba mocgu amma Anutu kpacma dengerema yofi degec, “Kuctoa mingina Anutu, ge kurumeng nga bangec amma kondung nga imocac iwai hania hania meficyununec. <sup>25</sup> Geng bicngoc Tiri Asu edena yeng kiscinina amma enac tofoc tofohoga Dawidi, yeac enara meefaina yeng yoac yofi deec, ‘Foracngoc bangeha bangeha ngicngac areng, yeni faka mangana anggecdeac yoac dedzege andae nga ngiha ngiha yeni negen negeng ua mema kpedzongemeandae, imoc mi ngereede. <sup>26</sup> Bangecac ngictau yeni efaigec ngic enara uayoacnginagoc, yeni kpeturanggema KEBU memadae. Nga yeng ngic meisinggema kerecdokungo nadzicmiec, ye ifingoc memagecdeac yoac dedae.’ *(Mitiyegec 2:1-2)*

<sup>27</sup> Geac enac tofoc tofohoga kpetiac, imoc Yesu Kristo nga geng ye kerecdokungo nadzicminec. Nga taong yomohainoc Herode nga Pontio Pirato, yereng bangec monnunac ngic Anutu mi negemmiadae, yeneng israe ngicngac yenigoc kpeturanggema ye keracmangang ammigec. <sup>28</sup> Amma waracngoc geangga kucfu nga enacgango denecac sirihau ifi ammidacgec. <sup>29</sup> O Kebu, yomoc ine dekengec yoacngina hennegeng amma enac tofoc tofohofocga kuc meficnunuma nangenununa yoacga kengeha kpac dekperagiyemebisina. <sup>30</sup> Demina mariga sinena sebiu ngerec ngeree nga negensinggecdeac faka kuhagoc nga faka mi hehena kpetiac enac tofoc tofohoga Yesu, yeac kpacfu fingeckembeso.”

<sup>31</sup> Ifi numugec wisickemanu amabangec kpedzucnema tacgec, imoc kpididieu Tiri Asungo ubanginau wakeu Anutuac yoac kengeha kpac ngic enacefac deireckeyemmegec.

<sup>32</sup> Yesu negensinggec, habu imoc yeni uba mocgu amma wiac feyem-meeec, imocac neac geac mi dema urecngina mekecgec. <sup>33</sup> Aposoro yeneng Kebu Yesu homecfunac yarec, siduc imocac hepuc amma kuhagoc dekperagigec. Nga danggunuctoayango sokoyunudacma feec. <sup>34</sup> Yeneac botucnginau mongngo wiac monggac mi obohoec, kpac. Ngicngac sasawa amabangecnginagoc kecgec, yeni amabangecngina imoc desigec hiedzo kirecgeu <sup>35</sup> Aposoro yenearu faigec. Faigec, yeneng ngic yeni iwaiac obohogescoc medereyemmekecgec.

<sup>36</sup> Anu ngic mong kefec kpara Yosefe, aposoro yeneng kpara mong Banaba degec, imocac titiha yofi: Demeseri medac. Ye Rewiac arennunac Kipiro nuclu fingerec. <sup>37</sup> Ngic yeng bangeha mong desiu hiedzo kirecgeu aposoro yenearu mekemma faidarec.

## 5

<sup>1</sup> Anu ngic mong kefec kpara Anania, ye enema Safiragoc bangecngira noboha mong desiec dzo kirecgeec. <sup>2</sup> Kirecgeu dzo tosea meickema faiu tarudeac enema edeu negentegeru uba mocgu anoc. Amma toseasac aposoro yenearu mekemma faiec.

<sup>3</sup> Faiu Petorongo yofi edeec, “Anania negenna, Satangngo ubagau kemeu geng Tiri Asu ikoc ammima bangeca nobohaac bung tosea herandzina fede. <sup>4</sup> Amabangecga noboha fegembeso dema fegembac me desina dzo kirecgeu imocngo ‘ifi me ifi amba’ dema ambang. Ge ubagango tobangguu

ifi andang, imoc naric mi ande. Negennec, ge ikoc annec, imoc ngic neni mi anemmenec, kpac. Ge Anutunoc ikoc ammidang.”

<sup>5</sup> Ifi deu Anania ye yoac imoc negemma imohaingoc todingge makpeu asu heifeec, imoc kpac anu homeec. Anu yeni sasawango faka fingerec, imocac siduha negemma damuyunuu kengectoa anggec. <sup>6</sup> Nga ngicmedac yeneng yacma farenga biranggema tofoho kemma tonggogec.

<sup>7</sup> Tonggomagec aua harebec wisickeu enema ye ewearu faka fingerec, imoc mi negemma haec. <sup>8</sup> Hau Petorongo yofi kpesimiec, “Bangec nobo-hango dzo kirecgedac, imocsac me?” kpesimiu yeng deec, “Oc, imocsacnoc.” <sup>9</sup> Ifi deu Petorongo yofi edeec, “foracngoc, ngeri Kebuac Asu tobanggeecdeac denegeng amma uba mocgu andaoc. Negennec, ewega tonggoma hadau, yeni nagu ngadeau nandae, mi hereemanu ge ifingoc tofogu kemma tonggogucecde.” <sup>10</sup> Ifi edemanu ye imohaingoc haniau todingge makpeu asuya ereu homeec. Homeu ngicmedac yeni ama manau emma ye bic homeec, ifi hemma farenga tofoho kemma ewea feec, imocac tegiau tonggogec. <sup>11</sup> Anu kpebung sasawa amma ngicngac sasawa yeneng siducngira negemma damuyunuu kengectoa anggec.

<sup>12</sup> Aposoro yeneng negensinggeceac faka kuhagoc nga faka mi hehena, imoc homac ngicngac yenearu megec. Nga Yesuac habu sasawa yeni Anutuac womong mana mong katapa mi kpekpea feec, kpara Saromo, ihai uba mocgu amma kpeturanggema kecegec.\* <sup>13</sup> Kpeturanggec ngicngac yeneng kengec amma yenearu mi torokpegec. Amma yeni sifu ewehihehi ayemmemma kecegec. <sup>14</sup> Ifi anggec ngicngac homac yeni Kebu negensinggema yenearu kentorokpe anggec Yesuac habu yadie. <sup>15</sup> Aposoro yeni faka kuhagoc megec henggecac amma yeni hafeigoc fefe nga dzakegoc sinnu yofi dema faiyunugec, “Petorongo kengha anu sifunec ongeango kpahacyunuu hafeingina kpac ambeso.” <sup>16</sup> Amma Yerusalem taong yerec yerec amabangec hereau tackende, imohacnac ngicngac homac hafeinginagoc amma asu seuhagocngo memanganeyunugec, yeni hesicyunu kenggec ngereedacegec.

<sup>17</sup> Faka ifia fingeru womong garengtoa nga arengfora sadukaio ngichabu, yeneng keracmangang angkecma <sup>18</sup> aposoro mendangyunuma witicamau faiyunugec. <sup>19</sup> Faiyunugec tofocnac imohai Kebuac angero mongngo nagu meyemmema hesicyunuu mama yofi edeyunuec. <sup>20</sup> “Ngeni Anutuac womonnu emma namma kecec gboriaac hania ngicngac sasawa edeyunudadachisia.”

<sup>21</sup> Ifi edeyunuu negemma ama werec wereckenggac womonnu emma ngicngac edekpou ayemmegec.

Naso imohai womong garengtoango arengforagoc yudangic yeneac tutumangtoa, imocac memba nga israe ngicngac yeneac enaratoa kpacyunuu hadacma kpeturanggegec. Kpeturanggema aposoro meyunu hagecdeac witicamau yoac faigec kenec. <sup>22</sup> Kenu keracnatang yeni kensikema witicamau hofocyunuma dzigene hama degec, <sup>23</sup> “Neni kensikema nagu kia seria yombong memea henni gareng yeni nagu nandau. Anu nagu witima emma ngic hofocyunuma ine ngic mong mi hending.” <sup>24</sup> Yoac imoc degec womonggac tebengic enara nga womong gareng enara, yeneng faka fingeccac, imocac obohogec.

<sup>25</sup> Ifi ammagec ngic mongngo hama deec, “Negendae, ngic witicamau faiyunudau, yeni womonnu ngicngac kpouyemmema nandae.” <sup>26</sup> Ifi deu

\* 5:12: Imocac onga hafac 615nu nga 617nu fede.

tebengic kunengngina yeng keracnatang meyunuu kenggec. Nga ngic yeneng hocngo yenerebauac kengecyunuu aposoro yumeau hesicyunu hagec.

<sup>27</sup> Nga yudangic yeneac gamang, imocac memba, tutumannu faiyunugec nammagec womong garengtoango yoac yofi kpesiyemmeec. <sup>28</sup> “Ngeni ngic yeac kpacsiduha ngicngac edekpou mi ayemmegecdeac dederac angememing. Nga ngeni ine yoac imoc edekpou ayemmema Yerusarennu monggoc desahedae. Amma ngic imoc yeac sawaac kopocsic, imoc neneac witiu faibeso dedae.”

<sup>29</sup> Ifi degec Petoro nga aposoro goa yeneng yoac yofi merengyemmegec, “Anutuac yoac wama ngicyoac tofoc tofoho, imoc naric mi ambesonga. <sup>30</sup> Ngeni Yesu maringinango mariponnu kpema kpehomegec kisicfocninaac Anutungo ye homecfunac megboriu yarec. <sup>31</sup> Yaru Anutungo meemma enaramemetoanina nga memengerecna amma kasonina gununggeu foiau nande. Nga israengic ngeni ubangina dzigeneu kopocsicngina kpac anudeac ifi anec. <sup>32</sup> Anutungo Tiri Asu enac tofoc tofohofora yempeande. Nga Tiri Asu nga neni Yesuac siduc imoc nenahafoc dekperagidimbe.”

<sup>33</sup> Yoac ifi edeyunuu wosongina meu aposoro yunuhomegecdeac degec. <sup>34</sup> Ifi degec tutumangnginau farisaiongic mong tarec, kpara Gamarie, ye mitiac negen negengngic nga ngicngac yeneng yeac ewea heikecgec. Yeng deec, “Ngeni ngic yomoc ama sobennu meyunu kemema nammagec.” <sup>35</sup> Ifi deu meyunu kemegec enarameme arengfora yofi edeyunuec, “Israengic, ngeni ngic yomoc haniangina negentegecma faka ayemmebisia. <sup>36</sup> Warac naso mong ngic mong kpara Teuda yengenaoc fingeema deec, ‘Ni ngick-unengngina.’ ifi deu ngic 400 isoc yearu kpeketahegec. Nga ye yengena dzikac kima homeu arengfora ticpac tehegec uangina kpac anec. <sup>37</sup> Ye kpac anu takesiac amma kpac oso oso nga oho oho naso megec, naso imohai Gariraia bangecfunac ngic mong kpara Yuda, ye ngic goa herengina miaru yeni ye modacgec. Yuda yengena ifingoc kpegec kpac anu arengfora ticpac tehedacgec.

<sup>38</sup> Imocac amma yofi edengunuba negenggec, ngeni ngic yomoc wayunugec kenggec. Yeni uaareng yomoc ngic negen negennu medaeu imoc bic kpac andarude. <sup>39</sup> Nga Anutungo nonggo tacmanu medaeu ngeni mi kpetariyem-megecdeacsoc anggecde. Kecma Anutu ngaba ammibauc.”

<sup>40</sup> Ifi edeyunuu ireckema aposoro kpacyunugec hagec dzikacngo yunugecdeac edeyunugec. Yunugec wisickeu yeni yoac monggoc Yesuac kpacfu mi dekperagigecdeac deracyunuma sueyunugec.

<sup>41</sup> Sueyunugec, yeni naric Yesu kparaac amma gamekpekpe ayemmegec, imocac ubangerecfu tutumannunac mama kenggec. <sup>42</sup> Amma yeni wenaha wenaha Anutuac womonnu nga amaya amaya, imohai Yesu ye Messia imocac siduc gombung edekpou ayemmema ua imoc mi wagec.

## 6

<sup>1</sup> Naso imohai Yesuac habu sokoma kenec. Sokoma kenu nenesemeng we-nacsoc mendzicyemmekecma yudangic grikyoac dekecgec, yeneac hodzec medadangyunugec. Ifi anggec, yeni yudangic ama mingina kecgec, ye-neac ubakpekpe anggec <sup>2</sup> aposoro 12 yeneng Yesuac habu kpacyunudacma yofi edeyunugec, “Neni yaka hendzic hendzic ua imoc nanggema Anutuac yoac dede, imocac ua wadacni mau naric mi ngereude. <sup>3</sup> Negen negensinggoc tosofocna, ngeni imocac amma ngic 7 ngenang botucfunac



meisingyunubisia. Ngic Asungo ubangina wakeu negen negeng nga fakangina gombunga yenengkecdae, ngic fakangina ifia meisingyunubisia. Nga neneng ua imoc yemmeni mebisia. <sup>4</sup> Nenaoc ine ua imoc wama nunumu nga Anutuac enacdede ua mekecbisina.”

<sup>5</sup> Yoac ifi degec habutoa yeneng negenggec ngereec. Anu ngic yofiguc meisingyunugec: Stefano, ye negen negensingtoayagoc amma Tiri Asu wake wakea femiec, amma Firipo nga Porokoro amma Nikano, Timong nga Pamena amma Nikorao. Nikorao ye Antiokianac nga ye bangec monnunac ngicngo warac Anutu mi negemmima kecma yudangic yenearu torokpeec. <sup>6</sup> Yeni ngic imoc aposoro yeneac hoannu faiyunugec nanggec aposoro yeneng maringina sebinginau faima yeneac amma numugec.

<sup>7</sup> Anu Anutuac yoacngo Yerusarennu yadima sokoma kenu Yesuac habu yenearu nasoya nasoya torokpeu torokpe fingeckenec. Fingeckenu Anutuac womong gareng, yenearuac homacngo siduc gombung negensinggema modagcec.

<sup>8</sup> Stefano ye Anutuac danggunuc nga kuc homac femiec. Imocac amma yeng ngicngac botucnginau kecma Kebu negensinggegecdeac faka kuhagoc nga faka mi hehena homac meec. <sup>9</sup> Anu yudangic yeneac kpekpeturang amangina mong kpara Feackecec\* degec, yenearuac ngic goango yacma Stefanogoc yoacngina engemmama anec. Ngic imoc yeni Kirene nga Are-sandria amaunac amma Kirikia nga Asia bangectoanac. <sup>10</sup> Nga Stefano ye Tiri Asuac kucfu yoac negentegecma deu yeni yoac turunga merembesonga osigec.

<sup>11</sup> Osima ngic goa fenggeyunugec, yeneng Stefanoac yofi degec, “Ngc ye Mose nga Anutu demanganeyuruu negening.”

<sup>12</sup> Ifi degec ngicngac habutoa amma yudangic enarafocngina nga mitiac negen negengngic, yeneac wosongina miagcec. Miacgec yeni Stefano mema mendanggema yudangic yeneac tutumangtoau mekemma <sup>13</sup> ihai ngic ikoha faiyunugec yeneng hepuc amma yofi degec, “Ngc imoc ye nenanggac ama kpetiac nga dedeseriyoacnina wisic wisickea kpac tatahoc demangane-ande.” <sup>14</sup> Yeng yoac yofi deu negening, “Yesu Nadzaretenc, yennoc ama yomoc iriringgema singyoac Mosengo deficgenemmeec, imoc wama yoac gboria heficgenemmeande.”

<sup>15</sup> Nga yudangic sasawa tutumangtoanginau tacgec, yeneng Stefano henserima henggec kicmesuyango angero yeneac siric isoc anec.

## 7

<sup>1</sup> Womong garengtoango Stefano kpesimiec, “Yoac dedae, imoc fora me?”

<sup>2</sup> Ifi deu Stefanongo yofi deec, “Mangfocna nga sactosofocna, yoac deba negenggec: Kiscinina Abraham ye Harang taonnu mi kemma Mesopotamia bangecfu kecmanu Anutu kuc nga kibikperagi mingina, yennoc fingeemima yofi edeec,

<sup>3</sup> ‘Ge amabangecga nga arengfocga wayunuma neng bangec mong edzacgubade, ihai kemma kecbesena.’ *(Fingec fingec 12:1)*

<sup>4</sup> Anu ye yoac ifi negemma Kardea bangec wama Harang taonnu kemma kefec. Ihai kecmanu mama homeec. Homeu Anutungo bangec ngeni

\* 6:9: Kpekpeturang ama imocac memba yeni warac ebicfu kegcgc. Yeni ngickuneng mocgu mocgu yeneac wanac kegcgc. Kecma yenaocngoc hiedzo kpeturanggema bummeemema ngic imoc wayunugec.

yofinenggac kecdae, Abrahang imohai sueu haec. <sup>5</sup> Hesticke hama bangec mong mi wamiu tiuenec, imoc kpac yombong. Ye nga bangecfora dengec tigece enudeace areng kpeyemmeec, imoc nambaraha kpac kecmanu edeec.\*

<sup>6</sup> Amma Anutungo yoac mong yofi deec, 'Esangaboga nga bangecfocga yeni kifa 400 ngic mong yeneac bangecfu kuric kecma enac tofoc tofoho ua mema sisis witiau kecbesandae.'

<sup>7</sup> Amma yoac mong yofi torokpeec,

'Enactofoc tofohofocngina meyunugecde, ngic imoc yeni turunga yemmebade nga nambaracfocga faiyunugec bangec yomohai dzigene hama enac tofoc tofoho anemma kecbesandae.' (*Fingec fingec 15:13-14*)

<sup>8</sup> Anutungo Abrahang dzadzahac mima sebi tosangina herecgegecdeac† Anutungo Abrahang edeec. Ifi edeac medaha Isaka kpeficgeu fingecma uameme 8 femanu medahaac sebi tosea herecgeec. Anu Isakango Yakobo kpeficgeec nga Yakobongo kisicfocnina 12 kpeficyunuec.

<sup>9</sup> Kisicfocnina yeni munangina Yosefe keracmangang ammima Aigita bangecfu faigec ngic goa yeneng bummema mekenggec. Ihai kecmanu Anutungo yegoc kefecac amma <sup>10</sup> kpendzennunac meickema ubangerec-goc kekec heficgemiec. Yeng Yosefe wosoefac ammima negen negentegec miu Aigita ngictau Faraongo negen negenga imoc hengngereema yengena amagerec nga aigitangicfora momoc garengyunuma kefudeac ngickuneng faiec.

<sup>11</sup> Faiu kecmanu Aigita nga Kanaang bangecfu bodi fingeru ebic kuneng meficgegec. Ifi fingeru kisicfocnina yeni nenesemenggac homema kecgec.

<sup>12</sup> Kecmagec 'Aigita bangecfu semeng fede' ifi degec negemma Yakobongo medacfora sueyunuu ihai kenggec. <sup>13</sup> Kecma naso monnu monggoc kenggec Yosefengo dacfora haniaya dekperagiyemmeec. Dekperagiyem-

meu Faraongo Yosefe yengena nga arengfora haniangina negentegerec. <sup>14</sup> Ifi anu Yosefengo dacfora edeyunuu kemma mangngina Yakobo nga arengfocngina sasawa bic kpacyunugec hagec. Nga ngicngac hagec, yeneac kpe-tengina 75 anec. <sup>15</sup> Nga Yakobo ye Aigita bangecfu kemma kecma homeec nga medacfora kisicfocnina yeni ifingoc ihaingoc homedacgec. <sup>16</sup> Homegec farengngina Sikeng amau meyunu hagec. Hama Abrahangngo Sikeng amau Hamoro medacfora yenearunac bangec mong kicsereac amma siriwa dzo dafigucngo bummeec, imohai tonggoyunugec."

<sup>17</sup> "Anutungo wiac Abrahang miudeac bicngoc deseriec, imoc fora fingerudeac naso wegenemanu Yakobo esangabofora nga bangecfora yeni Aigita bangecfu homac fingecsahe anggec. <sup>18</sup> Ifi amma kecmagec Aigita ngictau gboria mong fingerec, yeng Yosefeac hania mi negenec. (*Makekeng 1:8*)

<sup>19</sup> Anu ngictau yennoc kisicfocnina meenti memati ayemmema memanganeyunudarec. Amma yeng yofi edeyunuec, 'Ngeni sabacfocngina wayunugec homedacbisia.'"

<sup>20</sup> "Mose ye naso imohai fingeru Anutungo sabac gombunga imoc henu ngereec. Nga ye mamac amau afo harebec kefu garenggegec. <sup>21</sup> Ifi amma mekemma ama ngadeau tihereema faigec feec. Femanu Farao naroangango meficgema yengena medac isoc mema mekefu yadieci. <sup>22</sup> Yadiu

\* **7:5:** Fingec fingec 17:8; 48:4 † **7:8:** Sebi tosea, imoc ngicmedac fusacnginaac dumbengaac sebera fede, imoc herecgeandae.

Farao ngicfora yeneng aigitangic yeneac faka nga negen negeng kpoumigecec negentegecma kecma wiac deme anu kuhagoc anec.”

<sup>23</sup> “Kecma kifaya 40 anu ye israengic ogofora yenennegeng anudeac ubea efaiu kenec. <sup>24</sup> Kemma aigitangic mongngo israengic mong eng kpeu hemma ogea meficgema turunga meremma aigitangic homemea kpeec. <sup>25</sup> Kpema yofi negenec, ‘Ni arengfocna Faraoc mariunac mesiyunubadeac dema Anutungo ua nende, imoc negentegecdae gedang.’ Ye ifi negenec anu israe ngicngac yeneng imoc ine mi negentegecgec. <sup>26</sup> Anu wereckengau monggoc kemma israengic yohockang eng eweec meficcyuruma demefac ayecmema yofi edeyuruec, ‘Ngihoc waec, ngeri areng mocgungo ewedape, imoc naric kpac.’”

<sup>27</sup> “Ifi deu ngic ogea kpeecngo Mose kpefahama yofi deec, ‘Mongngo mi nereac desidesingic me gareng faigued. <sup>28</sup> Ge worang aigitangic kpehome-dang, ifi isoc ni gedang ifingoc nubeso annec.’ *(Makekeng 2:14)*

<sup>29</sup> Ifi deu Mosengo yoc imoc negemma imohaingoc worama Midiang bangecfu kemma kuric kefec. Ihai kecma ngac mema medac yohockang kpeficcyuruec.”

<sup>30</sup> “Anu kifa 40 monggoc kecma Sinai tikiugeng bangec hocsiragocfu kemma kecmanu angero mongngo icbarama susiau gerechorang manau fingeru henec. <sup>31</sup> Hemma kpidohoma hentegerudeac kenu Kebuac yoc yofi fingerec, <sup>32</sup> ‘Ni kisicfocga yeneac Anutu, Abrahang nga Isaka amma Yakobo, yeneac Anutunoc.’ Fingeru Mose ye dzonong fede fede amma kengec kpeu kiwa sufuma ngonducnema nanec. <sup>33</sup> Nammanu Kebungo yofi edeec, ‘Bangec nannec, imoc bangec kpetiac, imocac hanitabega hesina. <sup>34</sup> Ni ngic-focna Aigita bangecfu sisicyunugec kiacudumeng anggec ereu yenenduae. Amma mesiyunubadeac yaguc maduae. Imocac Aigita bangecfu sueguba bic kembesena.’” *(Makekeng 3:2-10)*

<sup>35</sup> “Ngic yeneng Moseac yoc wama yofi degec, ‘Mongngo ge neneac desidesingic me gareng mi faigued, kpac’ *(Makekeng 2:14)*

Anutungo ngic yenoc israengic yeneac enarameme nga mesi mesingicngina anudeac dema angero sueu gerechorang manau fingecmima ua imoc demiec. <sup>36</sup> Ifi amma Anutungo Mose sueu kemma hesicyunu haec. Ye Aigita bangecfu nga Kondung saccacfu nga bangec kisiu faka mi hehena nga negensingegecdae faka kuhagoc homac mema kecmanu kifa 40 anec.”

<sup>37</sup> “Amma Mose yennoc israengic yofi edeyunuec, ‘Anutungo arengfocngina yeneac botucfunac profete mong ni isoc mefic-gengemmeude.’ *(Dedeseri 18:15)*

<sup>38</sup> Amma yengngoc bangec hocsiragocfu kisicfocnina yeneac kpebungoc kpeturangema kecma Sinai tikiu emma angeroac enacfunac yoc keke-hagoc negemma mama edenunuec.”

<sup>39</sup> “Kisicfocnina yeni yengena wama yoara membaickema Aigita bangecfu dzigenegecdae ubangina suema <sup>40</sup> Arong yofi edegec, ‘Ge nemuonga mong menemmena nemu imocngo warainemmeso. Mosengo Aigita bangec-funac hesicnunu haec, ye gedang bic sufuma kpac anec.’ *(Makekeng 32:1)* <sup>41</sup> Ifi dema naso imohai nemuonga burumaka medaha siric isoc mema hosuc heimigecec. Yeni maringinango onga mema imoc deafehe ammima hoanggegec. <sup>42</sup> Ifi anggec Anutungo ngadeyunuma sawau onga hadehade

afeheyunugecdeac wayemmeec. Profete yeneac kibiyoac imocac yofi bic oho ohoya fede,

'Israe mingina, ngeni kifa 40 bangec hocsiragocfu kecma yang hosuc heima me sesegerec goa mong mi ohonenggec, kpac. <sup>43</sup> Ngeni nemu Morokoac kporuchedzo tofohokecgec nga nemu Refang, yeac asomeng onga mekecgec. Wiac imocnoc numumigecdeac memengere anggec amma ni Babirong bangec hereau faingunubade.' ” *(Amosi 5:25-27)*

<sup>44</sup> “Kisicfocnina yeni bangec hocsiragoc, ihai Anutuac kporuchedzo megeg, imoc Anutungo Mose sirih edzahema derecgeniec, imocac sirihau memea. <sup>45</sup> Bedzo imocnoc kisicfocnina Yosuang enara meyemueu yei bangecareng goa yeneac bangecfu mehama tacdacgec. Tacmagec Anutungo bangecareng kecgecmoc, yeni yunukporac ayemmeu kisicfocnina yeni bangec tigecc enu Anutuac kporuchedzo imohaingoc torokpeu torokpe mekengkecmagec Dawidi fingerec.”

<sup>46</sup> “Anutungo Dawidi wosofac ammiu yeng Yakoboac Anutu, yeac amawomong mong meficgeudeac numumiec. <sup>47</sup> Foracngoc, imoc yengenaoc kpac, Saromongo Anutuac womong memiec. <sup>48</sup> Engenatoa yeng ine ngic yeneng womong mong maringo memea, ihai tacyac mi angande. Profete mongngo enacyoac yofinoc deec,

<sup>49</sup> ‘Ngictau tatacna imoc kurumeng nga bangec imocngo titiserina, Kebungo ifi dede. Ngeneng amatatacna mong menenggec imoc ine mi ngereude amma fefe monggac manau tacnegembade, imoc obohoude. <sup>50</sup> Foracngoc, ni marinango wiac sasawa meficgedarai.’ ” *(Yesaia 66:1-2)*

<sup>51</sup> “Ngicngac gori gorio, ngeni ubakedzacngina fonggo fonggoya, kisicfocngina yeni Tiri Asu deendema ammikecgec, ngeni ifingoc ifi andae. <sup>52</sup> Kisicfocngina yeni profete sasawa yunukporac ayemmegeg. Profete yeneng dindiang mingina fingerudeac kpefingyoac degec nga ngeneac kisicfocngina yenennoc yenhafoc profete imoc yunugec. Kecma Ngic Dindiang yengena fingeru ngenennoc doc mema ye kpehomegeg. <sup>53</sup> Ngeni angeroac enacfunac dedeseriyoac megeg nga imoc ine sifu wagec.”

<sup>54</sup> Stefanongo yoac ifi edeyunuu negemma wosonginau meu yeni herebu kuneng negemma yearubigeng fima enacngina kisaranggema nangengngina manganec. <sup>55</sup> Stefano ye ine Tiri Asungo ubeau wakeu kurumennu fiu enu Anutuac kuc kibikperagiau Yesu Anutu foiau nanu hemma deec, <sup>56</sup> “Negendae, ni kurumeng anggeu Ngicac Medacngo Anutu foiau nanu henduae.” <sup>57</sup> Ifi deu yeni sasawango kpeborongtoa kpema kedzacngina kpefonggema yearu ururunggema kpefahe kpefahe kemma <sup>58</sup> taong ngadeau kensikema hocngo ukuma heigec. Ifi amma hepucngic yeni ngakpingina herea hesima ngicmedac mong kpara Sauro, yeac hanu guruhegeg.

<sup>59</sup> Guruhema Stefano hocngo heigec yeng yofi dema numuec, “O Kebu Yesu, ge ubaongana mena.” <sup>60</sup> ifi dema fafoc heima arohoma kpacma deec, “Kebu ge kopocsicngina yomoc wayemmena.” ifi dema homeec. Homeu Saurongo faka imocac negenu ngereec.

## 8

<sup>1</sup> So, naso imohaingoc Yerusalemnu kpebung kecgec, yeni hanahema yunukporac ayemmegeg. Ayemmegeg ticpac tehema Yudaia nga Samaria bangectoau kendacgec aposoro yeneng ine tacgec. <sup>2</sup> Amma ngic goa Kebu

eweheimima kecgec, yeneng Stefano mema kiacsonggongtoa yombong am-mima tonggogec. <sup>3</sup> Anu Sauro ye kpebung yunukporac ayemmeudeac amaya amaya emma ngicngac metai ayemmema witicamau faiyunuec.

<sup>4</sup> Yesuac habu yeni ticpac tehema kenggecngo ine guruamasoc keema ngicngac Anutuac enacyoac dekperagiyemmekecgec. <sup>5</sup> Ifi ammagec Firipongo samariangic yeneac taonnu sikema Kristoac yoacsiduc dekperagiyemmeec. <sup>6</sup> Dekperagiyemmema negensinggegecdeac faka kuhagoc meu hemma kedzac kpema yoara yenahafoc negenggec. <sup>7</sup> Imoc yofiac, ye asu seuhagoc homac kisangyunuu ngic hereunac erema arohoma woragec. Amma ye puring hania hania homac mengereyunuec. <sup>8</sup> Ifi anu taong imohai ngicngac yeni ubangerec kuneng negenggec.

<sup>9</sup> Anu taong imohai ngic mong kefec kpara Simong, ye bangecac hade-hadegoc ua mekefu samariangichabu yeneng henggec bibiagoc anec. Ye yengenaac negenu engena anec. <sup>10</sup> Anu engena mamea yeni yenahafoc yeac negenggec engena anu eweheimima yofi dema kecgec, "Anutuac kuc kunengngo yearu fede." <sup>11</sup> Ye boru mema kerec ayemmeu kpidohoma yearu kpeketahema nasoherec kecgec. <sup>12</sup> Anu Firipongo Anutuac eucerecng-gac siduc nga Yesu Kristoac hania deireckeyemmeu ngicngac yenahafoc negensinggema mitidoku nadzicgec. <sup>13</sup> Ifi anggec Simongngo ifingoc Yesu negensinggema doku nadzicma Firipoac hoannu kefec. Firipongo faka kuhagoc nga faka mi hehena meu Simong ye imoc hemma kpidohoma negen negeng ua homac meec.

<sup>14</sup> Samariangicngac yeni Anutuac yoac negenguba anggec, imocac siduc Yerusarennu aposoro yenearu kenu negenggec. Negemma Petoro nga Yohane sueyurugec kenoc. <sup>15</sup> Ihai kemema yeni Tiri Asugoc anggecdeac Kebu numumioc. <sup>16</sup> Tiri Asungo warac yenearu mong mi mamamu yeni Kebu Yesuac kpacfusac mitidoku nadzicgec. <sup>17</sup> So, aposoro yeri maringirango sebinginau faiec yeni Tiri Asugoc anggec.

<sup>18</sup> Aposoro yeri ngic yeneac sebiu maringira faiec Tiri Asugoc anggec, Simongngo imoc hemma dzo yerearu mehama <sup>19</sup> yofi edeyuruec, "Ngeri uayoac nga kuc imoc ni ifingoc nenec neng ifingoc ngicsebinginau marina faiba Tiri Asugoc ambisia."

<sup>20</sup> Ifi deu Petorongo yofi edeec, "Anutuac wosoefac imoc hiedzongo bummebeso negennecac hiedzogagoc ngerahafoc hofeu kemebesera. <sup>21</sup> Anutungo uba ikocga hendecac kuc yomocngo mong mi yafinggumanu entengeng kecnade. <sup>22</sup> Ge manganaga imoc wama ubaga dzigeneu Kebu numumina ubagau songo ikoha dzuacgembac.

<sup>23</sup> Manganaac hodungango ge memanganeguu ngicngac memanganeyu-nunadeac fakango fusegucnoc." imoc henduae.

<sup>24</sup> Ifi deu Simongngo deec, "Wiac dedapemoc, imoc mi fingeenbeso. Imocac ngeraoc neac amma Kebu numumiec."

<sup>25</sup> Anu aposoro yeri ngicngac Kebuac yoac dekperagima edekpou ayem-mema Yerusarennu dzigenebeso dema Samaria guruama tackendesoc siduc gombung dekperagiyemmema kenoc.

<sup>26</sup> Kebuac angero mongngo Firipo yofi dema edeec, "Ge efaima sing Yerusarennunac emu Gadza taonnu kemedede, imohai kembesena. Sing imoc kisi fede." <sup>27</sup> Ifi dema edeu Firipongo efaima kenec. Anu Etiopia bangectoau ngactau mong kefec kpara Kandake, yeac ngickuneng mong\*

\* 8:27: Ngic imoc ye gbomea meic meickea.

dzofinahaac garengtoa, yeng Yerusarennu Kebu afeheudeac kengenecfunac<sup>28</sup> dzigenema keretacfu tacma ferecge kemma profete Yesaia, yeac yoackibi osoec. <sup>29</sup> Ifi ammanu Asungo Firipo yofi edeec, “Ge bic keretac edimocac hoangau kenna.”<sup>†</sup> <sup>30</sup> Ifi deu Firipongo yearu nedzima kemma ngic ye profete Yesaia, yeac yoackibi osou negemma kpesimiec, “Yoac osonec, imocac hania negentegecne me?”

<sup>31</sup> Kpesimiu deec, “Mongngo mi dekperaginemanu neannaoc naric mi negentegecbade.” Ifi dema Firipo ye keretau enu yerahafoc tarecdeac derecgemiec. <sup>32</sup> Yoackibi osoec, imoc yofi,

“Rama mong kpehou anggecdeac mekengandae me ramamedahango dzoea merec merecgenic yearu waickema feande, siriha imocacsoc amma enara mong mi anggeec. <sup>33</sup> Yeni yoacfu kuha memama yeac yoacac fora mi dema bangecfu kekeha meickegec. Anu yeac esangabofora yeneac kpetengina mongngo oso osoac siriha kpac. Imoc yofiac, Kebuac arengfora yeneng kekeha bangecfunac wangecgec.” (*Yesaia 53:7-8*)

<sup>34</sup> Ifi osoma ngickunengngo Firipo yofi dema kpesimiec, “Profete ye meracac ifi dede, ye yengenaac me ngic monggac?” <sup>35</sup> Kpesimiu Firipongo enara anggema mitikibiab yoac imohacnac torokpema Yesuac siduc gombunggac hania edekpou ammiiec.

<sup>36</sup> Ifi amma kengkecma doku monnu kensikema ngickunengngo yofi deec, “Henna, doku yoc fede, ge naric mitidoku nadzicnembang me?” <sup>37</sup> Ifi deu Firipongo deec, “Ubaga hafoangoc negensinggenadeu naric ambade.” deu yoac yofi meremmiiec, “Yesu Kristo ye Kebuac medac, imoc negensinggeduae.” <sup>38</sup> Ifi dema keretac dzegeu taru Firipo nga ngickuneng yerahafoc dokuu kemema Firipongo doku nadzicmiiec. <sup>39</sup> Nga dokuunac eremaec Kebuac Asungo Firipo ioha wangecma kenu ngickunengngo monggoc mi hemma ubangerec negemma kenec. <sup>40</sup> Firipongo ine Asodoc taonnu kenu henggec. Amma ihacnac hanahema amea amea siduc gombung dekperagiymmema kengkecma Kaisarea taonnu mesiec.

## 9

<sup>1</sup> Sauroac hereu ubagerec kuneng fekefecac Yesuac habu ngaba ayememema yunumeme amma womong garengtoa yearu kemma yofi edeec, <sup>2</sup> “Ngic me ngac Damasko taonnu sing gboria modacdae, yeni meficyunuma meyunuma maringina dedeckema Yerusareng taonnu meyunu habadeac Damasko kpekpeturang amaac enara, yeneac kibi mong ohoma nenna.”

<sup>3</sup> Miu ye kemma Damasko mewegenebeso ammanu imohaingoc kumennunac kperagingo ioha mama nerarangeec. <sup>4</sup> Nerarangeu ye bangecfu todingge kpeu fema yoac mong yofi fingeru negeneac, “Sauro, Sauro, ge nocac nukporac anemma kecanne?” <sup>5</sup> ifi deu Saurongo kpesimiec, “Kebu ge merac?” ifi deu deec, “Nukporac anengkecneac, Yesu ninoc. <sup>6</sup> Imocac ge yacma amau kenna! Ihai kecmara dafi ambesonga, imocac yoac edegecede.”

<sup>7</sup> Anu ngic yegoc kenggec, yeni yoacngina kpac anu engsac iridzagec amma nanggec. Nocac yeni yoac negenggec amma ngic mong ine mi henggec. <sup>8</sup> Nga Saurongo yacma kic fiudeac kpanggung manggung anu

<sup>†</sup> 8:29: Ge ifingoc Dedeseri 23:1 nga Yesaia 56:3-7 osona. Warac ngic ifia yeni Anutuac hoannu naric mi hagec. Yaguc Tiri Asungo sing gboria meficgenemme.

ngicfora yeneng mariauu mema Damasko mekenggec. <sup>9</sup> Mekenggec ihai uameme harebec kiwa nomaneu tacma nenedoku mong mi neec.

<sup>10</sup> Damasko taonnu ubamereng ngic mong kefec kpara Anania, ye Kebungo ongau fingecmima kparec, "Anania." kparu deec, "Kebu ni yomoc." <sup>11</sup> deu Kebungo yofi edeec, "Ge yacma sing kpara Dindingac deandae, ihai kemma Yudaac amau emma ngic mong kpara Sauro, Tarso taonunac, ye hofocma meficgebesena. Negenna, ye numuma tacde. <sup>12</sup> Ye ongau kpefing yofi hendac: Ngic mong kpara Anania, yeng yearu kemma kiwa fiudeac dema maria sebiau faidac."

<sup>13</sup> Ifi deu deec, "Kebu, ngic yeac homac degec negenganduae. Ye geac kpetiac arengfocga Yerusarennu megigi noc efea ayemmeande. <sup>14</sup> Nga yei ifingoc kpacga kpacma dengereandimbe, neni sasawa witicnunuma menunu kenudeac womong gareng enara yeneng uakibi migec yofinenggac mekecede." <sup>15</sup> Ifi deu Kebungo yofi edeec, "Ge kenna. Ni ngic yenoc meis-inggeba ye siducedena bangec monnunac ngicngac nga ngictaufocngina amma israe medacfora yenearu kpacsiducna deyadibeso. <sup>16</sup> Ammanu kpacnaac amma sueba kpendzeng nga ebic hania haniaac witiau kecbeso, imoc edzahema kpoumibade."

<sup>17</sup> Ifi deu Anania ye kemma ama dedea, ihai emma Sauroac sebiu maria faima deec, "Tosona Sauro, yacna. Kebu Yesu sinnu fingecgenec, yennoc suenude. Ge kicga fina Tiri Asungo ubagau wakeudeac haduae." <sup>18</sup> Ifi demanu ye imohaingoc kiwaunac wiac mong fonoc isoc mau kiwa fima yacma mitidoku nadzirec. <sup>19</sup> Nadzicma yaka nema seriec.

Sauro ye Yesuac habu Damasko kegec, yenigoc uameme goa kefec. <sup>20</sup> Kecma imohaingoc yudangic yeneac kpekpeturang amau emma Yesuac hania dekperagiyemmema yofi edeyunuec, "Yesu ye Anutuac medac." <sup>21</sup> Ifi edeyunuu yeni negemma kpidohoma yofi degec, "Ngic imocngonoc Yerusareng taonnu kpac imocnoc ewehihei ammigec megigi ayemmema yei ifingoc wicityunuma womong gareng enara yenearu meyunu kenudeac haec." <sup>22</sup> Ifi degec Saurongo serima yofi deec, "Forangoc. Yesu ye Messia." Ye imocac hania edzacyunuu yudangic Damasko kegec, yeni negemma kpidohoma yoara turacya mi merenggec.

<sup>23</sup> Ye uameme homac ifi angkefu yudangic yeneng Sauro kpegecdeac yoac dedzege anggec. <sup>24</sup> Ifi amma yeni kpegecdeac dema oda naguyau hadzing tofocnac gareng faiyunugec nangkecgec. Yeac dekiric anggec, imoc yengenaaru hau negenec. <sup>25</sup> Anu Sauro yoaraac uba merenggec, yeneng tofocnac ye uficfu barima oda titingau sing faigec ngadeau kemema kenec.

<sup>26</sup> Kemma Yerusarennu kensikema Yesuac habu yenearu torokpeudeac yoara deu yeni sasawango kengec anggec. Nga ye ubamereng fora anec, imoc mi negensinggec. <sup>27</sup> Anu Banabango Sauro mema aposoro yenearu hesicke kemma yofi edeyunuec, "Kebungo Sauro sinnu fingecmima yoac edeec. Ifi anu ye Damasko taonnu kengeha kpac Yesuac hania dekperagiec." <sup>28</sup> Anu Saurongo yenigoc Yerusarennu tacyac amma yoac kengeha kpac deede ayemmema kengha anec. <sup>29</sup> Amma Kebuac kpacfu serima namma ngic siduc gombung kengeha kpac, enacefac edeyunuec. Edeyunuu yudangic ngic grikyoac dekecgec, yenigoc Anutuac enacyoac denengengac amma yoacngina engemmama anec. Anu ngic imoc yeneng ye kpebeso anggec. <sup>30</sup> Ifi anggec Yesuac habu yeneng imoc negemma Kaisarea taonnu hesicke kemema faigec kengkecma Tarso taonnu kengsikeec.



<sup>31</sup> Anu kpebung Yudaia nga Gariraia amma Samaria bangecfu kegec, yenearu ruae fingerec. Fingeru ruaegoc kecma kpetengina kuneng amma sahema Kebu eweheimima ubango hoanggema afehegec. Anu Tiri Asungo ubaebicngina meickeec.

<sup>32</sup> Petoro ye amabangec tackende, imoc yerecgema kengkecma Yesuac kpetiac areng\* Rida taonnu kegec, yenearu kemesikeec. <sup>33</sup> Sikema ihai ngic mong henec, kpara Ainea, ye puring amma fefeu fekefu kifa 8 bic anec. <sup>34</sup> Nga Petorongo yofi edeec, "Ainea, Yesu Kristongo mengeregudeac yacma fefega geanggaoc mengerena." deu ye imohaingoc yacma nanec. <sup>35</sup> Ifi anu ngicngac Rida taong nga Sarong bangecfunacngo ye hemma ubangina meremma Kebuaru kenggec.

<sup>36</sup> Yope taonnu ubamereng ngac mong kefec, kpara Tabita, kpara grikyoac-fusing Dorkas. Yearu memefiac faka gombunga feecac makpekpea mefi-cyunuma kefec. <sup>37</sup> Anu naso imohai Tabita ye hafei fingecmiu homeec. Homeu yeni farenga kerec nadzicmima amamana monnu meemma faigec feec. <sup>38</sup> Nga Yope imoc Rida taong wegenac tarecac Yesuac habu yeni Petorongo Rida tacde, imoc negemma ngic yohockang sueyurugec yearu kemma yofi desambic ammima edeoc, "Ge naric nenearu bic habang me?"

<sup>39</sup> Deec Petoro ye negemma efaiu yerigoc kenggec. Kensikeu fareng feecfu hesicke enggec. Enu ngachodzec sasawa yeni oronggema kiacubamangang anggec. Nga Tabita gbori kecma ngakpikporuc kpebiyemmekefec, imoc edzahedacgec. <sup>40</sup> Edzahengec Petorongo sueyunuu kemedacgec fafoc heima numuec. Numuu wisickeu farenga feecfu dzigenema yofi edeec, "Tabita ge yacna." deu ye kiwa fima Petoro hemma yacma tarec. <sup>41</sup> Tacmanu Petorongo mariaui mema miaru yacma nanec. Nanu Yesuac kpetiac areng amma ngachodzec Tabita ghorima yarec, imoc hengecdeac kpacyunuec. Kpacyunuu hagec Tabita yarec, imoc edzacyunuec. <sup>42</sup> Nga yeni siduc imoc degec, imocngo Yope taonnu sokoma kenu homacngo Kebu negensingegec. <sup>43</sup> Nga Petorongo ngic mong kpara Simong, yamberec seberameme, yeac amau naso herea isoc tacyac anec.

## 10

<sup>1</sup> Kaisarea taonnu ngic mong kefec, kpara Konerio. Ye Itaria wasaiareng tosea, yenearunac ngic 100, yeneac kunengngina kefec. <sup>2</sup> Ye yengena nga arengfora sasawa, yeneng heregoc Anutuac songo negemma eweheimima kegec. Konerio ye ubangereac wiac homac ngicngac makpekpea yemmekefec amma Anutu wenasoc numumikefec.

<sup>3</sup> Konerio ye 3 kirocac ua memanu Anutuac angero mongngo ongau yearu fingecma edeec, "Konerio." <sup>4</sup> Ifi deu kpidothoma kengec kpeu kiwango ghong hensermanu deec, "Kebu noc wiac?" deu yeng deec, "Nunumuga nga ubangerecgaac wiac makpekpea yemmeanec, imoc sese isoc Anutuaru enu ye imocac negengngerekecde. <sup>5</sup> Imocac ge yaguc Yope taonnu ngic sueyununa kemma ngic mong kpara Simong, kpara mong Petoro, ye hesicke habisia. <sup>6</sup> Ye yamberec seberameme ngic mong kpara Simong, yeac amau kecde. Amea imoc kondung tegiau tacde."

<sup>7</sup> Angerongo yoac imoc edema kenu Konerio ye enac tofoc tofohongic yohockang nga wasaingckereng mong, ngic imoc heitaiyunuma yoac deu negenec. <sup>8</sup> Imoc ayemmedacma Yope taonnu sueyunuu kenggec.

\* 9:32: Yesuac kpacfu kopocsic deficgema mengadehedae, yeni Anutuac kicfu kpetiac andae.

<sup>9</sup> Ngic yeni kengkecma sinnu fegec ama wereckenu monggoc kengkecma ama mewegenebeso ammagec, Petorongo wenac dzongiau numuudeac ama witiau waranda isoc feec, ihai enec.\* <sup>10</sup> Emma yakaac homema deu yaka ohomagec Kebungo kiwa merecgeu faka yofi henec: <sup>11</sup> Kurumeng anggeu wiac mong henec. Imoc kporuc isoc tegia noboc noboc mema bangecfu faigec mama, ifi isoc anec. <sup>12</sup> Imocac manau yamberec amma nengboudzoc hania hania feec. <sup>13</sup> Mamanu yoac mong yofi fingerec, "Petoro ge yacma kpenec anna." <sup>14</sup> Ifi fingeru Petorongo yofi deec, "Kebu imoc naric kpac, ni wiac wonongagoc nga Kebungo kpaie faie, imoc mong mi neai nga naric mi nebade." <sup>15</sup> Ifi deu atac yohockang anu deec, "Anutungo kpaie imoc heickede, imocac ge wonongagoc mi dena." <sup>16</sup> Nga faka imoc fingeru atac harebec anu imohaingoc kporuhagoc kpedziu kurumennu monggoc enec.

<sup>17</sup> Enu Petoro ye onga henec, imocac negengfagung amma tacmanu Konerio ngicfora yeni Yope taonnu sikema Simonggac amaac kpesi kpesi kengkecma odanaguyau namma <sup>18</sup> kpachofoc amma kpesigec, "Simong kpara mong Petoro, ye ama yei kecde me?" <sup>19</sup> Nga Petorongo onga henecac negengfagung amma kecmanu Asungo yofi edeec, "Negenec, ngic harebec yeni hama ge hofocgudae. <sup>20</sup> Imocac ge yacma kemema yenigoc kembesonga dema negengyohoc mi ambesena. Ngic imoc yeni neng sueyunuba hadae."

<sup>21</sup> Ifi deu Petorongo yenearu kemema deec, "Ngic hofocdau ni yomocnoc, ngeni dafiai hadae?" <sup>22</sup> Ifi deu ngic yeneng yofi degec, "Wasaingic gareng Konerio ye Anutu eweheimima faka gombunga modackecde. Nga yudangic sasawa yeni yeac negenggec ngereeeande, yenoc angero kpetiac mongngo fingecmima ameau heitaiyuma enacgaunac yoac negenudeac edeec." <sup>23</sup> Ifi degec Petorongo amau heitaiyunuma edoc bedoc ayemmeu fegec.

Fema wereckengau yacma ye nga ngic imoc yeni kembeso anggec Yesuac habuunac goa Yope kecgec, yeni yenhafoc kenggec. <sup>24</sup> Yeni sinnu tofocnac mong fema ama wereckenu yacma kengkecma Kaisarea kensikegec. Konerio ye arengfora amma tosofora heitaiyunuu tomai kecmagec kensikegec. <sup>25</sup> Kemma Petorongo amau embesonga ammanu Koneriongo hama hoangau fafoc heima numumiec. <sup>26</sup> Numumi Petorongo mema miacma yofi edeec, "Yacna ni ngicogogangoc."

<sup>27</sup> Ifi denegeng amma ye ama manau emma ngic kpedzucnema tacgec, yenemma yofi edeyunuec. <sup>28</sup> "Ngeni yudangic neneac faka negendae. Neni bangec monnunac ngic ngenigoc ogo nga engemma kekec ifi mi annideac kpaeyoac seria fede. Ni ine ngeni ngic wonongnginagoc dema desusuic mi dengemmebadeac Anutungo imoc edeedzacnu anec. <sup>29</sup> Imocacnoc heitainugec haba dema mi obohoai. Anu yoc heitainudae, imocac hania degec negemba."

<sup>30</sup> Ifi deu Koneriongo yofi edeec, "Uameme 4 bic wisickemanu marai 3 kirocac ua memanu numubare ngic mong ngakpia kperagiagocngo nearu fingecma <sup>31</sup> yofi edenuc, 'Konerio negenna, Anutungo nunumuga nga ubangerecgaac wiac makpekpea yemmeannec, imocac negengngereede. <sup>32</sup> Imocac ge Yope taonnu ngic sueyununa Simong kpara mong Petoro, ye hesicke habisia. Yeng yamberec seberameme Simong, yeac amau kecde. Amea imoc kondung tegiau tacde.' <sup>33</sup> Yoac ifi deu ni imocacnoc gereagoc sueyunuba gearu hadau. Hagec geng yoacna negemma hanecac naric ande.

\* **10:9:** Israe ngic yeni amangina sirihha dafi megec imoc ongau hafac 247nu fede.

Nga Kebungo yoa edeguec, imoc seng dena negennideac Anutuac kicfu nenahafoc kpedzucnema tacdimbe.”

<sup>34</sup> Ifi deu Petorongo enacefac amma yofi edeyunuec, “Anutungo ngicngac isinnunuma monggac songo negemma mong mi waude, imoc foracngoc negentegecyombonggeduae. <sup>35</sup> Ngic bangeha bangeha eweheimima angammeme dindingac angkecdae, yeneac negenu ngereeande. <sup>36</sup> Foracngoc, Anutungo Yesu Kristo mocgu, ngic sasawa nenang Kebunoc sueu maec. Yeng ruae yoa gombung israe ngicngac nenearu deficgenemmeec, imoc ngeni negendae. <sup>37</sup> Amma Gariraia bangecfu hanahema wiac fingecma Yudaia bangec sokoma kenec, imoc ngeni negendae. Imoc yofi: Yohane ye ngic dokunadzicac yoa edeyunuec. <sup>38</sup> Anu Anutungo Yesu Nadzaretenc kuc nga Tiri Asu faimiu yeng bangec yerecgema kengha amma ngic meficyunuma memereyunukefec nga mangana minginaac kucngo ngicngac kekecngina mengenganedarec, yeni mengereyunudarec. Anutungo nonggo tacmimanu yeng ua imoc meec.

<sup>39</sup> Anu Yesungo yudangic neneac bangecfu nga Yerusarennu ua meec, imoc hennegeng andaring. Ifi amma kecmanu yeni ye mariponnu kpegec homeec. <sup>40</sup> Homema femanu wenac harebec anu Anutungo ye megboriu yacma ngicngac fingecyemmeu hengec. <sup>41</sup> Ngicngac sasawa yenearu mi fingerec, kpac. Anutungo waracngoc siducedefora meisinnunuec, nenearusac fingerec. Ye homecfunac yaru neninoc nenedoku yegoc neing. <sup>42</sup> Nga Anutungo ngic yenoc ngic gbori nga homemea angammemenina desiudeac gununggeec, yoa imocac hepuc amma ngichabu gorongina kpema desaheyemmenideac denemmeec. <sup>43</sup> Anu profete sasawa yeneng yeaenoc hepuc amma yoa yofi degec, ‘Ye negensinggegecde, yeni yeaec kpacfu kopocsingina kpac anude.’”

<sup>44</sup> Petoro ye yoa ifi dema nammanungoc negemma tacgec Tiri Asungo yenearu mama ubangina wakeec. <sup>45</sup> Wakeu ngic sebi tosangina herec herecgeango Yesu negensinggegec nga Petorogoc kenggec, yeni Tiri Asungo wosoefahaac kuc bangec monnunac ngicngac, yenearu ifingoc faiyemmeu <sup>46</sup> nedzarangyoa dema Anutu dengerema deafehe ammigecc, yeni imoc negemma kerectegec anggec. Ifi anggec Petorongo yofi deec, <sup>47</sup> “Nenang Tiri Asugoc aning, faka imoc ngic yomoc ifingoc fingecyemmeu mitidoku naric mi segereyemmesongna.” <sup>48</sup> Ifi dema yeni Yesu Kristoac kpacfu doku nadzicgecdeac deyemmeec. Nga yenigoc uameme goa tarudeac edegec.

## 11

<sup>1</sup> Aposoro goa nga Yesuac habu Yudaia bangecfu kegec, yeni bangec monnuc ngicngoc Anutuac yoa negenguba anggec, imocac siduc negenggec.

<sup>2</sup> Nga Petorongo Yerusarennu dzigene kenu sebi tosangina herec herecgea, yeneng dehou ammima <sup>3</sup> yofi edegec, “Ge nocac sebi tosangina mi herec herecgea, yeneac amau emma yenigoc yaka nedang?”

<sup>4</sup> Ifi degec Petorongo faka haniaunacngoc fingecereec, imoc edeyunuec.

<sup>5</sup> “Ni Yope taonnu numuma kecbare kicna merecgeu onga mong yofi henai: Wiac mong kporuc kuneng isocngo tegia noboc noboc menamma kurumenunac nearu faigec maec, ifi isoc anec. <sup>6</sup> Mau hereema kperirickema yofi henai, yamberec kuneng kapia nga goa enacnginagoc amma nengboudzoc hania hania feec. <sup>7</sup> Ifi yenembare nearu kpakpac yofi fingerec, ‘Ge yacma kpenec anna.’ <sup>8</sup> Ifi deu yofi deai, ‘Kebu imoc naric kpac. Ni wiac wonongagoc

nga Kebungo wiac mong kpae faiec, imoc enacna mi kpesereecfu mi kpesereude.’<sup>9</sup> Ifi deba kurumennunac yoc mong fingeru atac yohockang anec, ‘Anutungo kpae imoc meickede, imoc wonongagoc mi debesena.’<sup>10</sup> Faka imoc fingeru atac harebec anu iwai imoc kporuhagoc monggoc kpedziu kurumennu enec.

<sup>11</sup> Anu negenggec, naso imohaingoc Kaisarea taonnunac ngic harebec sueyunugec nearu hama ama kefai, ihai nammaggec<sup>12</sup> Asungo yofi edenuc, ‘Ge yenigoc kembeso dema negengyohoc mi ambesena.’

Ifi deu kamba negen negensinggoc tosofocna 6 yomoc, yeneng modacnugec kemma wasaingicgareng yeac amau ening.<sup>13</sup> Enni yeng yoacsiduc yofi anemmeer, ‘Neac amau angero monggo fingecnemma yofi edenuc, “Ge Yope amau ngic sueyununa kemma Simong kpapa mong Petoro, ye hesicke hagec.<sup>14</sup> Yeng yoac edeguu ge nga arengfocga ngeni yoac imoc negemma hoanggema komoc kpegecde.”’

<sup>15</sup> Anu ni siduc gombung edeyunubare warac nenannu Tiri Asu maec, ifi isocngoc yenearu madac.<sup>16</sup> Ni imoc hemma Kebungo yoac yofi deec, imoc negensiai, ‘Yohane ye doku nadzicngemmeer, yoc ine Tiri Asu nadzicngemmeude.’<sup>17</sup> Nga nenang Kebu Yesu Kristo negensinggemina Anutungo wosoefahaac kuc nemmeer, yeng ine wosoefahaac kuc siriha imocngoc yemmu ni ifiango Anutu naric mi kpetarimibade.”

<sup>18</sup> Petorongo ifi dema edeyunuu yeni negemma ubangina kuha mau Anutu afehema yofi degec, “Foracngoc, Anutungo bangec monnunac ngicngac ubangina meremma kekecseriac fora anggecdeac ifinoc ande.”

<sup>19</sup> Ngicngac yeni Stefano kpema Yesuac habu goa yenhafoc yunukporac ayemmegec ticpac tehema goango Foiniki bangecfu nga Kipiro nucfu amma Antiokia taonnungoc kensikegec. Kemma kecma yudangicsac siduc gombung dekperagiyemmegec.<sup>20</sup> Anu Yesuac habu botucnginau ngicngac Kipiro nucfunac nga Kirene bangecfunac kegec, yeni Antiokia taonnu hama grukngic yenigoc ifingoc denegeng amma Kebu Yesuac siduc gombung dekperagiyemmegec.<sup>21</sup> Dekperagiyemmegec Kebungo kuc yemmu ngicngac habutoa yeni negensinggema ubangina Kebuaru faigec.

<sup>22</sup> Imocac yoacsiduc kpebung Yerusarennu kegec, yeneac kedzacfu kemmu yeni imoc negemma Banaba suegec Antiokia amau kenec.<sup>23</sup> Kensikema Anutungo danggunuc uaya bic meficgeec, ye imoc hemma ubangerec negemma ubanginango Kebuaru heiserigecdeac demeefai ayemmeec.<sup>24</sup> Ye ngic gombunga amma ye ubeau Tiri Asu nga negen negensing wake wakea femiu ngicngac homacngo imoc hemma Kebuaru torokpegec.

<sup>25</sup> Nga Banabango Sauro hofocma meficgeudeac Tarso kenec.<sup>26</sup> Kemma meficgema hesickeu Antiokia taonnu hama kpebung yenigoc kifa mocgu kecma ngic homac Anutuac enacyoac edekpou ayemmeec. Nga Antiokia amau hanahema ngicngo Yesuac habu, yeneac kpac Kristoac ngic deficgemyemmegec.

<sup>27</sup> Naso imohai profetengic goa Yerusarennac Antiokia taonnu magec.<sup>28</sup> Yenearunac tosongina mong kpapa Agabo. Asungo kpefing edeu yeng yacma bangecsoc boditua fingerudeac deficgec. Nga bodi imoc Roma ngictau Sisa Kraudic kecmanu naso imohai fingerec.<sup>29</sup> Fingeru Yesuac habu yeni yoac imoc negemma Yudaia bangecfu negen negensinggoc tosofocngina kegec meficyunugecdeac hiedzo feyemmeecsoc kpeturanggema yenearu faigec kenudeac deserigec.<sup>30</sup> Deserima hiedzo meficgegec, imoc

Banaba nga Sauro yemecgec yeri imoc mekemma Yesuac habu Yerusarennu enarafocngina kecgec, yeni yemmegec.

## 12

<sup>1</sup> Naso imohai ngictau Herodengo kpebung kecgec, yenearunac ngicngac goa yunuma memanganeyunuudeac negemma mendangyunuma witicamau faiyunuec. Ifi ayemmema ngade yoacfu faiyunuma ngaba ayemmema yunubeso negenec. <sup>2</sup> Amma yeng deu Yohane dara Yakobo wasaibeangngo kpehomegec. <sup>3</sup> Ifi anu yudangic yeni songo negenggec nga yeng yenemma ic sogong yisya kpac nene, imocac tacyacnasou deu Petoro ifingoc mendanggema witicamau faigec. <sup>4</sup> Ye makekenggac tacyacnasou wisickeu Petoro\* yudangic yeneac kicfu yoacfu faiudeac negensima deu witicamau faiec. Faima wasaingic 16 yengeng areng 4 nga 4 hendzicma namma garenggec. <sup>5</sup> Ifi anggec Petoro ye witicamau tacmanu kpebung yeni tatahoc Anutuaru numukegec.

<sup>6</sup> Anu Herodengo ama wereckenu Petoro yoacfu faiudeac deec, naso imoc wegenemanu tofocnac imohaingoc wasaingic yohockang yereng Petoro seng yohockangngo yeranggoc witicckema faiec botucngirau feec. Femagec wasai goa yeni nagu ngadeau gareng nanggec. <sup>7</sup> Yeni ama manau ifi fegeg Kebuac angero mongngo hama ihai nanu amamana imoc kperagidarec. Kperagi angerongo Petoro pandzengau kpeserema midima deec, "Ge bic yacna." demanu seng imohaingoc Petoroac mariaunac fotockema mau <sup>8</sup> angerongo deec, "Ge fadengga dzegema hanitabega heina kemeu." Dema angerongo monggoc edeec, "Ngakpiga herea heina kemeu modacnuna." <sup>9</sup> Ifi deu Petorongo yacma angero modacma kenec. Kemma angerongo faka yearu meec, imocac negenu onga isoc anec. <sup>10</sup> Nga yeri nagu yohockanggac gareng nanggec, imoc feracyunuma kemma aieng nagutoa taonggac kiwau-geng mewegenemaec, imoc yengenaoc anggeu kemeoc. Kemma sinnu kemma angero ye ioha aockeec.

<sup>11</sup> Ifi anu Petoro ye negen negenga sariu yofi deec, "Yaguc negentegecduae, Kebungo angeroya sueu Herodeac mariunac nga yudangic yeneac herebunac mesinude." <sup>12</sup> Ifi negentegecma kemma Yohane Marekoac nonggea kpara Maria, yeac amau sikeec. Ihai homacngoc kpeturanggema numuma tacgec. <sup>13</sup> Tacmagec Petorongo ama naguyau namma nagu heiu uanaroang mong kpara Rode, yeng imoc negemma mama <sup>14</sup> Petorongo yoac deu ubea negemma nagu mi witiwiti, eng sogaima ama manau emma, "Petoro ye hadac nagu nande." dema edeyunuec. <sup>15</sup> Edeyunuu yeni negemma degec, "Ubagasufude me?" degec, yeng serima deec, "Fora yombong, yeng nande." deu yeneng degec, "Imoc angeroyango gedang."

<sup>16</sup> Nga Petoro ye heimangoc nammanu yeni nagu witima yengena hemma kpidohogec. <sup>17</sup> Kpidohogec yeng maribarac tuema deracyunudacma Kebungo witicamaunac yungeru maec, imocac yoacsiduc ayemmema deec, "Ngeni siducna yomoc Yakobo nga negen negensinggoc tosofocnina edeyunugec." Ifi dema meickema monnu kenec.

<sup>18</sup> Ama wereckenu wasaingic yeni Petoro hofocma degec, "Ye dafiu aockedac?" dema kpidohoma oboc kpboc yombong anggec <sup>19</sup> Herodengo meficgegecdeac deu hofocbibiegec. Hofocbibiegec dekpesi ayemmu kpac

\* **12:4:** Ge Makekeng nadung 12 nga 13 imohai osoma negentegecna. Ihai tacyac yohockanggac hania dekperackperagia fede.

anu wasai yeneng nagugareng imoc yunuhomegecdeac desiec. Desiyunuma Yudaia bangec wama Kaisarea kemema kefec.

<sup>20</sup> Herodengo Tiro nga Sidonggac ngicngac herebu meficgeyemmekefec. Imoc yofiac, yeni nenesemengngina Herodeac bangecfunac megecac amma yeni kpedzucnema yearu hama ngaba kpac anu ruae fingerudeac kpesimigec. Yeni warac Herodeac ngickereng mong kpara Birasto, ye Herodeac gaufefe amea garenggema kefec, yearu kemma yeng yenigoc kefudeac dengombong ammigec. <sup>21</sup> Herodengo yocac imoc negemma imocac turunga merengyemmeudeac naso edeyunuec. Naso imohai ye ngictau ngakpia heima ngictautatahau matacma urecyoacngina edeyunuec. <sup>22</sup> Edeyunuu ngic yeni sasawango horianggemima yofi degec, “Yocac imoc ngicyoac kpac, imoc Anutuac yocac.” <sup>23</sup> Anu ye Anutu mi afeheecac amma naso imohaingoc Kebuac angerongo Herode kpeu kamango kigec homeec. <sup>24</sup> Homemanu Anutuac yocacngo yadima kenec.

<sup>25</sup> Anu Banaba nga Sauro Yerusarennu sueyurugec, yeri ua imoc medarec wisickeu dzigene Antiokia keneceac Yohane kpara mong Mareko hesickeec yenhafoc kengec.

## 13

<sup>1</sup> Kpebung Antiokia kegec, yeneac botucfu profete nga kpoukpou yofingo kegec: Banaba nga Simong, kpara mong Nige, Rukeo Kirene amaunac nga Sauro amma Manaeng.\* <sup>2</sup> Anu yeni naso monnu yakasege kecma Kebu afehegecdeac kpedzucnema kegec Tiri Asungo yocac yofi edeyunuec, “Banaba nga Sauro yeri neac ua meecdeac kpacyuruma ua yemerai, ngeni imoc meecdeac desiyecmegec.” <sup>3</sup> Ifi deu yeni yakasege kecma maringina sebingirau faima numukenehe ayecmema faiyurugec kenoc.

<sup>4</sup> Tiri Asungo ifi dema sueyuruu yeri Sereukia taonnu kemeoc. Ihai sikema kporucwageu emma kengkecma Kipiro nucfu enoc. <sup>5</sup> Emma Sarami taong ihai kemma yudangic yeneac kpeppeturang amangina tackenecoc, ihai emma Anutuac yocac deireckeyemmekenoc. Kenec Yohanengo yerigoc yenhafoc kecma meficyuruec.

<sup>6</sup> Anu nuc imohai hanising ferecge kengkecma Pafu amau kenggec. Ihai kensikema yudangic mong bangecac hadehadegoc nga profete ikoha kefec kpara Bara Yesu, ye meficgegec. <sup>7</sup> Ngic yeac tosoya kia mong kpara Sergio Pauro. Kia imoc ye negen negengtoayagoc nga Anutuac yocac negembesonga ammiu Banaba nga Sauro kpacyuruec. <sup>8</sup> Kpacyuruu Erima, ngic bangecac hadehadegoc,† yeng yereac yocac mefahema kiango Yesu negensinggebac deraheec.

<sup>9</sup> Ifi anu Tiri Asungo Sauro, kpara mong Pauro ubeau wakeu Erima kiwango henseriserima yofi edec, <sup>10</sup> “Mangana minginaac medac, ge Kebuac sing dindingac fekende, imocac ngaba seria amma kecna ubagau ikoc nga manganango wake wakea. Ge Kebuac sing dindingac femanu mengbaranggekecne nasoherec ifi kecma faka imoc mi wanec. <sup>11</sup> Imocac yaguc Kebuac kuc gearu fingeru hembesena. Kicga kundung kpeu naso botuc yomoc wenac kperagia mi heheng kecbesena.” Ifi deu imohaingoc wiac hoeng hoeng isocngo kiwa sangoheu kiwa kundung kpeu mariango meang kpeang amma mariaua megecdeac deec. <sup>12</sup> Faka imoc fingeru kiango hemma Kebuac siduc gombung kpoumigeac, imocac negenu engena anec.

\* **13:1:** Ngickereng Herodeac nonggomama yereng Manaeng heibeging ammima mekefec yadiec.

† **13:8:** Kpac imoc titiha bangecac hadehadegoc.

<sup>13</sup> Pauro nga ngicfora yeni Pafo taong wama wageu monggoc emma kengkecma Pamfria bangecfu Perege taonnu kensikegec. Kensikegec Yohanengo ihai wayunuma Yerusarennu dzigeneec. <sup>14</sup> Dzigeneu yeni Perege wama kengkecma Pisidia bangecfu Antiokia taong waseau, ihai kensikegec. Ihai kecmagec sabata naso anu yeni yudangic yeneac kpeketurang amau emma tacgec. <sup>15</sup> Tacgec gareng yeneng Anutuac dedeseriyoac nga profete yeneac yoackibi goa oso wisickema yofi edeyunugec, "Tosohocnina ngereng Anutuac enacyoac mong negendape isoc demeseri anemmeec negenni."

<sup>16</sup> Ifi degec Paurongo yacma waickema tadcacgecdeac maribarac kpouyemmema yofi edeyunuec, "Israengicngac, ngeni nga habu goa Anutu eweheimiandae, ngeni edengunuba negenggec: <sup>17</sup> Israengicngac nenang Anutungo kisicfocnina meisingyunuu yeni Aigita bangecfu kuric kecma sahegec. Amma ye kuctoayango imohacnac hesicyunu hama <sup>18</sup> bangec kisiu hocsiragocfu faiyunuma yenenggareng ayemmeec. Yenenggareng amma mebibieyunuma kecmanu kifa 40 wisickeec. <sup>19</sup> Wisickeu yeng Kanaang bangecfu amabangec seweng kpedzongyunuma kisicfocnina bangec imoc yemmu minginasoc amma kecmagec kifa 450 wisickeec.

<sup>20</sup> Wisickeu Kanaang bangecfu kecmagec yeng dedesingic meficyunuu keceremagec profete Samue fingerec. <sup>21</sup> 'Ngictaunina mong fingeru.' degec Anutungo Benyaminggac arenunac Kisi medaha kpara Sauro, ye meficgemyemmu kifa 40 enaramemengina amma kefec. <sup>22</sup> Kecmanu ye meickema ngictaungina Dawidi faiec. Amma yeac hania yofi dekperagiec, 'Ni Dawidi, Isaiac medac yeac ubana ngereeu ye hengising ammiac. Yennoc enac tofoc tofohona kefude.' "

*(Mitiyegec 89:20; Yesaia 13:14)*

<sup>23</sup> "Anu yoac yofi dedea fede, 'Dawidi arengfora yeneanunac israengicngac nenang kopocsicac ebicfunac mesinunuudeac ngic mong fingerude.' Anutungo imoc deserinemmeec, imocac fora fingerec nga imoc Yesunoc. <sup>24</sup> Anu Yohanengo ngic botucfu mi fingectegecma kecmanu israengicngac sasawa ubangina dzigeneu mitidoku nadzicgecdeac edeyunuec. <sup>25</sup> Edeyunuma uaya mesiu wisickebeso ammanu yofi edeyunuec, 'Ngeni ngic negennuandae, ni ye kpac. Negenggec, neac ngadeu hade, ye engenatua nga ni ifianggo yeac hanitabe witiha yungecma mi ngereeu de.'

<sup>26</sup> Tosofocna, Abrahanggac bangecfora nga habu goa Anutu eweheimiandae, ngeni yoacna deba negenggec, kopocsicac ebicfunac mesi mesiac sing fede nga komoc kpeni, yoac imoc nenannu faiec fede. <sup>27</sup> Nga Yerusareng ngic engena mamea, yeneng Yesu mi hentegecma ye kpegecdeac desigec. Yoacfu ifi faima desigec nga sabata tatac nasosoc profete yeneac kpefingyoac osonegeng angandimbe, imoc seriec. <sup>28</sup> Foracngoc, yeni Yesuac kopocsic hofocbibieama eng hodzinggema Piratoac mariu faigec, yeng desiu kpehomegecdeac degec. <sup>29</sup> Anu mitikibiu yoacsiduha oho ohoya fede, yeni imoc ammidacma mariponnunac mesima kicsereu mekenggec. Yeni mekemma kedzebe ngicngo miac miackeau sinegec emma feec. <sup>30</sup> Feu Anutungo ine homecfunac megboriu yarec. <sup>31</sup> Yacma ye ngicngac yegoc Gariraia bangecfunac Yerusareng taonnu yenhafoc kenggec, yeni uameme homac fingecyemmeec. Fingecyemmu henggec, yenennoc siducededefora anggec kecdae.

<sup>32</sup> Anu Antungo bangecfocnina hanahema wiac yemmeudeac deseriyemmeec, <sup>33</sup> imoc Yesu megboriu nambaracfocngina nenannu fora fingeru



imocac siduc gombung edengunuandimbe. Imocacnoc Mitiyegec nadung yohockang, imohai yoac yofi oho ohoya fede,

‘Ni yagucnoc megudua. Ge medacna nga ni geac Mangga.’ *(Mitiyegec 2:7)*

<sup>34</sup> Yeng Yesu megboriu yarec nga ye ngade homehome nga hoachoe imoc yearu monggoc mi fingerude. Yoac imocac Anutungo yofi deec,

‘Ni Dawidigoc dzahacemeic, imocac fora kenec kenehe kpetiac ngemmebade.’ *(Yesaia 55:3)*

<sup>35</sup> Amma Mitiyegec monnu yoac yofi fede,

‘Ge kpetiac ngicga onggongena ye mi hoabeso.’ *(Mitiyegec 16:10)*

<sup>36</sup> Dawidiac yofi negendimbe, Anutungo ye ua demiec, imoc ngicfora yenearu mesima homeec. Homeu esangabofora faiyunugec, ihaingoc tonggogec hoama kpac anec. <sup>37</sup> Anu Anutungo ngic megboriec, yeng ine hoac hoaea kpac.

<sup>38</sup> Tosofocna yofi edengunuba negenggec: Kopocsic dzuac dzuac, imoc ngic yennoc meficgeec, dedekperagi yoac imocngo ngenearu haec. <sup>39</sup> Nga Moseac dedeseriyoacngo kopocsicngina naric mi dzuarec. Nga Yesu negensinggec kopocsicngina dzuaru kpac anude, imoc ine fede. <sup>40</sup> Profete yeneng yoac yofi degec, imoc ngenearu seribacac nono edengunuduae.

<sup>41</sup> ‘Ngicngac ngeni defagoc angkecdae henggec. Ni naso imohai faka morora meba ngeni imoc hengkipidoc amma hofeu kemegecde. Ngic mongngo edengunuu imoc naric mi negensinggebau.’ ” *(Habakuc 1:5)*

<sup>42</sup> Ifi deu Pauro nga Banaba yeri kpeketurang amaunac mamaec ngic yeneng sabata tatac naso monggac yoac imocacngoc edeyunuecdeac derecgeyemegec. <sup>43</sup> Tutumang wisickeu mama yudangic nga bangec monnunac ngic homacngo yudangic yenearu torokpema kecgec, yeni yenahafocngoc Pauro nga Banaba modacyurugec Anutuac wosoefahaac arennu seria kecgecdeac demeseri ayemmeoc.

<sup>44</sup> Nga sabata tatac nasongina monggoc anu taong imocac ngicngac yeni Anutuac yoac negenggecdeac ebiriango sikegec. <sup>45</sup> Sikegec yudangic yeneng yenemma Pauro nga Banaba keracmangang ayecmegec Paurongo yoac deu yeneng yegoc yoacngina engemmama anu yoara kpema desusuic ammigec.

<sup>46</sup> Ifi anggec Pauro nga Banaba yeri yoac kucgoc kengeha kpac yofi edeyunuoc, “Hanahema yudangic ngeni Anutuac yoac dekperagingemebesonga. Yaguc ngeni ngenaoc wama kekecseriac areng mi ambeso dedaeac neni wangunuma bangec monnunac ngicngac, yenearu kennide.

<sup>47</sup> Kebungo yofi denemmeec,

‘Neng ge bangec monnunac ngicngac, yeneac kifa faiguba geng ngicngac kopocsicac ebicfunac mesiyununa dema ge ua imoc gamba mekengkecma bangec tegiau mekemma ebicfunac mesiyununa komoc kpegecde.’ ” *(Yesaia 49:6)*

<sup>48</sup> Ifi degec bangec monnunac ngicngac, yeneng imoc negemma ubangina ngereu Kebuac yoacac dedengerec anggec. Nga kekec wisic wisickeu kpac, imocac areng anggecdeac Anutungo negengyemmeecsoc, yeni Kebu negensinggec. <sup>49</sup> Nga amabangec ihai Kebuac yoacngo wakema kenec.

<sup>50</sup> Taong imocac ngac kuneng goa yeni yudangic yenearu torokpema kecgec. Yudangic yeni amagareng nga ngac imoc wosoumeme ayemmema

meyunu kemma Pauro nga Banaba yurukporac ayecmema amabangecngina segerema kisangyurugec kenoc. <sup>51</sup> Kemma fakanginaac amma haningiraunac yube kpefanggeec mau wayunuma Ikoniong taonnu kenoc. <sup>52</sup> Nga Yesuac habu yeneac ubau songo kuneng nga Tiri Asu wake wakea finge-cyemme kenec.

## 14

<sup>1</sup> Yeri Ikoniong taonnu sikema ihai ifingoc yudangic yeneac kpekpeturang amau emma siduc gombang kuhagoc deireckeyemmeoc. Imocac yudangic nga grikgic homacngo Yesu negensinggegec. <sup>2</sup> Yudangic goa yeneng ine yoac imoc wama bangec monnunac ngic Anutu mi negensigec, yeni fenggeyunugec negen negensinggoc tosofocnina herebu negengyemmegec. <sup>3</sup> Negengyemmegec yeri serima naso herea taong ihai kecma kengha kpac Kebuac yoac kuhagoc dekefoc. Ammanu Kebu danggunuhaac yoac meseriudeac yengenaoc nonggo tacyecmemanu yeri negensinggegecdeac faka kuhagoc nga faka mi hehena homac mema kefoc.

<sup>4</sup> Ifi anec taong imocac ngic tohoma goa yudangic yenearu kenggec nga goa aposoro yerearu kenggec. <sup>5</sup> Nga bangec monnunac ngic nga yudangic goa yeni garengfocnginagoc aposoro mangana ayecmema hocngo yereregcedac yoac dzegegec. <sup>6</sup> Dzegegec yeri imoc negemna worama Rikaonia bangecfu kenoc. Kemma ihai Ristera nga Derebe nga amabangec goa wegenac tarecfu <sup>7</sup> siduc gombang dekperagiyemme kenoc.

<sup>8</sup> Ristera taonnu ngic mong tarec, ye hanihora mangac manganea. Ye nonggo heremanaunac ifia fingeema kenghaya kpac eng takefec. <sup>9</sup> Tackefu Paurongo siduc gombang edeyunuu ngic ye negemna tacmanu yearu kic dindingac fima haniaya yofi negenec, "Ngic imoc ye ngerec ngereac negen negensing femidenoc." <sup>10</sup> Ifi negemna yoac kuhagoc yofi edeec, "Ge yacma hongngoc nanna." ifi deu ngic ye poratacke yacma kengha anec.

<sup>11</sup> Anu ngic habutoa yeneng Paurongo faka meec, imoc hemma kucgoc kpacma Rikaonia yoacnginau sing yofi degec, "Nemu yeneng ngicsebi mema botucninau magec kecdac." <sup>12</sup> Amma yeni Banaba ye nemu mong kpara Dia, ifi degec nga Pauro ye yoac dederecgeac ngic, imocac amma nemu mong kpara Hermes, ifi degec. <sup>13</sup> Nga nemu Dia yeac sesememengicngo deu yeni burumaka ngiwa goa nga dzundzaring taong tegiau odanaguyau mekemema ngihoc yereac eweheima hosuc heibeso angec.

<sup>14</sup> Ammagec aposoro yeri imoc negemna ubaebic mema ngakpingira merecgema amangira wama bic habu yeneac botucfu kemma yofi arohooc, <sup>15</sup> "Yei, ngicngac ngeni noc andae? Neri ngic ngeni isoc, ngeneac siric. Ngeni nemungina kucmama kecdac, yeni ngadeyunuma Anutu kekehagoc mewegenegecdeac siduc gombang dekperagingemmekecdipe. Yeng wiac sasawa bangecfu nga kurumennu nga kondunnu fedacde, imoc mificgedarec.

<sup>16</sup> Ngicngac warac kecgec, naso imohai bangec monnunac ngicngac negengyemmemanu yeni ubanginaac nga kekecnginaac songo hania hania, imocac kpaea mi faiyemmemanu yeni keceregec. <sup>17</sup> Keceregec ihoc bahoc mong mi angemmeec, kpac. Ye haniaya negenggecdeac ubangerec angem-mema deu kiawenac sawaunac nasoyau fingeckecde. Nga ye nenese-meng nasoyau deu fingeru yekangina homac mificgengemmeu songo witiau kecdac." <sup>18</sup> Ngihoc yereng yoac ifi gadzea mema yoac ua ebiringoc mekecma dekpetari ayemmeec yereac hosucheihei imoc wagec.

<sup>19</sup> Yeri ihai kecmaec yudangic Antiokia nga Ikoniong taonnunac sikema yereac ua desakoigec. Desakoima ngicngac wangecyunugec, yenhafoc Pauro hocngo heigec. Heima negengec, “Ye bic homedac.” ifi dema ama ngadeau taikema faigec feec. <sup>20</sup> Femanu Yesuac habu yeneng hama ornggema memidi ammigec gborima yacma amau enec. Nga wereckengau ye Banabagoc Derebe taonnu kenoc.

<sup>21</sup> Yeri kemma ihai siduc gombung dekperagiyemmeec ngic homacngo Yesu negensingegec. Ifi amma sing kenocfu, ihai monggoc dzigenema Ristera nga Ikoniong amma Antiokia taonnu tacyac hakefoc. <sup>22</sup> Hakecma amasoc sikema Yesuac habu negen negensingina kpedzucnema kecgecdeac demeseri ayemmema yofi edeyunuoc, “Nenang Anutuac eucererenu enideac kpendzeng hania hania fingecnemmeu imocac witiau kecbisina.” <sup>23</sup> Amma kpebung taong mocgu mocgu kecgec, yeneac enarafocngina meisinyunugec. Nga ngicngac Yesu negensingegec, yeneac amma yakasege amma numuma kenecyunuma Kebuac hoannu faiyunuoc.

<sup>24</sup> Nga yeri Pisidia bangec ferecgema kengkecma Pamfiria bangec fu kenoc. <sup>25</sup> Ihai kemma Perege taonnu yoac edeyunuma Ataria taonnu kemeoc. <sup>26</sup> Kemema kporucwageu emma kengkecma Antiokia dzigeneoc. Taong imohainoc Yesuac habu yeri warac Kebuac kenecfu faiyuruma ua deyecmegec, imohai sikema mesioc. <sup>27</sup> Ihai hasikema kpebung kpedzucyunuma Anutungo nonggo tayecmemanu ua sasawa meoc amma bangec monnunac ngicngac, yenearu ua nagu mong meyecmeu Yesu negensingegec, imoc edeyunudaroc. <sup>28</sup> Amma yeri naso hereangoc Yesuac habu yeneac botucfu kefoc.

## 15

<sup>1</sup> Yudaia bangec funac ngic goa yeni Antiokia taonnu kemema Yesuac habu yofi kpouyemmegec, “Ngeni Moseac yoacfu sebi tosangina mi herecgema komoc naric mi kpegecde.” <sup>2</sup> Ifi degec Pauro nga Banaba yerigoc yoacngina engemmama anu uba mocgu mi anggec. Ifi angkecma yeni aposoro nga Yerusarennu habu enarafocngina yenigoc yoac imoc dengeregecdeac Pauro nga Banaba amma ngic goa meisinyunuma Yerusarennu sueyunugec kenggec. <sup>3</sup> Nga kpebung yeneng singgac wiac yemmema sueyunugec kenggec. Kemma Foinike nga Samaria bangec kensikema Yesuac habu ihai kecgec, yeni yofi edeyunugec, “Bangec monnunac ngicngac homacngo ubamereng anggec.” Ifi degec, yeni imoc negemma ubangerec kuneng negenggec. <sup>4</sup> Nga yeni kengkecma Yerusarennu kensikegec. Kensikema kpebung nga aposoro amma Yerusareng kpebung enarafocngina, yeneng ama heiyemmegec. Heiyemmegec, yeni Anutungo nonggo tacyemmemanu misingua megec fora fingerec, imocac siduc meyemmegec. <sup>5</sup> Meyemmegec farisaioac mitiarennunac goango Yesu negensingegec, yenearu goa yacma yofi degec, “Bangec monnunac ngic yeni sebi tosangina herecgebesonga amma Moseac dedeseriyoac tofohogecdeac demeseri ayemmebesonga.”

<sup>6</sup> Ifi degec aposoro nga enara yeni kpedzucnema yoac imoc tembuc denegeng anggec. <sup>7</sup> Yoacua mekecma Petorongu yacma yofi deec, “Tosofocna, bangec monnunac ngicngac, yeni neac enacfunac siduc gombung negemma negensingegecdeac Anutungo warac nenang botucfunac meisinnuec, imoc negendae. <sup>8</sup> Anutu ye uba hehengngoc warac Tiri Asu nemmeec, imoc ifingoc bangec monnunac ngicngac, yeneac negeneac Tiri Asu yemmeec. <sup>9</sup> Nenang

negensinggeing, ifi isoc yeni negensinggegec Anutungo ubangina dzuarec. <sup>10</sup> Ifi anu ngeni Anutu tobanggema Moseac dedeseri, imocac tofo kuneng Yesuac habu yeneac witiu faibeso dedae, imoc naric mi ande. Bangecfocnina nga esangabofocnina amma nenang imoc tofobibiema obohoing. <sup>11</sup> Nga yofi yofinggedimbe, Kebu Yesungo yudangic nga bangec monnunac ngicngac, neni nenahafoc danggunuha nemmema ebicfunac mesinunuu komoc kpenide.”

<sup>12</sup> Ifi deu habutoa yeni engsac negemma tacgec. Nga Anutungo Pauro nga Banaba nonggo tacyemecmanu ua meoc, imocac siduc meyemmeoc. Yeri bangec monnunac ngicngac, yenearu negensinggegecdeac faka kuhagoc nga faka mi hehena homac meoc, imoc edeyunuoc.

<sup>13</sup> Siduc meyemmeec wisickeu Yakobongo yoac yofi edeyunuoc, “Tosofocna, deba negenggec, <sup>14</sup> Anutungo hanahema bangec monnunac ngicngac, yenearuac ngicngac meyunuu yeac arengfora anggecdeac sing meficgeec,\* imocac yoac Simonggo dekperagiu negending. <sup>15</sup> Negenni yeac yoacngo profete yeneac yoacgoc socfungoc ande. Negenggec, mitikibiu yoac yofi ohogec fede.

<sup>16</sup> ‘ “Neng ngade kecma dzigenema Dawidiac amabara sesuhau monggoc heigborima meseribade. <sup>17</sup> Nga ngic toseango Kebu ni kpachofoc anemma meficnugecde amma bangec monnunac ngicngac, yeneng ifingoc arengfocna ambisia.” *(Amosi 9:11-12)*

<sup>18</sup> Kebu ye bicngoc yoac ifia deereecngo dedenoc.’ <sup>19</sup> Imocac negengising amma yofi deduae, bangec monnunac ngicngac, yenearuacngo Anutu ubanginango hoanggema kecdae, yeni ebictoa mi yemmebisina. <sup>20</sup> Yofisac deserima kibi ohoyemmebisina, ngicngac yeneng nemunginaac sese dema wiac heiyemmeckdae, wiac wonongagoc ifia wabisia. Yeni serima kecma kaisero mi ambisia nga yamberec fusia sawagoc amma sacac segekecbisia. <sup>21</sup> Yeni Moseac yoac bic negendae. Nga imoc esea bicngoc yuda yeneng hanahema taonsoc osohakecgec. Amma imoc yofinenggac ifingoc sabata tatak nasoyau kpekpeturang amanginasoc osonegeng angandae.”

<sup>22</sup> Anu aposoro nga kpebunggac enarafocngina amma kpebungtoa, yeni negenggec imoc naric anec. Nga yenearuac ngic enara yohockang meis- ingyurugoc mong kpara Yuda, yeac kpara mong Basaba, amma Sira. Meis- ingyuruma yeri Pauro nga Banaba yerigoc yenhafoc Antiokia taonnu kenggecdeac sueyurugoc. <sup>23</sup> Amma yoackibi mong yofi dema ohoma yemme- kenggec,

“Neni tosofocngina aposoro nga enarango bangec monggac habuunac toso- focnina Antiokia nga Siria amma Kirikia bangecfu kecdae, ngenearu yoackibi yoc faingemmedimbe.

<sup>24</sup> Wenaengerec. Neni mi sueyunumina nenearunac ngic goa yeni yenaoc ngenearu hama yoac edengunuma negen negengngina mesufugec negengyohoc anggec, imoc negending. <sup>25</sup> Neni imoc negemma uba mocgu amma ngic yohockang meisinyuruma tosohocnina Ban- aba nga Pauro yerigoc sueyuruni hadae. <sup>26</sup> Ngic yerinoc Kebun- ina Yesu Kristo, yeac amma kekecngira waoc. <sup>27</sup> Anu ngic imoc meisinyuruding, yeri hama yoac imoc enacfu dekperagingemmeec negembisia. <sup>28</sup> Tiri Asu nga neni nenahafoc ebic goa witinginau mi faingemmenideac negenni ngereede. Ngeni singyoac yomocsac

\* **15:14:** Sing imoc Konerioac amau hanahema fingerec.

modacgecdeac faingemmeni ngereede: <sup>29</sup> Ngicngac nemunginagoc yeneng nemungina yeneac sese dema yang heiyemmegec, ngeni imoc wama mi nebisia. Ngeni yamberec fusia sawagoc mi nebisia amma sac mi nebisia. Nga kaisero mi ambisia. Ngeni imoc sasawa wadacgec ngereuede.

Imocac ngeni ubangerecgec kecbisia.”

<sup>30</sup> Anu kpebung yeni ngic imocnoc sueyunugec kenggec. Kengkecma yeni Antiokia kemesikema Yesuac habu Antiokia kecgec, yeni kpedzucyunuma yoackibi imoc yemmegec. <sup>31</sup> Yemmegec memeseri yoackibi imoc hemma osoma ubangerec negenggec. <sup>32</sup> Amma Yuda nga Sira yeri profete kefocac yoac homac dema Yesuac habu ubangina meefaima demeseri ayemmeoc. <sup>33</sup> Ifi angkefec naso wisickeu Yesuac habu yenearu dzigenebesonga turunga ruae nga kenecyoac ayecmegec kenoc. <sup>34</sup> Nga Sirango ine ihai kecbeso negenece.

<sup>35</sup> Pauro nga Banaba yeri Antiokia taonnu uangira monggoc torokpema mekefoc. Mekefec ngic homac yenigoc memefic amma Kebuac yoac ngicngac edekpou ayemmema siduc gombunggac hania dekperagiyemmeec. <sup>36</sup> Kecma Paurongo Banaba yofi edeec, “Nerang monggoc dzigene kemma taonnu Kebuac yoac dekperagiyemmeic, ihai negen negensinggoc tosofocnina dafi kecdac, imoc kemma hennegeng ambisira.” <sup>37</sup> Ifi deu Banabango Yohane Mareko yenhafoc kenggecdeac deec. <sup>38</sup> Nga Mareko ye warac yerigoc kengkecma Pamfiria bangecfu ua wama woraecac amma Paurongo yegoc kenggecdeac negenu mi ngereec. <sup>39</sup> Ifi amma Banabango yoacngira engemmama anu wama faiemeoc. Faiemema Banabango Mareko hesickeu kemma kporucwageu emma Kipiro nucfu kenoc. <sup>40</sup> Nga Pauro ye Sira meu kembeso deec Yesuac habu yeneng Kebuac danggunucngo ngerearu febeso degec kenoc. <sup>41</sup> Kemma yeri Siria nga Kirikia bangecfu kengkecma kpebung demeseri ayemmekenoc.

## 16

<sup>1</sup> Pauro ye kengkecma Derebe nga Ristera taonnu kenec. Anu Ristera ihai ubamereng ngic mong kefec, kpara Timoteo. Yeac nonggea yudangac nga ye Yesuac arennu toroc torokpea anu mama ye griknigic. <sup>2</sup> Amma Yesuac habu Ristera nga Ikoniong taonnu kecgec, yeneng Pauro yofi edegec, “Timoteo ye fakaya gombunga.” <sup>3</sup> Edegec Paurongo yerahafoc keneceac edeu naric deec. Anu yudangic bangec imohai kecgec, yeneng Timoteo mama ye griknigic, imoc negendacgec. Imocac Paurongo yeneac amma Timoteoac sebi tosea herecgeec. <sup>4</sup> Nga yeri amaea amaea kemma aposoro nga Yerusareng habuac enarafocngina singyoac dedzege anggec, imoc tofohogeceac Yesuac habu edeyunukenoc. <sup>5</sup> Ifi amma ua meec kpebung yeneac negen negensing yadieci. Nga wenacsoc bangec monnunac ngicngac, yeneng aposoro yenearu kemma torokpekecgec homac anggec.

<sup>6</sup> Asia bangectoau yoac dekperagiyemmebeso degec Tiri Asungo kpetariyemmeu Firigia nga Garatia bangec eng ferecgecma kenggec. <sup>7</sup> Kengkecma Misia bangec nga Asia bangec botucngirau namma Bitinia bangecfu kembeso degec Yesuac Asungo kpahe heiyemmeec. <sup>8</sup> Imocac yeni Misia bangec ferahema kengkecma Troa taonnu kemegec. <sup>9</sup> Ihai sikema tofocnac imohai Paurongo onga mong yofi henec, Makedoniangic mongngo yearu fingececma namma desambic ammima yofi edeec, “Ge dokutoa ferecgecma Makedonia bangecfu hama meficnununbesena.” <sup>10</sup> Pauro ye wiac

imoc henu Anutungo neni Makedonia bangecfu kemma siduc gombung dekperagiyemmenideac kpacnude, ifi negentegecma Troa wanideac bic efaiing.

<sup>11</sup> Efaima kporucwageu emma Troa wama ferecgema kengkecma Samotrake nuclu kensikeing. Kensikema wereckengau imohacnac kengkecma Neapori taonnu sikeing. <sup>12</sup> Sikema ihai wageunac mama hanising kengkecma Firipi taonnu sikeing. Imoc Makedonia bangecma imocac taongyada. Romangic yeneng warac bangec imoc megec. Anu taong imohai uameme goa kecmina <sup>13</sup> sabata naso anu taong odanagu wegenacfu doku mong feec, imohai yofi dema kemeing, “Ngicngac numuandae, yeneac tacyac mong doku tegiau fede me kpac, imoc kemema henni.” Ifi dema kemema ngac kpedzucnema kecmagec meficyunuma matacma yenigoc yoac yoac aning. <sup>14</sup> Yeneac botucfunac ngac mong Tiatira taonnunac kpara Ridia, ye finacama mingina nga kporuc sacsac faikefec. Ye Anutu eweheimima kefu Kebungo ubea mekperagiu Pauroac yoac kedzac kpema negene. <sup>15</sup> Amma ye yengena nga arengfora mitidoku nadzicma yofi derecgenemmeec, “Ngeni negennugec ni Kebu fora negensinggeanduae neac amau erema nigoc tacyac ambisia.” Ifi dema ngombonunuu ening.

<sup>16</sup> Naso monnu numukecgec, imohai monggoc kememina ihai wanac naroang mongngo meficnunuec. Naroang ye yafingagoc kecma ngicngac yeneac kpefingdede kefec. Ifi amma ngic mingingfora hiedzotoa kirecgeyem-mekefec.\* <sup>17</sup> Anu yennoc meficnunuma Pauro nga neni modacnunuma kpacma arohoec, “Ngic yomocngo Anutu Engenatoa, yeac enac tofoc tofoho nga kopocsicac ebicfunac mesi mesi amma komoc kpegecdeac sing mong derecgenemmedacgec ngeni sing imohai komoc kpegecde.” <sup>18</sup> Faka imoc wenacsoc anemmekefu Paurong imocac modzea tiu sisirema dzigene yafing yofi edeec, “Ni Yesu Kristo yeac kpacfu demekiri amma edeguba, ge ngac hereunac erema kenna.” Ifi deu ye imohaingoc erema kenec.

<sup>19</sup> Kenu ngac mingingfora yeni hiedzongina fingeceyemmeande, imoc kpac anu negemma Pauro nga Sira mendangyuruma kpedziyuruma yoacfu faiyurugecdeac kia yeneac amasobennu kenggec. <sup>20</sup> Kemma kia yenearu faiyuruma yofi degec, “Yeri yudangicngo amaninua dzomu meficgema tacyacnina memangedape. <sup>21</sup> Amma faka goa furia romangic nenaoc menideac kpaeyoac dedea fede, imocnoc mema modacdacnideac edenunudape.”

<sup>22</sup> Ifi degec ngichabutoango uba mocgu amma herebu negengyecmegec. Negengyecmegec kiango deu ngakpingira kucbiric hesigec. Hesima dzikacngo yurugec. <sup>23</sup> Dzikacngo homac kperec merecgeyuruma witicamau faiyuruma garengngo nagu seria heima gombunga yombong garengyuruudeac edegec. <sup>24</sup> Yoac seria ifia edegecac amma ye witicama mana ungguruha monnu faiyuruma haningira ic hendzic hendzirau faiu kindanggeu feoc.

<sup>25</sup> Tofocnac dzongiau Pauro nga Sira yeri Anutu yegec nunumu ammioc. Ammiec witicngic goango kedzac kpema negengyecmegec. <sup>26</sup> Negengyecmemagec, imohaingoc usocma kuhagoc meu witicama kpemindzaheu naguya bic anggedarec amma ngic sasawa witicngina fotockedarec. <sup>27</sup> Anu witicama garengngo gauunac kpidohoma yacma nagu anggema nandaru hemma, yofi negene, “Witicngic woradau.” ifi negemma

\* **16:16:** Ngicngoc bereckasi bummeandimbe isoc naroang ifi bummegec. Naso imohai yenearu faka ifia feec.

wasaibeanga taima ewehomebeso anu <sup>28</sup> Paurongo kungengngoc kpacma deec, “Ge sebiga mi kpena, neni hafoangoc tacdimbe.”

<sup>29</sup> Ifi deu gareng ye arengfora deu kifa migec ama manau emma dzonong fede fede amma Pauro nga Sira yereac haniu makpema fec. <sup>30</sup> Amma yacma ama manaunac hesicyuru mama kpesiyecmeec, “Ngickunenghocna, ni dafi amma komoc kpebade?” <sup>31</sup> Ifi deu yereng yofi edeoc, “Ge nga arengfoga ngeni Kebu Yesu Kristo negensinggegec yeng ebicfunac mesingunuu komoc kpegecde.” <sup>32</sup> Ifi dema ye nga arengfora Kebuac yoac edeyunuoc. <sup>33</sup> Edeyunuec gareng ye yacma tofocnac imohaingoc amau emma kubecn-gira dzuacsangohe ayecmema deu yengena nga arengfora doku nadzicgec. <sup>34</sup> Nadzicgec wisickeu yengena ama manau faiyuruma deu yaka gombunga mengerema yemecgec neoc. Anu ye nga arengfora yeni Anutuac ngic anggecac ubangina ngereeu sogaigec.

<sup>35</sup> Ama wereckenu kia yeneng witicama gareng ngic yohockang yungecyuruudeac keracnatang sueyunuec. <sup>36</sup> Sueyunuec garengngo yoac imoc negemma Pauro yofi edeoc, “Ni fainguruba keneccdeac kia yeneng yoac faigec hade. Imocac ngeri mama kemma ruaegoc kecbesera.” <sup>37</sup> Ifi deu Paurongo yofi edeoc, “Neri romangic arennu torokpema kecde, yeni hanianira mi negendacma ngic kicfu eng dzikacngo nuruma witicamau fainuruec. Nga yoc waic waic suenurugecac negendae, imoc naric kpac. Yeni yenaoc hama hesicnuruec kendede.”

<sup>38</sup> Anu Paurongo yoac ifi deu keracnatang yeni dzigene kemma kia yoac yofi edeyunuec, “Ngic yeri romangic arenunacngo kecdape.” Ifi degec yeni siduc imoc negemma damuyunuu kengec amma <sup>39</sup> ngihoc yerearu hama demembanang ayecmema witicamaunac hesicyuru mama amangina wama keneccdeac edeyuruec. <sup>40</sup> Ifi edeyuruec yeri witicamaunac mama Ridia yeac amau emma Yesuac habu yenemma demeseri ayemmema kenoc.

## 17

<sup>1</sup> Pauro nga Sira yeri Amfipori nga Apornonia taong ferecgema Tesaronike taonnu kenoc. Nga ihai yudangic yeneac kpekpeturang ama mong tarec.

<sup>2</sup> Nga Paurongo angande, ifi amma kpekpeturang amanginau emma sabata naso harebec yenigoc Anutuac yoac denegeng anggec. <sup>3</sup> Ifi amma yoac yofi dema mitikibiu yoac edzacyunuma deireckeyemmeec, “Messiango kpendzeng kpekecma homema monggoc gborima yarude, imoc mitikibiu dedea fede. Amma Yesu yennoc Messia, imoc dekperagikecduae.” <sup>4</sup> Ye ifi seria deireckeyemmeu yudangic goango ireckema Pauro nga Sira, yerearu kpeketahegec. Nga grikgic Anutu eweheimima kecandae nga ngac kuneng yeni homacngo yerearu torokpegec.

<sup>5</sup> Anu ngic homacngo siduc gombung negenggec yudangic yeneng keracmangang ayemmema kpedzaroc sobennu kemma yarengic kpacyunuec. Kpacyunuma taonnu dzomugerec meficgema Yasonggac amau Pauro nga Sira taroc, imohai kpedzucnedacgec. Kpedzucnedacma ngihoc meyuruma ngic yeneac botucfu faiyurubesonga degec. <sup>6</sup> Dema hofocyruma Yasong nga Yesuac habuunac goa meyunuma amaac enarameme yeneac kicfu kpedziyunuma kenggec. Imoc yofi dema aro aro kenggec, “Bangeha bangeha dzomugerec meficgema ngicuba miacyemmandae, ngic imon-gonoc nenearu ifingoc hadau. <sup>7</sup> Haec Yasongngo ama heiyemeru tacdape. Yeri Ngictau Sisaac dedeseriyoac kpema ngictau furia mong kpara Yesu, ye kpnggema dedape.” <sup>8</sup> Yeni yoac ifi dema amangic nga enara wosongina



megec. <sup>9</sup> Ifi anu gareng yeni Yasong nga tosofora ayemmegec sebingina kaso kpema hiedzo faigec wayunugec kenggec.

<sup>10</sup> Ama toforeu Yesuac habu yeneng imohaingoc Pauro nga Sira Berea taonnu sueyurugec kenoc. Kemma ihai yudangic yeneac kpekpeturang amau emma siduc gombung deoc. <sup>11</sup> Deec taong imocac yudangic yeni fakangina nga angammengina kpacgoc nga Tesaronike yeneac faka isoc kpahac, imocac enacyoac ubaefac hafoangoc negemma hoanggegec. Amma yoacngira ikoha me fora dema wenaha wenaha mitikibi osoma deusu anggec. <sup>12</sup> Ifiac amma yudangic yeneacunac homacngo Yesu nengenggegec amma griknngic nga griknngac kuneng homacngo yerearu torokpegec.

<sup>13</sup> Torokpegec Paurongo Berea taonnu Anutuac yoac dekperagi siduc imocngo Tesaronike kenu yudangic yeneng negenggec. Negemma Berea hama habutoa imoc demanganema herengina miacgec. <sup>14</sup> Ifi anggec Yesuac habu yeneng imohaingoc Pauro kondunnu suegec kemeec. Nga Sira nga Timoteo yeri ihaingoc kefoc. <sup>15</sup> Anu ngic yeneng Pauro hesicke kengkecma Ateng taonnu faigec. Faigec yeng Sira nga Timoteo bic haecdeac edeyunuu ngic yeni dzigenegec.

<sup>16</sup> Pauro ye Ateng taonnu yereac tomai kefec. Nga nemuonga wakemangoc tackenggec ye imoc hemma ubahodung kuneng negenece. <sup>17</sup> Amma ye yudangic yeneac kpekpeturang amau emma yudangic yenang nga griknngic goa yudangic yenearu torokpema kegec, yeni yenhafoc mitiac denegeng anggec. Amma ye ifingoc wenaha wenaha kpedzaroc sobennu kemma ngic tacgec, yenigoc miti denegeng anggec.

<sup>18</sup> Anu taong imohai kekecac hania negen negengngic kegec, kpacngina epikuengic nga stoikengic. Ngic imoc yeneng Paurogoc yoac demereng anggec goango Pauroac yofi degec, “Ngic imoc yennoc yadi yadima yoac debeso ande, imoc mi negendimbe.” ifi degec toseango yofi degec, “Ye nemu furiaac dedekperagi ngic.” Paurongo Yesuac siduc nga homecfunac yacyac, yoac imoc deecac yeni ifi degec. <sup>19</sup> Ifi dema sobengtoa mong kpara Areopage ihai hesicke emma degec,\* “Ge yoac furia denec, imoc naric edenunubesena. <sup>20</sup> Yoac imoc kedzacnina furia, imocac ge haniagoc dena negembeso anemmece.” <sup>21</sup> Ateng ngic kuric nga ama mingina sasawa, yeni yoacsiduc furia negemma yoac imocsac denegeng amma siduc homac angkegec.

<sup>22</sup> Ifi anu Pauro ye Areopage tutumang botucfu namma ngic yofi edeyunuec, “Ateng ngic, ni wiac sasawa hemma haniangina yofi hentegecd-uae, ngeni nemu hania hania homac ewehiyemmema yeneac faka hania hania mekecdae. <sup>23</sup> Ni taongnginau kengha amma nemuonngafocngina yenengkecma arata monnu kibi yofi oho ohoya feu henai, ‘Nemu mi henegeng angana, yeac arata.’ Nga nemu imoc mi negemma ewehiemiandae, yeac hania dekperagingemmeba negenggec.

<sup>24</sup> Anutu yennoc bangectoa bangec nga wiac sasawa ihai fede, imoc meficgema witiau wiac sasawa faidarec, yeng bangec nga kurumeng imocac mingina kecede. Ye womong ngic maringo menea, imohai tacyac mi angkecede. <sup>25</sup> Amma wiac mong hoforu ngicngo ua mema meficgeminade, imoc mi fede, kpac. Ye yengenaoc kekec nga asu amma wiac sasawa ngic yemmekecede. <sup>26</sup> Amma ngic mocgu meficgema deu yearunac ngic bangeha

\* **17:19:** Areopage bangec ihai kpekpeturang ama mong feec. Yeni ihai kpeturangema yoac hania hania denegeng angkegec.

bangeha nga habuya habuya fingecsahe kecgecdeac deec. Amma naso nga kpete, imoc yengngoc deyemmeec. <sup>27</sup> Nga ngic yeni yenaoc ubanginango Kebu yengena hofocma meficgeandae, ye imoc negensima ifi anec. Foracngoc, ye hereau kpac, ye ngic nenang botucfu kecde. <sup>28</sup> Nga yennoc kekecni-naac hania, nenang yeac kucfu kecma angammeme angkecdimbe. Amma ngeneac negen negengngic goango yofinoc degec, 'Nenang Anutuarunac fingering.'

<sup>29</sup> Anu nenang Anutuarunac, imocac amma ngic yeni ubau negemma gol me siriwa me hocngo marikibi meandae, Anutungo ifi isoc ande, imoc mi negensibisia. Anutu ye kuctoa mingina. <sup>30</sup> Ngeni warac wiac imoc mi negengegec Anutungo hemma imocac yoara mi deec. Yaguc ine bangeha bangeha ngicngac sasawa ubangina dzigeneudeac demeseri ayemmekecde. <sup>31</sup> Yeng bicngoc naso mong deec, imoc fede. Naso imohai bangeha bangeha ngicngac hanianina desima turunga dindingac merennemmeude. Amma ngic mong ye ua imocnoc meudeac demiec, ye ngic imoc edzacnunuudeac homecfunac meghoriu yarec."

<sup>32</sup> Anu Pauro ye homecfunac yacyac, imocac yoac deu goango demembaic ammigeac nga goango degec, "Yoac imoc naso monnu dena monggoc negembisina." <sup>33</sup> Ifi degec Paurongo wayunuma kenec. <sup>34</sup> Anu ngic goango ine Pauroaru kpeketahema Yesu negensinggegec. Imoc yeneanunac desi desi ngickuneng mong kpara Dionisio, ye Areopageac memba mong nga ngac mong kpara Damari, amma ngicngac goa.

## 18

<sup>1</sup> Paurongo uaya mesima Ateng wama Korinti taonnu kenec. <sup>2</sup> Ihai yudangic mong meficgeec kpara Akpira, ye Ponto bangecfu fingerec. Amma ye enema Prisika yegoc Itaria bangecfu kecmaec ngictau Sisa Kraudiongo yudangicngac Roma taonnu kecgec, yeneac dedeseriyoac dema sueyunuu kendaceg. Imocac yeri Roma wama Korinti taonnu gbori hama kefoc. Anu Paurongo yerearu kenec. <sup>3</sup> Pauro ye seriamu memengic nga Akpira ye ua imocngoc mekefecac ye ameau tacyac amma meficgeu yerahafoc hiedzo memeac ua imoc mekefoc. <sup>4</sup> Mekecma Paurongo sabata tatac nasosoc yudangic yeneac kpekpeturang amau emma yudangic nga grikgic denegeng ammagec yoac deireckeyemmeec.

<sup>5</sup> Anu Sira nga Timoteo yeri Makedonia bangecfunac haec Paurongo ua goa wama siduc gombung dedeac hombananga kefec. Amma yudangic yoac deireckeyemmekefec, imoc yofi, "Yesu ye Messianoc." <sup>6</sup> Ifi ayemmeu yeni yoara surema deendema ammigeac yeng fakangina wama wambaya kpei-haiu yube mau yofi edeyunuec, "Ngeneac sacngo ngenang orucfu habeso. Nga kopocsicnginaac turunga neac mi anude, imoc ngenang anude. Imocac yaguc wangunuma bangec monnunac ngicngac, yenearu kembade."

<sup>7</sup> Paurongo ifi dema yuda yeneac kpekpeturang ama wama ngic mong kpara Titio Yusto, yeac amau emma tacyac anec. Ngic imoc ye Anutu eweheimima kefec nga amea imoc yudangic yeneac kpekpeturang ama tegiau tarec. <sup>8</sup> Nga yudangic yeneac kpekpeturang amaac gareng kpara Krispo, ye nga arengfora yeni Yesu negensinggegec. Nga Korinti ngicngac homacngo Kebu negensinggema mitidoku nadzicgec.

<sup>9</sup> Anu Tofocna monnu Kebungo Pauro ongau yoac yofi edeac, "Ni nanggegubade, imocac amma kengec amma enackidzic mi ambesena, ge serima kecma enacyoacna debesena. <sup>10</sup> Neac ngichabutoa taong yomohai

kecdaeac ngic yeneng gumeme mi anggecde.”<sup>11</sup> Ifi edeu Paurongo kifa mocgu nga noboha ihai tacma Anutuac yoac ngicngac edekpou ayemmeec.

<sup>12</sup> Gariong ye Akaia bangecfu kiatoa kecmanu yudangic yeni uba mocgu amma Pauro ngaba ammima yoacfu mekenggec. <sup>13</sup> Mekemma kiaaru nesunggema yofi edegec, “Ngic yomoc ye dedeseriyoacnina kpeande. Ye sing mong tima Anutu eweheimigecdeac ngic fenggeyunuande.”

<sup>14</sup> Edegec Paurongo enacefac amma yoac debeso ammanu Gariongngo yudangic yofi edeyunuec, “O yudangic, ngic ye kopocsic ebiria meficgebac dede yoacngina naric negembai. <sup>15</sup> Nga ngeni ine ngenang edekpouyoac nga kpac hania hania amma singngina imocac yoacngina engemmama andeac genaoc desibisia. Yoac ifia neng naric mi desibade, imoc neac ua kpahac.”

<sup>16</sup> Ifi dema yoacfunac kisangyunuu magec. <sup>17</sup> Mama yeni uba mocgu amma kpekpeturang ama imocac gareng Sostene kiaac kicfu kpegec kiango imoc hemma yohoc bahoc anec.

<sup>18</sup> Paurongo Korinti kecma Yesuac habu dekpemac ayemmema Siria bangecfu kenudeac Kengkereai taonnu kemema wageu enec. Amma Prisika nga Akpira yerigoc yenhafoc kenggec. Kemma ye Anutugoc dedeseri deecac Kengkereai ihai orucdzoea merecgema wedzerec. <sup>19</sup> Yeni Efeso taonnu sikema Paurongo Akpira nga Prisika wayuruma yudangic yeneac kpekpeturang amau emma yenigoc Anutuac enacyoac denegeng anggec.

<sup>20</sup> Amma yudangic yenigoc kefudeac desambic ammigec ye imoc wama yenigoc yoac yofi dedzege anec. <sup>21</sup> “Anutungo negennenude isoc ni ngenearu monggoc dzigenebade.” ifi dema Efeso taong wama wageu monggoc emma kenec. <sup>22</sup> Kengkecma Kaisarea sikema kpebung yenearu emma yenigoc yoac yoac amma Antiokia kemeec.

<sup>23</sup> Paurongo Antiokia imohai naso goau kefec. Kecma taong imoc wama Garatia nga Firigia bangec yerecgema Yesuac habu demeseri ayemmema kenec.

<sup>24</sup> Naso imohai Efeso taonnu yudangic mong haec, kpara Aporo. Ye Aresandria taonnu fingecma kibiamatoa mesima mitikibiu yoac oho ohoya feec, imocac hania negentegecdarec. <sup>25</sup> Ye Kebuac enacyoac kpoumigecc negenec. Anu ye Yohaneac dokunadzic, imocac sirihasac negenec. Nga ye Yesuac sing gerec gerehagoc tongganangngoc deec.\* <sup>26</sup> Ye yudangic yeneac kpekpeturang amau siduc gombung kengeha kpac edeyunuec. Amma ihai siduc gombung deu Prisika nga Akpira yeri yoara negemma hoanggema Anutuac sing gboria tongganang deireckemioc.

<sup>27</sup> Nga Aporo ye Akaia bangecfu kembeso deu Yesuac habu yeni demeseri ammima Yesuac kpebung edi kegec, yeneac kibi yofi ohogec, “Ngic yomoc ye ngenearu hau ngeneng ama heimibisia.” ifi ohomigec mekengkecma ihai sikeec. Sikeu Anutungo ngicngac danggunuha yemmeu Yesu negensinggekecgec, yenearu kemma homac meficyunukefec. <sup>28</sup> Ye didiu yombong yoac kucgoc yudangic dedzameyunuma yofi dekperagiec, “Yesu yennoc Messia.” Ye mitikibigoc yoac imoc dema edzacyunuu ubangina kuha maec.

## 19

<sup>1</sup> Aporo ye Korinti taonnu kecmanu Paurongo sifecfusing ferecge kengkecma Efeso sikema Yesuac habu goa meficyunuma <sup>2</sup> kpesiyemmeec,

\* **18:25:** Ngicngac yeni Yesuac enac tofoc tofoho anggecdeac Anutu Manggac nga Medac amma Tiri Asu yeneac kpacfu dokunadzic monggoc ambisia. Yohaneac dokunadzic imoc soha mi anec, imocac dedea, imoc mi negentegerec.

“Ngeni Yesu negensinggema Tiri Asugoc anggec me kpac?” ifi deu yeneng degec, “Kpac, Tiri Asu kecede, siduc ifia mong mi negening.”<sup>3</sup> Ifi degec monggoc kpesiyemmec, “Anu ngeni noc mitidoku nadzicgec?” deu yofi degec, “Neni Yohaneac mitidoku nadziring.”<sup>4</sup> Ifi degec Paurongo yofi edeyunuec, “Yohanengo ngic ubangina dzigeneudeac doku nadzicyemmema yofi edeyunuec, ‘Ngadenau hama kecede, ngeni ye negensinggebisia.’ ye yoa imoc Yesuac negemma deec.”<sup>5</sup> Ngic yeni yoa imoc negemma Kebu Yesuac kpacfu mitidoku nadzicgec.<sup>6</sup> Mitidoku nadzicgec Paurongo maria sebinginau faiu Tiri Asungo yenearu maec. Mama ubangina wakeu yeni nedzarangyoac nga profeteyoa degec.<sup>7</sup> Ngic ifi anggec, yeneac kpetengina 12 isoc anec.

<sup>8</sup> Paurongo yudangic yeneac kpekpeturang amau emma kengeha kpac kecma afo harebac siduc gombang dekperagiyemmekefec. Amma ye Anutuac eucererengac hania yenigoc demereng angemema defengge ayemmec.<sup>9</sup> Ifi anu ngic goa yeni ubaseri amma Yesuac sing gombang ngadehema ngicngac habutoa yeneac kicfu imoc demanganegec Paurongo wayunuec. Wayunuma Yesuac habu kpedzucyunuma wenacsoc ngic mong kpara Tirano, yea k poukpou amau siduc gombang depou ayemmekefec.<sup>10</sup> Ye kifa yohockang ifi kecmanu Asia bangectoau yudangic nga griknigic ifingoc Kebuac yoa negendagec.

<sup>11</sup> Nga Anutungo Pauo nonggo tacmimanu faka kiwa morora kuhagoc meec.<sup>12</sup> Paurongo uakporuc nga keremmeme mekefec, ngicngac yeni imoc mema hafeigoc yenearu mekenggec, yeneng imoc kpeserema ngeregec nga asu mangana herenginaunac erema woragec.

<sup>13</sup> Yudangic goa bangec yerecgema asu mangana yunukporac anggec, yenearunac ngic goango ngicngac asu manganagoc yeneac witiu Yesuac kpac kpacma tobangema ua yofi mema degec, “Yesu kpacsiduha Paurongo dekperagiande, ge ngic yea kpacfu worabesena.”<sup>14</sup> Amma yudangic mong kpara Skewa, ye womong gareng enara kefec nga yea medacfora 7 yeni ifinoc anggec.<sup>15</sup> Ifi amma degec asumanganango yoa yofi merengyemmec, “Yesu negenduae amma Pauo ifingoc negenduae. Anu ngeni merac?”<sup>16</sup> Ifi dema ngic asu manganagocngoc kucgoc yacma wasai mema medac sasawa yunudacma ngakpingina mesuc kpesuc mema sebingina merecgeu yeni sac nadzicma senggang yacma amaunac mama woragec.

<sup>17</sup> Anu Efeso taonnu yudangic nga griknigic yeni imocac siduc negendacma kucngina mau dzonong fede fede anggec. Ifi amma Kebu Yesu afehema dengeregec.<sup>18</sup> Dengerema ngicngac Yesu negensinggegec, yenearunac homacngoc sikema angammemengina mangana angkecgec, imoc nonongkac deficdadagec.<sup>19</sup> Deficgegec ngicngac homacngoc warac bangecac hadehadegoc faka megec, yeni kibingina kpeturanggema ngic yeneac kicfu faigec gerefcu dzeec.\* Kpeturanggema faigec dzeec, kibi imoc ngic 10 yeneng kifa 16 kampani ua mema ua bummegecede, dzo kpetea imocacsoc anec.<sup>20</sup> Nga yeni ifi anggec Kebuac yoacsiducngoc kucgoc fingectegecma noboc noboc sokoma kenec.

<sup>21</sup> Paurongo mising ua imoc mesidacma yofi deec, “Asungo ubanau negen negeng nendeac Makedonia nga Akaiia bangec ferecgema Yerusarennu kemma tacba wisickeu Roma taonnu kembesare.”<sup>22</sup> Ifi dema memefihora

\* **19:19:** Drakma 50 tauseng nande nga drakma mocgu, imoc uameme mocguac uabung.

Timoteo nga Erasto sueyuruu Makedonia bangecfu waraima kenoc. Nga yengena ine Asia bangecfu monggoc kapia torokpema kefec.

<sup>23</sup> Naso imohai Efeso taonnu Yesuac yoacsiducac amma kpeborongtoa fingerec. <sup>24</sup> Imoc yofi: Siriwango marikibimemengic mong kefec kpara Demetrio, yeng Artemis nemu womonggac ongea kaptic siriwango me u enu ngic yeni bummekegcec. Bummegec ye nga ua ngic tosofora hiedzo homac kirecgeyemmekefec. <sup>25</sup> Demetrio nga ua ngic tosofora nga marikibimemengic sasawa kpedzucyunuma yofi edeyunuec, “Ngicwiac, ngeni uanina imocngo dzofinac meficgenemmeande, imoc negendae. <sup>26</sup> Nga ngic mong hama kecede kpara Pauro, yeac hania negendae. Ye Efeso amaunac nga Asia bangec goanac ngic noc efea fenggeyunuma uba mesufu ayemmema yofi edeyunuande, ‘Nemuunga ngicmaringo memea, imoc wiac fora kpa-hac.’ <sup>27</sup> Yeng ifi anu uanina kuha mabacac nga imocsac kpac. Nemutoanina Artemis yeac womong efaibacac amma Artemis yengena kpacsiduha kuha madacbacac. Anu Asia bangecfunac nga bangec noboc nobocnac ngic yenhafoc eweheimiandae amma siduha dafi kpac anude, imoc obohode.”

<sup>28</sup> Demetrio yeng yoac ifi edeyunuu yeni herebu kuneng negemma arohoma yofi degec, “Efeso yeneac Artemis ye engenatoa!” <sup>29</sup> Ifi amma ngic homacngo yenearu torokpema taong wakema dzomu gerehagoc meficgebesonga kpeketurangsobennu yenhafoc nedzima kendacgec. Amma Makedonianac ngic yohockang Pauro modaroc, kpacngira Gaio nga Aristako, yeri meyuruma kpedziyuru kengcec. <sup>30</sup> Nga Paurongo ifi negemma ngic kpeketurangnu kembeso deu Yesuac habu yeneng segeregec. <sup>31</sup> Amma provinsiac ngickuneng goa Pauroac toso kecec, yeneng ifingoc kpeketurang sobennu mi kenudeac dederacyoac yearu faigec kenec.

<sup>32</sup> Nga kpeketurang ihai ngicngac yeneng yoacorong homac anggec yoac sufudarec. Sufudaru goatoango “Hania damocac yei hama nandimbe?” ifi dema obohogec. <sup>33</sup> Obohoma nammagec yudangic tosongina mong kpara Aresande, ye ngichabutoa botucnginau nammanu deede ammgec yoac dzaeu emma yoac demendzic anudeac ngic maribarac kpouyemmeec. <sup>34</sup> Enu ngic yeneng ye yudangic, ifi hentegecma yenhafoc aua yohockang ferahema arohoma yofi degec, “Efeso yeneac Artemis ye engenatoa.”

<sup>35</sup> Ifi angkecmagec Efeso taonggac kibi oho ohongicngo hama yofi edeyunuec, “Ngeni waickema tacdacgec! Efeso ngicngac ngeni negengcec, Atemistoaninaac ongea nga womonga henggareng angkecdimbe. Amma yeac onga sawaunac maec, imoc bangectoa bangecac ngicngac sasawango negendacdae. <sup>36</sup> Imocac ngeni ubangina mau faka sicsauc mi ambisia. <sup>37</sup> Anu ngic yohockang meyuru hadae, yeri nemuninaac womonnunac wiac mong hamangec mi medaoc me Artemis mi emmidaoc. <sup>38</sup> Demetrio nga ua ngic ogofora yeni ngic monggac negengcec manganedeu ye yoacfu faibisia. Anu yoacfu faifaia, imocac naso fede amma kia kecdae. Ebicngina imoc yenearu mekemma yoacfu faiemebisia. <sup>39</sup> Me ngenang yoac mong fedeu enarameme yeneac kpekedzucfu mekengcec demengere ambisia.

<sup>40</sup> Ebicnina yofi fede, ngeni yaguc dzomugerec anggecac amma yoacfu fainunubauac. Dzomugerec meficgecec hania kpacfu ngickuneng hagecede isoc yoacac obohogecde.” <sup>41</sup> Kibi oho ohongicngo yoac ifi dema sueyunuu kengcec.

## 20

<sup>1</sup> Yoac orongtoa kpac anu Paurongo Yesuac habu heitaiyunuu hagec.

Hagec dederecge ayemmema meseriyunuma maringina mema Makedonia bangecfu kenec. <sup>2</sup> Kemma bangec imoc ferecgema Yesuac habu tackenggec, yeneac negen negeng midima demeseriyuac homac ayemmekenec. Kengkecma Grik bangecfu kemma <sup>3</sup> ihai afo harebec kefec. Kecma kondunnu kemema wageusing Siria bangecfu kembeso deu yudangic yeneng ngabayuac dema dekiric anggec ye Makedonia bangecfusing dzigeneudeac negemma kenec. <sup>4</sup> Anu ngic yofigucngo sinnu Pauro modackenggec: Piroac medac Sopate Bereanac nga Aristako nga Sekundo yeri Tesaronikenac, amma Gaio Derebenac nga Timoteo nga Tikiko amma Tirofimo, yeri Asia bangec dumbengaunac.\* <sup>5</sup> Ngic imoc yeneng waraima Troa taonnu tomainina kefcgec. <sup>6</sup> Tomainina kecmagec neni ine ic sogong yisya kpac nene, imocac tacnegennaso wisicke Firipinac wage meing. Wage mema wenac 5 kengkecma Troa taonnu kemma ihai uameme 7 kefcng.

<sup>7</sup> Anu neni sondau maung nenideac kpedzucneni Paurongo wereckengau kenudeac negemma Anutuac enacyuac edeyunuma kefec. <sup>8</sup> Edeyunukecmanu tofocnac dzongineu amamana wi taring, imohai kifa homac dzeec. <sup>9</sup> Anu Paurongo yoacherec deu medac mong kpapa Eutiko, ye gauac turic takecma nigeckpeu titing houhouyau ferecgema bangecfu kemema kpema fec. Femanu miacgec homemea anec. Ye ama mana harebec witiau wi, ihacnac makpeec. <sup>10</sup> Makpeu Paurongo kemema medac witiau fororahema fema ngicngac yofi edeyunuec, “Medac ye gbori fedecac ngeni kiacma mi ewehomegec.” <sup>11</sup> Ifi dema ama manau emma maung gumecyunuma yenigoc yaka neec. Neu wisicke yenigoc mitiac denegeng amma kecmanu ama wereckenu wayunuma kenec. <sup>12</sup> Ngic yeni ine medac gboriu ameau hesicke kemma wosongina nomanu ubangerec negenggec.

<sup>13</sup> Anu goa neneng Paurogoc Aso taonnu eacnideac suenunuu kporuc wageu emma kenni yengena ine hanising haec, yeng areng ifi faiec. <sup>14</sup> Hama ihai mefcncunuma wageu ereu neni nenahafoc kengkecma Mitirene taonnu kensikeing. <sup>15</sup> Ihanac kengkecma wereckenu dzintau Kio nucfu kemma kondung ferecgema mitiwocfu Samo nucfu kening. Ihanac seikponoc Mirete taonnu kensikeing. <sup>16</sup> Paurongo pentekos tatac nasou Yerusarennu bic tarudec dec. Nga neni Asia bangec dumbengau tacmina naso segebacac Efeso eng ferecge kengkecma Mirete sikeec.

<sup>17</sup> Sikema ihai namma Efeso yuac faiu kenu kpebung enarafocngina hagec. <sup>18</sup> Hagec Paurongo yuac yofi edeyunuec, “Ni Asia bangecfu hama nge-nearu uana dafi hanahema mekefai, imoc haniaunacngoc negenghaandae. <sup>19</sup> Ni memaemeyombonggema Kebuac enac tofoc tofoho kecbare yudangic yeneng ngaba dekiric anemmagec kiacubahodunggoc nga faitobannu kefai. <sup>20</sup> Anu yuac desahengemmema mong mi medadanggeba fec. Nga ngeni ngeregecdeac yuac homac ngicngac amasobengnginau nga amea amea kpoungemmekenai.

<sup>21</sup> Ni bic seria kpoungemmema yudangic nga grikgic ubamereng amma Anutuaru kemma Kebunina Yesu negensinggecdeac ubana kuha mi mamau dekperagingemmekefai. <sup>22</sup> Anu yoc Asungo ubanau derecgenendeac Yerusarennu kenduae. Kemba faka mong dafia ihai fingec-nude, imoc mi negenghomeduae. <sup>23</sup> Ni yofisac negenduae, witicama nga kpendzengngoc edi tomaina fede, imoc amasoc haba Tiri Asungo deficgenengkecde. <sup>24</sup> Deficgenenu ni ine neanna kekecnaac negemba buma

\* 20:4: Rukango kibi yomoc ohoec, yeng Paurogoc Makedonia bangecfu earoc.

engena mi angande. Ni eng sing derecgenenna timodacbadeac anengande. Nga Anutu danggunuhaac siduc gombang desahebadeac Kebu Yesungo denenec, ua imoc mekema mesibadeac ubana ande.

<sup>25</sup> Amma yomoc deba negenggec, ni Kebuac eucererenggac yoacsiduc ngicngac botucnginau dekperagingemeba negengandae, ngeneng ngade kecma kicna monggoc mi henggecde. <sup>26-27</sup> Anutungo yoac sasawa derecgenemmeande, imoc hafoangoc edengunuai, imohacnac wiac mong mi waba fec. Imocac yaguc kedzac hesari angemmeba negenggec: mongngo ngenearunac sufuudeu kopocsihaac turunga nearu mi feude.

<sup>28</sup> Ngeni ngenang garengemema Anutuac kpebung gombunga garengyunudacbisia. Ye yengena sacngo bummengunuec nga Tiri Asungo kpebung yeneac enara kecgecdeac meisingngunuecac ngeni ramagareng isoc Kebuac kpebungfora yenenggareng ambisia. <sup>29</sup> Ni yofi negenduae: Ni wangunuba katekasi enaragocngo ngenearu hama rama memanganengunubeso anggecde. <sup>30</sup> Amma ngenang botucfunac ngic fingecma yoac fora denggbaringgema Yesuac habu goa utac mengunugecdeac anggecde. <sup>31</sup> Ngeni imocac negentegecma efaima kecbisia. Ni kifa harebec hadzing tofocnac kiacubamanggangac nonosaeng tembus tembus dema gorongina kpekefai, imoc wagec ni maec, imocac ngeni uana imoc negensima kecbisia.

<sup>32</sup> Ni Kebuac mariu faingunuduae amma yeac danggunucyoac gombungau kpedzucngunuma faingunuduae. Imocngo kuc megecdeac meseringunu ngeni ngicngac kpetiac kekek megec kecdae, yenigoc ngenahafoc maridzoming megecde. <sup>33</sup> Anu ni ngenigoc kecma hiedzoac dewaidzoc mi angemmema <sup>34</sup> marinango ua meba hiedzo kirecgenemmeu neanna nga ngicfocna iwainina bummeing, ngeni imoc bic negendae. <sup>35</sup> Uana sasawa mekefai, imohai yofi kpoungemmeai: Ngeni makpekpea meficyunugecdeac ua kucgoc mebisia. Kebu Yesungo yoac yofi deec, 'Ge ubangerecfu ogoga wiac mong minade, imocac ubangerec buma kuneng gearu fingerude. Nga ubangerecfu ogogango wiac mong genude, imocac ubangerec buma gearu efea fingerude.' yoac imoc mi nigecngunubeso."

<sup>36</sup> Paurongo yoac ifi desima yenigoc fafoc heima numuec. <sup>37</sup> Numuu wisickeu negemma kiachodung kiaru yeni hoanggema titikokoc ammigec. <sup>38</sup> Ye warac yoac mong yofi edeyunuec, "Ngeni kicmesuna monggoc mi henggecde." Imocac yeni ubahodungtoa negemma hesicke kemma wageu faigec emma kenec.

## 21

<sup>1</sup> Neni wayunuma kporucwageu emma Ko nucfu kemma wereckengau Rodo nucfu kemma Patara taonnu sikeing. <sup>2</sup> Ihai kporucwageu mong Foiniki bangecfu kenudeac efaimanu meficgema ihai emma kening. <sup>3</sup> Kengkecma Kipiro nuc kanaugeng taru hemma ferahadacma Siria bangectoaugeng kengkefec. Nga wagengo Tiro taonnu sikema finac ihai faiudeac kenec. <sup>4</sup> Faimanu neni amau emma Yesuac habu meficyunuma yenigoc wenac <sup>7</sup> kefing. Kecmina Asungo meyunuu yeni Pauroca goroyoac dema Yerusarennu mi kenudeac degec. <sup>5</sup> Anu kekeng nasonina wegenua ngicngac namaracfocnginagoc hesicnungec nenahafoc taong wama kondung tegiau kemeing. Kemema sangiu fafoc heima numuing. <sup>6</sup> Numuni wisickeu marimeme amma wageu emmina yeni amau dzigenegec.



<sup>7</sup> Tirounac kengkecma Toremai taonnu sikemina wageu kekeng imoc wisickeec. Wisickeu neni Yesuac habu ihai yugucyunuma wenac mocgu yenigoc taring. <sup>8</sup> Werekengau kengkecma Kaisarea sikema Yesuac siducdede Firipo meficgeing. Firipo ye memefic 7 faiyunugec, yeneac botucfunac. Anu neni yeac amaunoc ening. <sup>9</sup> Ye naroangfora neakpac ngacnaroang kecgec, yeni Anutungo wosoefac ayemmeu profeteyoac dekecgec. <sup>10</sup> Ihai uameme dafiguc kecmina Yudaia bangecfunac profete mong kpara Agabo, ye nenearu hasikeec. <sup>11</sup> Hasikema Pauroac fadenga mema imocngo yengena hanimaria dzegema yofi deec, “Tiri Asungo yofi dede, ‘Fadeng yomocac mingina ye Yerusarennu kensikeu yudangic yeni yofinoc ammima bangec monnunac ngicngac, yeneac mariu faigecde.’”

<sup>12</sup> Yoac ifi deu neni nga amafora neneng Pauro Yerusarennu mi enudeac desegere annima edeni <sup>13</sup> yeng yofi deec, “Ngeni homac kiacma wosoumeme mi anenggec. Ni Yerusarennu witicfu embade, imocsac kphac. Ni ifingoc Kebu Yesuac momoc homebadeacnoc efaiduae.” <sup>14</sup> Yoac edeni mi negenu wama yofi deing, “Kebu negeneg, imoc fingecheso.”

<sup>15</sup> Uameme goa wisickeu Yerusarennu ennideac efaiing. <sup>16</sup> Efaini Kaisareanac Yesuac habuunac goa yeneng hesicnunuma ngic mong kpara Manasong, yeac amaunoc fainunugec. Anu Manasonggo Kipiro nuclu fingerec nga waraima ubamereng anec.

<sup>17</sup> Anu kengkecma Yerusarennu sikeni imohacnac negen negensinggoc tosofocnina yeneng ogo anemmema ubangerec negenggec. <sup>18</sup> Nga werekengau Paurongo Yakoboac amau hesicnunu ening. Emma tacmina kpebung yeneac enara yeni hagec. <sup>19</sup> Hadacgec Paurongo maringina meec. Mema Anutungo nonggo tacmimanu bangec monnunac ngicngac, yenearu misingua meu fora fingerec, imocac yoacsiduc sasawa ayemmeec.

<sup>20</sup> Paurongo yoacsiduc ayemmeu Anutu afehegec wisickeu Pauro yofi edegec, “Tosonina, ge yudangic tauseng dafiguc ferahema habunoc efeango Yesu negensinggema kecdac. Nga yeni sasawango Moseac dedeseriyoac seria mekecandae. <sup>21</sup> Anu geac yoacsiduc yofi hau yeni negengkecdac: Ge yudangic bangec monnu ngicngac, yeneac botucfu kecdac, yeni Moseac yoac wagecdeac amma sabacfocngina yeneac sebi tosangina mi herecgegecdeac deracyunuannecc. Amma yudangic fakanina wagecdeac edeyunuannecc. <sup>22</sup> Amma ngic yeneng geac ifi negengandaeac dafi ambesonga obohode. Ge Yerusarennu hadang, imocac siducnoc negenggecde.

<sup>23</sup> Imocac neni yoac mong edeguni modachbesena. Nenearu ngic 4 kecdac, yeni Anutugoc dedeseri anggecac orucdzongina mi merec merecge kecdac. <sup>24</sup> Geng yenearu tahockema faka kpetiac fede, imoc yenigoc modacma hosuc heiheingina bumma orucdzongina merecgecma wedzecgec. Ge ifi anna gemma geac yofi negenggecde, ‘Yoara hau negening, imoc fora kpac. Ye yengenaoc Moseac dedeseriyoac tofohokecde.’ Ge ifi anna yudangic Yesu negensinggedae, yeni geac ngaba mi anggecde. <sup>25</sup> Anu bangec monnunac ngicngacngo Yesu negensinggedae, yeneac warac singyoac deing, imocac yoacsiduc kibiu yofisac ohoma bic faiyemmeing, ngicngac yeni nemunginaoac sese dema yang heiymmegec ngeneng imoc wama mi nebisia. Ngeni yamberec fusia sawagoc mi nebisia amma sac wamagoc mi nebisia. Amma ngeni kaisero faka wama imoc mi ambisia.”

<sup>26</sup> Ifi degec Paurongo yoacngina negemma ngic 4 yenearu tahocke werekengau yenhafoc Anutuac womonnu emma faka kpetiac hanahegec,

imocac nasoya wisic wisickea amma sesengina faima hosuc tembuc tembuc-  
ngina heigecdeac dekperagiymegec.

<sup>27</sup> Faka kpetiac imocac uameme 7 wisickebeso ammanu Paurongo Anu-  
tuac womonnu emma kecmanu Asia bangecfunac yudangic yeni ye hemma  
ngic ngaba ammima arohogec habutoa wosongina miaru <sup>28</sup> Pauro mem-  
danggema arohogec, "Oe Israengic, ngeni hama meficnunugec meni! Ngic  
yomocngo bangecsoc kengkecma yudangic nenang nga dedeseriyoacn-  
ina amma womonnina, imocac ngaba ambesonga, ngic ifi edeyunukecde.  
Amma womonninau grikgic hesicyunuma ereu kpetiac amanina yomoc  
goteng heidaae."\* <sup>29</sup> Pauro ye Efesonac ngic mong kpara Trofimo yegoc  
taonnu kengha anec yerenggec, imocac ye womonnu hesickeu yerahafoc  
endaoc, ifi eng negensima degec. <sup>30</sup> Imocac amafora yeneng arong-  
ina negemma yacma gbindindinggema hama kpeturanggedacgec. Kpetu-  
ranggemagec ngic goango Pauro mendanggema womonnunac kpedzima  
magec, imohaingoc nagu heidacgec.

<sup>31</sup> Ngabangic yeneng Pauro mema kpehomebeso ammagec Roma wa-  
saingic yeneac garengtoaaru yoac yofi kenu negenec, "Yerusarengic sa-  
sawa yeni yenhafocngoc ngaba sicsauc angemedae." <sup>32</sup> Yoac ifi negemma  
imohaingoc wasai engena mamea meemema nedzima habutoa yenearu  
kemegec. Kemema henggec ngic yeni Pauro kpema kegcgc garengtoa nga  
wasai fora sikegec, yenemma engsac wagec. <sup>33</sup> Anu wasai garengtoango  
sikema deu medacfora yeneng Pauro mendanggema seng yohockanggo  
dzegegec. Dzegegec Pauro ye merac amma noc wiac anec, imocac kpesi  
kpesi ua meec. <sup>34</sup> Anu ngic yeni arona aroga anggec kpeboronnu yoac hania  
negenudeac obohoma deu wasai yeneng Pauro mema yenang uamau  
dzigene kenggec. <sup>35</sup> Anu Paurongo tireu embeso anu ngic yeneng yerecgema  
kucgoc igockegecac wasaingic yeneng Pauro mohockema enggec. <sup>36</sup> Ifi  
anggec ngic habutoango modacyunuma aroho kemma yofi degec,  
"Ngic ye kpeni kpac ambeso!"

<sup>37</sup> Ifi dema Pauro ama manau meembeso ammagec, yeng wasai garengtoa  
kpesimiec, "Ni naric yoac edegubai me?" deu garengngo deec, "Ge grikyoac  
negennec? <sup>38</sup> Warac aigitangic mongngo ngaba meficgeudeac godzungic 4  
tauseng wangecyunuu bangec kisiu hocsiragocfu kenggec. Ge ngic imoc me  
mong?" <sup>39</sup> Kpesimiu Paurongo yofi edeac, "Ni yudangic yombong amma  
Kirikia bangecfu Tarso taong tacde, imohacnac. Ge naric negennenna  
ngicngac yoac kapia edeyunuba." <sup>40</sup> Ifi deu negemmiu Pauro ye tireu  
namma ngicngac maribarac kpouyemmeu yoacngina kpac anu waickema  
tacgec hebraio yoacfusing yofi edeyunuec.

## 22

<sup>1</sup> "Kunengfocna nga tosofocna, ni neanna hania edengunuba negengec."  
<sup>2</sup> Anu Paurongo hebraio yoacfusing deu negemma ning kpedagec. <sup>3</sup> Nga  
ye tahockema edeyunuec, "Ni yudangic, Kirikia bangecfu Tarso taonnu fin-  
gecma imohai kecma yadiai. Kpoukpou Gamarie yeac bageau kecbare yeng  
kiscifocnina yeneac singyoac sasawa kpouneru negendarai. Amma ngeni  
yofinenggac faka andae, imoc ifingoc Anutungo negengngereenubeso dema  
yoac imoc seria yombong mekefai. <sup>4</sup> Amma ngicngac momoc sing gboria  
modagec yunukporac ayemmema witicyunuma witicamau faiyunukecma

\* **21:28:** Anutu womonga gotengagoc hemma ngaba ambacac yeni yoac imoc degec. Bangec  
monnunac ngic, yeneng ihai naric mi enggec, imoc kpaegoc.

yunukpebuc ayemmegecdeac deaingoc. <sup>5</sup> Womong garengtoa nga yudangic gamangtoangina yeneng neac hepuc naric amma hania ifia dekperagibau. Yenennoc kibi mong ohogec, imocac siriha yofi: Ngicngac sing gboriau modacgec ni meficyunuma witicyunuma Yerusarennu meyunu haanduae. Nga turunga yemmegecdeac tosofocngina Damasko kecandae, yenearu mekembadeac nengec.

<sup>6</sup> Ifi dema sing kengkecma wenac dzongiau isoc Damasko ama mewegenebare, imohaingoc kurumennunac kperagitoango gereagoc mama nerarannuec. <sup>7</sup> Nerarannuu bangecfu todingge kpe fema yoac mong yofi fingeru negenai, 'Sauro Sauro, ge nocac nukporac anemma kecannec?' <sup>8</sup> Ifi negemma yofi deai, 'Kebu ge merac?' Deba yofi edenuec, 'Nukporac angannec, Yesu Nadzaretenc ninoc.' <sup>9</sup> Ngic nigoc kecgec, yeni kperagitoango henggec, yoac edenuec imoc ine obohogec. <sup>10</sup> Obohogec neng kpesiai, 'Kebu, noc wiac ambadeac denennec.' deba Kebungo yofi edenuec, 'Ge yacma Damasko kenna wiac anna dema degecdegena, imoc edegugecde.' <sup>11</sup> Nga kperagitoango kicnau neraranggeu fiba kundung kpeec. Ifi amba ngicfocna yeneng marinau mema Damasko menu kenggec.

<sup>12</sup> Ihai ngic mong kefec kpara Anania, yeng dedeseriyoac henanggema memodacma kefu yudangic taong imohaingoc kecgec, yeni sasawango yeac negenggec ngereec. <sup>13</sup> Ngic yennoc nearu wegenac hasikema yofi edenuec, 'Tosona Sauro, ge kicga fitegecna.' ifi deu ihaingoc kicna fitegecma ye henai.

<sup>14</sup> Ifi dema yoac yofi edenuec, 'Kisicfocnina yeneac Anutu, yeng uaya mena dema edeedzacgu anu geng Dindingac mingina hemma yeac enacfunac yoac negennadeac meisingguc. <sup>15</sup> Ge yeac siducdede amma wiac hennegeng annec, siduc imoc bangecsoc ngic edeyunu kembesena. <sup>16</sup> Negennecc, ge naso mi ukuna! Yacma Yesuac kpac kpacna yeac kpacfu mitidoku nadzicma kopocsicga dzuacna.'

<sup>17</sup> Ifi deu Yerusarennu dzigenema Anutuac womonnu emma numuba kicna merecgeu Kebu henai. <sup>18</sup> Hembra yoac yofi edenuec, 'Ama yomocac ngicngac yeni geac enacfunac neac siducna negemma wagecde, imocac amma ge Yerusareng wama bic kenna.' <sup>19</sup> Ifi deu yoac yofi meremmiyai, 'Kebu, ge negensingguc, ni witicfu meyunuma kpekpeturangamea amea meyunu emma dzikacngo yunukefai, imoc bic negendae. <sup>20</sup> Amma siducdedega Stefano sacgoc homemea kpegecdeac ngakpingina hesigec garenggebare kpegec negemba ngereec, yeni imoc negendacdae.' <sup>21</sup> Ifi deba Kebungo yofi edenuec, 'Kpahac, ni bangec hereau bangec monnunac ngicngac, yenearu sueguba kennadeac ge bic efaima kenna.' "

<sup>22</sup> Ngic yeni kedzac kpemagec, Paurongo yudangic wayunuma bangec monnunac ngicngac, yenearu kenudeac warac Anutungo edeac, yoac imoc edeyunuu yeni seriangoc arohogec, "Ngic ifia imoc kekeha kpac ambeso. Ye kefu naric mi ande." <sup>23</sup> Ifi dema arohoma ngatangyunuu ngakpingina herea hesima yube figec enu meuku anggec.

<sup>24</sup> Anggec garengtoango deu wasai yeneng Pauro amanginau meenggec. Amma ngic yeni nocac homac arohomicgec faka negenudeac dzikacngo kpegec kopocsiha deficgeudeac desiyemmeec. <sup>25</sup> Desiyemmeu yeni dzikacngo kpegecdeac witicngo mendangge dzegema taigec. Taigec Paurongo enarangina yofi dema kpesimiec, "Ngeni ngic mong romangic yeneac arennu torokpema kecde, ye yoacfu mi faifai manganaac areng desima dzikacngo naric kpegecde me? Imoc singyoacngina kpede."

<sup>26</sup> Ifi deu enaranginango garengtoaar u kemma edeac, “Dafi ambesonga? Ngic ye romangic yeneac arennu torokpeec kecede.” <sup>27</sup> Ifi deu garengtoango Paurouaru kemma kpesimiec, “Dena, ge foracngoc romangic arennu torokpema kecnece me?” deu Paurongo deec, “Imoc fora ni romangic yeneac arennunac.” <sup>28</sup> Ifi deu yeng deec, “Ni hiedzio homac faiba kirecgenuu romangic anai.” Ifi deu Paurongo deec, “Ni ine fingec fingecna romangic yeneac arennu fingerai.” <sup>29</sup> Ifi deu yeni imohaingoc Pauru faka ammibeso degec, imoc wagec. Wasai garengtoa yeng ine yofi negenece “Pauru ye romangic. Ni ngic ifia witicfu faidua, imoc naric kpac!” Ye ifi negemma kengec kpeec.

<sup>30</sup> Wereckengau wasai garengtoango yudangic yeni Pauru hania damocac yoacfu faigec, imocac hania yombong negenudeac womong gareng enara nga yudangic tutumangtoanginaac memba deu sasawa kpedzucnegec. Amanu Pauru yungecma hesicke kemema kpedzucnegec, yeneac kicfu faiec.

## 23

<sup>1</sup> Paurongo yudangic tutumangtoanginaac memba yenearu serima yoac yofi edeyunuec, “Tosofocna, deba negengec, Anutuac kicfu ni kopocsicnaac negengfagunga kpac kecerema yaguc kecduaengoc.” <sup>2</sup> Ifi deu womong garengtoa kpara Anania, yeng ngic Pauru yafinggema nanggec, yeni yofi dema edeyunuec, “Ngeni dumbengau kpegec.” <sup>3</sup> Ifi deu Paurongo yofi edeac, “Anutungo guude, ge katapa mangana gbakingo oho ohoya, ifia manau bic dzame dzamea. Ge dedeseriyoacac modacma yoacna isinggema desinnunadeac ua mebesena. Nga imoc wama nugecdeac serima denec, ifi amma dedeseriyoac fede, imoc ferahanec.” <sup>4</sup> Ifi deu ngic nanggec, yeneng yofi edegec, “Ge Anutuac womong garengtoa kuha memama yoac ifia mi demina!” <sup>5</sup> Ifi degec Paurongo yofi deec, “Tosofocna, ye womong garengtoa kecede, imoc mi negemma yoac singau mi dedua. Mitikibiu yofi oho ohoya fede,

‘Ge enaramemefocga mi sowecyunubesena.’” *(Makekeng 22:28)*

<sup>6</sup> Anu enarameme goa yeni sadukaiongic nga goa farisaio arennunac ifingo kecgec. Kecmagec Paurongo imoc negemma ubea miacma tutumangtoau yofi edeyunuec, “Tosofocna, ni farisaiongic amma yeneac arennunac fingerai. Nga homecfunac yacyac fingerudeac negensinggema kecma yoac imoc nanggeanduae, imocac yoacfu fainudae.” <sup>7</sup> Yoac ifi deu farisaiongic nga sadukaiongic yeni yenaocngoc easiemegec tutumangngina tohoec. <sup>8</sup> Nga sadukaiongic yeni deandae, “Homecfunac yacyac nga angero amma bangecac hadehade nga yafing hania hania, imoc mi fede.” Nga farisaiongic yeneng deandae, “Imoc fora fedacde.”

<sup>9</sup> Amma imocac tutumangnginau orongtoa megec. Mekecma farisaio yeneac habuunac mitiac negen negengngic goa yacma yoac gereagoc yofi degec, “Neni ngic yomocac kopocsic hofocdimba. Angero me asu mongngo yoac edeefu neni imocac yoac mong mi debisina.” <sup>10</sup> Dema yoacngingano easiemegec wasai garengtoango Pauru taima merecgebauac kengec kpeu deu wasaingic yeneng kemema Pauru ngic botucnginaunac taimama ua amanginau mekenggec.

<sup>11</sup> Mekemma tofocnac imohaingoc Kebungo Pauru fingecmima yofi edeac, “Ge kucga mena, ge yei Yerusarennu neac hepuc amma haniana dekperagiymenec, imoc ifingoc Roma taonnu neac hepuc amma haniana dekperagiymebesena.”

12 Ama wereckenu yudangic goango yoac dedzege amma yenaocngoc dedeseri seria yofi degec, "Nenang nenedoku segekecma Pauro kpehomemaguc nenedoku nebisina." 13 Ngic yeni uba mocgu amma yoac imoc dedzege anggec, yeneac kpetengina 40 ferahaec. 14 Ngabangic yenenoc womong gareng enara nga yudangic enarafocngina yenearu kemma deficgemyemema yofi edeyunugec, "Neni nenedoku segekecma Pauro kpehomemaguc nenedoku nenide, yoac imoc deseriding. 15 Imocac ngeni tutumangtoaac memba yenigoc wasai garengtoaaru yoac yofi faigec kembeso, 'Ge Pauro neneac tutumannu suena hau yoara monggoc dehomebisina.' Anu yoacngina negemma ifi anu nenang sinnu sufuma Pauro mema kpehomenide."

16 Ifi degec Pauro deuyango yareyoac imoc negemma wasaiamau emma aniha edeec. 17 Edeu Paurongo wasai yeneac enara mong kpacma yofi edeec, "Ge medac yomoc wasaigarengtoaaru hesicke kenna. Yeng yoac mong edeude." 18 Ifi deu ngic yeng medac imoc wasai garengtoaaru hesicke kemma yofi edeec, "Witicngic Pauro yeng kpacnuma edenuu medac yomoc yoac edeguadeac hesicke haduae."

19 Ifi dema edeu garengtoango medac mariau mema hedzihau meicke kemma tembucngira tacma kpesimiec, "Ge noc yoac mehanec, dena negemba." 20 Kpesimiu medacngo yofi edeec, "Yudangic yeni gearu yoac faigec haudeac denegeng andau. Nga geng Pauro tutumangnginau hesicke kenna yeac haniaya seng negenggecde, ifi kpesigenggecde. 21 Kpesigemma haniaya seng negenggecdeac fenggegugec mi negembesena. Ngic kpetengina 40 ferahede, yeni sinnu sufuma Pauro kpehomegecdeac dedeseri seria yofi dedau, 'Neni nenedoku segekecma Pauro kpehomemaguc yaka nenide.' Yoac ifi deserima yeni bic efaima geac yoacac tomai kecdae." 22 Medac ye yoac ifi deu garengtoango yofi derahema sueec, "Ge yoacsiduc imoc hama deficgema edenunc, imoc ngic mong mi edeyunubesena."

23 Amma wasai garengtoango wasaingic yeneac enara yohockang kpacyuruma yofi edeyuruec, "Ngeri kemma yofi ambesera, wasaingic 200 yeni hanungo sing kekeng nga becasic witiau kekeng 70 amma sangarameme 200, ifigucngo efaima tofocnac 9 kiroc ammanu Kaisarea mekembisia. 24 Amma Pauroac becasic goa meficyunuma sate heiyemmebisia. Anu ngeni ye aikic garenggema ngictau Feriki, yearu mekembisia."

25 Ifi dema ngictauac kibi mong yofi dema ohoec.

26 "Kraudio Risia neng Ngictau Feriki geac kibi yomoc ohoduae. Wenacngerec.

27 Wasaingic yeneng ngic mong mehadae, yudangic yeneng mema kpehomebeso anggec. Anu neng ye romangic yeneac arenunac, yeac ifi negemma wasaingic yenigoc kemma maringinaunac mesiang. 28 Mesini yoacfu faigec, imocac hania negemba dema enara tutumangnginau mekenai. 29 Mekemma singyoacnginaac tohoma kecdaeac amma yoacfu faigec, imoc meficgema yofi negenai, 'Ye yoacfu faigec, imoc kpehome home me witicamau fai faiac siriha mi ande.' 30 Hau ngic goa yeni sinnu sufuma Pauro mema kpegecdeac dekiric anggec negemma gearu bic sueba hade. Amma yoacfu faidau, ngic imoc ifingoc sueyunuba gearu hama yoara edegubisia."

31 Ifi ohoma yemmeu wasaingic yeni garengnginaac enac tofohoma Pauro tofocnacngoc hesicke kengkecma Antipatri taonnu kenggec. 32 Wereckengau wasaingic tosea yeni amau dzigenemagec becasicfu tacgec,

yeni yenaoc Pauro hesickema Kaisarea kenggec. <sup>33</sup> Kemma ngictau kibi mima Pauro ifingoc mariaua faigec. <sup>34</sup> Faigec ngictaungo kibi osoma Pauro kpesimiec, “Ge Bangecga dahacnac?” deu Paurongo deec, “Ni Kirikia bangectoauac.” <sup>35</sup> Ifi deu ngictaungo yofi edeec, “Ge yoacfu faigugec, yeni hama fingecnenggec geac yoac debesonga.” Ye ifi dema Pauro Herodeac amau faima garenggegecdeac edeyunuec.

## 24

<sup>1</sup> Uameme 5 wisickeu womong garengtoa Anania nga yudangic enarafocngina goa amma singyoacac negen negengngic mong kpara Teaturo, yeni Kaisarea amau kemema ngictaularu Pauroac yoac degecdeac fingecgec.

<sup>2</sup> Fingecgec ngictaungo Pauro deu hau Teaturongo yeac yoac dema ngictau yofi edeec, “Ngictau gombunnina Feriki, ge gombunga garennununa ruae-goc kecdimbe. Amma geac negen negenggac amma kekecnina heimerenu gombunga kecni <sup>3</sup> nenearu amasoc nga iwai sasawa ngereema ereec. Imocac geac negenni naric angkecde. <sup>4</sup> Amma yoac deba uanaso ukubanggac mengisima negen negenninaac yoac wegenanec edeguba.

<sup>5</sup> Ngic yomocac faka yofi hening, ye deendema anemmekecde, imoc yudangic bangecsoc kecdac, yeni sasawango ngaba sicsauc meficgeyem-meande amma Nadzarete mitiareng yeneac enaranoc kecde. <sup>6</sup> Ye Anutuac womong imoc goteng heibeso anu meing. [Mema dedeserininaac sinnu wiac ammibeso <sup>7</sup> ammina wasaigarengtoa Risia ye medacfora yenhafoc kucgoc hama gereagoc wangecnunuec. <sup>8</sup> Amma yeac hania degec, ngic imoc yeni gearu hama fingecgecdeac deyemmeec.] Nga neni yeac yoac edegudimbe, imoc geanggaoc dekpesi ammima yoacfu faidimbe, imocac hania sasawa meireckenade.” <sup>9</sup> Yoac ifi deu yudangic yeni meficgema yoara nangegec.

<sup>10</sup> Anu ngictaungo Pauro yoac anudeac wadzimiu ye yoac yofi merem-miec, “Ge bangec yomohai ngicngac yeneac desidesingic kifa homac kecanec, imoc negensima haniana ubangeregcoc deba. <sup>11</sup> Ni Yerusarennu Anutu afeheba dema emma kecba uameme 12sac andac, ge yoac imoc negengyohoc amma ngic kpesiyemmena edegugec. <sup>12</sup> Ni Anutuac womong manau ngic goa yenisogc yoacna engemmama mi anec. Me kpekpeturang ama goau me amasobennu haifaka mema ngicngac hagec, imoc mi anai. Faka imoc mong amba mi henggec. <sup>13</sup> Ngic yomoc yeneng haniana dema edegudac, yoac imocac fora ifingoc edzacgugecdeacsoc mi ande. <sup>14</sup> Amma mong deficgegemma negenna: Sing gboria goango miti miti deandae, imoc modacduae. Imocac sinnu kiscifocnina yeneac Anutu eweheimima yoac sasawango dedeserinina modacde, imoc nanggeanduae. Amma profete yeni yoac deoho anggec, imoc negensinggeduae. <sup>15</sup> Amma kecma ngic mangana nga gombunga homecfunac yacyac naso wegeneude, ngic yomoc yaguc nesunggedae, yeni nga ni nenahafoc wiac imoc fingerudeac negens-inggema kecdimbe. <sup>16</sup> Ifi amma Anutuac kicfu nga ngic kicfu kopocsicnaac negengfagunga kpac ua serima memangoc kecanduae.

<sup>17</sup> Ni kifa goa bangec hereau kecma ubangerecac wiac ngic arengfocna yemmebadeac amma Anutuac sese faibadeac Yerusareng taonnu hayai. <sup>18</sup> Amma hosuc heiheiac segekekec nga faka kpetiac mesima womonnu emma kebare meficnugec. Ihai ngic habutoagoc me kpeboronggoc mi hayai. <sup>19</sup> Asia bangecfunac yudangic goa, yeni ine kpeborongtoa ifi anggec. Yeninoc kopocsicac wiac mong mekecbau dede gearu hama neac yoac

dekperagibau. <sup>20</sup> Me ngic yoc nandae, yeneac memba tutumannu nambare neac kopocsic mong meficgegec isoc deficegbisia. <sup>21</sup> Ni yoac mocgusac botucnginau namma yofi kpacma deai, 'Homecfunac yacyac fede, yoac imoc nangeanduae.' Imocac yaguc geac kifu menu hama yoacfu fainudae."

<sup>22</sup> Ngictau Feriki ye kekec gboriaac siduc negendarecac yofisac edeyunuec, "Wasai garengtoa Risiango Yerusarennac mau yoacngina desibade." Ifi dema yoacngina feudeac dema sueyunuec. <sup>23</sup> Amma ye wasaigareng yofi edema sueec, "Ngeni Pauro garenggema ngabakic mi hembisia amma tosofora naric hama heimefic ammibisia."

<sup>24</sup> Uameme goa kecma Feriki ye nga enema, yudangac kpara Drusira, yeri yerahafoc hama Pauroac deec erema Yesu Kristo negensinggegecac hania edeyuruu negenoc. <sup>25</sup> Nегemmaec yofi edeyuruuec, "Faka dindigac modacbesonga nga ubasebi garenggema faka mangana wabesonga amma desidesi nasoya haude." Ifi deu Feriki kengec kpeu Pauro yofi edema sueec, "Naric kenna, kecma naso monnu titing mong fingecnenu monggoc kpacguba habesena." <sup>26</sup> Ngictau ye hakecmangoc yofi negenec: Paurongo hiedzo goa nenu witicamaunac waba maude. Negeunga ifi feecac nasosoc kpacma yegoc yoac denegeng angkefec. <sup>27</sup> Ammanu kifa yohockang wisickeu kia mong kpara Porkio Festo, yeng ngictau Ferikiac tatac meec. Anu Ferikingo yudangic ubangerec kpeyemmedacma Pauro witicamau tacmanu wama kenec.

## 25

<sup>1</sup> Festo ye Yudaia bangectoaac ngictau ua hanaheec. Hanaheu uameme harebec wisickeu Kaisarea wama Yerusarennu enec. <sup>2</sup> Enu womong gareng enara nga yudangickuneng yeneng yearu hama Pauroac yoac dekperagima <sup>3</sup> hatahemima yofi degec, "Ge neneac wosoefac amma yoac faina kenu Pauro ye Yerusarennu habeso." Yeni sinnu sufuma namma Pauro kpehomegecdeac negemma ifi degec. <sup>4</sup> Edegec Festongo yofi edeyunuec, "Pauro ye Kaisarea ihai witicamau taru ni yei kapianec tacmaguc monggoc dzigenema kemebade. <sup>5</sup> Kemeba ngeni Pauro yoacfu faidauac wiac mong metacdaeu debeso dema ngenearunac enarameme goa yeni nigoc kemegec kopocsic mong meficgeec isoc yeni yeac yoac imoc dedacbisia."

<sup>6</sup> Ifi dema uameme 8 me 10 Yerusarennu kecma Kaisarea kemma ke-meec. Kemema wereckengau desidesi amau emma tacma deec, "Ngeni Pauro mehagec!" deu meenggec. <sup>7</sup> Meenggec Yerusarennac yudangic yerecgedacma yoac hania hania homac nesunggema seria dema nanggec. Amma yeni yoac imocac fora meficgegecdeac obohogec. <sup>8</sup> Nga Paurongo yoacngina turunga meremma hania yofi deec, "Ni yudangic dedeseriyoacngina me Anutuac womong me ngictau Sisa, yeni mong mi deman-ganeyunuai."

<sup>9</sup> Ifi deu Festongo yudangic ubangerec kpeyemmedarudeac Pauro kpesimiec, "Ge Yerusarennu naric emma ihai yoacga desibai me?"

<sup>10</sup> Ifi deu Paurongo yofi meremmiec, "Yoc nanduae, imoc ngictau Sisa yeac yoac desi desiamanoc nga neac yoac yomohai desibesonga. Ni yudangic faka mangana mong mi ayemmai, imoc geanggaoc negennec. <sup>11</sup> Ni kopocsictoa mong meficgebai dede nuhomenadeac dena sebina mi segerebai. Nga yeni ikocfu nesunggema haniana dedaeu ngic mongngo yeneac mariu naric mi fainuude, imocac amma Roma ngictau Sisa yeng yoacna desiudeac deduae."



<sup>12</sup> Ifi deu Festongo memeficfora yenigoc denegeng amma Pauro yofi edeec, “Ge ngictau Sisa yearu kembeso denec, imocac yearu kembesena.”

<sup>13</sup> Uameme goa wisickemanu ngictau Agripango naina Beanikegoc Kaisarea kemema Festo yuguckeoc. <sup>14</sup> Amma yeri uameme goa yegoc tacyac ammaec Festongo Pauroac yoacsiduc ngictau Agripa yofi edeec, “Ferikingo ngic mong witicamau faima kendaru takecde. <sup>15</sup> Anu hasikema Yerusarennu emba yudangic yeneac womong gareng enara nga enarameme yeni nearu hama kpedzucnema ngic ye kpegec homeudeac edenugec. <sup>16</sup> Edenugec ni yoac turunga yofi merengyemmeai, ‘Ngic mong hania kpacfu memeting ammiampi, sing imoc romangic nenearu mong mi fede. Ngic yoaragocngo ngic yoacfu faide, yeri eacma nammaec fora debesonga.”

<sup>17</sup> Ifi meremba yeh eacemeing, imohaingoc wereckengau ni desi desiamau emma Pauro mehagecdeac deai.’ <sup>18</sup> Ifi dema Pauro yoacfu faigec yeni yeac faka mangana mong deficgegecde debare yeni yenang mitinginaac sing fede, imocac hesucemegec. <sup>19</sup> Ngic mong kpara Yesu, yeac yofi degec, ‘Ye bic homeec.’ Anu Paurongo yofi dekperagiec, ‘Ye gbori kecde.’ Yeni ifisac degec. <sup>20</sup> Nga ni yoac imoc negentegecbadeac osima yofi kpesimiai, ‘Ge Yerusarennu naric emma ihai yoacga desibesonga me?’

<sup>21</sup> Edeba Pauro ye ngictau Sisango yoara desiudeac deec. Ifi deu desiai, ‘Pauro ye witicamau tomai tacmanu kecma sing mong meficgemaguc ngictau Sisaaru faiba kenude.’ ”

<sup>22</sup> Festongo ifi dema edeu Agripango deec, “Ni neannaoc ngic yengena enacfunac yoara negembadeac anende.” Ifi deu Festongo deec, “Wereckenu naric negennade.”

<sup>23</sup> Wereckengau Agripa nga Beanike yeri sebikibi meemema tutumang amau enoc. Nga wasai garengtoa nga ama imocac ngic engena yeni yenhafoc modacyuruma enggec. Anu Festongo deu Pauro meenggec. <sup>24</sup> Meemmagec Festongo yofi edeyunuec, “Ngictau Agripa nga ngicfocna yaguc nigoc tacdae, edengunuba negenggec: Ngic yomoc nande, yeac amma yudangic noc efeango yehi nga Yerusarennu kpacnuma hatahenemma deandae, ‘Ye naric mi kecbeso.’ <sup>25</sup> Nga yengenaoc Roma ngictau Sisango yoara desiudeac deecac yearu sueba kenude. Nga neng ine ye homeudeac kopocsic mong mi meficgeai. <sup>26</sup> Amma yoac fora hofocma ngictau Sisa yeac kibi ohoba dema obohoduae. Imocacnoc ngic yomoc ye ngenearu nga ngictau Agripa gearu faiba nanu ngeni haniaya negemma fora meficgegec kibi ohoma faiba kembeso. <sup>27</sup> Nga ni ngic mong witicamaunac kopocsahaac kibi mi ohoma Roma taonnu eng sueba kekengagc negemba naric mi ande.”

## 26

<sup>1</sup> Agripango Pauro yofi edeec, “Geangaoc haniaga dena negenni.” Ifi deu Pauro ye maria sinema yengena haniaya yofi edeyunuec, <sup>2</sup> “Ngictau Agripa, yudangic yeni yoacfu fainudae, imocac turunga gearu debade. <sup>3</sup> Geng yudangic neneac haifaka nga deendemanina fede, imoc negendacnec, imoc fora, amma negennemma tacmana yoacna debadeac ubana ngereede.

<sup>4</sup> Ni sabacfungoc amanau kekecmemena kecerema Yerusarennu kenai, imocac hania yudangic yeni negendacdae. <sup>5</sup> Ni waracngoc farisaio singgina tongganang yeneac botucfunoc kefai. Nga haniana hennengeng anggecngo dena imoc naric edegubau. <sup>6</sup> Anutungo homemea megboriyunuude, yeng yoac imoc bangecfocnina bicngoc deseriyemmema edeyunuec, yoac imoc fora fingerude, imoc negensinggeduaeac yaguc yoacfu nanduae.

<sup>7</sup> Israehabu 12 yeni hadzing tofocnac nasoya kpac Anutungo wiac deseriyemmec, imoc fingeudarudeac negensinggema Anutu afehema kecdae. O ngictau Agripa, imocac hania imoc nenahafoc negensinggemaguc yudangic yeneng yoacfu fainudau. <sup>8</sup> Amma Anutungo homemea megboriyunukecde, imoc ngeni nocac negenggec mi angana isoc angkecde. <sup>9</sup> Amma ni Yesu Nadzaretenc, yeac kpacsiduhaac kuc sing hania haniau memabesare dema yofi anai.

<sup>10</sup> Anu womong gareng enarango uakibi nenggec mekecbare kpetiac arengfora noc efea witicamau faiyunukecma yunuhomegecdeac degec, imoc hepuc amma negengyemmeai. Imocngoc Yerusarennu anai. <sup>11</sup> Amma ni naso homac yudangic yeneac kpekpeturang amaya amaya kemma ubamereng kpemeting ayememema Yesu denggbaringgegecdeac ayememema yunukporac ayemmekefai. Amma herebu yombong ayemmeai, imoc efea kpac amma imoc yeisac mi anai, kpac. Ni bangec goaac taonnu ifingoc kemma yunukporac ayemmekefai.

<sup>12</sup> Ifi angkecba womong gareng enara yeneac dedeu uakibi mema Damaskou ua ifingoc mebadeac fainugec kenai. <sup>13</sup> O ngictauna, ni sinnu kembare naso 12 kiroc ammanu kurumennunac kperagi mong kuneng wencac kperagia ferahade, ifiango mama ni nga arengfocna nerarannunuec. <sup>14</sup> Nerarannunuu neni bangecfu todingge kpefedacma hebiraio yoacfu yoac mong yofi fingeru negenai, 'Sauro Sauro, ge nocac nukporac anemma kecannec? Ge ubaseri ifi angkecma yasu biringa enaragocfu geanggaoc kpena nendangguu kpendzeng kpenade.\*'

<sup>15</sup> Ifi negemma yofi deai, 'Kebu ge merac?' deba yofi edenuc, 'Nukporac anengkecne, Yesu ninoc. <sup>16</sup> Ge yacma nanna. Yaguc neac enac tofoc tofohongic annadeac fingcengduae. Imocac wiac yaguc hennec nga ngade edzacguba hennade, imocac enacdedena kecbesena. <sup>17</sup> Ni yaguc arengfocga nga bangecareng, yeneac mariunac mesigukecbade. <sup>18</sup> Amma ni yenearu sueguba ge kemma ngicngac kicngina merecgena kundung ngadehema kperagiyo kembisia. Amma Satanggac kuc herecgena yeni Anutuaru kembisia. Ifi amma kopocsicngina kpac anu Kebu ni negesinnuma kpetiac kekec yemmeyemmea, yeneac habuu torokpegecde.'

<sup>19</sup> Ngictauna Agripa, ni kurumennunac onga henai, imoc mi kpeai. <sup>20</sup> Ni hanahema Damasko kemma dzigenema Yerusareng nga Yudaia bangecac yuda ngicngac amma bangec monnunac ngicngac, yenearu kenai. Kemma yeni ubangina dzigeneu Anutuaru kpeketahema ubamerem merenggac angammeme meficgegecdeac edeyunukefai.

<sup>21</sup> Ni ifi anaiac yudangic yeneng womonnu menuma nuhomebeso anggec <sup>22</sup> Anutungo garennukecmanu enacyoara deai amma yaguc deduae. Ni ngic engena mamea ngenahafocngoc tacmagec yomoc namma edengunuduae. Profete nga Mose yeneng wiac fingerudeac dema ohogec, imocngoc dekeduae. <sup>23</sup> Messia ye kpendzeng negengkecma homeec. Amma homemea yeneac enara mema yacma yudangic nga bangec monnunac ngicngac momoc kperagiyoara dekperagiyemmedarude. Yoac imocnoc Mose nga profete yeneng ohogec."

<sup>24</sup> Pauro ye haniaya ifi dema edeyunuu Festongo yofi arohomic, "Ge negen negengtoagango ubasufu meficgegende."

\* **26:14:** Naso imohai yeni burumakangina yasu biringagocngo odau faiyunubesonga yasu imocngo sebingina nendange kecgec.

<sup>25</sup> Ifi deu Paurongo yoac yofi meremmiec, “Ngictau Festo, ni ubasufu mi anduae. Ni yoac fora tongganang deduae. <sup>26</sup> Yoac deduae, imocac hania ngictau Agripa yeng negendeacnoc yearu efea deduae. Yoac deduae, imoc sufu sufu mi fingerec. Ngictau ge negen negeng monggac mi obohoney. <sup>27</sup> Ngictau Agripa, ge profete yeneac yoac negensingenec me? Negensingenec, imoc negenduae.”

<sup>28</sup> Ifi deu Agripango yofi edeec, “Anengkecmana mi hereemanu Kristoac areng ambaiaac.” <sup>29</sup> Ifi deu Paurongo deec, “Naso herea me wegena, imoc mi debade. Ge nga ngic goa yaguc yoac yomoc deba negendae, ngeni ni isoc anggecdeac numuduae. Senggoc tacduae, imocgoc anggecdeac ine mi deduae.”

<sup>30</sup> Ifi deu ngictau Agripa nga Festo amma Beanike nga goa tagec yeni yacma <sup>31</sup> kendacma denegeng amma yofi degec, “Ngic ye homecac me witicamaac areng mong mi ande.” <sup>32</sup> Amma Agripango Festo yofi edeec, “Ngic yomoc ye ngictau Sisango yoara desiudeac mi debac dede, ge naric yungecna kemma kecbac.”

## 27

<sup>1</sup> Anu wasaingic enara mong kpara Yurio, yeng Sisaac habu, imohacnac wasaingic 100 garengyunuec. Nga Itaria bangecfu kennideac naso wegenu ngictaungo deu Pauro nga witicngic goa Yurio yeac mariu faiyunuec, yeng meyunuu yenhafoc kporucwageu enggec. <sup>2</sup> Nga wage imoc Adramiteng taonnunac amma Asia bangec dumbengau modacma taong tackenec, ihai enudeac dedea, neni wage imohainoc emma Tesaronikenac makedoniangic mong kpara Aristako, yegoc nenahafoc kening.

<sup>3</sup> Werekengau wage Sidong taonnu emmanu Yuriongo Pauro ogo amima negemmiu taonnu keng emma ogofora yugucyunuu heimefic amnigec. <sup>4</sup> Nga wageu monggoc emma taong wamina firangng kennideugeng haecac Kipiro nuc nga Asia bangec botucngirau kening. <sup>5</sup> Kemma Kirikia nga Pamfiria bangec ferecgema kengkecma Mira taonnu Rikia bangecfu kensikeing. <sup>6</sup> Kensikeni ihai Aresandria taonnunac kporucwage mong tacma Itaria bangecfu kembeso anec. Nga wasaingic enarango imoc meficgema ihai menunuu ening. <sup>7</sup> Emma uameme goa dengec dengec kengkecma ua ebiriangoc mema Kinido taong tarecfugeng sikeing. Sikeni firangngo kperennunuu Kreta nuczugeng kening. <sup>8</sup> Kengkecma nuc imocac dumbenga mong kpara Sarimone ferecgema Rasaia mewegenema kondung medaha mong feec, kpara Wage bris gombunga, neni uaesa mekecmangoc ihai ening.

<sup>9</sup> Kondunnu naso herea kengkefing amma kianomang naso mewegenunuu kecma memanganenunubacac Paurongo goroyoac yofi deec, <sup>10</sup> “Ngicwiac, yoc monggoc kennide negemba heocnenide. Wage nga finacsac kpac, ngic nenahafoc kondunnu kemebinggac.” imoc hemma negenduae. <sup>11</sup> Ifi edeu wasaigareng yeng ine Pauroac yoac mi negensinggema wagegareng nga wage mingina yereac yoac negemma tofohoec. <sup>12</sup> Nga kondung medaha bic henggec wagengo ihai kianomanggoc tatacacsoc mi anec. Ifi anu yeni imoc wama Kreta nuc imocac taong mong brisiagoc kpara Foiniki, ihai naric endacma tacmagec kianomang naso wisickeudeac homacngo degec. Ihai mura seria mi kpeande, yowarecngosac efea kpeande.

<sup>13</sup> Anu kondunggac firang firang gombunga kpeu wagengic yeneng degec, “Naric kennide.” dema angka kpedzigez ereu Kreta nuc kpegegengema

kening. <sup>14</sup> Kemmina naso mi hereemanu firang kpara murango nuc fer-  
 eegema wage sebikpengau kucgoc kpeec. <sup>15</sup> Kpema wage mefaheu firanggac  
 kucfu wage garenggegedeac ambibiema wagec firanggac songou kenu ken-  
 ing. <sup>16</sup> Kengkecma nuc kapia mong kpara Kauda, imoc wadzahemima kem-  
 mina dinggi kondunnu kemebeso anu mi mebinggacsoc <sup>17</sup> uaes mekecma  
 dinggi wage witaui kpedzima faing.

Nga wage tohobacac imoc witicngo meserima kpfuseing. Kpfusema  
 dzegema Siriti sangiu, ihai embinggac amma wage yomeaac kporuc kuneng  
 kpedzigeac mau firangngo fifinunuu kening. <sup>18</sup> Kenni firang kuhagoc kpema  
 feu memanganenunubacac wereckengau finac goa kondunnu ukugec ke-  
 meec. <sup>19</sup> Kemeu hadzing tofocnac harebec anu wageac finac goa monggoc  
 ukugec kemeec. <sup>20</sup> Kemeu hadzing tofocnac homac firang yadango kpema  
 fec. Feu neni wenac me asomeng mong mi fingeru hemma negen negen-  
 nina fonggou kekecnina mi fingerudeac negening.

<sup>21</sup> Anu ngic yeni naso herea nenedoku wama kecmagec Paurongo kemma  
 botucnginau namma yofi edeyunuec, "Ngicwiac, ngeni neac yoac negembau  
 dede Kreta nuc mi wabing. Amma forangoc, wage mi manganeu finac  
 naric mi ukubing. <sup>22</sup> Nga nenang botucfunac mongngo mi kpac anudeac  
 ubangina kuha mi mabeso. Nga wage ine kpedzameude. <sup>23</sup> Worang tofocnac  
 Anutunaac enac tofoc tofohoya kecduae, yeac angero mongngo nearu hama  
 namma <sup>24</sup> yofi edenudac, 'Pauro, mi kengeguu, ge Roma ngictau Sisa yeac  
 kicfu nambesena, imoc fingecebeso. Anutungo geac nunumuac amma yofi  
 dede, "Ngic yomoc ngeni wageu kecdae, ngeneanunac mongngo mi kpac  
 anude." ' <sup>25</sup> Imocac ngic yomoc ngeni ubangina ngereeu. Anutungo yoac  
 edenuande, imoc ifi fingerude, imoc negensinggeduae. <sup>26</sup> Anu wagengo ine  
 nuc monnu enu wani nedzamebeso."

<sup>27</sup> Ifi deu Adria kondunnu meang kpeang kecmina hadzing tofocnac  
 14 anec. Amma tofocnac dzongiau wagengic yeni bangec mewegene  
<sup>28</sup> negemma kpete ukugec kemeu mita 36 anec. Iohanec wisicke kemma  
 kpete monggoc ukugec kemeu mita 27 anec. <sup>29</sup> Anu hoc witaui embing-  
 gac dema kengecyunuu wage buyau angka 4 ukugec kemeu ama wereck-  
 enudeac numugec. <sup>30</sup> Numumagec wagengic yeni wage wama worabeso  
 negensima wage dinggia faigec kemeu ikoc amma yofi degec, "Neni wage  
 dumbengau angka mong faini kemeude." <sup>31</sup> Ifi degec Paurongo wasaigareng  
 nga ngicfora yofi edeyunuec, "Wagengic woragecdeu ngeni komoc mi  
 kpegecde." <sup>32</sup> Edeyunuu wasaingic yeni dinggiac witic herecgegec kon-  
 dunnu kemeec.

<sup>33</sup> Kemeu ama werac wereckengac Paurongo ngic yeni yaka negecdeac  
 ngombongyunuma yofi edeyunuec, "Ngeni ebicfu yaka wama kecmagec,  
 yaguc uameme 14 ande. <sup>34</sup> Herenginango yakaac derecgeganu yaka mi  
 nene kecma homebauac ngombongngunuma deduae." Ifi dema yofi deec,  
 "Ngeni ubayohoc mi anggec nocac orucdzongina mong mi mama sufuude."  
<sup>35</sup> Ifi deu yeni sasawango hemmagec kicnginau ic sogong mong mema  
 Anutu dangge edema merecgeganu neec. <sup>36</sup> Neu yeni imoc hemma ubangina  
 ngereeu ifingoc yaka nedacgec. <sup>37</sup> Ngic wageu kefing, neneac kpetenina 276.  
<sup>38</sup> Anu yaka negec gebecyunuu wage efaiudeac wit homac wageu fec, imoc  
 kondunnu ukugec kemeu wage efaiec.

<sup>39</sup> Ama wereckenu bangec mi hehenaac hembibiegec. Amma kondung  
 medaha mong hoc kphac sangisac feu yeni imoc hemma wage imohai

naric enudeac degec. <sup>40</sup> Ifi degec ngic yeneng angka witicngina herecgegec kondunnu kemeu naso socfungoc wage gombunga garenggegecdeac somba yungecma kporuc kpedzige enu firang kporucfu kpeu kondung kpendz-icma kenggec. <sup>41</sup> Kemma kondung botuhau sangi mong erema feec, ihai emma wage dumbengau hendanggeu serimanu siritembong yadango wage buyaubigeng kpedzameec.

<sup>42</sup> Wage dzameu witicamangic yeni fifia mema worabauac wasaingic yeneng yunuhomebeso degec. <sup>43</sup> Ifi degec wasaingic garengnginango Pauro onggongeudeac negemma kpetariyemmemma yofi edeyunuec, "Fifia mema ngeneng kondunnu waraima yuma kemema fifia mema tegiau enggec. <sup>44</sup> Amma goa neneng katapa witiau nga goa wage kpedzac kpedzamea witiau kenggec." Neni nenahafoc ifingo ifi amma tegiau endacni nenearunac monggac sebua mi manganec.

## 28

<sup>1</sup> Neni kondung tegiau gombunga emma naning. Nanni nuc imoc kpara Merite degec negening. <sup>2</sup> Anu nuc imocac ngicngac yeneng hoannunuma kianomang nasoac amma gerecoa yukenemmegec dzeu negening. Amma faka gombunga goa ifia homac anemmegec.

<sup>3</sup> Anu Paurongo gerec kpiriria kpedzucnema medzucke hama gerecfu faiu kemec. Kemeu boudzoc mong gerec negemmima gereckpiriria manaunac erema Pauro mariau kima kpataingge nanec. <sup>4</sup> Ifi nanu bangec imocac ngicngac yeneng imoc hemma denegeng amma degec, "Ngic imoc ye ngic kpehomeecnoc, ye kondunnu mi kemema homedac, imoc fora. Nga ye kondung tegiau yei eremanu turunga sikemiu homeude." <sup>5</sup> Ifi degec Paurongo boudzoc gigima kpesiu gerecfu kemeu sebua ebic mong mi fingerec. <sup>6</sup> Yeni imoc hemma yofi degec "Boudzoc enara imohai yadiude me ye makpema homedarude." ifi dema tomai tacmagec sebua ebic mong mi fingeru yeni hemma negemma degec, "Ngic ye nemu."

<sup>7</sup> Nuc imocac ngickuneng kpara Popirio, yeac ama bangeha wegenac feu yeng ama heinemmeu uameme harebec yegoc tacyac aning. <sup>8</sup> Ammina Popirio mamango amau sebigerec hafei amma kerac ukuuku ammiu feec. Feu Paurongo ameau emma maria sebua faima numuma ngic mengereec. <sup>9</sup> Mengereu ngereeu nuc imocac ngicngac siduc imoc negemma hafeigoc homac yeneng ifingoc sikedacgec mengereyunudarec. <sup>10</sup> Mengereyunuu ngicngac yeni ubangerecoa negennemmemma kekennaso wegenu singgac neneyaka nga hieffinagoc kennideac sirihaui wageu fainemmegec.

<sup>11</sup> Kporucwage mong kianomang nasoac ihai nangkefec. Nga afo harebec wisickeu neni wage imohai emma kening. Wage imoc Aresandria taonnunac nga dumbengau nemuonga mong nanec, kpara Kasotoro nga Porukisi. Kasotoro nga Porukisi yeri foratombosonga. <sup>12</sup> Kengkecma Siraku taonnu kensikema emma ihai uameme harebec tacma <sup>13</sup> taong imoc wama Regiong taonnu kemma taring. Imohai tacni wereckengau ngadeninausing yowarec kpeu uameme mong wisickeu Puteori taonnu kening. <sup>14</sup> Kensikema negen negensinggoc tosofocnina goa meficyununi heitainunugec uameme <sup>7</sup> yenigoc tacyac amma imohacnac hanising kengkecma Roma kening. <sup>15</sup> Kensikeni Roma taonnu Yesuac habungo siducnina bic negenggecac goango hakecma Apio yeneac emeneclu meficnunugec. Nga goango ama mong kpara Kiang ama harebec, imohai meficnunugec. Meficnunugec Paurongo yenemma Anutu dangge edema ubangerec negemma kuc meficgeec.

<sup>16</sup> Roma taonnu sikeni Pauro witicamau mi fama ama monnu tarudeac deu yeni naric degec. Ye imohai tacma worabacac wasaingic mongngo ye garenggema kefec. <sup>17</sup> Ye ifi tacmanu uameme harebec anu yudangic yeneac garengfocngina kpacyunuu sikema yenhafoc tacgec yoac yofi edeyunuec, “Tosofocna, ni yudangic arengfocnina mi memayunuai me kiscifocnina yeneac singyoac nga fakangina deendema mi anai, imoc fora. Anu yeni Yerusarennu mendannuma romangic yeneac mariu eng fainugec. <sup>18</sup> Fainugec romangic yeneng haniana dekpesi amma hania kpacfu nuhomegecdeac dema kopocsicna hofocma yungecnugecdeac degec. <sup>19</sup> Ifi degec yudangic yeneng yoac imocac igocnuma kpetarigecac ngictau Sisango yoacna desuideac deai. Yudangic yeneac yoac mong yei mehama deba dema mi hayai.

<sup>20</sup> Ni imocacnoc negemma ngenigoc denegeng annideac kpacngunuba sikedau. Israengicngac nenang Anutu dedeseriyaac fora fingerudeac negensinggema kecdimbeac amma seng yomoc marinau witicnugec kecduae.”

<sup>21</sup> Ifi deu degec, “Yudaia bangecfunac geac yoackibi mong mi faigec hau hening. Me ngic mong suegec hama geac kopocsic yoac mong mi deu negening. <sup>22</sup> Imocac wiac negennec, imoc geanggaoc dena negenni naric ande. Ge mitiareng denec, imoc bangecsoc deendema anggec negendimbe.”

<sup>23</sup> Ifi dema tutumanggac naso mong degec naso imoc hau yudangic kpetengina homacngoc Pauroac amau kpeturangegec. Kpeturangegec, yeng Anutuac eucererenggac hania edeyunuec. Amma ye Moseac dedeseriyoac nga profete yeneac yoac, imoc osoma yenang negen negengngina wama Yesu negensinggecdeac deirekeyemmeudeac ua meec. Ye asoacngoc hanahema ifi dema kecmanu ama toforeyemmeec. <sup>24</sup> Amma ngic goa yeneng imoc ireckema yegoc uba mocgu anggec nga goa yeni mi negensinggec. <sup>25</sup> Amma yudangic yeni yenaocngoc yoacngina feracemeu Paurongo yoac mocgu yofi edeyunuec, “Tiri Asungo profete Yesaiaac enacfu kisicfocngina yeneac yoac yofi deec,

<sup>26</sup> ‘Ge kemma ngichabu yofi edeyununa: Ngicngac kedzacngo negen negeng, yeni imoc negemma naric mi negentegecgecde. Amma kicngo heheng yeni imoc hemma naric mi hentegecgecde. <sup>27</sup> Imoc yofiac, ngicngacareng yomoc yeni herengina tondzera nga kedzacnginango yoac negenggecdeac ebirdae amma kicnginango wiac henggecdeac mepisickegec. Yeni kicnginango wiac mong hembauac nga kedzacnginango negembauac amma negen negengnginango wiac mong negentegecbauac, imoc yeni ubangina dafu dzigeneu mengereyunubade.’  
(*Yesaia 6:9-10*)

Ngeni yeni isocngoc. <sup>28</sup> Imocac edengunuba negenggec, Anutungo memengerec sing meficgeec, imoc bangec monnunac ngicngac, yeneac arennoc ande, yeneng yoacna negemma komoc kpegecde.” Paurongo ifi deu negemma wama kenggec. <sup>29</sup> [Kemma sinnu yudangic yenaocngoc yoacngina feracemeu kenggec.]

<sup>30</sup> Pauro yengenaoc ama kuric bummema kifa yohockang ihai kecmanu ngicngac yearu kengha anggec, yeni ama heiyemmekefec. <sup>31</sup> Heiyemmema kengaha kpac yombong kecma Anutuac eucerereng dekperagiyemmeec. Ye Kebu Yesu Kristoac hania kpouyemmekefufu ngic mongngo mi kpetarimiec.

## Paurongo Roma Kpebung Yeneac Kibi Ohoec

<sup>1</sup> Ni Paurongo kibi yoc ohoma Roma kpebung ngenearu faiduae. Yesu Kristo ye minginna nga ni yeac wanacngic. Yeng kpacnuma segerenuu aposoro ua mema Anutuac siduc gombang dekperagibadeac denenec.

<sup>2</sup> Yeng siduc gombang imocnoc warac profete yenearu yoac dedzege amma haudeac deu yeneng imoc mitikibi kpetiacfu ohogec fede. <sup>3</sup> Siduc imoc yofi, Anutuac Medac, Kebunina Yesu Kristo, yeng ngicsebiac arennu Daw-idiac fingeasaheunac fingerec amma <sup>4</sup> kpetiac Asungo kucgoc yombong yeac yofi dekperagie, yennoc homecfunac gborima yarec, imocngo yofi edzacnunude, ye Anutuac Medacyombonga. Imoc Kebunina Yesu Kristoac siduc gombang. <sup>5</sup> Anutungo deu ye wosoefac anemmema aposoro ua nemmeu neni yeac kpacac amma bangec monnunac ngicngac Anutu mi negemmidae, yeneac botucfu yoac dekperagini yeneng ye negensinggema yoara tofohogecde, ua imoc mekecdimbe. <sup>6</sup> Nga Anutungo ngeni ifingoc kpacngunuma Yesu Kristoac areng anggecdeac negende.

<sup>7</sup> Anutuac songoareng Roma taonnu kecdae, ngeni kpacngunuu yeac kpetiac areng kecdae. Nga Anutu Manninaac amma Kebu Yesu Kristoac danggunuc nga ruaengo ngenearu febeso.

<sup>8</sup> Bangeha bangeha yeneng ngeneac negen negensingnginaac yoacsiduc edeameandae, imoc wiac engena ifi negemma ngeneac negensima Yesu Kristoac kpacfu Anutuna dange edekecduae. <sup>9-10</sup> Ni numuanduae, imohai nasosoc ngeneac negensima numukecduae. Anutungo imoc hemma hepucna ande. Nga ongaasunango uaya mekecma yengena Medahaac siduc gombang dekperagianduae. Amma ni nasosoc Anutu numumiba yeng ngeni naric anu ngenearu bic habade.

<sup>11</sup> Hama ngenema nenahafoc kecma ngeni serigecdeac Tiri Asuac wosoefacac kuc ngenearu mederebade, imocac homac anende. <sup>12</sup> Ni yofi negemma imoc deduae, ni ngenearu haba nenang negen negensinninango nanggeemema ngeneng ni meserinugec neng ngeni meseringunubade. <sup>13</sup> Negen negensinggoc tosofocna, yofi negenggecdeac anende. Ni miti uac fora imoc bangec monnunac ngicngac Anutu mi negemmidae, yeneac botucfu kpedzucneanduae, ifi isocngoc ngenearu hama miti uac fora goa kpedzucnebade. Amma imocac naso homac arenga faikecbare wiac goango ine dzegenukefec.

<sup>14</sup> Ni grikgic nga bangec monnunac ngicngac Anutu mi negemmidae amma fakangina siriha kpac kecandae, yeni miti dekperagiyemmebare. Amma ngic negen negenggoc nga negen negengina kpac, yenearu siduc gombang mamangkima dekperagima imocngo turunna kpoubesare. <sup>15</sup> Imocac amma Roma taonnu ngicngac kecdae, ngenearu ifingoc siduc gombang dekperagibadeac herena yacande.

<sup>16</sup> Siduc gombang imoc Anutuac kuc. Imocngo ngicngac sasawa negensinggeandae, yeni kopocsicac ebicfunac mesiyunuu komoc kpegecde. Yoac imoc yuda yeneac arennu waraima kemma grikg yeneac arennu momoc kenec. Imocac amma ni siduc gombangac negemba gameagoc mi angkecde. <sup>17</sup> Anutungo ngicngac dindingac denemmeande, imocac siduc



gombunnu yofi fingectegecande, negen negensinggoc hanahema negen negensinggoc mesibesonga. Amma yoac yofi bic oho ohoya fede, “Ngic ddingac ye negen negensinggoc kecma kechereude.” (*Habakuc 2:4*)

<sup>18</sup> Ngicngac goa yeni Anutuac faka nga yoac ngadehema sing ferahaandae amma faka nga yoac fora kpema waandae. Ngicngac imoc yeneac turunga kurumenunac fingeru Anutungo imoc kpouyemmeude. <sup>19</sup> Anutu haniaya botucnginau ddingac hengkecdae. Imocnoc Anutu yengenaoc mekperagiyemmeande. <sup>20</sup> Amma hanahema ama bangec meficgeecfunac kecerema yofinenggac kecdimbengoc yengena kicngo mi hengena nga ye wiac meficgeec, imoc hengcec. Imocngo yengena marikibiaac siriha finge-cyemmeu negentegeckecdae. Yeng nasoya nasoya kuc mingina kefecngo kefude amma ye Anutu, yeni imoc hentegecma kecdae. Imocac mongngo yoac mong yofi naric mi deude, “Anutu kecde, imoc mong mi negentegeiraic kopocsicna wabeso.”

<sup>21</sup> Yeni Anutu negemmidae, amma ewehieihei ine mi ammigece. Nga ye Anutu, imoc negendaenoc nga yeni ine ye mi dengeregece. Yeni ine negen negengngina ikoha, imocngo faka meu kicpisis nga ubafong angcec kundungngo ubanegen negengngina semeu sing segegece. <sup>22</sup> Yeni ifi kecma deandae, “Neni negen negentegecgoc.” ifi dema samackpeng amma dzingfonga kecandae.

<sup>23</sup> Nga yeni Anutu homeha kpac, yeac kuc kibikperagiagoc wama ngic homemea, yeneac ongangina nga neng nga yamberec amma sekac ongangina goa imocac Anutu siriha, ifia dema mekecgece. <sup>24</sup> Ifi angandaeac amma Anutungo yenang hereyacyac fakanginau wayunuu yeni kaiserofaka angkecma sebingina faka gameagocfu kpeandae.

<sup>25</sup> Anutungo wiac sasawa deu fingerec, yearu dedengerec nga dedengerec fekengkecheso, imoc fora. Nga yeni ine Anutuac yoac fora wama ikocyoac hoanggegece. Nga ye wiac sasawa deu fingerec, yeac ewehieihei faka wama yeac bageu monggoc mi kecandae. Yeng deu wiac fingerec, yeni imoc afehema imocac kingang kpeandae. <sup>26</sup> Imocac amma Anutungo kpae mong mi heiyemmema wayunuu hereyacyac faka gameagocngo fenggeyunuu ngac yeni ngicgoc kecandae negengandimbe, yeni sing imoc wagec faka goa ngacngo faka mi angana, imoc angemekecdae. <sup>27</sup> Nga ngic yeni sing imohaingoc ngacgoc kecec kecandae negendimbe, imoc wama herengina gerec isoc borang tiu ngicngo ngicfu kemma faka gameagoc angemeandae. Ngicngac ifi angkecdae, yeni yenaocngoc fakangina gameagoc angcec, imocacsoc turungango kekecnginau faka ddingac modacma meficgeyemmeude.

<sup>28</sup> Ngicngac yeni Anutu negemmibesonga negenggec wiac mamea anu faka imoc ngadehema wagec. Imocac amma Anutungo ifingoc kpae mi heima wayunuec. Wayunuu yeni faka kpedahango fenggeyunuu faka ngicngo mi angana, yeni imoc modacma angemekecgec. <sup>29</sup> Nga yeneac hereu faka mangana hania hania wake wakea fede, imoc yofi, yeni ngicngac ddingac kpac. Yeni ngabagoc nga kichodunggoc kecma faka mangana amma keracmanganggoc kecandae. Yeni herengina yaru ngic yunukpebuc anggecdeac ayemmeu ngabau eweandae. Yeni ikoc nga ngaba arenau ngic memanganeyunugecdeac ayemmeande amma gubekisang kecandae. <sup>30</sup> Kecma yeni enacfu faifai amma Anutu ubango wama ubaseri kecma yoacngina goria amma sebiengeng faka angkecdae. Amma nonggo mangfocngina yeneac yoac kpema faka mangana gboria meficgeandae. <sup>31</sup> Nga yeni

negen negengngina kpac kecma yenang yoacngina kpeandae. Yeni ngicngac tosofocngina heresongogoc hoangyunugecdeac obohoma ngicngac yeneac ubamangang mong naric mi negenggecde.

<sup>32</sup>Ngicngac faka mangana ifia angandae, yeni homecac areng andae. Yeni Anutuac sing dindingac imoc negemmaguc sifu faka ifia angkecdae. Nga yeni imocgoc torokpema goa yenenggec faka mangana ifia amma kecgec, imoc ifingoc negenggec ngereeande.

## 2

<sup>1</sup> Imocac ngic me ngac, ge negenna, ge ngicngac goa yeneac fakangina isinggema kopocsicnginagoc andae, ifi dekecnade, naso imohai geangga yeni isocngoc kopocsicgagoc annec, imoc deficemenade. Nga yeni isingyunuma, “Ngeni kopocsicnginagoc.” ifi deannecac geangga ifingoc isingemenec ande. Nocac geac faka nga angammemega imoc yeneac isocngoc ande. <sup>2</sup> Anu faka nga angammemengina ifia angkecdae, yeni Anutungo sing forau isingyunuma kopocsicnginaac turunga yemmeude, imoc negendimbe. <sup>3</sup> Nga ngicngac goa faka ifia angkecdae, ge yeneac faka isinggema kopocsicnginagoc andae dema geangga faka ifiangoc angkecma Anutuac isic isinggenasou degbedic yoac goa dema woranadeac negennec nga imoc kpac yombong. <sup>4</sup> Anutungo faka yumea yombong angemma modzotitia kpac tomaiga naso herea kecande, imoc ngadehenadeu naric mi ande. Nga ubaga merennadeac Anutungo yumea anggende, ge sifu imoc negentegecbesena. <sup>5</sup> Nga here dzege dzegegoc kecma ubaga mi meremma kopocsic mekpedzuc angkecma turunga menade. Nga Anutuac turung kpoukpouac nasotoa hau turunga dindingac fingectegecgenude. <sup>6</sup> Imoc yofiac,

“Kebungo ngicngac tembus tembus angammemengina hennegeng amma turunga kpouyemmeude.” (*Mitiyegec 62:12; Yoac negen negengagoc 24:12*)

<sup>7</sup> Mong ye mamangkima faka gombunga mekecma kurumenggac kuc kibikperagiagoc nga ewehihei amma kekecseri meudeac ammiu uatoa mekecde, Anutungo ye kekec wisic wisickea kpac miude. <sup>8</sup> Nga mong ye yengenaacsac negemma kecma yoac fora mi tofohoande nga sing dindingac kpema mangana modacande, Anutungo yearu herebuya kpakema kopocsicac turunga miude. <sup>9</sup> Nga ngicngac angammeme mangana angkecdae, yeni sasawango kpendzeng nga ubaebictoa meficgegecde. Yuda arengngo imoc waraima meficgemagec grik areng yeneng momoc meficgegecde. <sup>10</sup> Ngicngac faka nga angammeme gombunga angkecdae, yeni sasawango kurumenggac kuc nga kibikperagia nga ewehihei amma ruae meficgegecde. Yuda arengngo imoc waraima meficgemagec grik areng yeneng ifingoc meficgegecde.

<sup>11</sup> Anutu ye monde mondea mi femide. <sup>12</sup> Ngicngac dedeseriyoac yenearu mi faifaia, yeni kopocsic meficgegec Anutungo dedeseriyoara kpac, yeni sasawa manganaac areng desiyunuma wayunuude. Nga ngicngac dedeseriyoacac bageau kecma kopocsic meficgegec, yeni dedeseriyoacngo yoacfu faiyunudaru kopocsicnginagoc kecma mangedacgecde. <sup>13</sup> Nga ngicngac faka nga angammenginango dedeseriyoac modackecdae, Anutungo yenemma dindingac deyemmeude. Nga ngicngac dedeseriyoac kedzaczngosac negengandae, yeni dindingac mi deyemmeude, kpac.

14 Anu bangec monnunac ngicngac Anutu mi negemmidae, yeni dedeseriyoac oho ohoya mi modacandaengo yoara sifu momorongnginau fede, yeni imoc tofohoma dedeseriyoac modacandae, yeni yenaoc dedeseriyoacac mingina anggecde. 15 Nga dedeseriyoacngo wiac ambesonga dede, imoc ngicngac ubanginau bic oho ohoya fede, imoc edzacnuuandae. Amma here negen negengngina imocngo meseriude. Ubangina nga here negen negengngina yeri yerahafoc ua mema yoacfu kopocsingngina deficgeandape me nanggeyunuma meficyunuandape. 16 Imoc Anutuac desi desi nasotoau fingctegeru henggecde. Ni siduc gombung Yesu Kristongo nenec, imoc yofi dekperagianduae, Anutungo nasotoau ngicngac yeneac negen negeng sufu sufuya feec nga fede, imoc isinggema desiude.

17 Yudangic ngeni ngenanggac deandae, “Ni yudangic dema dedeseriyoacngo nanggenuu kecduae.” Amma ge Anutu negennec imocac negenna engena angkecde. 18 Anu dedeseriyoacngo sing kpougenu ge Anutuac negen negeng nga songo bic negemma faka nga angammeme damoc gombunga, imoc isinggema naric ireckenade. 19 Nga yofi negengemeanec, “Ngcicngac kicpisc yeneac sing edzacyunuyunu ngic amma kundung manau kengkecdae, yeneac kperagia, imoc ni.” 20 Nga dedeseriyoacfu negen negeng nga yoac fora hafoangoc fedecac ge negen negengngina obohoandae, yeneac negennec, “Ni yeneac dederecngenic.” amma ngicngac nambaracuba mekecdae, yeneac yofi negengannec “Ni yeneac kpoukpou.”

21 Ge ifi amma goa edekpou ayemmema geangga ine mi kpouemeanec. Amma hamangec mi mebesonga, ifi edeyunuma geangga sifu wiac hamangec meanec. 22 Amma kaiserofaka mi ambesonga, ifi demaguc geangga kaisero angannec. Nga ge nemu ngadeyunuannec amma geanggac ine womonginau emma yeneac wiac hamangec meanec. 23 Amma Anutuac dedeseriyoac mekecma geanggaac negenna engena anu gennoc dedeseriyoac kpema Anutu game witiau faiannec. 24 Mitikibiu yoac yofi oho ohoya fede,

“Ngeni ifi angkecdaeac amma bangec monnunac ngicngac, yeneac botucfu Anutuac kpac denggbaringgegecde.” *(Yesaia 52:5; Edzekie 36:22)*

25 Ge sebi tosaga herecgeama dedeseriyoac modacnadeu imocngo memefihagoc anude. Nga dedeseriyoac kpenadeu ine sebi tosaga herec herecgeango sifu sebi herec herecgea areng mi annade. 26 Anu areng goa sebi tosangina mi herecgegec, yeni angammemengingango dedeseriyoac modacdacande, yeni sebi herec herecgeareng, kpacngina ifi naric kpacbesonga. 27 Nga ge sebi tosaga herec herecgeango kecma dedeseriyoacac kibi mekecma dedeseriyoac ine kpema kecna ngic mong ye sebi tosea mi herecgegec, yeng dedeseriyoac modackecma faka nga angammemega isinggema ge kopocsicgaggoc deude. 28 Ngic mong ye sebiugeng yudangic ande, ye yudangic fora mi ande, kpac. Nga ngicsebiu sebi tosea herecgeandae, imoc sebi herec herecge fora mi ande, kpac. 29 Mong ye ubahereau yudangic ande, yeng yudangic yombong. Anutuac Asungo ubahereaac herec herecge ua meu Anutungo ngicngac areng ifia dengereyunuande, imoc ngicac ua kpahac. Nga dedeseriic kibingo ubahereac herec herecge ua, imoc naric mi meude.

### 3

1 Yudangic yeneng sebi tosangina herec herecgea kecmagec faka imocngo

yofi meficyunuu areng goa tatacngina feracyunugecde. <sup>2</sup> Anutungo yudangic kekecnginau hafoangoc nanggeyunuma ngic areng goa feracyunuma yudangic faka gombunga homac yombong ayemmeude. Yeng yeneac negenu ngereeu yengena yoac garengegecdeac yeneac botucfu faiec fede, imoc negenggec engena ambeso. <sup>3</sup> Anutungo yoac dedea modackecde. Anu goa yeni negen negensingina kpac kecgec, fakangina imocngo Anutuac faka mi meickeec. <sup>4</sup> Imoc kpac yombong. Yoac yofi oho ohoya fede,

“Geng yoac denec, imoc fora fingectegerude nga ge ngic hania isinggema yoacngina desinec, imoc dindingac.” *(Mitiyegec 51:4)*

Yoac yofi deni seria febeso, “Anutu ye fora nga ngicngac sasawa nenang ine ikocninagoc.”

<sup>5</sup> Goa yeni deandae, “Ngicngac angammemenina manganangonoc Anutuac faka dindingac mekperagiude.” Yoac imoc fora mi ande nga fora ambac dede Anutungo mangananinaac turunga kpounemmeu, imocngo dindingac naric mi ambac. Ni ngicac negen negeng modacma yoacna ifi deduae. <sup>6</sup> Anutu ye fakaya dindingac mi ambac debac bangeha bangehaac ngicngac naric mi isingyunuma desiyunubac, imoc foracngoc. <sup>7</sup> Neac ikocyoacngo Anutuac yoac fora mekperagima kpapa dengerebac ye kopocsicngic naric mi denembac. <sup>8</sup> Goa yeni enacfu faifai anemmema deandae, “Wiac gombunga fingerudeac nenang angammeme goa mangana ambisina.” Nga goa yeneng neneac deandae, “Imocnoc kpounemmeandae.” Ngicngac yoac ifia dean-dae, yeni Anutungo kopocsicnginaac turunga, imocac sirihau yemmeude.

<sup>9</sup> Imocac dafi denide, yudangic nenaoc grikgic feracyunukecdimbe me? Imoc kpac. Yudangic nga grikgic yeneac yoacngina yofi bic deding, “Nenang momoc sasawango kopocsicac bageau kecdimbe.” <sup>10</sup> Imocac yofi oho ohoya fede,

“Ngic mongngonec dindingac mi kecde, imoc kpac yombong. <sup>11</sup> Amma ngic mong negen negentegecgoc mi kecde me mongngo Anutu hofoc hofoc ua mong mi mekecde, kpac. <sup>12</sup> Yeni sasawango Anutuac sing ngadehedacma yenhafoc manganegec, mongngonec angammeme gombunga mi angkecde, imoc kpac yombong.” *(Mitiyegec 14:1-3; 53:1-3; Miti dedengic 7:20)*

<sup>13</sup> “Yeni ubangina imoc kicsere angge anggea.” *(Mitiyegec 5:9)*

“Yeni nedzarangnginango ikoc ayemmeandae amma bibicnginau boidzocac marasing mekecdae.” *(Mitiyegec 140:3)*

<sup>14</sup> “Yeni enacnginau sowecyoac nga negemmangang herenginaunac gerec dzema ereande.” *(Mitiyegec 10:7)*

<sup>15</sup> Nga yeni ngicngac yunuma sacngina hetinggegecdeac haningningango kpouma bic kengkecdae. <sup>16</sup> Amma yeni sing kengkecdae, imohai amabangec memanganema ngicngac ebicfu faiyunuandae.

<sup>17</sup> “Ngicngac imoc yeni ruaegoc kekecac sing mi negendae, kpac.” *(Yesaia 59:7-8)*

<sup>18</sup> Amma yeni Anutuac kicfu dzonong fede fedegoc namma eweheimigecdeac mong mi negensiandae. *(Mitiyegec 36:1)*

<sup>19</sup> Neni yofi negendimbe, dedeseriyoac imocngo ngicngac dedeseriyoac bageau kecdae, imoc yeneac enacngina medzickeudeac nga bangeha bangeha ngicngac sasawa yeni Anutuarunac turunga megecdeac amma yoara dede.

<sup>20</sup> Ngic mong ye dedeseriyoac modackeckma Anutuaru haude, ye Anutungo yofi naric mi demiude, “Ngic imoc ye dindingac.” Dedeseriyoac imoc ine kopocsicnina dekperaginemmeu negennide.

<sup>21</sup> Anu yofinenggac Anutungo ngicngac dindingac denemmeande, ye imoc didiu faiu hengkecdimbe. Sing imoc dedeseriyoac nga profete yeni hepuc angandae nga imoc dedeseriyoacac sing mi ande, kpac. Imoc sing gboria amma siriha mong yombong. <sup>22</sup> Anutungo Yesu Kristo fainemmeec nga ngicngac ye negensinggedae, yeneac dindingac deyemmeude. Nga ngicngac sasawa nenang siricnina mong mong mi ande, <sup>23</sup> nenang sasawa kopocsic meficgema kuc nga kibikperagia Anutuarunac haande, imoc kekecninau obohoma kecdimbe. <sup>24</sup> Obohomina Yesu Kristongo witicfunac yungecnunuec. Yungecnunuma Anutungo wosoefac anemmeandeac amma dindingac denemmeude. Imoc fingeenemmeudeac nenaoc ua mong mi meing.

<sup>25</sup> Anutungo Yesuac sac hensima nonongkac faiu nanu ngicngac nenang Yesu negensinggenide, yeng kopocsicac turung kpou kpouac bung angkecde. Sing imohai Anutu ye yengena dindingac, imoc edzacnunuudeac negenu ngereec. Imoc yofiac, ye warac ngicngac faka yumea ayemmema kopocsicnginaac turunga bic mi kpouyemmema <sup>26</sup> naso herea modzotitia kpac tomaingina kefec. Ye naso yofinenggac ngicngac Yesu negensingkecdimbe, nenang dindingac denemmeude. Ye yengena dindingac, imoc edzacnunuudeac negensima Yesuac uaac amma dindingac denemmeude.

<sup>27-28</sup> Ifiac amma angammemenina gombunga imocac sebinina meennideac sing mong mi fede, kpac. Anutungo ngicngac dindingac deyemmeande, imoc negen negensingnginaac amma deude, neni imoc negemma meseridimbe. Yeni dedeseriyoac modackeckdaeac ye dindingac mi deyemmeude, kpac. Imocac negen negensinggac amma sebiengeng naric mi annide. Ge uagaac amma ngic dindingac naric mi annade, imocac sebiga naric mi meennade. <sup>29</sup> Goa yeni yofi deandae, Anutu ye Yuda yeneac Anutusac. Nga imoc fora kpac, ye bangec monnunac ngicngac, yeneac Anutu momoc kecde, imoc fora. <sup>30</sup> Anutu mocgungonoc kecde. Amma ye sebi tosangina heregegec, yeni negen negensingnginaac amma dindingac deyemmeude. Nga sebingina mi heregegec, yeni ifingoc negen negensingngina hemma dindingac deyemmeude. <sup>31</sup> Nga negen negensingnginango dedeseriyoac mi meickenide, kpac. Nenang negen negensingngango dedeseriyoac nangenide.

## 4

<sup>1</sup> Kiscicnina Abrahang yeac hania henni. <sup>2</sup> Goa yeni yeac deandae, “Anutungo angammemeaac amma yeac ngic dindingac demiec.” Imoc fora mi ande nga imoc fora ambacfu ye sebia naric meembac. Nga imoc ine Anutuaac kicfu kpac.

<sup>3</sup> Neni mitikibiu yofi osoandimbe, “Abrahang ye Anutu negensinggeecac amma, yeng yeac ngic dindingac demiec.” *(Fingec fingec 15:6)*

<sup>4</sup> Ngic mong ua meande, yeac uabung imoc wosoefacac mimia mi ande, imoc ua meecac turunga ande. <sup>5</sup> Nga mong ye uaac sing wama negenserima Anutu negensinggeude, yeac yofi fingerude, Anutungo ngic mangana dindingac deyemmeande, yeng ngic imoc negen negensinggac amma uaya kpac wosoefacfu ngic dindingac demiude. <sup>6</sup> Nga mong ye angammeme

gombunga mong mi ammanu Anutungo yeac dindingac deu yeac kenec meude, ngic ifia yeneac Dawidingo ifingoc yofi deec,

<sup>7</sup> “Ngicngac goa yeni singyoac kpema kecmagec Anutungo manganangina wayemmeec nga kopocsingina semeyemmeec, yeni kenecnginagoc.

<sup>8</sup> Nga KEBUNGO ngic monggac kopocsihaac kpete mi meude, ngic imoc ye kenehagoc.” *(Mitiyegec 32:1-2)*

<sup>9</sup> Kenec yoac, imoc ngic sebi tosangina herecgegec nga ngic mi herecgegec yeneac momoc dedea. Abrahangno negensinggeecac Anutungo yeac negemma ngic dindingac demiec, ifnoc negemma deandimbe. <sup>10</sup> Abrahang ye sebi tosea herecgeugoc Anutungo dindingac demiec me? Imoc kpac, ye sebi tosea mi herecgeganungoc Anutungo ye dindingac demiec.

<sup>11</sup> Abrahang ye negensinggeu Anutungo yofi demiec, “Ngic imoc dindingac.” ifi dema sebi tosea herec herecgeac ma Abrahang miec. Ye sebia mi herecgema bic negensinggeec. Nga ngic sasawa sebingina mi herecgema negensinggeandae, Anutungo yeneac dindingac deudeac yeni Abrahanggac kiscifora, ifi kpacyunuec. <sup>12</sup> Nga ngic sebi tosangina herecgema Abrahanggac hanititi modacma Kebu negensinggeandae, yeneac ifingoc yofi deec, Abrahang ye yeneac kiscingina. Negen negensinnu kiscingina Abrahang, ye hanahema sebi tosea mi herecgema bic negensinggeec, ye isoc andae.

<sup>13</sup> Anutungo Abrahang nga bancefora yenigoc yoac yofi dedzege anec, bancec nga kurumeng imoc ngenec maridzoming anudeac ngemebade. Nga imoc Abrahangno dedeseriyoac modarecac mi deec, kpac. Yeni negensinggegec nga Anutungo negengyemmema dindingac deyemmeec, imocac witaui yoac dedzege anec. <sup>14</sup> Nga ngicngac yeni dedeseriyoac hoanggema maridzomingina mebau dede negen negensinggoc kekec foraya kpac ambac. Nga Anutungo wiac yemmeudeac deseriec, imoc ifingoc kuha kpac ambac. <sup>15</sup> Dedeseriyoacngo kopocsicac turunga hefcigeude nga dedeseriyoac mong mi feudeu dedeseriyoac ifingoc mi kpebau.

<sup>16</sup> Abrahang ye ngicngac dedeseriyoac mekecdae, yeneac mangngina. Amma ye ngicngac negen negensing yeac isoc feyemmede, ye ngic ifia, yeneac manggac. Nga Abrahanggac bancefora sasawa yeni dedzegeac yoac naric megecdeac imoc wosoefacac bageau feu negen negensingnginaac amma megecde. <sup>17</sup> Nga Abrahanggac negensima yofi oho ohoya fede, “Ni faiguba ge ngicngac areng homac yeneac mangngina annade.” *(Fingec fingec 17:5)*

Nga Anutungo ngic homemea megboriyunuande nga wiac mong mi fede, imoc bic fede, ifi isoc ye imoc dema kpara kparu fingecande.

Ifiac amma Abrahang ye nenang mannina, imoc Anutuac kicfu nga negen negensinggac sinnu. <sup>18</sup> Yeng gboricgoc anudeac siriha mi kefec, kpac. Nga ye Anutu negensinggeecac ngicngac areng homac yeneac kiscingina anec. Imocacnoc yoac yofi bic dedea feec,

“Bancefocga yeni homac yombong, kpete imocacsoc fingecgecde.” *(Fingec fingec 15:5)\**

<sup>19</sup> Abrahang ye kifaya 100 isoc anu sebia dzaparema kpedziu negenec. Nga enema Sara ye kifa feraheu sabac meudeac siriha naric mi anec. Nga Abrahang ye negen negensinga sifu seria feecac kucmama mong mi anec.

<sup>20</sup> Ye Anutungo wiac miudeac deseriec, imocac negengyohoc mong mi amma serima negensinggema kecma Anutu afehekefec. <sup>21</sup> Nga Anutungo yoac

\* **4:18:** Asomenggac kpete imocacsoc fingecgecde.

deserimiecmoc imoc meudeac imocac kuha soha femiec, Abrahangno ifi negentegecma negenseriec. <sup>22</sup> Imocac amma yofi nande, “Anutungo yeac negensima, ngic dindingac demiec.”

<sup>23</sup> Nga yocac yomoc, “Yeac negensima ngic dindingac demiec.” imoc Abrahanggacsac negemma mi oho ohoya fede, kpac. <sup>24</sup> Imoc nenanggac momoc oho ohoya fede. Anutungo Kebunina Yesu homecac arenunac megboriu nenang ua imoc meec, ye negensingeni yeng ifingoc negenemmema dindingac denemmeude. <sup>25</sup> Nga nenang sing feraheing, imocac amma ngicngac yeneng Yesu homecfu faigec. Nga Anutungo dindingac denemmeudeac Yesu homecfunac monggoc megboriu yarec.

## 5

<sup>1</sup> Ifi amma Anutungo negen negensinnina hemma dindingac denem-meu Kebunina Yesu Kristoac amma yegoc ruaeu kecdimbe. <sup>2</sup> Yeng sing meficgenemmeu Anutuac danggunuc manau yofinenggac kecdimbe. Nga Anutuac kuc kibikperagiagoc ngade fingecnemmeude, imoc wiac engena, ifi negemma sogaima kecdimbe. <sup>3</sup> Amma imocsac kpac, nenang ifingoc kpendzeng witiau kecma imocac negenni engena anu sogaikecdimbe. Kpendzeng kpekepe, imocngo herenina meseriude. <sup>4</sup> Meseriu modzotitia kpac kecma seserigoc nannide nga eucererenggac fora fingerudeac negensinggema kecdimbe. <sup>5</sup> Ifi kecmina ubaninaac kuha naric mi maude. Nocac Tiri Asugoc anni Anutungo songoya ubahereninau kpaceec fede.

<sup>6</sup> Nenang sicsauc kecminangoc Kristoac naso hau yeng nenanggac tatac mema homeec. Makpekepa kecminangoc, ye ifi anemmeec. <sup>7</sup> Ngic mongngo ngic dindingacac amma homeudeac negenside, siduc ifia mi negengandimbe. Nga mong ye faka nga angammemea gombunga angkecde, mongno yeac amma kengec wama homecfu naric kembang gedang. <sup>8</sup> Anutungo songoya edzacnunuma Kristoac deu yeng ngicngac nenang kopocsigoc kecmina nenanggac ammanoc homeec. <sup>9</sup> Anu yeac sawaac amma Anutungo ngicngac dindingac denemmeu yofinenggac kecdimbe. Imocac ye ifingoc turung kpoukpuuac nasou yoacnina deu komoc kpebesandimbe, imoc negenserima kecdimbe. <sup>10</sup> Nga nenang Anutuac ngabafora kecmina Medahaac homecngo ngaba meickeu Anutugoc ruae fingecnem-mec. Ruae fingecnemmeu nenang ifingoc Medahaac kekecac amma komoc kpebesandimbe, imocnoc negenserima kecdimbe. <sup>11</sup> Amma imocsac kpac, Kebunina Yesu Kristongo kopocsicnina meickema Anutugoc ruae meficgenemmeu nenang yofinenggac Anutuac negenni wiac engena anu sogaima kecdimbe.

<sup>12</sup> Imoc yofi fingerec, ngic mocguacsac amma kopocsic bangectoa bangecfu fingecma homec heficgeec. Nga ngicngac sasawa kopocsic meficgegecac amma homecngo ngicngac sasawa meyunuec. <sup>13</sup> Dedeseriyoac bangectoa bangecfu mi femanu kopocsicngo bic haec. Dedeseriyoac mong mi feu kopocsicac hennegeng naric mi fingerude. <sup>14</sup> Nga Adanggarunac erekecma Moseac nasou homecngo ine ngicngacareng sasawa garengyunuec. Adanggo kopocsic meficgema Anutuac yocac kpeec. Nga goa yeni yeac kopocsic imoc isoc mi meficgegec nga homecngo yeni sifu meyunuec. Adang ye ngic haudeac dedea, yeac ongea.

<sup>15</sup> Sing ferac ferahea, imoc siriha mong ande nga danggunuc imoc siriha mong, imoc fora. Ngic mocgungo kopocsicfu makpeecac ngicngac ebiriango



homedacgec. Nga Anutungo wosoefahaac nga ubangerehaac wiac ngicngac yemmeande, imoc ine homactoa anu yenearu ebiria yombong kpakeyem-meec. Imoc ngic mocguacsac, Yesu Kristoac wosoefacac amma ifi fingecma feec. <sup>16</sup> Ngic mocgungo hanahema kopocsic meficgeec, Anutungo imocac amma wosoefahaac wiac yemmeande, ifi mi negembisina, kpac. Ngic mocgungo kopocsic hanahema meficgeu Anutungo turung kpoukpouac faka hanahema meec. Meu ngicngac homac yeneng ine sing ferahema turungnginagoc anggec. Anggec Anutungo ifi hemma wosoefac ayemmema kopocsicnginaac turunga waec.

<sup>17</sup> Ngic mocgungo hanahema sing feraheu yeac kopocsicac amma homecngo ngicngac garengyunuudeu ine yofi negembisia, Anutungo ngicngacareng danggunctoac ayemmema wosoefacu dindingac deyemmu, yeni ngic mocgu, Yesu Kristo, yegoc kecima kekecac arennu kecima wiac homac yenhafoc garenggegede.

<sup>18</sup> Ifi anu ngic mocgungo sing feraheecac Anutungo ngicngac sasawa manganaac arennu desiec. Nga ngic mocgungo angammeme dindingac anecac ifi isocngoc ngicngac sasawa kopocsicnginaac turunga meickeec. Meickeu Anutungo ngicngac dindingac deyemmedaru imocngo kekecseri heficge yemmeec. <sup>19</sup> Nga ngic mocgungo enac tofoc tofoho faka wau ngicngac ebiriangoc yeni kopocsicnginagoc andacgec. Nga ifi isocngoc ngic mocgungo enac tofoc tofoha anecac amma Anutungo ngicngac ebiriangoc yeneac dindingac deyemmeec nga deyemmeude.

<sup>20</sup> Anu kopocsicngina kuneng monggoc anudeac dedeseriyoac haec. Nga kopocsicngina kuneng yombong anu danggunucngo monggoc yombong kopocsicngina ferahema fingecma feec. <sup>21</sup> Imoc yofiac, kopocsicngo homec meficgema yenenggareng anec, ifi isocngoc danggunucngo garennina anu Anutungo Kebunina Yesu Kristoac amma dindingac denemmema kekec wisic wisickea kpac nemmebesande.

## 6

<sup>1</sup> Imocac yofi debisina. Anutuac wosoefacngo yadiudeac nenang kopocsicfu monggoc torokpema mi kecbisina, kpac. <sup>2</sup> Nga kopocsicfunac bic homeing, ifi negemmaguc sifu ihai monggoc torokpema mi kecbisina. <sup>3</sup> Nenang Yesu Kristoaru kpekethama kecnideac doku nadzicnemmegec. Amma sasawango homehau bariyuhung anemmu nadzicdaring, ngeni imoc mi obohodaec. <sup>4</sup> Nga doku nadzicni Anutungo yegoc tonggonunuu homecfu kemeing. Manggac ye kuc nga kibikperagitoayango Yesu homecfunac megboriu kekec gboriau enec. Enu nenang ifingoc kekec gboriau kecnideac yegoc torokpenunuec.

<sup>5</sup> Yesungo homeec, imocac siricfu yegoc torokpema homeing. Amma ye homecfunac gborima yarec, nenang ifingoc torokpeinggac gborima yacnide imoc negendimbe. <sup>6</sup> Kopocsicac kuc heresebininau ua mekecede, imoc kpac anudeac ubaherenina esea mariponnu Yesugoc kpekpea, imoc negendimbe. Kopocsicngo minginnina monggoc mi kefudeac ifi anec. <sup>7</sup> Imoc yofiac, Yesungo ngic homeec, ye kopocsihaac witicfunac bic mesiec.

<sup>8</sup> Nga nenang Kristogoc bic homeing dema yegoc ifingoc kecnide, imoc negensinggedimbe. <sup>9</sup> Nga Anutungo Kristo homecfunac megboriu yarec. Amma ye yacma monggoc mi homeude, imocno negendimbe. Ye homecac kuc bageau monggoc mi kecede. <sup>10</sup> Ye ngicngac kopocsicninaac amma atac mocgusac homeu wisickeec. Amma yofinenggac kecede, imoc Anutuac

hoannu kecede. <sup>11</sup> Imocac ngeni ngenanggac yofi negembisia, kopocsicfunac bic homema imocac bageau monggoc mi kecdimbe. Nenang yofinenggac Yesu Kristogoc kpeketahema Anutuac hoannu kecdimbe.

<sup>12</sup> Kopocsicngo kpedzingunuu sebiac negensongo hania haniango wangepgunubacac ngeni kopocsic faka uba eseau fekecede, imoc wama mi modachisia. <sup>13</sup> Amma oruc kickedzac nga hanimaringina imocngo kopocsicac kingangkpekkepe mi ambeso, kpac. Ngeni warac homecfu kegec, yofinenggac ine kecec forau kecdae, imocac ngenaoc efaima kemma Anutuaru oruc kickedzac nga hanimaringina desigec imocngo yeac kingangkpekkepe ambeso. <sup>14</sup> Ngeni dedeseriyoacac bageau kecec, imoc bic wama danggunucac bageau kecdae, imocac amma kopocsingoc kunengngina mi ambeso.

<sup>15</sup> Imocac yofi annide. Nenang dedeseriyoac bageau mi kecdimbe, kpac. Nenang danggunucac bageau kecdimbe. Imocac kopocsic meficgeni, imoc mi ngereeude nga ifi mi fingecheso! <sup>16</sup> Ngeni ngic monggac wanac areng kecegeceac desiemegeceude ngeni yeac wanac areng kecma yeac enac tofohobisia, imoc negendae. Ifi isoc ngeni kopocsicac wanac areng kecma enara tofohogeceude homec meficgegecede. Nga ngeni enac tofoc tofohofakaac bageau kecma dindingac kecec meficgegecede.

<sup>17</sup> Anu ngeni warac kopocsicac wanac areng kegec, imoc bic wagec wisickeec. Wisickeu kpoukpouyoacac hoannu faingunugec, ngeni ubangina hafaogoc imohai desiemema imoc tofohokecegecac amma Anutu dengereduae. <sup>18</sup> Ngeni kopocsicac witicfunac bic mesi mesingunuya nga yaguc dindingac kekecac wanac areng amma kecdae. <sup>19</sup> Nga ngeni sebfusiatic kucmamanginagoc kecdaeac ngenaeac siricfu yofi deduae. Ngeni warac oruc kickedzac nga hanimaringina desiemema uba wonongagoc kecec nga singyoac kpekkepe, imocac bageau wanac areng kegec. Ifi kecma singyoac kpema kegec. Ngeni ifi isocngoc yofinenggac oruc kickedzac nga hanimaringina desiemema dindingac kekecac bageau wanac areng kecbisia. Kecma kpetiatic kekecfu yadiseri angecede.

<sup>20</sup> Amma ngeni kopocsicac wanac areng kecmagec dindingac kekecac yoacngo naric mi garengngunuec, kpac. <sup>21</sup> Ngeni imohai kopocsicac fora mekecegec imocngo kekecngina memanganeecc amma ngeni yofinenggac imoc negemma gamengunuande. Faka nga angammeme ifianoc homec heficgegeude. <sup>22</sup> Ngeni yaguc kopocsicac witicfunac mesingunungunuya nga Anutuac wanac areng kecdae, imocac fora yofi, ngeni kpetiatic kecec kecma yadiseri angkecmagec wisickeu kekecseri megecede. <sup>23</sup> Imoc yofiac, kopocsicac buma imoc homec megecede nga Anutuac wosoefac, imoc Kebunina Yesu Kristoac amma kekecseri buma kpac nemmebesande.

## 7

<sup>1</sup> Tosofocna, ngeni dedeseriyoac negendae, imoc negenduae. Imocac yofi debeso negenduae. Ngicngac gbori kecmagec dedeseriyoacngo kunengngina amma garengyunuande, fora. <sup>2</sup> Imocac ngac mong ye ngicfu kenudeu, ngic ye kecmanungoc ngacngo yegoc dzahacemema kefecede. Dedeseriyoacac sing ifi fede. Kecma ewea homeudeu dedeseriyoacngo ngac ngicfu witickeec, imocac witiha kpac anude. <sup>3</sup> Nga ewea gbori kecmanungoc ngac ye ngic monggaru kenudeu yeac serongac degecede. Nga ewea homeudeu ine ngac ye dedeseriyoacac witicfu monggoc mi kefude. Ye naso imohai ngic monggac ngac anudeu serongac mi anude. <sup>4</sup> Tosofocna, ifi isocngoc

Anutungo Kristoac sacfusi u ngeni yegoc ngunuhomeu ngeni dedeseriyoacac bageau monggoc mi kecdae. Ngeni ngic homecfunac yarec, yegoc torokpema kecgcedae nga nenang Anutuac uaac fora annideac ye ifi anec.

<sup>5</sup> Nenang warac uba eseac arennu kecmi na dedeseriyoacngo songo mangana herenina miaru homecac fora meficgekefing. <sup>6</sup> Nga yofineng-gac dedeseriyoacfunac yungec yungecnunuya kecdimbe. Dedeseriyoacngo mendannunuec, imohacnac bic homeing. Dedeseriyoacfunac homema ua esea imoc wama Asuac ua gboriau emma nandimbe.

<sup>7</sup> Imocac nenang yofi denide, dedeseriyoac yengenaoc kopocsic mi ande, kpac. Dedeseriyoacngo ine kopocsicac siriha edzacnuu negenghomeduae. Ge hensongo mi ambesena. *(Makekeng 20:17; Dedeseri 5:21)*

Dedeseriyoacngo ifi mi debacfu ni hensongoac siriha naric mi negenghomebai. <sup>8</sup> Nga kopocsic ye dedeseriyoacfusing ine singa meficgema hensongofaka hania hania herena manau miacande. Amma dedeseriyoac mi febacfu, kopocsic ye homemea ambac. <sup>9</sup> Ni warac dedeseriyoara kpac kecbare dedeseriyoacngo hau negenai. Negemba imohai ine kopocsicngo kekehagoc amma ua meu <sup>10</sup> homeai. Imohai yofi henai, dedeseriyoacngo kekek meficgeudeac faifaia fede, imocngonoc homec meficgenec. <sup>11</sup> Kopocsicngo dedeseriyoacfu singa meficgema ikocfu wangecnuma kpe-bucnuec. <sup>12</sup> Imocac yofi fede, dedeseriyoac imoc yengenaoc kpetiac nga nonoyoac ifingoc kpetiac nga dindingac amma gombunga.

<sup>13</sup> Wiac gombunga, imocngo homecfu mi fainuec, kpac. Kopocsicac hania fingetegerudeac kopocsicngo ine homecfu fainuec. Nga kopocsicngo wiac gombunga mema imocngo nearu homec meficgeec. Ifi anu dedeseriyoacngo kopocsic heficgeu kopocsic ye wiac mangana yombong, imoc fingetegeruec.

<sup>14</sup> Dedeseriyoac imoc Asuarunac, imoc negendimbe. Nga ni ine uba eseanagoc kecba kopocsicngo wanac menuu, kopocsicac bageu kecduae. <sup>15</sup> Nga faka nga angammeme angkecduae, imoc dafi ac angkecduae, imoc mi negentegecduae. Ni wiac mong ambadeac negensianduae, imoc mi angkecduae. Nga faka ubanango waanduae, imoc ine angkecduae. <sup>16</sup> Amma faka goa songona mi angande, imoc mekecduaeu imocngo yofi deseride, dedeseriyoac imoc gombunga. <sup>17</sup> Ifi anu neannaoc faka imoc mi angkecduae, kpac. Kopocsic neac here manau fede, imocngo faka imoc angkecde. <sup>18</sup> Neac hereu wiac gombunga mong mi fede, ifi negenduae, imoc uba eseac deduae. Imoc yofi, ni faka gombunga ambadeac negengkecma ine faka nga angammeme gombunga ambadeac obohoanduae. <sup>19</sup> Fora, angammeme gombunga ambesonga negenganduae, imoc mi angkecduae. Nga faka mangana wabadeac negenganduae, imoc ine angkecduae. <sup>20</sup> Ni faka goa mi ambadeac anengkecde, imoc ambadeu ine neannaoc faka imoc mi anduae, kpac. Kopocsic herena manau fede, imocngo ine faka imoc heficgeu anganduae.

<sup>21</sup> Faka gombunga ambesonga negembare faka manganango ine here-naunac bic erema kekecna garenggeande, imoc meficgeanduae. <sup>22</sup> Amma ubaanganau Anutuac dedeseriyoac ubangerecgcog hoanggekecbare <sup>23</sup> songo monggac singyoacngo ine sebinau fingeru henganduae. Nga imocngo negen negennau dedeseri fede, imocgoc ewema kecdae. Ewekecma kopocsicac singyoacngo sebinau witicfu faima sebinau uaya mekecde.

<sup>24</sup> Ni ngic makpekpea ubahodungoc kecma sebinagoc homecac bageau kecbare merang imohacnac mesinuude? <sup>25</sup> Anutuac dangge deduae, Yesu

Kristo Kebunina yeng mesinuude. Mesinuu neanna negen negennango Anutuac dedeseriyoacac bageau kecma wanac ua mekecduae nga ubana eseango ine kopocsicac singyoac kingang kpemima kecduae.

## 8

<sup>1</sup> Nga ngicngac Yesu Kristogoc kpeketahema kecdae, yeni yoacac arennu mi makpegecede. <sup>2</sup> Ge Yesu Kristogoc kpeketahema kecna Kecek Asuac\* dedeseriyoacngco kopocsic nga homecac singyoacac witicfunac yungecgucc. <sup>3</sup> Uba esa ye dedeseriyoacac kuha memau dedeseriyoacngco wiac obohou Anutungo ua imoc yofi meec. Ye Medacyombonga sueu nenang siric mema bangecfu maec. Mau Anutungo yeac sebiu kopocsicina desima meicke kpac anec. <sup>4</sup> Anu nenang uba esaac sinnu kengking imoc wama Tiri Asugoc kpeketahema kengkecdimbe. Kengkecma dedeseriyoacac faka dindingac kekecninau fingctegerude.

<sup>5</sup> Ngicngac uba esaac songo nga negen negeng modacandae, yeni negen negengngina uba esaac arennu faiandae. Nga ngicngac Asuac songo nga negen negeng modacandae, yeni negen negengngina Asuac arennu faiandae. <sup>6</sup> Anu uba esaac negen negeng imoc homehagoc nga Asuac negen negeng imoc kekehagoc amma ruaeagoc. <sup>7</sup> Uba esaac negen negengngco Anutu ngaba ammikecede amma Anutuac dedeseriyoac mi tofohoande. Imoc dedeseriyoacac bageau kefudeac obohoude. <sup>8</sup> Nga ngicngac uba esaac songo nga negen negeng modackecdae, yeni Anutuac ubasongo meficgegecede singa obohokecdae.

<sup>9</sup> Anu Anutuac Asungo ngeneac ubahereu kecdeu ngeni Asuac arennu kecgecede, uba esaac arennu kpac. Nga mong ye Kristoac Asu mi mekecede, ye ine Kristoac areng kpac. <sup>10</sup> Nga Kristongo ngeneac ubahereu kefudeu sebingina imoc kopocsicnginaac amma homeec. Nga ongaasunginango ine dindingac kekecac amma kekehagoc anec. <sup>11</sup> Anutu ye Asuyango Yesu homecfunac megboriec. Amma Asu imocngco ubaherenginau kecdeu yeng sebingina homecac bageau kecede, imoc ifingoc Asuyango megboriude.

<sup>12</sup> Negen negensinggoc tosofocna, negenggec, nenang turunninagoc kecdimbe nga imoc ine uba esaac negemma kpac. Asungo bic megborinunuec, imocac amma uba esaac arennu kecnideac turunga mong mi fenemmede. <sup>13</sup> Ngeni uba esaac songo nga negen negeng modacma kecgecede homeac areng anggecede. Nga Asuac kucfu uba esaac angammeme kpebucgegecdeu kechereema kechessandae. <sup>14</sup> Anutuac Asungo ngicngacareng wangecyunukecede, yeni sasawango Anutuac medacfora. <sup>15</sup> Asu mongngco wanac menunuu monggoc kengcgcoc kecnide, asu ifia mi nemmec, kpac. Nenang asu siriha mong mema Anutuac medacfora aning. Nga Asu imocngco meficnunu yea yofi kpacma dekecdimbe, "Manna, Manna." <sup>16</sup> Nenang Anutuac nambaracfora kecdimbe, yoac imocnoc Anutuac Asu yengenaoc hepuc amma ongaasuninau faiu dekecdimbe. <sup>17</sup> Nga yeac nambaracfora kecdimbeu yeac maridzoming memeareng ifingoc amma Kristogoc areng mocgu kecma maridzoming menide. Neni nenahafoc kuc nga kibikperaginagoc annideac yegoc ifingoc kpendzeng kpeni Anutungo fora nemmeude.

<sup>18</sup> Imoc yofi negensiduae, kuc kibikperagiagoc ngadeu nenannu fingctegerude, imoc wiac engena yombong nga yofinenggac ebic fingecnemkecede, imoc wiac mamea. <sup>19</sup> Anutungo deu wiac fingecdarec imoc

\* 8:2: Kecek Asu imoc Tiri Asuac dede.

sasawango Anutuac medacfora didiu fingectegecgecdeac mamangkima yeneac tomai kecdade.

<sup>20</sup> Nga Anutungo wiac deu fingeclarec, imoc ye negemmanu dzanggeande. Yeng wiac deu fingeclarec, imoc yengenaoc dzanggedarudeac mi negensiec, kpac. Anutu yengenaoc ifi faiec. <sup>21-22</sup> Amma imocac yofi negendimbe, Anutungo deu wiac sasawa fingeclarec, ihacnacngoc erekecma yaguc kecdimbe. Nga yeneng ifingoc wedzec horarac amma gadze yiniu homema hoaeandae, imocac witic hesima Anutuac nambaracfora yeneac amabangecfu kenggecdeac ayemmeude. Amabangec imoc witiha kpac nga imoc kuc nga kibikperagiagoc.

<sup>23</sup> Nga imocsaac kpac. Anutungo hanahema Tiri Asu nemmeec. Ifi nemmeu nenang ifingoc sebiniagoc bangec yomoc wama medacforaac tatacfu bic ennideac herekiki anemmeu nasoyaac tomai kecdimbe. <sup>24</sup> Amma nenang wiac foraya fingerudeac negenserima tomai kecma komoc kpenide. Mong ye foraya bic henu imoc fingerudeac negenserima kecande, faka siriha ifia mi fede, kpac. <sup>25</sup> Nga wiac mi hengena imoc mebesandimbe, ifi negensinggema kecdimbeu modzotitia kpac mamangkima tomai kecnide.

<sup>26</sup> Ifi kecina Asungo kucmaninaac amma hama meficnunuu ifi me ifi numuni ngereude, imoc mi negentegecandimbeac amma yeng agenina tima yoara kpac hereudumengau numuu Anutuaru engande. <sup>27</sup> Enu ngicherenina hengkecde, yeng Tiri Asuac negen negeng ifingoc negenude. Asu ye Anutuac negen negeng modacma kpetiac habu nenanggac amma nunumua faikecde.

<sup>28</sup> Anu yofi negendimbe, Anutungo arenga faima ngicngac negengyunuma kpacyunuu yeni yeac arengfora kecdade. Ngicngac heregoc yeac songo negengandae, yeni negengyunuma kekecnginau wiac sasawa didingac arenggema meficyunuu ngereeyombonggeude. <sup>29</sup> Imoc yofiac, Anutungo ngicngac bic negengyunuec, yeni meisingyunuu yadiseri amma yengena Medaha isoc anggecdeac desiyunuec. Medahango munafora homac yeneac waracdacngina anudeac ifi arenggeec. <sup>30</sup> Arenggema ngicngac warac bic meisingyunuec, yeni ifingoc kpacyunuma didingac deyemmec. Didingac deyemmema kuc kibikperagiagoc ifingoc yemmec.

<sup>31</sup> Imocac amma Anutungo nanggenunuma nenanggoc kecmanu mongngo sinnina hedzickema naric mi memanunuude. <sup>32</sup> Anutungo Medacyombonga mi segerema sasawa nenanggac amma ngaba yeneac mariu waec. Nga nenanggac waecac amma ye ifingoc ubangerehaac torokpema Medahagoc wiac sasawa nemmeude. <sup>33</sup> Mongngo Anutuac meisingfora yoacfu faiyunuudeu, Anutungo yeneac yocac ifingoc deu firang anggecde. <sup>34</sup> Yesu Kristo yennoc homeec. Homeu Anutungo ifingoc ye homecfunac megboriu yarec. Yacma Anutuaru enec, foiau tacma nenanggac amma numukecde. Imocac mongngo meisingfora yoacfu kopocsicninagoc dema negende, ye osiude. <sup>35</sup> Amma Kristungo heresongoc hoannunukecdeac, kekec imohacnac wiac mongngo nenang mederenunuudeacsoc mi ande. Kpendzeng me ubaebic me nunukporac anemmegecde me herehomehome me senggang kekec me manganebeso annide me dzikacbeang, imoc sasawango Kristoac songounac naric mi meicnunuude. <sup>36</sup> Yoac yomoc bic oho ohoya fede,

“Geac areng andimbeac amma yeni asoacnac kemma marai homecfu fainunukecdae. Yeneng nenenggec neni rama kpebucyunuandae, yeni isoc andimbe.”

(Mitiyegec 44:22)

<sup>37</sup> Imoc sasawa fingecnemmeu Kristongo heresongogoc bic hoannunuu nenang yegoc kecma feracyunuyombonggema firang amma kecdimbe. <sup>38-39</sup> Nga Anutungo heresongogoc hoannunuu nenang Kebunina Yesu Kristogoc kpeketahema kecmi na wiac mongngo naric mi mederenunuude, imoc negeseriyombonggeduae. Imoc homec me kekec, angero goa me ngictau goa, wiac goa yaguc fedae me wiac ngade fingecgede, wiac goa kucnginagoc wihacnac me wiac goa kucnginagoc emuhacnac nga wiac goa Anutungo deu fingecgec, yeni sasawango yeac songounac naric mi meicnunugede.

## 9

<sup>1</sup> Ni Kristogoc kpeketahema yoac fora deduae, ikoc mi anduae. Nga Tiri Asungo here negen negenna midiu imocngo hepucna anu yofi deduae. <sup>2</sup> Ni nasosoc arengfocna yeneac amma ubahodungtoa nga ubaebicgoc kecduae. <sup>3</sup> Nga neng yeneac do mema sowecac bageau kecma Kristoaru agac kecbadeac negenduae. Neni kisicnina mocgu. <sup>4</sup> Nga yeni Israe areng, yeni manggacac medacyombong kuc nga kibikperaginginagoc kecdae. Yeni dzadzahac nga dedeseriyoacgoc kecma Anutuac womong garengkekecdae. Amma Anutungo wiac yemmeudeac deseriyemmeec, imoc yenearu fedengoc. <sup>5</sup> Nga yeni kisibangecfocngina negendae, yeneac fingecsaheunac Kristongo ngic siric amma fingerec. Ye Anutunoc, wiac sasawaac engena. Yearu dedengerec nga dedengerec fekengkecbeso, imoc fora.

<sup>6</sup> Anutu yoara kuha made, ngeni ifi mi negembisia. Imoc yofi, Israeng-icngac Israe fingecsaheunac, yenearuac goa Israe yombong mi andae. <sup>7</sup> Imocac siriha yofi, Abrahanggac bangecfora goa yeni Sara kimearuac. Imocac yofi oho ohoya fede,

“Isakaac fingecsaheungo geac bangecfocga yombong anggede.” *(Fingec fingec 21:12)*

<sup>8</sup> Sebiac arennu fingecdae, yeni Anutuac nambaracfora, ifi mi dede. Dedzegeac bageau fingecandae, yeni Abrahanggac bangecfora yombong andae. <sup>9</sup> Ye Abrahang nga Sara yerigoc yoac yofi dedzege anec, “Ni naso deaimoc imohai habare Sarango medac mong mema kefude.” *(Fingec fingec 18:10,14)*

### *Songea arennu meisinnunuude*

<sup>10</sup> Nga imocsac kpac, Bangecnina Isaka ye Rebekagoc feu yeng fora tombosonga kpenangyuruec. <sup>11-12</sup> Nga medac yeri mi fingecma kecmaecngoc yereac angammemengira gombunga me mangana mong mi femanu Anutungo yereac Rebeka yofi bic edeec,

“Darango muneaac kingang kpeude.” *(Fingec fingec 25:23)*  
Anutungo mong uayaac amma mi meisinggeude, ye songoya nga negen negengaac amma ngicngac kpacyunuande, imoc seria nanudeac ye ifi anec.

<sup>13</sup> Imocac yofi oho ohoya fede,

“Ni Yakobo heresongogoc hoanggema Esau ine ubango ukuai.” *(Marekai 1:2-3)*

<sup>14</sup> Ifiac amma yofi denide. Anutungo sing mi segeude. Ye yoara gombunga angande. <sup>15</sup> Yeng Mose yofi edeec,

“Ni monggac wosoefac ammibadeac negemma ye wosoefac ammibade. Nga monggac ubamangang ammibeso negenduae, ye ubamangang ammibade.” *(Makekeng 33:19)*

<sup>16</sup> Ifi anu Anutungo yengena wosoefahaac amma ngic meisinggeude nga ngic ye yengenaocngoc songo meficgeecac me uatoa meecac amma ifi mi fingerude. <sup>17</sup> Mitikibiu yoac oho ohoya fede, imocngo Farao yofi edeec, “Ni gearu kucna bangeha bangeha edzacyunubade nga kpacna dekper-agigec kenu negendagecdeac amma ge ngictau faiguba genggecde.” *(Makekeng 9:16)*

<sup>18</sup> Imoc yofi, Anutungo mong wosoefac ammibesonga negendeu, imoc amiude. Amma monggac herea dzegebesonga negendeu, imoc dzegeude.

<sup>19</sup> Ge yoacna imoc negemma yofi denade gedang, “Anutuac songo nga negen negeng kpeudeac sing mi fede. Nga sing kpekpe mi febac dede yeng ni kopocsingagoc naric mi debac.” <sup>20</sup> Bangecngic ge negenna, ge ngicsac, ifi dema Anutuac yoac turunga mi merembesena. Marikibi minginango wiac mong meu wiac maringo memea, imocngo mingina naric mi kpesimiude, “Ge nocac ni ifia menunec?” *(Yesaia 29:16; 45:9)*

<sup>21</sup> Enangmemengic ye songeaac arennu ua naric meude, ye gbaki mema imocngo enang mong uaya engena meude nga enang mong uaya mamea naric meude.

<sup>22-23</sup> Enang goa yeni kuc kperaginginagoc anggecdeac Anutungo warac wosocefac ayemmema mengereyunuec. Ngicngac yeni yeac kuc kibikper-agiaoc henggecde, songoya ifi anec. Ye desi desiac fakaya ngicngac edzacyunuudeac nga yeni kuha negenggecdeac enang goa yeni kpedzac kpedzameaac arennu bic faifaia nandae, yeneac amma modzotitia kpac nasoherec tomaingina kecande, ye songea naric modacma ifinoc anude.

<sup>24</sup> Imocac nenannoc kpacnunuec. Imoc Yuda arengsac kpac, ye bangec monnunac ngicngac momoc kpacyunuec. <sup>25</sup> Ye profete Hoseaac kibiu ifingoc yofi dede,

“Ngicngac areng mong warac neac ngicngac mi kecgec, yeni neac ngicngac, ifi kpacyunubade. Nga ngac mong heresongogoc mi hoanggeai, ye neac songongac, yeac kpara ifi kpachade.” *(Hosea 2:23)*

<sup>26</sup> Nga bangec monnunac ngicngac Anutungo yeneac yofi deec, “Ngeni neac ngicngac kpac.” Amma bangec imohaingoc yofi kpacyunugecde, “Yeni Anutu kekehagoc yeac medacfora.” *(Hosea 1:10)*

<sup>27</sup> Yesaiango ine Israe yeneac negemma yofi kpacma dede, “Israe ngicngac yeni kpetengina kuneng, imoc kondunggac sangi isoc anudeu ni sifu yenearunac noboha efeaneacsac onggongyunuba komoc kpegecde. <sup>28</sup> KEBUNGO bangecfu ngicngac yoacngina bicbic isinggema desiyunuma uaya mesiude.” *(Yesaia 10:22-23)*

<sup>29</sup> Nga Yesaiango kpefingyoac yofi bic deec, “KEBU Kuctoa Mingina, yeng bangecfocnina noboha goa mi onggongyunuu komoc kpebau debac Sodong nga Gomora yeni isoc ambing.” *(Yesaia 1:9)*

<sup>30</sup> Ni yofi torokpema deduae, bangec monnunac ngicngac, yeneng dindingac kecgecdeac seseriua mong mi mekecma kekec dindingac eng meficgegec. Yeni negensinggegec, imocac amma Anutungo dindingac kpacyunuec. <sup>31</sup> Nga Israe ngicngac yeni ine dedeseriyoacngo kekec dindingacfu faiyunuudeac seseriua mekecgec. Mekecma dedeseriyoacfusing dindingac kekec mi meficgegec. <sup>32</sup> Yeni faka nga angammemenginaac negensima negen negensing fora imoc ine wagec. Yeni hocfu kpondzong heima mayunuec. <sup>33</sup> Imocac yofi oho ohoya fede,



“Negendae, ni Sionnu hoc mong faiba imohai yeni kpondzong heigece nga peperandziu tifainggema negemmangang meficgegece. Nga mongngo ye negensinggeudeu ye game kpepeu mi enude.” *(Yesaia 8:14; 28:16)*

## 10

<sup>1</sup> Tosofocna, Anutungo arengfocna kopocsicac ebicfunac mesiyunuu komoc kpegece, imocac heresongonango negengyombonggema ye numumianduae. <sup>2</sup> Amma ni yeneac hepuc amma yofi deduae, yeni Anutuac kingang kpegeceac ngombongemema seseri angkece. Nga ye dafi kingang kpebibesonga, imocac negen negentegec ine mi feyemme. <sup>3</sup> Amma yeni yenaocngoc sing dindingac meficgegeceac arenggema uaya mekece. Nga Anutungo sing mong bic meficgema ngicngac dindingac deyenmeande, sing imoc ine mi negendae. Ifi amma yeni Anutuarunac kekec dindingac fede, imocac bageau kegeceac waandae. <sup>4</sup> Kristongo dedeseriyoac hafoangoc modacdaru dedeseriyoacac ua wisic wisickea anec. Imocac amma ngicngac ye negensinggeandae, yeni sasawango dindingac kekec meficgegece.

<sup>5</sup> Mosengo dedeseriyoacac sing dindingac kekec imocac yofi ohoec fede, “Ngic mong ye dedeseriyoac modacdarude, yeng sing imohai kekehagoc amma kefude.” *(Sesememe 18:5)*

<sup>6</sup> Nga Anutungo negen negensinninaac amma dindingac denemmeude, sing imocngo yofi dede,

“Ge geanggaoc ubaheregango yofi mi kpesiemebesena, merang kurumennu enude?” *(Dedeseri 30:12)*

Imoc Kristo kurumennunac memaudeac negemma dede. <sup>7</sup> Me yofi, “Merang hofeu kemeude?” Imoc Kristo homecfunac meereudeac negende. Ifi mong mi negembisia.

<sup>8</sup> Imocac geac yoac yofi dedea fede, “Anutuac yoac imoc hoanggau nga enacgau amma heregau fede.” *(Dedeseri 30:14)*

Nga negen negensinggac yoac imocnoc dekperagingemmekecdimbe. <sup>9</sup> Imoc yofiac, ge enacbibicgango, Yesu ye Kebu, imoc dekperaginade nga Anutungo Yesu homecfunac megboriec, imoc negensinggenadeu Anutungo kopocsicgaac ebicfunac mesiguu komoc kpenade. <sup>10</sup> Nenang ubahereninango ye negensinggeni yeng dindingac denemmeude. Nga enacbibicininango ye dekperagini yeng kopocsicininaac ebicfunac misinunuu komoc kpenide. <sup>11</sup> Mitikibingo imocac yofi dede,

“Mongngo ye negensinggeudeu, ye gamekpepeu mi enude.” *(Yesaia 28:16)*

<sup>12</sup> Anu yudaareng nga grihareng siricngira mong mong mi ande. Kebu ye sasawa nenanggac Kebunina. Nga ngicngac yeac kpac kpacandae, yeni ubangerecngoc keneha hania hania naric yemmeude. <sup>13</sup> Nga

“Ngicngac yeng KEBUAC kpac kpacgec Anutungo yeni sasawa kopocsicnginaac ebicfunac mesiyunuu komoc kpegece.” *(Yoele 2:32)*

<sup>14-15</sup> Nenang mong sueni yeng Anutuac yoac dekperagiyemmeude. Nga Anutuac yoac dekperagiu negemma naric negensinggece. Negensinggema yeni Kebuac kpara kpacma komoc kpegece. Imocac yofi oho ohoya fede, “Ngic yeni siduc gombang mehakecgec ngicngac yeneng yeneac hani udu-meng ubangerehagoc negenggece.” *(Yesaia 52:7)*

<sup>16</sup> Anu ngicngac yenearunac homacngo siduc gombang imoc ine mi tofohogec. Yesaiango yofi dede, “Kebu ge negenna, yoac dekperagiyemmeing, imoc yeni mi negensinggegec.” *(Yesaia 53:1)*

<sup>17</sup> Nga Kristoac yoac dekperagiyemmeni yeni yoara negengandae. Amma yoac imoc negemma negensinggegede.

<sup>18</sup> Anu Israe yeni yoara kedzacnginango mi negenggec me? Ifi kpac, yeni bic negenggec. Yofi oho ohoya fede, “Ubaudumengngina imoc bangecfu kengkecde. Yeni yoacnginango bangectoa bangec yomocac noboc noboc wisic wisickeau kendarude.” *(Mitiyegec 19:4)*

<sup>19</sup> Ifiac amma monggoc deba, Israe ngicngac yeni yoara ubaherenginango negentegecgec me? Mosengo Anutuac enac mema imocac yofi deec, “Ni faka angemmeba ngeni ngicngac areng mong bangec mocguac areng mi andae, yeneac keracmangang anggecde. Nga areng mong negen negentegecngina kpac, ngeni yeneac herebu negenggecde.” *(Dedeseri 32:21)*

<sup>20</sup> Yesaiango kengeha kpac imocac torokpema bangeha bangeha ngicngac, yeneac yoac yofi deec, “Ngicngac yeneng ni mi hofocnuma eng meficnugec. Nga neac dekpesia kpac kegcgec, yenearu fingecyemmeai.” *(Yesaia 65:1)*

<sup>21</sup> Amma Israe areng yeneac ine yofi deec, “Ngicngac areng mong yoacna mi tofohoandae nga yoac kpekpe kecdae, yeneng hagecdeac asoacfunac kemma tofocnac marina sineyem-mekecduae.” *(Yesaia 65:2)*

## 11

<sup>1</sup> Imocac amma yofi negemma kpesiduae, Anutungo ngicngacfora bic wayunuec me? Imoc kpac! Neannaoc Israengic Benyaminggac arenunac nga kiscina Abraham. <sup>2</sup> Anutungo ngicngacfora bic meisingyunuma mi wayunuec, kpac. Nga Eria ye hereebiha Anutuac kicfu dekperagima israengicngac yeneac yofi dema numuec, imoc mitikibiu oho ohoya fede, <sup>3</sup> “Kebu, yeni geac profetefocga yunuhomegec nga geac arataga kpmbarackegec. Nga ni mocgungosac kecbare kekecna meickegecdeac negendae.” <sup>4</sup> Ye ifi numuu Anutungo ine turunga yofi meremmiec, “Ni ngicfocna 7 tauseng bic segereyunuba kecdae. Nga yeni nemu Baari yearu fafoc mong mi heimigec.” Ngeni imoc negembisia. *(1 Ngictau 19:10,14,18)*

<sup>5</sup> Ifi isocngoc Anutungo yofinenggac yenearunac tosea meisingyunuma wosoefaha ayemmeu yengena habubisic mong amma kecdae. <sup>6</sup> Yeng meisingyunuma danggunuha yemmeec, imoc yenang angammemengina gombungaac amma mi meisingyunuec, kpac. Ye angammemengina gombungaac amma meisingyunubac dede wosoefaha imoc wosoefac fora mi ambac.

<sup>7</sup> Imocac amma yofi fede, Israe yeni wiac megecdeac uatoa mekecma imocac fora mong mi meficgegede. Nga Anutungo ngicngac yeneac botucfunac meisingyunuec, yeneng ine wiac imoc meficgegede. Anu Israe noboha yeni ubaseri nga ubafong amma kecdae. <sup>8</sup> Imoc yeneac yoac mong yofi oho ohoya fede,

“Anutungo faka meu yeni ongaasungina dzingfong anec. Amma kicnginango wiac mong mi hemma kedzacnginango wiac mong mi negengec. Yeni ifia keceregecngo yaguc kecdaengoc.” (*Dedeseri 29:4; Yesaia 29:10*)

<sup>9</sup> Imocac Dawidingo yofi deec,

“Yakaneneac fakangina angandae, imocngo subabanggeng nga ufic isoc meyunuu kopocsicnginaac turunga ambeso. <sup>10</sup> Wiac mong mi henggecdeac yeni kicngina pisickebeso. Ge nasoya kpac ngadehokuc meyununa kecbisia.” (*Mitiyegec 69:22-23*)

<sup>11</sup> Ni yofi torokpema kpesiba, Israe yeni mayunuudeac kpondzong heigec me, imoc kpac. Yeni Anutuac yoac ferahegecac amma Anutungo bangec monnunac ngicngac, yeni kopocsicac ebicfunac mesiyunuu komoc kpegecde. Israe yeneng yenemma keracmangang anggecdeac ifi anec.

<sup>12</sup> Nga Israe yeni Anutuac yoac ferahegec, faka imocngo Anutuac wosoeffecto heficgeu bangeha bangeha yenearu kendarec. Amma Israe yeni Anutuac sinnu makpegec, imocngo bangec monnunac ngicngac, yeni wiac gombunga homac yombong meficgemyemec. Kecma, Israe ngicngac sawango negensinggecde, naso imohai wiac engena yombong fingerude.

<sup>13-14</sup> Anu bangec monnunac ngicngac kecdae, ngeneac yofi deduae, neanna arengfocna yeneng ngeneac keracmangang anggecde. Amma yeni sing imohai ngeni isoc kopocsicac dzuac dzuac mema komoc kpegecde. Ifi fingerudeac negemma neng ngeneac aposoro anai. Amma ua mekecduae imocac negemba engena yombong ande. <sup>15</sup> Anutungo Israe ngadehema waec, imocac bangec monnunac ngicngac ngeni Anutugoc uba mocgu amma ruae meficgegec. Ifi fedeu Anutungo monggoc Israe hoangyunuude, imocngo heficgeu homemea yeneng gborima kekec meficgegecde.

<sup>16</sup> Ngeni yaka buma heima waraima Anutu migececu yaka sasawa imoc kpetiac anude.\* Amma ic godea kpetiac andeu fawa sasawa ifingoc kpetiac anude.

<sup>17</sup> Anutungo oriwa fora imocac fawa goa metackema meickema, imocac tatahau, ge kate oriwa fawa yombong, kapia mong kperecegeguma oriwa forau torokpeguec. Nga geng fawa fora yenigoc kecnecc isoc yofi anude, ge ic godeagoc torokpema kecma kerecga ihacnac taima kecnade. <sup>18</sup> Ifi andeac, ge sebiengeng amma fawa noboha yeneac yofi mi negembesena, “Neng feracyunuduac.” Ge ine sebiengeng annadeu yofi negembesena, ge ic fawasac, geng ic godea mi nanggenec nga ic godeango ine ge nanggeguma kecde. <sup>19</sup> Ifi deba geng yofi denade gedang, “Yeni ninoc icfu torokpenugecdeac fawa goa metackegec.” <sup>20</sup> Denec isoc, yeni mi negensinggegecac amma metacyunuec. Nga geng negensinggenecac amma seria nangkecneccngoc. Imocac negen negenggau sebiengenga kpac amma kengecgec kecbesena. <sup>21</sup> Anutungo yengena fawa mi onggongyunuuecfu ge ifingoc naric mi onggongguude.

<sup>22</sup> Ge Anutuac faka yumea nga demetinga seria fede, momoc hentegecbesena. Ye ngic mayunuec, yeni demetinga seria ayemmec nga ge ine faka yumeau anggenec. Ge yeac faka yumeaac bageau mi kecnadeu ge ifingoc herecgeguude. <sup>23</sup> Nga fawa tosea negen negensingngina kpac, yeneng meremma negen negensingngoc anggecdeu ye icfu monggoc

\* **11:16:** Ye ic sogonggac dede. Imocac yoac Bangec kisiu 15:17-21. Yaka buma heima Anutuac sese faibesonga imocac yoac yomohai fede: Makekeng 23:19; 34:22; Sesememe 2:12,14; 23:10,17,20; Bangec kisiu 18:12; 28:26 Dedeseriyoac 26:2,10

torokpeyunuude. Nga Anutungo icfu torokpeyunuudeac naric mi obohoude. <sup>24</sup> Ge kateac oriwaac fawa kapia, imoc herecgeguma oriwa ic fora mong geac areng mi ande, imocgoc torokpeguuudeac mi ebiriudeu, oriwa ic fora yengena fawa monggoc toro torokpe ua imocngo wiac efea yombong anude.†

<sup>25</sup> Tosofocna, ngeni ngenanggac negenggec engena ambacac amma yoac mong yomoc sufu sufuya fede, imoc negenggecdeac negenduae. Imoc yofi, Israe noboha yeneac uba negen negengngina imoc fonggoma femanungoc bangec monnunac ngicngac, ngeni erema hakecma kpetenginaac siriha hafoangoc ambeso. Kpetengina hafoangoc anugoc Israe areng tosea ifingoc erema torokpegede. <sup>26</sup> Ifi anu Kebungo Israe hafoangoc kopocsicac ebicfunac mesiyunuu komoc kpegede. Imocac yoac yofi oho ohoya fede, “Memengerec ngic ye Sionnunac hau Anutu ngadeheandae, yeneac faka mangana imoc sasawa Yakoboac arennunac meickeude.” <sup>27</sup> “Nga kopocsingina meickebade, imocngo naso imohai dzadzahacngina feude.” (Yesaia 59:20-21; 27:9; Yeremaia 31:33,34)

<sup>28</sup> Siduc gombang hau Israe yeni imoc ngadehema Anutugoc ngaba angkecma ngeneac sing meefaigec. Anutungo ine Abrahanggac bangecfora meisingyunuma kisicfocnginaac amma hoangyunukecde. <sup>29</sup> Anutungo ngicngac kpacyunuu wosoefacfu kuc yemmema negen negenga ngade meremma monggoc wangecyunubac, faka imoc mi femide, kpac. <sup>30</sup> Amma bangec monnunac ngicngac, ngeni warac Anutuac yoac kpekpe kecgec nga yofinenggac Israe yeneng yeac yoac kpekpe kecgecac amma Anutuac wosoefac ngenearu fingerude. <sup>31</sup> Yeni hanahema Anutuac yoac kpegec ngeni Anutuac wosoefac megec. Nga Anutungo yofi faiec, ngeni wosoefac imoc megecguc yeni imoc ifingoc megede.

<sup>32</sup> Anutungo ngade ngicngac sasawa wosoefac ayemmeude. Ye imocac hanahema ngicngac yoackpekpenginaac amma witicfu faiyunudarec.

<sup>33</sup> O, Anutuac semeng dzohongagoc fede nga negen negenga imoc kuneng nga kpeukeme kemea. Anu yeac desi desiac hania nga fakaya amma angammemea, imoc negen negennina feraheude. <sup>34</sup> Imoc yofiac,

yeac negen negennu wiac fede, imoc ngic mongngo naric mi negenude. Nga mongngo ye negen negeng naric mi meficgemiude. (Yesaia 40:13)

<sup>35</sup> Amma ngic mongngo hanahema Anutu wiac mong miecfu ye imocac turunga kpoumiude, imoc kpac yombong. (Hiobe 41:11)

<sup>36</sup> Anutu ye yengenaoc wiac sasawa meficgedarec. Imoc yengena kucfu fedacde amma yengena songo fingerudeac faifaia. Yearu dedengerec nga dedengerec fekengkecheso, imoc fora.

## 12

<sup>1</sup> Ifi anu negen negensinggoc tosofocna, Anutungo wosoefac kuneng angemmeecac dederecge angemmema yofi deduae. Ngeni Anutuac kicfu asuu ua fora mema sebingina desigec imocngo Anutuac sese kekehagoc nga kpetiac anu yeng negenu ngereebes. <sup>2</sup> Ngeni bangectoa bangec yomocac ngicngac yenigoc angamemengina siriha mocgu mi ambeso. Anutungo uba negen negengngina heighborngemmu ngeni Anutuac songo negengising anggec yeng wiac kpacgoc nga gombunga yombong anu imoc negenu ngereude, imocac siriha naric negentegecgede.

† 11:24: Ic nenea gbomegoc didimang yeneng sing ifia metorokpeandae.

<sup>3</sup> Anutungo wosoefac anenu ni imocac sirihau ngeni sasawa yoac yofi edengunuduae. Ge geanggaac siricfu isingemema feracmarabaha kpac Anutungo negen negensinggac kpetea genec, imocac sirihau modacbesena.

<sup>4</sup> Sebi ye hafoangoc mocgu ande, imocac manau oruc kickedzac nga hanimarinina fede. Amma yeni uangina mocgusac mi meandae, kpac. <sup>5</sup> Ifi isocngoc nenang homac amma Kristoac manau sebi mocgu andacdimbe nga neni tembus tembus sasawa yeneac tosea.

<sup>6</sup> Anutungo danggunuha nemmeec, imocac sirihau wosoefahaac kuc amma ua sirihau mong mong nemmeec, imocac fenemede. Anutungo wosoefahaac amma mong profeteyoac deudeac miu, ye negen negensing femide, imocac sirihau modacma debeso. <sup>7</sup> Nga Anutungo ngic me ngac mong ogofora meficyunuudeac kuc nga ua miu yeng memefic uanoc mebeso. Nga kpoukpou uaac kuc femide, yeng imocac sirihau ngicngac kpouyemmebeso. <sup>8</sup> Mong ye ogofora negen negengngina midima demeseri ayammeudeac kuc femide, ye uaya imocac sirihau mekecbeso. Mong ye ubangerecac ngicngac wiac hania hania eng yemmeande, ye wiac imocac wosoefacfu yemmebeso. Nga enara kecma ua imocac meande, ye seseri amma uaya mebeso. Nga ubamangang negemma memeficua meande, ye ubangerecfu nga songogoc ngicngac ogofora meficyunubeso.

<sup>9</sup> Ngeni heresongogoc hoangemekecdae, imocngo faka fora ambeso. Ngeni faka nga angammeme mangana ngadehema faka gombunga serima angkecbisia. <sup>10</sup> Nga ngicngac negen negensinggoc kecdae, ngeni botucnginau heresongogoc hoangemema eweheihei angemegedeac seserigoc feracembisia. <sup>11</sup> Amma ngeni ua serima negemedeac modzotitia kpac kecma herengina wagec Asungo midiu ngeni Kebuac wanac areng kecma yeac ua mekecbisia. <sup>12</sup> Nga Anutungo wiac fingecegmeudeac deec, imocac fingerude, ngeni ifi negemma sogaijbisia. Nga kpendzenggac manau ngisima kecma mamangkima numukecbisia. <sup>13</sup> Amma kpetiac areng yeneng wiac monggac obohogec ngeni ebicngina negemma wiac yemmebisia. Nga ama monnunac goa hagec ngeni ama heiyemmegecdae angemmebeso.

<sup>14</sup> Amma ngicngac ngunukporac angemmegec ngeni yeni kenecyunubisia! Ngeni kenecyunuma mong mi sowecyunubisia. <sup>15</sup> Ngicngac sogaima kecandae, ngeni yenigoc sogaijbisia. Nga ngicngac kiacandae, ngeni yenigoc kiachbia.

<sup>16</sup> Ngeni negengemema uba mocgu ambisia. Nga ngeni mamea yenigoc tacma ua mamea naric mebisia, tatac engenaac mi angemmebeso. Ngeni tembus tembus ngenang negen negengtoanginagoc dema ifi mi negengebisia. <sup>17</sup> Nga ngicngac memanganengunugec ngeni yeneac turunga mangana mi merengyemmebisia. Ngeni ngicngac sasawa yeneac botucfu faka gombunga ayammegecdae arenggema kecbisia. <sup>18</sup> Ngeni ruaegoc kecgecdeac kuc fengemede, imocac sirihau ngicngac sasawa yenigoc ruacac sinnu kecbisia. <sup>19</sup> Songo tosofocna, faka mangana angemmegec, imocac turung mi kpouyemmebisia. Anutungo turungngina kpouyemmeudeac titing faimagec yengenaoc manganaac turung kpoukpou ua imocac mebeso. Imocac yofi oho ohoya fede,

“Manganaac turung kpoukpou, imocac neac ua, Kebungo ifi dede.” (*Dedeseri 32:35*)

<sup>20</sup> Ngeni yofi ambisia,

“Ngabaga hereaac homeu geng yaka mibesena nga dokuac ammiu geng doku gumbesena. Ge ifi annadeu gerecwewengaima oruhau kpeturanggena tarude.”  
(*Yoac negen negengagoc 25:21-22*)

<sup>21</sup> Ge manganango memaguudeac titing mi faimibesena, ge ine faka gombungango mangana memama firang ambesena.

## 13

<sup>1</sup> Gawamangfocnina kunengfocnina kecdae, nenang yeneac bageu kecma enacngina tofohoma kecbisina. Gawamang sasawa imoc Anutu yenge-naoc deu fingegec yea kpac mong mi fingerec. <sup>2</sup> Imocac mong ye gawamangfocnina yeneac yoac kpeude, ye Anutungo areng faiec, imoc kpeude. Amma ifi angandae, yeni yenaoc angammemenginaac turunga taima ebic meficgegecde. <sup>3</sup> Nga kia gawamangngo ngicngac faka gombunga angkecdae, yeni kengec mi meficgeyemmegecde, kpac. Ngicngac faka mangana angkecdae, yeni ine kengec meficgeyemmegecde. Nga ge kia gawamang yeneac kengeha kpac kecnadeac negennec isoc faka gombunga angkecna kia gawamangngo dengereguude.

<sup>4</sup> Geng gombunga kecnadeac amma yeni Anutuac kingangngic kecdae. Amma yeni foracngoc wasaibeang kucmamayagoc mi mekecdaeac faka nga angammeme mangana meficgenadeu ine kengecgubeso. Yeni Anutuac kingang ngicfora kecma manganameme yeneac turunga kpouyemmegecde.

<sup>5</sup> Nga turung kpoukpou ua, imocacsac kpac, ngeni negeng madzac ambauac ifingoc enacngina tofohobisia. <sup>6</sup> Gawamangfocnina yeni wisic wisickea kpac Anutuac bageu ua imocnoc mekecdae. Nga ngeni imocacnoc takesi faiandae. <sup>7</sup> Ngeni takesimeme yeni takesi yemmebisia nga finacac takesi degec imoc yemmebisia. Amma kunengfocngina yeneac kengecngunu enarafocngina ewehelhei ayemmebisia. Nga wiac ayemmebesonga dedea fede, imoc sasawa andacbisial

<sup>8</sup> Anu ngeni turungngina mong fedeu imoc bic kpoubisia. Ngeni heregoc songo negengemema kecbisia, faka imocac turung ine wisic wisickea kpac fekefude. Mong ye ngic ogea heresongogoc hoanggeude, yeng dedeseriyoac hafoangoc modarude. <sup>9</sup> Dedeseriyoac goa yofi fede,

“Ge kaisero mi ambesena, ngicngac mi yunuhomebesena, hamangec mi mebesena, hensongoc mi ambesena.”  
(*Makekeng 20:13-15,17; Dedeseri 5:17-19,21*)

Dedeseriyoac imoc nga dedeseriyoac goa tosea, imoc yoac mocguac manau kpeturanggedacma yofi fede,

“Ge geangga anggengande, siriha imocngoc gegoc wegena kecde, ye heresongogoc hoanggebesena.”  
(*Sesememe 19:18*)

<sup>10</sup> Nga mong ye ngicngac heresongogoc hoangyunuande, yeng ogofora ifingoc heresongogoc hoangyunuude. Ye naric mi memanganeyunuude. Ifi anu heresongogoc kekecngo dedeseriyoac hafoangoc modarude.

<sup>11</sup> Ngeni faka imoc mekecma naso yomocac negemma efaima kecbisia! Imoc yofiac, neni hanahema Kebu negensingeing, imohai negenni naso herea isoc feec. Yofinenggac ine komoc kpenide imocac naso wegenedeac ngeni gauunac gborima yachisia. <sup>12</sup> Tofocnac bic kpac anudeac ande nga ama werekenudeac ande, imocac nenang kundunggac angammeme wadacma kperagiaac tebemareku heima mekecbisina. <sup>13</sup> Amma wiac wenackperagiugana ande, imoc modacbisina. Nenang doku seria

nene nga kaisero amma sicsauc faka hania hania, imoc mi angkecbisina. Amma ewekpekpe nga keracmanganggoc kekec wadacbisina. <sup>14</sup>Uba esaac songongo ngenearu yacbacac ngeni sebinginaac songo mi nanggebisia. Ngeni Kebunina Yesu Kristo ngakpi isoc heima kecbisia.

## 14

<sup>1</sup> Ngic mong ye negen negensinggoc kecima kucmama kefu ngeneng yengena negen negensingaac deendema mi ambisia, kpac. Ngeni ye botucnginau heitaima hoanggebisia. <sup>2</sup> Goa yeni Kebu negensinggema yaka sasawa naric nedacgede. Nga goa ine Kebu negensinggema kecima kucmama amma semeng uaac yakasac negede. <sup>3</sup> Ngic mong ye wiac sasawa neande, yeng ogea yaka goa segea fede, ye mi ngadehebeso. Amma mong ye yaka goa segea fede, yeng ogea wiac sasawa neande, imoc kopocsihagoc mi debeso. Anutungo ye bic hoanggeec. <sup>4</sup> Geng ngic monggac kingangngic angammemea isinggema ye kopocsihagoc denadeac kuc mi genggena, kpac. Ye angammemeango deu maude me nanude imoc kebuyango ine naric deude. Amma kingangngic ye nanudengoc, Kebungo imocac kuc miudeac mi obohode.

<sup>5</sup> Ngic mong ye uameme sasawa yeneanunac monggac negenu engena angkecde. Nga mongngo ine uameme sasawa imocac negenu siriha mocgungoc angkecde. Ngic tembus tembus ye yengena ubea ireckedaru damocngo naric ande, imoc negenserima kecbeso. <sup>6</sup> Ngic uameme monggac negenu engena angande, ye Kebu negensima ifi anude. Nga yaka sasawa neande, yeng Kebuac negensima Anutu ubangerec edema yaka neude. Nga ngic yakasege angande, ye ifingoc Kebuac negensima Anutu ubangerec edeudengoc. <sup>7</sup> Nenanggarunac mongngo yengenaac amma kecde, imoc mi fede. Nga mongngo yengenaac amma homeude, imoc mong mi fede. <sup>8</sup> Nenang gbori kecnideu Kebuac amma kecnide nga homenideu Kebuac amma homenide. Homenide me gbori kecnideu Kebu yengena arennoc kecnide. <sup>9</sup> Kristo ye gbori kecnimbe nga homegec nenanggac Kebu, imocac amma ye homema monggoc gborima kekec meec.

<sup>10</sup> Ge tosogaac angammeme isinggema desinade me tosoga ngadehema memanade, imoc naric mi ande. Nocac nenang sasawa Anutuac yoacfu nambesandimbe. <sup>11</sup> Mitikibiu yoac yofi bic oho ohoya fede, "Kebungo yofi dede, 'Ni kekec mingina. Imocac ngicngac sasawa yeni neac kicfu fafoc heinenggede amma nedzarang sasawango Anutu kecde, imoc dekperagicede.'" *(Yesaia 45:23)*

<sup>12</sup> Iffi anu nenang sasawa tembus tembusnina namma haifakanina bangecfu aning, imocac siduc Anutu dekperagimibesandimbe.

<sup>13</sup> Nga nenang tosofocnina yeneac faka monggoc isinggema mi demanganeyunubisina, kpac. Ngeni ine yofi isinggehomebisina, tosofocnina mayunuudeac sinnu ic me hoc me botac mong mi faibisina. <sup>14</sup> Anu yaka me wiac mong imoc yengena seuha mi ande, imoc Kebu Yesugoc kpeketahema kecima ireckema negenseriduae. Nga mongngo ine wiac monggac dema imoc seuhagoc, ifi negensiudeu, wiac imoc yearu seuhagoc anude. <sup>15</sup> Nga geng yaka mong nena negen negensinggoc tosoga imocac ubaebic mefcgeudeu ye heresongogoc mi hoanggema kecnecc. Kristongo ifingoc tosogaac amma homeec, ye yaka nenegaac amma makpema manganebac wabesena. <sup>16</sup> Imocac amma ngeni wiacngina seuha kpac mekedcae, imoc gombunga garenggema kecgcedu, goa yeneng wiacngina gombunga fede, imocac deendema mi ammigcede. <sup>17</sup> Imoc yofiac, nenedoku imocngo



Anutuac eucererenggac fora mi ande. Tiri Asungo faka dindingac nga ruae amma sogac sogai nemmeande, imocngo ine Anutuac eucererenggac fora ande.

<sup>18</sup> Anu mong ye sing imoc modacma Kristoac kingang kpekecede, ye Anutungo negemmiu ngereeu de nga ngicngac yeneng ifingoc ye hennegeng ammigec naric anude. <sup>19</sup> Imocac nenang ruaefakau meficemema angam-memengina nanggeemema emekpesi angemebisina. <sup>20</sup> Imocac ge yaka-gaac amma Anutuac ua mi hendzicna. Yaka sasawa imoc kongaha, imoc fora. Amma yaka nene fakagango tosoga naric ammiu makpeude. <sup>21</sup> Ge yakagango tosogaac ubea memanganema ammiu makpebacac geng yang me waingdoku segega kecnadeu imocngo ngereeu de. Me faka nga angam-memega mongngo tosoga ubaebic meficgemibacac fakaga imoc wana ngereeu de.

<sup>22</sup> Amma geng wiac goa negen negenggau negenna naric anu imoc geang-gaoc Anutuac kicfu mekecbesena. Nga ngic mong ye wiac goaac negenu naric angkece nga imocngo hereebic miu yoacfu mi faiemekece, ye kenehagoc. <sup>23</sup> Ngic mong ye yaka goa negengyohocfu neude, yeng yoacfu makpeude. Ye mi negensinggema yaka imoc sifu neude. Faka nga angam-meme negen negensingoc mi angkecdimbe, imoc sasawa kopocsihagoc.

## 15

<sup>1</sup> Ngicngac Kebu negensinggema seria nandimbe, nenang kucmama kec-dae, yeneac ebic serima tofohoma nenanggacsac negemma meficemema mi kecbisina. <sup>2</sup> Amma nenang tembuc tembuc ngicngac wegena kecdae, yeni ngereegecdeac nga yeni Kebu negensinggema yadiseri anggecdeac kingang kpeyemebisina. <sup>3</sup> Kristongo ifingoc yengenaac ngereeu deac ua mi meec, kpac. Yeng faka anec imoc yofi oho ohoya fede,

“Desusuic areng yeni desusuic anggenggec, imocngo neac witiu enec.” (*Mi-tiyegec 69:9*)

<sup>4</sup> Mitikibiu warac wiac sasawa ohodacgec, imoc nenang edekpou anem-megecdeac oho ohoya fede. Yoac negenni imocngo meserinunuma nangge-nunuu wiac fingece nemeude, imoc negenseridimbe. <sup>5</sup> Amma Anutungo modzotitia kpac nga nangge nangge minginango meficngunumanu ngeni Yesu Kristoac negen negeng modacgec negen negengngina mocgu ambeso. <sup>6</sup> Ifi amma ngeni ngenahafoc enacurecfu Kebunina Yesu Kristoac Anutu nga Mangaac dengeregecde. <sup>7</sup> Nga Anutuac kpac kuneng fingerudeac negemma Kristongo hoangngunuec, ifi isocngoc ngeni hoangemebisia.

<sup>8</sup> Ni yofi edengunuduae, Anutungo warac bangecfocnina yenigoc yoac dedzege anec. Nga Kristongo Anutuac yoac fora meseriudeac sebi tosingina herec herecgea yeneac kingang kpekpe anec.

<sup>9</sup> Ifi anu bangec monnunac ngicngac, yeneng ifingoc Anutu wosoefahaac amma dengeregec. Imocac yofi oho ohoya fede,

“Imocac ni bangeha bangeha ngicngac areng tosea, yeneac botucfu den-gereguma yegecfu kpacga afehebade.” (*2 Samue 22:50; Mitiyegec 18:49*)

<sup>10</sup> Amma monggoc yofi dede,

“Bangec monnunac ngicngac, ngeneng yeac ngicngac arengforagoc kpetu-ranggema ngenahafoc sogaibisia.” (*Dedeseri 32:43*)

<sup>11</sup> Amma mong yofi,

“Bangec monnunac ngicngac, ngeni KEBU fendzonggema dengerebisia. Ngiha ngiha sasawa ngeni KEBU afehebisia.” *(Mitiyegec 117:1)*

<sup>12</sup> Nga Yesaiango torokpema yofi dede,

“Isaiac godeaarunac sera mongngo fingeema bangec monnunac ngicngac, yeneac ngictaungina amma garengyunuu yeneng ye negensinggema kecgcede.” *(Yesaia 11:10)* \*

<sup>13</sup> Anutungo kekecseriac dedepang faiec, ye negensinggegec yeac sogac sogai nga ruae hafaogac mewakengunubeso. Imoc mewakengunuu Tiri Asungo nanggengunuu kekecseriac dedepangngo ubanegen negengnginau sokongunubeso.

<sup>14</sup> Tosofocna, ngeni ngenaoc wiac gombunga arenggegec nga negen negeng sasawa imocngo mewakengunuu ngenaocngoc gorongina naric kpeemegecede, fakangina ifia fede, imoc negenseriyombonggeduae. <sup>15</sup> Ni ifi negemma kengeha kpac kecma yoac goa heigboringemmema ohoduae, imoc Anutungo wosoefac nga kuc nenecac anduae. <sup>16</sup> Ifi amma Yesu Kristoac kingangkpekpe kecma bangec monnunac ngicngac botucnginau Anutuac kicfu womonggareng kecma ua kpetiac mekecma yeac siduc gombunggac ua mekecduae. Mekecba Tiri Asungo bangeha bangeha ngicngac areng tosea, yeni Anutuac sese dema kpetiac meyunuu Anutungo yeneac negenu ngereede.

<sup>17</sup> Ni Anutuac kicfu kingang kpekpe uaya mekecma Yesu Kristogoc kpeketahema kecduae, imoc negemba engena yombong anu naric deduae. <sup>18</sup> Kristongo dafiu kuc nenu neng bangec monnunac ngicngac yenearu kemma yeac yoac dema uaya meba yoara modacgec, imoc mi dekperagiymebaiu imocngo ebiribac. <sup>19</sup> Imoc Anutuac Asu yeac kucfu fingerec, yeac kucfaka hania hania morora hemma yoara modacgec. Ni siriha ifia Yerusarennu hanahema bangec noboc noboc mekengkecma Iririkong prowinsiu wisickeu Kristoac siduc gombung dekperagiymedarai.

<sup>20</sup> Amma amabangec goau Kristoac kpacsiduc bic negenggec, yenearu siduc gombung mong mi edeyunukefai, imocac negemba ngereede. Imoc yofiac, ngic mongngo wotung bic ukuec, imocac witiau ua mebadeac mi anende. <sup>21</sup> Imocac yoac bic oho ohoya fede,

“Yeac kpacsiduc mong mi dekperagiymegec, areng imoc yeneng hentegecgecede. Nga ngicngac kedzacnginango yeac kpacsiduc mi negenggec, yeneng imoc negentegecgecede.” *(Yesaia 52:15)*

<sup>22</sup> Imocac amma naso homac sinnau kpae fingeru ngenearu mi hayai. <sup>23</sup> Nga yofinenggac uana bangec yomohai bic mesiba wisickeec. Amma ngenearu habadeac kifa homac songona bic anec. <sup>24</sup> Imocac Spania bangecfu kembade,† naso imohai ngenembeso negenduae. Amma ngenigoc ewacma songona imohai mesimaguc Spania bangecfu kembeso deba ngeneng ni mefcnugcedeac negenduae.

<sup>25</sup> Nga naso yomohai ine Yerusarennu kemma kpetiac areng ihai kecdae, yeni memefiac wiac yemmebesonga anduae. <sup>26</sup> Kpetiac habu Yerusarennu kecdae, yenearuac goa makpekpea kecdae. Nga Makedonia nga Akaia habu yeneng yeneac ubamangang negemma memefic goa kpedzucnema faigecdeac degec. <sup>27</sup> Yeni ifi anggecdeac ayemmeec. Yerusarenggac kpebung

\* **15:12:** Isai imoc ngictau Davidiac mama. † **15:24:** Spania imoc Inglis yoacfu sing Spain.

yeneng Asuac wiac gombunga bangec monnunac ngicngac, yenearu medereama yemmegec bangec monnunac ngicngac, yeneac turunga anec. Imocac amma yeni yenang dzofinacngo meficgeyemmeude imocngo ngereede. <sup>28</sup> Ifi anu ubangerecnginaac fora imoc Yerusarennu mekemma yemmeba makpekpea yeneng imoc megedecac singa meseribade. Imoc wisickeuguc ngenearu sing hama Spania bangecfu kembade. <sup>29</sup> Nga habade, naso imohai Kristoac kenec hafoangoc fede, imocgoc ngenearu habade, imoc negensiduae.

<sup>30</sup> Negen negensingoc tosofocna, ngeni Kebunina Yesu Kristoac amma Asungo heresongogoc kecec meficgenemmeande, yeac amma yofi edenunuduae, ngeni seriangoc meficnuma Anutu yofi numumibisia, <sup>31</sup> Yudaia bangecfu areng goa Kebu mi negensingeandae, yeneac mariunac yang ongonnuudeac numubisia. Amma ni memefiac wiac mehama kpetiac areng Yerusarennu kecdac, yeni imoc henggec ubangina ngereede, imocac momoc numubisia. <sup>32</sup> Ifi ammagec Anutungo negenu ngereeu ngenearu hama sogac sogaiog tacnegembade.

<sup>33</sup> Anutu ruae minginango sasawa ngenigoc kecbeso, imoc fora.

## 16

<sup>1</sup> Ngactosonina Foibe, ye nanggema yoac goa deba negenggec. Ye Kengkereaiac kpebung kingang kpeyemmeande. <sup>2</sup> Ngeni Kebugoc kpeketahema ye hoanggema yang wiac monggac obohou ngeni imoc meficgema mibisia. Ngeni kpetiac arenggac fakanina modacma ifi ammibisia. Ye ngicngac homac meficynukecma ni ifingoc meficnuec.

<sup>3</sup> Prisika nga Akpira yeri nga ni, neni Yesu Kristogoc kpeketahema kecma ua nenahafoc meandimbe. Wenacngerecna yerearu faiba hade. <sup>4</sup> Yereng neac amma kekecngira mi segereoc. Ni yerearu ubangerecna faiyecmeduae, imoc nengsac kpac. Bangec monnunac ngicngac, yeneac kpebung sasawa fekendae, yeneng ifingoc ubangerec deyecmedae. <sup>5</sup> Amma kpebung yereac amau kpeturangandae, yenearu ifingoc wenacngerecna faiba hade. Nga songo tosona Epaineto wenacngerecna ifingoc edebisia. Ye Asia bangecfunac Kristogoc kpeketahema yeac waracmedac anec. <sup>6</sup> Nga wenacngerecna Mariaaru sueba kende. Ye ngeneac amma uatoa mekefec. <sup>7</sup> Amma ngicngahocna neac bangec mocguna Androniko nga Yunia yerearu wenacngerecna faiba kende. Yeri aposoro botucnginau ewehaiheigoc uangira mekedape. Nga ni Kristoaru mi kpeketahebare yereng ye bic negensingeoc.

<sup>8</sup> Ni Kebugoc kpeketahema Ampiriato heresongogoc hoanggeduae, yearu wenacngerecna faiba kende. <sup>9</sup> Amma Urbanogoc Kristoac ua meing, yearu wenacngerecna nga songo tosona Sitaki yerearu wenacngerecna faiba hau edeyurubisia.

<sup>10</sup> Nga Apere ye Kristoac ngic fora, yearu wenacngerecna sueba kende nga Aristoburoac arengfora yenearu wenacngerecna faiba hau edeyunubisia.

<sup>11</sup> Nga Herodiong bangec mocguna amma Narikisoac arengfora Kebugoc kpeketahema kecdac, yenearu wenacngerecna sueba hau edeyunubisia.

<sup>12</sup> Nga Kebuac ngac Tirifaina nga Tirifosa, yeri yeac ua mema kecdape. Amma tosongira Peresi ye yeac uatoa ifingoc mede nga ngicngac homacngo yeac heresongo negengkecdac. Wenacngerecna yenearu sueba hade.

<sup>13</sup> Amma Rufu ye Kebuac meising ngic nga yeac nonggea momoc, yerearu wenacngerecna sueba hau edeyurubisia. Nonggeango ni ifingoc nonggo

anende. <sup>14</sup> Amma Asingkrito nga Firegong amma Hereme nga Patoroba nga Herema amma negen negensinggoc tosofocnina goa yenigoc kecdae, yenearu wenacngerecna sueba hade. <sup>15</sup> Nga Firorogo nga Yuria amma Nereo nainagoc nga Orumpa amma yenigoc kpetiac areng sasawa kecdae, wenacngerecna yenearu kende.

<sup>16</sup> Ngeni titikokoc kpetiac anemema wenacngerecngina angemebisia. Kristoac kpebung sasawa, yeneng wenacngerecngina faigec ngenearu hade.

<sup>17</sup> Tosofocna, goa yeni gurunendzic angandae, ngeni yeneac gareng meemebisia. Amma ngeni kpoukpouyoac bic megec, imoc memanganebauac wayunubisia. Imoc seriangoc dema edengunuduae. <sup>18</sup> Areng ifia yeni Kebunina Kristoac kingang ua mong mi kpekecdae. Yeni ine yakaac songo nga negensongongina fingerudeac ngicngac goa negengisinga kpac tobangyunuma ubaherengina mesufuma yoc gombunga dema dekerec ayemmegecde. <sup>19</sup> Nga ngeni enac tofoc tofoho areng kecdae, ngicngac sasawa yeneng imoc bic negenggecac negemba ngereede. Nga ngeni faka nga angammeme gombunga negentegecgecdeac amma angammeme manganaac arennu kopocsicngina kpac kegcgecdeac anengande. <sup>20</sup> Anutu, ye ruae mingina. Yeng naso mi hereemanu Satang haningina bageau memama kpedzameude. Kebunina Yesuac wosoefacngo ngenigoc febeso.

<sup>21</sup> Timoteo, neac ua mocgungo wenacngereha ngenearu sueu hade nga Rukio amma Yasong nga Sosipate bangec mocguna, yeni wenacngerecngina ngenearu ifingoc suegec hade.

<sup>22</sup> Ni Teatio, Kebugoc kpeketahema kecma kibi yomoc ohoma ngenearu ubangerecna faiba hade.

<sup>23</sup> Gaio, ye ni nga kpebung sasawa ama heinemmeande, yeng ngeneac wenacngerec ifingoc faiu hade. Nga taonggac dzo gareng Erasto nga tosonina Kpato, yereng ifingoc ubangerecngira faiec hade.

<sup>24</sup> Kebunina Yesu Kristoac ruaengo sasawa ngenigoc febeso. Imoc Fora.

<sup>25</sup> Nenang sasawango Anutu kpackuneng minide. Ni Yesu Kristoac dekperagingemmema siduc gombung edengunuai. Anutungo imohainoc meseringunuu seria nanggecdeac yearu kuc ifia femide. Anu yoc imoc warac hanac hanaheaunacngoc sufuu feerekefec. <sup>26</sup> Feerekefcu bangec monnunac ngicngac sasawa, yeneng ye negensinggema yoara modacgecdeac Anutu kekecseri minginango profete yeneac yoc mitikibiu fede, imocac deu yofinenggac didiu fingectegerec. Fingectegeru bangeha bangeha ngicngac areng tosea yeneng yoara naric negentegecgecde.

<sup>27</sup> Anutu mocgungo negen negentegec mingina. Nga nenang Yesu Kristogoc kpeketahema dedengerec nga dedengerec Anutuaru faini fekengkecbeso, imoc fora.

## Paurongo Korinti Kpebung Yeneac Warackibi Ohoec

<sup>1</sup> Anutungo Pauro negennenu Yesu Kristoac aposoro anai nga negen negensinggoc tosonina Sostene, nereng kibi yomoc faide hade. <sup>2</sup> Anutungo Korinti taonnu yeac kpebung kecdae, ngeni kpacngunuma Yesuac amma kpetiac mengunuec, ngeneac kibi yomoc faingemmedipe. Amma ngicngac sasawango Kebunina Yesu Kristoac kpac kpacandae, kibi yomoc ngenearu momoc faidipe. Kebu Yesu ye ngeni nga neni, nenanggac Kebu momoc. <sup>3</sup> Anutu Mannina nga Kebunina Yesu Kristo yereac danggunuc nga ruaengo ngenearu febeso.

<sup>4</sup> Anutungo Yesu Kristoac amma wosoefac angemmeec, imocac ni nasosoc ngeneac negemma Anutu dangge edekecduae. <sup>5</sup> Ngeni yegoc kpeketahema kecgec yeng wiac sasawa hafoangoc ngemmeec. Yoacdede nga negen negentegec keme kemea imoc sasawa bic fengemmede. <sup>6</sup> Kristoac dedekperagi edengunuung, imocac fora kekecnginau fingeru hemma kecgecde. <sup>7</sup> Imocac amma ngeni Yesu Kristo didiu fingectegerudeac tomai kecma Asuac wosoefac kuc sasawa, imocac mong mi obohoda. <sup>8</sup> Ye yengenaoc meseringunuu kechereemagec naso wisickeu ngeni Kebunina Yesu Kristoac nasotoau kopocsicngina kpac nanggec yoacfu naric mi faingunuude. <sup>9</sup> Anutungo Medaha Kebunina Yesu Kristogoc momoc torokpegecdeac kpacngunuec amma yeng yoacdede modarude.

<sup>10</sup> Tosofocna, ni Kebunina Yesu Kristoac kpacfu negen negengngina midima yofi edengunuduade, ngeni sasawango yoacdedenginau nga negen negengnginau uba mocgu amma gurunendzic mi angemebisia. <sup>11</sup> Tosofocna, Koroeac amaunac yeneng ngeneac yofi edenugec, “Yeni botucnginau tohoemema deendema angemema kecdae.” <sup>12</sup> Ngenearuac ngic goango deandae, “Ni Pauroac ngic.” imoc deandae. Nga goango deandae, “Ni Aporoac ngic.” amma goango deandae, “Ni Kefaac ngic.” nga goango deandae, “Ni Kristoac ngic.” ngeni tembuc tembuc ifia dekecdae. <sup>13</sup> Negenggec, Kristo ye mi tohoec, kpac. Yeni ngeneac amma Pauro mariponnu mi kpegec. Nga Pauroac kpacfu doku mong mi nadzicngemmegec, imoc kphac. <sup>14</sup> Ni ngenearuac mong doku mi nadzicngemmeai, imocac Anutu dengereduade. Krisipo nga Gaio yerisac nadzicyemerai. <sup>15</sup> Ifiac amma ngic mongno yofi mi debeso, “Ni Pauroac kpacfu doku nadzirai.” <sup>16</sup> Stefana nga arengfora yeni ine doku nadzicyemmeai, fora. Amma torokpema goa nadzicyemmeai me kpac, imoc mong mi negenduade. <sup>17</sup> Kristongo doku nadzicyemmebadeac mi suenuc, kpac. Yeng ngicngac siduc gombang edekpou angemmebadeac suenu hayai. Nga Kristoac mariponggac yoac imoc kucmama ambacac yoac imoc ngicac kucfu nga negen negentegecgoc mi debade.

<sup>18</sup> Ngicngac hofeac sinnu kemedae, yeneng mariponggac yoac imoc negenggec ubasufu yoac angkecde. Amma Anutungo kopocsicac ebicfunac mesinunuu komoc kpenide, imocac ine nenang yofi negensikecdimbe, mariponggac yoac imoc Anutuac kuc. <sup>19</sup> Yoac yofi oho ohoya fedengoc,

“Ni ngic negen negentegecnginagoc yeneac negen negentegec kpetotiebade nga ngic negen negenggoc yeneac negen negeng memabade.” (*Yesaia 29:14*)

<sup>20</sup> Anutungo bangec yomocac negen negeng mema kapa yeneac negen negentegecac tatacfu faiu ngicngac negen negentegecnginagoc, yeni mamea anggec. Nga mitiac negen negengngic yeni engena kpac. Nga ngic yoac mereng kpereng mema deandae, yeneng fora mong mi meficgegecde.

<sup>21</sup> Nga ngicngac yeni bangecac negen negentegecgoc kecma Anutu negem-migegecac obohogece. Obahoma siduc gombang denggbaringgema imoc abasufuyoac deandae. Ubasufuyoac imocac yofi dekperagini Anutungo ngicngac ebicfunac mesiyunuu komoc kpegecde, ye faka imoc negenu ngereude.

<sup>22</sup> Yudangic yeni kuc hania hania isinggegecdeac faka kuhagocac kpesi kpesi faiandae. Nga griknngic yeneng negen negentegec keme kemea meficgegecdeac ayemmeude. <sup>23</sup> Anu nenang ine Kristo mariponnu kpegec homeec, yoac imoc edekpou ayemmeni, yudangic yeneng imoc negenggec ubangina mi heiude nga griknngic yeneng negenggec imoc abasufuyoac angkecde. <sup>24</sup> Anu Anutungo yudangic nga griknngic kpacyunuu negens-inggegecde, yeneng Kristoarunac Anutuac kuc nga negen negentegec megecde. <sup>25</sup> Anutuac abasufuyoacngo ngicngac yeneac negen negentegec ferahema negen negengtoa anude nga kucmamayango ngicngac yeneac kucngina ferahema kuctoayagoc anude.

<sup>26</sup> Tosofocna, ngeni siric dafia kecmagec, Anutungo kpacngunuu hanahema negensinggec, ngeni imocac siraha negensibisia. Ngenearunac ngic sebiubigeng negen negentegecnginagoc homac kpac nga ngicngac efeangosac kucngina engena amma kpacngina kekena, imoc homac kpac. <sup>27</sup> Anutungo ngicngac negen negentegecnginagoc game kpekpeu faiyunuudeac ngicngac yeneac kicfu wiac abasufuyagoc angkecde, ngicngac imoc meisingyunuec. Amma yeng ngicngac kucngina engena game kpekpeu faiyunuudeac ngicngac yeneac kicfu wiac kucmama angkecde, ngicngac imoc meisingyunuma meyunuec. <sup>28</sup> Nga ngicngac yeneac kicfu wiac mamea angande nga wiac seuha deandimbe amma wiac kpac amma mi fede deandimbe, Anutungo imocno meisinggec. Meisinggeu wiac goa engena angande imoc kpac anudeac ye ifi negenec.

<sup>29</sup> Anu bangecngic me ngac mongngo Anutuac kicfu namma yengenaac negenu engena ambacac, yeng ifi anec. <sup>30</sup> Anutungo negengngemmeecac ngeni Yesu Kristogoc kpeketahema kecdae. Yeng Yesu sueu Anutuac negen negentegec botucninau mehaec. Mehau nenang Anutuac kicfu dindingac nga kpetiac annideac yeng kopocsicac witicfunac mesinunuec. <sup>31</sup> Imocac yoac yofi oho ohoya fede,

“Ngic mongngo miacemebeso negende, ye Kebungo kekehau dafi ammiac, imocsac negemma miacemebeso.” (*Yeremaia 9:24*)

## 2

<sup>1</sup> Tosofocna, ni ngenearu hama Anutuac negen negeng sufufu fede dekperagingemmema yoacna efea me negen negentegectoac siricfu yoac mong mi edekpou angemmeai, kpac. <sup>2</sup> Ni ngenigoc kecma yofi deba seric, “Korinti taonnu kecma Yesu Kristosac dekperagibade nga ye dafiu mariponnu kpegec homeec, imocsac dekperagibade.” <sup>3</sup> Ni ngenearu hayai, imohai kucmama nga kengec amma dzonong fede fede anai. <sup>4</sup> Amma

Anutuac yoac dekperagima yoacna songeagoc me negen negentegecfu mi wangepngunuai, kpac. Tiri Asuac kucfakango yoacna meseriu ngeni imoc hemma negenggec. <sup>5</sup> Ngeneac negen negensing imoc ngicac negen negentegecfu feu mi ngereeude. Anutuac kucngosac negen negensingngina nangeu febeso.

<sup>6</sup> Imocac amma goa ngeni bic yadiseri anggec, ngeni yoac negen negentegecog edengunuandimbe. Yoac dedimbe imoc naso yomocac negen negentegec kpac nga naso yomocac engena yeneac negen negentegec mi ande, nocac ngadeau kpac andacgecde. <sup>7</sup> Nga Anutuac kuc nga kibikperagingo fingectegecnemmeudeac ye bangec nga kurumeng mi fingecmaec negen negentegeha sufu sufuya imoc faiec feec, negen negentegec imocnoc dekperagidimbe. <sup>8</sup> Naso yomocac engena sasawa sawau me bangecfu yeneanunac mongngo negen negentegeha mi negenggec, kpac. Yeni imoc negembau dede yeni kuc nga kibikperagi mingina Kebu mariponnu naric mi kpebau. <sup>9</sup> Imocac yofi oho ohoya fede,

“Anutungo wiac kicngo mi hehena nga kedzacngo mi negen negena amma ngic hereau mi negen negenga, imoc arenggema ngicngac ye hoanggema heregoc yeac songo negenggecde, wiac imoc yeni yemmeude.” *(Yesaia 64:4)*

<sup>10</sup> Anutungo wiac imocacnoc negensima Asuya sueu dekperaginemmeu negening. Yeng wiac sasawa hennegeng amma Anutuac negen negeng keme kemea momoc hennegeng angkecde. <sup>11</sup> Geng ngic monggac ubaherea nga negen negena naric mi negennade, kpac. Ngicac ongaasungosac imoc negenude. Siriha ifiangoc mongngo Anutuac ubaherea nga negen negena naric mi negenude, imoc kpac. Anutu yengena Asungosac wiac imoc negengkecde. <sup>12</sup> Anutungo wiac hania hania wosoefacfu nemmeec. Amma nenang imoc negentegecnideac Asuya nemmeu meing. Bangecac asu mong mi meing, kpac. <sup>13</sup> Nga Anutungo wiac nemmeec, imocnoc dekperagidimbe. Yoac imoc ngicac negen negentegecfu mi dekecdimbe, imoc Asuac negen negentegecfunoc modacma denide. Neni Asuac yoac imoc Asuac kucfu dekperaginide.

<sup>14</sup> Anutuac Asuarunac Asuac wiac, imoc ngic mong ye Anutuac Asuya kpac kecma naric mi meude. Imoc yearu ubasufu faka anude. Asuac wiac imoc asuu henegeng ambesonga, imocac amma ngic Asuya kpac, yengeng Asuac wiac mi negenggecde. <sup>15</sup> Ngic Kebuac Asugoc kecde, yeng wiac sasawa naric hengising anude nga ngic mongngo ngic imoc naric mi hengising ammiude.

<sup>16</sup> Mitikibininau yoac yofi oho ohoya fede,  
 “KEBUAC negen negeng imoc ngic mongngo naric mi negenude nga mongngo ye dederecge naric mi ammiude.” *(Yesaia 40:13)*  
 Nga nenang Kristoac negen negenggoc kecdimbe.

### 3

<sup>1</sup> Tosofocna, warac ngenearu hayai, imohai ngic Tiri Asugoc kecdae, imocac sirihau yoac edengunubadeac osiai. Ngeni Kristogoc kpeketahema sabac siricfu kegcacac ngicngac uba esea modacgec edeyunuanduae, ifi isoc yoac edengunuai. <sup>2</sup> Ngeni naso imohai yaka seria negecdeacsoc mi anggecac namusac gumecongunuai. Nga ngeni yagucngoc yaka seria negecdeacsoc mi ande. <sup>3</sup> Ngeni uba eseaac siricfu kecdangoc. Imoc yofiac, ngeni keracmangang angemema yoacngina ngabasiric deendema angemeandae. Ngeni ifi amma ngictehec siric kecma <sup>4</sup> mongngo deude, “Ni Pauroac ngic.”



Nga mongngo ine deude, “Ni Aporoac ngic.” Ngeni ifi degecdeu negemba ngeni ngictehecac arennu kecdae.

<sup>5</sup> Aporo ye merac nga Pauro ye merac? Neri kingangkpekpesac andipe. Kebungo ua nemeru neri imocac sirihau ua mekecdipe. Mekecde ngeni yoacnira hoanggema ye negensinggegec. <sup>6</sup> Neng komoc homecha Aporo yeng imocac witiau doku kpakeec. Nga Anutungo uaya mema imoc meyadiude. <sup>7</sup> Ngic yaka homerude, ye engena kpac nga doku semeng witiau kpakeande, ye engena mi ande. Anutungo wiac meyadikecde, ngeni yeac negenggec engena ambeso. <sup>8</sup> Amma ngic wiac homecande nga ngic doku witiau kpakeande, yeri uangiraac hania mocgu ande. Ngade kecma yeri tembus tembuc uangiraacsoc bung meecde.

<sup>9</sup> Neri Anutugoc ua mekecdipe nga ngeni Anutuac semengua nga yeac ama. <sup>10</sup> Anutungo wosoefac anemma amamemeac negen negeng nenu imocac ngiha anai. Ifiac amma ni imocac sirihau simengwotung arenggema ukuba kemeec. Nga imocac witiau ngic goango torokpema ama megecde. Amma amamemengic yeneng uangina dafi mekecma simeng witiau ama torokpema mekecdae, imoc tembuc tembucngina isinggema mebisia. <sup>11</sup> Anutungo Yesu Kristo bic gununggeec simengwotunga isoc nande. Nga ngic mongngo yeac tegiau wotung mong ukuu kemeudeac singa mi fede.

<sup>12</sup> Anu ngic mongngo simeng imocac witiau torokpema ua mekefude, yeng gol me siriwa me hoc seria sirihau gombunga me ic me birohoc me tomocngo meudeu <sup>13</sup> uayaac hania Kebuac nasotoau fingectegerude. Naso imohai gerecngo uaninaac hania tembuc tembuc tobanggema mekperaginemmeude. <sup>14</sup> Ngic mongngo ama meu gerecngo uaya tobanggeu seria nanudeu ye imocac ua bung meude. <sup>15</sup> Nga monggac uaya dzeude isoc wiaha tegecma kpac anude nga Anutungo yengena gerecfunac mesiu komoc kpeude.

<sup>16</sup> Ngeni yofi negembisia, ngeni Anutuac womong nga Anutuac Asungo ngeneac here manau kecde. <sup>17</sup> Nga ngic mongngo Anutuac womong memanganeudeu Anutungo ye ifingoc memanganeude. Anutuac womong imoc kpetiac nga womong imoc ngeninoc.

<sup>18</sup> Ngic mong yengenaocngoc ikoc mi angemebeso. Botucnginaunac mongngo yengena negensima yagucac negen negentegec mekecdeu yeng bangecac ngic yeneac kicfu ubasufuyagoc amma negen negentegec fora meficgebeso. <sup>19</sup> Bangec yomocac negen negentegec imoc Anutuac kicfu ubasufuyagoc. Imocac yoac yofi oho ohoya fede,

“Ye ngic negen negentegecnginagoc yeneac yoac dzegema yenang botacfu faiyunuude.” (Hiobe 5:13)

<sup>20</sup> Amma mong yofi,

“*KEBUNGO* ngicngac negen negengnginagoc negendacde. Ye ngicngac denegengngina hennegeng amma negenu imoc uaya kpac ande.” (Mitiyegec 94:11)

<sup>21</sup> Ngeni ngic monggac kpara kpacma yegoc torokpema sebiengeng angandae, imoc mi ngereede. Imoc yofiac, wiac sasawa imoc ngeneac bic anec. <sup>22</sup> Imoc Pauro me Aporo me Kefa me bangeha bangeha me kecec me homec me wiac mong bic faifaia fede me dengc fingerude, imoc sasawango ngeneac. <sup>23</sup> Nga ngeni ngenaocngoc Kristoac ngicngac nga Kristo ye Anutuac ngic.

## 4

<sup>1</sup> Nenang Kristoac kingangkpekpefora. Nga yeng Anutuac negen negeng sufu sufuya, imoc garenggenideac uayoac nemmeu ua imoc mekecdimbe, ngicngac yeneng ifi negembisia. <sup>2</sup> Ngic mong ye gareng ua mekecede, ye enaraac yoac modacma sing naric mi segebeso.

<sup>3</sup> Nga ni neannaoc yofi deba, ngeneng me ngic goa yeneng yoacfu fainuma yoacna desigecede, imocac negemba wiac engena mi ande. Nga neannaoc ifingoc naric mi isingemema forana debade. <sup>4</sup> Here negen negennau hofocemema ebic mong mi meficgeduae, fora. Nga ni kopocsicna kpac, imoc naric mi debade. Kebungo haniana hennegeng amma yoacna desiude. <sup>5</sup> Imocac amma ngeni nasoya mi fingecmanungoc ngic monggac yoac mi desibisia. Kebu yengenaoc hama wiac kundunnu sufuma fede, imoc mekperagima ngicngac negen negengnginaac hania didiu faiu fingectegerude. Amma yeng naso imohai ngicngac tembus tembus dedengerecngina edeyunuu negenggede.

<sup>6</sup> Tosofocna, ngeni yoacna negentegecgedeac yomohai ngenac amma neanna nga Aporoac sing edengunuba negembisia. Yoac mitikibiu oho ohoya fede, ngeni imoc mi ferahebisia. Ngeni ngic monggac sebi meemma monggac sebi mi memabisia. Ngeni negen negeng imoc megecedeac negenduae. <sup>7</sup> Geac fakaga imoc siriha mong kpac, ge wiac sasawa mekecnec, imoc eng genggena mekecnec. Anu wiac imoc engsac genggec, imocac amma sebiga mi meembesena.

<sup>8</sup> Ngeni bic gebecngunuu finactoanginagoc anggec amma ngeni nenia kpac ngictau andae. Nga forangoc, ngeni ngictau fora kecbau debac songona kuneng ambac. Nga ngeni ngictau ambau isoc neneng ngenigoc kecma ngictau momoc ambing.

<sup>9</sup> Ni yofi negenduae, Anutungo aposoro fainunuu ngicngac yeneac areng wisickeau nandimbe. Yeni tenicfagoc anemmegecedeac wenac kpekpeu fainunugec. Ngicngac nga angero yeneac kicfu gameagoc nga homeac areng isoc kecadimbe. <sup>10</sup> Neni Kristoac amma memaemema ubasufu isoc anni ngeneng ine sebingina meemma, "Neni Kristogoc kpeketahema fitira kecdimbe." ifi deandae. Nga kucmama kecmi ngeneng kucnginagoc kegede. Nga ngicngac yeneng ngeni ewehihehi faka angemmema neni ine mangana dema wanunuandae. <sup>11</sup> Anu neneng naso yofinenggac ifingoc hereninaac homema dokuac anemmeu wamba tegec tegera heima kecni ngicngac yeneng nunuandae. Amma amagerecni kpac kuric isoc kecma <sup>12</sup> nenaoc marininango uatoa meandimbe. Ngic yeneng sowecnunugec ine kenecyununide amma nunukporac anemmegec ubanina mi mau serima kecnide. <sup>13</sup> Nga ngicngac yeneng denggarinnunugec yeneac yoac gombunga denide. Neni yofinenggacngoc bangecfu seuc isoc anni ngicngac yeneng ukununugecde.

<sup>14</sup> Gameac yoac edengunubadeac yoac yomoc mi ohongemmeduae, imoc kpac. Ni ine songonambaracfozna demeting angemmebade, ifi isoc ohongemmeduae. <sup>15</sup> Ngeni Kristogoc kpeketahema kecmagec garengfocngina teng tauseng demeting angemmebau ngeni sifu mangngina mocgusac kecede. Nennoc siduc gombung angemmeba ngeni Kristoaru kpeketahema kecec gboria meficgegec. <sup>16</sup> Ifi anu negen negengngina midima edengunuduae, ngeni ni dafi amba hemma modacnuma anduae isoc ambisia. <sup>17</sup> Imocac amma yaguc Timoteo sueba ngenearu haude. Ye songomedacna kecma Kristogoc kpeketahema kecede amma ye yoac modacma mong mi segeude.

Ni Yesu Kristogoc kpeketahema dafi kecanduae, yoac imoc kpebung sasawa fekendae, ngeni edekpou angemmeanduae. Nga Timoteongo ngenearu hama yoac imocnoc heigboringemmeude.

<sup>18</sup> Ngic goa ngenearunac yeneng neac ifi negemma deandae, “Ye nenearu mi haude.” goa ngenearunacngo neac ifi negemma sebingina meemma yoacna kpeandae. <sup>19</sup> Nga Kebungo negenu ngereede isoc naso mi hereemanu ni ngenearu habade. Hama yoac kpekpe areng kucngina dafi fede, imoc hennegeng ambade. Amma yoacnginasac mi negembade. <sup>20</sup> Anutuac eucerereng imoc yoacfusing mi fingectegerude, imoc kpac. Imocngo Tiri Asuac kucfu fingectegerude. <sup>21</sup> Anu ngeni neac dafi angemmede, imoc edenubisia. Dzikacgoc habadeac angemmede me heresongogoc nga yumea kekecac asugoc habadeac angemmede?

## 5

<sup>1</sup> Ngenearu kaisero faka fede, yoac ifi degec negening. Kaisero faka mong bangec monnunac ngicngac Anutu mi negemmidae, yeneac botucfu mi feande, imocnoc ngeneac botucfu fede. Imoc ngic mongngo mamaac enemagoc feyac angandape. <sup>2</sup> Faka ifi femanu ngeni ine sebingina meengandae, imoc naric mi ande. Ngeni imocac ubahodung negemma ngic faka imoc angande, ye botucnginaunac meickebau, imocngo ine ngereebac. <sup>3</sup> Ni sebingo hereau kecduae, fora. Nga ongaasunango ine ngenigoc kecduae. Ifi kecma ngic imocac fakaya isinggema bic desiai. <sup>4</sup> Ngeni nga ni, nenang ongaasuu Kebunina Yesuac kpacfu kpedzucnema kecmina Kebunina Yesuac kucngo nenangoc feu <sup>5</sup> nenang ngic ifia Satangac mariu faibisina. Nga sebiango bangecac faka sasawa modackecde, imoc memanganedaru kpac anu ongaasuyango Kebuac nasotoau komoc kpebeso.

<sup>6</sup> Sebiengengfakangina imoc naric mi ande. Ngeni yis kapiancecac uuhau faigec imocngo uuha sasawa meu sokoande, ngeni imoc bic negendae. <sup>7</sup> Anu nenang ramamedaha Kristo, yeni sese imoc bic kpegec homema dzuacnunuec. Imocac ngeni uuha esea yisgoc meickedacma uuha gboria faibisia. <sup>8</sup> Imocac amma nenang uuha esea yisgoc, imocac ngaba nga faka mangana wadacma faka kongaha nga yoac foragoc, imocac ic sogong yisha kpac mekechisina.

<sup>9</sup> Ngic serofaka angandae, ngeni yenigoc kpeketahema mi kechisia, imocac kibiui bic ohongemmeai. <sup>10</sup> Amma bangecfu areng serofakanginagoc me kichodungnginagoc amma ngic ikoc amma ngicngac wiacngina wangecyunuandae me nemu ewehiyemmeandae, ngeni yeni sasawa wayunudacgecde, imocac ine mi negemma dedua. Ngeni imoc anggedeu ngeni bangec yomoc wadacma kenggedecdeac singsac fengemmeude. <sup>11</sup> Ngeni negen negensinggoc tosofocngina deyemmeandae, yeneac negemma ine yofi ohoai. Yeni serofaka angandae me hiedzoac kichodunggoc kecandae me nemu ewehiyemmeandae me ngicngac goa deendema ayemmeandae me doku seria nekecma ubasufu angandae me ngicngac ikoc ayemmema wiacngina wangecyunuandae, faka ifia angandaeu ngeni ngicngac imoc yenigoc kpeketahema mi kechisia nga ngeni yenigoc yaka ifingoc mi nebisia.

<sup>12</sup> Ngicngac ngadeau kecdae, yeni isingyunuma yoacngina naric mi desibade, imoc neac ua kpac. Ngeni ine arengfocngina botucnginau kecdae, yeni isingyunuma yoacngina desibisia. <sup>13</sup> Nga Anutungo ngicngac

ngadeau kecdae, yeneac faka nga angammemengina isinggema yoacngina desiude. Ngeni ngicngac mangac manganea botucnginaunac meicyunubisia. *(Dedeseri 17:7; 19:19; 21:21; 22:21,24; 24:7)*

## 6

<sup>1</sup> Fakangina yomoc mi ngereeu. Ngenearunac ngic mongngo ogea ngaba ammima gamea kpacngo kpetiac tosofora yenearu mi kemma feracyunuude. Feracyunuma ngic negen negensingngina kpac, yenearu kemma ogea yoacfu faiane. <sup>2</sup> Kpetiac areng ngeneng kecma ngiha ngiha yoacngina desibesandae. Ngeni imoc mi negendae gedang. Ngeni ngade ngenaoc ngiha ngiha yoacngina desigecde, imocac ngenaoc yofinenggac wiac efeanec yoacfu ifingoc desibisia, imoc ngereeu. <sup>3</sup> Amma ngeneng ngade angero isingyunuma yoacngina desigecde, ngeni imoc negendaenoc. Ifiac amma ngeni faka goa botucnginau fede, imoc naric isinggebisia. <sup>4</sup> Yaguc ine yoac mong botucnginau fingeru ngeni sing segema ngic goa kpebunggac ewehelheiu mi kecdae, yeni meisingyunuma yoacngina desigecdeac faiyunuandae. <sup>5</sup> Ngeni gamengunuudeac negemma imoc deduae. Nga ngenec botucfunac ngic mongngo negentegecma kecma tosofora yeneac ebicyoac dema mengereeu, imocngo naric ambac. <sup>6</sup> Nga yofinenggac ngeni ine negen negensinggoc tosofocngina kecdae, ngeneng negen negensingngina kpac, yeneac kicfu kemma yoacfu faiemeandae.

<sup>7</sup> Ngeni yoacfu faiemeandae, faka imocngo edzacngunuude ngeni firang mi andae. Nga tosofocngina yeneng ikocfu yoacngina dema me wiacngina wangepngunuandae, ngeni imoc eng wagec feu ngereebac. <sup>8</sup> Nga ngeni ine negen negensinggoc tosofocngina mangana nga ikoc ayemmema wiacngina wangepngunuandae.

<sup>9</sup> Ge ikoc mi angemebesena amma yoac yomocac mi obohobesena. Ngicngac Anutuac yoac kpeandae, yeneng Anutuac eucererengac maridzoming naric mi megecde. Kaisero faka angandae me nemu ewehelheiyemmeandae me singtoa ngac yenearu kengandae me ngic goa yeneng ngic ogofocnginagoc fema ngacgoc kekec isoc kecandae me ngic goa yeneng meficunugecdeac negemma kpae mi heiyemmema engsac ngic ogofocnginagoc feandae me <sup>10</sup> hamangecmeme me ngicngac kichodungnginagoc me doku seria nema ubasufu angandae me enacfu faifai yoac deandae me ikoc amma hiedzo wangepngunuandae, areng ifia yeni sasawango Anutuac eucererengac maridzoming naric mi megecde. <sup>11</sup> Nga ngenearunac ngicngac goango warac ifi kecgec. Ifi kecmagec Kebungo yengena kpacfu nga Anutuninaac Asu yeac kucfu dzuacngunuma dindingac dengemmema kpetiac arennu faingunuc.

<sup>12</sup> Goa yeni deandae, “Ni faka hania hania sasawa naric ambade, kpae mong mi fede.” Nga neng ine deba, “Wiac sasawa imocngo memefihagoc mi ande. Wiac sasawa naric ambade, fora. Nga wiac mongngo ine garenubeso anu imoc wama naric mi modachesare.” <sup>13</sup> Yaka imoc hereninaac amma fede nga hereninango yakaac amma fede. Nga kecma Anutunung meicyuruu kpac anecde. Sebininango Kebuac amma fede, imoc serofaka anudeac amma mi fede nga Kebu ye sebininaac amma kecde. <sup>14</sup> Anu Anutu kuctoayango Kebunina meghoruu yarec, kecma yeng nenang ifingoc meghorinunuu yacnide.

<sup>15</sup> Anu sebingina imoc Kristoac sebiaac tosea ande, ngeni imoc negembisia. Nga ni Kristoac sebia tosea singtoangacgoc kpeturanggeba yeac sebiac noboha anu mi ngereede, imoc kpac yombong. <sup>16</sup> Imoc yofiac, ngic mongngo serongacgoc feudeu ye yegoc sebi mocgu andape, ngeni imoc negembisia,

“Ngicngac yohockang yeri sebi mocgu anecde.” yoac imoc dedea fede.  
(*Fingec fingec 2:24*)

<sup>17</sup> Anu mong ye Kbugoc kpeketahema kecde, yeng yegoc asu mocgu anecde.

<sup>18</sup> Ngeni kaiserofaka woramima meickebisial! Nga mong ye faka nga angammeme mangana goa angande, imoc yengena sebiac ngadeu angkefude. Nga sero angande, ye ine yengena sebia kopocsic meficgemima memanganeemeude. <sup>19</sup> Anutungo Tiri Asu ngenimeu mekedae, ye ubaherenginau kefu sebingina imoc yeac womong, imocac ngeni ngenao ubasebinginaac mingina kpac. <sup>20</sup> Ngeni bungngina memea nga Kebungo bung imocacsoc faiec, imocac ngeni sebinginango Anutu kpac kuneng mibisia.

## 7

<sup>1</sup> Ngeni kibinginau yofi kpesinenggec, “Ngic ye ngacgoc feude, imoc naric me kpac.” imocac yofi deba negenggec: <sup>2</sup> Kaisero faka fingebacac ngic tembuc tembuc ye yengena enemagoc ambeso nga ngac tembuc tembuc ye yengena eweagoc ambeso. <sup>3</sup> Nga singngo wiac dede, ngicngo enema imoc mibeso nga ngacngo ifingoc ewea imoc mibeso. <sup>4</sup> Amma ngac ye yengena sebiac mingina mi ande, kpac, eweango ine yeac sebiac mingina ande. Nga ifi isocngoc ewea ye yengena sebiac mingina mi ande, kpac. Enemango ine yeac sebiac mingina ande. <sup>5</sup> Imocac eweeneng ngeri ngeraocngoc sebingira mi segereemebesera. Ngeri naso goausac numuecdeac uba mocgu amma naso dema naric segereemebesera. Nga ngeraoc sebingira garengemeecdeac kuc mi fengecmedeac Satangngo faitobannu faingurubacac ngeri naso wegenaneacsac eng kecma monggoc ngerahafoc kecbesera. <sup>6</sup> Nga imocngo dedeseriyoac mong mi ande. Ngeri dafi naric anecde imocac deduae. <sup>7</sup> Neanna songo ine yofi, ngicngac ngeni ni kecduae isoc kecgec ngereebac. Anu Anutungo wosoefahaac wiac nemmeande, imoc ngicngac tembuc tembucnina nemmeu mekecdimbe. Ye ngic mong kuc yoc mima mong imoc miude.

<sup>8</sup> Ngic goa ngeni ngac mi mema eng kecdae amma ngachodzec ngeneac yofi deba negenggec, ngeni ni isoc eng kecgecdeac negemba ngereede.

<sup>9</sup> Ngeni garengemegecdeac kuc imocacsoc mi fengemmedeu, ngeni seroac songngo herenginang ereu manganebauac memeturannu meemema eweeneng anggec ngereede.

<sup>10</sup> Nga eweeneng ngeneac yoac yomoc demeseri angemmeba yoacna modacbisial. Ngac mongngo ewea naric mi wabeso. Imocngo neac yoac kpac, imoc Kebuac yoac. <sup>11</sup> Ngac mong ye ewea wama kenudeu yofi ambeso, ye eng kecbeso me ewea warac kefec, yearu monggoc kemma yegoc ruae meficgema eweeneng monggoc ambesera. Nga ngic mongngo enema naric mi wama kembeso.

<sup>12</sup> Amma ngicngac tosea ngeneac yoac mekecduae, imoc ine Kebuac enacfunac mi meing. Ngic monggac enemango Yesu mi negensinggema eweagoc kefudeac negendeu, ngicngo enema mi wabeso. <sup>13</sup> Me ngac monggac eweango Yesu mi negensinggema enemagoc kefudeac negenudeu ngacngo ewea mi wabeso. <sup>14</sup> Ngac mong ye ewea negen negensinga kpac

kecde, ye ewea kpetiac anudeac ammiude. Nga ngic mong ye enema negen negensinga kpac kecde, ye enema kpetiac anudeac ammiude. Ifi mi anggecdeu nambaracfocongina seucnginagoc kecgcede. Nga nambarac yeni ine yofinenggac kpetiac andae. <sup>15</sup> Anu mongngo Yesu mi negensinggede, yeng ewea me enema negensinggede, ye waudeac negensiu kpaie mi faibisia. Anutungo ruaegoc kecnideac kpacnunuec. <sup>16</sup> Ngac, geng ewega kopocsicfunac mesina komoc kpeude me kpac, imoc naric mi negennec. Nga ngic, ge enengga kopocsicfunac mesina komoc kpeude me kpac, ge imoc naric mi negennec.

<sup>17</sup> Anutungo ngicngac kekecnginaac sirihauc mocgu mocgu kpacngunuma heitaingunuu ngeni imocac sirihauc kecbisia. Amma kpebung sasawa ngeneng faka imoc modagecdeac edengunuanduae. <sup>18</sup> Ngic mong ye sebi tosea herec herecgeac areng kecmanu Anutungo ye kpacma heitaiecfu yeng negen negeng imoc mesufuudeac ua mi mebeso. Nga ngic mong ye sebi tosea mi herec herecgea kecmanu Anutungo kparecfu yeng sebi tosea mi herecgebeso. <sup>19</sup> Sebi tosea herec herecgea me mi herec herecgea, imocngo wiac engena mi ande. Nga Anutuac nonoyoac modacbesonga, imocngo wiac fora yombong. <sup>20</sup> Nga ngic mocgu mocgu ngeni kekec siriha dafi kecmagec Anutungo kpacngunuma heitaingunuec, ngeni kekec siriha imocngoc kecbisia.

<sup>21</sup> Ge minginggaac wanacngic kecmana Anutungo kpacguecfu imocac negengyohoc mong mi ambesena. Nga ge ngic yungec yungec annadeac sing fingecgenu imoc naric modacbesena. <sup>22</sup> Ngic mong ye minginaac wanacngic kecmanu Kebungo kpacma heitaiecfu, yeng naso imohai sifu Kebuac ngic witiha kpac ande. Amma ngic mong witiha kpac kecmanu kparu, yeng sing ifiangoc Kristoac wanacngic anu Kristongo yeac mingina anude. <sup>23</sup> Kebungo bungngina bic meec, imocac ngeni ngic yeneac bageu wanac areng mi kecbisia. <sup>24</sup> Tosofocna, ngeni nanang siriha dafi nammagec Kebungo mocgu mocgu kpacngunuma heitaingunuec, ngeni siric ifiangoc Anutuac kicfu kecbisia.

<sup>25</sup> Ngac goa ngeni ngicfu mi kemma eng kecdae, ngeneac negemma Kebruarunac singyoac mong mi fenende. Nga Kebungo wosoefac anenec, imocac siriha negen negenna deba ngeni negengyohoha kpac kecma yoacna naric modacbisia. <sup>26</sup> Naso yomoc ebic kuneng fingecma fedec amma ngeni yofinenggac kecdae isoc, ifi torokpema kecgec ngereude, ifi negenduae. <sup>27</sup> Ge enenggagoc bic dzegeemeocfu ngac wabesonga mi negensibesena. Nga yoac dedzegega kpac kecma ngac menadeac hofoha fai mi ambesena. <sup>28</sup> Nga ge sifu ngac mong menadeu kopocsic mi meficgenade. Nga ngac mongngo eng kecma ngicfu kenudeu ye ifingoc kopocsic mi meficgeude. Eweeneng angkecdae, yeneac kekecfu ebic hania hania fingecande, ni imohacnac onggonggunubadeac negenduae.

<sup>29</sup> Tosofocna, naso wegenaneacsac fede, ifi deduae. Ifiac amma ngic eneng-goc kecdae, ngeni enengfocngina kpac, ifi isoc kecbisia. <sup>30</sup> Nga ngicngac kiackecdae, ngeni kiacngina kpac, ifi isoc kecbisia. Nga ngicngac sogac sogagoc kecdae, ngeni sogac sogaingina kpac, ifi isoc kecbisia. Amma wiac bummedae, ngeni wiacngina kpac isoc kecbisia. <sup>31</sup> Nga ngicngac bangec yomocac wiac bummema mekecdae, ngeni wiacngina efeanec feyemmede, ifi isoc kecbisia. Nga bangec yomoc yaguc fede, imoc kpac ambesande.

<sup>32</sup> Bangecac ebicngo mi fingecngemmeudeac songona ande. Ngic ngacfu mi kenec, ye Kebuac wiacac negen negenga kuneng femide amma ye dafi

anu Kebungo negemmiu ngereeudeac ua meude. <sup>33</sup> Nga ngic mong ye ngac bic meec, ye ine bangecac wiacac negen negenga kuneng femide amma ye enema faka dafi ammiu enemango negemmiu ngereeude. <sup>34</sup> Ifi amma negen negenga tohoma yohockang anude. Nga ngac naroang me ngac kosic ye Kebuac wiacac negen negenga kuneng femide, ye yofi negende, “Ni dafu kecha sebina nga ongaasuna kpetiac anude.” Nga ngac mong ye ngic bic meec, ye ine bangecac wiacac negen negenga kuneng femide, ye ewea faka dafi ammiu eweango negemmiu ngereeudeac ua momoc meude.

<sup>35</sup> Ngeni meficngunubadeac amma yoac yomoc deduae, imoc kudoc kpengemebadeac kpac. Ngeni sirihau kecma Kebuac ua nasosoc mekecmagec bangecac wiacngo negen negengngina mi mesufubeso, ifi negenduae.

<sup>36</sup> Ngac mongngo ngicfu kengkenggac nasoya ferahema sifu ngicfu kenudeac ammiu mamango hanahema kpetarima ngade negengyohoc amma naric deude, ye kopocsic mi meficgeude. Nga naroanga ngicfu naric kenude. <sup>37</sup> Nga manggac mong ye negengyohoc mi amma naric garengemema naroanga ameau tacheso, imoc ubayau bic negenseriye ye fakaya gombunga anude. <sup>38</sup> Nga ngic mong ye naroanga ngicfu faiude, ye fakaya gombunga. Nga mongngo naroanga ngicfu mi faiude, yeng monggac fakaya feraheude.\*

<sup>39</sup> Ngac mong ye ewea gbori kecde, ye ewea kecmanu yegoc kpeketaemema kechesera. Kecma ewea homeu ye ebiha kpac amma ngic monggaru kembeso dema songea anu naric kembeso. Imoc Kebuac negen negennu ambeso. <sup>40</sup> Nga ye eng kecbac debac keneha engena ambac. Neac negen negeng ifi ngemmeduae. Nga ni ifingoc Anutuac Asugoc kecduae, imoc negensiduae.

## 8

<sup>1</sup> Ngicngac yeni yang kpema nemuac sesengina faima neandae, imocac hania yofi deduae, nenang sasawango negen negentegecgoc kecdimbe, imoc negendimbe. Nga yofi ifingoc negendimbe, “Negen negengngo ngicngac sebingina meenude.” Nga heresongogoc kecec imocngo ngicngac nanggeyunuude. <sup>2</sup> Ngic me ngac mongngo yofi negemma kecdeu, “Ni negen negentegecnagoc.” ye negen negentegec kecec dindingacac siricfu mi kecde. <sup>3</sup> Nga mong ye Anutu heresongogoc hoanggedeu Anutungo ye negemmiude.

<sup>4</sup> Nemuac sese nebesonga me kpac, imocac yofi bic negentegecdimbe. Anutu mocgungo kecde nga nemu yeni wiac fora kpac. <sup>5</sup> Ngicngac yeni nemungina sawau me bangecfu kecgoc kpacngina anutu deyemmeandae. Kebu nga anutu ifia homac kecdae. <sup>6</sup> Ifi kecmagec Anutunina ye mocgusacnoc. Yearunac wiac sasawa finge.cdarec amma ye imocac mama nga nenang yeac amma kecdimbe. Kebunina Yesu Kristo ye mocgu nga yeac witiu wiac sasawa nga nenang kecdimbe.

<sup>7</sup> Negen negentegec imoc ngicngac goa yeneac ubau mi fede, yeni nemuac negemma faka fora dema yeneac sese nema kpanjangeyunuandae nga here negen negengngina kucmamango seuhagoc anude. <sup>8</sup> Nga yakanene imocngo Anutuac wegenacfu mi fainunuude, kpac. Yaka nenide isoc imoc yeac kicfu engena mi ande. Nga mi nenideu isoc wiac monggac mi obohonide. <sup>9</sup> Goa ngeni ine negengefaima nemagec tosofocngina kucmama

\* **7:38:** Kebanga 36-38 mitiac negen negengngic imocac hania uba mocgu mi andae. Buk Baibelu sing mong meremmerenga fede.



kecdae, yeni yakaac amma faitobannu faiyunugec mayunubacac ngeni gareng meemema kecbisia. <sup>10</sup> Ge negen negentegecgagoc. Amma geng nemuac womonnu tacma nenadeu ogoga mongngo here negen negenga kucmamango ihai kecma fakaga hemma ubea midiu yeng nemuac sese ifingoc nema ubayohoc meficgeude. <sup>11</sup> Ge ifi angkecma negen negentegecgagocngo ngicngac kucmama memanganeyununade. Nga Kristongo tosoga yeac ifingoc homeec. <sup>12</sup> Amma ngeni tosofocngina yeneac here negen negeng memanganeyemmegec kucmama fingeceyemmu Kristoaru kopocsic meficgegede. <sup>13</sup> Imocac amma yofi deduae, ni yakanango tosona ebicfu faiba makpebacac naric yang wama monggoc mi nebesare. Negen negensinggoc tosona ebicfu faibadeu, imoc mi ngereuede.

## 9

<sup>1</sup> Ni ngic kpaec kpac amma ni aposoro. Kebunina Yesu kicngo hemma Kebugoc kpeketahema kecma ua mekecba ngeni ua imocac fora andae. <sup>2</sup> Foracngoc, ngicngac goa yeneng neac yofi negendae, “Ye aposoro kpac.” ifi negenggec ni sifu ngeneac aposoro anduae. Amma Kebuac aposoro kecduae, ngeninoc imocac foraya andae.

<sup>3</sup> Ngicngac goa yeneng neac ngadeyoac dema kecgoc imocac turunga meremma yofi edeyunuduae, <sup>4</sup> kpebung yeneng neri ifingoc yaka nemegec nedede, imoc singngo dede. <sup>5</sup> Amma neri ifingoc enenghocnira negen negensinggoc kecdape, sinnu meyrude habing, imoc ngereebac. Aposoro goa nga Kebuac munafora amma Kefa, yeneng enengfocnginagoc kengha angandae. <sup>6</sup> Nga Banabagoc nerengsac kekecniraac wiac fingerudeac ua marinirango medede, ngeni ifi negensiandae. Nga imoc kpac, singngo ifi mi dede. <sup>7</sup> Wasai ngic mongngo wasaiua mema yengenaarunac bunggac dzo mi meude. Nga mong ye waing homeru fora anu yengenaoc gbomea mema neudenoc. Me mongngo ramaburumaka garengyunuma kecande, yeng yenearunac namu menec angande.

<sup>8</sup> Ni ngic yeneac negen negeng mema yoac yomoc mi deduae, kpac. Dedeseriyoacngo imocac ifingoc dede. <sup>9</sup> Mosengo dedeseriyoacfu yofi ohoec fede,

“Burumakango wit sebera meickebesonga tidzameudeac ua ebiria mekecde, imocac dumbenga mi dzegebesena.” *(Dedeseri 25:4)*

Anutungo burumaka yeneac negemma imoc mi deec, kpac. <sup>10</sup> Foracngoc, ye ngicngac nenanggac ifingoc negemma ifi deec. Imoc nenanggac momoc negemma oho ohoya fede. Ngic bangec mendzickecde nga ngic wit sebera kpetima kecde, yeri fora nasoya hau ua imocac foraac noboha meecdeac negensima ua mekecdape.

<sup>11</sup> Anu Anutuac Asuac gbome ngenearu kpeginideu ngenearunac ifingoc sebiac mefic menide, ngeni imoc negenggec ngereebesoo. <sup>12</sup> Nga ngic goa yeni ngenearunac wiac goa naric megecdeu neneng imoc torokpema monggoc menide, ngeni ifi negenggec ngereebesoo. Nga neni Kristoac siduc gombang kpaec heibinggac negemma ngenearunac semeng memeac dede fedemoc, imoc wama mong mi mema sebiac ebic hania hania tofohoma kecdimbe.

<sup>13</sup> Ngic Anutuac womonnu ua mekecdae, yeni yakangina womonnu meficgema neandae. Nga aratau kingang ua mekecdae, yeni arataac seseunac tosea meandae, ngeni imoc bic negendae. <sup>14</sup> Nga goa yeni siduc gombang mekperagingemmeandae, yeni sing imohacnacngoc kekecnginaac semeng meficgebisia, Kebungo sing imoc faiec. <sup>15</sup> Ni ine memefic ifia

mong mi mekefai. Amma ngeneng wiac mong nenggecdeac negemma kibi yomoc mi ohoduae, kpac. Neanna semeng meficgebade, imocac negemba engena ande. Nga homebaiac mongngo sinna imoc naric mi meickeude. <sup>16</sup> Anutungo igocnuma dzegenuu siduc gombung ngicngac edekpou ayem-mekecduae. Amma siduc gombung mi dekperagibai dede yeac sowec bageau kecbai. Imocac neannaoc ua gombunga meduae dema kpacna naric mi miacbade. <sup>17</sup> Amma neanna songo modacma uaac kpesi kpesi faiba naric degec ua yomoc mebaiu yeneng uabung nenggec mebai. Nga Kebu yengenaoc ua yomoc mebadeac denenec, imoc modacma garengua buma kpac mekecduae. <sup>18</sup> Nga bunna siriha yofi ande, ni siduc gombung dekperagikecma wiac mebadeac dedea, imoc wadacma engsac naric dekperagiyemebade.

<sup>19</sup> Ngic mongngo neac kpae mi faiec, kpac. Nga neng ine ngicngac homac kpedziyunubadeac negemma yeneac bageu naric faiemema wanacngicngina amma kecduae. <sup>20</sup> Ni yudangic kpedziyunubadeac amma yenigoc kecma yudangic siricnginau angkecduae. Neannaoc dedeseriyoacac bageu mi kecduae, fora. Nga ngicngac dedeseriyoacac bageu kecdae, yeni kpedziyunubadeac yenigoc kecma yeni isoc dedeseriyoacac bageu kecduae. <sup>21</sup> Nga ngicngac goango dedeseriyoacac bageu mi kecdae, yeni kpedziyunubadeac yenigoc kecma dedeseriyoac kpac isoc kecduae. Anu neannaoc Anutuac dedeseriyoac ngadeau yombong mi kecduae, ni ine Kristoac dedeseriyoacgoc kecduae. <sup>22</sup> Kecma ngicngac kucmama kpedziyunubadeac yeni isoc yenigoc kucmama amma kecduae. Amma ngicngac hania hania kecdae, yenearunac goa kopocsicac ebicfunac mesiyunuba komoc kpegecdeac yenigoc kecma kekec hania hania modacma yeni isoc kecduae. <sup>23</sup> Ni siduc gombunggac amma uana sasawa mekecduae, kecma imocac fora nasoya hau neanna imocac siriha noboha mebadeac negensiduae.

<sup>24</sup> Nedzi nedziac ngic ariacsobennu firang anggecdeac nedziandae, yeni sasawango nedzimegac mocgungo firanggac sokoc meude, ngeni imoc bic negendae. Ngeni ngenang sokocngina megecdeac ifi isoc nedzibisia. <sup>25</sup> Ngic ariacfu kpacngina faiandae, yeni sasawango sebingina hafoangoc efaiudeac arengegecde. Ngic yeneng dzaring dzangge dzangge ubaheyem-megecdeac ifi anggecde. Nga nenang dzaring dzangge dzanggea kpac ubahenemmegecdeac sebinina hafoangoc garengemenide. <sup>26</sup> Ni sicsacu mi nedzianduae nga ngicngac maringina eng ukugec pong kpeu ukuandae, ifi isoc mi anganduae. <sup>27</sup> Ni yofi anganduae, ngicngac tosea yenearu siduc gombung edekpou ayemmema hennegeng nasou ngic kpedaha ambaiac sebina kpekecduae. Imoc neac wanac areng amma yoacna modarudeac ifi ammikecduae.

## 10

<sup>1</sup> Tosofocna, ngeni kisicfocnina yeneac yoacsiduc negentegecgecdeac negenduae. Hoengngo kperacyunuu yeni sasawango imocac bageu kengkecma kondung ferecgegec. <sup>2</sup> Hoeng nga kondung yereng mitidokungina anu yeni sasawango Mosegoc torokpegecdeac imohai doku nadzicgec. <sup>3</sup> Amma yeni sasawango Asuac yaka siriha mocgu nekenggec. <sup>4</sup> Asuac hoc peperandzingo modacyunuu hoc ihacnacnoc doku mau yeni sasawango Asuac doku siriha mocgu nekenggec. Nga hoc peperandzi imoc Kristonoc. <sup>5</sup> Nga Anutungo kisicfocngina botucnginau ngic homac yeneac fakanginaac

amma ubea mi ngereec. Mi ngereeu yeni bangecfu mayunuu homedacgec farengnginango bangec kisiu sinsararang kpema fekenec.

<sup>6</sup> Yeni faka mangana angkecgec, imoc ifingoc nenanggaru fingeccbacac siduc imoc nenanggac amma faifaia fede. <sup>7</sup> Amma monggoc deba, ngeni yeni isoc nemu ewehelhei mi ayemmebisia. Yeneac yoac yofi oho ohoya fede, “Ngicngac yengeng matacma nenedoku nemaguc yacma yegec fede fede kecgec.” *(Makekeng 32:6)*

<sup>8</sup> Anu mong deba, nenang ifingoc serofaka mi ambisina. Yeneanunc ngicngac goa yeni serofaka angkecgecac ngicngac 23 tauseng yeni uameme mocguac manau makpema homedacgec. <sup>9</sup> Ni monggoc torokpema deba, goa yeneng Kebu faitobang ammigecc boidzoc yeneng yinigecc homedacgec. Nenang ifingoc Kristo mi tobanggebisina. <sup>10</sup> Nga ngicngac goa yeneng modzotitiac yoac degecc ngickpekpe angerongo hama kpebucyunuec. Nenang siriha imocngoc modzotitiac yoac mi debisina. <sup>11</sup> Faka yenearu fingerec, imoc ongea isoc ande. Siriha imocngoc yofinenggac ngicngac naso wisic wisickeau kecdimbe, imocngo goronina ambeso. Imocac amma yoac imoc mitikibiui oho ohoya fede. <sup>12</sup> Imocac ngic mongngo yofi deande, “Ni seria nanduae.” ye kecma makpebacac garengemebeso. <sup>13</sup> Anu faitobang ngicngac goa yenearu fingeccgec, siriha ifia ngenearu ifingoc fingeccngemmeude. Nga Anutungo yoac dema imoc modarude. Faitobang fingeccngemmeu ngeni ebic imoc tofohoma keccgecde. Nga imocngo kucngina mi feraheudeac faitobang ebiria kpae heimiude. Faitobang hangemmeu yeng imohacnac woragecdeac sing meficngemmeu faitobangngo kucngina mi memaudeac garengngunuude.

<sup>14</sup> Songo tosofocna, nemu yeneng witicngunubauac ngeni nemu ewehelhei faka wama imohacnac worama yeni mi hoangyunubisia. <sup>15</sup> Ngeni ngicngac negengeccnginagoc, imocac amma ngeneac yofi deba, ngeni ngenaocngoc yoacna negemma isinggebisia. <sup>16</sup> Kenecac sokoc keneheandimbe, nenang imoc nema Kristo yengena sawagoc kpeketahema yegoc sac mocgu annide. Nga ic sogong tueandimbe, imoc nema Kristo yengena sebigoc torokpema yegoc sebi mocgu annide. <sup>17</sup> Ic sogong imoc hafac mocgu. Yeni hafac mocgusac mema imohacnac mederenemmegec nenang sasawango imoc neandimbeac nenang ngicngac homac kecma sebi mocngoc andimbe.

<sup>18</sup> Ngeni Israe ngicngac yenemma negensibisia. Ngicngac seseac wiac ohogec noboha neandae, yeni arata kpanggeandae. <sup>19</sup> Ngicngac nemu sesengina dema wiac heiyemmegec, imocngo wiac engena mi ande, ngeni yoacna imoc negengeccgec. Nga nemu yengena ifingoc wiac engena mi ande. <sup>20</sup> Nga bangeha bangeha ngicngac Anutu mi negemmidae, yeneng seseac wiac faiandae, imoc Anutuac negemma mi faigeccde. Yeni ine hadehade nga yafinggac negemma sesegerec ohoandae. Nga ngeneng ine hadehade nga yafing yenigoc kpanggeyunugec mi ngereede. <sup>21</sup> Ngeni Kebuac sokoc nga hadehade nga yafinggac sokoc momoc mema imohacnac ifingoc negeccde, imoc naric mi ngereede. Nga ngeni Kebuac yaka nga hadehade nga yafinggac yaka momoc kpanggeandae, imocngo osiande. <sup>22</sup> Nga kucninango Kebuac kuc mi ferahade. Nenang Kebuac here miacbinggac ifi mi ambisina.

<sup>23</sup> Goa yeneng deandae, “Wiac hania hania sasawa annideac kpae mong mi fede.” Nga neng ine yofi deduae, “Faka goa imocngo tosofocga yeneac memefic mi anude. Wiac sasawa annideac kpae mong mi fede, fora. Amma

faka goango ine mi miacnunuuma meserinunuude.”<sup>24</sup> Ngic ye yengena gombung fingerudeac negemma fakaya mi ambeso, kpac. Ngeni tosofocngina yenearu gombunga fingerudeac negensima fakangina ambisia.

<sup>25</sup> Ngicngac yeneng suenefcu wiac sasawa faigec ngeni imoc here negen negengnginaac amma heikpesia kpac naric eng menec ambisia.

<sup>26</sup> “Bangeha bangeha nga wiac sasawa bangecfu fede, imoc *KEBUAC*.” (*Mitiyegec 24:1*)

<sup>27</sup> Anu ngicngac Kebu mi negensinggeandae, yenearunac mongngo ameau kpacngunuu ngeneng yofi ambisia, ngeni ihai kenggecdeac negenggec naric anu yeac amau embisia. Enggec yeng yaka ngemmeu ngeni here negen negenginaac amma dekpesi mong mi amma imoc naric nedacbisia. <sup>28</sup> Nga ngic mongngo yofi dekperagingemmeudeu, “Yomoc nemu seseac yang noboha.” imohai ine yaka imoc mi nebisia. Imoc yengena nga here negen negenggaac amma yaka imoc wama mi nebisia. <sup>29</sup> Nga geac here negen negenggaac mi deduae, kpac. Ni tosogaac negemma imoc deduae. Nenang kpaea kpac kecdimbeac ngic monggac here negen negengngo naric mi isinnunubeso. <sup>30</sup> Nga ngicngac yenigoc yaka nema Kebuac dangge denideu yeneng wiacac bic dangge deding, imocac desure naric mi anemmebisia.

<sup>31</sup> Ngeni nenedoku nedae me wiac mong angandaeu ngeni Anutuac negensima dengerebisia. <sup>32</sup> Ngeni yudangic nga griknngic amma Anutuac kpebungfora negemmangang mi meficgeyemmebisia. <sup>33</sup> Anu ngicngac homac ebicfunac mesiyunuba komoc kpegecde nga yeneac gombunga fingerudeac amma ua imoc mekecduae. Neanna gombunna fingerudeac ine mi mekecduae.

## 11

<sup>1</sup> Ni Kristoac faka nga angammeme modacanduae nga ngeneng siric imocngoc neac faka nga angammeme hemma modacnubisia. <sup>2</sup> Nga ngeni neac wiac sasawa negensidaae amma yoac edengunuma ngemmeai, imoc meandae, imocac dengerengunuduae.

<sup>3</sup> Ngic mocgu mocgu sasawa yeneac orucngina imoc Kristo nga ngac mocgu mocgu yeneac orucngina imoc ngic amma Kristoac oruha imoc Anutu, ngeni imoc negentegecgecdeac negenduae. <sup>4</sup> Nga ngic mong ye oruha kperahema numuude me profeteyoac deude, ye yengena oruha gamekpekpe meficgemiude. <sup>5</sup> Nga ngac mongngo oruha mi kperahema numuude me profeteyoac deude, ye ine yengena oruha gamekpekpeu faiude. Imoc ngac mongngo oruha wedzeddarec isoc. <sup>6</sup> Amma ngac mong ye oruha mi kperahadeu ye oruha merecgeu wegena ambeso. Nga ngac ye oruha ifi merecgeude me wedzerude faka imocngo gameagoc andeu ye oruha kperahema kecheso.

<sup>7</sup> Ngic ye Anutuac onga nga kibikperagia, imocac amma ye oruhau wiac mong faima mi kperahebeso. Ngacngo ine ngicac kibikperagia. <sup>8</sup> Anutungo ngic ngacfunac mi meficgeec, ye ine ngac ngicfunac meficgeec. <sup>9</sup> Nga ngic ye ngacac amma mi mefic meficgea, ngacngo ine ngicac amma mefic meficgea. <sup>10</sup> Imocac ngac ye kuha femide imocac ma isoc wiac mong oruhau heima kperahebeso. Ye angero yeneac amma ifi ambeso.

<sup>11</sup> Ngac ye tembuha kekec imoc mi fede nga ngic ye tembuha kekec ifingoc mi fede. Ngic nga ngac ngeni meficemema kechisia, Kebungo areng ifi faiec.

<sup>12</sup> Ngac ye ngicfunac mefic meficgea, ifi isocngoc ngic ye ngacfunac fingec fingera amma wiac sasawa imoc Anutuarunac hakecde.

<sup>13</sup> Ngeni ngenaoc faka imoc isinggebisia. Ngac mongngo oruha mi kperahema Anutu numumiande, imoc mi ngereeude. <sup>14</sup> Anu ngic mong ye orucsbaya kuneng mekecde me orucdzoya dzegeande, faka imocngo gameagoc angande. Ngic nenang angammemeninango imoc kpounem-mekecde. <sup>15</sup> Nga ngac mong ye orucdzoya kuneng femideu ye imoc negenu wiac engena, imoc naric nga gombunga, nocac ye orucdzoyango oruc-sira kperaheudeac imoc mekecde. <sup>16</sup> Mongngo yoac yomocac deendema anudeac negendeu ye yofi negembeso, nenearu faka ifia mong mi fede nga Anutuac kpebung yeneac botuclu faka mong ifia ifingoc mi fede.

<sup>17</sup> Yoac torokpema edengunuba, imoc dedengerecyoac mi debade. Ngeni tutumangnginau ubagombung yoac mi dema ngenaocngoc memanga-neameandae. <sup>18</sup> Nga hanahema yomocac deduae, ngeni kpebunnu kpedzucnema tacma yoacngina tohoemeu kecandae, imoc negenai. Yoac imocac negemba fora isoc ande. <sup>19</sup> Ngenearu tohoemeemefaka fingebesio. Anutungo ngicngac damoc fakangina fora hemma botucnginau nanggeyunuande, imoc didiu fingectegerude. <sup>20</sup> Ngeni kpedzucnema enacurec yaka neandae, imocngo Kebuac maung fora mi angande. <sup>21</sup> Amma ngeni yaka mehama yakanene nasou ngicngac tembus tembus ngenaoc yakanginasoc nedacgec goango ine herenginaac homeandae nga goa ngeneng doku homac yombong nema ubangina sufuande. <sup>22</sup> Ngeni amanginau tacmangoc yakangina waraima nebisia, faka imocngo naric ambac. Ngeni Anutuac kpebung ngadeyunuandae, ifi isoc angandae. Amma tosofocngina goa iwaingina kpac kecdae, yeni gamekpekpe ayemmeandae. Ifi angandaeac daif dema dengerengunubade, imoc obohode.

<sup>23</sup> Kebungo yoac yomoc edenuu negenai. Nga yoac imoc warac bic edengunuai, imoc yofi, Yudango Yesu doc meec, tofocnac imohainoc yofi fingerec, Yesungo ic sogong mong mema <sup>24</sup> Anutuac ubangerec dema ic sogong mendzicma yofi deec, "Yomoc fusina, imoc ngeneac amma faifaia. Ngeni imoc nema neac negensima nekecbisia." <sup>25</sup> Nga yaka negec wisickeu ye kpakenecc mema yofi deec, "Kpakenecc yomoc sacnaac dzadzahac gboria. Ngeni imoc negeccdesoc neac negensima nekecbisia." <sup>26</sup> Ngeni ic sogong nga kpakenecc yomoc negeccdesoc, naso imohai Kebuac homec dekperagigecde. Dekperagi kecmagec ye haude.

<sup>27</sup> Ngic mong ewehelheia kpac Kebuac ic sogong nga kpakeneccfunac neudeu Kebuac sacfusiac turunga imoc yearu fingerude. <sup>28</sup> Ifi anu ngicngac tembus tembus ngeni ngenaoc isingememaguc ic sogong nema kpakeneccfunac nebisia. <sup>29</sup> Ngic mong ye Kebuac sacfusia mi hentegecma engsac neude, ye nenedokuyau kopocsicac turunga meficgemiude. <sup>30</sup> Fakangina ifiac amma botucnginau ngicngac homac yeni kucmama nga hafeinginagoc andae. Amma goa yeni bic wangunuma homegec. <sup>31</sup> Nga nenang tembus tembus hanianina faka forau hengising annideu kopocsicac turunga nennanu mi habac. <sup>32</sup> Anutungo ngade bangec nga kurumeng memanganema meickeude, nenang imocgoc manganebinggac ye kopocsicac turungango metinnunuude.

<sup>33</sup> Tosofocna, imocac amma yofi ande, ngeni yaka negeccdeac kpeturangema haandae, naso imohai ngicngac ogofocngina waraima megeccdeac tomiai ambisia. <sup>34</sup> Nga ngeni tutumangnginau kopocsicac turunga meficgebauac ngic mongngo hereaac homeudeu ye ameau tacma yaka nemaguc habeso. Nga yoacna tosea fede, imoc ngenearu hamaguc torokpema edenunubade.

## 12

<sup>1</sup> Tosofocna, Asuac ua fede, ngeni imocac wiac negenggecdeac negenduae. <sup>2</sup> Ngeni Anutu mi negensinggema kecgec, naso imohai hadehade nga yafing yeni nemuonga yoacngina kpac, yenearu wangepngunugec ngeni modacyunuma engsac kengkecgec, ngeni imoc negendae. <sup>3</sup> Imocac amma yofi deba negembisia, Anutuac Asungo ngic mong meu yeng yofi mong mi deude, “Yesu ye sowehagoc.” Nga Tiri Asungo ngic mong meu yeng, “Yesu ye Kebu.” ifi naric deude. Asu siriha mongngo yearu ua meu ine imoc deudeac obohode.

<sup>4</sup> Asungo wosoefahaac amma kuc hania hania nemmeande, imoc sasawa Asu mocgu, yearunac hakecde. <sup>5</sup> Nga Kebungo ua hania hania nemmeande, imoc sasawa Kebu mocgu, yearunac hakecde. <sup>6</sup> Amma Anutungo sing hania haniau kuha mederenemmeande, imoc sasawa Anutu mocgu, yearunac hakecde.

<sup>7</sup> Asungo ngicngac meficnunuudeac arengfora tembus tembus menunuma kekecninau kuha mekperagiude. <sup>8</sup> Amma Asungo ngicngac menunuu mongngo yoac negen negentegecgoc deude nga mongngo yoac keme kemea deude. Nga Asu mocgungo nenearu ua imoc meude. <sup>9</sup> Mongngo Asuarunac negen negensing seria meude. Nga mongngo yearunac hafei mengec mengereac kuc hania hania meude. <sup>10</sup> Asu imocngoc ngic mong faka hania hania kuhagoc meudeac negen negeng miude. Nga mongngo profete yoac deudeac negen negeng miude. Amma mongngo asu hania hania isingyunuudeac negen negeng miude. Nga mongngo nedzarangyoac hania hania deudeac negen negeng miude. Amma mongngo nedzarang yoacfusing yoac merenudeac negen negeng miude. <sup>11</sup> Asu ye mocgu amma yennoc ua sasawa mekecma negen negenga nga songoya modacma kuha arengfora tembus tembus mederenemmeude.

<sup>12</sup> Sebinina imoc mocgu nga imocac tosea homac fekende. Imocac tosea sasawa kpeturanggecgec sebi mocgu anude. Nga Kristoaru siriha ifi isocngoc fede. <sup>13</sup> Asu mocgungo kpeturannunuma doku nadzicnemmeu sebi mocgu aning. Nenang yuda ngicngac me grik ngicngac me wanac areng me witicnina kpac kecdimbe, nenang sasawa Asu mocgungoc mema doku isoc nedaring.

<sup>14</sup> Sebinina imocac tosea homac fekende, imoc wiac mocgu kpac. <sup>15</sup> Nga haningo yofi debac, “Ni mari kpac, imocac amma sebiac tosea mong mi anduae.” ye sifu sebigoc torokpema sebiac tosea anude. <sup>16</sup> Nga kedzacngo debac, “Ni kic kpac, imocac sebiac tosea mong mi anduae.” ye sifu sebigoc torokpema imocac tosea anude. <sup>17</sup> Anu sebingo hafaogoc kicsac ambac dede ye yoac negenudeac osibac. Me hafaogoc kedzacsac ambac dede ye homuna negenudeac osibac. <sup>18</sup> Yaguc yofi ande, Anutungo negen negenga nga songoya modacma sebiac tosea sasawa tembus tembus sebi mocguaru arengyunuma torokpeyunc. <sup>19</sup> Anu sebiac tosea sasawango sirc mocgusac ambac dede yeni kpeturanggema sebi mocgu hafaogoc naric mi ambau. <sup>20</sup> Sebi ye mocgu nga sebiac tosea yeni homac.

<sup>21</sup> Nga kicngo mariaac yofi naric mi deude, “Ni gea kpac tembus naric kecbade.” Amma orucngo haniac ifingoc yofi naric mi deude, “Ni ngeria kpac tembus naric kecbade.” <sup>22</sup> Imoc kpac, sebiac tosea goa kucngina mamea deandimbe, yenennoc sebininau uatoa yombong meandae. <sup>23</sup> Nga

sebiac tosea goa negenni ewehiheihea kpac, yeni ewehihei monggoc ayem-mema kperacyunuandimbe. Amma sebiac tosea goa henggecdeac negenni gameagoc angkecde, imoc faka gombunga modacma kperahkecdimbe.

<sup>24-25</sup> Nga sebininaac tosea goa ewehiheiingnagoc, yeni kperacyunubesonga mi negengandimbe. Amma sebinina tosea yenaocngoc tohoemebauac Anutungo sebinina arenggema sebinina tosea goa mamea negengandimbe, yeni ine monggoc ewehiheyemmec. Ewehiyemmema yeni sofungoc garengemegecdeac ifi anec. <sup>26</sup> Amma sebiac tosea mongngo kpendzeng kpeudeu sebitosofora yenhafocngoc meficgema kpendzeng kpegecde. Nga sebiac tosea mong dengereudeu sebiac tosea sasawa yeni yenhafocngoc sogai gecde.

<sup>27</sup> Anu ngeneng ine yofinenggac Kristoac sebi amma tembus tembus sebiac tosea andae. <sup>28</sup> Amma Anutungo kpebunnu ngicngac goa yofi faiyunuec, warac warac aposoro nga yeneac ngadeau profete amma yeneac ngadeu mitiac kpoukpou faiyunuec. Ifi faiyunumaguc goa faka kuhagoc megecdeac faiyunuec. Ngicngac goa yeni hafei ua hania hania megecdeac Asungo imocac kuc yemmec. Amma ngicngac meficyunugecdeac areng goa faiyunuec nga wiac garenggegecdeac ngicngac ifia faiyunuec amma goa nedzarangyoac hania hania degecdeac faiyunuec.

<sup>29</sup> Anu nenang sasawango aposoro mi annide nga sasawango profete mi annide, kpac. Amma sasawango kpoukpou mi annide. Nga sasawango kucfaka menideac negen negeng mi mekecdimbe. <sup>30</sup> Amma hafei ua hania hania menideac Asungo imocac kuc nenang sasawa mi nemmec. Nga sasawango nedzarangyoac mi deandimbe amma sasawango yoacninausing imoc mi merengandimbe.

<sup>31</sup> Anu ngeni Asungo wosoefahaac amma kuc nemmeande, imocac engenaya megecdeac serima kecbisia. Amma sing mong torokpema edzacn-gunubade imocngo sing sasawa feracyunude.

## 13

<sup>1</sup> Ni Asuac kucfu yoac hania hania debai me Asuac kucfu angero ye-neac yoac hania hania debade amma ngicngac yeni heresongogoc ine mi hoangyunuma kecbai, imohai ni gonggong isoc arohoma me tambarang isoc udumengtoasac angkecbade. <sup>2</sup> Amma profeteyoac debai dede nga negen negeng keme kemea sasawa negentegecbade amma negen negentegec-nagoc kecbai dede tiki meickecbadeac negen negensinna imocacsoc fenende amma ngicngac yeni heresongogoc ine mi hoangyunubai foraya mong mi meficgebai. <sup>3</sup> Nga dzofinacna sasawa mederema ngicngac yemmebai amma sebina meemma homefcu faibai nga ngicngac yeni heresongogoc ine mi hoangyunubai dede ni foraya mong mi meficgebai, kpac.

<sup>4</sup> Heresongogoc hoangemema kekec, imocngo ngic monggac modzotiti mi negenude, ye yumea kefude. Nga imoc keracmanganga kpac kecma yengena yoac homac mi deude amma sebiengeng mi anude. <sup>5</sup> Ye faka mi angana, imoc mi amma yengenasac mi negensiude. Ye herebuya kpac kecma turungyoac mong mi deude. <sup>6</sup> Ye faka manganaac amma ubangerec mong mi negenude, kpac. Ye faka foraac ine sogaiude. <sup>7</sup> Ye wiac monggac modzea mi tiude. Ye wiac sasawa negensingeude amma wiac sasawa fingerudeac negensima kecma, imocac kucmama mi anude. Nga wiac hania hania finge cmu serima nanude.



<sup>8</sup> Heresongogoc hoangemema kekec, imocnggo naric mi kpac anude. Profeteyoacnina imoc ine kpac anude amma nedzarangyoacnina imoc meickeu kpac anude nga negen negennina keme kemea, imoc ifingoc kpac andarude. <sup>9</sup> Negen negennina amma profeteyoacnina imoc wiac nobohasac nemme nemmea. <sup>10</sup> Nga wiac hafoa fede, imoc Anutuarunac hauguc wiac noboha nemme nemmea, imoc kpac andarude. <sup>11</sup> Ni medac kecma medacbisicac siricfu negen negeng isinggema arenggekefai. Kecma ngic amba nambarac kekec meickeu yada sing kecduae.

<sup>12</sup> Anu yofinnggac wiac hengandimbe, imoc wikinnu onga irec ireckea kpac, ifisac wiac hengkecdimbe. Ngade kecma wiac fora kicngo hennide. Yofinnggac wiac noboha negengandimbe. Anutungo hafoangoc negennene, ni ifi isoc naso imohai wiac hafoangoc negendacbad. <sup>13</sup> Ifi anu wiac harebecngo feengkefude, imoc nenang Kebu negensinggedimbe nga kekecseri febesande imocac negen negeng amma heresongogoc hoangemema kekec. Nga wiac harebec yenearunac wiac mocgungo engena ande, imoc ngicngac ogofocnina heresongogoc hoangeme kekec.

## 14

<sup>1</sup> Ngeni heresongogoc hoangeme kekecac angemmebeso. Amma ngeni Asuac faka megecdeac songongina kuneng ambeso. Amma ngeni profeteyoac megecdeac negenggec engena yombong febeso. <sup>2</sup> Mong ye nedzarangyoacfusing yoac deande, ye ngic nenanggoc yoac mi deude, kpac. Ye ongaasuyango yoac keme kemea Anutu edeu, ngic mongngo imoc naric mi negentegerude. <sup>3</sup> Nga mong ye profeteyoac deande, yeng ngicngad ubaherengina midima meserinunuma nanggenunuude. <sup>4</sup> Nga ngic nedzarangyoac deande, ye yengena meseriemeude nga profeteyoac deande, yeng kpebung meserinunuude. <sup>5</sup> Anu ngeni sasawango nedzarangyoac degecdeac negemba ngereede. Nga ngeni profeteyoac degecdeac songona kuneng ande. Mongngo nedzarangyoac dema yoara mi merenudeu ye ngic profeteyoac dede, yeac mamea anude. Nga yeng yoara merenudeu ye ifingoc kpebung meseriu songira mocgura anecde.

<sup>6</sup> Tosofocna, ngenearu hama yoac goa dekperagingemmebai me yoac keme kemea goa edengunubai me profeteyoac debai me kpoukpouyoac goa debai dede imocnggo memeficngina ambac. Ni ine ngenearu hama nedzarangyoacsac debai dede, imoc memefiha kpac ambac.

<sup>7</sup> Imoc ifingoc fora yofi ande. Kungac nga gita yeri kekecngira kpac amma yeri sifu udumengngiragoc. Ge imoc eng sicsauc kpene udumenga siriha mi fingerudeu ngicngac yeni kungac me gita imocac ubea obohogecde. <sup>8</sup> Amma dzikacac tomengngo udumenga gombunga mi fingeru ngic yeni dzikacac naric mi efaengcde. <sup>9</sup> Ge ifingoc yofi negembesena, ubagau yoac didingac denadeu ngicngac yeni yoacga naric negentegecgecde. Ge ine sicsauc nga kpeboronggoc denadeu yeni yoacga obohogec yoac sawau engsac denade.

<sup>10</sup> Yoac hania hania bangecfu fekende nga yoac mong titiha kpac, imoc mi fede. <sup>11</sup> Ni ngic monggac yoac siriha mi negentegecbadeu yeng yoac deu yeac kicfu kuricngic ambade nga yeng ifingoc neac kicfu kuricngic anude. <sup>12</sup> Ngeni Asuac faka megecdeac homac angemmeande nga ngeni Asuac fakango kpebung meseriyunuande, imoc ifingoc megecdeac mangkibisia.

<sup>13</sup> Imocac mong ye nedzarangyoac deude, yeng yoac imoc ifingoc merenudeac Anutu numumibeso. <sup>14</sup> Ni nedzarangyoacfu sing numuduaeu ongaasunango numuude, fora. Nga negen negennango ine fora mong mi meficgeude.

<sup>15</sup> Ifi anu dafi ambesonga? O, ni ongaasunango numubade nga negen nengentegecnagoc ifingoc numubade. Ni ongaasunango dedengerec yegec heibade nga negen negentegecnagoc ifingoc dedengerec yegec heibade. <sup>16</sup> Anu ongaasugango Anutu dengerenadeu ngictehec yeni geac dedengerec torokpema, "Imoc fora." degecdeac obohogece. Yeni yoacga mong mi negentegecgec. <sup>17</sup> Nga ge geangaoc Anutu dengerena imoc ngereede. Amma yoacga ine ngic ogofocga mi meseriyunuude. <sup>18</sup> Ni nedzarangyoac deanduae, imocngo Anutu dengereduae. Amma ngeni feracngunudacma nedzarangyoac homac yombong deanduae. <sup>19</sup> Ni neanna songoac debade nga kpebung botucnginau kecma yoacna 5 negen negentegecnagoc debade, imocngo nedzarangyoacna teng tauseng ferahade, imoc negenduae. <sup>20</sup> Negen negensinggoc tosofocna, ngeni negen negentegecnginau nambarac isoc mi kecbisia. Ngeni angammeme manganau ine sabac isoc kecbisia nga negen negentegecnginau yada kecbisia.

<sup>21</sup> Dedeseriyoacfu yoac yofi oho ohoya fede,

"Yoacfusing siriha mong nga ngicngac yeneac enacbibcnginau dedengingango mong ande, ni ngicngac imoc meyunuma yoacna debade nga ngicngac yeneng ine kedzac mi kpegecede, *KEBUNGO* ifi dede." (*Yesaia 28:11-12; Dedeseri 28:49*)

<sup>22</sup> Ngicngac negen negensingngina kpac kecdae, yeneng kucfaka bibiagoc henggecdeac nedzarangyoacngo imocac faifaia fede. Ngicngac negen negensingnginagoc kecdae, yeneac amma ine mi fingerude. Amma profeteyoac ngicngac negen negensingnginagoc yeneng bibiagoc anggecdeac faifaia fede. Imoc ngicngac mi negensinggedae, yeneac kpac. <sup>23</sup> Kpebung sasawa kpeturanggema tacma nedzarangyoac degec ngic monnunac me ngic goa negen negensingngina kpac ngeneac botucfu erema imoc ngenemma degece, "Ngeni ubangina sufude." <sup>24</sup> Nga ngeni sasawango profeteyoac dema tacmagec ngic monnunac me ngic negen negensingngina kpac ngeneau ereu yoacnginango ye hereau meu yengena kopocsiha engenu imocngo yoacfu faiude. <sup>25</sup> Faiu ye ubahereau negen negeng mekefu sufuma fede, imoc didiu fingetegerude. Ifi fingetegeru yeng makpema kimesuya mesufuma Anutu dengerema deude, "Foracngoc, Anutungo ngeneac botucfu kecede."

<sup>26</sup> Tosofocna, yofi naric ambesonga. Ngeni kpeturanggema tacgecede, imohai ngicngac sasawango ngicngac ogofocngina wiac goa edeemegecdeac mehabisia. Mongngo mitiyegec mong heingemmeso nga mongngo yoac edekpou angemmeso amma mongngo yoac goa dekperagingemmeso nga mongngo nedzarangyoac debeso nga mongngo imoc merembeso. Ngeni yoac sasawa imoc kpebung meserigeceac debisia. <sup>27</sup> Anu ngicngac goango nedzarangyoac degecdeu yohockang me harebecngosac debisia. Amma imoc arennu degec mongngo imoc merembeso. <sup>28</sup> Nga nedzarangyoac imocac merem merenggac ngic mong imohai mi tarudeu ngic imoc ye tutumangnginau waickema tacma yengena hereusac Anutugoc dedeng ambeso. <sup>29</sup> Nga kpekpeturanggac amanginau profete yohockang me harebecngosac profeteyoac debisia. Ifi degec ngicngac tosea ngeneng profeteyoacngina negemma isinggebisia. <sup>30</sup> Anu ngic mongngo waraima yoac

deu yoac sufu sufuyaac dedekperagiyoac mong tacde yearu haudeu ngic waracngo waickemanu ogeango debeso. <sup>31</sup> Ngeni sasawango profete yoac naric debisia. Nga debeso dema ngic me ngac mocgu mocgungo arennu yoac imoc debisia. Ifi anu ngicngac sasawango negen negeng megede nga ngeni ubaherengina midima meseriemegede. <sup>32</sup> Profete asungo ngicngac profeteyoac deandae yeneac negen negeng tofohoande. <sup>33</sup> Anutu ye sicsaucac Anutu kpac, ye ua arengagoc mema ruaea meficgeande.

Kpebung kpetiac, imocac manau ngac yeni yoacngina waickema kecandae, ifi isoc <sup>34</sup> ngenearu ifingoc ambesonga. Ngac ngeni yoacngina waickema tacma kpebunggac negen negeng modachisia. Ngeni imohai yoac yoac mi ambisia. Singyoacngo imocac ifi dede. *(Fingec fingec 3:16)*

<sup>35</sup> Ngeni wiac monggac hania obohoma negembeso angemmeu amanginau kemma ewefocngina kpesiyemmebisia. Ngac mongngo kpebung botucnginau yoac yoac anude, imoc faka gameagoc. <sup>36</sup> Anutuac yoac imoc ngenearunac hanahema mi fingerec nga imoc ngenearusac mi kemma fede, kpac.

<sup>37</sup> Ngenearunac mongngo yengenaac negenudeu, "Ni profete, ni Asuac negen negenggoc kecduae." yeng kibi ohoanduae, imoc hennegeng amma imoc Kebuac singyoac, imoc bic negenghomeude. <sup>38</sup> Nga ngic mongngo yoac yomoc osoma waudeu ngeni ye ifingoc wabisia.

<sup>39</sup> Imocac negen negensinggoc tosofocna, ngeni profeteyoac degedeac homac angemmebeso. Nga nedzarangyoacac mi kpetaribisia. <sup>40</sup> Nga ngeni wiac sasawa sirihau nga arengagoc ambisia.

## 15

<sup>1</sup> Tosofocna, ni siduc gombung dekperagingemmeba ngeni imoc negemama hoanggema seria mekegcec, imoc monggoc heigboringemebadeac negensiduae. <sup>2</sup> Nga yoac edengunuba negengcec negen negensingngina seria imohai feudeu imocngo kopocsicfunac mesingunuu komoc kpegede. Amma ngeni imoc wagecdeu negen negensingngina uaya kpac anude. <sup>3</sup> Ni hanahema Kebuarunac yoac engena yofi mema ngemmeai, Kristongo nenang kopocsicninaac amma homeu <sup>4</sup> tonggogec uameme harebec anu Anutungo megboriu yarec. Faka imoc mi fingecmanu imocac negen negeng mitikibiu bic oho ohoya fec, imoc fingerec. <sup>5</sup> Nga ye Petofo fingecmima ngade medacfora 12 fingecyemmeec.

<sup>6</sup> Imocac ngadeau tosofocnina kpetengina 500 ferahade, yeni yenhafoc tacmagec yeng yeneac kicfu fingeru henggec. Anu yenearunac goa bic homegec nga homacngo yofinenggac kecdangoc. <sup>7</sup> Ye imocac ngadeau Yakobo fingecmima aposoro sasawa fingecyemmeec. <sup>8</sup> Nga wisic wisickeau fingecnec. Nenggac mongngo sabaha kebangsac meude, ni ifi isoc amba yeng sifu fingecnec. <sup>9</sup> Ni Anutuac kpebung yunukporac ayemmebisma kefai nga ngicngac yeneng aposoro kpacnuandae, imocacsoc mi anduae, neng ine aposoro yeneac mameangina. <sup>10</sup> Nga Anutungo wosoefahaac amma ye dafugeng fainuu ni ifianoc yaguc kecduae. Kebare wosoefaha eng mi fec. Ni sasawa feracyunudacma ua homac meai. Nga imoc neanna kucac kpac, Anutuac wosoefac nigoc fec, imocngo ua imoc meec. <sup>11</sup> Amma ni nga yeni imocnac dekperagini ngeni modacma negensinggegec kecdae.

<sup>12</sup> Anutungo Kristo homecfunac megboriec, imoc edekpou angemmekecdimbe nga ngenearunac ine goango deandae, "Homecfunac yacyac imoc mi fede." yeni ifi deandae, imoc mi heide. <sup>13</sup> Homecfunac yacyac

mong mi febac dede Kristongo ifingoc homecfunac naric mi gborima yacbac. <sup>14</sup> Nga Anutungo Kristo mi megboriu yacbac dede neni yoac edekpou angemmekecdimbe, imocngo uaya kpac ambac nga ngeneac negen negensingngina ifingoc uaya kpac ambac. <sup>15</sup> Homecfunac yacyac mi febac dede Anutungo Kristo mi megboribac, “Anutungo Kristo megboriec.” imoc ikocfu hepuc amma debing dede Anutuac dedekperagingic ikoha ambing.

<sup>16</sup> Ni monggoc deba, homecfunac yacyac mi febac Kristo yeng homecfunac naric mi gborima yacbac. <sup>17</sup> Kristongo homecfunac mi yacbac dede ngeneac negen negensingngina imoc uaya kpac ambac nga ngeni kopocsicnginagoc kecbau. <sup>18</sup> Nga ngicngac goa yeni Kristogoc kpeketahema kecma bic homegeg, yeni bic sufuma kpac ambau. <sup>19</sup> Nga nenang yaguc kecma Kristoac amma kekecseri menide, imoc negensima kecdimbe, imocac ngicngac yeni neneac ubamangangtoa naric negembau. Nga ngicngac sasawa feracyunuma ebicninagoc kecbing. Nga imoc fora mi ande.

<sup>20</sup> Foracngoc, Kristongo homecfunac gborima yarec. Ye homecfunac yacyac imocac buma heima ngicngac homemea yeni waraiyemmema homecfunac gborima yarec. <sup>21</sup> Ngic mocngungo homecac sing meecac homec fingerec. Imocac amma ngic mocngungo ifingoc sing meu homemea yeneng homecfunac gborima yacgecde. <sup>22</sup> Ngicngac sasawango Adanggac amma homec meficgegeg yeni sasawango ifi isocngoc Kristoac amma gborigecde. <sup>23</sup> Amma ngicngac nenang tembus tembus arenggoc yacnide. Kristongo waraima yarec amma yeng kecma monggoc haude, naso imohai yeac arengfora yeni gborima yacgecde. <sup>24</sup> Ifi fingecmanu naso wisickeude. Yeng imohai kia gawamang nga sasawa kucnginagoc bangecfu nga sawau kecdae, yeni meicyunudaru kpac anggeg eucererenga Anutu Manggacac mariu faiude. <sup>25</sup> Kebu ye ngictau kecmanu Anutungo ngabafora sasawa hania bageau faiyunuude.

<sup>26</sup> Ifi faiyunuma ngabaya wisic wisickea, imoc kpara homec, ye meickeu kpac anude. <sup>27</sup> Nga “Anutungo wiac sasawa yeac haniaac bageu bic faidarec.” (*Mitiyegeg 8:6*) Amma “Wiac sasawa.” imoc yeac haniaac bageu faiec, imoc deu nenang yofi ireckebisina, Anutu ye yengenaoc Kristoac bageu mi faiemec. <sup>28</sup> Yeng wiac sasawa Kristoac bageu faiu Medacngo Manggacac bageu faiemema kefude. Nga Manggacngo wiac sasawa Medahaac bageau faidarec, ye yengenaocngoc kecma ngicngac sasawa yeneac oruha anude.

<sup>29</sup> Ngicngac goa yeni homemea memefic ayemmegecdeac negensima doku nadzicandae. Homecfunac yacyac mong mi febac dede faka imoc uaya kpac ambac. <sup>30</sup> Uanaac amma ngic yeni nasosoc nubesonga angandae. Nga homecfunac yacyac mi febac dede ni uaac fakana sicsauc ambac. <sup>31</sup> Kebunina Yesu Kristoac amma tosofocna ngeneac amma wenacsoc homeanduae, fora. <sup>32</sup> Ni Efeso amau wasaiyang yenigoc ewekpekpe anai. Amma ni ngicngac sicsauc kecdae, yeni isoc kecbai ewekpekpena imocac fora mong mi fingeru yofi debai,

“Homecfunac yacyac mi feudeu nenang yaguc nenedoku naric nema wereckenu homedacnide.” (*Yesai 22:13*)

<sup>33</sup> Ngic yeneng ikocfu wangecngunubauac ngeni henghomema kecbisia. Manganameme yenigoc kecnideu imocngo fakanina gombunga memangaude. <sup>34</sup> Ngeni ubasufu yoac wama sing dindingac modacma kopocsic mong mi meficgebisia. Ngenearunac goango Anutu mi negemmidae, imoc gameagoc anu edengunuduae.

<sup>35</sup> Goa yeneng ine yofi kpesigecde gedang, “Homemea yeni dafugeng gborima yacgecde nga sebi dafia mema yacgecde?” <sup>36</sup> Ge ngic ubafong yombong. Wiac homecannec, imoc eng mi nemonggeande, kpac. Wiac esea homeu gboriango kekehagoc ereude. <sup>37</sup> Amma gbome homecannec, imoc foradzuamagoc kpac, imoc eng homecnade. Imoc wit gbomea me gbome goa homecnade socngina mocgu ande. <sup>38</sup> Nga Anutungo songea modacma gbome mocgu mocguac siriha modacma foradzuama miande. <sup>39</sup> Sebinina sasawango siriha mocgungoc mi ande, kpac. Ngic nenang sebinina siriha mong nga yangkposi yeneac mong amma neng yeneac mong nga kondungyang yeneac mong. <sup>40</sup> Amma kurumenggac sebi nga bangecac sebi, yeri siricngira mong mong andape. Kurumenggac sebi ye yengena kibikperagiagoc nga bangecac sebi imoc yengena mong. <sup>41</sup> Wenacac kperagi imoc yengena siriha mong nga afoac kperagi imoc yengena siriha mong amma asomenggac kperagi, imoc yeni siricngina mong ande. Amma yeni kperaginginaac siriha tembus tembus ande.

<sup>42</sup> Homecfunac yacyac, imocac siriha ifinoc fede. Ngic sebingina bangecfu faiandimbe, imoc pereckema dzamema kpac anude. Nga Anutungo imoc monggoc megboriu imocngo fekengkebesande. <sup>43</sup> Fareng ye kpauema homuna fiu bangecfu tonggoni, imocngo kibikperagiagoc amma gborima yarude. Wiac kucmama anu bangecfu homecni, imocngo kuhagoc nemonggema yarude. <sup>44</sup> Ngic sebingina tonggoandimbe, imoc sacfusigoc nga Anutungo sebingina megboriude imoc asugoc. Sebi ye sacfusigoc feudeu asu sebi ifingoc feude. <sup>45</sup> Imocac yoac yofi oho ohoya fede, “Adang warac warac, ye ubaongayagoc nga kekehagoc fingerec.” (*Fingec fingec 2:7*)

Fingeru Adang wisic wisickea, ye asu kekeha nemmeude. <sup>46</sup> Asu sebi ye waraima mi haec, kpac. Sebi sacfusigoc yeng ine hanahema hamanuguc asu sebi ye ngade haec. <sup>47</sup> Ngic waraima haec, ye bangecngo memea bangecfunac fingerec. Nga yeac ngadeau haec, yeng kurumennunac haec. <sup>48</sup> Nenang ngic bangecngo memea, ye isoc kecdimbe. Nga kurumenggac ngic kecde, ye isoc kurumennu kecbesandimbe. <sup>49</sup> Nenang bangecngic yeac siric meing, ifi isocngoc kurumenggac ngic yeac siric mema kecbesandimbe.

<sup>50</sup> Tosofocna, sebi sacfusigocngo Anutuac eucererenggac maridzoming naric mi meude, kpac. Wiac pereckema dzameude, imocngo wiac fekengkefudeac maridzoming ifingoc naric mi meude, imocnoc edengunuduae. <sup>51</sup> Yoac mong sufu sufuya fede, imoc dekperagiba negenggec, nenang sasawa mi homemina Kebungo homemea yenigoc nenahafoc sasawa heimerennunuu siric mong andacnide. <sup>52</sup> Imoc yofiac, trampet wisic wisickea imocac nasoyau trampet mongngo arohomanu wiac sasawa bic yombong piratac heiande me kicparac kpouandimbe, ifi isoc fingerude. Yeng ngicngac bic homegec, yeni megboriyunuu yeni yacma kekec dzonggo dzonggoya kpac megecde. Ifi fingecmanu nenang ifingoc heimerennunuu siric mong annide. <sup>53</sup> Anutungo wiac hoac hoaea nga homemea ye kekec dzonggo dzonggoya kpac ngakpi isoc heimiude. <sup>54</sup> Nga Anutungo wiac hoac hoaea nga homemea kekec dzonggo dzonggoya kpac ngakpi isoc heimiude, yoac yomoc mitikibiu oho ohoya fede, imoc fora fingerude,

“Kekecngo firang amma homec gbokou kpac anec.” (*Yesai 25:8*)

<sup>55</sup> “Homec ge firang monggoc mi annade, waega imoc kpac anec.” (*Hosea 13:14*)

<sup>56</sup> Homecac waea, imoc kopocsic nga kopocsicac kuc imoc dedeseriyoac.  
<sup>57</sup> Nga Anutungo sing meficgenemmeu nenang Kebunina Yesu Kristoac amma firang angkecdimbe, imocac Anutu ubangerec ammidimbe.  
<sup>58</sup> Tosofocna, Kebuac ua meandae, imoc sicsauc mi meandae, ngeni imoc negendae. Ngeni imocac Kebuac ua mi wabisia, kpac. Ngeni nasosoc seria namma imoc mekecbisia.

## 16

<sup>1</sup> Kpetiac areng Yerusarennu kecdae, yeneac amma hiedzo yofinenggac kpedzucnekecdimbe, imocac yoac yofi deba, ni Garata kpebung edekpou ayemmeai, ngeni imocngoc ambisia. <sup>2</sup> Ngeni sondasoc tembuc tembuc dzongina ereandesoc, imohacnac tosea hendzicma amanginau faigec tacbeso. Ifi anggec ni habade, naso imohai kpekedzucac uatoa mi menide. <sup>3</sup> Ngeni ifingoc ngic goa meisingyunugec nga neng hama Yerusarennu ubangerec hiedzo nga ngic kibinginagoc naric sueyunubade. <sup>4</sup> Nga negemba naric kekenggac siric anu ni ifingoc yenigoc nenahafoc kennide.

<sup>5</sup> Ni Makedonia kemmaguc ngenearu sing habade. Nocac ni Makedonia prowins ferecgemaguc habade. <sup>6</sup> Hama ngenigoc tacba wisickeu noboc me noboc kembade. Uaac titinga fingeru ngenigoc naso herea isoc kecbade. Naric anude isoc nomang naso hafoangoc kecbade. <sup>7</sup> Ni yofinenggac ngenearusing eng ferecgema kembadeac mi anende. Kebungo negemmanu hama naso herea isoc ngenigoc kecbadeac ine negensiduae. <sup>8</sup> Amma Efeso bangecfu kecbare Pentekos naso wisickeu monggoc wama kembade.\* <sup>9</sup> Yomohai ua kuneng yombong mebadeac sing sarima fede. Nga ngabafocna homac yomohai ifingoc kecdae.

<sup>10</sup> Timoteongo ngenearu haudeu ye negengyohoha kpac botucnginau kefudeac areng faibisia. Ye ni isoc Kebuac ua mema kecd. <sup>11</sup> Ngenearunac mongngo ye mi ngadehebeso. Ye monggoc nearu dzigeneudeac deu ngeni singa meefaima ruaegoc suegec habeso. Ni nga negen negensinggoc tosofocnina neni yeac tomak kecnide.

<sup>12</sup> Ni Aporo homac igockema yofi negenai. Yeng kpebunggac areng goa yenigoc ngenearu habeso. Amma ye bic haudeac mi ammiac. Ngade kecma titinga mong fingeru naric haude. Yeac ifi deduae.

<sup>13</sup> Ngeni garengemema efaima kecma negensinggema serima nambisia. Ngeni ngic siric amma seserigoc kecbisia. <sup>14</sup> Amma ngeni hoangemema heresongogoc wiac sasawa ambisia.

<sup>15-16</sup> Stefana nga arengfora yeneng Akaia bangecfu hanahema uaac buma heima ubamereng anggec. Yeni ubamereng amma hanahema kpebung kpetiac meficngunugec, ngeni ngicngac imoc negengyunudae. Tosofocna, igocngunuma yofi deduae, ngeni ngicngac ifia nga goa yenigoc kecma uatoa mema kecandae, yeneac yoacngina modachisia. <sup>17</sup> Stefana nga Fortunato amma Akaiko, yeni ngeneac tatic mema nearu hagecac amma ubangerec negenduae. <sup>18</sup> Amma yeni neac ongaasu nga ngeneac ongaasu momoc midigec ngereeing, imocac ngeni ngic ifia ewehiyemebisia.

<sup>19</sup> Asia prowins manau kpebung fekendae, yeneng wenacngerecngina faigec ngenearu hade. Nga Akpira amma Priska, yereac amau kpebung kpedzucneandae, yeni Kebuac kpacfu wenacngerecngina suegec ngenearu

\* **16:8:** Pentekos imoc ifingoc Yuda yeneac hombang mong.

hade. <sup>20</sup> Amma negen negensinggoc tosofocnina sasawango wenacngerecngina suegec ngenearu hade. Ngeni titikokoc kpetiac angemema wenacngerec angemebisia.

<sup>21</sup> Ni Paurongo wenacngerecyoac yomoc neanna marinango ohongemmeduae. <sup>22</sup> Mong ye Kebu heresongogoc mi hoanggeudeu sowecngo yeac witiu febeso. O Kebu, ge hana.

<sup>23</sup> Kebunina Yesuac wosoefacngo ngenigoc febeso. <sup>24</sup> Ngicngac Yesu Kristogoc kpeketahema kecdae, songonango sasawa ngenearu febeso. Imoc fora.



## Paurongo Korinti Kpebung Yeneac Ngadekibi Ohoec

<sup>1</sup> Anutungo Pauro negennenu Yesu Kristoac aposoro anduae. Ni nga tosonina Timoteo, nereng kibi yomoc Anutuac kpebung Korinti taonnu kecdae nga kpetiac areng sasawa Akaia bangecfu kecdae, ngenearu faidipe.

<sup>2</sup> Mannina Anutu nga Kebunina Yesu Kristo, yereac danggunuc nga ruaengo ngenearu febeso.

<sup>3</sup> Nenang Kebunina Yesu Kristo, yeac Anutu Manggac kenehebisina. Yeng Manggacnina amma ye nanggac ubia manganeande. Ye Anutunina amma memeseri hafoangoc, imocac mingina. <sup>4</sup> Nenang ebic sasawau kecni yeng meserinunuande. Imocngo meefainunuu nenang yeac memeseri mema ngicngac ebicnginagoc yenearu kemma meseriyununide. <sup>5</sup> Kristongo kpendzeng kpeec, nenang kpendzeng ifia ebirangoc kpeandimbe, imocac Anutungo Kristoac amma ebirangoc meserinunuande. <sup>6</sup> Ngeni memeseri megecde nga komoc kpegecdeac ebic tofohoandimbe amma meseringunuideac Anutungo meserinunuande. Ifi meseringununi ngeni ebicnginac serima nanggecde. Ngeneac ebic nga neneac ebicngo siricngira mocgu andape. <sup>7</sup> Nenang nenahafoc ebicnina medereandimbe, ifi isoc memeserinina medereemenide, imocac ngeneac negengyohoc mong mi mekecdimbe.

<sup>8</sup> Tosofocnina, Asia bangecfu nenearu ebic fingeru kpendzeng kpeing, ngeni imoc mi obohogecdeac negemma yomoc edengunudimbe. Ebic-toango memanunuma kucnina kpeu ubahereninau yofi negening, "Nenang homecac areng andimbe." <sup>9</sup> Anu Anutungo homecfunac ngicngac megboriyunuande, ye negensinggenideac yeng homecac arenunac mesinunuec. Nenang kucngo soha mi ande, ye imoc edzacnunuudeac ifi anec. <sup>10</sup> Yeng homecac arenunac mesinunuec amma ye ngade ifingoc homecac arenunac mesinunuande amma mesinunubesande, neni yeac ifi negensinggema kecdimbe. <sup>11</sup> Nga imoc fingerudeac ngeni nunumuu meficnunubisia. Nga Anutungo danggunuha nemmeude, imoc fingeru ngicngac homac yeneng hemma neneac negemma Anutu dengeregecde.

<sup>12</sup> Ngicngac yeneac kicfu nga ngeneac kicfu amma Anutuac kicfu angammemenina gombunga nga kpetiac amma kongaha kecdimbe. Amma here negen negennina kpetiac bangec yomohai ifi kecma negenni negana angkecde. Nga uba esaac negen negeng modacma botucnginau mi kecandimbe, kpac. Anutuac danggunucngo sing edzacnunu kpetiac kecec kpetofohoma kecandimbe. <sup>13-14</sup> Wiac ohongemmeandimbe, ngeni imoc sasawa osoma naric negengecgecde. Wiac oboc obohoa mong mi ohoandimbe.

Kebunina Yesu, yeac nasotoau ngeni neneac naric negensima sebingina meenggecde nga neni ifi isocngoc ngeneac negensima sebinina meennide. Yofinenggac ngeni kapiancecac negennunudae nga wisic wisickeau ngeni hafoangoc ine negennunugecde.

<sup>15-16</sup> Ni imoc negensima yofi arenggeai, neng ngenearusung hama ferecema Makedonia bangecfu kembade. Kemma monggoc ngenearu dziengema habade. Haba ngeni Yudaia bangecfu suenugecde. Ni ifi ambai dede waraima ngenearu hama dzigeneba monggoc neac amma ubangerec negembau.

<sup>17</sup> Ni imoc hanahema arenggema ngade eng kosa mi wayai. Ni “oc, oc” nga “kpac, kpac” naso socfungoc mi deanduae amma uba eseausing uana mi arengeanduae. <sup>18</sup> Foracngoc, Anutu yoacedeada modackecde nga neni ifi isoc yoac edengunuandimbe, ihai “Oc” nga “Kpac” naric mi kpeturanggenide. <sup>19</sup> Amma ni nga Siriwano amma Timoteo, neneng Yesu Kristo Anutuac Medac botucnginau dekperagingmeing, yeng “Oc” nga “Kpac” mi kpeturanggeude, kpac. Yearu oc yoacsac fede. <sup>20</sup> Anutungo wiac nemmeudeac deseriec, ye medahaac negensima “Oc” deec. Ifi deu Medahaac amma dedeseria fora fingerec nga fingeckenude. Fingeckenu Anutungo nenanggac amma kpac kuneng meude. <sup>21-22</sup> Yeng ngeni nga neni nenahafoc Kristoaru nanggenunuude. Nanggenunuu nenang ngade kurumenggac wiac menideac yeng yofinenggac Tiri Asuac kerecdokuyango nadzicnemema ubahereninau faiec. Faiu imocngo Anutuac ma anude.

<sup>23</sup> Anu Korinti amau mi hayai, imocac hania yofi, ni botucnginau demeting yoacsac debaiac imoc wama mi hayai. Dedena imoc Anutu yengenaoc negemma hepucna ande. <sup>24</sup> Nga neneng negen negensingnginaac garengtoa mi kecdimbe, kpac. Ngeni Kebu negensinggema serima nandae. Ifi namma ubangerec negenggecdeac ngeni nga neni nenahafoc ua mekecdimbe.

## 2

<sup>1</sup> Negen negennango yofi negensidua, ni monggoc ubaebic meficgengemebaiac wama mi habade. <sup>2</sup> Neng hanahema ubaebic meficgengemebadeu ngenearunac mongngo ubangerec naric mi meficgenenude. <sup>3</sup> Nga ngenearu haba goa ngeneng ubangerec meficgenengandae, imocac negemba ngereede. Ngeni ubaebic meficgenembauac kibi mong ohongem-melai. Ni ngeneac yofi negengyombonggeduae, sogac sogai nearu fedeu ngeni sasawango sogaigecde. <sup>4</sup> Ni heresongotoagoc hoangngunuduae, imoc negenggecdeac kibi ohoai. Amma herenango dehau anenu ubaebic kuneng mema kiacma kibingina ohongemmeaimoc, imocngo ebic ngenmmebadeac mi ohoai, kpac.

<sup>5</sup> Ngic ubaebic meficgenemmeec, ye ubaebic nisac mi meficgenenec, kpac. Yeng ine ngeni sasawa ubaebic meficgengemmeec. Imocac homac mi debade, imocsac deduae. <sup>6</sup> Nga ngeni homacngo ngic imoc kopocsihaac amma demeting bic ammigec, imocngo yofinenggac soha anu ifi monggoc mi ammibisia. <sup>7</sup> Yeng ubamangang ebirangoc kecma kpac ambacac ngeni ine kopocsiha wama demeseri ammima <sup>8</sup> heresongongina edzahebisia, imoc seria dema edengunuduade. <sup>9</sup> Ngeni sasawango yoacna tofohogecde me kpac, imoc negentegecbadeac kibina ohongemmeai. <sup>10</sup> Nga ngeni ngic monggac kopocsic wagecdeu neng ifingoc yeac kopocsic wabade. Nga kopocsic mong wabadeu imoc Kristoac kpacfu ngeneac amma waduae. <sup>11</sup> Satanggac faitobannu manunubacac ifi ambisia. Yeng faitobang arenggeande, imocac sirihaac mi obohodimbe.

<sup>12</sup> Anu Troa taonnu hama Kristoac siduc gombung edekpou ayemmebadeac Kebungo singa bic mesarinenec. <sup>13</sup> Hama Tito hoforaiac ongaa-sunango ruae mi meficgeu ine dekenec amma faiyunuma Makedonia bangecfu kenai. <sup>14</sup> Anu Kristogoc kpeketahema kecni Anutungo nasosoc yeac firanggac arennu hesicnunuude. Hesicnunu guruamasoc kenni Yesuac siducngo homung kerengagoc amma imocngo uaninau fingeama kenggefude. <sup>15-16</sup> Kristogoc kpeketahema kecni sebihomunnina gombunga

Anutuaru enude. Ngicngac komoc kpegecede, yeneac botucfu imocngo homuna gombunga kekehagoc amma kekec yemmeude. Nga hofeac sing modacandae, imoc yeneac botucfu ine hoachomung kpedzini imocngo homec yemmeude. Tembucnina ua imoc naric mi mebing, kpac. Kristogoc kpeketahema kecni ifi fingerude.

<sup>17</sup> Ngic goa yeni hiedzotoa kiregcyemmeudeac negemma Anutuac yoac deandae. Yeni isoc mi angkecdimbe, kpac. Anutungo suenunuu yeac negensima Kristogoc kpeketahema kecni ubaherenina dindingac femanu Anutuac yoac dekperagiandimbe.

### 3

<sup>1</sup> Neni uaninaac hania monggoc dengununide me kibi mong nanggenunuudeac ohoma ngenearu mehani obohoude, ngeni imoc bic negendae.

<sup>2</sup> Ngeni ngenaocngoc neneac kibi andae. Nga Kristongo kibi imoc ubaherenina manau bic ohou ngicngac sasawa yeneng kibi imoc osonegeng angkecdac. <sup>3</sup> Anu neni ngenearu ua meni ngeneng Kristoac kibi andae, imoc didiu bic fingctegerec. Amma kibi imoc pengdokuyango mi oho ohoya, kpac. Anutu kekehagoc yeac Asungo ine kibi imoc ohoec. Nga ye imoc tafebisic hocngo memea, imohai mi ohoec, kpac. Imoc ine ngicac sebifusiac tafeu ngicngac ubaherenginau oho ohoya fede.

<sup>4</sup> Yesugoc kpeketahema kecma yofi negensidimbe, Anutungo uaya nanggema garenggeude. <sup>5</sup> Nga neni yofi negemma naric mi debisina, "Neni naric nenaoc ua imoc menideacsoc andimbe." kpac. Ua menideac kuc, imoc Anutuarunac hanemmekecede. <sup>6</sup> Yeng meserinunuu dzadzahac gboriaac kingangkpeke kecnideac. Imoc dzadzahac Mosengo ohoec, ifi isoc kpac. Asungo dzadzahac imoc ubaherenginau ohoec. Amma dedeseriyoacngo yoacfu fainunuu homenide nga Asungo ine kekec nemmeude.

<sup>7</sup> Anutungo dedeseriyoac imocac kibi hocfu ohoec. Yoac imocngo homec meficgenemmec amma sifu kuc nga kibikperagiagoc haec. Moseac kicmesuya kperagiua Israe ngicngac yeni kicmesuyau kic figecdeac osigec. Ngade ine kuha maec. <sup>8</sup> Moseac ua areng imoc kuc kibikperagigoc hanahema kuha maecac amma Tiri Asuac ua arenggac kuc nga kibikperagiango wiac imoc monggoc feraheude. <sup>9</sup> Ua arengngo yoacfu fainunuande, imocngo kuc kibikperagiagoc anecac amma ua areng sing dindingac meficgenemmeude, imocac kuc kibikperagiango monggoc ferahade. <sup>10</sup> Ifi anu kuc kibikperagia engenatoa imocngo kuc kibikperagia warac feec yeac kuc memaude. <sup>11</sup> Wiac kuc kibikperagiagoc haec, imocac kuha bic mama kpac anec, fora. Nga wiac feengkefude, imocac kuc kperagiango wiac ifia monggoc ferahaude.

<sup>12</sup> Anu wiac feengkefude, imoc negensima kengeha kpac ua mekecdimbe. <sup>13</sup> Moseac kicmesuyaac kperagia, imocac kuha mamamu ye yofi negemma kicmesuya kporucngo kperahaec, "Israe ngicngac faka imoc mi hembisia." Nga neneng ine ifi mi angandimbe, kpac. <sup>14</sup> Yeneac negen negeng ine fonggou ifi anec. Nga yofinenggac kpou kpoufocngina dzadzahac esaac yoac osoyemmeandae, imohai kporuc imocngangoc seria namma negen negengngina hedzickekecede. Anu ngic yeni Kristogoc kpeketahegecdeu kporuc imoc meicmeicka anude. <sup>15</sup> Oc, yofinenggac kpou kpoufocngina Moseac yoac osoyemegec kporuc imoc ubaherengina hedzickekecede. <sup>16</sup> Nga ngic mong ye ubamereng amma Kebuaru kenudeu kporuc imoc meickema kpac anude. <sup>17</sup> Kebu ye Asu amma Kebuac Asungo ngicfu kefu ngic ye witiha kpac kefude. <sup>18</sup> Nga nenang sasawa kicmesunina kperaha

kpac kecni Kebuac kuc kibikperagingo kicin nau wiking isoc heimerenu yeac onga annide. Amma yeac kperagingo kekecnin nau yadima saheude. Kebu ye Asu amma Asungo uaya meu faka imoc fingerude.

#### 4

<sup>1</sup> Anutungo wosoefahaac amma ua areng ohoaimoc, imoc nemmeec. Imocac amma kucmama mi angandimbe. <sup>2</sup> Neni faka sufu sufu gameagoc sasawa bic wadacma dekerec naric mi angemmenide. Amma Anutuac yoac mereng kpereng amma naric mi edengununide, kpac. Yoac fora didiufingectegerudeac neni Anutuac kicfu yoara deni ngicngac sasawa here negen negengngin nau naric ireckegecde. <sup>3</sup> Nga siduc gombung deandimbe, imoc goa yenearu sufu sufu anude isoc. Ngicngac imoc yeni hofeac sinnu kemegecde, yenearu ifia fingerude. <sup>4</sup> Kristo ye Anutuac onga nga yeac siric. Anu bangec yomocac nemu Satang, ye ngicngac mekundungkpeyunuu negen negensingngina kpac kecdac nga yeni Kristoac siduc gombungngo ngicngac mekperagiyemmeande, imoc mi henggecdeac kicpisc anggec. <sup>5</sup> Kebu Yesu Kristo dekperaginide nga neni nenang mi dekperagiemeandimbe, kpac. Yesuac amma ngeneac kingangkpeke amma kecdimbe. <sup>6</sup> Anutungo yofi deec,

“Kundununac kperagi fingecna.”

*(Fingec fingec 1:3)*

Anutuac yennoc ubaherenina mekperagikecde. Amma Kristo ye Anutuac kuc nga kibikperagia negentegecde, negen negentegec imocngo yeac kicmesuyaunac hama ubaherenina mekperagiude.

<sup>7</sup> Nenang enang isoc kecdimbe. Anutuac kibikperagia imocac kuha engena nga imoc dzofinac isoc ubaherenin nau faifaia fede. Dzofinactoa imoc yearunac haande nga ngicngac yeni imoc negentegecgecdeac yeng imoc ubahereninaac enannu faiec. <sup>8</sup> Anu ebic hania haniango noboc noboc igocnunuaude, imocngo ine mi dzenunuaude. Nga faka nga uaninaac gagabuma mi ukuni kpeande. <sup>9</sup> Ngic yeneng kporacnunumagec Kebungo naric mi wanunuaude. Yeni nunugec manunuu sifu mi kpac angandimbe. <sup>10</sup> Yesuac kekec sebinin nau fingectegerudeac amma neni Yesuac homec sebinin nau tofohoma mekecdimbe. <sup>11</sup> Yesuac kekecngo bangecsebinin nau fingectegerudeac ngicngac yeni nasosoc Yesuac amma sebinina homecac arennu faigece. <sup>12</sup> Nga homec ye nenearu ua ifi mekecmanu kekecngo ngenearu ifingoc uaya mekefude.

<sup>13</sup> Yoac mong yofi oho ohoya fede,

“Ni negen negensinggoc kefaia ebicnasou ifingoc negensinggumangoc kefaia, imocac amma deduae.”

*(Mitiyegec*

*116:10)*

Anu neni ifingoc negen negensinggac Asugoc kecima negensinggema yoac dekecdimbe. <sup>14</sup> Anutungo Kebu Yesu homecfunac megboriec, yennoc Yesugoc homecfunac megborinunuma neni nga ngeni nenahafoc menunuma yengena hoannu fainunuu nannide, imoc negendimbe. <sup>15</sup> Wiac sasawa imoc ngeneac amma fingerude. Nocac Anutuac danggunucngo torokpeu torokpe ngicngac yenearu hakefu ngicngac homac yeneng ubangerec ebirangoc negemma Anutuac dengeregecde.

<sup>16</sup> Sebininango kucmama meficgema kpac ambeso anu Anutungo sifu ubaherenina wenacsoc heigborinemmekecde, imocac nenang ubanina mi maude. <sup>17</sup> Anu ebic nga kpendzeng kpeandimbe, imoc naso wegenanacsac feude, imocngo wiac kuneng mi ande. Imocngo ine sinnina meu kekecseriac

kuc nga kibikperagia engenatoa menide. <sup>18</sup>Wiac kicngo hengandimbe, imoc nasoya hau kpac ambesande. Nga wiac kicngo mi hehena, imocngo fefeseri feude. Imocac wiac kicngo mi hehena, imohaigeng kicnina fima kecdimbe nga wiac kicngo hengandimbe imoc wanide.

## 5

<sup>1</sup>Neni yofi negendimbe, sebininaac bedzo yomoc, imoc bangecfu bedzoac onga ande. Amma imoc dzamema barackeu Anutungo amanina mong maringo mi memea kurumennu bic fainemmec. Ama imocngo fefeseri amma feengkefude. <sup>2</sup>Ifi anu, nenang seabedzonina\* yomohai kecmina asoringa anemmu kurumenggac ama heinemmeu kemeudeac songotoanina ande. <sup>3</sup>Yeng imoc heinemmeu kemeudeu senggang mi nannide. <sup>4</sup>Nga nenang bedzo yomohai kecma asoringa ebirangoc anemmu imoc hesinideac mi anemmeude. Kekecngo ine homec gbokoudeac negemma ye sebi gboria witiau heiu kemeudeac anemmede. <sup>5</sup>Anutu yengenaoc kekec imoc menideac mengersenunuec, yennoc Tiri Asu nemmeu imocngo dzadzahacac dzicznina.

<sup>6</sup>Nga sebingo amanina anu ihai kuric kecma Kebutoc araing kecdimbe, nenang ifi negemma ubayohoc mi kecnode. <sup>7</sup>Nenang yofinenggac yoara negensingema fora kicngo mi hengandimbe. <sup>8</sup>Ifi kecma negengyohoha kpac kecnode. Nga singa febac dede neni bancegsebinina yomoc naric wama Kebuaru kemma amanina gboriau kecbing. <sup>9</sup>Imocac yofi negenseridimbe, edi yegoc me yei kecni ubea ngereudeac nenang enara tofobobisina.

<sup>10</sup>Nenang sasawa Kristoac ising isinggac tatahau kembisina. Kenni yeng naso imohai faka nga angammemenina gombunga nga mangana angkefing, imocac turunga kpounemmeude.

<sup>11</sup>Kebu ye damuyagoc, neni imoc negendimbeac kengecunude. Imocac amma ngicngac kpedziyununideac uatoa mekecdimbe. Nga Anutungo hanianina didiu bic faima hemma negende. Anu ni negemba ngeni ifingoc here negen negengnginau hanianina naric ireckebisia. <sup>12</sup>Ngeni heitainunugecdeac uaninaac hania monggoc dema mi edengununide. Goa yeni hama sebingina meenggec ubaherenginango fora mi meficgeande. Ngic ifia hagec yofi naric edeyunubisia, "Neni Pauro nga Timoteo amma Siriwano yeneac negenni engena ande." <sup>13</sup>Ngeni ubasufu denemmegecdeu imoc neni Anutuac negemma andimbe. Nga negen negentegecgcoc kecnodeu imoc ngeneac negemma angkecdimbe.

<sup>14</sup>Ngic mocgungo ngicngac sasawa donina mema homeec. Nga neni sing imohaingoc sasawango homedaring, ifi negendimbe. Imocac amma Kristo heresongogoc hoanggema ua mekecdimbe. <sup>15</sup>Kristongo ngicngac sasawa neneac amma homeec. Nga ngicngac kecdimbe, neni nenanggac kekecacsac negemma monggoc mi kecbisina, kpac. Nenang Kebuac amma kecbisina, nocac yeng nenanggac amma homeu Anutungo ye monggoc megboriu yarec.

<sup>16</sup>Imocac amma yofinenggac namma emma uba esea faka wama ngicngac yeneac negenni mamea mi ambeso. Amma warac Yesuac ngictehec isoc negening, yofinenggac ine kpac. <sup>17</sup>Mong ye Kristoaru kpeketahama kefudeu Anutungo ye meficgeu gboria fingecma kefude. Kekec eseaac wiac imoc bic kpac anec nga kekec gboria imocngo fingecma feudenoc. <sup>18</sup>Imoc sasawa Anutuarunac hakecde. Kristongo turunnina kpouu Anutungo uba mocguac

\* 5:2: Ye sebinina nengu bedzo isoc ande, nasohere mi kefudeac.

faka nemmeu yegoc ruae fingerec. Fingeru ruayoac dekperaginideac ua nemmeec.

<sup>19</sup> Anutungo Kristoaru kecma bangectoa bangec yegoc uba mocgu anggecdeac faka meec. Nga ngicngac nenang yoara kpema kecminangoc yeng kopocsicnina waec. Wama ngicngac yegoc uba mocgu anggecdeac ubahereninau yoac imocnoc faiu dekperagiyemmeandimbe.

<sup>20</sup> Nenang Kristoac enacdede nga Anutungo enacnina meefaiu yeac de-sambicyoac Kristoac amma ngicngac yofi edeyunuandimbe, "Ngeni Anutugoc uba mocgu anggecdeac yegoc ruae meficgebisia." <sup>21</sup> Kristo ye yengena kopocsiha kpac. Amma yeng donina mema kopocsicac ebicfu enec. Enu nenang yegoc kpeketahema Anutuac ngicngac dindingac amma kecdimbe.

## 6

<sup>1</sup> Neni nenahafoc ua mekecdimbeac yofi serima edengunudimbe, "Ngeni Anutuac wosoefac bic megec, imoc eng kpedzonggebauac amma eden-gunudimbe." <sup>2</sup> Anutungo imocac yofi deec,

"Nasokereng anu ni kedzac kpema nunumuga negenai. Amma ni noc nasou ebicfunac mesigubadeac imocac isinggema meficguai." (*Yesaia 49:8*) Negenggec, yagucngoc nasokereng ande nga ye yofinenggac ebicfunac mesinunuude.

<sup>3</sup> Anu ye ua nemmeu ngicngac yeneng imoc demanganema ubanginango wabauac neni fakanina garenggeandimbe. <sup>4</sup> Nga Anutuac kingangkpekepora kecdimbe, imoc fakanina sasawau ngicngac edzacyunuma kpendzenu seriyombonggema kecandimbe. Amma yare witiau kecma ebic hania hania meficgema ubanina kuha mau kecandimbe. <sup>5</sup> Ngic yeni dzikacngo nunuandae nga witicamau fainunuandae amma neneac amma dzomugerec meficgeandae. Neni uatoa mekecma gaugbori kecma hereninaac homeandimbe. <sup>6</sup> Neni Tiri Asugoc kpeketahema seria namma negen negentegecngoc kecma faka kongahau nanggeemema ngicngac ogofocnina yeneac ubanina manganeu heresongo forau hoangyununide. <sup>7</sup> Anutuac kuc mekecma yoac fora dema kecec dindingac, imocngo dzikacac wiacnina angkecde nga imoc mari foininau\* mema ua meandimbe nga kanau† mema garengemeandimbe, faka imoc sasawa amma Anutuac kingangkpeke kecdimbe.

<sup>8</sup> Ngicngac goa yeneng ewehi anemmeandae nga goa yeneng deman-ganenunugecde. Goa yeneng enacfu faifai anemmeandae nga goa yeneng dengerenunugecde. Neni yoac fora deni goa yeneng imocac negemma ikoc degecde. <sup>9</sup> Ngicngac homacngo wanunuandae amma sifu negennunuandae. Neni homebeso amma sifu gbori kecdimbe. Ngic yeneng dzikacngo nunugec sifu ine mi homeandimbe. <sup>10</sup> Nga ubahodung negemma sifu nasosoc so-gaima kecdimbe. Neni makpekepa kecma sifu ngicngac meficyununi yeni kurumenggac finactogoc anggecde. Wiacnina kpac yombong kecma sifu wiacnina sasawa fenemmede. Ifi isoc kecni ngicngac yeneng hanianina naric negentegecde.

<sup>11</sup> Ngicngac Korinti taonnu kecdae, ngeneac negemma sing dindingac denide. Amma ngeneac ubaherenina kuneng yombong fede. <sup>12</sup> Nga ngeneng neneac negemma herengina dzegegec neneng sifu ngeneac amma

\* 6:7: Foininau, imocac yofi nengandae, imocngo kucgoc ewebesonga. † 6:7: Kanau, imocac yofi negengandae, imoc garengemenideac dzikac wiac amma kaso isoc ua mebeso.

ubaherenina mi dzezenide, kpac. <sup>13</sup> Nambaracfozna, ni yaguc ngeneac yofi deduae, neneng ngeneac angkecdimbe, ifi isoc ngeneng ifingoc ubaherengina hafoangoc neneac angemmebeso.

<sup>14</sup> Dindingac kekec nga singyoac kpekpe yeri yoac dedzege naric mi anecde. Nga kperagi nga kundung yeri uba mocgu naric mi anecde. Imocac ngeni ngicngac goa negen negensinggina kpac, yenigoc yoac dedzege mi ambisia. <sup>15</sup> Kristongo Beriagoc<sup>‡</sup> uba mocgu naric mi anude. Nga ngicngac negen negensinggoc yeni ngicngac negen negensinggina kpac, yenigoc negen negenggina mocgungoc naric mi anggecde. <sup>16</sup> Negenggec, Anutuac womong nga nemuonga botucngirau yoac dedzege naric mi feude. Imoc yofiac, nenang Anutu kekehagoc, yeac womong. Anutungo imocac yofi deec, “Ni amagerecna yenearu mema yenigoc kecbade. Kecma yeneac Anutu amba yeneng ngicngacfozna anggecde.” (*Sesememe 26:12; Yeremaia 32:38; Edzekie 37:27*)

<sup>17</sup> Imocac amma, “Kebungo yofi dede,

‘Ngeni yeneac botucfunac meickema wayunuma tembucngina kecma wiac mong wonongagoc mekpesere mi ambisia. Ngeni ifi anggecdeu neng hoangngunuma negengngemmebade. (*Yesaia 52:11; Edzekie 20:24,41*)

<sup>18</sup> Amma ni ngeneac Mangngina nga ngeneng neac naroang medacfozna anggecde, KEBU Kuctoa Minginango ifi dede.’ ” (*2 Samue 7:14*)

## 7

<sup>1</sup> Songo tosofocna, Anutungo botucninau kefudeac deseriec, imocac nenang wiac sasawa ongaasunina nga ubasebinina heidzadzu kpekecde, imoc dzuacmengere amma kongaha ambisina. Amma Anutu eweheiheigoc hoanggekcma kpetiac kekec kecnideac ua hanaheing, imoc mesidacma yadiseri ambisina.

<sup>2</sup> Ngeni ubaherengina meyadima hafoangoc hoannunubisia. Neni ngic me ngac mong faka mangana mi ammiing. Amma wiacngina mong ikocfu mi wangecngunuing. <sup>3</sup> Ngeni manganaac areng kecdae, imoc mi debade, kpac. Ngeni neneac heremanau kecdae, imoc bic edengunuai amma home-nide me kecnide, imoc sasawa nenahafoc andacnide. <sup>4</sup> Ni ubaherengango hoangngunuma ngeneac negemba ngereema engena ande. Amma neni ebic hania witiau kecmina ngeneng nanggenunugec, imocac ubangerec ehirangoc negenduae.

<sup>5</sup> Foracngoc, neni Makedonia bangecfu kensikeni ebic hania hania fingec-nemmeu tacyacnina gombunga mong mi fingerec. Sebiugeng ngicngac yeni yoacsisic hania hania amma ngaba anemmegec ubahereninau kengecgoc kefing. <sup>6</sup> Nga Anutungo ngicngac ubaebicgoc kecgoc meseriyunuande, yeng Tito sueu nenearu hau imocngo meserininuuec. <sup>7</sup> Amma Tito haec, imocsac kpac, ngeneng dafiu demeseri ammigec, yeng yoac imoc edenunuu ubangerec negening. Amma ngeni nenggecdeac songongina ande nga kpe-bunggac ebicac amma ubamangang andae amma ngeni dafiu neac songotoa negendae, ye imoc momoc edenunuu ubangerecna negenai.

<sup>8</sup> Kibina warac ohoai, imocngo ubamangang meficngengemmec. Ni imoc negemma naso wegenanecnac negengyohoc amma ubanango waec, yofinenggac ine ubanango mi wade. <sup>9</sup> Neng ngeneac ubangerec negemma sogaiduae. Imoc yofiac, ngeni ubahodungsac negembau imoc mi sogaiwai.

<sup>‡</sup> 6:15: Beria imoc Satanggac kpara mong.



Nga ngeneng ubamangang negemma ubamereng anggec. Ngeni Anutuac songo nga negen negeng modacma ubamereng anggec. Ifi anggecac yofinenggac kibininaac amma ebicngina fingerecmoc, imoc bic kpac anec. <sup>10</sup> Anutungo ubamangang meficngemmeu imocac ubanginango mi wabisia, kpac. Imocngo ine ubamereng meficngemmeu komoc kpegecede. Bangacac ubamangang, imocngo ine homec meficngemmeude.

<sup>11</sup> Anutungo ubamangang ifia meficngemmeu imocngo ngenearu fora yofi fingecegmeec, ngeni serima namma kopocsicfakaac kengecngunuu imoc kpebungnginaunac meickegecedeac dema ngicngac demeting ayem-megec kekecngina hafoangoc kongaha fingeru hengkecdimbe. <sup>12</sup> Ni warac kibi ohongemmeai, imoc ngic mongngo ogea memanganeeac me mangana ammiec, kibi imoc yereac amma mi ohoai, kpac. Ngeni Anutuac kicfu dafiu heresongogoc hoannunuaadae, imoc fingectegeru ngenaocongoc imoc henghomegecedeac amma ifi ohongemmeai. <sup>13</sup> Imocac amma memeseri meing. Mema torokpema yofi negening, ngeni sasawango Tito ongaasuya menomanema kuc gboria meficgemigec. Neni imoc negemma sogac sogai ebirangoc meficgeni imocngo meserinunuec.

<sup>14</sup> Ni Titoac kicfu ngeni dengerengunuma yofi edeai, ye ngenearu hama ngenenu nearu game mong mi fingerec. Neni ngenearu hama yoacnina sasawa imoc fora deing, ifi isoc Titoac kicfu dengerengununi fora fingerec. <sup>15</sup> Yeng ngeneac negemma ubeango songotoagoc hoangngunuude. Ye ngenearu hau ngeni dafiu ama heimima kengecngunuu eweheimima yoara tofohogec, ye imoc mi nigeckpeec. <sup>16</sup> Ngeni serima kecdaeac negengyohocna kpac ubangerec negemma kecduae.

## 8

<sup>1</sup> Tosofocna, Anutungo Makedonia kpebung tackendae, yeni wosoefac dafiu ayemmeec, imoc edengunubesonga negendimbe. <sup>2</sup> Imoc yofiac, yeni makpekpea kecma ebic witiau kpendzeng kpema sifu kpebung kpetiac Yerusarennu kecdae, yeneac ubangerec negemma wosoefac amma sese ebirangoc faigec. <sup>3</sup> Yeni wiac feyemmeec soha faigec. Nga neng hepucngina amba yeni imoc ifingoc ferahagec. Yeni yenaocngoc ifi arenggema anggec. <sup>4</sup> Yeni serima deigoc anemmema yofi degec, "Neni ifingoc ubangerec faka torokpema Yerusareng kpebung meficyununideac negendimbe." <sup>5</sup> ifi degec kpetea mong hanahema negensima faiing. Faini yeni imoc ferahama faigec. Ferahama torokpema Anutuac negen negeng nga songo modacma yenaoc Kebuac mariu faiemegec. Ifi faiemema nenearu torokpema ifingoc faiemegec.

<sup>6</sup> Ifi anggec, Tito ye ubangerec sese imoc faigecdeac ua ngenearu hanaheec, ye imoc mesiudeac deserima edeing. <sup>7</sup> Ngenearu wiac sasawa ebirangoc fede, imoc yofi, negen negensing nga enac dedengina fengemmede. Amma negen negentegec nga uaac songo amma neneac heresongotoa fengemmede. Ifi femanu ngeni ifingoc Yerusarenggac ubangerec sese ebirangoc naric faigecde.

<sup>8</sup> Ni yoac yomoc dedeseriyoacac siricfu mi edengunuduade, kpac. Goa yeni ua imohai faiemegecedeac songotoangina fede. Anu ngeni ngicngac hoangyunuma yeneac heresongo fora negendae me kpac imocac faitobannu faingunuduade. <sup>9</sup> Ngeni Kebunina Yesu Kristoac wosoefac negendae. Ye kurumennu finactoayagoc kecma ngeneac amma finaha wadacma makpekpea

amma kefec. Yeng makpekpea anecac ngeni kurumenggac finactoangi-nagoc anggec.

<sup>10</sup> Anu ngeni sese faigecdeac neac negen negeng torokpeba imocngo meficngunubeso. Ngeni kifa bageau ua imoc megecdeac negemma bic deserima waraima ua imoc bic hanahegec. <sup>11</sup> Ngeni hanac hanaheau efaima ua imoc heresongogoc megec, ifi isocngoc mamangkima yofinenggac uangina mesibisia. <sup>12</sup> Nga ngeni efaima kucngina fengemmedesoc sese faigec, imoc Anutuac kicfu ngereede. Nga kucngina mi fengemmedeu imoc yoara kpac. <sup>13</sup> Ngicngac goa yeni ebicngina kpac kegecde nga ngeni ebicngoc kegecde, faka ifia mi ngereede, kpac. Ngeni siricngina mocgu amma kegecdeac deduae. <sup>14</sup> Ifiac amma naso yofinenggac ngenearu wiac homac fede, imocac nobohango ngicngac wiac monggac obohodae, yeni meficyunuude. Anu ngade kecma ngeneng wiac monggac obohogecdeu, imohai yenearu wiac homac feude, imocngo ngeni ifingoc meficngunuude. Ngeni ifi amma siric mocgu kegecde. <sup>15</sup> Imocac yofi oho ohoya fede,

“Ngic wiac homac meec, yeng semengtoagoc mi anec nga efeanec meec, yeng wiac mong mi hoforec.”

*(Makekeng 16:18)*

<sup>16</sup> Anu neni ngenearu ubangerecogoc ua meandimbe, ifi isocngoc Anu-tungo Titoac ubea midiu ye ngenearu uaya ubangerecogoc mekefec, imocac Anutu dengereduae. <sup>17</sup> Ye ngenearu ua meudeac ubea bic faiu mesirimini yeng songotoa negemma ngenearu haec.

<sup>18</sup> Anu tosonina mong, ye siduc gombang deu kpebung sasawa fekendae, yeni yeac negenggec ngereeande, ye Titogoc sueni yerahafoc haecde. <sup>19</sup> Kebungo kpac kuneng meudeac negemma neni Yerusarenggac ubangerec sese garenggeckdimbe. Kpebung yeneng ngic imoc meisinggegec yeng nenigoc sese Yerusarennu mekennide. <sup>20</sup> Nga hiedzo imoc dafi garenggeckdimbe, ngic mongngo imocac ngadeyoac debacac neni nenahafoc mekennideac songonina ande. <sup>21</sup> Kebuac kicfu nga ngicngac yeneac kicfu momoc faka dindingac anni ngereeu. <sup>22</sup> Nga neni tosonina mong yerigoc sueyununi kenggecde. Ngic imoc ye ua hania haniaac songotoa negengande, neni naso homac imoc henni ubanina ngereec. Yeng ngeneac negenu engena ande.

<sup>23</sup> Anu ni Titoac yofi deba negenggec, ye ua ogona anu neri ngenearu hade nenahafoc ua meandimbe. Nga ngihoc yeri kpebunggac aposoro kecma uangirau Kristoac kpac miacandape. <sup>24</sup> Imocac ngeni kpebung kicnginau songongina edzacyunuma heresongogoc hoangyunubisia. Ifiac amma neneng ngeneac negemma dedengerecyoac deing, imocngo ikoc mi ambeso.

## 9

<sup>1-2</sup> Ni kpetiac areng Yerusarennu kecdae, yeni meficyunugecdeac ohongemmeduae. Ngeni ua imoc megecdeac bic efaigec, imoc negenduaeac kibi yomohai yoac imoc naric wabaiacsoc. Nga Makedonia yeneac kicfu ngeneac yofi dengerengunuanduae, “Tosofocnina Akaiac kecdae, yeni ua imoc megecdeac kifa bageaungoc bic efaigec.”\* Anu ngeneng wiac yemmeyemmeac wosoefac meficgegec yeneng ngeneac siduc imoc negemma herengina yaru yeni ifingoc ambesonga negensigec.

<sup>3</sup> Anu neneng dengerengunuung, imocngo fora kpac ambacac tosofocnina imoc sueyunuduae. Yoac bic deai, ngeni ifi isoc memefic anggecdeac efaima

\* 9:1-2: Korinti taong imoc Akaiac prowinsiu feec.

kecbisia. <sup>4</sup> Anu kecma habeso deba Makedonia ngic goango nigoc hagec ngeni ua imohai mi efaigecdeu imoc ngenenggec neni nga ngeni momoc gamekpekpe ambinggac. <sup>5</sup> Imocac amma neng tosofocnina edeyunuba yeneng warainemma hama kembisia, ifi negenduae. Yeni hama meficngunugec ngeneng ubangerecac wiac faigec kenudeac bic deserigec, imoc mengerema kpedzucne fai ambisia. Nga ngeni ubaebiha kpac ubangerecgoc sesengina faigecdeac tosofocnina sueyununi hadae.

<sup>6</sup> Ngic mong ye yaka efeanec semeng uau homerude, yeng fora efeaneacsac meficgeude. Nga mong ye yaka ebira homerude, yeng fora ebirangoc meficgeude, ngeni imoc negensibisia. <sup>7</sup> Mong ye ubangerecgoc ngicngac wiac yemmeu Anutungo yeac heresongo negenude. Imocac ngeni negengyohocfu me ngicngac goa yeneac hodzinnu wiac ngicngac yemmegecde, imocngo mi ngereeude. Ngeni ine tembuc tembuc ubanginau wiac mong bic negenserigec, imoc yemmebisia. <sup>8</sup> Ifi anggec kpekpedzuc ua gombunga hania hania fingeru Anutungo meficngunukefu wiac fengemmekefude nga ngeni nasosoc imohai wiac homac faigecdeacsoc anggecde. Anutungo nenesemengngina nga dzongina keneheu wiacngina ebirangoc nasosoc fekefude. Ifiac amma ngeni sesenasou sasawango sesengina naric faigecde. <sup>9</sup> Imocac yofi oho ohoya fede,

“Ye songea modacma wiac mederema ngicngac makpekpea yemmeude. Yeac faka dindingac, imoc nasoya nasoya feengkefude.” (*Mitiyegec 112:9*)

<sup>10</sup> Anutungo komoc meficgeu ua mingina ye imoc homerude. Amma semenga ifi miande, yeng ngeneac komoc ifingoc meficgema semengngina ebirangoc mesaheude. Nga ngeneac fakangina dindingac, imocac fora torokpe torokpe homac amma kenude.

<sup>11</sup> Ngeni wiac hendzicma ngicngac ebic hania hania fingecyemmeu yeni ubangerecgoc wiac yemmegecdeac amma ngeneac wiacngina homac fingerude. Ifi anu neni ubangerecac wiac imoc ngicngac yemmeni yeni Anutu dengeregecde. <sup>12</sup> Ngeneng memefic ua imoc mema, imocngo kpetiac areng wiac monggac obohoda, yeni meficyunugecde. Imocngo sebinginasac mi meficgeude, kpac. Imoc ifingoc Anutuaru dedengerec ebirangoc meficgeude. <sup>13</sup> Ngeni memeficac ua imoc memagec Yerusareng kpebung yeni enac tofoc tofohongina henggecde. Ifi henggec ngeni Kristoac siduc gombung hoanggema yenigoc nga ngicngac sasawa yenigoc haring meandae, yeni imoc negemma Anutu dengeregecde. <sup>14</sup> Nga Anutuac wosoefac ebirangoc ngenearu fedecac yeni ngeneac amma numugecde nga ubaherengnango ngeneac angkecde. <sup>15</sup> Anutungo wosoefacfu wiac nemmeande imoc wiac engena anu imoc yoacngo dafi debesonga obohodimbe. Neni dengereni.

## 10

<sup>1-2</sup> Ngicngac goango neac yofi deandae, “Paurongo nenanggoc yei kecma yoara yumea deande amma hereau kecma yoac seria kengeha kpac edenuuande.” Ni ngenearu haba ngic goa neac yofi deandae, “Pauro ye bangecac faka modacma uaya mekecde.” imoc yenearu yoac seria kengeha kpac naric debade. Kristo ye yumea nga ubaefacgoc nga sing imoc modacma faka angemmebadeac anende. Nga ngeni imoc wama neng kengeha kpac yoac seria edengunubadeac mi igocnubisia.

<sup>3</sup> Neni bangecfu kecdimbe, fora. Amma dzikac kpekecma bangecac faka mi modacnide, kpac. <sup>4</sup> Tebe mariku dzikacac wiac mekecdimbe, imoc bangecfunac kpac. Imoc Anutuarunac amma imoc kuhagoc anu neneng imoc mema manganaac odasongngina hembarackema negen negengngina ikoha meickenide. <sup>5</sup> Faka nga negen negeng engena sasawango Anutuac negen negeng keme kemea imoc kpekecde, neni imoc momoc meickenide. Meickema negen negeng sasawa kpehafoima dzegema Kristoac enac tofoc tofohoac bageau fainide. <sup>6</sup> Nga ngeneac enac tofoc tofohongo hafoangoc fingeru yoackpekpe sasawa imocac turunga kpounideac efaima kecdimbe.

<sup>7</sup> Anu ngic mongngo deudeu, “Ni Kristoac ngic.” Ye yengenaoc imoc negengemeu, neni ye isocngic Kristoac ngic kecdimbe. Ye ifingoc yengenaoc negengemebeso. Mongngo ifi negemmanu fakanina imoc yearu ircleuke. <sup>8</sup> Kebungo kuc nemmeec, imoc ngeni memanganengunuideac mi nemmeec, kpac. Ye meseringununideac kuc nemmeec. Ni kucna imocacsoc fede nga imoc negemba engena ande. Imocac amma gamekpekpeu mi fainugecde. <sup>9</sup> Amma kibi ohongemmeanduae, imocngo kengehagoc fingerudeac mi negenganduae. <sup>10</sup> Nga ngic goa yeneng deandae, “Pauroac kibi imoc yoac seria nga kuhagoc, fora. Anu ye hama nenangoc kecma ine sebiungoc kucmamayagoc kecma yoac deu ngicngac yeni imoc ngadehema wagecde.” <sup>11</sup> Ngicngac ifi deandae, yeni yofi negentegecbisia, neni hereau kecma yoac kibi ohongemmeandimbe nga hama ngenigoc kecma angam-memenina, imocngo siriha mocgu angkecdimbe.

<sup>12</sup> Ngic goa yeneng ine yofi deandae, “Merang botucninau kuneng kecde?” yeni imoc denegeng amma isinggeandae. Ngic ifia yeni wiac mong mi negentegecma sing segegecde. Neni yenigoc namma merang nenanggaru engena kecde, imoc naric mi debing. <sup>13</sup> Anutungo meisinnunuma uayoac nemmeu neni imoc modacma ngenearu ifingoc sikeing. Nga ma imoc ferahama sebinina naric mi meennide. <sup>14</sup> Neni ngenearu hama Kristoac siduc gombung edengunuing. Ngenearu mi habinnu uaninaac yoacsiduc imocngo sebiengeng ambac. <sup>15</sup> Nga ngic goa yeneng ua bic megec, neni ihai kemma kiwa amma engena annideac negemma mong mi meandimbe, kpac. Neni yofi negendimbe, ngeneac negen negensingngo yadiseri anu neneac ua ngenearu ifingoc yadiseri anude.

<sup>16</sup> Nga ngeneng yadiseri anggec neni ngeneac ngadeau bangec goa fekende, ihai ifingoc kemma siduc gombung dekperagiyemmenide. Ifi amma imohai ngic monggac uaac kiwa mi annide. <sup>17</sup> Nga mong ye yengenaac negenu engena angkecde, yeng KEBUAC negenu wiac engena anu so-gaibesos. (*Yeremaia 9:24*) <sup>18</sup> Anutungo ngic mong nanggeu ua meude, imocngo ngereeude. Nga mong ye yengena kuha nanggeemema ua meude, imoc naric mi ngereeude.

## 11

<sup>1</sup> Ni yoac mong mereng kpereng deba modzongina mi tibeso. <sup>2</sup> Anutungo herea gerec dzeande, ifi isoc ni ngeneac amma herena dzema kecde. Imoc yofiac, ngac mong ye ngic bingeha bic demigec kecande, neng ifi isoc Kristoaru enembingec kongaha faingunubadeac negensiduae. <sup>3</sup> Ngeneng Kristoangemaha kongaha kecma heregoc yeac songo negendae. Nga boidzocngo Ewa ikoc ammima tobangeec, ngic mongngo ifi isoc kekecngina kongaha nga Kristoac songo imocac negen negeng wangecngunubac kengecnude. <sup>4</sup> Ni fakangina mong henganduae, imoc ine naric mi ande. Neneng Yesuac

siduc dekperagingemmeing nga ngic mongngo hama imoc kpema Yesu siriha monggac dekperagingemmeudeu ngeni yeac yoac mi isinggema engsac ubangerec negemma meandae. Faka imoc naric mi ande. Ngeni Asu bic megeg, imoc wama asu siriha mong ngic yenearunac ubangeregcoc meandae. Nga neneng siduc gombang dekperagingemmeing, imoc kpema siduc gombang siriha mong deudeu ngeni imoc ifingoc mi isinggema engsac ubangeregcoc negemma megecede.

<sup>5</sup> Ni neanna yofi negenduae, aposoro ifia yeni sebingina meengandae nga ni yeneac mamea mi anduae, kpac. <sup>6</sup> Yoac dedeac kuc homac nearu mi fede, fora. Nga negen negentegec sifu soha fenende. Ngeni sing hania hania ngenearu bic fingeru henggec.

<sup>7</sup> Ni hiedzoac arennu siduc gombang mi dekperagingemmekefai. Ngeneng engena anggecdeac memameai, imocac negemba kopocsic mi ande. <sup>8</sup> Anu ni ngenearu kingang ua mebadeac kpebung goa yeni hiedzo nenggec meai, fora. Nga ngenearunac ine hiedzo mong mi meai, kpac. <sup>9</sup> Amma ni ngenigoc kecma wiac monggac obohoma ngenearunac mong ebicna mi miai, kpac. Tosofocnina Makedonia prowins, ihacnac hagec, yeni ine wiac obohoai, imoc sasawangoc meficnudacgec. Ifi anggec ni garengemema ebic mong mi ngenmeai amma mong mi ngenmebade. <sup>10</sup> Nga Kristoac yoac forau kecduaeac ngicngac Akaia bangecfu kecdae, yeneng dedengerecna imoc naric mi meickegecede. <sup>11</sup> Ni heregoc ngeneac songo negenduaeac ebic mong ngenmebeso mi anende. Neng ifi hoangngunuma ngeneac heresongo negenduae, Anutungo imoc negende.

<sup>12</sup> Ngic goa wangepngunuandae, yeni nenigoc soc mocgu ambeso amma sebingina ifingoc meembeso anggecede. Yeni ifi anggecdeac ni imoc kpae heima hiedzoac faka damoc anganduae, imoc engnoc amma kecbade. <sup>13</sup> Nga ngic ifia yeni aposoro ikoc amma ongeasac mekecma ua fora mi mema siricngina heimerenggec Kristoac aposoro siric isoc angkecdae. <sup>14</sup> Faka ifi anggecac ngeni mi kpidohobisia. Satang ye ifingoc yengena siriha heimerenu kperagiac angero, ifi isoc angande. <sup>15</sup> Ifi ammanu yeac kingangkpekpefora yeneng ifingoc siricngina heimeremma faka dindingcac ua ngic, ifi isoc anggecede nga imocngo wiac engena mi ande. Amma yeni ine kecma wisic wisickeau angammemenginaac turunga megecede.

<sup>16</sup> Anu ngeni neac yofi mi negembisia, "Ye ubea sufude." imoc monggoc edengunuducae. Amma ngeni neac ifia negendaeu ngeni sifu ngic ifia dema hoannubisia. Ifi anu neng ifingoc neanna kpacna miacma yoac kapianec debade. <sup>17</sup> Amma yoac yomoc deduae, imoc Kebuac enac modacma mi deduae, imoc ine ubasufuyoac isoc neannaoc dema kpacna miacma deduae. <sup>18</sup> Ngic homac yeneng bangecac negen negeng modacma yenang kpacngina miacgecdeac yoac deandae. Imocac amma ni ifingoc neanna kpacna miacma yoac goa debadeac negenduae. <sup>19</sup> Nga ngeni ngenaoc negen negentegecninagoc kecdimbe negendae, ngeni ubasufuyoacac songo negendae, imoc hemma kecduae. <sup>20</sup> Ngic goa yeni wanac mengunuma iwaingina wangepngunuma kpekpe patang angemmema kpacngina meenggecede. Ifi angkegcoc ngeni imoc hemma ngeni kpae mong mi heiyemmeandae, kpac. <sup>21</sup> Ifi anggec gamenu yoac yofi deduae, nenearu kucfaka ifia mong mi fede, ifi ambing dede imoc nenenggec gameagoc ambac.

Nga ngic goa yeneng kengecngina kpac kecma kpacngina miacandae, ni ifi isocngoc kengeha kpac ubasufuyoac dema kpacna miacba negenggec.

<sup>22</sup> Yeni hebiraiο ngic, fora. Nga ni ifingoc hebiraiο ngic. Yeni Israe ngic nga neng ifingoc israe ngic. Yeni Abarahangac bangecfora amma ni ifingoc yeac bangec anduaengoc. <sup>23</sup> Nga yeni Kristoac kingangkpekpefora andae nga neng imocac engena anduae. Amma monggoc ubasufuyoac isoc deduae. Ni Kristoac ua feracayunuma mekecduae. Ifi feracayunuba ngaba yeneng naso homac witicamau fainugec tarai. Tacba yeneng naso homac dzikacngo ebirangoc nugec nga naso homac homecfu heima kefai.

<sup>24</sup> Yudangic yeneng dzikacngo nugec, imoc atac faif anec. Amma nugec, imoc kpetea 40 imohacnac mocgusac meickegec. <sup>25</sup> Nga naso harebec kocbing kiai amma naso mocgu hocngo neregec. Nga naso harebec wageu kenni dokungo wageu wakeu kemeing. Amma naso monnu hadzing tofocnac mocgu kondung witiau kefai. <sup>26</sup> Ni naso homac bangeha bangeha yerecgekcma dokutoau manganebeso anai. Nga godzungic yeneng sinnu memanganenubeso anggec amma neanna arengfocna yeneng memanganenubeso anggec nga bangeha bangeha ngic Anutu mi negemmidae, yeneng memanganenubeso anggec. Nga taong goau ngic yeneng memanganenubeso anggec. Anu bangec kisiu nga kondunnu kecma ebic meficgeai. Amma ngic goa ikoc amma yofi degec, "Neni ifingoc negen negensinggoc kecdimbe." yeneng tosonina dema memanganenubeso anggec.

<sup>27</sup> Ifi anenggec sifu ua esa kpendzenggoc mekefai. Mekecma naso homac gaugbori kecma nenedoku hoforai nga naso homac wambaac osima tentenuu kefai. <sup>28</sup> Anu ebic imocsac kpac, ni ifingoc wenacsoc kpebung sasawa garengyunubadeac negemma ua ebira mekecduae. <sup>29</sup> Kpebung yenearunac ngic mongngo kuha kpac anu neng ifingoc ubaebic mebade. Nga yenearunac mongngo kopocsicfu makpeu yeac ebic imocngo hembra herenau gerec isoc dzeude. <sup>30</sup> Nga kpacna miacbeso dema kucmamanaac negemma miacbade. <sup>31</sup> Ni ikoc mong mi deduae, imoc Yesu Kristoac Anutu nga Manggacngo negende. Ye wisic wisickea kpac nasosoc dengerebesonga.

<sup>32</sup> Ni Damasko taonnu kecbare ngictau Aretaac gawanango mendannuudeac taonnu garengfora faiyunuec. <sup>33</sup> Faiyunuu tosofocna yeneng meficnuma ufcfu barinuma taonggac odaac titinnusing fainugec oda ngadeau mama yeac mariunac worayai.

## 12

<sup>1</sup> Haniana goa torokpema deba, ni kicna tegeru wiac henai nga Kebungo wiac sufu sufuya dekperaginene, imocngo ngeneac memeficngina mi ande gedang nga imoc sifu deduae. <sup>2</sup> Ngic mong Kristogoc kpeketahema kecde, ye negenduae, ye kurumeng kpetea harebec, imohai kpedzige enu yaguc kifaya 14 ande. Amma ye sebigocngo enec me sebia wama enec, imoc ine mi negenduae, Anutungo imoc negende. <sup>3</sup> Ni ngic imoc negemmiyombonggeduae. Amma yeng sebiagoc me sebia kpac enec imoc mi negenduae, Anutungo negende. <sup>4</sup> Ngic imoc ye kpedzige emma eucererennu kemma yoac goa ngicngo dedeac soha kpac, imoc kpaeyagoc nga dedeasoc mi ande, imoc henegeng anec. Imoc ni. <sup>5</sup> Ni ngic imocac negemba engena ande. Ni neanna mi miacemeduae, kpac. Ni kucmamanaacsac negemma haniana ifi dekperagiduae.

<sup>6</sup> Ni neanna miacemebadeac songona ambac imoc ubasufuyoac mi anu yoac fora debade. Amma ngic yeneng nengandae me siducna negengandae, yeni imoc ferahema dengerenubauac neanna miacemebadeac wadae.

<sup>7</sup> Kicna tegeru wiac sufu sufuya engena yombong henai, imoc negemma neanna miacemebaiaac Anutungo wae mong sebinau faiec fede, imoc Sa-tanggac angero mongngo dzikacngo nuande. <sup>8</sup> Nuw waengo sebinanac meickeudeac Kebu numumiba atac harebec bic anu <sup>9</sup> Kebungo yofi ede-nuec, “Neac wosoefacngo ge socguude. Nocac kucnango kucmama imocac kekecfu hafoangoc fingectegerude.” ifi deecac yofi negenduae, Kristoac kucngo kperacnuudeac kucmamana dekperagibade. <sup>10</sup> Anu ni ubahodung negemma ebicfu nga kucmama kecba defagoc anemma nukporac anen-gandae, ifi anenggec Kristoac amma sogaianduae. Ni kucmamagoc kecma imohainoc kucnagoc anduae.

<sup>11</sup> Ngeneng igocnugecac amma ngic kapaya isoc anduae. Ngeni ine ngenaoc dengerenubau imoc ngereebac. Imoc yofiac, ni mameanec kecbare sifu ngic aposoro engenatoa deandae, imoc yeneac mamea mong mi kecd-uae. <sup>12</sup> Ni ngeneac botucfu uana serima mekecba ngeni negensinggegedeac kucfaka hania hania nga faka mi hehena fingecngemmeu aposoro yeneac ma imoc uanau fingectegeru henggec. <sup>13</sup> Amma kpebung goa yeneac botucfu sing modarai, imoc ifingoc ngenigoc kecma modarai. Wiac mocgusac fede, ni dzofinacac arennu ebic mong mi meficgengemmeai. Imoc henggec kopocsic andeu ngeni kopocsicna imoc wabisia.

<sup>14</sup> Ngenearu monggoc habadeac efaiduae, imocngo atac harebec anude. Hama sebiac memefiac ebic mi ngemmebade. Nambarac yeneng nonggo mang yeneac wiac mi mekpedzuc anggecde, kpac. Nonggo mang yeneng ine nambaracfocongina yeneac wiac mekpedzuc anggecde. Imocac dzo-finacngina mebadeac mi habade, kpac. Ni ngenanggac amma habade. <sup>15</sup> Amma ngeneng kekecngina ngereudeac amma dzofinac fenende, imoc ubangerecgc naric meficngunuma faingemmebade. Nga imocac kpac, ni ifingoc neanna kekec hafoangoc ngeneac amma naric wabade. Ni ngeneac heresongotoa negenduae, imocac ngeni ifingoc neac songo kapia naric negembisia.

<sup>16</sup> Ni ebic mong mi meficgengemmeai, ngeni imoc yagucnoc negendae. Nga dekerecfu me ikocfu wiacngina mong mi wangecngunuai. <sup>17</sup> Amma ngic sueyunuba hagec, yeneng neac negensima wiac mong mi wangecngunugec, kpac. <sup>18</sup> Amma neng Tito ngenearu haudeac edema yegoc tosonina mong sueyuruba haoc. Hama Titongo ifingoc wiac mong mi wangecngunuec. Neri Asu mocgu nerahafoc modacemema hanititinira mocgungoc tima kecdipe.

<sup>19</sup> Neni ngenearu hama hanianina dema ngeneac kicfu men-gereemenideac dedae, ngeni imoc mi negensibisia. Tosofocna, neni ine Kristogoc kpeketahema kecma Anutuac kicfu yoac denide. Ngeni nanggengununi yadiseri anggecdeac ua sasawa menide. <sup>20</sup> Ni ngenearu hama ngenemba ngeni neac songo mi modacgecde nga ngeneng ifingoc neac mi angemmeude, imocac kengecnude. Ngeni gubekisang kecma enacfu faifai amma yoacngina deendema keracmangang nga herebu angemmema sebingina meemba yoackpekpegoc kecma uba mocgu mi kecandae, ngeni siringina ifia hembaiac kengecnude. <sup>21</sup> Nga haba ngicngac homac ngenearunac kopocsic meficgema faka wonongagoc nga sero faka mekecma sicsauc kekec mong mi wagec, imoc hemma kiac ubamangang amba Anutungo ngeneac kicfu memanubacac kengecnude.



## 13

<sup>1</sup> Ni monggoc ngenearu habeso negenduae, imoc haba nasona harebec anude. Yoac yofi oho ohoya fede, “Ngic yohockang me harebec yoacngina mocgu anudeu ngeni kopocsicmeme yoara naric isinggema foraya degecde.” *(Dedeseri 19:15)*

<sup>2</sup> Anu ni naso dzongiau hama kopocsicmeme nga kpebungtoa ngeni gorongina kpema yoac edengunuai. Nga yaguc ngenigoc tacbai ifi isoc yoac imoc hereau kecma monggoc ohongemmeduae. Ifiac amma ni monggoc ngenearu dzigene habade, imohai ngicngac goa ngeni kopocsicfunac ubamereng mi anggec, ngeni demeting seria angemebade. <sup>3</sup> Kristo ye ngenearu uaya kucmamaya kpac, yeng ua kuhagoc meande. Nga enacnau yoara deanduae me kpac imocac kpesi kpesi ngenearunac haec. Ni dzigene hama demeting angemmeba yeac kucfu yoara deanduae, imoc negentegecgecde. <sup>4</sup> Ngic yeneng ye gagabuu mariponnu kpegec homeec. Homeu Anutungo ye nanggeu yacma yaguc yeac kucfu kecde. Neni yegoc torokpema kucmama kecma yearu kpeketaheni Anutungo nanggenunuu yeac kucfu ngenearu ua menide.

<sup>5</sup> Nga ngeni negen negensinggoc kecdae me kpac, imocac ngenaoc tembuc tembuc tobangemema isingemebisia. Nga Yesu Kristongo ubaheregau mi kecdeu ge faitobannu makpenade, imoc negentegecbesena. <sup>6</sup> Nga neni faitobannu mi makpeing, ngeni imoc meficgegecdeac negensiduae. <sup>7</sup> Ngeni faka nga angammeme gombunga angkecma kopocsic mong mi meficgegecde, imoc Anutu numumikecdimbe. Neni ngicngac yeneng dengerenungecdeac ngeneac mi numuandimbe, imocac goa yeneng neneac negemmanganeandae. <sup>8</sup> Neni yoac nga faka fora naric mi kpenide, neni yoac nga faka fora nanggenide. <sup>9</sup> Neni kucmama kecmina ngeneng kucnginagoc kecgec ubangerec negendimbe. Nga ngeni Kristoac kpeteu yadiseri anggecdeac ifingoc numukecdimbe. <sup>10</sup> Anutungo uayoac nenu ni ngicngac negen negensinggoc yadiseri anggecdeac ua mekecduae. Nga memanganengunubadeac mong mi deec, kpac. Imocac ni hereau kecma ngeneac kibi yomoc ohoduae. Kecma ngenearu habade, imohai demeting yoac seria naric wabade.

<sup>11</sup> Negen negensinggoc tosofocna, ni yoac desima yofi deduae, ngeni ubangerecog kecma mengereemema meseriemema ruae meficgema uba mocgu kecbisia. Ifi anggec Anutu, songo nga ruae minginango, ngenigoc kefude. <sup>12</sup> Ngeni wenacngerec angemema titikokoc kpetiac angemebisia. Ngicngac kpetiac sasawa yeneng wenacngerecngina suegec ngenearu hade. <sup>13-14</sup> Kebunina Yesu Kristoac danggunuc nga Anutuac heresongogoc hoangemekekec amma Tiri Asugoc ureckekec, imocngo ngicngac sasawa ngenearu fekecbeso.

## Paurongo Garata Kpebung Yeneac Kibi Ohoec

<sup>1</sup> Aposoro Pauro nearunac. Ngic yeneng uayoac yomoc mi nenggec nga ngic mongngo ifingoc ua yomocac sing mi meficgenenec, imoc kpac. Imoc Anutu Manggacngo, Kristo homecfunac megboriec, ye nga Yesu Kristo yereng sing imoc meficgenenocac ua yomoc mekecduae. <sup>2</sup> Ni nga tosofocna nenahafoc kecdimbe, neneng Garata kpebung ngeneac kibi yomoc faingemmedimbe.

<sup>3</sup> Danggunuc nga ruae Manggacnina Anutuarunac nga Kebunina Yesu Kristo yearunac ngenearu febeso. <sup>4</sup> Ye Mannina Anutuac negen negeng nga songoya modacma nenang kopocsicac amma yengena kekeha waec. Ifi amma naso mangana yofinenggac kecdimbe, imohacnac meicnunuec. <sup>5</sup> Imocac amma yearu dedengerec wisic wisickea kpac fekengkecbeso, imoc fora.

<sup>6</sup> Anutungo Kristoac wosoefacfu ye modacgedeac ngeni kpacngunuec. Amma ngeni ine ye bic yombong wama kengkecma siduc gombung siriha monggac kedzac faima modackecdae, imoc hembra wiac mangana yombong anu imocac negen negengua homac mema warecngunuduae. <sup>7</sup> Amma siduc gombung siriha mong imoc mi fede. Ngic goango ine Kristoac siduc gombunggac siriha netohogecdeac ayemmu ngeneac uba mesufu angkecdae. <sup>8</sup> Nga siduc gombung neneng bic edekpou angemmeing, imoc ine neneng me kurumennunac angero mongngo, imoc netohoma siriha mong edekpou angemmeudeu ye sowecyoacac bageu kecbeso. <sup>9</sup> Nga yoac bic deing yoc monggoc deduae, ngeni siduc gombung bic negemma hoanggegec, ngic mongngo imoc netohoma siriha mong edekpou angemmeudeu ye sowecyoacac bageu kecbeso.

<sup>10</sup> Anu ni yaguc yoac deduae, imoc ngic yeneng negen ngereenugecdeac mi deduae. Imoc Anutungo negen ngereenuudeac amma deduae. Amma ngic yeneng neac negenggec ngereeuideac ua mebai dede Kristoac wanacngic naric mi kecbai.

<sup>11</sup> Tosofocna, siduc gombung dekperagianduae, negen negeng imoc ngic dedeunac kpac, imoc edengunubadeac negenduae. <sup>12</sup> Ngic mongngo deu negenai me mongngo mi kpounenec, imoc kpac. Yesu Kristo yengenaoc imoc ine kpefinnu mekperagima kpounenec. <sup>13</sup> Ni warac yudangic yeneac negen negeng arennu kecma faka anai, ngeni imoc bic negendae. Nga Anutuac kpebungfora efeu mi yunukporac ayemmema memanganeyunuai. <sup>14</sup> Nga yudangic neneac dedeseri nga fakau negen negennango yadikecma yudangicngac ogofocna yeni homac feracyunuai. Amma esangabofocnina yeneac singyoac negemma herena gerec dzeu imoc meserikefai.

<sup>15</sup> Nenggac heremanau tacbare Anutu yengenaoc meisinnuma wosoe-fahaac kpacnuec. <sup>16</sup> Amma yeng songea modacma Medaha yengenaoc mewakenuu ni Medahaac siduc imoc bangec monnunac ngicngac Anutu mi negemmidae, yenearu dekperagibadeac ifi anec. Anu ni naso imohaingoc kemma dafi ambadeac ngic goa dekpesi mong mi ayemmeai. <sup>17</sup> Amma ngic warainemma aposoro anggec yenembadeac Yerusarennu mi kenai, kpac. Ni ine Arabia bangecfu kemma monggoc Damasko dzigeneai.

<sup>18</sup> Ihai kecbare kifa harebec wisickemanu Kefa hembadeac Yerusarennu kemma uameme 15 yegoc kefai.\* <sup>19</sup> Amma imohai kecma aposoro mong mi yenenai. Ni Kebuac munea Yakobosac henai. <sup>20</sup> Yoac ohoduae imoc ikoc kpac, imoc Anutuac kicfu deduae.

<sup>21</sup> Anu imocac ngadeau Siria nga Kirikia prowinsiu kemma kefai. <sup>22</sup> Nga Yudaia bangecfu Kristoac kpebung kecdae, yeneng ni mi negennugec. <sup>23</sup> Goa yeneng yofi degec negenggec, “Ngic ye warac nunukporac anemmec, ye negen negensinggac siduc gombung memanganeecngo imoc yaguc ngicngac edekpou ayemmekecde.” <sup>24</sup> Yeni ifi dema neac amma Anutu dengeregec.

## 2

<sup>1</sup> Anu kifa 14 wisickeu ni monggoc Yerusarennu kenai. Naso imohai Banabagoc neri Tito hesickede nenahafoc kening. <sup>2</sup> Ni Yerusarennu kembadeac Anutungo kpefinnu edenuc. Ihai kemma siduc gombung bangec monnunac ngicngac Anutu mi negemmigec, yenearu sing edekpou ayemmekefai siduc imoc ngic enara degec kecgec, yeni tembuc tembuc dekperagiymmeai. Ni warac nedziai nga yaguc nedziduaengoc, uana imocngo sicsauc amma fora kpac ambacac yoac imoc dekperagiymmeai.\* <sup>3</sup> Anu Tito grikgicngo nigoc haec, ye sebi tosea herecgegecdeac enara yeneng mong mi degec. <sup>4</sup> Ngic goa tosofocnina mi andae, yeneng ine Titoac ifi degec. Yeni sing eseac bageu fainunugecdeac hama botucninau kecma Kristongo witicfunac menunuec, imocac kickitong kecdae. <sup>5</sup> Nga siduc gombunggac yoac fora ngenearu seria feudeac neneng naso monggac ngic ifia yeneac yoac bageau mong mi kefing, kpac.

<sup>6</sup> Anu ua mekecduae dema ngic enara yeneng imohai wiac mong torokpema ambadeac mi edenuc, kpac. Nga yeneng warac dafi kecgec, imoc naric mi debade. Anutungo ngic sebiacsac hemma ngicngac mi insingyunuude. <sup>7</sup> Yeneng ine faka fora yofia hemma mariu meme anggec. Anutungo Petoro ngic sebi tosangina herec herecgea yenearu siduc gombung dekperagiudeac uayoac mic, ifi isocngoc ni ngic sebi tosangina mi herec herecgea, yenearu siduc gombung dekperagibadeac uayoac nenec. <sup>8</sup> Anutungo Petoro ua kucgoc meudeac fenggemiu, yeng ngic sebi tosangina herec herecgea, yeneac botucfu aposoro ua meec. Nga ni ifi isocngoc ua kucgoc mebadeac fengenenu bangec monnunac ngicngac Anutu mi negemmidae, yeneac botucfu aposoro ua mekecduae.

<sup>9</sup> Anu kpebunggac ngic wotunga degec, Yakobo nga Kefa amma Yohane, yeni Anutuac danggunuc fenec, imoc hentegecma yeni ni nga Banaba nerigoc uba mocgu amma marinira mema yofi degec, “Ngeri bangec monnunac ngicngac Anutu mi negemmidae, yenearu siduc gombung dekperagibesera nga neneng ngic sebi tosangina herec herecgea, yenearu siduc gombung dekperaginide.” <sup>10</sup> Ifi dema yoac mocgusac yofi torokpegeg, “Ngeni ngicngac makpekpea, yeneac ebic negensibisia.” ifi degecac ni imocnoc negemma mamangkima ua serima mekefai.

<sup>11</sup> Anu Petorongo Antiokia hama sing segeec. Imocac amma ni namma kopocsic anec, imoc edeai. <sup>12</sup> Yakoboarunac areng goa mi hamagec ye bangec monnunac ngicngac yenigoc yaka nekefec. Nga ngic sebi tosangina herec herecgea arengfora goa hasikegeg, imohai ye kengec amma bangec monnunac ngic wayunuma yenigoc monggoc mi tarec. <sup>13</sup> Ifi anu yudangic

\* 1:18: Kefa imoc Petoro. Yesungo kpara mong ifi mic.

\* 2:2: Paurongo yoac heima nedzi nedziac yoac homac dede.

tosea yeni ifingoc yegoc sebimeme anggec. Nga Banabango ifingoc ikoc fakangina modacma sing segeec. <sup>14</sup> Anu yenemba, yeni siduc gombunggac yoac foraac faka mi modagec, ni ngicngac sasawa yeneac kicfu Petoro yofi edeai, “Ge yudangicnoc amma yudangic fakanina wama bangec monnunac ngicngac, yeneac faka modacannec, ge ine bangec monnunac ngic, yeneng yuda neneac faka modagecdeac fakagau edzacyununc, imoc mi ngereede.”

<sup>15</sup> Neni yuda arenunac fingering nga bangec monnunac ngicngac Anutu mi negemmidae, kopocsicmeme areng yeneanunc mi fingering. <sup>16</sup> Ngic mong ye Yesu Kristo negensinggedeu Anutungo yeac ngic dindingac demiude, imoc negendimbe. Ngic mong ye dedeseriyoac modacma kecde, Anutungo ye dindingac mi demiude, kpac. Nga Anutungo negen negensinninaac amma dindingac denemmeudeac neni dedeseriyoacac sing wama Yesu negensinggema kecdimbe. Imoc yofiac, ngicngac dedeseriyoac modacandae, Anutungo yeni ngicngac dindingac naric mi deyemmeude, kpac. Ye ngicngac Yesu negensinggema kecdae, yeni ine dindingac deyemmeude.

<sup>17</sup> Goa yeni neneac yofi dedae, “Ngeni dedeseriyoac wama kopocsic meficgedae.” Ifi febac dede Kristongo kopocsicac sing meficngemembac nga ifi kpac. <sup>18</sup> Ni wiac bic wama meickeai, imocac tataha monggoc mengerebadeu kopocsic meficgebai. Nga ni ine faka eseaac tatac monggoc mi mengerebade, kpac. <sup>19</sup> Ni Kristogoc mariponnu momoc nugec nanic. Nga Anutugoc kecbadeac amma dedeseriyoacngo kopocsicna edzacnuu Kristogoc homema yoac imoc wayai.

<sup>20</sup> Imocac amma ni neannaoc monggoc mi kecduae. Kristongo neac ubaheremanau kecde. Imocac yofinenggac kecma Anutuac Medac negensinggeba yeng kekecnau mewakenude. Yennoc heresongogoc hoannuma neac amma yengena kekeha waec. <sup>21</sup> Anutuac wosoefac ubanango mi waduae. Ngic mong ye dedeseriyoac modacandae, Anutungo ye ngic dindingac imoc naric mi demiude, kpac. Imocac amma Yesungo mariponnu homeec. Dedeseriyoac kuhagoc febac Yesungo mariponnu naric mi homebac.

### 3

<sup>1</sup> Garata ngic, ngeni negen negentegecngina kpac yombong. Yesu Kristo mariponnu kpegec nanec, ngeni imoc negentegecgecdeac kicnginau yoac soha kpoungemeing. Nga ngic mongngo ine kundunggac faka mong angemmema negen negengngina mesufuu ngeni ifi isoc kecdae. <sup>2</sup> Ngeni yofi isinggebisia, neni siduc gombung edengununi ngeni imoc negensinggema Asu megecnoc. Ngeni ine angammemenginango dedeseriyoac modagecac amma Asu mi megec, kpac. <sup>3</sup> Ngeni Asugoc kekecngina hanahegecngo yaguc ine uba eseaac uau monggoc kecdae, imoc mi ngereede. Ngeni kapafaka yombong andae. <sup>4</sup> Ngeni warac Yesuac amma kpendzengtoa kpegec. Nga yaguc ine imocac fora engsac wadae. <sup>5</sup> Ngeni Abrahang isoc Anutuac yoac negemma negensinggegecac Asungo hama kucfakaya botucnginau mekecde. Nga faka imoc dedeseriyoac mekecdaeac amma mi fingece.

<sup>6</sup> Imoc yofi fingerec,  
Abrahang ye Anutu negensinggeu Anutungo ye ngic dindingac demiec.  
(*Fingec fingec 15:6*)

<sup>7</sup> Imocac amma ngicngac Anutu negensinggema kecdimbe, nenang Abarhanggac medacfora, ngeni imoc negentegecbisia. <sup>8</sup> Nga Anutungo bangec monnunac ngicngac, yeni negen negensingnginaac amma dindingac

deyemmeude. Ye imocac siduc gombang warac Abarahang edeec nga imoc mitikibiu yofi oho ohoya fede,

“Bangec monnunac ngicngac, yeni sasawango gearu hama kenecgoc anggecde.” *(Fingec fingec 12:3; 18:18; 22:18)*

<sup>9</sup> Abrahangng Anutuac yoac negensinggeec nga ngicngac yeneng Anutuac yoac negensinggedae, yeni Abrahangng kenec megecde.

<sup>10</sup> Ngicngac yeneng dedeseriyoac tobangema tofohokecdae, yeni sasawango sowecac bageu kecdae. Mitikibiu imocac yoac mong yofi oho ohoya fede,

“Ngcngac dedeseriyoacfu wiac oho ohoya fede, imoc wama mi modackecdae, yeni sowecac bageu kecdae.” *(Dedeseri 27:26)*

<sup>11</sup> Mitikibingo ifingoc yofi dede,

“Ngc mong ye negen negensing arennu kefude, Anutungo ye ngic dindingac demiude.” *(Habakuc 2:4)*

Nga mong ye dedeseriyoac modackecde, Anutungo yeac dindingac mi demiude, kpac. <sup>12</sup> Dedeseriyoacngo negen negensinggac yoac mi mekperagiude. Nga yoac mong yofi ine dedea,

“Ngc mong ye yoac imoc modacma kecde, yeng imocac manau kefude.” *(Sesememe 18:5)*

<sup>13</sup> Yesungo donina mema dedeseriyoacac sowecfunac bummenunuec. Nga yoac yofi oho ohoya fede,

“Ngc sasawa icfu gbedicyunugec nanggec, yeni sowecnginagoc.” *(Dedeseri 21:23)*

Ifi feecac dedeseriyoacac sowecngo Kristo sendenggeu yeng dedeseriyoacac sowecfunac menunuec. <sup>14</sup> Anutungo kenec Abrahang miec, imocngo Yesuac amma bangec monnunac ngicngac, yenearu kendarudeac Yesungo bummenunuec. Ifi anu Anutungo yoac deseriec, imoc modaru nenang Yesu negensingeni Asu nemmeec.

<sup>15</sup> Tosofocna, ni ngic fakanina fede imocac sirihau edengunuba negenggec. Ngic mongngo maridzominggac yoac deserima deu ngic mongngo imoc naric mi kpeude nga yoac mong imocac witiau mi torokpeude.

<sup>16</sup> Anutungo Abrahang nga bangeha yeri wiac goa yemerudeac yoac dedzege anec, imoc ye bangecfora homac yeneac mi deec. Ye ine ngic mocguacsac yofi deec, “bangecga.” Nga ngic imocnoc Kristo. *(Fingec fingec 12:7; 13:15; 24:7)*

<sup>17</sup> Ni imocac amma yofi deduae, Anutungo Abrahangng dzadzahac deseriec nga kecma kifa 430 wisickemanu Mosegoc dedeseriyoac fingerec, imocngo dzadzahac esea naric mi kpeude me meickeude. <sup>18</sup> Manggac mongngo maridzominggac yoac mong mi deude isoc nambaracfora yeni dedeseriyoacac sing modacma maridzomingngina megecde. Nga Anutungo Abrahang wiac miec imocngo maridzominggac yoac modarec.

<sup>19</sup> Ifi anudeu dedeseriyoac nocac faifaia fede? Imoc yoackpekpeac amma faifaia fede. Abrahangngac bangeha ye mi fingecmanu Moseac dedeseriyoacngo kuhagoc fec. Bangeha yeacnoc maridzominggac yoac oho ohoya fec.

Anu angero yengeng ine dedeseriyoac mema uba mocgu fingerudeac hengising ngicngina Mose migec. <sup>20</sup> Hengising ngic ye ine areng mocguac yoac mi deude. Nga Anutu ye mocgu amma yengena yoacacsac deude.\*

\* **3:20:** Imocac amma yoac dedzege Anutungo Abrahangngoc meec imocngo Moseac yoac ferahede.

<sup>21</sup> Anutungo Abrahanggoc yoac dzegeec, imoc dedeseriyoacngo mi kpede, imoc kpac yombong. Anutungo dedeseriyoac nemmeec, imocngo kekecseri meficgenemmebac dede ye dedeseriyoacac amma ngicngac dindingac denemmebac, amma ifi mi fingerec. <sup>22</sup> Ngicngac Yesu Kristo negensinggema Abrahanggac dedzegeyoac hoanggekecdae, yeni maridzominggina megedde. Imoc fingerudeac mitikibingo ngicngac sasawa kopocsicac bageu faiyunuec.

<sup>23</sup> Negen negensingngo mi femanu neni witicamau tacni, dedeseriyoacngo garennunuec. Nga negen negensingngo fingeru ebic imoc kpac anec. <sup>24</sup> Nga dedeseriyoacngo garennunuu kecminangoc Anutungo negen negensinnu dindingac denemmeudeac Kristongo fingerec. <sup>25</sup> Nga naso yomoc negen negensinggac sing dindingac kekec bic fingerec. Imocac amma dedeseri garenggac bageu monggoc mi kecdimbe. <sup>26</sup> Ngeni sasawango negen negensinnu Yesu Kristogoc kpeketahema kecma Anutuac medacfora andae. <sup>27</sup> Nga ngicngac Kristoaru doku nadzicgec, ngeni sasawa siricngina yofi, Kristongo wambangina anu ngeni ye heigec kemeec. <sup>28</sup> Imoc yudangic me grikgic me wanacngic minginagoc me ngic witiha kpac, ngic me ngac, ngeni areng mong mong mi andae, ngeni sasawango Yesu Kristoaru kpeketahema areng mocgu andae. <sup>29</sup> Nga Kristogoc kpeketahedaue Abrahanggac bangecfora kecma Anutuac yoac dedzegegoc kpeturanggema maridzominggac areng Kristogoc anggedde.

## 4

<sup>1</sup> Ni yofi negemma deduae, medac monggo maridzominga yeac anudeac negemma medachisic amma imocac tomal kecde, ye kpara kpac kecma wanacngic isoc kefude. <sup>2</sup> Ye yengena garenggac bageu amma hiedzo garenggac bageu kecmanungoc mamango naso deec, imoc hasikeu finaha tiu enude. <sup>3</sup> Nenang ifingoc ifi kefing. Nambarac kecminangoc bangecac hadehade yengeng wanaac menunuec yeneac bageu kefing. <sup>4</sup> Kecmina naso dedea, imoc hasikeu Anutungo yengena Medaha sueu maec. Ye dedeseriyoacac bageu ngacfu fingerec. <sup>5</sup> Fingecma ngicngac dedeseriyoac bageu kecdimbe, nenang ihacnac yungecunuu erema yengena medahaac tatic menideac maec.

<sup>6</sup> Ngeni nambaracfora andae, imocac amma Anutungo Medahaac Asu sueu hereninau kecma yofi kiackecde, "Manggac, neac Manna." <sup>7</sup> Imocac amma, ge monggoc wanacngic mi annade. Ge Anutuac medactatac mena yeng maridzomingga dedea, imoc genude.

<sup>8</sup> Anu ngeni warac Anutu mi negenggec nemu yeneng wanac mengunuec. Amma nemu imoc yeni Anutuac siric isoc kpac. <sup>9</sup> Ngeni yofinggac ireckema Anutu negemmidae me yofi naric deba, Anutungo ngeni bic negenggunuu kecdae. Nga ngeni monggoc dzigenema bangecac hadehade makpekpea nga kucngina kpac, yenearu monggoc kemma yeneac wanac areng anggeddeac negendae, fakangina imocngo obohode. <sup>10</sup> Amma ngeni uameme goa nga afo goa nga kpefinnu naso hemma kifaac siriha naso hania haniaac negenggec fora anu imoc modacma kecandae. <sup>11</sup> Nga uatoa ngenearu meai, imocngo fora kpac ambacac amma negengyohoc anduae.

<sup>12</sup> Tosofocna, ni ngeni isoc kecduae, imocac ngeni ni isoc anggeddeac desambic amma edengunuduae. Nga ngeneng mong ni memanganenuec. <sup>13</sup> Sebiugeng ebicnagoc amma naso imohai hanahema siduc gombung dekperagingemmeai, imoc bic negendae. <sup>14</sup> Nga sebinaac ebicngo ngeni

tobangngunuec, fora nga ngeneng mi negemmanugec amma mi wanugec, kpac. Ngeni Anutuac angero mong me Yesu Kristongo haec, ifi garenggebau isoc ni hoannuma garennugec. <sup>15</sup> Anu yaguc ine songongina engsac kpac ande. Ngeni warac songo homac negemma kicgbomangina mesima nenggedeac siriha anggec, ngeneac gombung imoc hepuc amma dekperagiduae. <sup>16</sup> Ni goroyoac edengunuba ngeni neac yoac wagec, imocac oboho-duae.

<sup>17</sup> Ngic wangepgunubeso angkecdae, yeneng ngeni yenigoc torokpema nangedeac gereagoc yombong dekecdae. Amma yeni ngeneac gombunga mong mi negensidae, kpac. Ngeneng yoacnginaac songo negemma yenearu torokpegecde, imocac ine ayemmede. <sup>18</sup> Ni ngenigoc kefai, imohai faka gombunga modacgecdeac uatoa megec. Amma faka gombunga modacgecde, uatoa imocac nasosoc mekecbisia. <sup>19</sup> Nambaracfozna, ni ngeneac amma monggoc kpendzeng gadze isoc nikecde, ifi angkecbare Kristongo ngeneac hereu fingectegecbeso. <sup>20</sup> Ni ngeneac negemma dafi ambade, imoc obohoyombonggema negen negeng ua mekecdae. Amma ngenigoc yofinenggac kecbai dede goroyoacna seria naric wama yoac yumea deba ngeni imoc modacbau.

<sup>21</sup> Anu dedeseriyoacac bageu kecbeso angemmedeu, ngeni kedzac faima yoac yomoc negembisia, <sup>22</sup> Abarahang ye medahora yohockang, mitikibiui yoac ifi oho ohoya fede, medac mongngo enema yombong, yearunac nga mong ine wanacngac yearunac. <sup>23</sup> Nga medaha wanacngac yearunac, ye sebiac arennu fingerec nga enemaarunac yombong fingerec, yeng Anutuac dedzegeyoac fec, imocac arennu fingerec.

<sup>24</sup> Ni yoac heima yofi deduae. Ngac yohockang yeri dzadzahac yohockang-gac onga andape. Dzadzahac mong imoc Sinai tikiu Arabia bangecfu yoac dedzege anggec, imocac nambaracfora yeni wanac kekecac bageu fingecgecdae, imocngo Haga ande. <sup>25</sup> Amma Yerusareng imoc Hagaac onga ande. Yerusareng ye yaguc yengena nambaracforagoc wanac areng amma witicfu kecdae. <sup>26</sup> Nga wi kurumennu Yerusareng mong witiha kpac, imoc nenang nonggonina yombong. <sup>27</sup> Nga yoac yofi oho ohoya fede,

“Ngac kufing sabacga kpac, ge sogac sogagoc kecna. Nga ngac gadze mong mi giec, ge kucgoc sogaima arohona. Ngac kosc yeac nambaracfora homac, kpetenginango ngac eweagoc yeac nambaracfora kpetengina feraheude.” *(Yesaia 54:1)*

<sup>28</sup> Tosofocna, Anutungo Abrahangoc yoac dedzege anu Isaka fingerec, ifi isocngoc Anutungo Yesuac amma yoac dedzege meficgeu yengena nambaracfora fingering. <sup>29</sup> Ngic sebiac arennunac fingerec, yeng naso imohai ngic Asuac arennunac fingerec, ye kpekporac ammiac, siric imocngo yaguc fede. <sup>30</sup> Nga mitikibing imocac negensima yofi dede,

“Ge wanacngac medahagoc kporacyuruna kenec, nocac wanacngac yeac medahango enengyombonga yeac medacgoc maridzoming naric mi meecde, kpac.” *(Fingec fingec 21:10)*

<sup>31</sup> Tosofocna, imocac nenang wanacngac yearunac kpac, nenang ngac enema yombonga yearunac.

## 5

<sup>1</sup> Nenang witiha kpac kecnideac Kristongo witicfunac yungecnunuec, imocac ngeni serima nambisia. Ngeni monggoc wanac kekecac bageu faingunubauac henghomema kecbisia.



<sup>2</sup> Nengendae, ngeni sebi tosangina herecgegedeu Kristoaru nac memefic mong mi megedce, ni Paurongo imoc edengunuduae. <sup>3</sup> Ngic sebi tosangina herecgegedeu yeni dedeseriyoac hafaogoc tofohoma modacdachisia, imoc serima monggoc edengunuduae. <sup>4</sup> Nga ngic Anutuac kicfu dindingac nanggedceac dedeseriyoac modacgedceac nengendae, ngeni Kristoaru nac kperecgeemema yegoc monggoc mi kpeketahama Anutuac wosoefac wama ngadeau kecgedce. <sup>5</sup> Nga Asungo wangecnunu neni negen negensinnu kecni Anutungo dindingac kpacnunuude, imoc menideac tomai kecdimbe. <sup>6</sup> Nenang Yesu Kristoaru kpeketahama kecni sebi tosea herec herecgea me mi herec herecgea, imocngo wiac engena mi ande. Negen negensinnango heresongogoc hoangemema mekecnide, imocngo fora ande.

<sup>7</sup> Amma ngeni mitiac sinnu nedzi nedzi gombunga nedzimagedc ngic merang singngina hedzickeu yoac fora wama kecdae. <sup>8</sup> Anutungo kpacngunuec amma yeng faka ifia anggedceac mi fenggengunuec, kpac. <sup>9</sup> Yis kapianecngo uuha sasawa sokodarude. <sup>10</sup> Nga Kebugoc kpeketahama ngeneac negemma yofi negensima kecduae, ngeni neac negen negeng imoc modacma kecma negen negeng goa wagecdce. Nga ngic mong ye negengyohoc meficgengemkecdce, yeng kopocsicac turunga meficgeude. <sup>11</sup> Tosofocna, sebi tosa herec herecgea sing imoc mi dekperagiduae, sing imoc bic wayai. Imocac amma ngic yeni nukporac anengkecdae. Ngic yeni sebi tosangina herecgegedceac kpouyemebai dede ngicngac yeni mariponggac yoacac ngaba mi ambau. <sup>12</sup> Nga ngic goango yoacnina kpekecma negen negengngina mesufuma kecdae, yeni sebi tosangina hafaogoc herecgea meickegec ngereebac.

<sup>13</sup> Tosofocna, ngeni witicngina kpac kecgedceac Anutungo kpacngunuec. Ngeni witicngina kpacac amma ine degbedic yoac dema uba esea modacgec mi ngereede. Imoc mi fingerudeac ngeni songogoc hoangemekcma wanacngic isoc kingang kpeemebisia. <sup>14</sup> Imoc yofiac, dedeseriyoacngo hafaogoc kpeturangema yofi fede, “Ge geangga anggengande, sirihia imocngoc ngicngac ogofocga heresongogoc hoangyunukechesena.” *(Sesememe 19:18)*

<sup>15</sup> Nga ngeni ine ngenaocngoc enacngo ingiemema ewekpebuc ange-mekecma memanganeembauac garengngina meemebisia.

<sup>16</sup> Ni yofi deduae, ngeni Tiri Asugoc heirima kengkecbisia. Amma ngeni uba eseaac negensongo wama imoc mi modacbia. <sup>17</sup> Uba eseaango Asuac kekec kpeude nga Asungo uba eseaac kekec kpeude. Yeri ngaba angemeandape, imocac ngeni wiac gombunga ambesonga negengkecdae, imoc waandae. <sup>18</sup> Nga Asungo wangecngunu kengkecdae dedeseriyoacac bageu mi kecgedce.

<sup>19</sup> Nga uba eseaac angammeme didiu yofi fingectegerude, Kaisero faka nga sebiac songo hania hania. <sup>20</sup> Nemuac eweheihei kekec nga dzinac faka amma ngabagoc tohoeme kekec, ngeni yoacngina ngabasiric angandae nga kichodung nga herebu amma tusucnene faka, gurunegicgoc tohoeme kekec amma mitiareng ikoha hania hania. <sup>21</sup> Imoc keracmangang nga doku seria negec uba mesufu ayemmekecdce amma faka goa ifia. Warac edengunuai nga yagac monggoc gorongina kpema edengunuduae, ngicngac faka ifia modacandae, yeni Anutuac eucererengac maridzoming naric mi megedce.

<sup>22</sup> Asuac fora imocngo heresongogoc hoangemema kekec nga ubangerec amma ruae nga modzotitia kpac amma faka yumea nga faka gombunga amma negen negensingoc kekec, <sup>23</sup> nga wosoefacgoc kekec amma faka

nomana. Dedeseriyoacngo faka ifia sasawa kpae mong mi heiude. <sup>24</sup> Anu Yesu Kristoac ngicngac yeni uba eseangina imocac hereyacyac nga negen-songogoc, imoc mariponnu bic kpegec homeec.

<sup>25</sup> Asungo kekecnina meficgenemmeudeu, yengngoc kekecnina garenggeu nenang ye modacbisina. <sup>26</sup> Modacma sebiengeng me keracmangang angemema mi tobangemebisina.

## 6

<sup>1</sup> Tosofocna, ngenearunac ngic mongngo sing feraheu ngic Asugoc kecdae, ngeneng imoc meficgema ngic ifia uba yumeau edemengere ambisia. Nga ngenang ifingoc faitobannu makpebauac ine garengemema kecbisia. <sup>2</sup> Ngeni botucnginau ebicngina fuama emekpesi kecbisia. Ifi amma Kristoac dedeseriyoac hafoangoc modacgecde. <sup>3</sup> Ngic mong ye engena mi amma yengenaac negenu engena ande, ye ine yengenaoc ikoc angemeude. <sup>4</sup> Nga ngeni tembus tembus angammemengina hengising ambisia. Anu mongngo henu fakaya naric anu, imocac ubangerec yengenaaru febeso. Femiudeu goa yeneac faka hemma imocgoc mi isinggebeso. <sup>5</sup> Ngic tembus tembus yeni ebicngina tembus tembus tofohogecde.

<sup>6</sup> Kpoukpoufocngina Anutuac yoac kpoungemmeandae, ngeni yeneac negensima wiacngina gombunga hendzicma yeneac noboha yemmebisina. <sup>7</sup> Anu ngeni ikoc angemebauac henghomema kecbisia. Ge Anutu ikoc ammima naric mi tobanggenade. Ngic mong ye semeng mong homerude, ye semeng fora siriha ifiangoc kpedziude. <sup>8</sup> Ngic mong ye uba esea arennu wiac homecande, yeng uba eseac arenunac foraya kpedziu manganema kpac anude. Nga Asuac arennu wiac homecande, yeng imocac fora, kekeha wisic wisickea kpac kpedziude. <sup>9</sup> Imocac amma faka gombungaac kucmama mi ambisina. Nenang modzotitia kpac kecma faka gombunga amma kecmima nasoyada hau semeng fora gombunga menide. <sup>10</sup> Nenang nasonina fedengoc, imohai ngicngac sasawa faka gombunga ayemmekecbisina nga arengfocnina Kebunina negensinggema kecdae, yeni momoc gombunga ayemmebisina.

<sup>11</sup> Henggec, neannaoc marinango kibi kuneng yombong ohongemme-duae. <sup>12</sup> Ngic sasawa yeni sebi tosangina herecgegecdeac igocngunuma dekecdae, yeni uba eseac siricfu engena anggecdeac amma ifi degecde. Amma yeni Kristoac mariponggac amma yunukporac ayemmebauac, imocac ifi angemmekecdae. <sup>13</sup> Ngic sebi tosangina bic herecgegec, yeni yenaoc dedeseriyoac mi tofohokecdaengoc. Yeni ine ngeneac negemma yenaoc kpac kuneng megecdeac amma ngeneng sebi tosangina herecgegecdeac homac ayemmeude. <sup>14</sup> Nga neng wiac monggac negemma kpacna mi miacbade, kpac yombong. Kebunina Yesu Kristoac mariponggac amma bangecac wiacngo mariponnu homeec nga neng ifingoc bangecac wiacac homemiaiac negemma dedengerec angkecduae.

<sup>15</sup> Ngic sebi tosa herec herecgea me mi herec herecgea imocngo wiac engena mi ande. Nga Anutungo deu wiac gboria fingerec, imocngo ine wiac engena ande. <sup>16</sup> Nga ngicngac singyoac imoc kekecnginau modackecdae, yenearu ruae nga wosoefacngo witinginau febeso amma Anutuac Israe yenearu ifingoc.

<sup>17</sup> Amma yofi desiduae, ngic mongngo ni ubaebic monggoc mi nembeso nocac Yesuac kubehaac ebic sebinu mekecduae

<sup>18</sup> Tosofocna, Kebunina Yesu Kristoac wosoefacngo ngeneac ongaasunginagoc febeso, imoc fora.

## Paurongo Efeso Kpebung Yeneac Kibi Ohoec

<sup>1</sup> Ni Paurongo Efeso taonnu kpetiac areng kecdae nga Yesu Kristo negensingedae, ngeneac kibi yomoc faiduae. Anutungo negennenu Yesu Kristoac aposoro anduae. <sup>2</sup> Mannina Anutu nga Kebunina Yesu Kristo yereac danggunuc nga ruaetoango ngenearu fefeseri febeso.

<sup>3</sup> Nenang Kebunina Yesu Kristo, yeac Anutu Manggac kenehebisina. Kristogoc kpeturangema kecdimbeac amma yeng kurumenggac kenec Asuac arennu fedacde, imoc sasawa nemmeec. <sup>4</sup> Yennoc bicngoc yombong hanahema bangec kurumeng mi fingecmanu kiwau ebiha kpac nga kpetiac kecnideac Kristoac amma negengising anemmeec. <sup>5</sup> Nga medacfora anideac ye songoya nga negen negenga modacma Yesu Kristoac amma meisinnunuc <sup>6</sup> Amma ye Medackerengaac amma ubangerec yombong anemmeecac nenang eweheimima dengerebisina.

<sup>7</sup> Yesu Kristoac danggunucac dzohong imoc wakema fedecac nenang yearu kpeketaheni ye sawango kirecgenunuu mangana meic meicke fingerec. <sup>8</sup> Imocac dzohongau negen negentegec nga negen negeng fora menderitadema kpetinggenemmeec. <sup>9</sup> Amma yeac ubau wosoefacac negen negeng sufuyufuya fede, imoc deserima yofi deireckenemmeec, <sup>10</sup> "Ni Kristo sueba bangecfu mama wiac sasawa bangecfu nga kurumennu fede, imoc kpeturangema oruha anude. Nga negen negeng ua mema arenggema nasotoaya negenai, imohai fora fingerude."

<sup>11</sup> Ye areng imoc bicngoc negensima yeac amma maridzominnina menideac negengising anemmeec. Ye wiac sasawa ubeau feec, imoc fora fingerudeac ifi arenggeec. <sup>12</sup> Imocac nenang hanahema erema Kristoac amma kekecseri menideac dedea, imoc negensinggedimbe. Nga Anutu kpara kengkena dengerema afehebisina. <sup>13</sup> Ngeni ifingoc yoac fora negemma memengerecac siduc gombang mema Yesu negensinggegec. Negensinggema negeng yeac anggecdeac amma Tiri Asu ngemmeudeac deec, ye herenginau faima dzadzahacac dzic ngemmeec. <sup>14</sup> Kurumennu finacnina fede, imocac dzadzahacac dzic Tiri Asu ande. Imoc nenang nemmenemmea. Imoc mekecnideu Anutungo kuric bangecfunac nambaracfora mesinunuma menunuude. Imocac Anutuac kuc nga kibikperagia dengerebesonga.

<sup>15</sup> Anu ngeni Kebu Yesu negensinggeandae amma yeac kpetiac arengfora sasawa heresongogoc hoangyunuandae, yoacsiduc imoc negenaic <sup>16</sup> ngeneac amma nasosoc negensima Kebu numumima dangge dema <sup>17</sup> yofi numuanduae, Kebu Yesu Kristo yeac Anutu, kibikperagiaac Manggac, yeng negen negentegec nga wiac sufuyufuya mekperac kperagi Asu ngemmeu Anutu hafoangoc negemmigece. <sup>18</sup> Yeng ubaac kicngina mekperagi wiac kurumennu ngeneac tomal fede, imoc negentegecbisia. Anutungo ngeni imoc mebesandaeac kpacngunuc. Wiac imoc kuc nga kibikperagiagoc wake wakea fede. Ye ngicngacfora kpetiac maridzomingngina imoc ngemmeudeac faiec fede. <sup>19</sup> Amma Yesu negensinggedimbe, nenannu yeac kuctoa engenango ua mekecde, imocac hania ifingoc negentegecbisia.

<sup>20</sup> Nga yengena kuha engena, imocngo Yesuaru ua meu homecfunac megborima meemma kurumennu faiec foiau tacde. <sup>21</sup> Nga kia gamang nga ngickuneng amma kuc hania hania nga sawakebangau kebuareng kecdae, yeneac engenatoa faiec tacde, imoc naso yofinenggacsac kpac, imoc ifi fekengkebesande. <sup>22</sup> Ifi amma wiac sasawa haniaac turumannu kpedzucyunuma orucngina anudeac gununggema kpebungfora yenearu faiu yeng wiac sasawaac kunengngina kecde. <sup>23</sup> Anu yeni yeac forakebanga hanimaria anggeg yeng imoc hafaogoc sing hania hania meficgedacma sasawa mewakedacande.

## 2

<sup>1</sup> Ngeni warac Anutuac sing ferahema kopocsicgoc amma ongaasungina homemea kecma <sup>2</sup> bangectoa bangecac kekec nga sawaac hadehade yeneac ngictau modacgeg. Anu yaguc yoackpekpeac medacfora kecdae, yenearu ngictau imocngo ua mekecdengoc. <sup>3</sup> Ngeni nga neni ifingoc nenahafoc warac yeneac arennu kecma ubasebinina esea yeac songo nga negen negeng sasawa modaring. Modacni Anutuac sowecngo witininau enec.

<sup>4-5</sup> Nenang Anutuac sing ferahema kecni ongaasunina homemea anec. Anu ye sifu negennemmema wosoefaha engena anemmema heresongogoc hoannunudeac amma Kristogoc homecfunac nenahafoc megborinunuec. Anutungo wosoefaha ngenmema kopocsicac ebicfunac mesingunuu komoc kpegecde. <sup>6-7</sup> Ye Yesu Kristoac gombangac amma wosoefac kpenemmema yegoc torokpenunuec. Imocac ngadeau danggunuctoayaac dzohong mekperagiudeac Yesu Kristogoc megborinunuma yegoc kurumennu fainunuec. <sup>8</sup> Imoc yofiac, ngeni Yesu negensingegecac yeng danggunuha ngenmema kopocsicac ebicfunac mesingunuu komoc kpegecde. Nga imoc ngenang gombangac kpac. Anutungo wosoefahaac amma wiac imoc ngenmeec. <sup>9</sup> Imoc ngenang angammemeac kpac. Imocac ngic mongngo yengenaac negenu wiac engena mi ambeso. <sup>10</sup> Nenang Anutuac marikibi nga Yesugoc kpeturanggema kecni Anutungo angammeme gombunga arenggema derecgenemmeec. Nga yeng areng imoc modacma kecnideac denemmeec.

<sup>11</sup> Imocac ngeni wiac yomoc negenggeg febeso, ngeni warac bangecsebi arennu ngicngac bangec monnunac Anutu mi negemmima kecmagec yudangic yeni sebi tosangina herec herecgeango ngeneac yofi degeg, "Ngeni imocngina kpac." Faka imoc sebiu angana imoc ngicngo memea. <sup>12</sup> Naso imohai ngeni Kristoac kpac kecma israengic yeneac arennu torokpema mi kegeg. Nga Anutungo dzadzahacac yoac dedzege israengicngac kpeyemmeec, imocac ngadeau kegeg. Ngeni bangectoa bangec yomohai Anutua kpac kegeg nga kekec gombunga mong fingeckbesande, imoc mi negensingegec. <sup>13</sup> Ngeni warac araing kegeg amma naso yofinenggac Yesu Kristogoc kpeturanggema kecdae. Nga Kristoac sawango wangecngunuu Anutuac hoannu sikedacma kecdae.

<sup>14</sup> Kristo ye yengenaoc neneac ruaetoanina. Yudangic nga ngicngac bangec monnunac, nenang botucninau kpaie feu yeng imoc hendzicma ngaba imoc meickeu kpac anec. Kpac anu ye yengenaaru kpeturannunuu habu mocgu aning. <sup>15</sup> Nenanggarunac ngic gboria mocgu fingerudeac ye sacfusia faima dedeseriyoac manau nonoyoac fede, imoc sasawa meickeec. Ifi anu ruaetoa fingerec. <sup>16</sup> Ye mariponnu homema namma habu yohockang ngabagoc tohoemema kefing, nenang kpeturannunuu uba mocgu aning. Amma Anutuaru fainunuma sacfusiango kpeturannunuu ruaie fingerec.

<sup>17</sup>Yeng sikema araing nga wegenac kekeha momoc ruaeyoac dekperaginemeu negening. <sup>18</sup>Asu mocgungo wangecnunuu ngeni nga neni kpeturanggema Manggacac hoannu naric hama nannide.

<sup>19</sup>Imocac naso yofinenggac kuriha monggoc mi kecdae. Ngeni Anutuac ngicngac kpetiacgoc kpeturanggema ama mingina anggec. Amma yofinenggac Anutuac arengfora kecdae. <sup>20</sup>Ngeni Anutuac ama mengunungunuya. Aposoro nga profete neneng serengunudimbe amma Yesu Kristo yengenaoc hocwotung seria ande. <sup>21</sup>Nenang sasawango yeac witiu torokpeu torokpe emma Asuac kucfu yadiseri amma Kebuac womongyada kpetiac fingecyadi annide. <sup>22</sup>Asungo ngenearu ua mema ngeni ifingoc yearu meyadingunuma torokpengunuu ngeni Anutuac ama fingecyadi anggecde.

### 3

<sup>1</sup>Anu ni Pauro imocacnoc ngicngac bangec monnunac ngeneac amma Yesu Kristoac witicngic anai kecduae. <sup>2</sup>Ngeni neac hania bic negendae. Anutungo danggunuha ngenearu mekemba dema uayoac denenec. <sup>3</sup>Denemma negen negeng sufu sufuya didiu deficgenenec, yoac imocnoc wegena bic ohoduae. <sup>4</sup>Ngeni imoc osoma Kristoac yoac sufu sufuya hania negentegecduae, ifi naric negenggecde. <sup>5</sup>Yoac sufu sufuya imoc Asungo aposorofora nga profetefora kpetiac kecdae, yenearu deficgeyemmeec. Bicngoc ngic keceregec, yenearu ifi mong mi dedea. <sup>6</sup>Yoac sufu sufuya imoc yofi, nenang Yesu Kristogoc kpeturanggema kecdimbe amma Anutungo bicngoc nenanggac dedzege anec. Ngicngac bangec monnunac nga yudangic neni maridzoming imoc nenahafoc mekecnideac siduc gombung imocngo dekperaginemeu forakebanga mocgu annide. <sup>7</sup>Ni siduc gombung imocac kingangkpekke kecbadeac Anutungo wosoefahaac ua nga kuc amma danggunuha nenec, imoc yengena kucfu denenec.

<sup>8</sup>Anutungo ubangerec anenu Kristoaru semengtoa fefea fede, imocac siduha ngicngac bangec monnunac Anutu mi negemidae, yenearu dekperagiyembadeac ua imoc denenec. Ni ngic kpetiac sasawa yenearunac mameanec nga yeng sifu ifi anenec. <sup>9</sup>Nga yoac sufu sufuya dekperagibadeac yoac yofi edenuma nenec, Anutungo wiac sasawa deu fingecgec, ye negen negensufuya uba tembuha bicngoc hanahema negengerekefec. <sup>10-11</sup>Ye negen negentegectoaya imocac hania imoc bicngoc Yesu Kristo Kebunina yearu arenggeu yaguc fora ande. Gareng areng nga areng kuctoanginagoc sawau kecdae, yeni imoc negentegecdeac Anutuac kpebungforango imoc dekperagiyemmebisia. <sup>12</sup>Anu Kristongo sing meficgenemmeu ye negensinggema kengec nga ubayohoa kpac Anutuac hoannu naric fingeckecdimbe. <sup>13</sup>Imocac yofi edengunuba negenggec: Ni ngeni meficngunubadeac kpendzeng witiau kecba imocac ubangina kuha mi mabeso, kpac. Imoc memeficngina ambeso.

<sup>14-15</sup>Imocacnoc nenang Mannina kecde, ye fafoc heimima numumianduae. Yeng ngicngachabufora sasawa bangecyu nganungunuu nganungunuu kecdimbe kpac nemmeu yeac kpac nenannu fede. Ngeneac negemma yearu yofi numuanduae,

<sup>16</sup>"Anutu, ge kuc nga kibikperagitoagango Asugaac dzohonnu kuc meficgeyemmeu ubaonganginango yadiseri ambeso. <sup>17</sup>Amma yeni Kristo negensinggec geng yeneac ubahereu kecbesena nga godongina heresongogoc kekecfu seria kecgecdeac meseriyununa.

<sup>18</sup>Ifi anna yeni ngicngac sasawa kpetiac kecdae, yenigoc

heresongogoc kekecac hania wihacnac made nga edihacnac hade amma noboc nobocnac hade nga emuhacnac erede, imoc efaima negentegecbisia. <sup>19</sup> Amma Kristongo heresongogoc hoannunuande, imoc ngic negen negeng sasawa ferahedacma fede, imoc ifingoc negenggecdeac numugenduae. Ammanu gearu ubaac semeng wake wakea, imocngo mewakeyunubeso.”

<sup>20</sup> Anutu kuctoayango nenannu ua mekecede, yennoc ua hania hania engena yombong meudeac kuc femide. Amma yeac uango nunumunina nga negen negennina homac ferahedacde amma imoc wisic wisickea kpac.

<sup>21</sup> Kristo Yesu kpebungfora kpeturanggema kecma kecerebesandae, nge-neac botucfu dedengerecngina yearu fekengkecbesande. Imoc fora.

#### 4

<sup>1</sup> Imocac ni Yesuac amma witicngicngo gorongina kpema yofi eden-gunuba, ye kekec sirihau monnu kpacngunuuc, imocac sirihau kecbisia.

<sup>2</sup> Ngeni yumea amma wosonomang hafoangoc kecma faka yumea mekecma ubangerecfu modzotitia kpac tomai kecma heresongogoc hoangemema nanggeemebisia. <sup>3</sup> Amma Asuac ruaeac witicngo dedecngunu uba mocgu anggec. Amma ngeni imoc herecgebauac seriyombonggema kecbisia.

<sup>4</sup> Forakebanga imoc mocgu nga Asu ye mocgu, ifi isocngoc Anutungo kpacngunu wiac gombunga sirihau mocgu fingecngemmeudeac negensima kecdae. <sup>5</sup> Kebu ye mocgu nga negen negensing imoc mocgu amma doku-nadzicngo mocgu. <sup>6</sup> Anutu mocgu, yeng Manggac urecna mocgu amma engenatoanina. Amma yeng ngicngac sasawa botucninau nga ubaherenisoc kecede.

<sup>7</sup> Nga Kristongo yengena areng modacma kpebungfora nenang Tiri Asuac danggunuctoyaac semeng, imoc hendzicma ubangerehaac wiac tembuc tembuc denemmeecsoc, imoc mekecdimbe. <sup>8</sup> Imocacnoc yoac mong yofi fede,

“Ye wi sawau yombong emma witicareng wityicyunuma wangecyununa arengau kenggec yeng bangecngic wosoefac wiara yemmeec.” (*Mitiyegec 68:18*)

<sup>9</sup> “Ye wi enec.” Imoc eng mi dedea, ye waraima mama bangec manau kemeecngo erema enec. <sup>10</sup> Ngic maec, yeng dzigenema emma kurumenga kurumenga ferecgedacma bangec nga kurumennu wiac sasawa sokodacma kefudeac enecnoc. <sup>11</sup> Amma yennoc ua yofi denemmeec, goa aposoro nga goa profete amma goa siduc gombung dedekperagi areng\* nga goa kpebung yeneac gareng amma goa miti kpoukpou, ifi denemmeec. <sup>12</sup> Ngicngac kpetiac nenang miti ua kuhagoc mema Kristoac hanimari nga forakebanga meyadi ni seriudeac ifi fainunuuc.

<sup>13-14</sup> Nenang nambarc kekec monggoc mi kecbisina, kpac. Anutu meda-hango uayoac denemmeec, imoc negensima hania negen negeng kemea mekecma yoara negensinggema uba mocgu amma kecbisina. Nenang sasawa ifi kecma mitiu yadiserima Kristoac kpeteusoc, imohainoc kensikemina Yesu yengenaoc mewakenunuude. Ikocngic yeneng firang isoc ikocyoacfu sing segema sebiu faifaiyoac hania hania kpounemmegec daracburuc kpema kengke hakpe mi ambisina. <sup>15</sup> Ifiac amma nenang heresongogoc hoangemema yoac fora dekecbisina. Ifi anni haifakaninango

\* **4:11:** Areng imoc yeni siduc gombung dekeperagigec ngicngac ubangina heiu ubamereng anggec.



hafaogoc fingeoyadi ammanu orucnina Kristo yearu kpeketahema fora menide. <sup>16</sup> Yeac marabeau uanina tembus tembus meni, ginongngo hanimari nga wiac sasawa torokpedacma nanggeemeu forakebanga mocguyada fingeoyadi annide. Imoc heresongogoc hoangemeemeac fakau fingerude.

<sup>17</sup> Ni Kebuac kicfu gorongina kpema edengunuba negenggec: Ngeni, bangec monnunac ngicngac Anutu mi negemmidae, yeni isoc monggoc mi kecbisia. Yeni negen negengngina kpekeng kpehaac amma sing obohoma kecdae. <sup>18</sup> Amma yeni negen negengecngina mi fedec kundung manau dzingfong kpema ubasinginaac amma Anutuac kekec ngadeau kecdae. <sup>19</sup> Yeni faka gombunga ngadehema gamea kpac kaisero faka nga kekec sicsauhagoc modacma ubawonongnginagoc torokpeu torokpe kecdae.

<sup>20</sup> Nga ngeni Kristoac sing ifia mong mi negendae, kpac. <sup>21</sup> Kristoac yoac fora kpoungemmegec, ngeni imoc negenggec, imoc negenduae. <sup>22</sup> Hensongongina manganango ubanegen negengngina esea memanganec. Ngeni faka ifia warac modackecgec amma ngeni imoc wabisia. <sup>23</sup> Tiri Asungo ubanegen negengngina megboribeso. <sup>24</sup> Amma Tiri Asungo ubanegen negengngina gboria meficgengemmeu ngeni imoc heigec kemebeso, imocno Anutu yengena onga isoc dindiang nga kpetiac yombong kecbisia.

<sup>25</sup> Amma nenang sebi mocguac oruc kickedzac nga hanimaria kecma meficemema kecdimbeac ngeni sasawa faka ikoha wadacma yoac fora tosofocngina yenigoc denegeng amma kecbisia. *(Dzekaraia 8:16)*

<sup>26</sup> "Ngeni herengina buu kopocsic mi meficgebisia." *(Mityegec 4:4)*

Nga ngeni herebu mekecmagec wenackiwango mi kemebeso. <sup>27</sup> Ngeni mangana mingina ama mi heimibisia. <sup>28</sup> Hamangecmeme ngic ye hamangec wama mariango ua fora mema semeng meficgema ngic makpekpea mefiyunubeso.

<sup>29</sup> Ngeni isi enacnginaunac mong mi erebeso, kpac. Yoac deandae, imocngo ngicngac yoacngina negemma ebicnginasoc mefiyunuma yadiseri anggedecac meseriyunubesonga. <sup>30</sup> Ngeni Anutuac Tiri Asu ubaebic mi mibisia. Anutungo ebicfunac yungecngunuudeac naso faiec, imohai nanggedecac dzadzahacac dzic Tiri Asu faingemmeec. <sup>31</sup> Botucnginawu mundang kpema kekec mi febeso nga ngeni ngaba nga herebu faka wabisia. Amma ngeni yaipararac nga enacfu faifai mi ambisia. Ngeni mangana imoc sasawa wadacma ukudacbisia. <sup>32</sup> Ngeni ruae nga wosoefac amma ubamangang angemema kecbisia. Anutungo Kristoaru kopocsicngina waec, ifi isoc ngeni ifingoc ngenaocngoc kopocsicngina waemebisia.

## 5

<sup>1</sup> Ngeni Anutuac songonambaracfora, imocac ngeni ye isoc amma yeac kekec modacma kecbisia. <sup>2</sup> Kristo ye ifingoc heresongogoc hoannunuma yengena sebia desiemema sese imoc Anutuaru mekemma nenanggac donina mema homeec. Sese imocngo homung kerengagoc amma Anutuaru enec. Nga ngeni onga imoc modacma heresongogoc hoangemema kecbisia.

<sup>3</sup> Amma ngenang botucfu kaisero faka nga sicsauc kekec wonongagoc hania hania amma kichodung, ngeni faka imoc hafaogoc wama mi yombong debisia, kpac. Ngeni kpetiac kecdaeac faka ifia ngenearu angana mi ande.

<sup>4</sup> Ngeni isi nga tenicfagoc yoac sicsauc kundungagoc, wiac ifia enacnginaunac ereu naric mi anude. Ngeni imoc wadacma ubangerecyoac nga dedengerecyoac degec ngereuede. <sup>5</sup> Amma kaisero me ngic ubawonongnginagoc areng ifia yeni Kristo nga Anutuac eucerereng manau naric mi

enggecde amma maridzoming imohai naric mi megecde. Nga kichodunggac faka imoc nemu afec afehe faka. Nga ngicngac faka imoc meandae, yeneng eucerereng manau naric mi enggecde, ngeni imoc negenghomebisia.

<sup>6</sup> Ikocngic mongngo yoac sicsauha edengunu ngeni imocac negenggec fora mi ambeso. Nocac Anutungo angammeme ifiaac kopocsicac turunga yoackpekpeac medacfora kpouyemmeude. <sup>7</sup> Imocac amma ngeni yenigoc mi kpeketahebisia. <sup>8</sup> Ngeni warac kundunggac areng kecgec nga yaguc ine Kebuaru kpeketahema kperagia areng andae. <sup>9</sup> Amma kperagiaac faka fora yofi fingeckecde, angammeme gombunga nga dindingac kekec amma faka nga yoac fora dede. Imocac ngeni kperagiaac nambaracfora amma imocac sirihau kecma <sup>10</sup> Kebungo negenu wiac ngereeude, imoc negengising amma ambisia. <sup>11</sup> Ngicngac areng goa yeni kundunggac faka nga angam-memengina fora kpac meandae, ngeni ine yenigoc mi kpeketahebisia, kpac. Nga ngeni faka nga angammeme nonongkac kperagiaau mekperagigec haniangina hentegecgec ngereeude. <sup>12</sup> Nocac yeneng fakangina sufu sufu angkecdae, imoc sasawa naric mi debade. Imoc deba gameagoc anude. <sup>13</sup> Nga faka ifia sasawa nonongkacfu faini kperagiango imoc mekperagiui ireckuede.

<sup>14</sup> Imocac sirihau yofi, wiac sasawa kperagiango henu meaiude. Imocacnoc yofi dedea,

“O, ngic gau fema kecnecc, ge gborima homecfunac yacna. Ifi anna Kristongo mekperagiguude.”

<sup>15</sup> Imocac ngeni singngina gombunga hentegecma kengkecbisia. Amma ngeni negen negengngina kpac isoc mi kecbisia, kpac. Ngeni negen negentegecgec amma kecbisia. <sup>16</sup> Yofinenggac faka manganango sokodacma fedac ngeni seserigoc faka gombunga amma kecbisia. <sup>17</sup> Ngeni ngicngac kapaya isoc mi kecbisia, kpac. Nga Kebungo ua dengemmeec, ngeni imoc hentegecma kecbisia. <sup>18</sup> Ngeni waingdoku seria nema ubasufu mi ambisia. Imocngoc kekecngina memanganeeude. Asungo ubanginau wakebeso. <sup>19</sup> Yegec mitikibiu fede nga Tiri Asungo yegec ngemmeude, ngeni imoc heima ubaemenengeng ambisia. Amma ngeni yegec heima musi kpema Kebu ubaherengo dengerebisia. <sup>20</sup> nga ngeni Kebunina Yesu Kristo, yeac kpacfu nasosoc Anutu Manggac wiac sasawaac amma dangge edebisia.

<sup>21</sup> Ngeni Kristo eweheimima yeac amma uba mocgu amma enac tofoc tofoho angemema kecbisia.

<sup>22</sup> Nenggac Kebuac enac tofoc tofoho kecdae, ngeni ifi isoc ewefocngina yeneac enac tofoc tofoho kecbisia. <sup>23</sup> Imoc yofiac, Kristongo kpebunggac oruha nga ifi isocngoc eweango enemaac oruha ande. Kristongo kpebunggac oruha nga nenang yeac hanimari forakebanga andimbe nga ye Memengerecna. <sup>24</sup> Kpebungngo Kristoac enac tofoho kecde, ifi isoc nenggac ngeni ewefocngina yeneac yoac sasawa tofohobisia.

<sup>25</sup> Kristongo kpebungfora nenang heresongo negemma hoannunuma donina mema sebia desiemeecc, ifi isocngoc manggac ngeni enengfocngina heregoc yeneac songo negembisia. <sup>26</sup> Anu nenang kpetiac annideac ya yengena yoaraac kucfu mitidokuyango dzuacnunuec. <sup>27</sup> Dzuacnunuma menunuu kpebungfora nenang nekuc nekutackea kpac nga goctoponina kpac kecma yeac kicfu fingeccnide. Nenang gombunga nga kpetiac ebicnina kpac kecma kuc nga kibikperaginagoc yeac kicfu fingeccnideac negenecc. <sup>28</sup> Manggac ngeni sing imoc modacma enengfocngina heregoc yeneac songo

negembisia. Ngenang sebinginaac angemmeande, ifi isoc enengfocnginaac angemmeso. Ngic mong ye heregoc enemaac songo negende, yeng yengena songo negenude. <sup>29</sup> Nga ngic mongngo sebia ngaba naric mi ammiude, imoc kpac. Ye sebia henggarang amma neneyaka gombunga mima kecde. Kristongo kpebungfora nenannu ifinoc angecde. <sup>30</sup> Nenang Kristoac hanimari nga kickedzac mocgu amma kecdimbe. <sup>31</sup> Yoac mong yofi fede,

“Imocac ngic mong ye nonggomama wayuruma enemaaru kpeketaheu yeri ubasebi mocgu amma kefecde.” *(Fingec fingec 2:24)*

<sup>32</sup> Anu negen negeng sufu sufuya yomoc kpeu keme keme ande. Imoc Kristo nga kpebungfora ngeneac negemma deduae. <sup>33</sup> Imocac ngic sasawa ngeni tambuc tambuc ngenang heresongogoc hoangemeandae, ngeni ifi isoc enengfocngina heresongogoc hoangyunubisia. Nga ngac ngeneng ifingoc ewefocngina eweheihei ayemmebisia.

## 6

<sup>1</sup> Nambarac, ngeni Kebuac amma nonggo mangfocngina yeneac enac tofoc tofoho kecbisia. Imocngo sing dindingac ande.

<sup>2</sup> “Ge nonggo manghocga seseheyurubesena.”

Dedeseriyoac imocngo wiac ngemmeudeac waracyoac ande, imoc torokpema yofi dedea,

<sup>3</sup> “Ge ifi amma wiac sasawa naric fingecgenu bangecfu naso herea kechereenade.” *(Makekeng 20:12; Dedeseri 5:16)*

<sup>4</sup> Manggac, ngeni nambaracfocngina herebu mi meficgeyemmebisia, kpac. Ngeni Kebuac yoac modacma nonoyoac edeyunuma metingyunuma dederece ayemmegec, yeni yadiseri ambisia.

<sup>5</sup> Wanacngic mingingina bageau kecdae, ngeni uangingau negengyohoa kpac, yumea kecma ngisima bangecfu mingingfocngina yeneac yoac tofohokecbisia. Dzonongngina fedeu yoacngina ferahebauac Kristoac enac tofohokecdae, ifi isoc yeneac yoac heregoc tofohobisia. <sup>6</sup> Nga ngeni mingingfocngina yeneac kicfu uanginaac gombungasiric mi ambisia. Ngeni Kristoac ua ngic kecdaeac Anutuac enac ubangeregoc tofohoma songogoc uangina nasosoc gombunga mekecbisia. <sup>7</sup> Ngeni ngic yeneac negensima kpac, Kebuac negensima uangina imoc uba feacfu mekecbisia. <sup>8</sup> Nga negenggec, ngic mong ye yengena ua mekecde me wanacngic minginagoc kefu minginaac ua gombunga mekefudeu Kebungo imocac turunga socfungoc kpouyemerude.

<sup>9</sup> Ngic ngeni wanac ngic yeneac minging kecdae, ngeni ifingoc wanac ngicfocngina yumea ayemmema ngaba mi ayemmebisia. Ngeni yofi negembisia, kurumennu Kebu urecngina mocgu kecde. Yearu monde monde mi fede.

<sup>10</sup> Desima deba, ngeni Kebuaru heiserigec kuctoayango ngenearu fercegema feu kucgoc kecbisia. <sup>11</sup> Mangana minginango ikocfu fusu nendzic ngaba sikengemmu ngeni serima nangedeac Anutuarunac tebemariku dzikacac wiac sasawa, imoc megec kemeu serima nangede. <sup>12</sup> Imoc yofiac, nenang ngic sebifusi yenigoc dzikac mi kpekecdimbe, kpac. Nenang sawau enara areng nga wiac kuctoanginagoc hania hania kecdae, yenigoc dzikac kpema kecdimbe. Hade hade imoc yeni kundunggac kuc kuneng nga engena amma gareng kecma bangec noboc noboc uangina mekecdae. <sup>13</sup> Imocac Anutuarunac tebemarikungina nga dzikacac wiac sasawa, megec kemeu dzikacnasou seria nammagec ngaba yeneng naric mi memangunuma woragec ngeni seria nangede.

<sup>14</sup> Ngeni imocac yofi ambisia, yoac forango fadengngina anu ngeni imoc kebangnginau dzegebisia. Dindingac kekecngo mariku anu ngeni imocngo kperacemebisia. <sup>15</sup> Ubangina meefaiu faka imocngo hanitabengina anu ngeni imoc heigec kemeu tiserima kemma siduc gombung dekperagigec ruae fingebeo. <sup>16</sup> Amma ngeni imoc sasawa mekecbisia nga tebeac saia, imoc negen negensingnginaac onga. Ngeni imoc nasosoc mema nanggec mangana minginango tebemedaha gerechorangagocngo wedecngunuu ngeni imoc mebockebisia. <sup>17</sup> Amma aieng opoc kpara “Anutuac memengerec.” imoc heigec kemebeo. Amma Tiri Asuarunac dzikacac beang kpara “Anutuac yoac.” ngeni imoc mekecbisia.

<sup>18</sup> Asungo ngenearu ua meu nasosoc Anutu kpacsambic ammima kecma nunumungina numumibisia. Ngeni gaugbori kecma seserigoc amma kpetiac areng sasawa yeneac negensima ifi angkecbisia. <sup>19</sup> Anu enacna efaiu kengecna kpac kecma siduc gombungganegen negeng sufufufuya dekperagiyemebade nga Anutungo yoac nenudeac ngeni ifingoc numubisia. <sup>20</sup> Ni imocac siducedengo witicamau tacma kengeha kpac yoac imoc gombunga edeyunubesare.

### *Dedesiyoac*

<sup>21</sup> Tikikongo hama kekecnaac hania nga ua meanduae, imoc obohobauac yoacsiduc angedmedarude. Ngic imoc negen negensinggoc tosonina anu ye heresongogoc hoangedimbe. Ye Kebugoc kpeketahema seseri amma yeac kingang kpekecde. <sup>22</sup> Yeng neneac yoacsiduc angedmemma ubaefac kpengemmeudeac sueba haude.

<sup>23</sup> Anutu Manggac nga Kebunina Yesu Kristo yereng negen negensinggoc tosofocna ngeni ruaegoc nga heresongogoc hoangngunuma negen negensingngina meseribesera. <sup>24</sup> Ngicngac Kebunina Yesu Kristo heregoc yeac songo negendae, ngenearu danggunuc nga songotoaya wisic wisickea kpac imocngo fekengkebeso.

## Paurongo Firipi Kpebung Yeneac Kibi Ohoec

<sup>1</sup> Yesu Kristoac wanacngic Pauro nga Timoteo, nereng kibi yomoc faidipe, imoc Firipi taonnu kpetiac areng sasawa nga kpebunggac enarafocongina amma kpebunggac memefic ngicngacfocongina Yesu Kristogoc kpeketahema kecdae, ngenearu hade.

<sup>2</sup> Mannina Anutu nga Kebunina Yesu Kristo yereac danggunuc nga ruae ngenearu febeso. <sup>3</sup> Ni ngeneac negensianduae, naso imohai Anutuna ubangerec edeanduae. <sup>4-5</sup> Siduc gombunggac ua hanaheaiunac erema yaguc ande, ngeni nigoc ua areng mocgu mema kefing, imocac amma ngeneac negensima sogac sogaicog numuanduae. <sup>6</sup> Amma yofi negensinggeduae, Anutungo ua gombunga ubaherenginau hanahema imoc torokpema mekengkefu Yesu Kristoac nasotoa hau, imohai uaya imoc mesidarude. <sup>7</sup> Ni ngeneac ifi negemma herenau baringunuma kecbade imoc ngereede. Witicamau kecbade me mitiac ngabaareng yenearu siduc gombunggac hania dekperagibade me siduc gombung ngenearu meseribade imohai ngeni sasawango nigoc Anutuac wosoefacfu areng mocgu kecnide.

<sup>8</sup> Anutungo hepucna kecede. Yesuac wosoefacfu heirima ngenigoc kecbadeac ubasongona fede, imoc fora deduae.

<sup>9-10</sup> Nga faka damocngo gombunga ande, ngeni imoc naric isinggegedeac yofi numuanduae, ngeni heresongogoc hoangemema kecbisia. Nga songo imocngo yadima negen negeng kpeu keme kemea meficgeu Anutuac sing negentegecede, ifi numuanduae. Ngeni ifi negentegecma Yesuac nasotoa hasikeu kongaha nga kopocsingina kpac nanggecede. <sup>11</sup> Nammagec dindingac kekecac fora Yesu Kristoac kpacfu mewakengunuude. Imocngo Anutuac kibikperagi nga dedengerec meficgeude.

<sup>12</sup> Tosofocna, nearu faka fingerec, imocngo siduc gombunggac ua monggoc meseriu yadie. Ngeni imoc negenggecedeac songona ande. <sup>13</sup> Yadiu ngicngac ngictauac oda manau kecdae\* amma ngicngac noboc noboc kecdae, yeni sasawa bic yofi hentegegec, "Ngic imoc Kristoac amma witicfu kecede."

<sup>14</sup> Witicamau tacduaec tosofocnina homac negen negengngina Kebuaru seriec. Serima Anutuac yoac kengeha kpac dekecdae.

<sup>15-17</sup> Ni seria namma siduc gombung dekperagibadeac Anutungo fainuec, yeni imoc negemma sing dindingac wosoefacfu Kristo dekperagikecdae. Tosea yeneng ine keracmanganggoc nga ngabau negen negeng kpeengkpema witiau Kristo dekperagidae. Dekperagima neac yofi negensidae: Ye ebic hania hania meficgeminide. <sup>18</sup> Yeni Kristo herengin-aunac mi dekperagiandae me sing forau Kristo deandae, imocac homac mi debesonga, yeneng Kristo dekperagidae, imocngo wiac engena ande. Ifi negemma yofinenggac sogaiduae amma monggoc sogaiabade. <sup>19</sup> Ifi ammagec ngeneac nunumu nga Yesu Kristoac Asungo meficnude, imocac yofi negensidae, witicfunac yungecnugecede. <sup>20</sup> Nga songotoana yofi fede, wiac

\* **1:13:** Ngictau yeac oda manau yengena amagereha feec. Amma ofis hania hania nga witicama amma ua arenggac ama fekenece.

monggac me monggac negemba gameagoc mi ande. Ni ine kengeha kpac kecma kekecfu me homecfu sebinango Kristo kpac kuneng mibade.

<sup>21</sup> Kekec yomohai Kristogoc kecduae nga homecngo forana meficgenenude. <sup>22</sup> Nga sebigoc kecma ua meba fora homac fingerudeu imocac dafi debade, imoc mi negengecduae. <sup>23</sup> Songo yohockangngo kpedzinuu kecduae. Kemma Kristogoc kecbadeac homac anende, imocngo wiac sasawa ferahema ngereyombonggede. <sup>24</sup> Nga ngeneac gombunggac amma sebigoc monggoc torokpema kecbesare. <sup>25</sup> Imoc seria negengyombonggeduaeac bangecfu ngicngac sasawa ngenigoc kecma meficngunuba ngeneng negen negensinggoc kecma yadiseri amma sogaima kecgcede. <sup>26</sup> Nga ngenearu monggoc hama kecbadeac ngeni nenggec imocngo songo meficgengemmeu Yesu Kristoac amma kekecngina meseriude.

<sup>27-28</sup> Ni hama ngenembade me hereau kecma ngeneac yoacsiduc yofi negembeso anduae, ngeni ongaasu mocgu nga ubahere mocgu kecma ngabafocngina yeneac mong mi kengecngunumanu serima namma yeni siduc gombung negensinggegedeac ewema kpendzenggoc uatoa mekecdae. Imoc fingerudeac ngeni Kristoac siduc gombung imocac sirihau kecbisia. Faka imocngo ngabafocngina yofi edzacyunuude: Yeni manganema kpac anggede nga ngeni ine komoc kpegede. <sup>29</sup> Ngeni Kristo meficgegedeac areng yofi ngemme ngemnea fede: Ngeni ye negensinggema ifingoc yeac amma kpendzeng kpegede. <sup>30</sup> Warac uau kpendzenggoc kekec uatoa mekefai imoc kicngo henggec amma yaguc mekecduae imoc negendae, sirihai ifiangoc ngeni yaguc mekecdae.

## 2

<sup>1-2</sup> Kristongo meseringunuma heresongoc hoangngunukecde. Nga Tiri Asungo hama kpeturanggunuu ngeni ubamangang negengemema wosoe-fac angemegecde. Imocngo botucnginau negen negeng mocgu nga uba mocgu amma heresongogoc hoangemegec ubangerec hafoa negembade. <sup>3</sup> Ngeni kuneng tatacac amma kichodung mi ambisia nga sebiengggoc mi kecbisia. Ngeni faka imoc wama memaemema ngicngac ogofocngina yeneac kpac miacma ngenang kpac memama kecbisia. <sup>4</sup> Ge geangga wiacsac mi garenggebesena, ogofocga yeneac wiac ifingoc meficyunuma garenggebesena. <sup>5</sup> Yesu Kristoac faka nga negen negeng fede, faka nga negen negeng sirihai imocngo ngenearu febese.

<sup>6</sup> Yeng Anutugoc siricngira mocgu kefoc nga ye Anutu kekeha kefec imoc segereudeac mi negeneac.

<sup>7</sup> Ye yengena kekec wama wanacngicac siric meec. Amma ye ngic sebi mema ngic siric fingeru henggec.

<sup>8</sup> Ye yengenaoc memaemema Anutuac yocac modackecma homec meficgema mariponnu homeec.

<sup>9</sup> Imocac amma Anutungo ye miacma engenatoa gununggeec amma kpac kuneng miec, imoc kpac sasawa ferahedacde.

<sup>10</sup> Anu yeni kurumennu nga bangecfu amma bangec bageau kecdae, yeneng Yesuac kpacfu fafoc heidacgecdeac ifi anec.

<sup>11</sup> Ifi anecac ngicngac sasawa yeni enacnginango Yesu Kristo ye Kebu, ifi dekperagigec dedengerec imocngo Anutu Manggacac ambesande.

<sup>12</sup> Imocac songoarengfocna, ngeneng warac nasosoc yoacna modacma kecgec, ngeneac wegena kecbare enacna modacgec ifi isocngoc yaguc

hereau kecbare ngeni yoacna modacmangoc wosokpidocfu nga fagung amma madzagoc uatoa mema kecmagec nasoya hau komoc kpegecde.

<sup>13</sup> Anutungo ua arenga gombunga fingerudeac ubaherenginau ua mekecde. Ifi mekefu ngeni efaigece amma ua imoc megecdeac kuc ngenmekecde. <sup>14</sup> Ngenmekefu ngeni dehesi nga negengyohoha kpac kecma ua sasawa mebisia. <sup>15</sup> Ifi amma ngeni, ngicngac mangac manganea nga sing sege segea kecdae, yeneac botucfu Anutuac nambarac amma kopocsicngina kpac kecma kpetiac nga kongaha nanggecde. Namma Anutuac yoac kekehagoc mekecma asomeng isoc bangectoa bangecfa mekperagiyemmegecde. <sup>16</sup> Ngeni ifi anggec, Kristoac nasotoau ngeneac negemba wiac kuneng anude nga neannaac yofi negembade, ni sicsauc mong mi nedziai me uatoa imoc sicsauc mi meai. <sup>17</sup> Ngeni sesegerec isoc negen negensingngina mekecdae nga ngabafocna yeni sacna imocac witiau faigece de ni sifu songo negemma ngenigoc sogaiduae.\* <sup>18</sup> Nga ngeni sing imohaingoc songo negenggec nenahafoc sogaibisina.

<sup>19</sup> Kebu Yesungo negenu naric anu naso mi hereemanu Timoteo sueba haude. Amma yeng dzigenema ngeni dafi kecdae, imocac siduc edenuu ubana ngereede. <sup>20</sup> Nocac ye isoc ngic ifia mong nigoc mi kecde, kpac. Ye mocgungo ngeneac hafoangoc angkecde. <sup>21</sup> Nga ngicngac homac yeng yenang wiacacsac negemba Yesu Kristoac uaac mong mi negengkecdae. <sup>22</sup> Nga Timoteo ye fakaya gombunga, ngeni imoc negendae. Ye medacngo mamagoc ua mekecde, if isoc nigoc siduc gombungac ua meficnuu mekecdipe. <sup>23</sup> Nga nearu sing dafi fingerude, imoc negenghomemaguc ye bic sueba haudeac negensiduae. <sup>24</sup> Amma Kebu negenserima yofi negeduae, neannaac naso mi hereemanu ifingoc ngenearu habade.

<sup>25</sup> Anu tosona Epafodito sueba ye ngenearu monggoc haudeac negenduae. Ye nigoc ua mekecde amma nigoc kecma Kebuac wasai ngic ande. Nga ngeneng ye suegec hama nanggekufung anenu wiac monggac mi obohobade. <sup>26</sup> Ye hafei ammiu siduha negenggec, imocac ye ngeneac fagung amma hereango ngeneac sasawa ammikecde. <sup>27</sup> Nga foracngoc, ye hafei ammiu homebesonga anec. Nga Anutungo yeacsac kpac, ni momoc ubamangang negennemecma ngerec ngeree meficgemiec. Ifi anu ubahodung kuneng mi fingece nene. <sup>28</sup> Nga ngeneng ye hemma ubangerec negenggecdeac nga neng ubahodunna kpac kecbadeac ye sueba ngenearu haude, imoc seria negensiyombonggeduae. <sup>29</sup> Nga ngeni Kebugoc kpeketahedaec amma ye hafoangoc hoanggema ama heimima ye nga ngic ifia goa kecdae, yeni ewehiei ayemmebisia. <sup>30</sup> Nga ngeneng meficnugecdeac obohogecac yeng hama meficnuma Yesu Kristoac uaac amma sebia memanganema homebeso anecnoc.

### 3

<sup>1</sup> Yofi torokpema deduae. Tosofocna, ngeni Kebuaru kpeketahema sogac sogaigoc kecbisia. Ni yoac warac ohongemmeai imoc monggoc ohongemebadeac modzona mi tide, kpac. Imocngo kasongina anude.

<sup>2</sup> Ngic kasi isoc kecdae, ngeni ngic yeneac henghomema kecbisia. Amma ua ngic mangana, ngeni yeneac negenghomema kecbisia amma ngic sebingina herecgema manganegec, ngeni yeneac ifingoc henghomema kecbisia.

\* **2:17:** Anutungo songo negenudeac Yuda yeni sesegerecngina witiau waindoku kpagegec. Pauroac sac siric ifu hetinggecde imocac sogaide. Bangec kisiu 15:3-10



<sup>3</sup> Anutuac Asungo faka nenearu meu Anutuac ua mekecdimbe, nenannoc sebi tosa herec herecgea areng andimbe. Neni Yesu Kristoac negenni engena ande amma negen negensinnina nenannu mong mi fainide. <sup>4</sup> Nga neannaaru negen negenna faiba feudeac negemma sifu naric ambai, fora. Nga ngic goa yeneng yenannu negen negengngina faigec feande, ifi isoc faiba febac dede neng ifingoc feracyunuma ambaiac siriha. <sup>5</sup> Nga fingecha uameme 8 ammanu sebi tosana herecgegec. Ni Israe arenunac nga Benyaminggac kisicfunac Hebirairo ngic yombong amma Hebirairo arenunac. Amma farisaioac sinnu dedeseriyoac modarai. <sup>6</sup> Ni ngombonggema kpebung yunukporac ayemmekefai amma dedeseriyoac mong mi ferahema ihai ngic dindingac kefai. <sup>7</sup> Nga warac wiac mekecma negemba memeficna anec, imoc ine yaguc Kristoac amma negemba memefiha kpac ande.

<sup>8</sup> Ni Kebuna Yesu Kristo ye negemmiba, imocngo memefiha engenatoa ande. Imocac amma warac kecma anai meai, imocac negemba memefiha kpac angkecde. Kekecnau Kristo mekecbadeac amma wiac sasawa negemba seuha andarec, imoc bic wayai. <sup>9</sup> Dedeseriyoac modacma neanna kucfu ngic dindingac ambadeac mi negensikecduae. Anutungo negen negensinggac sing yofi faiec, ngic mong ye Kristo negensinggeude, ye ngic dindingac anude. Ifiac amma Kristoaru kpeketaheba Anutungo nenu ngereudeac anengande. <sup>10</sup> Amma Kristo yengena nga Anutuac kuc yengenaoc Kristo homecfunac megboriec, imoc negemmibadeac anende. Amma yegoc kecma kpendzeng kpema yeng homeec, ifi isoc homema ye isoc ambadeac negenduae. <sup>11</sup> Ifi angkecbare nasoya hau homecfunac gborima yachesonga negensiduae.

<sup>12</sup> Ni nedzi nedzi ua hafoangoc bic mesiai me firanggac sokoc bic meai, ifi mi deduae, kpac. Yesu Kristongo menuec, imocac amma imoc mebadeac nedzi nedzi ua mekecduaengoc. <sup>13</sup> Tosofocna, ni firanggac sokoc bic meai, ifi mi negensiduae. Amma ua mocgu yofi mema kecduae. Wiac bic anai, imoc monggoc mi negensikecduae nga wiac ngade fingerude, imoc mebadeac ua serima mekecbade. <sup>14</sup> Amma ni bic yombong kpeteu sikema firanggac sokoc mebadeac nedziduae. Imocacnoc Anutungo kpacnunu Yesu Kristogoc kpeketahema kurumennu kecnide.

<sup>15</sup> Anu yadiseri bic aning, nenang sasawango ifi negensibisina. Nga ngeni wiac monggac negenggec singa siriha mong anudeu Anutungo wiac sufu sufuya imoc ifingoc mekperagingemmeude. <sup>16</sup> Nga sing mocgu modacma haing, sing imocngoc modacma kembisina.

<sup>17</sup> Tosofocna, neng waraingemmeba ngeni imoc hemma siriha imocngoc modacnubisia. Amma ngic neac sirc modackecdae, ngeni kicngina yenearu fibisia. <sup>18</sup> Warac naso homac yoac edengunukefai, imoc yaguc kiacgoc monggoc edengunudae. Ngic homac yeneng Kristoac mariponggac ngaba amma kecdae. <sup>19</sup> Ngic ifa yeni hofeac areng anggecde. Heresebinginaac songo, imocngo kebungina angkecde. Nga fakangina gameagoc, imocngo yeneac ubangerec angkecde amma yeneac negen negensi imoc bangecac kekecfu fekecde.

<sup>20</sup> Nenang kurumenggac areng kecdimbe nga kpacnina kurumennu fede. Nga neni memengerecnina Kebu Yesu Kristoac tomai kecmina yeng ihacnac hama menunu komoc kpenide. <sup>21</sup> Ye wiac sasawa yengena bageu faiudeac kuc femide. Amma yeac kuc imocngo bangecsebinina makpekpea heimerenu yengena sebi isoc kuc nga kibikperagiagoc anude.

## 4

<sup>1</sup> Tosofocna, ngeni heresongogoc hoangngunuba herenango ngeneac amikecde. Ngeneng sogac sogai meficgenemma neac irana andae. Nga songo tosofocna, ngeni imocac amma Kristoaru kpeketahama seria kecbisia.

<sup>2</sup> Euodia nga Sintike, ngeri Kebugoc kpeketahama kecma uba mocgu ambesera, dedereceyoac imoc edenguruduae. <sup>3</sup> Nga ogona geng yoac modackecnec amma nigoc ua mekecnecac desambic amma yofi edeguduae, ngac yohockang yomoc meficyurubesena. Nocac yeri nga Kremento amma ngicngac tosea goa kpacngina kekecac kibiufede, yeneng nigoc kecma siduc gombunggac ua arennu uatoa mema kecgec.

<sup>4</sup> Ngeni nasosoc Kebuaru kpeketahama kecma sogac sogaigoc kecbisia, monggoc deduae, ngeni sogac sogaigoc kecbisia. <sup>5</sup> Kebungo wegena kecde. Ngicngac sasawango ngeneac yumea kekec hentegecbisia. <sup>6</sup> Ngeneng wiac monggac negengyohoc mi ambisia. Amma ngeni wiac monggac angemme, imoc Anutuac kpara kpacma dengerema numumibisia. <sup>7</sup> Ifi ummagec Anutuac ruaengo negen negentegec sasawa ferahede, imocngo ubaherengina nga negen negengnginaac kaso anu Yesu Kristoaru kpeketahama kecgecde.

<sup>8</sup> Tosofocna, yoac mong yofi debesonga negensiduae, faka fora nga eweheiheigoc nga dindigac amma kongaha, faka henni songea angande amma negenni gombunga ande nga angammeme gombunga dengerenideac siric ande, faka sasawa ifiango negen negengngina mewakedacbeso. <sup>9</sup> Nga neng negen negeng sasawa kpoungemmeba negenggec nga wiac nearunac kedzacnginango negenggec amma kicnginango henggec, ngeni ua imoc medacbisia. Ngeni ifi anggec Anutungo ruaea ngemmema ngenigoc kefude.

<sup>10</sup> Ngeni monggoc neac negensima fakangina heigborima memeficna fainenggec, imocac Kebu dengerema sogaiduae. Ngeni warac bic neac negensigec, fora. Nga memefic sing mong mi feecac obohoma wagec.

<sup>11</sup> Ni wiac goaac obohoma dewaidzocyoc mi deanduae. Iwaina fenende, imocsac mekecma naric kecduae. Ifi kecbadeac negen negeng bic meai.

<sup>12</sup> Nga makpekpea kekec nga finactogoc kekec imoc tobanggema negenai. Amma yaka negebec kekec nga here home home kekec nga wiacna homac me efeanec kekec, Anutungo negen negeng imoc sasawa edzacnudarec.

<sup>13</sup> Kuc minginango negennemmanu wiac sasawa imoc naric andacbae.

<sup>14</sup> Ebicfu kecbareng ngeneng meficnugec, faka imocac negemba ngereede.

<sup>15</sup> Siduc gombunggac ua hanac hanaheau Makedonia prowins wama kenaimoc, imoc Firipi kpebung ngenengsac hiedzoac arennu nanggenugec, imoc negendae. <sup>16</sup> Tesaronike taonnu kecma wiac kpedadanggeai, imoc ngeneng negemma ifingoc naso goa heimefic anemma fainenggec. <sup>17</sup> Ifi deba ngeneng wiac nenggecdeac monggoc derecgeduae, ifi mi negembisia.

Ua megecac fora, imocngo yadiseri amma wiacngina kurumennu fede imocgoc torokpeude.

<sup>18</sup> Epafoditongo wiac goa ngenearunac mehaecac wiac monggac mi oboho kecha wiacna ebiriangoc fede. Nga wiac imocngo homung kerengagoc amma sese songea, Anutungo imoc henu ngereede. <sup>19</sup> Anutuna ye kperagia nga finactoyagoc. Amma yeng ngeni wiac obohodae, imoc Yesu Kristoac amma naric ngemmedarude. <sup>20</sup> Anutu ye Mannina. Yearu dedengerec nga dedengerec fekengkecbeso, imoc fora.

<sup>21</sup> Kpetiac areng sasawango Yesu Kristogoc kpeketahama kecdae, ngeni yenearu wenacngerecna edeyunubisia. Tosofocngina yei nigoc kecdimbe,

yeneac wenacngerecngina ifingoc ngenearu hade. <sup>22</sup> Nga kpetiac areng sasawa yei kecdae, yeneng ifingoc ngeneac wenacngerec dedae. Amma Sisaac areng yeac amau kecdae, yeneng wenacngerecngina seria yombong faingemmedae.

<sup>23</sup> Kebunina Yesu Kristoac wosoefacngo ubaonganginagoc febeso.

## Paurongo Korosai Kpebung Yeneac Kibi Ohoec

<sup>1</sup> Pauro nga Timoteo nerearunac. Anutungo negennenu Yesu Kristoac aposoro anduae nga Timoteo ye negen negensinggoc tosonina. <sup>2</sup> Kpetiac areng nga ngicngac Kristogoc kpeketahema ye negensinggema Korosai taonnu kecdae, kibi yomoc ngenearu faide hade. Anutu Manninango danggunoc ngemmema ruaea ngemmeso.

<sup>3</sup> Neni ngeneac amma nunumu ua meandimbesoc, Kebunina Yesu Kristo yeac Manggac nga Anutu dangge edeandimbe. <sup>4</sup> Nocac ngeni Yesu Kristoaru kpeketahema ye negensinggema kecma kpetiac areng sasawa heresongogoc hoangyunuandae, ngic yeneng imoc edenunugec bic negening. <sup>5</sup> Ye wiac kurumennu faiu tomaingina fede imoc ngade megedeac negensinggema kecdae. Nga kurumenggac siduc gombunggac yoac fora <sup>6</sup> ngenearu bic hasikeu negenggec, imocngo bangectoa bangec imohai fingecyadi amma fora gombunga meficgeude. Nga ngeni Anutuac wosoefacac siriha hentegecma siduc gombung negenggec, imohacnac erekecma yaguc ifingoc ngenearu yadima kecde.

<sup>7-8</sup> Asungo ngenearu ua meu heresongogoc hoangemedae, songo tosonina Epafarango siduc imoc anemmeec. Epafara ye Anutuac wosoefacac siriha kpoungemmeec amma ye yofinenggac meficngunuma Kristoac kingangkpeke kecde.

<sup>9</sup> Anu hanahema ngeneac siduc negening, imohacnac ngeneac amma tatahoc numuma kpesi kpesi yofi kpesikecdimbe, Anutungo wiac negenu ngereede, negen negeng imocngo mewakengunuu Asu yengenaoc negen negeng gombunga nga negen negentegec ngemmeso. <sup>10</sup> Ifi fingeru ngeni Kebuac yoac hafoangoc modacgec yeng imoc hendacma negenggereede. Nga ngeni ua nga angammenginaac fora gombunga meficgedacma Anutuac negen negennu yadiseri monggoc anggecde. <sup>11</sup> Nga yengena kuc nga kibikperagitoa imocngo meseringunuude. Ifi anu ngeni kuc sasawa mema sogac sogalgoc modzotitia kpac seria yombong kecgecde.

<sup>12</sup> Anutu Manggacngo kpataning arenggac wiac kperagiu faifaia fede, imoc menideac mengerenunuec. Nga ngeni yearu sogac sogalgoc dangge dema kecbisia. <sup>13</sup> Imoc yofiac, kundungngo garennunuudeac uayoac nga kuc mekefec. Mekecmanu Manggacngo imocac kucfunac meicnunuma Songomedahaac eucererennu fainunuec nga nenang yofinenggac ifi kecdimbengoc. <sup>14</sup> Medaha ye donina meu Anutungo kopocsicnina waec. <sup>15</sup> Medac ye Anutu mi hengena yeac siric kefec amma kecde. Kecma wiac sasawa mi fingecmanu ye Anutuarunac kponanga mocgu tohoma fingerec. Fingecma waradacnina amma kecde. <sup>16</sup> Nga Anutungo Medahaac negensima wiac sasawa yeac anudeac Medahaarusing wiac sasawa bangecfu nga kurumenga kurumenga manau fedacde, imoc meficgeoc. Yeneac areng yofi, wiac kicngo hengena nga mi hengena amma sawakebangau ngictau tatacnginagoc nga kebuareng kecdae amma ngic yei enara tatac mema kecdae nga ngic gawamang uanina megedeac uayoacnginagoc kecdae. <sup>17</sup> Nga wiac sasawa mi fingecmanu ye bic kefec amma yeng wiac sasawaac haniatoa mocgunoc.

<sup>18</sup> Ye kpebunggac oruha nga kpebungngo yeac forakebanga. Amma ye warac warac tatacfu tarudeac warainemmema homecfunac yacma fingerec. Fingecma kpebunggac hanac hanahea kecede. <sup>19</sup> Anutungo yofi negensiu ngereec, "Yeac ubahereau hafaogoc tabade." <sup>20</sup> Ye medahaac ifi negemma wiac sasawa bancecfu nga kurumennu fede, imoc Anutugoc uba mocgu anggecdeac medahaac sawa mariponnu maec, imoc mema wiac sasawa imocngo mengereu ruae fingerec.

<sup>21</sup> Anu ngeni warac ubanegen negengnginango Anutuac kuric kecma yeac ngabafora amma angammemengina manganagoc kecgec. <sup>22</sup> Ifi kecma kpetiac nga kpataning amma kopocsicngina kpac anggecdeac yeng mengunuma yeac kicfu faingunuu nangecdeac negenec. Imoc fingerudeac ye homeec, naso imohaingoc yengena sebiu ngeneac kopocsicac turunga kpouu ruae fingerec. <sup>23</sup> Ngic yengeng warac siduc gombung imoc dekperagigec ngeni nga wiac sasawa Anutungo deu fingecgec, yeni yoac imoc negenggec. Anu ngeni siduc gombunggac fora ihai tiserima namma mi wagecdeu ngeni yeac kicfu nangecde. Nga Pauro neng yoac imocac kingangkpekke kecbadeac Anutungo meficnuec.

<sup>24-25</sup> Anutungo ua arenga nenec imocac siriha yofi, neng yeac yoac hafaogoc ngenearu dekperagibadeac ua arenga nenec. Nenu yoac imocac kingangkpekke anai. Nga ngeni Kristoac kpebung yengena forakebanga. Ngeni yeac amma kpendzeng soha mi kpegec. Nga neng meficngunuma ngeneac amma neanna sebiu kpendzeng kpeduae. Ifi kpema ubangerec negenduae. <sup>26</sup> Amma siduc gombung dekecduae, imoc warac nasoya nasoya ngicngac areng sasawa keceregec yenearu sufu sufu feec. Ifi feu yofinenggac yengena kpetiac areng kecdae, ngenearu fingectegecde.

<sup>27</sup> Anutungo yoac sufu sufuya feec, imoc kpetiac areng ngenearu dekperagiudeac negenec. Yoac sufu sufuya yofi feec, yeng bangec monnunac ngicngac, yenearu kuc nga kibikperagi homacngoc edzacyunuude. Imoc yofi, Kristongo ubaherenginau kecede nga yeac uaac amma Anutungo kurumennu ngeneac kuc nga kibikperagi faiu tomaingina fede. <sup>28</sup> Nga neni ye dekperagiyemmema ngicngac sasawa tembus tembus gorongina kpema negen negentegecgoc yombong yoac edekpou ayemmekecdimbe. Ifi ayemmeni ngicngac tembus tembus yeni Anutuac kicfu Yesu Kristogoc kpeturangema yadiseri amma nangecdeac gorongina kpekecdimbe. <sup>29</sup> Gorongina kpeni Kristo yengena kuctoango nanggunuma meficnumanu uatoa ebiringoc mema kecduae amma mekecbadengoc.

## 2

<sup>1</sup> Korosai ngicngac ngeni nga Raodikea ngicngac amma sasawango kicmesuna mi negendae, ngeneac nga yeneac amma kpendzeng kpema uatoa mekecduae, ngeni imoc negenggecdeac negenduae. <sup>2</sup> Ni kpebung ngeneac ubaherengina demeseri ambadeac uatoa mekecduae. Ifi amba ngeni ubango hoangemema hafaogoc negen negeng seria megecede. Imocngofinactoa isoc fengemmu Anutuac yoac sufu sufuya negentegecyombonggecede. Amma yeac yoac sufu sufuya imoc Kristonoc. <sup>3</sup> Yearunoc negen negentegec nga negen negenggac finactoa sasawa sufu sufuya fede. <sup>4</sup> Nga ngic mongngo ikocyoc dema tobangngunuma uba mesufu angemmebauac kibi yomoc ohongemmeduae. <sup>5</sup> Ni sebingo ngenigoc mi kecduae, fora.

Nga ongaasuu ine ngenigoc kecma yofi negenduae, ngeni Kristoaru kpeketahema ye seria negensinggema kekecngina gombunga arenggekecdae. Ifi ngenemma sogaiduae.

<sup>6</sup> Ngeni Yesu Kristo Kebungina mema ubaherenginau faima hoanggegec, imoc siriha ngeni ye modacma kecbisia. <sup>7</sup> Amma ngeni yearu godongina seria mema yadiseri ambisia. Nga yoac edekpou angemmeing, imocngo negen negensingngina meseriu nambisia. Nga ngenearu dedengerec ebiringoc febeso.

<sup>8</sup> Ngic mongngo ngicdede dema ikocfu wangepngunubauac ngeni henghomema kecbisia. Negen negeng ifia, imoc Kristoaruac kpac. Imoc esangabofocngina yenearuac bangectoa bangec, imocac hadehadegoc meficgegec. <sup>9</sup> Imoc yofiac, Kristo yengena sebiu Anutu yengena kekeha hafoangoc fekecde. <sup>10</sup> Kristo ye sawau nga bangecfu enarameme nga kucnginagoc kecdae, yeneac oruha. Nga ngeni yegoc kpeketahema kecmagec yeng mewakengunuude. <sup>11</sup> Anu ngeni yegoc kpeketahema kegec ngenearu herec herecgeac faka fingerec.\* Ua imoc ngic mariu mongngo mi meec, kpac. Kristongo herec herecge ua imoc mema ubangina esea herecema hesima ukuec. <sup>12</sup> Ukuu Anutungo dokunadzicfu Kristogoc tonggongunuec. Nga Antungo Kristo homecfunac megboriec. Anutungo ua kuhagoc meande, ngeneng imoc negensinggegec yeng sing imohai ngeni ifingoc Kristogoc megboringunuec.

<sup>13</sup> Anu ngeni warac homemea kecma uba eseangina mi herec herecgea Anutuac yoac kpekecma singa ferahegec. Nga yeng Kristogoc megboringunuma yoackpekpengina sasawa wangemmedacma monggoc mi negensiec. <sup>14</sup> Kopocsicac kibi mong oho ohoya feec, imocngo manganangina heficgenemmeec nga Kristongo kibi imocnoc biringngo mariponnu kpeu nanec. Ye ifi anu yoac kibi oho ohoya feec, imoc meickema dzuacdaec. <sup>15</sup> Amma ye yengenaoc mariponnu nanec, imohaingoc sawau me bangecfu enarameme nga kucnginagoc kecdae, yeneac dzikacac wiacngina hesiyemmedaru eng didu nangec.

<sup>16</sup> Imocac amma ngic mongngo nenedokungina siriha amma tacnegeng nasotoa me sabatanaso me afo gboria made, naso imohai dafi tacandae, yeni naric mi isingngunuma demanganengunubisia. <sup>17</sup> Wiac imoc sasawa, imoc wiac ngade fingerude, imocac ongaonga nga Kristongo wiac fora ande. <sup>18</sup> Nga goa yeni kpefing hania hania hengkecma ikocfu memaemema angero dengereyunduandae, yeneng firangac iraga mebauac yeneac yoac mi modacbesena. Ngic ifia yeni ubangina eseaac negen negeng sicsauc modacma eng yenangac negenggec wiac engena angkecde amma yoackpekpegoc kecdae. <sup>19</sup> Areng ifia yeni kpebungac oruha Kristo wama kecandae. Yearunac sic ginoninna mama sebinina kpeturanggema nangeande. Ifi anu Anutuarunac yadi mekecdimbe.

<sup>20</sup> Anu ngeni Kristogoc homema bangectoa bangec imocac hadehade bic wagec ifi isoc andeu, ngeni bangecac ngicngac siricfu yeneac bageu mong mi kecbisia, kpac. <sup>21</sup> Ge imoc mi mebesena nga imoc mi nebesena amma imoc mi kpeserebesena, ifi degec mi ngereude. <sup>22</sup> Imoc ngicac dede nga ngicac negen negengsac nga wiac imoc ngeneng menec amma mekegec kpac anudeac faifaia. <sup>23</sup> Anu ngic ifia yeni yenaoc deandae, "Yoacnina imoc negen negentegecog." Yeni ifi dema yenaoc miti arengngina meficgeemema

\* 2:11: Yuda yeni sebi tosangina herecgegec. Paurongo faka imoc negensima yoac heima deec.

yegec nunumu nga memaemema faka ikoha modacma wiac hania haniaac segekecma ngicngac warecyunugecdeac sebingina memanganeandae. Nga faka ifiango fora mong mi meficgeude, kpac. Imoc uba eseac negen negeng hania meseriude.

### 3

<sup>1</sup> Ngeni Yesugoc homecfunac momoc gborima yacgec, ifi dema wiac wi fede, imocac angemebesoo. Kristongo imohai Anutuac foiau tacde. <sup>2</sup> Ngeni wiac wi fede, imocac negensima kecma bangecfu wiac fede, imocac ine mi negensibisia. <sup>3</sup> Ngeni bic Kristogoc homegec kekecngina yegoc Anutuaru sufuu, ngeni yeac hoannu kecdae. <sup>4</sup> Kristo ye kekecnginaac hania. Yeng fingectegeru, naso imohai ngeneng yegoc yeac kuc nga kibikperagiau nge-nahafoc fingectegecgecde.

<sup>5</sup> Imocac ngeni bangecac songo hania hania herenginuu fengemme-de, imoc wagec homebesoo. Faka imoc yofia, kaisero nga songo ikoha amma faka seuhagoc nga faka mangana amma kichodung. Kichodung imocngonoc nemuac afec afehe faka ande. <sup>6</sup> Nga ngicngac yengeng faka mangana ifia sa-sawa mekecma Anutuac yoac kpegec yeng imocac turunga kpouyemmeude. <sup>7</sup> Ngeni warac yenigoc kecma faka ifia homac angkecgec. <sup>8</sup> Amma ngeni yaguc herebu nga faka gereagoc amma ngaba imoc wabisia. Nga desureyoac amma tenicfagoc imoc enacnginaunac mi ereudeac garengemebisia.

<sup>9</sup> Ngeni ikoc mi angemebisia nocac ngeni ubasebingina esea angam-memeagoc bic hesima wagec. <sup>10</sup> Ngeni imoc wama ubasebingina gboria heima mekecdae. Nga Anutungo ubasebingina gboria meficgema monggoc heigborima negen negentegec foragoc faingemmu imoc yengena siric anude. <sup>11</sup> Ifi heigboringunuu ngeni grikgic me yudangic andae, imocac dede kpac ande. Nga ngeni sebi tosangina herec herecgea me sebi tosangina mi herec herecgea nga ngeni grikgic arennu mi torokpedae me bangec hereaunac ifi yombong kecdae me ngeni ngicngac wanaha mingingngi-nagoc kecdae me witiha kpac kecdae, imocac mi dedimbe, Kristongo ngic-ngac ngeneac ubahereu hafoangoc kefudeu, imocngo wiac fora ande.

<sup>12</sup> Anutungo heresongogoc hoangngunuma meisingngunuu yeac kpatan-ing areng kecdaeac ngeni ubaherenginanoo ngicngac yeneac ubamangang negemma wosoefac ayemmebisia. Amma memaemema yumea kecma ngicngac ogofocngina yeneac modzongina mi tibeso. Ngeni faka imoc sasawa wamba isoc heigec kemeu mekecbisia. <sup>13</sup> Amma ngeni ngicngac ogo-focngina yeneac modzongina mi tiu kopocsicngina waemmebisia. Kebungo ngeneac kopocsic bic wangemmeer, ifi isoc ngic mongngo ngic monggac yoac mekecdeu kopocsicngina waemekecbisia.

<sup>14</sup> Anu ngeni imoc sasawa angkecma heresongogoc hoangemema kecbisia. Ifi kecec heresongongo witic isoc amma dzegengunuu ngeni yadiseri hafoa mocgu amma kecgecde. <sup>15</sup> Ifi kecmagec Kristoac ruaengo herengina garenggebesoo. Ngeni ifi anggecdeac yeng bic kpacngunuec. Ifi anu ngeni ruaegoc sebi mocgu amma dange dema kecbisia.

<sup>16</sup> Kristoac yoacngo ubaherengina mewakebesoo. Nga negen negentegec-goc edekpou angemema gorongina kpeemmebisia. Nga Mitiyegecfu yegec fede nga uba furiau yegec amma Tiri Asungo yegec heficngememe kecde, ngeni imoc ubangerecgc Anutu heimibisia. <sup>17</sup> Ngeni wiac sasawa degecde me anggecde, ngeni imoc Kebu Yesuac kpacfu ambisia. Amma ngeni ye negensima Manggac ubangerec edebisia.



<sup>18</sup> Ngac, ngeni ewefocngina yeneac yoac tofohobisia, nocac Kebuac dedeu faka imocngo naric anude. <sup>19</sup> Ngic, ngeni enengfocngina heresongogoc hoangyunubisia nga modzotiti me ngaba mong mi meficgeyemmebisia. <sup>20</sup> Nambarac, ngeni wiac sasawa negemma nonggo mangfocngina yeneac enac tofohodacbisia. Kebungo faka ifia negenu ngereede. <sup>21</sup> Nambarac yeni mangfocngina yeneac modzongina tiu ihoc bahoc ambauac manggac ngeni wosomeme yoac mi ayemmebisia.

<sup>22</sup> Ngic wanac kecdae, ngeneac mingingfocngina yeneng imoc me imoc degec ngeni yoacngina negemma hafoangoc modacbisia. Yeni ubangerec negenggecdeac yeneac kicfusac enac tofoc tofoho mi ambisia. Ngeni uau ubangina suema Kebu eweheimima uangina mekecbisia. <sup>23</sup> Amma ua imoc me imoc megecde, imohai ubangina suebisia. Ngeni imoc ngic yeneac amma mi mebisia, kpac. Ngeni Kebuac negemma uangina mebisia. <sup>24</sup> Ifi megec Kebungo turunga kpoungemmema maridzominga ngenmeude. Nga Kristongo ngeneac mingingngina nga ngeni yeac uanoc mekecdae. <sup>25</sup> Kebu ye monde mondea kpac. Imocac ngic mongngo faka angammeme mangana mekefu Kebungo imocac sirihau turunga miude.

#### 4

<sup>1</sup> Ngeni yofi bic negendae, ngeneac ngic kunengngo wi kurumennu kecde. Imocac ngic ngeni wanac areng mingina kecdae, ngeni ua arengfocngina faka dindingacfu nga sirihau ayemmekecbisia.

<sup>2</sup> Anu ngeni nunumu uau serima ubagbori kecma dengerebisia. <sup>3</sup> Ngeni neneac ifingoc negemma yofi numubisia: Anutungo yoacac nagu menem-meu Kristoac negen negeng sufu sufuya fede, imoc dekperagini negembisia. Yoac imocacnoc witicamau kecduae. <sup>4</sup> Yoac imoc didiu faima yoac sirihau dekperagibadeac numubisia.

<sup>5</sup> Ngeni ngicngac ngadeau kecdae, yeneac botucfu negen negentegecgoc kecma Kebuac sing edzacyunugecdeac nasongina mi ukubisia. <sup>6</sup> Nga ngeni nasosoc ngicngac tambuc tembuc yeneac yoac turunga dafi merengyemegec negenggecdeac amma yoacnginango wosoefacgoc kondunggac songo angkecde, ifi isoc ambeso.

<sup>7</sup> Nga neac yoacsiduc, imoc Tikikongo angemmedarude. Ni heresongogoc hoanggekecduae nga ye modzotitia kpac Kebuac enac tofohoma kecde. Kebu ye minginnina anu yegoc nenahafoc kpeketahema yeac wanac areng amma momoc kecdimbe. <sup>8</sup> Yennoc neni kecdimbe imocac sirihau eden-gunuudeac nga ngeni ubaherengina meseriudeac sueba hangemmede. <sup>9</sup> Anu yegoc ngeneac amamocgungina mong, Onesimo, sueni haecde. Onesimo ye uayaac goiya heiande, amma ye heresongogoc hoanggema kecdimbe. Nga yereng faka yei fingerec, imocac siduc angemmedarecde.

<sup>10</sup> Nga Aristako ye nigoc witicamau taric, yeng ngeneac wenacngerec deu hade. Nga Mareko, Banabaac nebera yeng ifingoc wenacngerec dede. Ngeni yeac dedekperagiyoac bic megec, yeng ngenearu haude isoc ubangerecgc ama heimibisia. <sup>11</sup> Amma Yesu, kpara mong Yusto, ye wenacngerec deu hade. Ngic harebec imoc yenengsac sebi tosangina herec herecgeaac aren-nunacngo meficnuma Anutuac eucererenggac ua nenahafoc mekecdimbe. Yeneng meserinuma kecgoc amma kecdaengoc.

<sup>12</sup> Kristoac wanacngic Epafara, ye ngeneac arenunacnoc, yeac wenacngerecngo ngenearu hade. Amma ngeneng yadiseri amma nanggecdeac nga Anutuac negen negeng nga songo sasawa ireckema imohai hafoangoc

kecgecdeac, ye ifi negemma ngeneac amma nasosoc nunumu ua ebiriangoc mekecde. <sup>13</sup> Ye ngeni nga Raodikea ngicngac amma Hierapori ngicngac ngeneac amma uatoa mekecde, imocac hepuc amma edengunuduae. <sup>14</sup> Nga Ruka, dota heresongogoc hoanggedimbe, ye nga Dema, yereng wenacngerecngira ifingoc faiec ngenearu hade. <sup>15</sup> Amma Nimfa nga kpebung yeac amau kpedzucneandae nga Raodikea taonnunac tosofocna yenearu wenacngerecna faini hade.

<sup>16</sup> Anu ngeni kibi yomoc garenggema osoma faigec Raodikea kpebung, yenearu kenu yeneng hemma osobisia. Amma neac kibi Raodikeanac haude siriha imocngoc yombong osobisia. <sup>17</sup> Nga Arkipo yofi edebisia, “Kebungo ua bic genec, ge ua imoc hafoangoc modacma mekecbesena.”

<sup>18</sup> Anu Pouro ni wenacngerecna yomoc neanna maringo ohongemmeduae. Nga witicamaungoc tacduaeac neac negensibisia. Kebuac danggunucngo ngenearu febeso.

## Paurongo Tesaronike Kpebung Yeneac Warackibi Ohoec

<sup>1</sup> Pauro, Siriwano nga Timoteo, neneng Anutu Manggac nga Kebu Yesu Kristogoc kpeketahema kecma Tesaronike kpebung ngeneac kibi yomoc faidimbe. Wosoefac nga ruae ngenearu febeso.

<sup>2-3</sup> Neni tatahoc ngeneac amma dangge dema Anutu Manninaac kicfu nunumuninau negensingunukecdimbe. Ngeni negensinggema angam-meme gombunga meficgema ngicngac heresongogoc hoangyunugecdeac uatoa meandae. Amma ngeni modzotitia kpac kecma Kebunina Yesu Kristo, yeac negenserima kecdae.

<sup>4</sup> Tosofocnina, Anutungo ngeni heresongogoc hoangngunuma meisingn-gunuec, imoc negendimbe. <sup>5</sup> Imocac hania yofi, neni ngenearu siduc gombung mehaing, imoc kuhagoc nga Tiri Asugoc amma negen negenseri hafoangoc mekecma mehama ngemmeing, neni yoacsac mi ngemmeing, kpac. Ngenigoc kefing, imohai ngeneac amma areng aning amma meing, ngeni imocac siriha negendae. <sup>6</sup> Ngeni kpendzeng homac kpema Anutuac yoac negemma hoanggegec. Hoanggegec Tiri Asungo meefaingunuu sogac sogaigoc kecgec. Ngeni ifi amma fakanina modacma kemma Kebuac faka ifingoc modacma kecdae.

<sup>7</sup> Imocac Makedonia nga Akaiia ngicngac negen negensinggoc kecdae, yeni fakangina gombunga ifia hemma imoc ifingoc modacdae. <sup>8</sup> Kebuac yoacng ngenearunac hanahema Makedonia nga Akaiia bangecfu desahegec kenu negenggec. Nga ngeni Anutu negensinggegec, yoacsiduc imocngo ifingoc bangec noboc noboc sokoma kenec. Ifi anu neneng ua yenearu torokpema mekengkeng imoc ngeneng meefaigec. <sup>9</sup> Neni yenearu kenni yeni yenaoc Tesaronike ngeneac siduc yofi edenunugec, "Pauro ogohoragoc ngenearu hagec ngeni heitaiyunugec. Amma ngeni Anutu kekehagoc nga yoara foragoc yeac wanac areng anggecdeac nemungina hania hania wama Anutuaru kenggec. <sup>10</sup> Amma yofinenggac Medaha kurumennunac maudeac tomai kecdae." yeneng siduc ifi anemmegec. Anutungo Medaha Yesu megboriu homecfunac gborima yarec nga yennoc ebicfunac mesinunuu turing kpoukpou nasoya hau komoc kpenide. Ngeni imoc negensinggedae.

## 2

<sup>1</sup> Tosofocna, neni ngenearu hama kefing, imocngo foragoc anec, imoc nge-naoc negendae. <sup>2</sup> Neni Firipi bangecfu warac kecmina yeneng kpendzenu fainunuma nununenere anemmegec. Nga ngenearu hani Tesaronike ngicngac goa yeneng ifingoc homacngoc yombong deendema anemmegec. Ifi anemmegec neni Anutuaru heirima kengeha kpac kecma Anutuac siduc gombung dekperagingemmeing, ngeni imoc negendae. (*Aposoro 16:16-40*) <sup>3</sup> Yoac sicsauc mong mi dekperagingemmeing, kpac. Amma ikocfu wiac mong wangecngununideac mi aning. Amma ngac yenigoc sicsauc kecnideac faka mong mi meing. <sup>4</sup> Nga Anutungo nenenu naric anecac siduc gombung naric dekperaginide. Ngic yeneng negenggec ngereudeac yoac mong mi edengunukecdimbe, kpac. Anutu here heheng mingina, yeng songogoc negennemmeudeac yoacnina dekecdimbe.

<sup>5</sup> Amma neni dekerecyoac mong mi edengunuing nga kichodung faka mong ifingoc mi aning, kpac. Imoc Anutungo hepucnina anemmede, imoc negendae. <sup>6</sup> Nga ngic yenearunac kpackuneng menideac mong mi anemmede. Amma ngenearunac nga ngic goa yenearunac ifingoc mong mi anemmeande. <sup>7</sup> Neni botucnginau Kristoac aposoro kecdimbe, imoc wiac kuneng. Nga sifu memaemema yumea kefing. Nenggac mongngo yengena sabaha namu mima garenggeande, siriha imocacsoc garenggunuing. <sup>8</sup> Amma ngenigoc kecma ngeneac heresongotoa negemma hoangngunuma songogoc Anutuac siduc gombung kpoungemmema mong mi merandziing. Nga imocsac kpac, neni ifingoc ngeneac amma kekecnina naric wanideac negening.

<sup>9</sup> Anutuac siduc gombung edekpou angemmeing, naso imohai ngenigoc kecma dzofinacac ebic mong mi meficgengemmenideac hadzing tofocnac uatoa kpendzenggoc mema kefing, imoc bic negendae. <sup>10</sup> Negen negensinggoc tosofocna, neni kpetiac nga dindingac amma kopocsiha kpac faka ifia mema ngenigoc kefing, ngeni imoc hemma negemmagec Anutungo ifingoc hepuc anemmeec. <sup>11-12</sup> Ngeni Anutuac eucererenggac kuc nga kibikperagiagoc imohai kecgedecac yeng heitaingunuec. Ngeni yeac negen negeng nga songo modacgedecac amma manggacngo yengena nambaracfora meseriyunuma nanggeyunuandae, neni ifi isoc angemmeing.

<sup>13</sup> Anu ngenearu hama Anutuac yoac dekperagini negemma degec, “Imoc Anutuac yoac, imoc ngicyoac kpac.” Ifi dema yoara hoanggegec. Imocac amma neneng nasosoc Anutu dangge edekcdimbe. Anutuac yoac deing, yoara imoc fora yombong, imoc negensinggec nga imocngo ubaherenginau uaya mekecede. <sup>14</sup> Tosofocna, Anutuac kpebung Yudaia bangecfu Yesu Kristogoc kpeketahema kecdae, yenearu kpendzeng fingerec, siriha imocngoc ngenearu ifingoc fingeru yeni isoc anggec. Areng goa ngeneac bangecfunac ebic imoc meficgengemmegec. Ifi isoc yeneng ifingoc arengfocngina yudangicngac yenearunac ebic meficgegec. <sup>15-16</sup> Yenennoc Yesu nga profete yunuhomegec nga yeneng ifingoc nunukporac anemmegec. Bangec monnunac ngicngac yeneng komoc kpegedecac neni Anutuac yoac edeyunuandimbe. Anu yeni imoc mi anggecdeac yudangic yeni uanina kpetarima ngicngac sasawa ngadeyunuandae. Anutungo imoc hemma negenu mi ngereande, yeni nasosoc kopocsicngina torokpeu torokpe kecdae. Yudangic yeneng ifi anggec yeng imocac turunga wisic wisicseau yemmeec.

<sup>17</sup> Tosofocna, naso wegenanec nenahafoc kecma sebingosac wangunuing, imoc ubahereninango kpac. Ifiac amma kicmesungina monggoc hennideac homac anemmekecede. <sup>18</sup> Nocac neni ngenearu monggoc habesonga negensima kefing, fora. Neannaoc ngenearu habadeac naso homac bic tobanggeai. — Nga Satangno ine sinnina hedzickeu obohoing. <sup>19</sup> Kebu Yesungo hama ngenemma neneac uaac amma naric deude. Ngeni firanggac kpeteac iranina andae. Neni ifi negensima sogaidimbe. <sup>20</sup> Ngeni neneac dedengerec nga sogac sogainina andae.

### 3

<sup>1-2</sup> Anu neni ngeneac negensima ubanina fafic kuneng anu yofi deing, “Neneng Ateng amau naric tacma tosonina Timoteo sueni kembeso.” Ifi dema sueni haec. Timoteo ye Anutuac ua ngicngo nenigoc momoc kecma Kristoac siduc gombung dekperagikecede. Yeng ngenearu hama negen negensinnu meficngunuma negen negengngina midima meseringunuudeac dema sueni

haec. <sup>3</sup> Ebic hania hania ifiangoc ngenearu fingeru ngicngac goa yeneng kengkppe hakpe ambauac nga Anutungo ebic ifia tofohonideac negennem-meec, imoc ngenaoc negendae. <sup>4</sup> Ngic yeneng nunukporac anggecde, imoc ngenigoc kecma bic edengunuung. Amma imoc bic fingerec, ngeni imoc negendae. <sup>5</sup> Imocac amma ni ifi kecha ubana kuha mau ngenae negen negensingninaac siriha negembadeac Timoteo sueba ngenearu haec. Nga uatoa ngenearu meing, imoc faitobang ngicngo tobangngunuu ine fora kpac ambacac.

<sup>6</sup> Anu Timoteongo ngenearunac dzigenema ubangerec yoac mehama gombungangina yofi edenunudarec, ngeni negen negensingnginagoc kecma heresongogoc hoangemekecdae. Amma ngeni nasosoc neneac negensima ubaefac angkecdae. Amma neni kicmesungina hennideac anemmede, ifi isoc ngeni kicmesunina henggecdeac angemmekecde, ifi edenunuec. <sup>7</sup> Tosofocnina, neni medac kpedadang nga kpendzeng sasawaac witiu kecmina ngeneac negen negensinggac siducngo neneac herenina meseriec. <sup>8</sup> Nga ngeni Kebugoc kpeketahema kekecngina seria kecdaeac amma neni naric kecdimbe. <sup>9</sup> Anu neni ngeneac amma Anutunina monggoc nga monggoc dengerenideac negendimbe nga ngeneac amma yeac kicfu songogoc kecma dangge edeni ngereeude. <sup>10</sup> Nga neni kicmesungina hennideac hadzing tofocnac heregoc seriyombonggema numukecdimbe. Nga negen negensingnginau kapainec kpedadangedae, imoc meficngununideac negendimbe.

<sup>11</sup> Anu Mannina Anutu nga Kebunina Yesu yereng sinnina edzacnunumaec neni ngenearu habisina. <sup>12</sup> Nga heresongogoc hoangngunukecdimbe, ngeneng siriha imocacsoc heresongogoc hoangemema ngicngac tosea goa ifingoc heresongogoc hoangyunuma kecbisia. Ifi kecmagec Kebu Yesu yengenaoc songongina meyadingemmeu torokpeu torokpe amma monggoc yadibeso. <sup>13</sup> Ifi anu ye ubaherengina meserikecde amma kpetiac arengfora yenigoc maude, imohai ngeni kpetiac nga kopocsicngina kpac kecma Anutu Mannina yeac kicfu nanggecde.

## 4

<sup>1</sup> Tosofocnina, neni Kebu Yesugoc kpeketahema negen negengngina mi-acnideac goroyoac yofi torokpema monggoc dedimbe. Anutungo ngenenu ngereeudeac ngeni yeac sing modacbisia. Ngeni yofinenggac ifi kecdae nga imocngo botucnginau yadiseri ambeso. <sup>2</sup> Neni dederecgeyoac Kebu Yesuarunac negemma edengunuung, imoc sasawa negendae. <sup>3</sup> Imoc yofiac, Anutuac negen negeng nga songo yofi fede, ngeni kaisero wama kpetiac yombong ambisia. <sup>4</sup> Amma ngicngac tembus tembus ngeni kpetiac nga dindingac kecma sebingina gombunga garengemebisia. <sup>5</sup> Bangec mon-nunac ngicngac yení Anutu mi negemmima sebiugenggac kekek, imoc songotoa negemma modacma kecdae, ngeni ifi isoc mi ambisia. <sup>6</sup> Ngeni se-biugenggac songoac amma tosofocngina yeneac engengfongngina yenigoc sero mi ambisia. Kebungo kopocsic ifia negemma turunga yemmeude, neni imocac gorongina seria kpema bic edengunuung. <sup>7</sup> Anutungo kpetiac kecnideac kpacnunuec. Sebiac songogoc kecnideac mi edenunuec, kpac. <sup>8</sup> Imocac amma yofi ande, ngenearunac mongngo yoac yomoc kpema ngade-heude, ye ngic yoac mi ngadehede, ye ine Anutu kpetiac Asu ngemmeeac, yengena yoac kpeude.

<sup>9</sup> Ngeni heresongogoc hoangemegecdeac Anutungo sing imoc bic edekpou angemmeec. Imocac ngeni negen negensinggoc tosofocngina heresongogoc hoangemegecdeac yoac mong mi obohodae. Nga neneng yoac imoc monggoc mi ohongemmenide. <sup>10</sup> Fora, ngeneng tosofocnina Makedonia bangec noboc noboc kpebang hafoangoc kecdac, yeni sasawa heresongogoc hoangyunu kecdac, faka imocngo botucnginau yaditegerudeac negen negengngina midima dedimbe. <sup>11</sup> Nga ngeni yumea kecma uangina garenggegecdeac negen negengngina seria febeso. Warac edengunuung, ifi isoc ngenaoc maringinango ua mekecbisia. <sup>12</sup> Ifi anggec ngic ngadeau kecdac, yeneac kicfu angammengina dindingacngo herengina wingegec eweheingemmegecde nga ngeni wiac monggac naric mi obohogece.

<sup>13</sup> Ngicngac yeni kurumenggac mi negemma, yeni homecnasou kiac songgong ebiria angandae. Tosofocnina, ngeni yeni isoc ubamangang mi negembisia. Ngeni homegec yenearu noc wiac fingerude, imocac hania negenghomegecdeac songonina ande. <sup>14</sup> Imoc yofiac, Yesungo homema yarec, imoc forangoc negensinggedimbe. Imocac amma ngicngac yeni Yesu negensinggema bic homegec, Anutungo yeni hesicyunuu Yesugoc hagecde, imoc ifingoc negensinggedimbe. <sup>15</sup> Ngicngac Kebuac hahanasoyau gbori kecdimbe, nenang ngic homegec, yeni naric mi waraiyemmenide, imoc Kebuac dede mong modacma edengunudimbe. <sup>16</sup> Kebungo imohai yoac kuhagoc demanu angero yeneac enarangina mong yeac ubaudumeng fingerude. Imohaingoc Anutuac trampet arohoude. Arohomanu Kebu yengenaoc kurumennunac sawau maude. Mau ngicngac Kristogoc kpeketahema homegec, yeneng waraima gborima yacgecde. <sup>17</sup> Yacgec ngicngac gbori kecdimbe, nenang yenigoc ifingoc hoeng manau kpedzinunuu nena-hafoc sawau Kebugoc ewacnide. Ewacma Kebugoc nasoya nasoya kecnide. <sup>18</sup> Ifi negemma ngeni imocac amma yoac yomocngo denange angemema meseriemema kecbisia.

## 5

<sup>1-2</sup> Tosofocnina, Kebuac nasotoa imocngo hamangecngic yeneng tofocnac haandae, ifi isoc haude. Ngeni ngenaoc imoc bic negenghomedae. Imocac noc nasou me yabung nofu yomoc fingerude, imoc kibiung monggoc naric mi ohongemmenide. <sup>3</sup> Nga ngicngac yeni degecde, “Ruae nga garengagoc kecdimbe.” Ifi dekecmagec, naso imohaingoc memangac manganea ebic fingecyemmeude. Ebic imoc ngac heregoc medac meudeac naso mi negemmanu gadze kiande, ifi isoc bic fingecyemmeude. Fingecyemmeu naric mi woragecde.

<sup>4</sup> Nga tosofocna, hamangecngic hau ngeni kpidohoandae, ifi isoc wenac imohai yeng hau naric mi kpidohogece nocac ngeni kundunnu mi kecdac, kpac. <sup>5</sup> Ngeni sasawangoc wenac nga kperagiaac nambaracfora nga nenang tofocnac me kundunggac areng kpac. <sup>6</sup> Imocac goa gau feandae, ifi isoc gau mi febisina, nenang ine ubagbori kecma sebiac songo wadacma garengemebisina. <sup>7</sup> Nga gaufefe ngic yeni tofocnac gau feandae nga doku seria nene yeni tofocnac doku nema ubangina sufuande.

<sup>8</sup> Anu nenang wenacac arengfora. Imocac amma sebiac songo wadacma garengemebisina. Negen negensing nga heresongogoc hoangemekekec, imocngo marikunina ambeso nga kecma komoc kpenideac negensidimbe, imocngo aieng opocnina anu heima nambisina. <sup>9</sup> Imoc yofiac, Anutungo desi desi nasoyau manganaac gerea menideac mi denemmeec, Kebunina

Yesu Kristongo ebicfunac mesinunuu komoc kpenide, imoc denemmeec. <sup>10</sup> Gbori kecdimbe me bic homegec, nenang sasawango yegoc gbori kecnideac yennoc nenanggac amma homeec. <sup>11</sup> Imocac amma ngeni yofinenggac demeseri angemema meyadiemeandae, ifi isoc monggoc torokpema ambisia.

<sup>12</sup> Tosofocnina, ngeni yofi anggec ngereeude, ua ngicngac yeneng ngeneac botucfu uatoa mema kecdae, ngeni yeni negensiyunubisia. Yeni Kebugoc kpeketahema garengngunuma gorongina kpema kecdae. <sup>13</sup> Yeni ua mekecdaeac amma heresongotoagoc hoangyunubisia, ngeni imocac negenggec engena ambeso. Amma ngenang botucfu ruaegoc angemekecbisia.

<sup>14</sup> Negen negensingoc tosofocnina, neni gorongina kpema yofi edengunudimbe, ngicngac ua wama sicsauha kecdae, ngeni yeni nono edeyunubisia. Nga ubangina mamea kecdae, ngeni demeseri ayemmebisia amma ngicngac goa sebiugeng hafei nga kucmama kecdae, ngeni yeni meficyunubisia. Ifi amma modzotitia kpac yumeau ebicngina tofohobisia.

<sup>15</sup> Manganaac turunga kpouemebauac ngeni garengemema kecbisia. Nga ngeni nasosoc ngenang botucfu nga ngicngac sasawa yenigoc faka gombunga anggecdeac uatoa mema kecbisia.

<sup>16</sup> Ngeni nasosoc sogac sogaigoc kecbisia. <sup>17</sup> Amma ngeni tatahoc numuma kecbisia. <sup>18</sup> Nga ngenearu wiac fingcngemmeude imocac Anutu dangge edebisia. Ngeni Kristogoc kpeketahema ifi angkecgecde, imocngo Anutuac ubasongo ande.

<sup>19</sup> Ngeni Tiri Asuac gerec mi hepiskeyebisia. <sup>20</sup> Nga ngic profeteyoac edengunugec ngeni imoc meenti memati amma mi ngadehebia. <sup>21</sup> Ngeni ine yoac imoc sasawa hengising amma gombunga mekecbisia. <sup>22</sup> Amma ngeni mangana hania hania imoc hengkpatebisia.

<sup>23</sup> Anutu ye ruae mingina. Yeng kpetiac kekecac faka meyadingemmema mewakengunuu ongaasungina nga ubaongangina amma sebingina hafoangoc soronga nga kopocsiha kpac femanu Kebunina Yesu Kristo haude.

<sup>24</sup> Anutu heitaingunuec, ye yoacdedea modacma uaya mekecma mesiude.

<sup>25</sup> Tosofocnina, ngeni neneac ifingoc negensima numuma kecbisia.

<sup>26</sup> Ngeni tosofocnina sasawa kpetiac fakau titkokoc ayemmema wenacngerecnina deyemmebisia. <sup>27</sup> Amma ngeni kibi yomoc negen negensingoc tosofocnina sasawa osoyemmegec, imoc gombunga garenggecdeac Kebuac kpacfu edengunuduae.

<sup>28</sup> Kebunina Yesu Kristoac wosoefacngo ngenigoc febeso.



## Paurongo Tesaronike Kpebung Yeneac Ngadekibi Ohoec

<sup>1</sup> Ngicngac Anutu Manninagoc nga Kebunina Yesu Kristogoc kpeketahema kpebung Tesaronike taonnu kecdae, ngeneac kibi Pauro nga Siriwano amma Timoteo neneng faingemmedimbe.

<sup>2</sup> Anutu Manggac nga Kebu Yesu Kristo, yereng wosoefac angemmema ruae ngemmebesera.

<sup>3</sup> Tosofocnina, ngeni tembus sasawango heregoc songo negenge-mekecdae amma imocngo botucnginau yadiseri ande. Nga ngeneac negen negensingngina homac yadide, imocac neni ngeneac amma nasosoc Anutu dangge edeni ngereeude. <sup>4</sup> Ngabafocngina yeneng ngunukporac angemmegec ngeneng kpendzeng kpema negen negensingngina ukugec mi kpeec. Imoc hemma ngeneac ngeni engena anec. Imocac amma Anutuac kpebung fekemda, yeni siduc imoc edeyununi ubanina ngereeude.

<sup>5</sup> Ngeni Anutuac eucererenggac amma kpendzeng kpekecdae. Anutungo kpendzengngina imoc hemma ubea ngereeu ngeni eucererenggac areng dengemmeude. Amma yeng sing dindingacfu yoacnina desiude, imocngonoc yeac faka dindingac edzacnunuude. <sup>6</sup> Anutu ye faka dindingacac mingina. Imocac ngic kpendzenu faingunukecdae, yeng yeni turunga kpouyemmemma kpendzenu faiyunuude. <sup>7</sup> Nga ngeni nga neni kpendzeng-goc kecdimbe, imocngo kpendzennina menomaneude. Anu Kebu Yesungo angerofora kucnginagoc, yenigoc kurumennunac mama fingectegegecede, imohai ifi anude. <sup>8</sup> Ye gerec borangagoc mama Anutu mi hoanggegec nga Kebunina Yesuac siduc gombunggac yoara mi tofohoandae, yeni kopoc-sicnginaac turunga kpouyemmeude. <sup>9</sup> Turunga kpouyemmeu imocngo wisicwa kpac memanganeyunukefu yeni Kebuac kicfunac nga kuc nga kibikperagiaunac meicyunugecede. <sup>10</sup> Meicyunugec naso imohaingoc ngicngacfora kpetiac kecdae, yenearu kuc nga kibikperagigoc fekefude. Nga ngicngac sasawango ye negensinggedaeac yeni hemma kpidohoma dengeregecede. Nga ngeni dedekperagiyoac edengununi negensinggegecac amma imoc ngenearuoc fingerude.

<sup>11</sup> Imocac amma ngeneac negensima nasosoc yofi numukecdimbe, Anutungo kpacngunuec, yeng ngenenu ubea ngereebesoo. Nga ngeni ye negensinggema uaac songo meficgema faka gombunga mekecma uangina kucgoc mema mesigecede. <sup>12</sup> Ngeni ifi anggec ngicngac yeni ngeneac amma Kebunina Yesu yeac kpara dengerema eweheimigecede nga yeac amma ngeni ifingoc dengerengunugecede. Imoc Anutunina nga Kebunina Yesu Kristo yereac wosoefacac amma ifi fingerude.

## 2

<sup>1</sup> Tosofocnina, Kebunina Yesu Kristoac haha naso nga yegoc kecnideac kpeturannunugecede, imocac goroyoac mong edengununi negenggec. <sup>2</sup> Ngic goa yengng Kebuac hahanaso bic haec deandae. Nga goa yengng neneac enacfu netohoma deandae, "Yoaac mong nenearu hadac me kibi mong nenearu hadac me asu mongngo dedac." Ngeni yoaac ifia negemma kpidohoma dzonong fede fede bic mi ambisia.

<sup>3</sup> Mongngo faitobangyoac ifia hania hania edengunuu ngeni yoara mi negembisia. Imoc yofiac, Kebuac sike sike naso mi hamanu ngicngac yeni singyoac mi hoanggema ubango ngadehegede. Ifi anggec singyoac kpekpengic mongngo didiu fingectegerude. Anutungo ngade ngic imoc hofeu ukuude. <sup>4</sup> Nga yeng ngic negen negeng sasawa kpedarude. Anutu nga nemu nga noc wiac ngicngac yeneng numuyemmeandae, imoc sasawa kpeyemmeude. Ifi amma ye Anutuac womonnu emma ihai tacma yenge-naac deude, "Ni anutunoc." <sup>5</sup> Ni ngenigoc kecma imoc bic edengunuai. Ngeni imoc bic nigecongunc gedang. <sup>6</sup> Ye yofinenggac fingectegerudeac kpaefede, ngeni imoc negendae. Imocac amma ye nasoyau hama didiu nanude.

<sup>7</sup> Anu singyoac kpekpeac negen negeng sufufufuac faka, imocngo uaya bic mama kecede. Nga mong ye imoc fingerudeac kpaefa heima kecede, ye meickeguc <sup>8</sup> singyoac kpekpe ngic didiu fingectegerude. Fingectegeru-manu Kebu Yesungo hama enacasuyango memanganu kuckperagiayangomeickeu kpac anude. <sup>9</sup> Ngic imoc ye Satangngo meficgeu kefude. Ye ngicngac ikoc ayemmeudeac faka kiwa morora mama kuha sasawa edzacyunuma <sup>10</sup> kopocsicac ikocfaka sasawa imocgoc wangecyunuu hofeac sinnu kemegecede. Yeni yoac fora heregoc mi hoanggegeg, imocac amma komoc naric mi kpegecede.

<sup>11</sup> Yeni ifi angkecdaeac Anutungo uba mesufuac kuc yenearu faiu ikoc imoc negensinggecede. <sup>12</sup> Imocac amma ngicngac imoc sasawa yeneng yoac fora mi negensinggema sicsaucac faka songogoc hoanggema kecdae. Ifi kecgeg Anutungo kopocsicac turunga kpouyemmeude.

<sup>13</sup> Kebuac songo areng nga negen negensinggoc tosofocnina, Anutungo ngeni hanahema meisingngunuu Tiri Asuyango kpetiac kekecfu meyadin-gunuu ngeni yoac fora negensinggegeg. Nga ye mengerengunuu komoc kpegecedeac negemma meisingngunuec. Imocac amma neni ngeneac negemma nasosoc Anutu dangge edekecni ngereeude. <sup>14</sup> Anu neni siduc gombang edengununi ngeni imoc negemma yoac fora megecedeac Anutungo kpacngunuec. Ifi amma ngeni Kebunina Yesu Kristoac kuc nga kibikperagia megede.

<sup>15</sup> Tosofocnina, imocac amma yofi ande, neneng yoac enacfu nga kibiudekpou angemmeing, ngeni sing imoc serima namma mekecbisia. <sup>16-17</sup> Kebunina Yesu Kristo yengenaoc nga Anutu Mannina yeri yoac nga uangina imoc sasawaac manau negen negengngina midima herengina meseribesera. Yerennoc heresongogoc hoannunuma woseofangiraac amma ubaherenina nasosoc meserinemmekecdape. Yeri ifi anec nenang kecma wiac gombunga mebesandimbe, ifi negensikecdimbe.

### 3

<sup>1</sup> Tosofocnina, torokpema yofi deni negenggeg, ngeni neneac amma yofi numubisia, neni Kebuac yoac desaheni imoc bic yadima kendaru ngicngac areng goa imoc eweheima megeg, ngenearu fingerec, sirihimocngoc ngicngac goa yenearu fingeckembeso. <sup>2</sup> Ngicngac homac yeni negen negensingngina kpac, ifi kecdae. Nga Anutungo ngicngac ngabagoc nga manganameme yeneac mariunac mesinunubeso, ngeni imocac ifi numubisia. <sup>3</sup> Nga Kebuac yoacdedea modacma meseringunuu mangana minginango mi memanganengunuudeac kasongina kpeude. <sup>4</sup> Neni Kebuac amma ngeneac yofi negensinggedimbe, Neni demeseri angemmema yoac edengununi ngeni

imoc tofohoma kecdae amma kecgcede. <sup>5</sup> Kecgec Kebungo ubaherengina wangeru Anutuac heresongongo semengunuu Kristo isoc serima kecbisia.

<sup>6</sup> Tosofocnina, goa yeni oyong kecgcec sing kpouyemmeing, imoc mi modacgecede. Ngeni ngicngac ifia yeneac hereau kecbisia. Neni imoc Kebunina Yesu Kristoac kpacfu demeseri angemmema edengunudimbe.

<sup>7</sup> Nga neni kefing, siric imocngoc kecgcedeac negenni ngereede, ngeni ngenaoc imoc bic negendae. Nga ngenigoc kefing, imohai oyong mong mi kefing, kpac.

<sup>8</sup> Neni ngeneac botucfu kecma ngic monggarunac yaka buma kpac eng mema mi nekefing. Neni ine ebic goa ngemmebinggac marininango hadzing tofocnac uatoa kpendzennu mema kefing.

<sup>9</sup> Neni mitiac uabung menideac naric debing dede nga faka aning, imoc ngeneng hemma modacgecedeac aning. <sup>10</sup> Nga ngenigoc kefing, imohai singyoac yofi edengunuing, “Ngic mong ye ua meudeac mi ammideu, ye yaka mi nebeso.”

<sup>11</sup> Neni ifi dema naso monnu ine siduc mong yofi negening, ngenearunac ngic goa ua mi meme oyong kecma gubekisang amma kpounecyoac dekecdae. <sup>12</sup> Neni Kebu Yesu Kristoac kpacfu ngic ifia demeseri ayemmema yoac yofi edeyununide, “Ngeni kekecngina meficgegecedeac ngisima kecma ua mekecbisia.”

<sup>13</sup> Negen negensinggoc tosofocnina, ngeni angammeme gombunga anggecedeac ubango modzotitia kpac kecbisia. <sup>14</sup> Nga neni yoac kibi yomohai ohongemmedimbe, ngic mongngo yoac imoc mi tofohoudeu ngeni yeac buremema yegoc mi kecbisia. Ifi anggec ye gamekpeu kecbeso.

<sup>15</sup> Amma ngeneng ngic ifia mong ngaba mi ammibisia, kpac. Ye ine tosongina kecedeac goroya kpegec kecbeso.

<sup>16</sup> Kebu ruae mingina ye yengenaoc nasosoc nga sing hania haniau ruae ngemmebeso. Yeng ngenigoc sasawa kecbeso.

<sup>17</sup> Ni Pauro neannaoc marinango wenacngerec ohongemmeduae. Ngicngac sasawango neac marikibi hemma negensinggegecedeac ohoanduae.

<sup>18</sup> Kebunina Yesu Kristoac wosoefacngo ngenigoc fekecbeso.

## Paurongo Timoteo Yeac Warackibi Ohoec

<sup>1</sup> Yesu Kristongo kurumenggac sing meficgenemmeec, ye nga memenercna Anutu yereng denenec, ni Pauro Yesu Kristoac aposoro anai. <sup>2</sup> Kibi yomoc negen negensinnu medacna Timoteo, geac ohogenduae. Anutu Mannina nga Kebunina Yesu Kristongo wosoefac nga ubamangang amma ruaea gembeso.

<sup>3</sup> Ni Makedonia prowinsiu kembeso amma yoac yofi edeguai, ge Efeso mi wama imohai ngic goa yenearu kemma dede goa siriha mong mi kpouyemmegecdeac kpetariyemmebesena. <sup>4</sup> Yeni nemusiduc nga esangabo keceregec yeneac kisc kpekecdaeac yoacngina engemmama anu Anutuac yoac negensinggegecdeac sing waandae. <sup>5</sup> Geng dederecgeyoac dena foraya yofi fingerude, Anutuac heresongongo ubaherengina mewakeu fagung madzaha kpac negen negensingngina dindingac anude. <sup>6</sup> Goa yeni faka ifia fingerudeac mi negensima yoac sicsauc deandae. <sup>7</sup> Amma Anutuac dedeseriyoac edekpou anggecdeac homac ayemmeande. Yeni yenaoc yoac serima deandae, imocac hania mi negentegecdae.

<sup>8</sup> Mongngo dedeseriyoac sing dindingacfu mekefudeu imocngo fora gombunga meficgemiude. <sup>9</sup> Ge yofi negembesena, dedeseriyoac imoc ngic dindingac kecdae, yeneac negemma mi faifaia. Imoc ine areng yofia yeneac amma faifaia, ngicngac singyoac ngadehema ihoc bahoc amma Anutu ngadehema kecdae. Yeni kopocsic meficgema kpetiac kekec mi negensima bangecac wiacac songongina anude. Yeni nonggo mangfocngina yunukpebuc amma ngicngac yunuhomeandae. <sup>10</sup> Amma yeni kaisero nga ngicngo ngicfu sero ua meandae. Yeni ngicngac hamangec meyunuandae amma wanacngicngac bummeyunuma monggoc sueyunuandae. Amma yeni ine Anutuac kicfu yoac deserima ikocyoac dema ngicngac botucnginau ikocyoac deandae. Nga negen negeng dindingac kpoungemmeing, imoc ngicngac goa kpeandae. Dedeseriyoac imoc ngicngac ifia yeneac negemma faifaia fede. <sup>11</sup> Anutu ye kenec mingina ye kuc nga kibikperagiagoc. Yeng siduc gombang nenu uaya modacma mekecduae nga dedeseri kpekpe areng yeni imoc ifingoc kpeandae.

<sup>12</sup> Kebunina Yesu Kristongo neac negenu ngereeu uayau naric fainuecac negemma kuc nengkecde, yeac dangge dekecduae. <sup>13</sup> Amma ni warac ye demanganema ngaba ammima habufora yunukporac ayemmekecma yarengic anai. Nga yeng sifu wosoefac anenec. Nocac ni faka fora mi negentegecma Yesu mi negensinggema sicsauc kefai. <sup>14</sup> Ifi kecbare Kebuninaac wosoefac nga heresongotoa yombong, imoc negen negensinggoc Yesu Kristoaranac nearu haec. <sup>15</sup> Yesu Kristongo bangecfu kopocsicmeme mengerenunuude nga komoc kpenideac maec. Yoac imoc seria nga fora amma ngicngac sasawangac imoc negemma hoanggegec ngereeu. Ni kopocsimeme sasawa feracyunuma ngic mangana yombong anai. <sup>16</sup> Ifi kecbare, ye modzotitia kpac fakaya imoc didiu fingetegerudeac wosoefaha kpenenec. Ifi anenu ngic yeneng negensinggema kekecseri megecdeac sosoha amma waraiyemmeai. <sup>17</sup> Ngictau wisic wisickea nga home homea

kpac nga mi hengena ye mocgungo Anutu kecde. Ye eweheimima yeac dedengerec nga dedengerec fekengkecheso, imoc fora.

<sup>18</sup> Medacna Timoteo, ngabafocnina yenigoc dzikac gombunga kpekechese. Ifi annadeac profete yoac gearu degec negennec. Imoc modacnadeac edeguduae. <sup>19</sup> Ge negen negensinggoc kecma herenegen negengga garengena kpetiac febeso. Ngic goa yeni kecec kpetiac imoc wama negen negensinggina ukugec kpeu manganegec. <sup>20</sup> Nga yenearunac Himenaio nga Aresande, yeri Satangngo metingyuruudeac yeac mariu faiyuruai. Faiyuruaiac yeri Anutuac kpac monggoc mi denggaringgeecde.

## 2

<sup>1</sup> Nenang ngicngac sasawa meficyununideac yeneac amma numuma Anutu dangge edebisina. Imoc ua engena ande, imocac yoac seria deduae. <sup>2</sup> Ngicngac yumea nga ruaegoc kecma Anutu eweheimima faka dindingac angkecdae, yeneac kecec gombunga. Nga ifi kecnideac ngictau nga enara tatacfu takecdae, yeneac amma numubisina. <sup>3</sup> Nunumunina ifia imoc gombunga, imoc Anutu memengerecinango negenu ngereuede. <sup>4</sup> Amma yang ngicngac sasawa yeni komoc kpema yoara fora negentegecdeac am-mikecde. <sup>5</sup> Imoc yofiac, Anutu mocgungo kecde amma Anutu nga ngicngac botucninau hengisingngic mocgu kecde, ngic imoc kpara Yesu Kristo. <sup>6</sup> Ye yengenaoc ngicngac sasawa donina meudeac kekeha waec. Yoac imocac nasoya hau dekperagiu negenggec. <sup>7</sup> Ni yoac imoc dekperagibadeac Anutu yengenaoc meisinnua aposoro fainuec. Fainuu yeac yoac negensinggema bangec monnunac ngicngac, yeni yoac fora edekpou ayemmeai. Imoc fora yombong, ikoc mi anduae.

<sup>8</sup> Neac negen negeng nga songo yofi anu ngic ngeneac deduae, ngic guruama noboc noboc kecdae, ngeni ngaba nga deendema yoacngina wama maringina kpetiac miacma numubisia. <sup>9</sup> Ni ifingoc ngac ngeneac yofi deduae, ngac ngeni memaemema wamba isinggema gombunga nga sirihau heibisia. Amma ngeni kibikereng meficgegecdeac kubu buma kuneng mi heibisia me orucdzongina mi mudzebisia. Nga ngeni wiac hania hania golngo memea mi faima wamba buma kuneng mi heibisia. <sup>10</sup> Ngac mong ye faka gombunga mekecma Anutu eweheihei ammiande, faka imocngo kibikerengngina ambeso. <sup>11</sup> Amma ngac ngeni faka yumea amma kpoukpou yoac negemma enac tofoc tofoho andachisia. <sup>12</sup> Nga ngac yeneng edekpou angang me ngic yeneac enara anggecdeac mi negenduae. Ngac ngeni dekpeborong wama yumea kechisia. <sup>13</sup> Anutungo hanahema Adang meficgema Ewa ngadeau meec. <sup>14</sup> Mangana minginango Adang faitobannu mi faiec. Ye ine ngac faitobannu faiu makpema singyoac kpeec. <sup>15</sup> Ngac mong ye Yesu negensinggema kpetiac kecma ngicngac heresongogoc hoangyunukecma kekeha isinggeudeu ye sabac memeaac amma komoc kpeude.\*

## 3

<sup>1</sup> Ngic mong ye kpebung yeneac enara ua mebeso ammideu ye negen negenga gombunga, yoac imoc seria nga fora yombong. <sup>2</sup> Nga kpebunggac enara ye dindingac kecma ngac mocgusac yeac ngic ambeso. Amma ye kekeha nomana ambeso. Ye negen negentegecgoc yoac dema kecec sirihau kecma ngicngac amayau heitaiyunubeso. Amma kpoukpou ua imocac siric

\* **2:15:** Pauro ye nocwiac negensima yoac yomoc ohoec, mitiac negen negengngic yeni imocac uba mocgu mi andae.

negembeso. <sup>3</sup> Ye waing doku nema ubasufu ngic mi kecbeso amma ye herebungic kecdeu mi ngereeude. Ye ngic yumea amma ruaegoc kecbeso nga hiedzoac songou negen negenga mi febeso. <sup>4</sup> Ye yengena enemmedacfora gombunga garengyunubeso amma yengena nambaracfora yoara tofohoma ewehelhei ammigecdeac garengyunubeso. <sup>5</sup> Imoc yofiac, ngic mong ye enemmedacfora garengyunuudeac sing mi negendeu yeng Anutuac kpebung garengyunuudeac sing siriha ifingoc mi negenude. <sup>6</sup> Enarangina ye ubamereng gboriango mi ambeso. Mangana mingina ye sebiengenggac amma yoacfu makpeec ye ifi isoc makpebacac. <sup>7</sup> Amma ngicngac yeneac kicfu game meficgebacac nga mangana minginaac botacfu mendanggebacac ngicngac ngadeau kecdae, yeneng ifingoc ewehemigec ngerebeso.

<sup>8</sup> Kpebungac enac tofoc tofoho ngic yeneng siriha imocngoc faka nga angammengina siriha ambisia. Yeni nedzarangina yohockang mekecdae mi ngereeude amma waing dokuac songotoa negenggedeu mi ngereeude amma hiedzo megecdeac kichodungoc mi kecbisia. <sup>9</sup> Yeni ine here negen negengina kpeticgoc kecma negen negensinggac yoac keme kemea mekecbisia. <sup>10</sup> Ngic kpebungac enac tofoc tofoho ngic ambeso ayemmede, ngeni yeneac haniangina hengising anggec nga ebicngina kpac anuguc kpebunnu enac tofoc tofoho ua naric mebisia. <sup>11</sup> Amma kpebungac enac tofoc tofoho ngac yeni ifingoc faka nga angammeme siriha mekecbisia. Yeni ngic me ngac monggac ngadeyoac degecde, imoc mi ngereeude. Kekecngina imoc nomana ambeso. Amma yeni dewa mong mi ambisia. <sup>12</sup> Nga kpebungac enac tofoc tofoho ngic ye ngac mocgusacac ngic kecbeso. Ye yengena enemmedacfora nga goa yegoc kecdae, imoc gombunga garengyunubeso. <sup>13</sup> Imoc yofiac, kpebungac enac tofoc tofoho ngic ua gombunga mekegcec kpebung yeneng ewehelhei ayemmegec, yeni Yesu Kristo negensinggema serima nangecde.

<sup>14</sup> Ni kibi yomoc ohogemma geac negensima gearu bic habadeac anende.

<sup>15</sup> Nga uango dzegenuu bic mi habade isoc kpebunnu yeni sing dafiu kecbisia, imoc negembesena, imocac amma kibi yomoc ohoduae. Kpebung yeni Anutu kekehagoc, yeac ama nga yoac foraac karu amma wotung seria. <sup>16</sup> Negen negensinninaac hania imoc sufu sufuyau feec:

Ye kuneng nga engena yombong, imoc fora.

Ye sebiu fingectegerec nga Asungo haniaya dindingac imoc nonongkac mekperagiec.

Angero yeneng ye henggec.

Ngicngac yeni yeac siduc bangec monnunac ngicngac, yenearu dekperagigec bangec noboc noboc kenu negensinggecec.

Ye Anutuac kuc nga kibikperagiau monggoc meemma ihai kecde.

## 4

<sup>1</sup> Naso wisic wisickeau ngic goa yeneng negen negensingngina ukugec kpeu, yeni hadehade yeneac kpoukpouyoac negenggec asu hania hania yeneng dekerec ayemmema ikocfu wangecyunugecde. Tiri Asungo imocac yoac didiu dekecde. <sup>2</sup> Anu ikocngic herenegen negengngina dzadzu kpekpea, yeneng ngicngac dekerec ayemmema ikocfu wangecyunuma <sup>3</sup> ngac megecdeac kpae heiyemmema yakasege anggecdeac dederece ayemmegecde. Anu ngicngac yeni Anutuac yoac fora negemma Yesu negensinggema kecdae, yeni yakangina ubangerecgec megecdeacnoc Anutungo yakangina meficgemyemmec nga yeni imoc sege anggecdeac ikocfu deandae. <sup>4</sup> Anutungo wiac deu fingecdarec, imoc sasawa gombunga. Nga

wiac imoc ubangerec goc mema mekecni, imoc neneacsoc ande. <sup>5</sup> Imoc Anutuac yoac nga nunumungo meu kpetiac anude.

<sup>6</sup> Ge tosofocnina yoac yomoc edekpou ayemmenadeu Yesu Kristoac kingangkpeke gombung annade. Kingang kpeke ifia kecnadeu, negen negensinggac yoac kpougenggec modacnec, imocno negen negengga meseriude. <sup>7</sup> Ge bangecac siduc hania hania ngadehema geangga kekecfu Anutuac faka nga sing imoc meseribesena. <sup>8</sup> Ngic ariac ambesonga sebingina meefaiandae, imocngo memefiha efeaneacsac ande. Ngicngac yeni Anutuac faka nga sing meseriandae, imocngo kekecngina hafoa meficgeude, imoc yagucac kekec meseriude nga kekec ngade haude imoc ifingoc meseriude, Anutungo ifi denemmeec. <sup>9</sup> Yoac imoc fora, ubanina ihai naric faini feu negensinggenide. <sup>10</sup> Anutu kekehagoc, yearu kpeketahema kecdimbe, yeng ngicngac sasawa yeneac memengerecna ande nga ye negensinggedae, yeneac yombonnoc. Imocac amma uatoa kpendzenggoc mema kecdimbe. <sup>11</sup> Nga ngicngac yeni yoac imoc modacgecdeac seria edekpou ayemmebesena.

<sup>12</sup> Ge medacgbosing kecnecac mongngo geac negenggec mamea mi ambeso. Nga fakaga kpetiac nga dedega amma angammemega nga negen negensingga amma ngicngac heresongogoc hoangyunuannec, yeneng fakaga imoc hemma modacbisia. <sup>13</sup> Anu ngicngac yenigoc mitikibi osonegeng amma ubaherengina midima edekpou ayemmekecmana habade. <sup>14</sup> Nga enara yeneng maringina witigau faima profeteyoac degoc Tiri Asuac wosofacac kuc mong menec, kuc imocgoc ua mekecna mi nomanebeso. <sup>15</sup> Nga ngicngac yeni yadiseri annec, imoc henggecdeac negen negengga uagau faina seriangoc feu imoc modacma mekecbesena. <sup>16</sup> Mekecma geangga garengemema yoac edekpou ayemmekecneac, imoc ifingoc garenggebesena. Ifi annadeu ge nga ngicngac yoacga negengandae, ngeni ngenahafoc komoc kpegecde.

## 5

<sup>1</sup> Ge ngic yada mong yoac edebesonga dema kucgoc nga gereagoc mi ammima ubea midima mangga yoac edeannec, ifi isoc yoac edebesena. Nga medacgbosing yeni dacmunafocga yeneac ubangina midima angannec, ifi isoc ayemmebesena. <sup>2</sup> Amma ngac yada yeni nonggogaac angannec, siriha imocngoc ayemmebesena nga naraang yeni naingfocga yeneac angannec, siriha imocngoc herega kpetiac femanu ayemmebesena.

<sup>3</sup> Ngac hodzec memeficngina kpac kecdae, kpebung ngeneng yeni ewehelhei ayemmema meficymmebisia. <sup>4</sup> Anu ngac hodzec mong ye nambaracforagoc me esaforagoc kefudeu yenaoc ine warac warac hodzecngina heng-gareng ammigeceac ua mebisia. Yeneng ifi amma nonggo mangfocnginaac turung kpouyemmebisia. Faka imocngo Anutuac kicfu ngereude. <sup>5</sup> Nga ngac hodzec mongngo memefiha kpac tembuha kecma Anutungo meficmiudeac negenserima hadzing tofocnac numukefude. <sup>6</sup> Anu ngac hodzec mong sebiac songo modacande, ye ine sebiugengsac kecde nga ubahereugeng ine homemea kecde. <sup>7</sup> Ngac hodzec yeneac yoac imoc ngicngac seriangoc edeyununadeu yeneac ubakpeke naric mi fingerude. <sup>8</sup> Ngic mong ye sactosofora yenengareng mi angande nga yengena nonggo mang nga dacmunafora ifingoc mi garengyunuudeu ye negen negensingga bic wama faka mangana amma bangec monnunac ngicngac Anutu mi negemmidae, yeni feracyunuma faka mangana anude.



<sup>9</sup> Anu ngac hodzec mong ye kifaya 60 bic ferahema ngic mocguac ngac kefec, yeac kpacsac ngac hodzec yeneac kibiu arenggebesonga. <sup>10</sup> Amma angammemea gombunga feec nga fede, imoc ngicngac sasawango bic henegeng angkegcec. Imoc yofi, ye nambaracfora gombunga yenenggareng angkefec nga ngicngac edoc bedoc ayemmekefec amma ngicngac kpetiac hanangina dzuacyemmekefec. Ye ngicngac ebicfu kegcec meseriyunukefec amma ngicngac meficyunuudeac naso mong mi ukukefec.

<sup>11</sup> Ngac hodzec afo engeng kecdaengoc ge yeneac kpac areng imohai mi ohobesena. Yeni Kristoac modzongina tiu ngicac songo monggoc negemma ngicfu kembeso anggecde. <sup>12</sup> Yeni warac yoac dzegegec, imoc wama yoacfu makpema ebic meficgegecde. <sup>13</sup> Amma yeni oyong kecma amayuguc kengkegecde. Nga imocsac kpac, yeni ifingoc yoac gubekisang amma kpounec nga yoac goa yeneac wiac me dedeacsoc mi ammanu imoc sifu degede. <sup>14</sup> Imocac amma ngac hodzec afo engeng kecdaengoc yeneac negemma areng yofi faiba modachisia. Yeneng ngic monggoc mema sabac meficgema amangina garenggebisia. Yeni ifi anggec ngabafocnina kecdae, yeneng yoac mangana deyemmegecdeac sing naric mi meficgegecde.

<sup>15</sup> Ngac hodzec goa yeni sing bic segema Satang modacgec. <sup>16</sup> Nga negen negensingoc ngac kecdae, yeneac amau ngac hodzec goa kecdae yeneng heimefic ayemmegec kpebung yenearu ebic mi fingecebo. Kpebung ngeneng ngac hodzec makpekpea memeficngina kpac yombong kecdae, yeni ine heimefic ayemmebisia.

<sup>17</sup> Ngic enara habu gombunga ngenenggareng angemmema uangina meandae, yeni eweheihei ayemmema uaac bung yemmebesonga. Yeni yoac dekperagima edekpou angemmema uatoa mema kecdae, yeneacnoc negensibisia. <sup>18</sup> Mitikibingo imocac yofi dede,

“Burumakango wit sebera kpetiudeac uatoa mema wit witiau tima yerecge-  
 ande, imocac dumbenga mi dzegebesena.” *(Dedeseri*  
*25:4)*

nga

“Uangic yeni uanginango uabungngina meficgebeso, imocngo ngereeude.”  
*(Ruka 10:7)*

<sup>19</sup> Amma mongngo ngic enara mong yoacfu faibesonga negenudeu, ngeni yoac imoc hepuha kpac mi negembisia. Ngic yohockang me harebecngo yoac imocac hepuc angemegec, imohai yoac imoc negembisia. <sup>20</sup> Yeni ngicngac yeneac kicfu kopocsic meficgegecdeu, geng ifingoc ngicngac yeneac kicfu demeting seria ayemmema ngicngac tosea yeni ifi hemma yenaoc kekecngina isinggegecde. <sup>21</sup> Anu ni Anutu nga Yesu Kristo amma angero meisingyunuyunuya, yeneac kicfu yoac imoc modacnadeac seria edegud-uae. Ge ifingoc negeung yoac mi debesena me monde monde mi ambesena. <sup>22</sup> Nga mariga ngicngac yeneac witiu bic faima mi kenecyunubesena. Ngicngac yeneac kopocsicfu mi torokpebesena. Ge kpetiac kecbesena. <sup>23</sup> Herekiki nga hafei homac anggendande, imocac doku thecsac mi nebesena. Ge ine heregaac amma waing kapiancec ifingoc nebesena.

<sup>24</sup> Ngic goa yeneac kopocsic didiu bic fede, yeni yoacfu bic enggecde. Nga goa yeneac kopocsic sufufufu fede, yeni yoacfu ngade enggecdengoc. <sup>25</sup> Ifi isocngoc angammeme gombunga goa yaguc didiu fede. Nga angammeme gombunga goa yaguc didiu mi fede, imoc kecma sufufufu naric mi feude.

## 6

<sup>1</sup> Mong ye wanac arenggac tofo bageau kecdaengo mingingfocngina ewe-heihei ayemmegec ngereeu de. Ifi anגעc ngicngac yoac kpouyemmeing nga Anutuac kpac, imoc naric mi demanganegcede. <sup>2</sup> Nga wanac areng goa yeneac mingingfocngina negen negensinggoc kecdae. Yeni negen negensinggoc tosofocnina andae, ifi dema negengyemmegec mamea mi ambeso. Yeni ine wanac arenggac siricfu songogoc torokpema mingingfocngina monggoc yombong kingang kpeyemmebisia. Yeni wanac areng yenigoc Yesu negensinggema heresongogoc hoangemema kecdae. Yofinenggac mingingfocngina siricngina ifia kecdaeac, wanac arengngo yeneac amma ua gombunga yenearu mebisia. Ge faka imoc kpouyemmema herengina midibesena.

<sup>3</sup> Ngic mong ye netohoma sing mong kpoungemmema Kebunina Yesu Kristoac yoara dindigac wama Anutuac faka nga sing kpoungemmeing, imoc ngadeheande, <sup>4</sup> ngic ifia ye hereau sebiengeng fede amma ye wiac mong mi negende. Yeac songo ine manganagoc kekec nga ngic yenigoc nesisic yoac nga negen negeng hania hania deande, faka ifia keracmangang nga ngabasiric amma yoac mangana nga negeung meficgeude. <sup>5</sup> Ngicngac ifia yeni negen negengngina fonggou ngaba wisic wisickea kpac angemenda. Yoac fora imoc ubanginaunac bic meic meickea, monggoc mi fede. Yeni dzofinac meficgegecdeacsac Anutuac faka nga sing modachbesonga negensidae.

<sup>6</sup> Fora, mong ye dewaidzoha kpac ruaegoc kecma Anutuac faka nga sing modackecde, yeng sing imohai wiac gombunga homac meficgeude. <sup>7</sup> Ni foracngoc deduae, bangectoa bangec yomohai entegeng fingering. Nga bangectoa bangec yomoc wama kembesonga dema ifingoc entegeng kenide. <sup>8</sup> Semeng nga wambanina soha fenemmeu de ruagoc dewaidzoha kpac yumia kecbisina.

<sup>9</sup> Ngicngac dzofinactogoc anggecdeac negengareng angandae, yeni faitobannu kecma mangana minginaac botacfu emma sebiac songo modacma kapa faka amma kekecngina memanganegcede. Faka ifiango memanganeyunuu kpac anggecde. <sup>10</sup> Imoc yofiac, hiedzoac songo negen negeng, imocngo mangana sasawaac hania. Ngicngac goa yeni hiedzoac songo kuneng mekecdae, imocngo negen negensingnginau wangecyunuu kemma hereebic kuneng meficgeyemmeude.

<sup>11</sup> Anutuac ngic, ge faka imoc hemma ngadehema woramibesena. Kekec dindigac modacma Anutuac faka nga sing kekecgau seriudeac mamangkima Yesu negensinggema Anutu nga ngicngac heresongogoc hoangyunuma modzotitia kpac kecma kekec yumea mekecbesena. <sup>12</sup> Negen negensinnu magubacac dzikac gombunga kpema nedzibesena. Amma uatoa mema nedzima kekecseriu hasikenade. Imoc menadeac Anutungo kpacguc. Amma sing gombunga imoc modachbeso annec, imoc warac ngicngac yeneac kicfu deficgena hepuc anggegoc.

<sup>13</sup> Anu Anutungo wiac sasawa kekecnginagoc faiec nga Yesu Kristo yeng Pontio Piratoac kicfu haniaya gombunga deficgeec, yereng hepucna anec yofi edeguduae, <sup>14</sup> dederecgeyoac negennec, imoc modacma goctopoha nga kopocsiha kpac, imoc mekecmana Kebunina Yesu Kristoac hahanasoya fingectegebese. <sup>15</sup> Nga Anutu yengenaoc nasoya negende, imoc fingectebese. Anutu ye kenehagoc ye tembuha Kuctoa mingina nga yeng ngictau yeneac Ngictau nga kebu yeneac Kebu. <sup>16</sup> Ye mocgungo dzonggo

dzongoya kpac nga kperagia manau kecde. Nga kperagi imocac manau ngic mongngo naric mi enude, kpac. Amma kperagi imoc mongngo mi henec nga naric mi henude. Kuha nga eweheihei yearu feecngo fede nga nasoya kpac fekengkecbesande. Imoc fora.

<sup>17</sup> Ngicngac naso yomohai dzofinactoanginagoc kecdae, yeni sebiengeng mi anggecdeac nonoseria edeyunubesena. Dzofinac imocngo tinananina seria kpac. Anutungo wiacnina hania hania songogoc mekecnideac meficgenemmekecde, yeng tinanangngina ambeso, imoc edeyunubesena.

<sup>18</sup> Yeni ua gombunga mekecnagec angammemengina gombungango hiedzotoangina ambeso. Amma yeni wosoefac amma iwaingina mekecdae, imoc medereyemmema kegcgecdeac demeseri amma edeyunubesena. <sup>19</sup> Yeni ifi mekecma kekecnina ngade haude, imohai dzofinacngina tohong kpema tatak gombunga mengeregecde. Mengerema kekec forau hasikebesandae.

<sup>20</sup> O, Timoteo, Anutungo wiac garenggenadeac genec, imoc gombunga garenggekecbesena. Amma bangecac siduc nga yoac sicsauha hania hania, imohacnac wadzahemima worabesena. Ngic goa yofi deandae, “Neni yoac negen negengtegehagoc mekecdimbe.” nga yoacngina imocngo yoac kpekpe ande. Ge imoc negemma ngadehebesena. <sup>21</sup> Anu ngic goa yeneng negen negengtegec imohai kpeketahema negen negensinggac sing segegec. Anutuac danggunucngo ngenigoc febeso.

## Paurong Timoteo Yeac Ngadekibi Ohoec

<sup>1</sup> Ni Pauro Anutungo negennenu Yesu Kristoac aposoro anai. Nga Yesu Kristoaru kpeketahema yearunac kekec naric menide, yoac dedzege imoc dekperagiyemebadeac suenuec. <sup>2</sup> Timoteo medacna, ni heresongogoc hoangguma kibi yomoc gearu faiduae. Anutu Manggac nga Kebunina Yesu Kristoac danggunuc nga wosoefac amma ruaengo gearu febeso.

<sup>3</sup> Esangabofocna yeni Anutu eweheimigec, ifi isocngoc herenegen negenna kpetiacgoc kecma eweheimima dangge deduae. Ifi dema hadzing tofocnac numuma imohai ge negensigma kecduae. <sup>4</sup> Kickumaga mau henai, imoc negensiba herenango geac ammiu monggoc gembadeac anende. Amma gemma sogac sogai hafoangoc meficgebadeac negensiduae. <sup>5</sup> Negen negensingga hafoa fede, imocac negensiba ubana ngereede. Negen negensing imocnoc warac ataga Roisi nga nonggoga Eunike, yerearu feec. Negen negensing imocnoc yofinenggac gearu fede, imoc negengyombonggeduae.

<sup>6</sup> Imocac amma yofi edeguduae, ni warac marina witigau faibare Anutungo wosoefahaac amma kuc mong genec, imoc monggoc heigereenadeac negensigenduae. <sup>7</sup> Imoc yofiac, Anutungo Asu nemmeec, imocngo kucmama mi meficgenemmeude, kpac. Yeng kucgoc kecnideac nga heresongogoc hoangyununideac amma tambuc tambuc gombunga garengemenideac faka meficgenemmeude. <sup>8</sup> Imocac ge gamea kpac kecma Kebuac yoacsiduc dekperagibesena. Nga yeac amma witicamau tacduaeac negenna gameagoc mi ambeso. Ge ifingoc Anutuac kucfu siduc gombunggac amma ni isoc kpendzeng kpebesena.

<sup>9</sup> Nga komoc kpenideac negemma ebicfunac mesinunuma kpetiac kecnideac Anutungo kpacnunuec. Nenang faka gombunga aninggac ifi mi anec, kpac. Ye yengenaoc arenga negenu feec, imoc bicngoc yombong bangec nga kurumeng mi fingecmaec Yesu Kristoac gombunggac amma wosoefac anemmeec. <sup>10</sup> Ifi femanu yagucnoc memengerecnina Yesu Kristongo hau Anutuac wosoefac areng imoc fingectegerec. Fingectegeru yeng homec meickema kekec dzonggo dzonggoya kpac, imoc kperagiau mehau hening. Yeng siduc gombung nemmeu kekecseriac faka hentegering.

<sup>11</sup> Nga ni siduc gombung imoc dekperagima ngicngac kpouyemebadeac imocac aposoro denenec. <sup>12</sup> Imocacnoc kukusisic witiau kecduae. Imoc yofiac, ni ngic negensinggema kecduae, ye negemmiduaeac game naric mi nuude. Nga negen negensina seria yofi fede. Ye kuhagocngo wiacna yearu faiai fede, yeng imoc garenggekcmanu nasoya haude. <sup>13</sup> Ni sirihau Anutuac yoac ngicngac kpouyemmeanduae, geanggaoc imoc negenec nga imocac sirihangoc edekpou ayammebesena. Nga Yesu Kristogoc kpeketahema negen negensing nga heresongogoc kecma Anutuac yoac imoc hoanggema modacbesena. <sup>14</sup> Tiri Asu nenang hereu kecde, yeng nonggo tacgemmanu Anutungo wiac gombunga mekecnadeac genec, imoc garenggena febeso.

<sup>15</sup> Ngic Asia prowinsiu kecdae, yeni sasawango ni bic wanugec, imoc negennec. Figeru nga Hemogene yeri ifingoc wanuoc. <sup>16-17</sup> Nga witicamau tabare Onesiforongu Roma hama serima hofocnuecma meficnuec. Amma

ye Roma ngicngac yeneac game mi kpeu naso homac ubangerec meficgenenec. Imocac Kebungo Onesiforo nga arengfora wosoefac ayemmebeso. <sup>18</sup> Imocac Kebungo negemmanu nasotoayau wosoefac meficgemibeso. Anu Efeso taonnu warac kecbare yeng sebina garenggema ua kuneng yombong meec, imoc geangaoc hemma bic negennec.

## 2

<sup>1</sup> Medacna, Yesu Kristoac danggunungo meseriguu kucgoc kecbesena. <sup>2</sup> Ge nga ngicngac homac ngeni ngenahafoc yoacna negenggec. Yoac imoc ngic sing mi segeandae, yeneac mariu faina yeneng mitiu yadima ngicngac tosea torokpema edekpou ayemmegecde. <sup>3</sup> Anu Yesu Kristoac wasaingic gombunga amma kpendzenggoc kecma modzotiti mi ambesena. <sup>4</sup> Wasaingic ua mekecdae, yeni ngadeau ua hania hania fede, imoc mong mi megecde, kpac. Yeni enarafocnginagoc yoac dedzege anggec, yeneac enac modacma ua mekecgecde. <sup>5</sup> Nga ngic mong ye ariacfu nedzima ariacac singyoac segeude, ye firanggac ira naric mi meude. <sup>6</sup> Nga ngic mong ye seserigoc ua heihomec angkecde, yeng hanahema semengfora mebeso, imoc ngereeude. <sup>7</sup> Ni yoac deduaemoc, imoc negen negenggau faima mekecna. Nga Kebungo wiac sasawa negentegecnadeac meficgegenude.

<sup>8</sup> Yesu Kristo, Dawidiac fingecsaheunac, ye homecfunac yarec, yeac negensima kecbesena. Yeac siduc gombunnoc dekperagiyemmekecduae. <sup>9</sup> Ni imoc dekperagikecduae, imocac amma kpendzeng kpema mekecbare ngic yeneng godzungic witicamau faiandae, ifi isoc witicamau fainugec. Nga Anutuac yoacngo witiagoc mi ande, kpac. <sup>10</sup> Yesu Kristongo meisingfora ebicfunac mesiyunuu yeneng ifingoc komoc kpema kekecseriac kibikperagia megecdeac ni kpendzeng sasawa naric kpema serima namma imoc tofohoduae.

<sup>11</sup> Yoac fora nga seria mong yofi fede:

Yegoc homeinnu yegoc nenahafoc ifingoc kecnide. <sup>12</sup> Amma serima kecma ebic tofohonideu yegoc ngictau kecnide.

Nga ye ngadehenideu ine yeng ifingoc ngadenunuude. <sup>13</sup> Amma dedeserina wama mi modacnideu yeng sifu dedeseria modacmangoc kefude, nocac ye mondea mondea kpac.

<sup>14</sup> Ge yoac ohodua, imoc kpebung heigboriyemmena. Nga yeni yoac goa negemma yoacngina engemmama ambacac goroyoac imoc seriagoc Anutuac kicfu edeyununa. Yoac engemmamagoc dede, imoc memefiha kpac. Ngicngac yeneng imoc negenggec yoac imocngo homac yombong memanganeyunuude. <sup>15</sup> Anutuac hehenu ngereeudeac seserigoc kecma uaga mebesena. Amma yoac fora gbomea tongganang dena gamengo ua ngic geac witiu mi embeso. <sup>16</sup> Nga ngicngac bangeac siduc nga yoac sicsauha deandae, imocac araing kecbesena. Ngicngac yoac ifia degec imocngo wangecyunuu Anutu ngadehema hereau torokpeu torokpe kenggecde. <sup>17</sup> Amma yeni yoacngina deyadigec imocngo kubec seria isoc monggoc yadi kenude. Himenaio nga Fireto yeri ngic ifia yenearunac. <sup>18</sup> Yereng yoac fora wama sing segema deandape, "Homecfunac gborima yacyac, imoc bic fingerec." ifi dema ngicngac goa yeneac negen negensinggina memanganeece.

<sup>19</sup> Anu Anutungo wotung seria faiu kemeec nande, imoc goroc goroc naric mi anude. Imohai yoac yofi oho ohoya fede,

“Kebungo ngicngacfora negengyunuude.”

(*Bangec kisiu 16:5*)

*Septuagintaunac)*

Nga mong yofi,

“Ngicngac Kebuac kpac kpacandae, yeni faka nga angammeme kopocsigoc, imoc sasawa wama araing kecbisia.”

<sup>20</sup> Anu ama kunennu enangtapa siriha hania hania fekende. Goa gol me siriwango memea nga goa ic me gbakingo memea. Nga enangtapa goa imoc uangina kuneng ande nga goa ine uangina seuhagoc ande. <sup>21</sup> Nga ngic mong ye yengena wiac seuhagoc imohacnac dzuacemeude, yeng enangtapa uaya kuneng, ifi isoc. Ye kpetiac amma minginaac amau efaima namma ua gombunga meudeac siriha imocacsoc ande.

<sup>22</sup> Bangecfu sebiac songo sebigbori yenearu feande, imohacnac worama hereau kecbesena. Ngic goa yeni herengina kongaha mekecma Kebuac kpac kpacandae, yenigoc seseri ua mema sing dindigac modacma negen negensingoc kecma ngicngac heresongogoc hoangyunuma ruaegoc kecbesena.

<sup>23</sup> Ge yoac sicsauha nga memefiha kpac, imoc hemma wabesena. Faka imocngonoc ngaba meficgeu ewekpekep fingerude. <sup>24</sup> Kebuac wanacngicngo eaceasigoc mi kecbeso. Ye ngicngac sasawa yenigoc yumea kecma kpoukppou uaac titiha negemma modzotitia kpac kecbeso. <sup>25-26</sup> Nga ngic goa yeni mangana minginaac botacfu tacma yeac negen negeng nga songo modacandae, yeni Kebuac wanacngic yeac yoac kpeandae, ifi ammagec yeng yenigoc yumeau kecma dederecegyoac edekpou ayemmebeso. Ayemmeu Anutungo ubangina merenggecdeac kuc yempeu gedang yeni ubangina ireckeu yoac fora negenghomema mangana minginaac botacfunac fotockema woragecde.

### 3

<sup>1</sup> Naso wisic wisickeau ebic hania hania fingecebesande, imoc negenna febeso. <sup>2</sup> Ngicngac yeni imohai yenanggac songo nga hiedzoac songo homac negenggecde. Yeni yenang wiacac negenggec engena anu sebiengenggoc kecma tenicfagoc amma nonggo mangfocnginaac yoac kpegecde. Nga ngicngac wiac yemmegecde, yeneac ubangerec mong mi negenggecde. Amma mitiu kekec yenearu mi feude. <sup>3</sup> Nga yeni ngicngac tosofocngina heresongogoc mi hoangyunugecde amma ngicngac yeneac kopocsigoc wawa mi anggecde. Yeni enacfu faifai amma angammemengina mi garenggema ubagori faka mekecma faka gombunga ubango wagecde. <sup>4</sup> Yeni kererengunuma angammemengina sicsauc anggecde amma sebingina meenggecde. Bangec nga sebiac songo yeneac kekecnginau yadiu Anutucac songo ine wagecde. <sup>5</sup> Amma yeni sebingosac mitiu kekec siric isoc kegcgecde nga Anutucac kucfakaya imoc wama ngadehegecde. Nga geng ine wayunuma yeneac hereau kecbesena.

<sup>6</sup> Yenearunac ngic goango gombunga siric kemma amayuguc amma ngac goa yoacfu yukpe kecdae, yeni metai ayemmeandae. Ngac ifia yeni yukpe yukpe fakangina amma songongina hania hania modackecgec kopocsingina ebiriude. <sup>7</sup> Yeni kpoukppouya negengkecdae nga yoac fora ine naric mi hentegecgecde.

<sup>8</sup> Nga bicngoc Yane nga Yambere yeri Moseac yoac waoc, ifi isoc ngic deduae, yeni negen negeng ikohagoc kecma yoac fora kpeandae amma negen negensingac sing segegecde. (*Makekeng 7:11,22; 9:11*) <sup>9</sup> Yane nga Yambere yereac sicsauc faka didiu fingeru sasawango imoc negenggec, ifi

isoc sasawa yeneng ngic imocac sicsauc fakangina hentegecgecdeac amma ikoc yoacngina monggoc mi yadiude.

<sup>10</sup> Nga Timoteo, ni wiac kpougenai, imoc negemma modacma kecne. Ni angammeme anai nga kekecnaac sing faiai, imoc negennec. Amma negen negensinnagoc modzotitia kpac kecma ngicngac heresongogoc hoangyunuma seserigoc kefai. <sup>11</sup> Ni Antiokia nga Ikoniong amma Ristera taonnu kecbare nukporac anenggec ebicfu nga kpendzenggoc kefai. Ifi kecbare Kebungo ebic sasawa imohacnac mesinuc, imoc negennec. <sup>12</sup> Nga ngicngac sasawa Yesu Kristoaru kpeketahama Anutu eweheimima kecgecdeac negendae, yeni ifingoc yunukporac ayemmegecde. <sup>13</sup> Anu ngic manganame nga ikocngic yeni faitobannu ngicngac faiyunuan-dae, yeni manganangina monggoc yadiseri anu manganeyombonggecde. Amma yeni yenaocngoc ikoc angemema goa ifingoc ikocfu wangecyunugec makpegecde.

<sup>14-15</sup> Ngicngac goa gombunga negengyununec, yeneng sabacgaunac kecerenec, naso imohai kpetiac yoac oho ohoya fede, imoc kpougenggec. Kpougenggec yoac imoc hoanggena negen negengga meefaiu Yesu Kristo negersinggema komoc kpenec. Ge imoc negenserina imocngo kekecga meseribeso. <sup>16</sup> Anu yoac mitikibiu oho ohoya fede, imoc sasawa Anutungo asuya fifiu ngicfu kemeec, imocngo yofi meficnunuude, imoc Anutuac enacyoac kpounemmema dederecge anemmeude. Amma mengerenunuma sing ddingac modacnideac garennunuude. <sup>17</sup> Nga Anutuac ngicngac yeni uac negen negeng nga kuc imocac sirihau mema ua gombunga megecdeac yoara imoc yemmeec.

## 4

<sup>1</sup> Yesu Kristongo eucererengau fingecma namma gbori nga homemea isingyunuma desiyunuude. Ni yeac nga Anutuac kicfu serima edegud-uae, <sup>2</sup> ge nasoyau me nasoya kpacfu Anutuac yoac ngicngac dekper-aiyemmemema goroayo edeyunubesena. Amma dederecge ayemmema nanggeyunuma modzotitia kpac wiac sasawa kpouyemmebesena. <sup>3</sup> Naso mong haude, imohai ngicngac yeni kpoukpouyoac gombunga negem-besonga modzongina tiude. Yeni ine yenang songo modacma kpoukpoungic homac kpedzucyunugecde. Kpedzucyunugec yeni ngicngac yeneac kedza-cfu wiac songea ande, imocac kpouyemmegecde. <sup>4</sup> Amma yeni yoac fora wama ngadehema nemusiduc nga siduc fora kpac, imohaigeng kpeke-tahema sing segecde. <sup>5</sup> Nga geng wiac sasawa isinggema geanggaoc garengemema ebic fingecgenu serima nambesena. Ifi namma Anutuac siduc gombung dekperagiyemmemema Anutungo uayoac genec, imoc hafoan-goc modacma kecbesena.

<sup>6</sup> Anu homecnasona bic hadeac ngic yeneng waing Anutuac sese faiandae, ifi isoc sacna kpakegecde. <sup>7</sup> Dzikac gombunga kpema bic mesiai. Amma ngic firang anggecdeac nedziandae, ifi isoc hafoa nedzima bic mesiai nga negen negensinna seria mekecma mi ukuba kpeec. <sup>8</sup> Yaguc kekec ddingacac ira neac tomai faifaia fede. Amma Kebungo faka ddingac ising isingngic, yeng naso imohai ira imoc nenude. Nga imoc nisac mi nenude, kpac. Ngicngac sasawa yeni yea haha nasoya fingectegerudeac songo negendae, yeng imoc ifingoc yemmeude.

<sup>9</sup> Ua mongngo dzegenude dema naso mi ukuma nearu bic habesena.

<sup>10</sup> Imoc yofiac, Dema ye bangecac kekecac songo negemma bic wanuma



Tesaronike taonnu kenec. Nga Kereseke ye Garata prowinsiu kenec amma Tito ye Darimatia prowinsiu kenu <sup>11</sup> Rukangosac nigoc kecde. Mareko ye uaac manau memeficna andeac amma geng ye meficgema hesickena gegoc habesera. <sup>12</sup> Tikiko Efeso sueba kenec. <sup>13</sup> Nga habesonga dema ngakpina herea Troa taonnu Karpoac amau waba feec, imoc nga kibina sasawa ihai faiba fede mehabesena. Nga kibina sasawa rama seberau oho ohoya fede, imoc negemba wiac engena andeac imoc momoc mehabesena.\*

<sup>14</sup> Aieng gerecfu oho ohongic Aresande,† yeng ebic homac meficgenenec. Nga Kebungo angammemeaac turunga kpoumiude. <sup>15</sup> Ye faka gerea amma yoacna homac meenti memati angkefec, imocac ge ngic yeac garengga mema kechesena.

<sup>16</sup> Anu ni hanahema Roma ihai yoacfu namma haniana deai, naso imohai ngic mongngo neac hepuc mi nanec, sasawango ine wanudacgec. Nga ifi anggecac imocngo mi meebiriyunubeso. <sup>17</sup> Ni siduc gombang bangec monunac ngicngac Anutu mi negemmidae, yenearu dekperagima mesibadeac Kebungo nigoc namma kuc nemma raionggac enacfunac onggonnuma mesinuc. <sup>18</sup> Ngic yeni ebic hania hania anembesonga negendae nga Kebungo imohacnac ifingoc mesinuu komoc kpeba kurumeng eucererengau fainuude. Yearu dedengerec nga dedengerec fekengkecheso, imoc fora.

<sup>19</sup> Neac wenacngerec Prisika nga Akpira amma Onesiforo arengfora yenearu kende. <sup>20</sup> Erasto ye Korintiu kemma kefec. Ye mi haec nga Trofimo ye ine hafei meecac Mirete taonnu waba tarec. <sup>21</sup> Nga geng naso mong mi ukuma nomannaso mi ammanu bic habesena. Euburongo wenacngerec degende amma Pudeng nga Rino amma Kraudia nga nengen negensing-goc tosofocnina sasawa, yeneng ifingoc wenacngerecngina gearu faigec hade. <sup>22</sup> Kebungo geac ongaasugoc kecheso. Nga danggunuhango ngenearu febeso.

---

\* **4:13:** Kibingina homac imoc papirus mariango memea imohai ohokegec. Papirus maria imoc sang maria isoc kuneng. Kibingina goa yeni rama me noning seberau ohogec. Sebera imoc ine buma kuneng. † **4:14:** Aresande, ye kopa nganoc imocgoc ua meec.

## Paurongo Tito Yeac Kibi Ohoec

<sup>1</sup> Ni Pauro, Anutuac wanacngic nga Yesu Kristoac aposoro. Anutuac meisingfora yeni yeac faka nga sing fora negensinggema negentegegecdeac fainuec. <sup>2</sup> Yoaac imocngo kekecseri meficgeude, imoc negensinggedimbe. Anutu memengerecna yearu ikoc mong mi fede, yeng hanac hanaheau-nacngoc kekecseri menideac enarango deseriec. <sup>3</sup> Anu yengena nasoya hau yoara didiu ngicngac faiyemuec dekperagicec, imoc debadeac fainuec. <sup>4</sup> Tito, negen negensingnu medacyombonna, ni kibi yomoc gearu faiduae. Anutu Manggac nga memengerecna Yesu Kristo yerearunac danggunuc nga ruaengo gegoc febeso.

<sup>5</sup> Ua noboha feec, imoc mesinadeac negemma Kreta nucfu waguba tacnec. Amma ua areng edzacguai, imoc modacma taong fekendaesoc, imohai kemma kpebunggac enara meisingyunuma uayoac yemmebesena. <sup>6</sup> Ngic mongngo dindingac kecma ngac mocguac ewea kecheso. Ye nambaracfora negen negensingnginagoc kecdae amma yoackpekpe me ihoc bahoc kekec, yoacsiducngina ifia mong mi febeso. Ngic ifia yeng enara naric anude. <sup>7</sup> Imoc yofiac, kpebunggac enara ye Anutuac wiac garenggeude, imocac yeng ngic soronga kecheso. Nga ye yengenaac negenu engena mi ambeso. Amma ye ngic gerea mi ambeso. Ye waing doku nema ubasufu ngic anu mi ngereude. Ye yarengic mi ambeso amma kichodung faka mi mekecheso. <sup>8</sup> Yeng ngicngac ama heiyemmekecheso amma faka nga angammeme gombunga, imocac songo negembeso. Fakaya nomana ambeso amma dindingac nga kpetiac kecma fakaya nga kekeha garengembeso. <sup>9</sup> Nga yoac fora edekpou aning, yoac imoc seria mekecheso. Ifi amma ngicngac sing dindingac kpouyemmemema ubangina midiude. Nga yoacnina kpeandae, yeneac yoac negen negentegecog merengyemuec kucngina mabeso.

<sup>10</sup> Ngic enarafocnginaac bageu kekec waandae, ngic ifia homacngo kecdae. Yeni yoackpekpe amma yoac onea deandae amma ngicngac ogofocngina ikocfu wangecyunuandae. Nga ngic sebi tosangina herecgegec, yenennoc faka ifia angkecdae. <sup>11</sup> Ngic ifia yeneac enac medzickebesonga. Yenennoc dzofinactoa ikocfu meficgegecdeac yoac dedesifucgoc edekpou ayemmegecede. Ayemmegec ama areng goa hafoangoc tohoma manga-negecede. <sup>12</sup> Kreta ngic yenang kpefing ngic mongngo yenanggac yofi deec, "Kretangic yeni nasoya nasoya ikoc angkecdae amma yaka ondzonggboc nekecma oyong kecma kateyang mangana isoc kecdae." <sup>13</sup> Yeac yoac imoc fora, imocac yeni negen negensingngina mengerema sirihau anggecdeac nonosaeng seria edeyunubesena. <sup>14</sup> Amma yudangic yeni nemusiduc goa dema singyoac ngicfunac meserima yoac fora wama ngadeheandae. Yeni yoac ifi mi negembisia, imoc seriangoc edeyunubesena.

<sup>15</sup> Nga ngicngac kopocsicngina kpac kecdae, yeneac kekecfu wiac sasawa kongaha feude. Nga ngicngac goa bic manganema kongaha mi andae amma negen negensingnginagoc mi kecdae, yeneac negen negentegec nga herenegeng negengngina momocngoc manganuec wiacngina kongaha mong

mi feude.\* <sup>16</sup>Yeni Anutu negemmidae, imoc enacnginangosac deficgegede nga fakanginango ine ye busic kpemigece. Fakangina mangana imocac amma urumbeso anemmece. Yeni yoac kpekpeareng kecma wiac mong gombunga angangac siric mi andae.

## 2

<sup>1</sup>Yoac gombunga nga dindingac fede, ge imoc modacma yofi kpouyemebesena. <sup>2</sup>Ngic yada yeni nomana kecma garengemema fakangina ewehiheigoc mekecbisia. Nga yoac yofi edeyununa, yeni negen negensingngina garengema ngicngac heresongogoc hoangyunuma modzotitia kpac Kebuac ua mebisia. <sup>3</sup>Nga ngac yada yeni ifingoc faka nga angammemenginaac arennu ngicngac kpetiac siricfu kecbisia, imoc kpouyemmebesena. Nga yeneng enacfu faifai mi ambisia amma waing doku nene, imocac ebicfu mi kecbisia. Wiac gombunga fede, ngeni imoc ngicngac ogofocngina kpouyemmebisia.

<sup>4</sup>Imocac ngac naroang ewefocnginagoc yofi kpouyemmebisia, Yeni ewefocngina nga nambaracocngina heresongogoc hoangyunuma <sup>5</sup>garengemema kpetiac kecbisia. Amma yeni ama uangina negen negengoc nga ubangerecogoc mema kecma ewefocngina yeneac yoac tofobobisia. Ifi anggec ngic mongngo Anutuac yoac naric mi demanganeude. <sup>6</sup>Ge sebigbori ngic ifingoc garengemegeceac negen negengngina midima edeyunubesena. <sup>7</sup>Amma wiac sasawau geanggaoc angammemega gombungangoc kecma sirihau anna modacgubisia. Ge kpoukpouga mekecma ewehiheiagoc kecma yoac fora kpouyemmena. <sup>8</sup>Nga ngabafocga yeni gamenginagoc namma geac yoac mong mi megeceac ngicngac ubadzidzigaunac yoac memefihagoc edeyunuma kecbesena.

<sup>9</sup>Wanac ngicngac mingingfocnginagoc kecdac, yeni mingingfocngina yeneac yoac sasawa tofohogecdeac imoc dederece ayemmebesena. Nga yeni mingingfocngina yeneac yoac turunga mi merengyemmebisia. Amma yeni mingingfocngina yeneng negengyemmegec ngereudeac uangina mekecbisia. <sup>10</sup>Yeni ine mingingfocngina yeneacunac wiacbisc mong heikpesia kpac eng mi mekembisia, kpac. Yeni ua sasawa mekecma yoac modac modac ngicngac ambisia. Amma yeni faka ifia anggec Anutu mengerecnaac kpoukpouyoac imoc ngicngac yeni ubangerehagoc negengece.

<sup>11</sup>Anutu engenatoa yeac wosoefacngo ngicngac sasawa yenearu fingectegeru komoc kpegeceac memengerec meficgeyemmeec. <sup>12-13</sup>Ye nga memengerecna Yesu Kristo, yereng kuc nga kibikperagiau hama fingecterece, imocac amma kenehaac tomal kecdimbe. Ifi kecmina Anutuac wosoefacngo metinnunu yofinenggac bangectoa bangec yomocac faka nga songo ngadehema kekecna garengema sing dindingac modacma Anutu eweheimema kecdimbe. <sup>14</sup>Anu Yesu Kristongo singyoac kpekpe arenunac yungecnuudeac yengenaoc ngabafora maringinau faiemec. Nga nenang yengena ngicngac amma kpetiac kecma ua gombunga mamangkima menideac faka imoc anec.

\* **1:15:** Paurongo dede yaka neneac kpaec mong mi fede. Goa yeneng ine degec, yaka goa imoc kpaecogoc. Mareko 7:19 Roma nadung 14 nga Sesemene nadung 11-15 imocac hania nga negen negeng ihai oho ohoya fede.

<sup>15</sup> Ge yocna imoc mema dederecge ayemmema ubangina midibesena. Ge yoc sasawa imoc kuc genggena, imocac siriha edeyunubesena. Nga ngic mongngo geac negenu mamea mi ambeso.

### 3

<sup>1</sup> Ge yoc yofi heigboriyemmena, ngicngac yeneng gawamangfocngina yeneac yoacngina negemma tofohoma ua gombunga megecdeac nasosoc efaima kechisia. <sup>2</sup> Amma yeni ngic me ngac mong demanganegecde, imoc mi ngereude, kpac. Yeni deendema mi amma yumea kecma ngicngac yeneac ebic negentegecma ubangerec faka ayemmedachisia. <sup>3</sup> Nga nenang ifingoc warac negen negentegecog mi kecma yoc kpeni goa yeneng ikocfu wangecnunugec sing segeing. Amma baneac hensongo nga negensongo hania hania imocngo witicnunuec. Nenang herebugo nga ogo yeneac keracmanganggoc kecma ubango ukuemeing. <sup>4</sup> Anu Anutu memengerecnina, yeac danggunuc nga ubaefacngo didiu fingectegeru <sup>5</sup> yeng dzuacnunuu Tiri Asungo ua meu fingec fingec gboria fingering. Ye ua gombunga meinggac amma mi mengerenunuec. Ye nenanggac ubamangang negemma mengerenunuu komoc kpeing. <sup>6</sup> Anu yeng memengerecnina Yesu Kristo yeac amma Tiri Asu ebiriangoc kpakenemmeec. <sup>7</sup> Kpakenemmema wosoefahaac amma dindiang denemmeu kecdimbe. Amma maridzominnina kekec wisicwickea kpac, imoc menideac negensima tomal kecdimbe. <sup>8</sup> Yoac imoc fora yombong.

Yoac imoc kucgoc edekpou ayemmenadeac negenduae. Ifi anna ngicngac Anutu negensinggema kecdae, yeneng faka gombunga isinggema imoc anggecdeac homac ayemmeude. Ua ifia imoc gombunga nga ngicngac yeneac memeficngina anude. <sup>9</sup> Ngicngac goa yeni yoac siriha kpac engem-mama deandae amma esangabo yeneac kisic kpema dedeseriac yoac goaac yoacngina engemmama anu ngaba angandae. Geng ine yoac ifia negemma ngadehebesena. Yoac ifia imoc memefiha kpac nga imocngo fora mong mi meficgeude. <sup>10</sup> Gurunegic ngic mongngo hau naso mocgu nonoyoac edena mi negenu edena atac yohockang ambeso nga yoacga mi negenudeu wana tembuha kecheso. <sup>11</sup> Ngic ifia ye sing segema kopocsic meficgema yengenaoc yoacfu faimeude.

<sup>12</sup> Ni Ateama me Tikiko gearu sueba hau naso mi wama nearu Nikopori taonnu bic habesena. Ni kianomang nasou ihai kecbadeac bic negensiai. <sup>13</sup> Aporo nga desi desi ngic kpara Dzena yeri singgac wiac mong mi obo-hoecdeac ge memefic seriangoc ayecmebesena. <sup>14</sup> Anu ngicngac focnina uaac fora mi meficgebauac yeneng ifingoc ngicngac ebicngina hemma faka gombunga mema meficyunugecdeac sing kpouyemmena negenggecde. <sup>15</sup> Ngicngac nigoc kecdimbe, yeneng wenacngerecngina gearu faigec hade. Nga ngicngac Anutu negensinggema neneac songo negendae, yeni wenacngerecnina edeyununa. Danggunucngo ngeni sasawa ngenearu febeso.

## Paurongo Firemong Yeac Kibi Ohoec

<sup>1</sup> Ni Pauro Yesu Kristoac amma witicngic nga negen negensinggoc tosonina Timoteo, nereng kibi yomoc faide Firemong gearu hade. Ge ua mocunira nga heresongogoc hoangguma kecdipe. <sup>2</sup> Negen negensinggoc nainnina Apia nga Kebuac wasaingic ogonira Arkipo yearu amma kpebung Firemonggac amau kpedzucneandae, kibi yomoc ngeneac momoc faidipe. <sup>3</sup> Anutu Mannina nga Kebunina Yesu Kristongo danggunuha ngemmema ruae ngemmebeso.

<sup>4-5</sup> Negen negensinggoc tosona, Kebu Yesu negensinggema kpetiac areng sasawa heresongogoc hoangyunukecne, geac siduc ifi negengkecduae. Imocac amma nunumunau geac negemma nasosoc Anutu dangge edekedduae. <sup>6</sup> Ge negen negensinnu nenigoc urec kecma Kristogoc kpeketahema kecna wiac gombunga sasawa mekecdimbe, imoc hafoangoc negengec-nadeac numuanduae. <sup>7</sup> Nga kpetiac areng ubaherengina heigboriyem-meanec. Heresongogoc ifi hoangyununa henaiac fakaga imocngo meser-inuu ebriangoc sogaiduae.

<sup>8</sup> Imocac amma Kristogoc kpeketahema kecma ua genggena menadeac naric edegubai, imocac negenna mi ebiribeso. <sup>9</sup> Heresongo negengemeeme fakau namma yoac yumea yofi deba, ni Pauro ngicyada yofinenggac Yesu Kristoac witicngic kecduae. <sup>10</sup> Amma ni medacna Onesimo\* yeac yoac debade. Ye witicamau kecbare fingec fingec gboriau medacna isoc fingecnec nga yeac negemma desambic anggemma yofi deduae, <sup>11</sup> Ye warac gearu memeficga mong mi anec nga yaguc geac nga neac momoc memeficnira angkecde. <sup>12</sup> Ni neanna ubaherena suebai isoc ye sueba gearu dzigeneude. <sup>13</sup> Siduc gombunggac amma witicamau kecbare yeng geac tatac mema nigoc yei kecma meficnubac, imoc naric ambac ifi negenai. <sup>14</sup> Nga geng naric mi demana ubanaac segereba wabanggac amma wayai. Nga faka gombungaac anggeni songoga modacnadeac sueba haude.

<sup>15</sup> Onesimo ye negen negensinggoc tosoaga kecma wisic wisickea kpac gegoc kefudeac gedang warac waguec. <sup>16</sup> Waguma wanacngic siricfu monggoc mi haude, kpac. Ye yaguc negen negensinggoc songo tosonina ande. Ni yeac ifi yombong negenduae. Nga geng yeac mingina nga negen negensinnu Kebuac amma ye tosoaga momoc ande, faka imoc wiac engena. <sup>17</sup> Ge negenna nerang ogo ogo andipeu Onesimo haude, ye ifingoc neng haba ambang isoc mema ye hoanggebesena. <sup>18</sup> Nga yeng sing ferahema wiacga mong memanganec me yeac turung gearu fedeu imoc sasawa wana neac turung ambeso. <sup>19</sup> Pauro neanna marinango kibi yomoc ohoduae. Ni turung imoc kpougembade. Nga geangga kekecac turung nearu fede, imocac yoac ine mi deduae.

<sup>20</sup> Ge foracngoc negen negensinggoc tosona, Kebunina Kristoac amma meficnuna ubaherengano ruae meficgeude. <sup>21</sup> Nga enac tofoc tofohoga fede, imoc negemma kibi yomoc ohogenduae. Nga wiac deduae, geng imoc torokpema monggoc annade, imoc negenduae.

\* **1:10:** Onesimo imoc titiha memefihagoc.

<sup>22</sup> Amma mong yofi negensiduae, ngeneac nunumunginaac amma witi-camaunac mesinugec ngenearu habade. Imocac neac ama mana mong mengerebesena.

<sup>23</sup> Ni Epafragoc nerahafoc Yesu Kristoac amma witicamau kecdipe, yeng geac wenacngerec dede. <sup>24</sup> Ngic nigoc kecma ua nenahafoc meandimbe Mareko, Aristako, Dema nga Ruka yeneng ifingoc wenacngerecngina degec hade. <sup>25</sup> Kebunina Yesu Kristoac danggunucngo ongaasunginau fekecheso.

## Hebiraio Yeneac Kibi

<sup>1</sup> Anutungo bicngoc naso homac singa hania hania imohai yoara profete yeneac enacfu faiu, yeneng bangefcocnina yoac edeyunukecgec. <sup>2</sup> Nga yofinenggac naso wisic wisickeau ye yoara Medahaac enacfu faiu yeng yoac edenunuec. Bangecfu nga sawau amma kurumennu wiac sasawa fekende, imoc Anutu medahaarusing yegoc meficgeoc nga maridzominga sasawa medahango meudeac desimiec. <sup>3</sup> Anu Medac ye yengenaoc Anutuac kperagia amma yeri siricngira mocgu andape. Nga Medac ye yoara kucgoc amma imocngo wiac sasawa bangecfu nga sawau amma kurumennu fekendacde, imoc nanggedaru fede. Amma ye ngicngac sasawa nenanggac kopocsic heidzuac ua mesima kurumennu Ngictau kuhagoc yeac foiau enec tacde.

<sup>4</sup> Medac ye angero sasawa yeneac kunengngina. Amma yeng kpac kuneng maridzomingac arennu meec, kpara imocngo angero yeneac kpac sasawa feracyunuude. <sup>5</sup> Nga Anutungo angero monggac yofi mi edeec, “Ni yagucnoc megudua. Ge medacna nga ni geac Mangga.” (*Mitiyegec 2:7*) Amma yeng angero monggac negemma yofi mi deec, “Ni yeac Manggac nga yeng neac Medac anude.” (*2 Samue 7:14; 1 Ngictau siduc 17:13*)

<sup>6</sup> Amma ye waracmedaha bangectoa bangecfu kefudeac hesicke haec, naso imohai yofi deec, “Anutuac angero sasawa yeneng ye ngonducnemima afehebisia.” (*Dedeseri 32:43 Septuaginta mitikibiunac.*)

<sup>7</sup> Amma angero yeneac ine yofi deec, “Ye angerofora sueyunuu yeneng yoara mema kenggec gerechorang uayoac edeyunuu yeneng ye kingang kpemigecde.” (*Mitiyegec 104:4*)

<sup>8</sup> Amma Medahaac negemma yofi deec, “Anutu, geac ngictau tatac imoc wisic wisickeau kpac amma feengkefude. Amma ngictau yasugaac kpara imoc faka dindingac. <sup>9</sup> Ge dindingac kekecac anggengande nga singyoac kpekpe, imocac ine ubagango waannec. Imocac amma Anutungo, geac Anutungo dema ge meis- ingguma sogac sogaiac kerecdokungo nadzicgenu geac sogac sogai imocngo tosofocga yeneac ferahede.” (*Mitiyegec 45:6-7*)

<sup>10</sup> Amma yeng monggoc Medahaac yofi deec, “O Kebu, hanac hanaheaungoc bangecac kpesinga fainec amma kurumenga kurumenga fekende, ge imoc sasawa marigango meficgedacnec.

<sup>11</sup> Yeni kpac andacgecde nga geng ine kecbesannec. Yeni sasawango ngakpi isoc dzamema kpac anggecde. <sup>12</sup> Geng kurumenga kurumenga fekendae, yeni ngakpi isoc kpouyununade nga ngicngac wamba mes- ima gboria faiandae, ge ifi isoc ine esea meicyunuma gboria fainade. Nga geng nasosoc siric mocgungoc kecnade nga geac kifanaso imoc wisic wisickeau kpac.” (*Mitiyegec 102:25-27*)

<sup>13</sup> Anu Anutungo angero monggac yofi mi edeec, “Ge foinaugeng tacmana ngabafocga hanigaac bageau faiyunuba yeni han- ititiga anggecde.” (*Mitiyegec 110:1*)



<sup>14</sup> Angero sasawa yeni asuareng amma ua mema kecdae nga ngicngac memengereac maridzoming megecdeac tomai kecdae yeni yeneac kingang kpegecdeac Anutungo sueyunuande.

## 2

<sup>1</sup> Imocac amma sing segema kembangac yoac sasawa imoc negenghomema mekecbisina. <sup>2</sup> Moseac nasou angerongo ngicngac yoac edeyunugec, imoc seriangoc faifaia feec. Ifi feu Israe ngicngac yeneng yoac imoc kpema mi tofohogec, yeni kopocsicnginaac sirihau turunga megec. <sup>3-4</sup> Anu Kebungo monggoc memengerecac sing mong kuha engena yombong edenunuec. Yeng imoc hanaheu yoara negenggec yeneng imocac hepuc amma edenunugec. Anu Anutu yengenaoc yoara meserima negensinggegecdeac kucfaka nga faka kiwa morora mema songoya modacma Tiri Asuac wosoefacac kuc nemmekefec. Ye ifi anecac nenang memengerecac sing kpenideu turungaac naric mi woranide.

<sup>5</sup> Bangectoa bangec gboria fingerudeac yoara deandimbe, imoc angero yeneac bagenginau mi faifaia. <sup>6</sup> Nga kibiu mongngo yofi bic dekperagiec, “Geng bangecfu ngicngacnec negensinunuma ngicac medac gombunga garennunukecne, imocac warecguduae. <sup>7</sup> Naso weganeacsac angero yeneac mamea anudeac geng faina kefec. Amma ye kuc kibikperagiagoc kekecac iraya heiminec. <sup>8</sup> Nga Anutungo wiac sasawa yeac bageu faiec.” *(Mityegec 8:4-6)*

Yeng wiac sasawa yeac bageau faima wiac mong mi herandzima hafaogoc faiec. Nga yofinenggac faka imoc mi hengandimbengoc amma sifu hennide. <sup>9</sup> Anu nenang Yesuac yofi hendimbe, Anutungo faka meu Yesungo naso weganeanc angero yeneac mameangina kefec. Kefu Anutungo wosoefac anemmeu Yesungo ngicngac sasawa donina mema kpendzeng kpema homeec. Imocac ye kuc nga kibikperagia amma ewehiheci mekecma imocngo yeac ira ande. <sup>10</sup> Anutungo wiac sasawa meficgedarec amma ye imocac mingina. Amma yeng medacfora homac hesicyunuma kibikperaginginagoc anggecdeac ine memengerecac hanac hanahengic kpendzenu faiec. Faiu ye yengena sebiu kpendzeng negemma uaya mesiu kekeha hafaogoc gombunga anec. Yeng ifi anecac Anutuac medacfora yeni kibikperagiaou naric enggecde. <sup>11</sup> Yesungo kpetiac kekecac dzuac dzuac ua mekecde nga ngicngac kpetiac kekecac dzuac dzuac mekecdimbe, nenang kpetiac amma arennina mocgu kecdimbe. Imocac amma ye nenanggac munafocna debesonga game mi kpeude. <sup>12</sup> Ye yofi dede,

“Ni geac kpac kuneng munafocna dekperagiyemmema kpebung botucnginau namma eriendzong megembade.” *(Mityegec 22:22)*

<sup>13</sup> Amma monggoc yofi dede,

“Ni yearu heiriduae.”

Amma monggoc dede,

“Nenenggec, ni nga nambaracfocna Anutungo nenec, neni yei.” *(Yesaia 8:17-18)*

<sup>14</sup> Yesungo homec nga mangana mingina memanganeudeac homeec. Anutuac nambaracfora nenang sebifusininagoc nga ye siric ifiangoc sebifusiagoc anec, ifi anecac amma mangana mingina naric memanganec.

<sup>15</sup> Amma ye arengfora kekecnina hafaogoc homecac kengecnunuande,

nenang kengecac witicfunac naric yungecnuude. <sup>16</sup> Foracngoc, ye nenang Abrahanggac bangecfora hoannunuma kecede. Ye angero ifi mi hoangyunude, kpac. <sup>17</sup> Ye donina meudeac amma wiac sasawa negemma munafora nenanggac siric yombong amma mong mi segeec. Ye ifi amma ngicngac nenanggac wosoefac amma uayoara modacma Anutuac kicfu ngicngac nenanggac womonggarengtoa anec nande. <sup>18</sup> Ye ine yengena kpendzeng kpema faitobannu enec, imocac yeng ngicngac faitobannu engandae, yeni meficyunuudeacsoc ande.

### 3

<sup>1</sup> Kpetiac tosofocna, kurumenggac kpkapacngo ngenearu ifingoc haec. Imocac ngeni negen negengngina Yesuaru faibisia. Yenoc aposoro nga womong garengtoanina nga nenang yeac kpara deficgekecdimbe. <sup>2</sup> Mose ye Anutuac uayoac modackecma Anutuac amau yoara tofohoma kefec. Nga Anutungo Yesu uayoac miu yeng Moseac siricfu uayoac imoc modackefec. <sup>3</sup> Ama memengicngo kpac kuneng meande, fora. Amma imocngo ama yengenaac kpac kuneng ferahade. Siriha ifia amma Yesungo Mose feraheu nenang yeac kpara afehedimbe. <sup>4</sup> Amatehec sasawa imoc ngicngo mamea nga Anutungo ine wiac sasawa meficgedarec. <sup>5</sup> Mose ye wiac ngadeau fingerudeac sosoha anec. Ye ifi kecma Anutuac amau kingangkpeke kefec. <sup>6</sup> Mose ye kingangkpepe kecma Anutuac uayoac modackefec nga Kristongo Anutuac Medac kecma uayoac modacma yeac amagareng kecede. Amma nenang kengeha kpac kurumenggac wiac menide, imoc wiac engena negemma serima mekecnideu Anutuac amanoc angkecnide.

<sup>7</sup> Imocac amma Tiri Asungo yofi dede,

“Ngeni yaguc yeac yoac negendae, imohai <sup>8</sup> herengina mi dzegegec. Ngeni warac bangec kisiu yoacna kpema tobannugec, ifi isoc monggoc mi ambisia. <sup>9</sup> Bangecfocngina yeneng imohai neng ua mekefai, imoc kifa 40ac manau hengkecma ni ine tobannukecgec. <sup>10</sup> Nga ngicngac naso imohai kegec, yeneac herebu negemma yofi deai, ‘Yeni herenginango nasoc sing segekecma neac sing fekende, imoc negenggecdeac mi ayemmeande.’ <sup>11</sup> Imocac ni herebu amma deserima yofi deai, ‘Yeni neac kecnegeng kekecfu naric mi enggecde.’” (*Mitiyegec 95:7-11*)

<sup>12</sup> Tosofocna, ngenearunac mongngo ubahereau negen negeng mangana ereu negen negensing wama Anutu kecec mingina ngadehebauac ngeni henghomema kecbisia. <sup>13</sup> Mitikibingo “yaguc” ifi demanu ngeni uamemesoc ubaherengina midiemebisia. Kopocsicngo ngenearunac goa ikoc ayemmu herengina dzegebauac ngeni ifi ambisia. <sup>14</sup> Nenang urecfu Kristo seria negensinggema kefing, negen negensinnina siriha imocngo mekecnideu naso wisic wiskeau serima nanni yeng deude, “Ngeni neac ogofocna.”

<sup>15</sup> Anu monggoc dedea yofi fede,

“Ngeni yaguc yeac yoac negendae, ngeni imohai herengina mi dzegegec. Ngeni warac yoacna kpegec, ifi isoc monggoc mi ambisia.” (*Mitiyegec 95:7-8*)

<sup>16</sup> Negenggec, Mosengo Aigita bangecfunac ngicngac hesicyunuma kenu yeni sasawango Anutuac yoac negemmaguc ine faka hania hania angkecma yoara kpegec. <sup>17</sup> Amma yeni yoara kpema kopocsic meficgegecac yeng kifa 40 ngaba ayemmu bangec kisiu homedacgec fedaengoc. <sup>18</sup> Nga yeng ngicngac yeac yoac kpegec, yenengsac kecnegenggac kekecfu mi enggecdeac

deseriec. <sup>19</sup> Amma yofi hentegecdimbe, yeni mi negensinggegec, imocac amma yeneng bangec deec, imohai engegecdeac osigec.

#### 4

<sup>1</sup> Anutungo kecnegeng kekecfu ennideac deec, imoc nandengoc. Nga kecma ngeneanunac goango engegecdeac obohobauac, ngeni garengngina mema kecbisia. <sup>2</sup> Yeneng siduc gombang negenggec, nenang ifi isocngoc imoc negening. Nga yeni ine imoc negemma mi negensinggegec amma Yosua nga Karebe yerigoc uba mocgu mi anggecac amma yoac negenggec, imocngo yenearu memefiha kpac anec. <sup>3</sup> Nga ngicngac negensinggema kecdimbe, nenaoc kecnegeng kekecac areng andimbe. Anutungo bangec nga kurumenggac kpesinga faiu wisickeu wiac sasawa mesidacma kecnegeng kekecac uameme faiec. *(Fingec fingec 2:2)*

Ye ifi faima sifu yofi dede,

“Imocac ni yeneac herebu negemma ine yofi deseriai, ‘Yeni neac kecnegeng kekecfu naric mi engegecde.’” *(Mitiyegec 95:11)*

<sup>4</sup> Uameme 7gac yoac fekende imocac yoac mong yofi fede,

“Uameme 7 fingeru Anutungo uaya sasawa faidacma tacnegenec.”

<sup>5</sup> Nga yomohai yoac imocac nobohango yofi dede,

“Yeni ine neac kecnegeng kekecfu naric mi engegecde.”

<sup>6</sup> Ngicngac goa yeni ine kecnegeng kekecfu naric engegecde. Nga goa yeni hanahema siduc gombang negenggec, yeneng ine enac tofoc tofohongina kpac, imocac kecnegeng kekecfu mi engec. <sup>7</sup> Imocac amma naso hereangoc anu Anutungo monggoc naso mong kpara “yaguc” ifi deserima yoac Dawidi miu yennoc yofi deec,

“Ngeni yaguc yeac yoac negemma, herengina mi dzegebisia.” *(Mitiyegec 95:7-8)*

<sup>8</sup> Yosuang kecnegeng bangecfu hesicyunu embacfu Anutungo ngadeu Dawidiac nasou naso monggac naric mi debac. <sup>9</sup> Imocac yofi nengdimbe, Anutuac ngicngac yeneac hombanggac kecnegeng naso fedengoc. <sup>10</sup> Nga Anutungo uaya faima tacnegenec, ifi isocngoc ngic mong ye Anutuac kecnegeng kekecfu emma uaya faima kecnegenude. <sup>11</sup> Nga warac areng yeneng makpegec, nenanggarunac mongngo yeni isoc yoac kpekpe ambauac nenang kecnegeng kekec imohai ennideac negemma seserigoc ua mema kecbisina.

<sup>12</sup> Anutuac yoac imoc kekehagoc nga uaya nasosoc mema kecdengoc. Imoc wasaibeang sasawa enara noboc noboc imoc feracyunuma enara santac yombong ande. Imocngo wiac sasawa nendzicma noboc nesariande. Imoc ongaasu nga ubaonganina hendzicyuruma sic gbotoc gbotoc nga sic manau kereha nendzicyuruude. Amma ubahereninau negen nengeng nga faka sufuma mekecdimbe, imoc isinggema foraya mekperaginemmeude. <sup>13</sup> Nga Anutungo wiac sasawa deu fingececdarec imocac wiac mongngo yeac kicfu sufu sufuya mi fede. Wiac sasawa imoc fingec fingec nga didiu yeac kic witiau fedacde amma yearunoc kekecninaac siduc memini imoc isingedarude.

<sup>14</sup> Nga womong garengtoanina engenango kurumenga kurumenga ferahedacma enec kecde, imoc Yesunoc, Anutuac Medac. Ye ifi kecdeac negen negensinnina deficgeandimbe, imoc negemma seria mekecbisina.

<sup>15</sup> Faitobang fingecnemmeande, ifi isoc womong garengtoanina ye ifingoc fingecmidarec nga yeng ine kopocsic mong mi meficgeec. Imocac ye kucmamanina hennegeng andacma nenanggac ubamangang negengkecde. <sup>16</sup> Imocac nenang kengec nga negengyohoa kpac kecma Anutuac danggunuac ngictau tatacac wegenac kembisina. Ifi anu memefic naso yombong hau yeac wosoefac meficgeni yeng danggunuha nemmema meficnunuude.

## 5

<sup>1</sup> Anutungo Yuda yeneac womong garengtoa ngicfunac meisinggema desiu yeng ngicngac yeneac amma Anutuac kicfu namma uaya mema ubangerecac nga kopocsicac sesegerec faiande. <sup>2</sup> Amma womong gareng ye yengena kucmamaac bageau ifingoc kecde. Imocac ngicngac negen negentengengina kpac me sing segeandae, yeni gombunga ayemmeudeacsoc ande. <sup>3</sup> Yeng kucmamayaac amma yengena nga ngicngac yeneac kopocsicac sesegerec momoc faiande, imoc ngicngac yeneacsac kpac. <sup>4</sup> Amma ngic mongngo womong garengtoaac tatac yengena ubeaac naric mi meude. Anutungo Arong kpacma womong garengtoa uayoac miec, ifi isocngoc Anutungo womong garengtoa sasawa kpacyunuma uayoac yemmeande. <sup>5</sup> Nga Kristo ye yengenaoc ifingoc womong garengtoa anudeac amma kpactoagoc mi meemeec, kpac. Anutungo yeac yofi deec,

“Ni yagucnoc megudua. Ge medacna nga ni geac Mangga.” *(Mitiyegec 2:7)*

<sup>6</sup> Amma monnu yofi oho ohoya fede,

“Geng Merikisedeac siricfu womonggareng wisic wisickea kpac kecengkecnade.” *(Mitiyegec 110:4)*

\*

<sup>7</sup> Yesungo bangecsebigoc kecma yofi numuec, “Ge homecfunac megborinubesena.” Ifi numumima kpacambic ammima kunengngoc arohoma kiarec. Nga ye Anutu eweheimima enac tofoc tofoho kefecac Anutungo nunumuya negenec. <sup>8</sup> Yesu ye Medac yombonga. Amma yeng sifu kpendzeng kpema enac tofoc tofoho kekecac faka meec. <sup>9</sup> Amma ye kpendzeng kpema hafoangoc gombunga anec. Yeng ifi anu ngicngac yengeng yeac enac tofohoma uayaac amma komoc kpema wisic wisickea kpac kecengkecgecde. <sup>10</sup> Ifi anu Anutungo yeac yofi deec, “Geng Merikisedeac siricfu womonggareng wisic wisickea kpac kecengkecnade.”

<sup>11</sup> Wiac imocac yoac homac fenemme nga ngeni yoac negenggecdeac tondzera angandae, imocac edekpou angemmeba dema obohoduue. <sup>12</sup> Ngeni naso herea bic negen negensinggoc kecma kpoukpou ua bic megeg ngereebac. Amma yofinengac mongngo hama ine Anutuac yoac haniaunac monggoc edekpou angemmeudesoc ande. Ngeni yaka seria negecdeacsoc mi amma namuacsac angemmede. <sup>13</sup> Nga ngic mong ye namuungoc kecde, ye sabac kecdengoc. Nga neni ditingac kekecac yoac kpoumini ye imoc negemma meudeacsoc mi ande. <sup>14</sup> Yaka seria imoc ngicngac bic yadiseri angana, yeneac. Amma ngicngac ifia yeni negen negengngina naso herea bic midima faka damocngo gombunga me mangana, imoc ireckema negengecma kecdae.

\* **5:6:** Merikisedeac siduc imoc Fingec fingec 14:17-24 oho ohoya fede.

## 6

<sup>1</sup> Ngeni mitiu wiac efea hanahema kpoungemmeing imoc monggoc mi denide. Amawotung monggoc ukuni kemeu imoc mi ngereue. Imocac amma faka kpakparoha wagece nga Yesu negensinggegece amma <sup>2</sup> doku nadzicac kpoukpou hania hania nga mari faifaic ua amma homecfunac gborima yacyac nga hofeac kpendzeng wisic wisickea kpac, <sup>3</sup> imoc Anutungo negenu naric anudeu monggoc mi denide.

<sup>4</sup> Imoc yofiac, ngicngac goa yeni kperagi bic yemmeyemnea nga kurumenggac ubangercac yaka nehemma Tiri Asugoc bic anggec. <sup>5</sup> Amma yeni Anutuac yoacac songea amma bangec nga kurumeng ngade kecma fingeibesande, imocac kuc ifingoc nehenggec. <sup>6</sup> Nga ngicngac imoc nehemma makpema ngadehegecede, yeni monggoc ubamereng meyunuma heitaiyununideac singa mong mi fede. Ifia yeneng Anutuac Medac didiu deengdema ammima mariponnu monggoc kpeandae. <sup>7</sup> Bangec mong medzameni kiango naso homac kpema uau doku meficgeu ngicngac yeni yakangina imohai homecgec fora meficgeyemmeu yofi debesonga, bangec imoc Anutuac keneclu fede. <sup>8</sup> Nga bangec mong medzac medzameango ine witic waeagoc nga tebanghaseng meficgeudeu bangec imocngo uaya kpac amma sowehagoc anu naso wegenu gerecngo dzeu kpac anude.

<sup>9</sup> Songo tosofocnina, ngeni ngicngac ifia kpac amma ngeneng komoc kpegecdeac areng, ifinoc negensima kecdimbe. Ifi negensima sifu goroyoacngina dedimbe. <sup>10</sup> Anutungo sing dindingacfu yoac nga fakangina isinggeude. Ngeni uanina meandae nga kpara songogoc hoanggeandae, yeng imoc naric mi nigeckpeude. Amma ngeni kpetiac areng heimefic ayemmegec nga torokpema ayemmekecdaengoc, ye imoc ifingoc naric mi nigeckpeude. <sup>11</sup> Nga ngeni negenyohoha kpac kecma wiac fingecegemmeudeac negensinggema kecdae, ngeni imoc megecdeac tembut mamangkima ua mekecmagec naso wisic wisickea haude. Ngeni ifi kecgecdeac anemme. <sup>12</sup> Imocac ngeni oyonga mi ambisia. Ngicngac negen negensing seriangoc modzotitia kpac mekecdae, yeni maridzomingngina Anutungo warac deyemmeec, imoc megecede, ngeni ifi amma yeneac siric modachisia.

<sup>13</sup> Anutungo Abarhanggoc yoac dedzege anec. Amma wiac ngade miudeac deseribesoma amma yeac kunenga mong mi kefecac ye yengenaac kpacfungoc kpacma yofi dema deseriec,

<sup>14</sup> "Foracngoc, ni kenecgubade nga fingeacsahega sahebesande." (*Fingec fingec 22:16-17*)\*

<sup>15</sup> Anu Abarhang ye naso hereangoc tomai kefec. Amma ubea kuha mi mamanu Anutungo wiac miudeac deec, imocac fora fingeru henec.

<sup>16</sup> Nga ngicngac yeni yoacngina meserigecdeac kunengngina kpacma yoacngina deserienda. Yeni ifi anggecdeu deengdema fakangina wisickedarude. <sup>17</sup> Anu Anutungo ifingoc yoara deseriec. Nga Abrahanggac bangecfora yenearu yoara monde monde mi anec, yeni imoc negemma dzadzahac kuha momoc negentegecyombonggegecdeac ifi deec. <sup>18</sup> Ye ifi dema yoac seria yohockang meficgenemmeec. Yoac yohockang ifi feecac yoara ikoc naric mi anude.† Fakaya ifia negenni imocngo ebiriangoc

\* **6:14:** Anutungo Abrahanggoc dzadzahac meec, imoc yomohai oho ohoya fede, *Fingec fingec 12:1-3; 13:14-18; 15:1-21; 17:1-27; 18:1-15; 22:1-18.* † **6:18:** *Fingec fingec 12:7; 13:15; 15:1-21, imohai Anutungo Abrahanggoc yoac dedzege anoc. Amma Fingec fingec 22:16-17 imohai ye yoara deseriec. Imocac yoac seria yohockang oho ohoya fede.*

meserinunuu bangecac wiac naric wama wiac ngade menideac deec, imoc seria mekecnide. <sup>19</sup> Nga Anutungo wiac menideac denemmeec, yoac imocngo ubaonganinaac angka isoc angande. Imocngo yeac womongtoau emma kpoructoa ferecgema kpetiac nga kpetiac yombonggac manau seria fede. <sup>20</sup> Anu Yesungo nenanggac amma imocac manau warainemmema enec. Ye womong garengtoa wisic wisickea kpac kecengkefudeac emma Merikisedengo kefec isoc kefude.

## 7

<sup>1</sup> Merikisede ye Sareng taonggac ngictau amma Anutu engenatoa yeac womong gareng kefec. Nga Abarahang ye ngictau yenigoc ewema kpebucyunuecfunac dzigenema hamanu yeng sinnu ye meficgema keneheec. <sup>2</sup> Keneheu Abarahangngo iwaiya sasawa dzikacfunac meecmoc, ihacnac tennunac mocgu hendzicma Merikisede miec. Nga Merikisede yeac kpara titiha imoc, “Dindingac kekecac ngictau.” amma monggoc “Sarenggac ngictau.” imocac titiha “Ruaec ngictau.”

<sup>3</sup> Amma ye nonggomama nga esangabofora yeneac kpacarengngina mong mi oho ohoya. Nga ye fingec fingecnasoya kpac amma homec nasoya ifingoc kpac, ye Anutuac Medac siric isocngoc amma womong gareng nasosoc kecengkefude. <sup>4</sup> Anu dzite hania bangecnina Abarahangngo wiara dzikacfunac meec, imoc hendzicma teng imohacnac mocgu miec. Imocac ngeni hentegecbisia Merikisede ye ngic engenatoa. <sup>5</sup> Nga Rewiac bangecfora yeneng womong gareng ua mekegcedeac uayoac megec, yeni ngicngac yenearunac tennunac mocgu imoc mekpedzuc ambisia, dedeseringo ifi dede. Nga ngicngac imoc yeni Abarahanggac bangecfora nga sactosofocngina kecma sifu yenearunac tennunac mocgu mekegcec. <sup>6</sup> Anu Merikisede ye yeneac arenunac mi fingerec, kpac. Amma ye sifu Abarahanggarunac tennunac mocgu mema ngic Anutuac dzadzahac mekefec, yenoc keneheec. <sup>7</sup> Nga ngic merang kenec miec, yeac kpacngo kenec meec, yeac ferahede. Mongngo yoac imoc naric mi kpeude.

<sup>8</sup> Anu mong yofi, womong gareng homec bageau kecdae, yeneng tennunac mocgu kpedzucnema mekecdae. Nga Abarahangngo tennunac mocgu Merikisede miu meec, yeng ine kecdengoc, dedekperagi ifi nemmegec. <sup>9</sup> Amma yoac yofi naric denide, Rewi ye tennunac mocgu memec ngic nga Merikisedengo Abarahanggarunac tennunac mocgu bic meec, imoc Rewiarunac meecac amma Rewi yengenaoc tennunac mocgu ifingoc faiec. <sup>10</sup> Merikisedengo Abarahanggoc sinnu ewaroc, naso imohai Rewi ye bangehaac hereu bic tareac amma Abarahangngo Merikisede wiac miec, imoc Rewingo ifingoc miec ande.

<sup>11</sup> Nga Isirae ngicngac yeneng dedeseriyoac megec, imohai yofi feec, Rewiac areng yeni womong gareng ua mebisia. Nga yeneng womong gareng ua megec wiac hafoangoc ngereebac dede Anutungo womong gareng monggoc fingerudeac mong mi debac. Nga yofi fingecbeso, womong gareng ngic mong Merikisede yeng kefec, siriha ifia fingecbeso amma ye Aronggac arenunac fingecbac imocngo mi ngereebac. <sup>12</sup> Nga womong garenggac ua areng gboria fingerudeu dedeseriyoacac areng gboria ifingoc fingecbeso, sing mong mi fede. <sup>13</sup> Amma womong gareng imoc ine kiscic mong yenearunac nga yeac kiscicfunac mongngo arata henggareng mong mi angkefec.

<sup>14</sup> Kebuninango Yuda kisis yenearunac fingerec, imoc negendimbe. Nga Yudaac areng, yenearunac mongngo womong gareng anude, imocac Mosengo mong mi deec, kpac.

<sup>15</sup> Anu Kebuninango Yuda kiscifunac fingeema Merikisedengo womong gareng kefec, ifi isoc womong gareng anec, imocngo monggoc dekperagiu Rewi arenggac womonggareng ua soha mi anec. <sup>16</sup> Womong garengtoa ye sac areng mocguac manau modacma fingecheso, dedeseringo imoc dede. Nga Kebunina ine kekec dzonggo dzonggoa kpac imocac kucfu womong garengtoa anec. <sup>17</sup> Yeac negemma dedekperagi yoac yofi fede, "Geng Merikisedeac siricfu womonggareng wisic wisickea kpac kecengkecnade." *(Mitiyegec*

*110:4)*

<sup>18</sup> Dedeseriyoac kucmama nga memefiha kpac warac hau yoac imocngo faka warac feec, imoc meickeu kpac andarec. <sup>19</sup> Dedeseriyoacngo memengerec ua hafoa mong mi meec, kpac. Nga Anutungo yofinenggac sing mong mesarinemmeec, imocngo warac sing feec, imoc ferahede. Nga nenang sing imoc modacma Anutuac hoannu kengkecnide.

<sup>20</sup> Anutungo yoara meserima Yesungo womonggareng anudeac deseriec. <sup>21</sup> Womong gareng Rewiac arenunac yeneac demeseriyoac ifia mong mi feec. Ye imoc Yesuaru faima yofi edeec,

"Kebungo yoara meserima yofi deec, 'Ge womong gareng wisic wisickea kpac kecengkecnade.' ye yoara ifi meserima naric mi waude."

<sup>22</sup> Anutungo Yesuac ifi meseriec, imocac amma Yesungo dzadzahac gboria imocac nonggo tarec. Ifi taru dzadzahac gboriango esaac kuc ferahede.

<sup>23</sup> Womong gareng Rewiac arenunac yeni ngic homac. Nga homebesandaengo ua imoc mekecgecdeac homecngo womonggareng ua imocac kpaec anec. Imocac amma mong homeu mongngo torokpeu torokpe meerekecma womong gareng ua megec amma yaguc meandae. <sup>24</sup> Nga Yesungo ine wisic wisickea kpac kecengkefude, imocac womong gareng ua yegoc wisic wisickea kpac amma feeng kechesande. <sup>25</sup> Ye nasosoc Anutuac kicfu yoacfu meficnunuudeac kefudeac ngicngac yearusing Anutuaru kennide, nenang hafoangoc mengerenunuudeac mi obohode.

<sup>26</sup> Anu womong garengtoa yennoc naric meficnunuude. Ye kpetiac nga kopocsiha kpac, kongaha amma wononga kpac. Anutungo ye ngic kopoc-sicmeme yeneac botucfunac meickeu ye kurumeng sasawa fekende, imoc feracyunuma wi kecde. <sup>27</sup> Nga womong garengtoa Rewiac arennu yeni wenacsoc yenang kopocsicac sese faimaguc ngicngac yeneac kopocsicac ngade faikecdae. Nga Yesungo faka imocac bageau mi kefec, kpac. Ye ine sese dema yengena faiemec nga yeng imoc naso mocgusac meu soha anec.

<sup>28</sup> Foracngoc, dedeseringo ngic kucmamagoc uayoac deyemmu womong garengtoa angkecdae. Nga demeseriyoacgoc fingerec, imocngo Medac uayoac demiu yeng tatak mema kucmamea kpac nga hafoangoc gombunga wisic wisickea kpac feengkefude.

## 8

<sup>1</sup> Imocac amma yofi fede, womong garengtoaninango kurumenggac ngictautatac, imocac foiau tataha mema tacde. <sup>2</sup> Amma ye Anutuac womong yeac kporuc bedzo fora kurumennu nande, ihai kingangkpekpe ua mema kecde. Kporuc bedzo imoc ngicngo mi memea, kpac. Anutu yengenaoc imoc mema faiec.



<sup>3</sup> Anutungo womong garengtoa uayoac deyemmeu yeni ubangerec nga kopocsicac sesegerecngina faikecdae. Imocac amma Yesungo ifingoc sese mong faibeso. <sup>4</sup> Womong gareng yeni dedeseriyoac modacma Anutu sese heiheimiac ua imoc bic mekecdae, imocac ye engngoc bangecfu kecbacfu womong gareng naric mi ambac. <sup>5</sup> Mosengo kporuc bedzo mema miacbeso anu Anutungo goroyoac dema yofi edeec,

“Ni tikiu onga edzacguai, ge siriha imoc yombong modacma wiac sasawa medacnadeac henghomema mebesena.” *(Makekeng 25:40)*

Nga ngic yaguc womonnu ua meandae, yeni Mose isoc kurumenggac onga modacma uangina mekecdae.

<sup>6</sup> Yesu ye dzadzahac gboriaac ngicbotuc, dzadzahac imoc dedzege yoac kuha monggoc mekecde, nocac dzadzahac gboriaac dedeseriyoacngo eseaac ferahede. Amma yeac womong gareng ua, imocngo bangecac womong gareng ua siriha ifi isoc ifingoc feraheude. <sup>7</sup> Dzadzahac esea ebiha kpac ambac dede dzadzahac gboria mongngo tataha naric mi mebac. <sup>8</sup> Nga Kebu Anutungo ine ngicngacfora yenenu kopocsicnginagoc anggecac yofi deec, “Kecma naso mong haude, imohai ni Israe nga Yuda areng yenigoc dzadzahac gboria mong mebade. <sup>9</sup> Dzadzahac imoc warac bangecfocngina yenigoc meai, imocfia isoc kpac. Naso imohai neng maringinau mema Aigita bangecfunac hesicyunu hayai. Yeni dzadzahac meai, imoc wama imocgoc mi kecgacac ni ifingoc wayunuma yohoc bahoc ayemmeai.”

Ye ifi dema monggoc torokpeec,

<sup>10</sup> “Ni ngadeu dzadzahac gboria Israe areng yenigoc mebade, imocac siriha yofi, dedeseriyoacna ngicngac yeneac negen negenu faima kibia imoc herenginai yombong ohobade. Amma neng Anutungina kecha yeneng ngicngacfocna kecgacde. <sup>11</sup> Nga imohai mongngo Israe ogea me munea mong edekpou ammima yofi mi deude, ‘Ge Kebu negemina.’ Nocac ngicngac kapiaunac erema kunengtoau wisickeude, yeni sasawango negennugecde. <sup>12</sup> Ni wosoefac ayemmeba sing segema me kopocsic meficgeandae, imoc sasawa wama monggoc mi negensibade.” *(Yeremaia 31:31-34)*

<sup>13</sup> Ye dzadzahac gboria monggac deec, imohai dzadzahac warac meec, imocngo esea anec, ifi dekperagiec. Nga wiac mong bic wawaya esea ande, imocngo naso kapianeccac fema kpac anude.

## 9

<sup>1</sup> Dzadzahac waraima haec, imocac fakaya nga singyoara feec. Nga kpetiac amaya yei bangecfu feecngoc. <sup>2</sup> Anu kporuc bedzo mana warac warac feec, imocac kpara Mana kpetiac. Nga mana warac warac imohai kifa nananga amma tebo ic sogongagoc nanoc. <sup>3</sup> Nga kporuc monggac ngadea imohai kporuc bedzoac mana mong feec, kpara Mana kpetiac nga kpetiac yombong. <sup>4</sup> Imohai hosuc homuna gombunga oho ohoac arata golngo memea nga dzadzahacac katapa taroc. Dzadzahacac katapa imoc golngo faima mekatahadacgec nga imocac manau enang golngo memea mannayakagoc\* faigec tarec. Aronggac yasu sera kpekpea nga dzadzahacac

\* **9:4:** Anutungo bangec kisiu mannayaka Israe ngicngac engsac yemmeu yeni imoc asoacsoc sobing isoc bangecfunac kpedzucnekecgac. Manna imoc hebraio yoac amma titiha yofi, “Noc wiac?”

tafe ihai ifingoc faigec feec. <sup>5</sup> Katapa imocac witiau kerobing kibikperagin-giragoc yohockang kpegangngirango tapeau hedzic hedzic ammima semeec feec. Antungo ihainoc kopocsicnginaac turung kpoukpou ua mekefec. Nga imocac hania sasawa yofinenggac mi debade.

<sup>6</sup> Yeni kporuc bedzo siriha ifi mekegcgac womong gareng yeni ama mana warac warac imohai emma uangina mekecdae.† <sup>7</sup> Nga womong gareng-toangosac ama mana mong imohai kifasoc atac mocgu engande. Amma ye eng naric mi engande, kpac. Ye sac mema emma yengena kopocsic nga ngicngac yeni kopocsic hania kpacfu eng sicsauc megec, imocac amma sese faiudeac meengkecde. <sup>8</sup> Nga Tiri Asungo yofi edzacnunude, Kporuc bedzoac kuha femanu mana kpetiac nga kpetiac yombong ngicngac ihai enggecdeac singa mong mi fingectegerude. <sup>9</sup> Ngicngac yofinenggac kecdae, yeni imocac ongea isoc ande. Yeni Anutuac womonno yeac ubangerec nga kopocsicac sesegerec meemma faimiandae nga imocngo ine yeneac herenegen negengngina hafoangoc naric mi dzuacyemmeude. <sup>10</sup> Nga ua imocac nenedoku nene nga dzuac dzuacac faka hania hania imoc sebiu uasac meandae. Anutungo singyoac imoc yemmeu, yeni imoc modacma kecmeagec nadung gboria monggac nasoya haude.

<sup>11</sup> Anu Kristongo bic hama wiac sasawa gombunga yei fede, imocac womong garengtoa anec. Ifi amma kporuc bedzo mong gombunga yombong maringo mi memea amma bangecfunac wiac mongngo mi memea, imoc nande, imoc kuneng nga hafoangoc gombunga amma esea ferahey-ombonggede. <sup>12</sup> Kristo ye noning ngiwa me burumaka medahaac sac mema mi enec, kpac. Ye yengena sacngo naso mocgusac sese mema mana kpetiac nga kpetiac yombong, imohai enec. Emma yengena sacngo bunnina meec, imocngo fefeseri fekecbesande. <sup>13</sup> Ngicngac yeneng Anutuac kicfu wonongnginagoc anggec womong gareng yeneng noning me burumaka ngiwa yeneac sac nga burumaka ngagera medac mi memea gerecngo dzeu hama ande, hamaya imoc mema ngicngac wonongnginagoc yenearu kpegiandae. Kpegigec wisickeu ngicngac yeni Anutuac kicfu sebiugeng kpetiac anggecde. Imocac amma yofi negembisia, <sup>14</sup> Kristongo kekecseriac Asugoc namma yengena soronga amma kekeha Anutuaru faiemeecc. Yeac sacngo yangburumaka sacngina homac ferahede. Imocngo herenegen negenina dzuacdaru angammemenina kpakparoha kpac anu Anutu kekehagoc kingang kpeminide.

<sup>15</sup> Kristo ye yengena kekeha faiemema dzadzahac gboriaac ngicbotuc anec. Nenang dzadzahac esea imocac dedeseriyoac kpeing. Kpeni yeng homema bunnina mema dzadzahac esea imocac bageaunac menunuec. Anutungo ngicngac kpacnunukecde, nenang kekecseriac maridzoming menideac Kristongo ifi anec. <sup>16</sup> Maridzominggac kibi mong fedeu yofi ambesonga, minginango homeudeu, imoc dekperagibesonga. <sup>17</sup> Mingina gbori kecmanungoc maridzoming kibi imoc ohogec eng feude. Minginango homeude, imohai maridzominggac kibi seriude.

<sup>18</sup> Imocac amma dzadzahac esea imoc sacngo meserigec. <sup>19</sup> Nga Mosengo dedeseriyoac sasawa ngicngac edederege ayemmedaru wisickeu burumaka nga noning ngiwa sacngina mema dokugoc yerecgema ramad-zoea saccac nga babacmeac mema sacfu nemuruckema imocngo kibi

† 9:6: Naso imohai Anutuac womong Herodengo meec imoc nanec. Kporuc bedzo nga Anutuac womong imocac hania "Yoac goaac dedekperagi" hafac 1126 imohai henggec.

kpouy kyouya amma ngicngac sasawa witinginau kpegiu nadzicyemmeec.

<sup>20</sup> Nadzicyemmema yofi edeyunuec,

“Sac yomoc, imoc dzadzahacac sac. Anu ngeni dzadzahac manau kecgedeac Anutungo edengunuec.” *(Makekeng 24:8)*

<sup>21</sup> Anu Mosengo kporuc bedzo witiau nga manau amma sesegerec faifaiac wiac hania hania tarec, imoc ifingoc sacngo kpegiu sasawa nadzicmidarec.

<sup>22</sup> Ifi anu dedeseri fakau sacngo wiac meu kpetiac anude nga sac mong mi kpakeudeu kopocsic wawa mong mi fingerude.

<sup>23</sup> Bangecfu kporuc bedzoac wiac fede, imocngo womong kurumennu fede, imocac ongea ande. Nga imocngo Anutuac kicfu kpetiac anudeac sacngo dzuacgec. Nga wiac fora kurumennu fede, imoc kpetiac anudeac sac gombunga nga engena yombongngo fede. <sup>24</sup> Kristongo ama kpetiac maringo memea amma wiac fora fede imocac ongea ande, ama imohai mi enec, kpac. Yeng nenangcac amma Anutuac kicfu nanudeac kurumeng forau enec. <sup>25</sup> Amma womong garengtoa ye kifasoc yangsawa mema mana kpetiac nga kpetiac yombong, imohai engande. Nga ye angande, Kristongo ifi isoc mi angande. Ye naso homac sese meemeudeac mi engkecde.

<sup>26</sup> Kristongo ifi kecbac dede ye bangec nga kurumeng hanac hanaheau-nacngoc naso homac kpendzeng kpeerekecbacfu imoc naric mi wabac. Nga ye ifi mi anec, kpac. Ye naso wisickebeso ammanu bangectoa bangecfu naso mocgusac fingecma ngicngac kopocsicnina meickeudeac Anutuaru yengena sebia desima faiu sese uaya medarec. <sup>27</sup> Anu ngicngac sasawa naso mocgusac homenideac dedea nga ngadeau kecma yoacfu nambesonga. <sup>28</sup> Ifi isocngoc Kristongo naso mocgusac ngicngac sasawa nenangcac kopocsic tofohodarudeac amma sesenina anec. Amma ngade haude, imohai kopocsic tofhoudeac mi haude. Naso imohai Kristongo ngicngac yeac tomai kecdae, yenearu fingecma mengereyunuu komoc kpegecde.

## 10

<sup>1</sup> Wiac gombunga ngade haude, Moseac dedeseriyoac imoc wiac imocac ongea, imocngo wiac fora mi ande. Ifi anu ngic yeni kifaya kifaya Anutu afehegecdeac yeac hoannu hama sesengina siriha mocgusac faiandae nga imocngo ine dedeseriyoacac kucfu hafoangoc naric mi mengereyunuude.

<sup>2</sup> Dedeseringo hafoangoc mengereyunubacfu yeneac sese faifai imoc bic kpac ambac. Amma kopocsicngina bic kpac anu yeni herenegen negengngina kpetiac kecma kopocsicnginaac gamegoc monggoc mi kecbau. <sup>3-4</sup> Imoc yofi, burumaka ngiwa nga noning ngiwaac sawango kopocsic meickeudeac-soc mi ande, kpac yombong. Imocac amma sesegerec faifaiac faka imocngo kifasoc kopocsicngina heigboriyemmekecdenoc. <sup>5</sup> Anu Kristongo bangectoa bangecfu mama imocac negensima Anutu yofi edeac,

“Ge ubangerec nga kopocsicac sesegerec hania hania, imocac mi anggengkefec. Nga geng ine bangecsebi mong mengerema nennec. <sup>6</sup> Anu Ngicngac yeneng ramaburumaka hafoangoc kopocsicnginaac amma gerecfu faigec dzeande, imocngo songo mi mefcgegenude, kpac. <sup>7</sup> Ifi anu deai, ‘Anutu, negenna, geac songo modacbadeac hayai nga kibi kpoukpouac manau neac yoac oho ohoya fede.’” *(Mitiyegec 40:6-8 Septuagintaunac)*

<sup>8</sup> Sesegerec sasawa imoc dedeseriyoac modacma faiandae nga Kebungo ine yoac yofi deec, “Ubangerec nga kopocsicac sesegerec hania hania nga

ramaburumaka hafoangoc kopocsicngina amma gerecfu dzeande, imocac mi anggenude nga imocngo songo mi meficgegenude.”<sup>9</sup> Ifi dema yofi deec, “Negenna, geac songo modacbadeac hayai.” Ifi dema yeng sing gboria meseriudeac sing esea imoc meickeec.<sup>10</sup> Yesu Kristongo nenanggac negemma songo imoc modacna sebia mekemma naso mocgusac sese faiu sing imohai kpetiac aning kecdimbe.<sup>11</sup> Womong gareng yeni wenacsoc namma womong gareng uangina mekecdae amma yeni sesegerec siraha mockicngoc nasoya nasoya mekecdae, imocngo ine ngicngac kopocsicngina meickeudeacsoc mi ande.<sup>12</sup> Nga Kristongo kopocsic meickeudeac sese mocgusac kuha wisic wisickea kpac, imoc faima Anutuac foiau tataha moga tacde.<sup>13</sup> Nga Anutungo ngabafora yeac hania bageu hanititi siricfu faiyunuude, ye imocac tomai tacde.<sup>14</sup> Yeng sese mocgusac faima ngicngac hafoangoc mengereyunuu yeni wisic wisickea kpac kpetiac kechereema kecbesandae.

<sup>15</sup> Anu Tiri Asungo ifingoc hepuc amma yofi edenunuec,

<sup>16</sup> “Kebungo yofi dede, ‘Ni ngadeguc dzadzahac gboria yenigoc mebade, imocac siraha yofi, dedeseriyoacna ngicngac yeneac negen negennu faima kibia imoc herenginau ohobade.<sup>17</sup> Amma kopocsicngina nga singyoac kpekpengina imoc sasawa wama monggoc mi negensibade.’” *(Yeremaia 31:33-34)*

<sup>18</sup> Nga Kebungo kopocsicnina wau kpac anecac kopocsic meic meickeac seseac ua monggoc mi mebesonga.

<sup>19-20</sup> Negen negensinggoc tosofocnina, Yesu yengena sawaac kucfu nenang kengeha kpac kecma kporucnagu ferahema mana kpetiac nga kpetiacfu naric ennide. Yeng sing gboria nga kekehagoc witinemmeec nga kporucfusing kennideac yengena sebingo sing imocnoc menemmeec.<sup>21</sup> Womong gareng engenatoaninango Anutuac arengfora garennuma kecde.<sup>22</sup> Nga nenang hanahema herenegen negennina gameagoc nga mi ngereeande, yeng imoc dzuaru kongaha fede nga sebinina doku kongahango dzuaru kongac kpeing. Imocac amma nenang ubaherenina fora imocgoc kekecnina isinggeyombonggema ye hafoangoc negensinggema Anutuac hoannu kembisina.<sup>23</sup> Kebu maridzoming nemmeudeac yoac deseriec, yeng dedea modarude. Nga imoc nenanggaru fingerudeac negensegec amma kecma deficgekecbisina.<sup>24</sup> Amma songo nga angammeme gombunga botucninau feudeac nenang henggareng angemema meserimekecbisina.<sup>25</sup> Ngicngac goa yeni kpeketurannina waandae, imoc mi ngereede. Nasotoa wegenede, ngeni imoc bic negendaec meserimekecbisia.

<sup>26</sup> Nenang yoac foraac negen negeng mema negentegecmaguc kopocsic faka arenggema mekecnideu ine kopocsicninaac amma monggoc sese mong mi feude.<sup>27</sup> Ebictoaninagoc kecni ising ising nasou gerectoa mongngo nonohoma memanganenunuudeac tomainina feude.

<sup>28</sup> Ngic monggo Moseac dedeseriyoac kpeu ngic yohockang me harebec yeneng imoc hemma yoara wama yoacfu faigecdeu, ye ubamanganga kpac kpebucgegecdeac areng anude.<sup>29</sup> Anu dzadzahacac sacngo ngic mong bic dzuarec, yeng ngade sac imoc ongea kpac dema Anutuac Medac witiiau goteng tima Danggunucac Asu demanganeudeu, yearu turunga noc efea fingecmiude, imoc bic negendae.<sup>30</sup> Nga

“Kopocsicac turung kpoukpou imoc neac uanoc nga ni ngicngac kopocsicng-inaac turung kpouyemmebade.” *(Dedeseri 32:35)*

Kebungo yoac imoc deec, ye negendimbe. Ye monggoc yofi deec, “KEBUNGO ngicngacfora isingyunuma yoacngina deude.” *(Dedeseri 32:36; Mitiyegec 135:14)*

<sup>31</sup> Anutu kekehagocac mariu embesonga, imoc ebihagoc nga kpendzengagoc yombong.

<sup>32</sup> Ngeni hanahema Kebuac kperagia megec, naso imohai siduc gombungac amma uatoa mema kpendzeng kpegec, imoc mi nigecngunubeso.

<sup>33</sup> Amma ngic yeneng naso goau ngicngac yeneac kicfu faingunuma gamekpekpe nga defagoc amma ngunukporac angemmegec. Nga naso goau ngaba yeneng ngeneac tosofocngina ifi ayemmegec ngeni ogo angemmema yenigoc nanggec. <sup>34</sup> Ngeni witicngic yenigoc ngenahafoc kpendzeng kpegec nga ngic yeneng goa ngeneanunac witicamau faiyunugec nga ngaba yeneng goa ngeneanunac hamangec faka angemmema hiedzongina megec. Ifi anggec ngeni ine sogaima yofi negenggec, hiedzonina feengkefude imocngo bangectoa bangecac hiedzo ferahedacde. <sup>35</sup> Imocac ngeni kengeha kpac kechisia. Kecma faka imocac buma kuneng meficgegecde. <sup>36</sup> Ngeni modzotitia kpac kegec, imoc ngereede. Imocngo meficngunuu ngeni Anutuac enac tofoc tofoho amma maridzomingngina deec, imoc megecde.

<sup>37</sup> Anu naso wegenanec fede, imoc wisickeu, “Ngic haudeac dedea, ye naso mong mi ukuma haude. <sup>38</sup> Ngicngacfocna dindingac kecdac, ngeni negen negensinggoc kecheregecde. Nga ngeneanunac monggo wanuma kenudeu neng ine yeac negemba ubaherenango mi ngereede.” *(Habakuc 2:3-4)*

<sup>39</sup> Nenang ine ye ngadehema hofeac sing modacma kemenide, imocac areng kpac. Negen negensinggoc kecma firang amma ubaonganinagoc kekecsери ennide.

## 11

<sup>1</sup> Wiac mong fingecnemmeudeac seriangoc negensima kecdimbe, imoc kicngo mi hemma sifu negenni fora ande, fakanina imocac kpapa negen negensing. <sup>2</sup> Ngicngac bicngoc kegec yeni negen negensingnginagoc kegecac amma Anutungo hepuc ayemmema yoac nga fakangina deseriec. <sup>3</sup> Wiac kicngo hengandimbe, imoc wiac hehenaunac mi fingerec. Anutungo yoac deu kurumenga kurumenga nga bangectoa bangec fekende, yeng imoc meficgedaru fingerec, imoc negen negensinggoc kecma negentegecnide.

<sup>4</sup> Abengo negen negensingagoc kecma Anutuac sesegerec faiec, imocngo Kaingac sese feraheec. Ferahau Anutungo yeac sesegerec hemma negenu ngereeu ngic dindingac demiec. Abe ye bic homeec, amma sifu negen negensingau yoara dekecdengoc. <sup>5</sup> Enoko ye negen negensinggac amma homec mong mi fingecmiu henec. Nga Anutungo ye engsac meickeu enec. Ye mi emmanu Anutungo yeac yofi demiec, “Ni geac negemba ngereede.” Ifi dema Anutungo ye meickeu ngicngac yeneng hofocma monggoc mi meficgegec.

<sup>6</sup> Anu ngic mongngo Anutuac hoannu kembeso negende, ye yofi negensinggema kecbeso, Anutu ye kecdenoc nga ngicngac ye kpachofoc angandae, yeni turunga gombunga yemmeude. Nga mong ye negen negensinga kpac kecande, Anutungo yeac negenu naric mi anude, imoc kpac

yombong. <sup>7</sup> Ngicngac yeni dokutoa haudeac ebic mi hemmagec Anutungo Noa goroyoac edeu yeng yoara negensinggema eweheimima wagetoa mong meec. Ifi mema yengena arengfora ebicfunac onggongyunuec. Yeac negen negensingngo bangectoa bangecac faka mangana mekperagi Anutuac yoacfu kenggec. Yeng ine negen negensingaac amma ngic dindingaac maridzoming meec.

<sup>8</sup> Anutungo Abrahang kparu yeng yoara negensinggema imoc modacma bangeha wama bangec dahai kenudeac obohoec. Nga bangec Anutungo miudeac deec, imocngo maridzominga anec. <sup>9</sup> Anutungo bangec miudeac dedzege ammiac, ye ihai kemma kuric isoc kefec. Kecma Anutuac yoac negensinggema kporuchedzoya faiu nanu Isaka nga Yakobo ihai yerigoc kefec. Yereng Abrahanggoc bangecac dzadzahac imoc mekefec imocngo maridzomingina anec.\* <sup>10</sup> Anutu yengenaoc taong wotungseriagoc warac arenggema meficgeec nga Abrahang ye kuric kecmanu imocac tomai kefec. <sup>11</sup> Anu Sara ye sabacmeme nasoya kpac anec. Nga ye Anutuac yoac negensinggema kefecac heregoc amma medac kpenanggema meec. Anutungo dzadzahac yoac dema imoc modarudenoc, ye ifi negensiec. <sup>12</sup> Imocac amma ngic sabac meficmefficgeacsoc kpac, yearunac bangecfora homac sahema fingegec sawaac asomeng nga kondung tegiau sangi isoc angec nga ngicngo kpetengina oso osoacsoc mi ande.

<sup>13</sup> Yenennoc Anutuac yoac negensinggema homegec. Nga Anutungo bangec yomohai bangecngina deec, imoc mong mi meficgeyemmeec. Yeni ine wiac hereaungoc feu kpedzima hemma yofi deficegec, “Neni bangecfu kuric amma naso wegenaneacsac yei kecdimbe.” (*Fingec fingec 23:4; 1 Ngictau siduc 29:15*)

<sup>14</sup> Anu ngicngac yoac siriha ifia deandae, yeni yenang bangec yombong meficgegedec hofoc hofoc ua mema kecma deficgedae. <sup>15</sup> Amma yeni bangecngina warac kecma wagec, imoc negensibau dede yeni naric monggoc dzigenebau. <sup>16</sup> Nga bangec mongngo esea ferahede kpara kurumeng, yeni bangec imocac ayemmeec. Imocac amma “Anutu ye Anutunina.” yeni ifi degec, ye game mi kpekecde, nocac yeng yeneac negemma taong mong bic mengereec.

<sup>17-18</sup> Anutungo Abrahang faitobannu faiu, yeng yoara negensinggema medaha faiu sesegereha ambeso anec. Nga Anutungo medac yeac warac yofi deec, “Isakaarusing bangecfocga fingecsahe angecde.” (*Fingec fingec 21:12*) Medaha mocgu imocnoc ye dzadzahacac areng kefec ye sifu mema sesegereha anudeac deec. <sup>19</sup> Nga ye yofi negensima kefec, “Anutungo ye homecfunac ifingoc naric megboriude.” Imocac yoac yofi heima dedimbe, “Anutungo Isaka homecfunac meec.”

<sup>20</sup> Isakango dzadzahacac yoac negensinggema wiac ngade fingerude, imoc negensima Yakobo nga Esau kenecyuruec. <sup>21</sup> Nga Yakobo ye Anutu negensinggema kefecac homebesonga amma yeac kpacfu Yosefeac medachora tembus tembus kenecyuruec. Kenecyuruma yasuya susiau merandzima ngonducnema Anutu numumima dengereec. <sup>22</sup> Yosefe ye Anutuac kuc negensima dzadzahac yoara negensinggema Israe areng Aigita bangecfunac dzigenegecdeac kpefing deec. Amma yengena sic mekenggedecac negensima derecgeyemmeec.

\* 11:9: Imocac hania Fingec fingec 15:1-21 fede.

<sup>23</sup> Mose fingerec, naso imohai medac fingegec yunuhomebesonga, ngictauc dede ifi feec. Anu yeac nonggomama yeri siriha gombunga hemma kengec mi amma ngictauc dedeseri kpema Anutu negensinggema afo harebec medacngira mesufuec feec. <sup>24</sup> Nga Mosengo negen negensinggoc kecma yadiu Faraaac naroanggac medac, yeac ifi degecdeac waec. <sup>25</sup> Ye kopocsiac ubangerec hania hania negemma naso weganeac kefudeac mi ammiec. Ye ine Anutuac ngicngac yenigoc ebic tofohoma kefudeac negenu ngereec. <sup>26</sup> Amma ye Aigita bangecac dzofinac imocac negenu mamea anec. Kristoac amma game meudeac negenu engena anec, imocngo Aigitaac dzofinac ferahede. Ye imoc negensima Anutuarunac bung meudeac kic fiec. <sup>27</sup> Ye Anutuac yoac negensinggema Aigita bangecac ngictauc kengec mong mi kpeu Aigita bangec waec. Ye Anutu mi hengen, ye kicngo mi henec nga henec isoc kpendzeng kpekecma ubea mi maec. <sup>28</sup> Ngic kpekpe angerongo morocmedacfocngina yunuhomebacac yeng Anutu negensinggema makekenggac ramamedaha kpehou amma sawango nagunginasoc hosoeac. <sup>29</sup> Nga Israe ngicngac yeni negen negensinggoc kecma kondung sacsac imohacsing ferecema bangec kerengaiu kengec. Kemmagec Aigita areng yeneng ifingoc ferecengi dema doku nema homedacgec.

<sup>30</sup> Israe yeneng Anutuac yoac negensinggema Yerikoac odatoa hocngo memea, imoc yerecgegec uameme 7 ammanu barackema madarec. <sup>31</sup> Ngic yohockang yeri Yeriko sufu sufu hengkperece ambesonga kenec singtoangac Rahabango Anutu negensinggecac ruaegoc heitaiyuruec. Imocac amma ye negen negensingngina kpac yenigoc manganema mi kpac anec.

<sup>32</sup> Nga ni Gideong nga Baraki amma Simsong nga Yefita amma Dawidi nga Samue amma profete sasawa, yeneac siduc ifingoc naric debai nga nasona mong mi fede. <sup>33</sup> Yeni negen negensinggoc kececac dzikacfu ngictau homac yeneac wasaingic memayunuma ngictaufocngina anggec amma raiong enacngina medzickegec. Nga singyoac feec imoc garenggema Anutungo wiac deseriec imoc megec. <sup>34</sup> Yeni gerecyada kucngina menomanegec. Nga ngabafocngina yeneng wasaibeangngo yunuhomebeso anggec woragec. Yeni kucmama kececac Anutungo kuc yemmeec. Yeni dzikac kucgoc kpema kuric wasaingic homac kporacyunugec. <sup>35</sup> Ngac goa yeni negensinggema kececac Anutungo arengfocngina homecfunac megboriyunuma yenearu monggoc faiyunuec.

Ngictau goa yeni profete dzikacngo yunuma medzoicyunuma Anutuac yoac wagecdeac degec. Nga profete yeni ine homecfunac yacyac, imocac kecec gombung negensima ngictau yeneac yoac wama witicamaunac mi woragec. <sup>36</sup> Nga goa yeni ngickicfu deendema amma defagoc ayemmema dzikacngo yunugec. Amma goa monggoc sengngo witicyunuma witicamau faiyunugec. <sup>37</sup> Anu goa hocngo yeneregec nga goa segengo sebingina merecgegec nga goa wasai beangngo kpebucyunugec. Nga goa yeni wambangina kpac anu rama nga noning sebera heima kengkecma sebiac wiacac obohokecegec. Ifi anggec ngicngac yeneng yunugec ebic witiau kececac. <sup>38</sup> Kecma yeni bangec kisiu nga bangec sifehau amma kedzebeu me bangec singau yerecema kececac. Yeneng gombungngina mehama ngicngac amabangecngina botucfu kececacdeac sing mong mi feec. Ngicngac kopocsiangnging sing imoc hedzickeec.

<sup>39</sup> Nga ngicngac imoc yeni negen negensinggoc kececac Anutungo yenenu ngereec. Amma yeni wiac megecdeac dzadzahac yoac dedea, imoc bangecfu kecma mong mi megec. <sup>40</sup> Anutungo nenannu wiac engena



faiudeac negenec. Nga yeni nenanggoc hafoangoc mengereyunuudeac imoc negensiec.

## 12

<sup>1</sup> Ngicngac siducngina arenggema ohoduae, yeni hoeng isoc yerecnuma boifocnina amma kecdae. Imocac amma wiac sasawa meebirinunuande, imoc meickedachisina. Nga kopocsicngo mendannunuyombonggema witicnunukecde, imoc heregedacma sing edzac edzacnunuya fede, imoc seserigoc modacma nedzima kembisina. <sup>2</sup> Kemma kicnina Yesuaru fikecbisina. Yeng negen negensinnina hafoangoc mengerema kefude nga yennoc ua imocac hania. Ye sogac sogai ngade haude, imoc negensima mariponggac kpendzenu emma game kpekke bageau kekec, imoc tofohoma wiac efea negenec. Ifi amma Anutuac tatacac foiau emma yaguc tacdenoc. <sup>3</sup> Nga ngeni kucmama amma ubangina mabacac yeac negensima kecbisia. Yeng waraima kpendzeng kpemanu kopocsicmeme yeneng yeac deendema ammigec.

<sup>4</sup> Anu ngeni ine kopocsic tidzamegecdeac eweyombonggegec amma sac hetic hetinggeaac nadunnu mi emma kecdae. <sup>5</sup> Nga Kebungo medacfora meseringunuudeac yofi edengunude, ngeni imoc naric mi nigecongubeso. “Medacna, Kebungo gumeting anggenu ge imoc mi ngadehebesena nga yeng yoac seria deu ubaga mi mabeso. <sup>6</sup> KEBUNGO medac mong songogoc hoangekecde, ye metinggeude nga medaha songo negemmi, ye kpemeting ammiude.” *(Yoac negen negengagoc 3:11-12)*

<sup>7</sup> Ngeni Anutuac medacfora. Nga manggac sasawango medacfocongina metingyunuandae, ifi isocngoc Anutungo kpendzenu faingunuma mengersunuuude. <sup>8</sup> Nga yeng medacfora sasawa fakanginaac memengere ua mema ngeni ifi mi angemmeudeu yeac nambaracfora yombong mi anggecde amma ngeni hamangecfunac fingegec isoc anude. <sup>9</sup> Amma bangecfu mangfocnino metinnunugec nenang fakangina ifia negensima ewengina heing. Nga asu yeneac Manggacngo metinnuu yeac yoara monggoc yombong tofohoma kekec mebisina. <sup>10</sup> Mangfocnina yeni negen negengina feec, imocac sirihau naso wegenanec sac metinnunugec nga Anutungo metinnunuande, imocngo ine memefihagoc yombong ande. Nenang yeac kpetiac kekecfu torokpema kecnideac ifi angkecde. <sup>11</sup> Anu memetinnina imoc yofinenggac ubahodung meficgenemmeande, imoc ubangerehagoc mi anude, kpac. Nga ngicngac yeni memetinnu kecma yadiserikecdae, yenearu faka imocngo ngade faka dindigacac ruae kekecac fora meficgeude.

<sup>12</sup> Imocac amma ngeni maringina kucmama me fafocngina mangana meseriemebisia. <sup>13</sup> Amma ngicngac hanimangang haningina mepatickebauac ngeni singngina heitumebisia. *(Yoac negen negengagoc 4:26)*

Ngeni ifi anggec haningina ngereebesoo.

<sup>14</sup> Ngeni kpetiac kekec mi kecegecdeu Kebu naric mi henggecde, imocac ngeni ngicngac sasawa yenigoc ruae nga kpetiac kecegecdeac uatoa mebisia. <sup>15</sup> Ngeneacunac mongngo Anutuac woseofacfunac manganubacac henghomema kecbisia. Nga botucnginaunac wiac herebu nga ubaebic imocngo sera mi kpebeso. Imocngo sera kpema ebic meficgengemmeu wosohodung isoc homac memanganengunuuude. <sup>16</sup> Amma ngeneac botucfunac mongngo kaisero faka ambacac me Esau isoc Kebuac ihoc bahoc ambacac ngeni henghomema kecbisia. Esau ye naso mocguac yakango

waracmedacac kenec muneagoc emekpesi anoc. <sup>17</sup> Amma yeng ngade mamarunac kenec imoc mebeso anu mamango waec. Ye imoc meudeac kiaru mengec mengereac sing mong ine mi fingecmiec.

<sup>18</sup> Israe ngicngac yeni tikingina mewegenema henggec gerechorang dzeu kundung kpema medzickeyombonggeec. Nga firang kpeu <sup>19</sup> trampet mong kunengng arohau enacudumeng mongngo yoac deu mi negenggecdeac desambic anggec. <sup>20</sup> Yoac yofi dedea, imocngo ebictoa meficgeyemmeec, “Ngc me yang mongngo tiki imoc kpesereudeu ngeni imoc hocngo hebucgebisia.” *(Makekeng)*

*19:12-13)*

<sup>21</sup> Anu wiac henggec imocac homac yombong kengecyunuu Mosengo yofi deec,

“Ni kengecnuu dzononna fedede.” *(Dedeseri 9:19)*

<sup>22</sup> Ngeni ine tiki ifiau mong mi hagec, kpac. Ngeni Siong tiki, imoc Anutu kekehagoc yeac taong amma kurumenggac Yerusareng, imohai sogac sogaiac tutumannu hagec. <sup>23</sup> Ihai areng yofi bic kpeturanggec kecdae. Ngicngac sasawaac Anutu, yeng desi desingcngina. Nga Angero habu teng tauseng dafiguc amma ngicngac Anutungo hafoangoc mengereyunuma yeneac dindingac deyemmeec, yeneac ongaasungina. Nga kurumenggac osokporennu kpacngina oho ohoya waracmedac isoc kecdae, yeni kurumenggac kpebung habu andae. Yeni sasawango kpeturanggema ihai kecdae. <sup>24</sup> Nga ngeni Yesuaru hagec yeng dzadzahac gboriaac ngic botucnina andenoc. Amma ye sawa kpegiec, imocngo Abeac sacngo yoac deec, imoc ferahema kuhagoc yombong deude.

<sup>25</sup> Imocac ngeni ngic yoac edengunukecde, ye ngadehebauac garengngina mema kecbisia. Imoc yofiac, Mosengo bangecfu kecma ngicngac goroyoac seria edeyunuu yeni yeac yoac negenggecdeac wama kecma kopocsicac turunga, imohacnac naric mi woragec. Nga yeng kurumenga kurumenga imohacnac mama goroyoac edenunumanu yoara ngadehenideu kopocsicac turung imohacnac ifingoc naric mi woranide. <sup>26</sup> Moseac nasou Anutuac ubaudumengngo bangec kpemindzaheec nga yofinenggac ine yofi deserima edenunukecde,

“Naso monnu monggoc bangec kpemindzahebade, imohai ine bangecsac kpac, kurumenga kurumenga ifingoc kpemindzahebade.” *(Hagai 2:6)*

<sup>27</sup> Nga “Naso monnu monggoc.” yoac imocngo yofi dekperaginemme, wiac hanac hanaheau deu fingeCdarec ye imoc kpemindzaheu kpac anude. Nga wiac sasawa mi fingecmanu nanec, ye imoc ifingoc kpemindzaheu seria namma fefeseri feude.

<sup>28</sup> Nga eucereng mong ifi nemmeu mekecdimbe, imoc kpemic kpemindzahenasou naric mong mi manganeude. Imocac amma nenang Anutu ubangerec negemmima yeng negenu ngereude, sing imohai yeac bageau memaemema eweheimibisina.

<sup>29</sup> Foracngoc, Anutunina ye gerechorang amma wiac sasawa dzeu kpac andarude. *(Dedeseri 4:24)*

## 13

<sup>1</sup> Negen negensinggoc tosofocna, ngeni ngenaocngoc heresongogoc hoangemema kecbisia. <sup>2</sup> Ngicngac hagec ngeni yeneac ama heiyemmegecdeac mi nigeCngunubeso. Ngicngac goango ifi anggec, yeni mi negemma angero goa ama heiyemmegec. <sup>3</sup> Nga ngicngac witicamau tacgec ngeni ngenahafoc tacdae, ngeni ifi isoc yeneac negensima meficyunubisia.

Nga ngic goa witicamau yunuandae, imoc ngeneac sebi momoc kpedae, ifi isoc negemma meficyunubisia.

<sup>4</sup> Nga eweeneng memeturanggac fakaya imoc ewehiheiagoc ambeso. Nga eweeneng yerahafoc fefengira eweheimiec imocngo wononga kpac febeso. Noac, Anutungo kaisero ngicngac haniangina isinggema turunga yemmeudenoc. <sup>5</sup> Anu ngeni hiedzoac tusuc faka mi ambisia, ngeni ine wiac bic fengemme, imoc soha ande, ngeni ifi negemma kecbisia. Anutu yengenaocngoc yofi bic deec, “Ni ngeni wangunuma me wiacngina segerema naric mi ngadengunubade, imoc kpac.” *(Dedeseri 31:6)*

<sup>6</sup> Imocac serima kengeha kpac kecma yofi naric denide, “KEBU ye nenanggac memeficnina nga ngic mongngo wiac mong anemmeu imocac naric mi kengecnunuude.” *(Mitiyegec 118:6-7)*

<sup>7</sup> Ngeni enarafocngina Anutuac yoac edekpou angemmekegoc amma dafi kecma fora meficgegec, imoc negensima kecbisia. Ngeni negen negens-ingngina henghomema namma yeneac siric modacbisia. <sup>8</sup> Yesu Kristo ye worang nga yaguc amma nasosoc siric mocgungoc kecengkefude.

<sup>9</sup> Anutuac danggunucngo ubaherengina meseriu seria nanggecde, imocngo wiac gombunga. Nga nenedokuac singyoac hania hania imocngo ine ubaherengina naric mi meseriude. Imocac ngeni kpoukpou gboria hania hania wagec wiac ifiango mi wangecnunubeso, kpac. <sup>10</sup> Anu arataninagoc kecma womong gareng yeni kporuc bedzou ua mekecdae, yeni arata imohacnac yaka mong naric mi mema negecde. <sup>11</sup> Womong garengtoango yang yeneac sac mema womong mana kpetiac amma kpetiac yombong, imohai meemna kopocsic meic meickeac sese faiande. Amma yang fora ine tacyac anggec imocac ngadeau faigec dzema kpac angande. <sup>12</sup> Imocac Yesungo ifingoc yengena sawango ngicngac kpetiac meyunuudeac taong naguac ngadeau kpendzeng kpeec. <sup>13</sup> Imocac tacyac angandimbe, imocac ngadeau yearu kemna yegoc gamekpekke witiau momoc embisina. <sup>14</sup> Yei bangecfu nenang taong seria mong mi fede. Nga nenang ine taonnina ngade haudeac kicfifi kecdimbe.

<sup>15</sup> Imocac nenang Yesuac kpacfu Anutu nasosoc dedengerec ammini, imocngo sese fora ambeso. Enacbibicninango kpara dekperagikecma fora meficgebisina. <sup>16</sup> Nga ngicngac goa heimefic ayemmebesonga amma wiacnina fede, imoc hendzicma yemmebisia, faka imoc mi nigecnunubeso. Anutungo sese ifiaacnuc negenu ngereede.

<sup>17</sup> Ngeni enarafocngina yeneac ewengina heima yoacngina tofohobisia. Imoc yofiac, yeni ubagbori kecma ubaonganina garenggema kecma uanginaac yoacsiduc degedceac nasoya faifaia fede. Nga yeneac ua imoc uban-gerecog ambeso. Ngeni ubaebicfu ua imoc mebau debac ni ngeneac negemba memefihagoc naric mi ambac.

<sup>18</sup> Ngeni neneac numubisia. Neni herenegen negennina kpetiac, ifi negenserima kecdimbe. Nga angammemenina sasawa gombunga feudeac anemme. <sup>19</sup> Ngeni nunumu monggoc yombong meficnumagec neng naso mi ukuma ngenearu bic dzigene habadeac negensiduae.

<sup>20</sup> Ruaeac Anutungo dzadzahac fefeseriac sacngo, ramagarengtoa Kebunina Yesu homecfunac megborima miarec, <sup>21</sup> yennoc ua gombunga sasawa megecdeac kuc ngemmema mewakengunuu yengena songo nga negen negeng modacgecde. Yeng ifi anemmema negenu ngereeu, faka imoc nenearu

fingebes0. Nga yearu dedengerec nga dedengerec fekengkechesande, imoc fora.

<sup>22</sup> Negen negensinggoc tosofocna, ni kibi yomoc ohongemmeduae, imocngo herea mi ande, imocac ngeni dederecge yocac yomoc modzotitia kpac kecma negenggecdeac igocngunuma deduae. <sup>23</sup> Amma mong edengunuba negenggec, yeni tosonina Timoteo witicamaunac yungecgec. Imocac yeng naso mi ukuma nearu bic hasikeudeu yegoc ngenendedeac ngenearu bic hadede.

<sup>24</sup> Neneac wenacngerecngo enarafocngina amma kpetiac areng sasawa yenearu kembeso. Amma tosofocnina Itarianac yeneac wenacngerecngo ngenearu ifingoc hade.

<sup>25</sup> Anutuac danggunucngo ngicngac sasawa ngenearu febeso.

## Yakoboac Kibi

<sup>1</sup> Ni Yakobo Anutu nga Kebu Yesu Kristo yereac wanacngic kecma kibi yomoc ohoma Israe kisic 12 bangeha bangeha singsararang kpema kecdae, wenacngerecna ngenearu faiba hade.

<sup>2</sup> Negen negensinggoc tosofocna, faitobang nga ebic hania hania fingecngemmeu imoc sasawa wiac sogac sogaigoc, ngeni ifi negembisia. <sup>3</sup> Negen negensinggocna faitobannu faigec imocngo meseringunuu ngicngac seria anggecde. <sup>4</sup> Amma ngeni modzotitia kpac kecma serima uangina hafoangoc mesigecde. Mesima yadiseriyombongema wiac monggac naric mi obohogecde.

<sup>5</sup> Anutungo pakeng dedea kpac songogoc kecma ngicngac wiac homac yemmekecde. Imocac ngeniac botucfunac ngic me ngac mongngo negen negentegecac kpedadangeudeu ye Anutuaru numuma kpesimiu miude. <sup>6</sup> Nga ye kpesima numumiude, imohai ine negengyohoha kpac negensinggema numubeso, nocac ngic mong ye negengyohoc anude, ye kondunggac siri isoc, firangngo imoc wangecma kengha anu sicsauc kpekefude. <sup>7</sup> Ngicngac ifia yeni, “Kebuarunac wiac mong naric menide,” imoc mi negensibisia. <sup>8</sup> Ngicngac ifia yeni ubayohoc amma negen negeng mocgucfu naric mi serima yananggac sing sasawa negengyohocgocsac anggecde.

<sup>9</sup> Negen negensinggoc tosonina mong ye mamea kecande, ye yengenaac negenu engena ambeso. <sup>10</sup> Nga ngic mong dzofinahagoc, ye yengenaac negenu mamea ande, imoc negensibeso. Dzaring dzuriango kpindzing manau tohoma moronggema kpac angkecde, ifi isoc ye ifingoc kpac anude. <sup>11</sup> Nga asoac wenac gereango erema kpindzing kpeu imocngo gbanggema dzuria siraha gombunga moronggeu kpac anude. Nga ngic dzofinactoyagocngo wiac meficgeudeac uatoa meande, ye siraha ifi isoc bic moronggema kpac anude.

<sup>12</sup> Ngic mong faitobannu serima namma ebic tofohoude, ye kenehagoc. Nga ngicngac Anutu songo negemmiandae, yeni kekecac ira yemmeudeac deseriec. Ngic mong ye faitobannu heiserima kefude, ye imocnoc meude.

<sup>13</sup> Kopocsicac faitobang ngic fingecmiu ye yofi mi debeso, “Anutungo faitobannu faiunadac.”

Imoc yofiac, wiac manganango Anutu naric mi memaude nga yeng ngic mong kopocsicac faitobannu ifingoc mi faiude, kpac. <sup>14</sup> Ngic tembuc tembuc yengenaac songongo ngic faitobannu faiyunuande amma yengena songongo ye wangecma ikoc negen negeng negemma faka hania hania meudeac songo meficgeude. <sup>15</sup> Anu negensongo manganango kpenanggema medac mong meude, ye kpara kopocsic. Nga kopocsicngo hafoa yadiseri amma homec kpenanggema meude.

<sup>16</sup> Songo tosofocna, ngeni ngenacngoc ikocfu mi wangecemebisia. <sup>17</sup> Anutu ye kurumeng kperagiac manggac amma yearu kundung mong mi kpeude, kpac. Yearu kperagia feec nga fede nga fekengkefude. Nga yeng wihacnac wiac gombunga nga soronga suenemmeu maude. Ye ubangereha ifi nemmekecde. <sup>18</sup> Anutu ye songoya nga negen negenaac amma yoac forau yeac nambaracfora fingering kecdimbe. Yeng deu wiac sasawa bangecfcu fingecdarec, imocac buma heihei annideac ifi anec.\*

\* 1:18: Kontucac buma heiandimbe, ifi isoc annideac denemmeec.

<sup>19</sup> Songo tosofocna, ngeni yofi negenggec, yoac mong degec hau ngeni bic kedzac faibisia. Faima imocac turunga bic mi merembisia me herebu bic mi ambisia. <sup>20</sup> Ngicac herebungo Anutuac kicfu faka dindingac mi heficgeude, kpac. <sup>21</sup> Imocac amma ngeni faka seuhagoc nga faka mangana ifia homac fede, imoc sasawa meickedacbisia. Amma ngeni yumea kecmagec yoac herenginau homec homera, imocac kucngo ubaongangina ebicfunac mesiu komoc kpegecde.

<sup>22</sup> Ngeni Anutuac yoac kedzacac nebasac mi negembisia. Ngeni yoara negemma tofohogecde, imocngo ngereeudef. Ifi mi anggecdeu ngeni nge-naocngoc ikoc angemegecde. <sup>23</sup> Ngic mong ye Anutuac yoac engsac negemma imoc mi modarudeu ye ngicngo yengena kicmesuya wikinnu hengande, ifi isoc. <sup>24</sup> Ye ongea engemma kemma imohaingoc yengena siriha dafia, imoc bic nigeckpeude. <sup>25</sup> Anutuac singyoac soronga, imocngo witicfunac yungecnuudef. Nga ngic mongngo imoc hennegeng amma mekecma nigera kpac uaya mekefude, Anutungo yeac ua keneheude.

<sup>26</sup> Ngic mong ye yengenaoc yofi negenude, “Ni Anutu eweheimima kecduae,” ifi dema enacbibihia mi garenggeudeu yeac eweheihei imocngo sing segeu fora kpac anude. Ye yengena ubaherea ikoc ammiudenoc. <sup>27</sup> Nga Anutu Manggacnina yeac kicfu eweheihei faka kpetiac nga kongaha, imocac siriha yofi, bangectoa bangec yomocac songo ngadehema wonong mi heiemema beging nga ngachodzec ebicfu kecdae, yeni yenenggareng ayemmesesona. Imocngo Anutuac eweheihei gombunga.

## 2

<sup>1</sup> Tosofocna, Kebunina Yesu Kristo ye kuc nga kibikperagiagoc kecdede. Nga ye negensinggedae, ngeni ngic engena mamea sebinginaac siriha faka ayemmeandae, imoc naric mi ngereede. <sup>2</sup> Imoc yofi, ngic mongngo ngeneac kpekpeturannu ring golngo memea amma ngakpi kibia gombunga heima hau naso imohaingoc ngic mong makpekpea wambaya esea wonongagoc heima haude. <sup>3</sup> Ifi haec ngeni ngic wamba kibia gombunga faidac, ye hemma yeac degecde, “Ogo, ge yei hama tatak gombungau tacna.” Ifi dema ngic makpekpea yeac ine yofi degecde, “Ge edimoc kemma nanna.” me “Ge haninau parannu matacna.” <sup>4</sup> Ifi anggecdeu ngeni ngenaocngoc siricngina hentegecma sing manganau ngicngac ogofocngina isingyunugecde nga imocngo mi ngereede.

<sup>5</sup> Songo tosofocna, ngeni kedzac kpema negenggec, ngicngac bangectoa bangec yomohai makpekpea kecdae, yeni negen negensinggoc kuneng anggecde amma eucererenggac mingina amma imocac maridzoming megecde, Anutungo ifi negemma meisingyunuec. Ngicngac heregoc Anutuac songo negengandae, imoc yeneac anudeac deymmeec. <sup>6</sup> Amma ngeni ine ngicngac makpekpea game meficgeyemmeandae. Nga ngic finactoanginagoc yenennoc memanganangunuma yoacfu faingunuandae. Nga ngeni yenisac eweheihei ayemmeandae, imoc mi ngereede. Makpekpea yeni faka ifia mong mi angemmeandae. <sup>7</sup> Yesuac kpara gombunga warac witinginau enec nga dzofinactoanginagoc yenennoc kpac imoc demanganandae.

<sup>8</sup> Anu dedeseriyoac mitikibiu yofi oho ohoya fede, “Ge geangga anggengande, siriha imocngoc gegoc wegena kecdae, yeni heresonggoc hoangyunubesena.” *(Sesememe 19:18)*

Ngeni eucererenggac yoac imoc foracngoc modacgecdeu faka gombunga anggecde. <sup>9</sup> Nga ngeni ngic engena mamea sebinginaac siricfu ayem-meandaeu kopocsic meficgegecde. Nga dedeseriyoacngo manganangina dekperagima singyoac kpekpe, ifi dengemmeude. <sup>10</sup> Imoc yofiac, ngic mong ye dedeseriyoac hoanggema nadunga sasawa modacdacma nadunga mocgusac kpeudeu, ye nadung sasawa imocac turunga meude. <sup>11</sup> Anutungo yofi deec,

“Ge kaisero mi ambesena.”

amma monggoc yofi,

“Ge ngicngac mi yunuhomesesena.” (*Makekeng 20:13-14; Dedeseri 5:17-18*)  
 Nga kaisero mi amma ngicngac yunuhomenadeu dedeseriyoac kpekpengic bic annec. <sup>12</sup> Anutuac singyoacngo witicfunac yungecnunuude, yeng singyoac imoc modacma fakanina isinggeude. Imocac ngeni ifingoc singyoac imoc yoacnginau nga fakanginau modacbisia. <sup>13</sup> Ngic mong ye ngicngac ogofora wosoefacgoc mi ayemmekecde, yeac wosoefac faka mong yoacfu mi fingerude. Nga wosoefacgoc kekecngo yoacfu namma firang anude.

<sup>14</sup> Tosofocna, ngic mongngo deude, “Ni negen negensinggoc kecduae.” ifi dema angammemea mi feudeu negen negensinga imocac fora mi meficgeude. Nga negen negensing ifiango ebicfunac naric mi mesiyunuude nga yeni komoc mi kpegecde. <sup>15</sup> Negen negensinggoc ngic me ngac toso mong ye kekehau noc wambaya heiude nga yakaya wenacsoc neudeac kpedadangekecmanu <sup>16</sup> ngenearunac mongngo yeac deude, “Ge ruaegoc kemma nomang ngakpiga heima yaka negebec ambesena.” ye enacngosac ifi dema sebiaac wiac obohode, imoc mi miudeu, negen negensingaac fora mong mi fingerude, kpac. <sup>17</sup> Nga negen negensingga angammemea kpac fede, imocngo homemea ande.

<sup>18</sup> Nga ngic mongngo deude, “Ge negen negensinggoc kecne. Nga ni ine angammemea mekecduae. Negen negensingga angammemea kpac, imoc edzacnuna hemmaguc angammemea edzacguba negen negensinna naric hennade.” <sup>19</sup> Amma Anutu ye mocgusac kecde, imoc bic negensinggenec, imoc gombunga. Nga asu mangana yeni ifingoc imoc negensinggema kengec amma dzonongngina fedekedengoc.\* <sup>20</sup> Nga geng ine negen negensinggoc kecma angammemega kpac kecne, imoc fora mong mi meficgeude, kpac. Ge ngic negen negengga kpac isoc, imocac siriha negenghomesesena. <sup>21</sup> Warac nenang bangecnina Abarahang ye medaha Isaka sese dema aratau faiu Anutungo yeac negen negensing angammemeagoc hemma ngic dindingac demiec.

<sup>22</sup> Nga yeac negen negensing nga angammemea yeri meficemema yera-hafocngoc ua meoc. Amma angammemeango negen negensinga nanggeu yeri mocgu anoc. <sup>23</sup> Anu imoc fora ande nga mitikibingo edzacnunuma yofi dede,

“Abarahang ye Anutu negensinggeu Anutungo yeac ngic dindingac demiec.”

(*Fingec fingec 15:6*)

Amma yeac yofi degec, “Ye Anutuac ogea.” <sup>24</sup> Anutungo ngic angammemea arennu yeac dindingac deude nga negen negensinggac arennusac kpac, ngeni imoc hendae.

\* **2:19:** Asu mangana yeni eng negensinggedae angammemengina gombunga mong mi fede. Imocac negen negensinggina fora kpac.



<sup>25</sup> Nga Anutungo singtoangac Rahaba angammemeaac amma dindingac demiec. Yeng ngic sueyuruyuruya ama heiyemecma sing monnusing sueyuruu woraac. <sup>26</sup> Sebi ongaasuya kpac, imoc homemea nga siriha ifiangoc negen negensing angammemea kpac, imoc ifingoc homemea.

### 3

<sup>1</sup> Tosofocna, ngeneanunac homacngo kpoukpou anggecdeac mi negen-sibisia. Anutungo yoacfu fainunuudemoc naso imohai kpoukpou hanina ebiriangoc isinggema yoacnina desiude. <sup>2</sup> Nenang sasawa naso homac kopocsicfu manunuude. Amma ngic mong ye yengenaac yoac segema kopocsic mi meficgeudeu ye ngic hafoangoc gombunga amma yeng sebia ifingoc garenggeudeac mi obohoute. <sup>3</sup> Anu becosi yeni yoacnina negemma modacgecdeac enacnginau aiengbiscic faima sebinginau hafoa kisangyunuandimbe. <sup>4</sup> Nga wagetoea kondunnu kecdae imoc ifingoc hembesonga. Yeni kunengtoa nga firang seriango meyunuu wage gareng ye wiachisihia merengfai anu wagetoea yeac maria modarude.

<sup>5</sup> Anu nedzarang ye ifingoc sebininau wiac kapia ande nga sifu yoactoea dema sebinina meenude. Nga negengcec, gerec kapiabisicngo hanahema dzeu ickate kunengtoa faiu dzeande. <sup>6</sup> Nedzarannina imoc gerec isoc, imocngonoc sebininaac wiac sasawa feracyunuma manganaac nonggea angkecde. Nga hofengo nedzarannina faiu dzeu nedzaranninango sebinina sasawa meu wonong anu kekecnina hafoa imoc faiu dzeude. <sup>7</sup> Yangkasi nga neng amma boudzoc nga kondunnu yang hania hania fedacdae, yeni warac nga yaguc yoac kpouyemmema garengyunuandimbe. <sup>8</sup> Nga ngicngo nedzaranga garenggeudeac obohokecde, imoc tacnegenga kpac mangana mekefu marasing manganango yearu wakede. <sup>9</sup> Nenang nedzaranninango Kebu Manninaac kenecyoac deandimbe\* nga nedzarannina imocngonoc ngicngac Anutuac siric meyunuyunuya, yeni ine sowecyunuandimbe. <sup>10</sup> Enacbibic imohacnacngoc kenecyoac nga sowecyoac momoc maande. Tosofocna, imoc naric mi ande. <sup>11</sup> Doku kiwa mocgu imohacnacngoc doku sawera nga hodungagoc momoc naric mi maecde, kpac. <sup>12</sup> Tosofocna, fig icngo oriwa gbomea naric mi meficgeude nga waing witicfu fig gbomea naric mi fingerude. Siriha ifingoc doku kondunggocngo doku sawera naric mi meficgeude.

<sup>13</sup> Ngeneanunac ngic mongngo negen negentegec nga negen negenga irec ireckae mekecdeu, ye yumea kecma negen negentegecgc fakaya gombunga edzacngunubeso. <sup>14</sup> Nga ngeni ubaherenginau keracmangang kuneng amma kichodung negemmangangoc hoanggedaeu ngenang sebingina meemma ikocgoc kecma yoac foraac yoackpekpe mi ambisia. <sup>15</sup> Negen negeng ifia imocac hania kurumennunac kpac, imoc ine bangecfunac nga uba eseunac amma hadehade yeneac ua. <sup>16</sup> Ngeni ubaherenginau keracmangang amma kichodung tusucfaka feudeu ngeni ifingoc ewekpekpegoc kecma memanganemegecdeac faka hania hania angkecma tohomema kecgecde. <sup>17</sup> Negen negentegec wihacnac maande, imocngo hanahema negen negenga kpetiac faima monggoc ruae nga faka yumea meficgeude. Imohai ubaseri me ubagori me ikocyoac mong mi fede nga monde monde

\* **3:9:** Anutungo meficnunu nenang bangecngicngacnec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereude. (Fingec fingec 9:26; 14:20; 24:48; Mitiyegec 16:7; 26:12; 103:22 nga goa homac fede.)

mi angande. <sup>18</sup> Ngicngac ruae kekecac ua meandae, yeni ruae komoha homecgec fora dindingac kekec fingecyemmeude.

#### 4

<sup>1</sup> Ubasebinginau hensongo fede, imocngo igocngunuma botucnginau dzikac meficgeu ewekpekke angandae. <sup>2</sup> Ngeni wiac mebesonga negemma wiac mi mekecdae nga yunukpebuc amma hodzinu faka mekecma wiac naric mi tigece enude. Amma ngeni gorec gorec nga ewekpekke angkecdae. Amma ngeni nunumungina kpac kecdaeac wiac gombunga naric mi megecde. <sup>3</sup> Ngeni ine wiac megecdeac numuma yofi negensiandae, “Sebiac hensongou dzofinacnina naric ukunide.” Ifi negemma ngeni sicsauc numuma imocac fora mong mi megecde.

<sup>4</sup> Ngicngac waemeeme faka angandae, ngeni yofi negembisia, mong ye bangectoa bangec yomocac kekec imocac ogea angande, ye Anutu ngadeheude. Imocac mong ye bangecac kekec ogo ammibeso ande, yeng Anutuac ngaba areng anude. <sup>5</sup> Mitikibiu yoac yofi fede, “Ye ongaasu nenang hereu faiu tacde, imocac nenang yeac areng kecnideac homac ammikecde. Ngeni yeac herebu meficgebauac ye mi wabisia.”\* Yoac imoc eng oho ohoya mi fede, imoc negembisia. <sup>6</sup> Anu yeng ferahema wosoefac kuneng anemmeude, imocacnoc mitikibingo yofi dede, “Anutungo ngic sebiengengoc kecdae, yeni kekecngina memaude nga ubasebingina memama kecdae, yeni wosoefaha yemmeude.” (*Yoac negen negengagoc 3:34*)

<sup>7</sup> Imocac ngeni Anutuac yoacac bageau kecma mangana minginaac yoac kpema ngadehegec yeng wangunuude. <sup>8</sup> Anu ngeni Anutuac hoannu kenggec yeng ifingoc ngeneac wegenac haude. Manganameme ngic, ngeni maringina dzuacgec nga ngicngac ubayohocgoc kecdae, ngeni ubaherengina dzuacmengere anggec kpetiac anu. <sup>9</sup> Ngeni ubamangang nga ubahodung negemma homac kiacbisia amma dzomocgoc kecdae, ngeni meremma kiacgec nga sogac sogaihoc kecdae, ngeni meremma ubaebicgoc ambisia. <sup>10</sup> Ngeni Kebuac kicfu memaemegec yeng miacngunuude.

<sup>11</sup> Tosofocna, ngeni ngenacngoc mi demanganeeembisia. Mong ye ogea demanganede me fakaya isinggema demanganedeude ye dedeseriyoac deendema amma memaude. Nga dedeseriyoac isinggema memanadeu imohai dedeseriyoac mi modacnade, kpac. Geng ine dedeseriyoacac ising ising ngic annade. <sup>12</sup> Yoac ising isingngic nga dedeseriyoacac oho ohongic imoc mocgungosac amma yennoc naric ebicfunac mesingunuu komoc kpegecde me memanganengunuu kpac anggecde, ye imocac kuc femide. Nga ge ogoga isinggenadeac kuc mi genggena, kpac.

<sup>13</sup> “Neni yaguc me wereckenu taong imohai me taong monnu kemma kifa mocguac manau ihai kecma iwaiac emekpesi amma hiedzoina monggoc meficgenide.” ngicngac ifi deandae, ngeneac yofi deba negenggec, <sup>14</sup> Ngeneng wereckenuac siriha nga kekecngina dafi anude, imoc mong mi negendae. Kekecngina imoc hosuc isoc, naso wegenanecac erema kpac anude. <sup>15</sup> Ngeneng yofi degce ngereebac, “Kebungo negenu ngereude isoc nga kecnideu ua imoc me imoc menide.” <sup>16</sup> Anu ngeni sebiengeng yoac dema sebingina meengandae. Yoac ifia sasawa faka mangana yombong ande.

\* **4:5:** Mitiac negen negengngic yeni imocac yoac yofi nensidae, Yakobo ye mitikibiunac yoac goa yofia isoc kpeturangema dede. Makekeng 20:5; 34:14; Dzekeraria 8:2

17 Imocac negenggec, ngic mong ye angammeme gombunga anudeac negen negengtegec femiu imoc sifu waude, ye kopocsihagoc.

## 5

1 Ngicngac dzofinactoanginagoc, ngeni negenggec, ebic kunengngo nge-nearu fingeema memanganengunuudeac amma ngeni arohoma kiacec. 2 Ngeni iwaingina dzamema kpac anude amma wambangina imoc dzauk-padzadzangngo neu kpac anude. 3 Hufengngo gol nga siriwangina meude nga hufeng imocngo siducedede amma haniangina dekperagi u sebinginau gerec isoc ngonohoude. Ngeni naso wisic wisickeaunoc hiefinac mekpedzuc anggec, imocngo ifi fingeengemmeude. 4 Negenggec, ua ngicfocngina yeni semeng uanginaunac fora kpengemmegec ngeni ua bung yemmebeso wagec, imocngo kiackecde. Nga ua ngic yeneac kiacngo ifingoc Kebu Kuctoa mingina yeac kedzacfu bic kemeece. 5 Ngeni bangecfu kecma sebiac songo modagcec dzofinacnginango kekecnginau wakeude. Nga Anutungo ngicngac kpebucyunuudeac nasoya wegenemanu ngeni ine ondzonggboc amma kecdaengoc. 6 Ngeni ngic dindingac yoacfu faima kopocsihagoc dema kpebucgegec nga yeng ngaba mong mi mekefec.

7 Tosofocna, imocac ngeni modzotitia kpac tomai kecmagec Kebungo habeso. Nga negenggec, semeng ua minginango semenga homeru kia kpeu yeng semenga bangecfunac yadiudeac modzotitia kpac fora nasoac tomai kefude. 8 Nga Kebuac hahanaso bic wegene hadeac amma ngeni ifingoc ubaherengina meserima modzotitia kpac tomai kecbisia. 9 Tosofocna, ising isingngic ye nagu ngadeau bic hama nande. Ngeni yoacfu mabauac nge-naocngoc gubepakeng mi angemebisia. 10 Profete warac Kebuac kpacfu yoac dekecgec, yeneng modzotitia kpac yumea kecma ebic tofohokecgec. Tosofocna, ngeni yeneac siric modacma ifi ambisia. 11 Ngicngac modzotitia kpac kegec, yeneac negenni kenehagoc anec nga ngeni Hiobeac yoac bic negenggec. Ye ebicfu serima kefecac amma Kebungo yearu faka gombunga meec. Kebungo ubamangang kuneng nga wosoefactoagoc fakaya anemeude.

12 Nga yoac fora mong yofi, ngeni yoacngina seriudeac wiac mong kpacma mi deseribisia. Ngeni kurumeng me bangec kpacma yoacngina mi deseribisia. Ngeni kecma yoacfu makpebauac fora imoc fora nga kpac imoc kpac, ifi debisia.

13 Ngenearunac ngic me ngac mongngo ebic goa fingeemiu ye numubeso nga mongngo sogac sogaioc kefude, yeng afec afeheyegec heibeso. 14 Nga ngenearunac mongngo hafei ammiu kpebunggac enara kpacyunuu yeneng yeac amma Kebuac kpacfu kerecdokungo nadzicmima numubisia. 15 Ifi anggec nunumu negen negensinggoc, imocngo hafeigoc yearu ngerec ngeree fingeemiu nga Kebungo meficgema miaru yarude. Nga kopocsihagoc andeu Kebungo kopocsiha wau kpac andarude. 16 Imocac ngeni ngerec ngeree meficgegecdeac kopocsiangina ngenaoocngoc deficemema nunumungo meficemebisia. Ngic mong dindingacngo numuude imocngo wiac kuhagoc amma memefihagoc anude. 17 Eria ye ngic yombong nenang isocngo kia mi kpeudeac numuu kia mi kpekpe kifa harebec nga noboha anec. 18 Nga ye monggoc numuu sawaunac kia mau bangecngo semeng monggoc meficgeu fingerec.

<sup>19</sup> Negen negensinggoc tosofocna, ngene arunac ngic mongngo yoaac foraac sing segema sicsauc kenudeu mongngo ye dzigeneudeac deu dzigeneudeu  
<sup>20</sup> yeng yofi negembeso, ngic tosoya manganaac sinnunac merende, ye ngic yeaac ubaongaya homecfunac mesimiu kopocsic homac kperaheude.

## Petoroac Kibi 1

<sup>1</sup> Ni Petoro, Yesu Kristoac aposorongo meisingfora Ponto nga Gara-tia amma Kapadokia nga Asia amma Bitinia bangectoau israengicngac singsararang kpema kuric kecdae, ngeneac kibi yomoc ohoduae. <sup>2</sup> Anutu Manggacngo bic negenu feecac yeng meisingngunuma yofi desiec, Tiri Asungo ngenearu ua meu yadiseri amma kpetiac anggecde. Ifi amma ngeni yeac enac tofohogec Yesu Kristoac sacngo kpegiu nadzicngemmeec kecdae. Yeac danggunac nga ruaengo ngenearu sahema febeso.

<sup>3</sup> Nenang Kebunina Yesu Kristo, yeac Anutu Manggac kenehebisina. Yeng wosoefactoa kpenemmema Yesu homecfunac megboriec. Sing imohai nenang kekec meficgenemmeu fingec fingec gboria fingering. Ifi fingecma yeac wiac kekehagoc fingecnemmebesande, imoc negensinggema kecdimbe. <sup>4</sup> Ye ifi amma kurumenga kurumenga fekende, imohai marid-zominnina tini enudeac bic faiec fede. Nga wiac imoc mi kpac anude amma imoc naric mi dzameude, imoc kongaha feengkefude. <sup>5</sup> Ngeni negen negensinggoc kecmagec Anutu ye kuhagocngo garengngunuu naso wisickeau komoc kpegecde. Imoc fingerudeac efaima fede.

<sup>6</sup> Anu naso kopianec yomohai ebic nga faitobang hania hania fingecngemmeu ongangina dzokonemanu ngeni sifu wiac ngade haude, imocac negemma mamangkima sogaima kecbisia. <sup>7</sup> Gol siriha negendimbe. Ngic yeneng imoc tobanggema siriha henggecdeac gerecfu faigec dzema isinggeandae. Gol fora ye fingectegerude nga imoc sifu ngade kpac anude. Nga negen negensinggina fora, imoc gol ferahema wiac engena anude. Yesungo fingectegerude, naso imohai negen negensinggina imocngo dedengerec nga kuc kibikperagiagoc amma eweheihei meficgeude. <sup>8-9</sup> Ngeni ye kicnginango mi henggec amma sifu yeac songo negendae. Nga yofinenggac ye mi hengandae amma ngeni sifu ye negensinggecde. Amma ngeni ye negensinggec, yeng ubaongangina kopocsicac ebicfunac mesingemmeu ngeni komoc kpegecde. Ngeni imoc negensima sogac sogai ebiriangoc amma kecdae.

<sup>10</sup> Profete yeni ngeneng Anutuac wosoefac megecdeac kpefing degec amma yeni komoc kpekpea sing negengireckegecdeac uatoo mekecgec. <sup>11</sup> Ifi anggec Kristoac Asungo yenearu kecmanu Kristongo kpendzeng kpema ngade kuc kibikperagiagoc mebesande, imoc Kristoac Asungo herenginuu kefecac kpefinnu bic edzacyunuu dekperagingemmegec. Amma imoc meracac yoac nga noc nasou fingeru henggecdeac kicfifi anggec. <sup>12</sup> Kicfifi amma yenang meficmegecdeac kpac, imoc ngeni meficngunugecdeac yoara dekperagingemmegec, Anutungo imoc edzacyunuu yeni ireckegec. Kecma Anutungo Tiri Asu kurumennunac bangecfu sueu mama siduc gombung dedengic kuc yemmeu, yeni yoac imoc mema dekperagingemmegec ngeni imoc negenggec. Nga Angero yeni imoc ifingoc henggecdeac ayemeande.

<sup>13</sup> Imocac meheng kpeheng amma ubanegen negengga isinggema geangaoc garengememana Yesu Kristoac hahanasoya fingectegeru imohai wosoefaha mehaude, ge negen negengga yeac wosoefactu hafoangoc seria faina febeso. <sup>14</sup> Ngeni warac siduc gombunggac yoac mi negentegecma sebiac songo modacgec. Amma ngeni enac tofoc tofoho nambarac isoc

kecdaeac sebiac songongo monggoc mi garengngunubeso. <sup>15</sup> Anutungo kpacngunuec, ye kpetiac nga ngeni ifi isoc faka nga angammemengina hafoangoc kpetiac ambeso. <sup>16</sup> Imocac yofi oho ohoya fede, “Ni kpetiac, imocac amma ngeni kpetiacngoc kecbisia.” (*Sesememe 11:44-45; 19:2; 20:7*)

<sup>17</sup> Anutu ye monde mondea mi femide nga yeng ngicngac tembus tembus angammemenginaac sirihau yoacngina desiude. Nga ngeni ye “Manggac” kpacandaeu, ngeni yei kurickekecac nasonginau eweheimima kecbisia.

<sup>18</sup> Ngeni warac bangefcocngina yeneac sicsauc fakau kecmagec Anutungo bungngina mema meisingunuec, imoc siriwa me golngo kpac nocac siriwa nga gol imoc kpac anecde. <sup>19</sup> Ye Kristoac sacngo bumengunuec. Nga Kristoac sac imoc wiac engena yombong, imoc rama medaha mong puringa kpac nga ebiha kpac, yeac sac isoc. (*Makekeng 12:5; 29:1; Sesememe 22:17-25*)

<sup>20</sup> Bangec nga kurumeng mi fingecmaec Anutungo Kristo bic meisinggeec. Meisinggeu yeng yaguc naso wisic wisickeau nenanggac amma fingete-gerec. <sup>21</sup> Fingetegecma sing meficgenemmeu yofinenggac Anutu negensinggema kecdimbe. Ye medaha homecfunac megborima kuc nga kibikperagi miu nenang Anutu negensinggema yearu negen negennina naric fainide.

<sup>22</sup> Ngeni yoac foraac enac tofohogec, imocngo ubaongangina dzuaru ubaherenginaunac songotoa ereu ngeni tosofocngina heresongogoc hoangyunugecde. <sup>23</sup> Anutuac yoac imoc kekehagoc amma seria nande. Yoac imocngo megboringunuu fingec fingec gboria fingecgec. Kpea imoc dzonggo dzonggoa kpac imocngo nemonggema kekecserigoc anude.

<sup>24</sup> Imocac yoac yofi oho ohoya fede,

“Ngicngac sasawa bangecfu kecdae, yeni kpindzing isoc amma kibikper-agingina imoc dzaring dzuria isoc. Yeni kpindzing dzanggeande nga dzaring dzuria moronggeande, ifi isoc dzanggegecde.” (*Yesaia 40:6-8*)

<sup>25</sup> Anutuac yoacngo ine fefeseri feude. Imocngo siduc gombung ande nga ngic yeneng imoc edekpou angemmegec negenggec.

## 2

<sup>1</sup> Ngeni ngaba hania hania nga ikocfaka amma keracmanganggac faka wama ngicngac mi demanganeyunubisia.

<sup>2-3</sup> KEBU ye gombunga, ngeni imoc bic tobanggeec. (*Mitiyegec 34:8*)

Imocac ngeni sabac gboriangoc namuac ammiande, ifi isoc Asuac arennu namu kongaha imocac angemmebeso. Ngeni imoc nema yadimagec yeng ebicfunac mesingunuu komoc kpegecde.

<sup>4</sup> Kebu ye hoctoa kekehagoc, ngeni yearu habisia. Ngic yeneng hoc imocac hoc mangana dema meickegec. Nga Anutungo imocac negenu sirihana engena anu imocnoc meisinggeec. <sup>5</sup> Nga ngeni ifingoc hoc kekehagoc yeac siric andae. Nga Anutungo asu ama mengunuande. Mengunuu ngeni yengena womong gareng kpetiac amma Asuac sinnu sese faigegecde, imoc Yesuac amma Anutungo henu ngereude. <sup>6</sup> Imocac mitikibiu yoac yofi oho ohoya fede,

“Nengenggec, ni hocwotung mong sirihana engena imoc meisinggema Sionnu gununggebade. Ngic mongngo ye negensinggeude, ye gamekpekpeu naric mi enude.” (*Yesaia 28:16*)

<sup>7</sup> Ngicngac ye negensinggema kecdae, ngenearu hoc imocngo sirihana engena ande. Nga mi negensinggeda, yenearu yofi fingerude,

“Amameme ngic yeneng hoc mong mangana dema ukugec. Nga hoc imocngo amaac hoc wotung amma seria nanude.” *(Mitiyegec 118:22)*

<sup>8</sup> “Nga yeni hoc imohai kpondzong heigecde nga peperandziu tifainggema negemmangang meficgegecde.” *(Yesaia 8:14)*

Yeni Anutuac yoac kpeandaeac ifi anggecde, yoac imoc yeneac bic dedea.

<sup>9</sup> Anu ngeni Anutuac faka kuhagoc dekperagigecdeac Anutungo ngeneac areng meisingngunuec. Meisingngunuma ngeni yengena areng ngicngac kpetiac anggecdeac mengunuma ngictauac arennu faingunuu womong garengua mekecgecde. *(Makekeng 19:5-6; Yesaia 43:20)*

Yenoc kundunnunac hagecdeac kpacngunuma kperagiau heitaingunuma yengena kperagi engena, imohai faingunuec. <sup>10</sup> Ngeni warac ngicngac areng mocgu mi kecgec, kpac. Nga yaguc Anutuac ngicngacfora amma yeac areng kecdae. Ngeni warac Anutuac wosoefac mong mi hengkecgec. Nga yofinengac yeac wosoefac hemma kecdae.

<sup>11</sup> Songo tosofocna, ngeni bangec yomohai kuric kecdae, imocac ngeni uba eseac negensongo hania haniango ubaanganginagoc dzikac kpeande nga ngeni imoc wama kecgecdeac gorongina kpema deduae. <sup>12</sup> Ngeni bangec monnunac ngicngac, yeneac botucfu faka nga angammeme gombunga angkecbisia. Ifi anggec yeni ngeneac dedeseriyoac kpekpeareng dema enacfu faifai angemmema angammemengina gombunga henggecde. Ifi hemmagec Anutungo yeni yugucyunuu naso imohai dengeregecde.

<sup>13</sup> Ngeni Kebuac amma kia gawamang, yeneac enac tofohobisia. Imoc ngictaungo kuc sasawa mekecde nga <sup>14</sup> yeac bageau gawana sasawa. Yeng uayoac yemuec yeneng ngicngac angammemengina mangana angkecdae, yeneac turung kpouyemmegecde. Nga faka gombunga angkecdae, yeni dengereyunugecde. <sup>15</sup> Ngic yeni negen isingngina kpac wiac mong mi negentegecdae, imoc ngeni angammemengina gombungango enacngina midomebisia, imocngo Anutuac songo ande. <sup>16</sup> Ngeni witicfu mi kecdae nga witiha kpac kekec, imocngo angammemengina mangana mi kperahebeso, kpac. Ngeni Anutuac wanac areng kecbisia. <sup>17</sup> Amma ngeni ngicngac sasawa ewengina heima negen negensinggoc tosofocngina heresongogoc hoangyunubisia nga Anutuac damungunuu ngictau eweheimibisia.

<sup>18</sup> Wanacngic kecdae, ngeni mingingfocngina yeneac enac hafoangoc modacma ewengina heima kecbisia. Ngeni mingingfocngina yumea nga gombunga amma gori gorua momoc ifingoc ayemmekecbisia. <sup>19</sup> Ngic mong ye Anutuac yoac ubahereau feu imoc modaru goango kopocsiha kpac hemmaguc sifu ebicfu faigec kpendzeng kpeudeu faka imocngo danggunuhagoc anude. <sup>20</sup> Nga ngic yeneng kopocsicnginaac amma ngunugec ngeni kpendzenu emma imocac bageu seria kecgecdeu imocngo dedengerec wiac mong mi ande, kpac. Ngeni ine angammemengina gombunga ammagec kpendzenu faingunuec imocac bageu seria kecgecde, imocngo Anutuaru danggunuhagoc anude.

<sup>21</sup> Ngeni ifi anggecdeac Anutungo kpacngunuec. Anu ngeni Kristoac hanititi modacgecdeac yeng ngeneac amma kpendzeng kpema sing imoc edzacngunuec.

<sup>22</sup> Ye kopocsic mong mi meficgeec amma yeac enacfunac ikocyoac mong mi negenggec. *(Yesaia 53:9)*

<sup>23</sup> Nga yeni defagoc ammigec yeng turunga sowecyoac mong mi merenec. Nga kpendzeng kpema dekengec mong mi ayemmeec, kpac. Ye ebiha



Anutungo yoac dindingac desikecde, yeac mariu faiemeec. <sup>24</sup>Ye yengena sebiango nenang kopocsic atickema icfu nanec. Nanu nenang kopocsicfunac homema sing dindingac modacnideac ifi anec. Nga yeac kubecngo ngeni hafeidzoicfunac ngerec ngeree meficgengemmeec. <sup>25</sup>Ngeni warac rama isoc sing segema kecgec. Nga yofinenggac ramagarenggaru bic dzigenegec yennoc ubaongangina henggareng angemmeude.

### 3

<sup>1-2</sup>Anu ngac ngeni sing imohaingoc ewefocngina enacngina tofohoma kecbisia. Nga yeneac botucfunac goango Anutuac yeac mi negensinggegecdeu enengfocngina ngeneng Mitiaac yoac mi ede edeyunuu angammemengina gombungangoc angkecgec, imocngo ewefocngina Kebuac sinnu taiyunuu kenggecde. <sup>3</sup>Ngac ngeni orucdzongina dzegeandae nga kubu nganoc golngo memea sebinginau faiandae amma wamba siriha gombunga heiandae, imocngo siric kerengngina mi meficgebeso. <sup>4</sup>Nga ongaasungina yumea nga ruaegoc ubaherengina manau sufu sufuya fede, imocngo siric kerengngina meficgebeso. Imocac kibi kuha mi maande nga imocngo fekengkefude nocac imoc Anutuac icfu wiac engena ande. <sup>5</sup>Ngac kpetiac warac kecgec, yeneng siriha ifingoc kibingina meemma ewefocngina enacngina tofohoma Anutuaru negen negengngina faikecgec. <sup>6</sup>Imoc Sara isoc, yeng ewea Abrahang eweheimima kunenna dema enara tofohokefec. Ngeni faka nga angammeme gombunga mekecma wiac monggac dekengeha kpac kecgecdeu Saraac naraangfora anggecde.

<sup>7</sup>Ngacac kuc, imoc ngicacsoc kpac. Ngic enengfocnginagoc ngeni imoc negensima imocac siriha yenyigoc kecbisia. Nga ngeni kekecac danggunuc imocac maridzoming ngenahafoc megecdeac nga ngic ngeni nunumunginaac kpae fingebacac amma enengfocngina ewehihei ayemmebisia.

<sup>8</sup>Kpeturanggema deba, ngeni sasawa negen negengngina mocgu febeso. Ngeni wosoefac angemema heresongogoc hoangemema ubamangang negengemema memaemema kecbisia. <sup>9</sup>Ngicngac yeni mangana angemmegec ngeni turunga manganangoc mi merengyemmebisia nga yeni desofoc angemmegec ngeni turunga desofocngoc mi ayemmebisia, kpac. Ngeni kenec imoc maridzomingngina anudeac kpacngunungunuya, imocac yeni ifingoc kenecyoac edeyunubisia.

<sup>10</sup>Imoc yofiac,

“Ngic mong ye kekecac songo negembeso nga naso gombunga hembesonga ammikecde, ye nedzaranga yoac mangana debacac nga enachibihango ikocyoc debacac garenggebeso. <sup>11</sup>Ye faka mangana ngadehema angammeme gombunga angkecbeso. Amma ye ruaeac sing meficgeudeac uatoa mebeso. <sup>12</sup>KEBUNGO ngicngac dindingac yenearu kic fima nunumunginaac kiedzac kpeude. Nga mangana mekecdae, yeni ine yenengwa anude.”

*(Mitiyegec*

*34:12-16)*

<sup>13</sup>Ge faka nga angammeme gombunga annadeac mamangkima angkecnadeu ngicngac yeni memanganegugecdeac obohoma wagecde. <sup>14</sup>Amma yeni dindingac kekecnginaac amma kpendzennu faingunugecdeu, imoc ngeni kenecnginagoc.

Ngeni yeneac damu nga kengec mi ambisia.

*(Yesai 8:12)*

<sup>15</sup>Kebu Kristo ye kpetiac, ngeni negen negeng imoc ubaherenginau mekecbisia. Amma gombungangina ngade haude, imocac hania goriangoc

kpesingemmegec turunga merenggecdeac nasosoc efaima kecbisia. <sup>16</sup> Ngeni ine kpesi kpesiac turunga herebuya kpac, yumea nga ewehelheigoc amma here negen negeng kpataningau merembisia. Ngeni ifi anggecdeu, angammemengina gombunga Kristoac amma angkecdae, imocac ngic dedeng-gbarung angkecdae, yeni gameyunuude. <sup>17</sup> Ngic mong ye angammemea gombungaac amma Anutungo negemmiu kpendzeng kpeude, imocngo ngereude. Nga mong ye fakaya manganaac amma kpendzeng kpeude, ye mi dengerebesoga.

<sup>18</sup> Kristongo Anutuac hoannu fainunuudeac atac mocgu donina mema kpendzengtoa kpeec. Ngic dindingacngo yoackpeke areng nenanggac amma ifi anec. Ye sebiugeng kpegec homeec nga ongaasuugeng bic megboriu kefec. <sup>19</sup> Kecma asu goa witicamau kegec, yenearu kemma yoac edekpou ayemmeec. <sup>20</sup> Noa ye wagea memanu Anutungo modzotitia kpac tomaingina kecbibiemanu yeneng yoara kpegec.

Nga Noango wagea medzickeu naso imohai Anutungo dokungo ngicngac efeanec, 8sac ebicfunac mesiyunuec. <sup>21</sup> Dokunadzicngo onga imoc mema ebicfunac mesingunuude. Dokunadzicngo sebiac wonong mong mi dzuarude, kpac. Imoc yofi, Yesu Kristongo homecfunac yarecac amma herenegeng negengngina kpetiac anude, imocngo Anutuac kicfu deficgeude. <sup>22</sup> Yesungo bic kurumennu enec. Amma ye Anutuac foiau tacde. Nga angero nga wiac kpac kuneng memea amma kuc yemmeyemeea, yeac bageu bic faiyunuyunuya kecdae.

## 4

<sup>1</sup> Kristongo sebigoc kpendzeng kpeec. Nga ngeni yeng kpendzeng kpeec, ifi isoc naric kpegecde, negen negeng imocngo marikungina ambeso. Ngic mong ye sebigoc kecma kpendzeng kpeec, yeng kopocsicac sing bic waec.

<sup>2</sup> Nga yofinenggac nangennide, ye ngicngac yeneac negensongo hania hania monggoc mi modacma Anutuac negen negeng nga songo modarude.

<sup>3</sup> Bangec monnunac ngicngac Anutu mi negemmidaa, yeneac kekecac negensongoac faka yofi fede, imoc kaiserofaka nga kickerec angkecdae amma doku seria tosofocnginagoc nema ubangina sufuande nga sing sege segea modacma imocac siricfu nemu hania hania afehegecde. Ngeni warac faka ifia angkecgec imoc monggoc mi ambisia. <sup>4</sup> Ngeni bangec monnunac ngicngac sicsauc fakangina hania hania anggec ngeni yenigoc monggoc mi torokpema kecdaeac amma yeni imoc hemma negenggec sirihau mong anu desusuic amma demanganengunugecde. <sup>5</sup> Anu Anutungo ngic gbori nga homemea angammemengina desiudeac efaima kecde, yearu haniangina debisia. <sup>6</sup> Ngicngac homemea yeni siduc gombung edekpou ayemmegec negenggec, yeni warac sebiugeng kekec kegec, imocac sirihau turunga megecde. Ifi mema asuu Anutu kecde isoc kecgecde.

<sup>7</sup> Wiac sasawa imoc kpac anudeac naso wegenede. Imocac ngeni garengemema negengisingoc kecma nunumu ua mebisia. <sup>8</sup> Heresongogoc kekec imocngo kopocsic hania hania homac kperaheude, ngeni imocac amma songo fora heregoc negengemema hoangemebisia, imocngo faka engena ande. <sup>9</sup> Ngeni ubangerecogoc modzotiti nga ngadeyoara kpac kecma ama heiemema garengemebisia. <sup>10</sup> Anutungo wosoefahaac amma Tiri Asuac kuc hania hania ngemmeec, imocac ngeni Anutuac kingang kpeke gombunga kecma tembuc tembuc meficemema kecbisia. <sup>11</sup> Ngic mong ye miti hania ngicngac dekperagiyemmeude, ye Anutuac yoac modacma dekperagibeso.

Amma mong ye memefiac arennu kingang kpeyemmekecde, ye Anutungo kuc miande, imocac sirihau kingang kpekpe ua mebeso. Ifi anggec ngicngac yeneng faka sasawa imoc hemma Yesu Kristoac negemma Anutu dengeregecde. Ye kibikperagi nga kuc mingina nasoya wisic wisickea kpac fekengkecbesande, imoc fora.

<sup>12</sup> Songo tosofocna, faitobang kpendzengagoc fingecngemmeude, imocac mi kpidohobisia. Nga imoc fingecngemmeude, imocngo faka furia mi ande. <sup>13</sup> Nga ifi fingecngemmeu imohai ngeni Kristogoc torokpema kpendzeng kpema imocac sirihau sogaibisia. Ifi anggec yeng kecma kuc kibikperagiagoc fingectegerude, imohai ngeneac sogac sogaitoa fingerude. <sup>14</sup> Nga ngicngac yeneng Yesuac kpacac amma demanganengunuma defagoc angemmegecdeu ngeni kenecnginagoc, nocac yeni ifi angemmegec Anutuac Asu kuc nga kibikperagiagoc, yeng ngeneac witiu tarude. <sup>15-16</sup> Nga ngic mongngo kpara, “Kristoac ngic,” ifi dekecdaeac kpendzeng kpedeu ye imocac ine game mi kpebeso, ye kpac imocac amma Anutu dengerebeso. Nga ngeneacunac mongngo ngic kpekpe me wiac hamangec meec me yarengic ande me ngicngac ogofocngina goa yeneac wiac imocac hodzinggeude, ye fakaya ifiac amma kpendzeng kpeu gameagoc ambacac ngeni faka ifia mi angkecbisia, kpac.

<sup>17</sup> Imoc yofiac, Anutu ye yengena ama arengfora yenearu sing hanahema faka nga angammengina isinggema desiudeac nasoya wegenede. Amma ye nenangaru sing uaya imoc hanaheudeu areng goa yeni siduc gombung-gac yoc kpeandae, yenearu uaya torokpema angammenginaac turunga engenangoc yemmebesande. <sup>18</sup> Nga,

“Ngicngac faka dindingac modacandae, yeni faitobannu emma kekec uatoa mema firang amma komoc kpegecde. Faka ifia fingecngemmeudeu, kopocsicmeme nga Anutu ngadeheandae, yenearu ebictoa fingerude.”

*(Yoc negen negengagoc 11:13)*

<sup>19</sup> Ngicngac Anutungo negengyemmeu kpendzeng kpeandae, yeni angammeme gombunga angkecma ubaongangina hafoangoc Anutu bangec nga kurumeng meficgeec, yeac mariu faibisia, nocac ye dedzegeyoara mi waude, kpac.

## 5

<sup>1</sup> Kristongo kpendzeng kpeec imoc kicnango henai nga imocac hepuc kecduae. Amma kuc nga kibikperagia fingerude, imohai nenahafoc kec-nide. Kpebunggac enara ni ngenigoc ifingoc ua imoc mema kecduaengoc gorongina kpema yofi deduae, <sup>2</sup> Anutuac habungo ngeneac botucfu kecdae, ngeni yeni gombunga garengyunuma ubaebicfu ua mi mebisia, ngeni ubangeregcoc ua megec Anutungo negenu ngereeude. Amma ngeni hiedzonginagoc anggecdeac ua imoc mi mebisia. Ngeni uangina imoc mamangkima mekecbisia. <sup>3</sup> Anutungo kpebung ngemmeec, imoc yeneac engenangina isoc mi kecbisia. Ngeni faka gombunga kpebung edzacyunugec, yeni imoc hemma modachisia. <sup>4</sup> Ifi kecmagec gareng yadango fingectegecma yeng irangina kuc kibikperagiagoc dzame dzamea kpac ngemmeude.

<sup>5</sup> Sebighori ngeni ifingoc yadafocngina yeneac bageu memaemema kecbisia. Amma ngeni sasawa fakangina yumeau angemema kecma imoc wamba isoc heigec kemebeso. Imoc yofiac,

“Anutungo ngicngac sebiengeng kecdae, yeni wayunuma memayunuude nga memaemema kecdae, yeni danggunuha yemmeude.” *(Yoac negen negengagoc 3:34)*

<sup>6</sup> Imocac ngeni Anutuac mariseriaac bageu memaemema kecbisia. Ifi kecmagec Anutungo yengena nasou miacngunuude. <sup>7</sup> Ye yengenaoc ngeneng-gareng angkecdeac ngeni ubaebicngina sasawa yearu faidacbisia.

<sup>8</sup> Ngabangina mangana mingina, ye raiong isoc arohoma yerecgema ngicngac gbokoyunuudeac hofocyunuma uatoa mekecde. Imocac ngeni ubagbori kecma garengemema <sup>9</sup> gofochima serima namma negen negensingnginango mangana minginaac yoac hefahebisia. Hefahema yofi negembisia, negen negensinggoc tosofocngina bangeha bangeha kecdae, yeni ifingoc kpendzeng imocngoc kpekecdae.

<sup>10</sup> Anutu danggunuc mingina, yeac kuc kibikperagiango fefeseri fede nga yeng ngeni ihai Yesu Kristogoc kegecdeac kpacngunuec. Nga ngeni kpendzenu nasu wegenanec kecekemmagec, yengenaoc mengeren-gunuma nonggo tacngemmu seria nanggecde. <sup>11</sup> Ye kuc mingina amma kechereema kecbesande, imoc fora.

<sup>12</sup> Siritano ye negen negensinggoc tosonina yeac yofi negemma deduae, ye uau serima namma meficnuu kibi wegena yomoc ohongemmeduae. Ni nanggununuma Anutuac danggunuc fora imocac hepuc amma dekperagingemmeduae, ngeni imocac hoannu seria kecbisia. <sup>13</sup> Anu Anutungo Babirong taonnu kpebung kecdae, yeni nga ngeni ngenahafoc meisingngunuec, yeni nga medacna Mareko, yeneng ubangerecyoac ngenearu faigec hade. <sup>14</sup> Ngeni heresongogoc hoangemema wenacngerec dema kpetiacfu titikokoc angemebisia. Ngicngac Kristogoc kpeketahema kecdae, yeac ru-aengo sasawa ngenearu febeso.

## Petoroac Kibi 2

<sup>1</sup> Ni Simong Petoro, Yesu Kristoac wanacngic nga aposorongo kibi yomoc ohongemmeuae. Nenang Anutu nga memengerecna Yesu Kristo, yeri dindngac, imocac amma nenang negen negensinggac nadunga mocgu meficgenemmeoc. Imoc wiac engena yombong. <sup>2</sup> Anu ngeni Anutu nga Kebunina Yesu hafoangoc negengyemecmagec yereac danggunuc nga ruae, imocngo ngenearu sahema febeso.

<sup>3</sup> Anutungo Kristoac dedengerec nga yeac kuc nga kibikperagiau kec-nideac kpacnunuec. Nenang ye negemmini Anutungo hama yengena kucfu kekec nga yeac sing modacnideac kuc sasawa nemmeec.

<sup>4</sup> Bangecac songo imocngo faka dzonggo dzonggoya meficgeude. Nga ngeni Anutuac kekecfu torokpema bangecac songo imoc wagecdeac Anutungo Kristoac kuc nga kibikperagia manau yoac dedzege engena angem-mee. <sup>5</sup> Ngeni imocac amma efaima serima namma negen negensingng-inango faka dindngac meficgebese nga fakangina dindngacngo negen negentegec meficgebese <sup>6</sup> amma negen negentegecnginango garengeme kekec meficgebese, garengeme kekecngo seserigoc kekec meficgebese nga seserigoc kekecngo Anutuac enac tofoc tofoho meficgebese, <sup>7</sup> Anutuac enac tofoc tofohongo dacmunac heresongogoc hoangeme kekec meficgebese imocngo heresongo meficgeude.

<sup>8</sup> Faka imoc sasawango ngenearu yadiseri amma fedacdeu ngeni ngisima kecma Kebunina Yesu Kristo hafoangoc negemmima kecgecde. Kecma kekec imocac fora gombunga homac fingecngemmeu mong mi obohogecde. <sup>9</sup> Nga ngic mong ye kekec imoc mi femide, ye kicpisia nga hereausing naric mi hentegeude, siriha imocacsoc. Ye kopocsiha warac dzuac dzuara, imoc bic nigeckpeec. <sup>10</sup> Tosofocna, ngeni Anutungo bic kpacngunuma meisngn-gunuec, ngeni mamangkima kufung tigeceude naric mi mangunuude. <sup>11</sup> Ifi anggec yeni ubangerec angemmema Kebu nga memengerecna Yesu Kristo yeac kekecseriac eucererenu heitaingunugec enggecde.

<sup>12</sup> Ngeni yoac fora bic negemma mekecgec imoc negenduae, amma sifu nasosoc yoac imoc heigboringemebadeac negenduae. <sup>13-14</sup> Amma sebinaac bedzo yomoc hesibadeac nasoya wegenede, Kebunina Yesu Kristongo imoc bic dekperaginene. Imocac sebinaac bedzogoc kecbade, imohai yoac goa heigboringemmema midingunubadeac negemba naric ande. <sup>15</sup> Amma ni ua imoc nasosoc mamangkima mekecduae. Mekecma homeba, yoac imoc mi nigecongunuude.

<sup>16</sup> Neni Kebunina Yesu Kristoac kuc nga hahanasoac deing, imoc nemusiducgoc torokpeni songea anudeac mi deing. Neni yeac kuc nga kibikperagia engena kicinango hemma negeninggac hepuc amma yofi dedimbe, <sup>17</sup> Anutu Manggacngo eweheihei nga kuc kibikperagia mimanu kuc kibikperagi engenatoa imocac manaunac enacudumengngo fingecma yeac yofi deec,

“Yomoc neac Songomedacna, ni ye hensongo ammiduae.” *(Mataio 17:5; Mareko 9:7; Ruka 9:35)*

<sup>18</sup> Neni yegoc momoc tiki kpetiacfu nammina ubaudumeng imocngo kurumennunac fingeru negening.

<sup>19</sup> Ifi negemma, profete yeneng yoac ohogec, imoc nenannu seria fede. Imoc kifa mong isoc nga imoc amabangec kundung fede, imohai mekper-agingimanu ama wereckenu asoac asomengngo herenginau dzema mekper-agingunuude, ngeni kicngina ihacgeng fima hoanggegec ngereeuide. <sup>20</sup> Nga profete yeneac yoac sasawa mitikibiuh oho ohoya fede, imoc yeni yeneng ubanginaac yoac mong mi degec, kpac. Ngeni imoc negengegebisia. <sup>21</sup> Imoc yofiac, profeteyoac imoc ngic songou fingeru mi degec, imoc Anutuarunac nga Tiri Asungo imoc mehama enacnginau faiu degec.

## 2

<sup>1</sup> Warac ngicngac yeneac botucfu profete ikoha kecgec, ifi isocngoc kpoukpou ikoha ngeneac botucfu ifingoc kecgecde. Yeni dedesifuc yoac goa ikoha dema waic waic botucnginau mehama kekecngina memanganegecde. Nga Kebungo bic bummeyunuec, ye ifingoc busic kpema yenaoc ebic witinginau faigec, imocngo bic memanganeyunuude. <sup>2</sup> Kpoukpou ikoha yeni faka hania hania mangana gameagoc angkecgec ngicngac homacngo modacyunugec yeni imoc hemma yoac foraac sing deendema anggecde. <sup>3</sup> Anu kpoukpou imoc yeni ngeneac dzofinac hensongo amma ikocyoac dema hodzinggema wangecngunugecde. Nga Anutungo faka ifia bicngoc ngadeheec amma yofinenggac yoacfu faiyunuma memanganeyunuude.

<sup>4</sup> Angero yeneng kopocsic meficgegec Anutungo mi ongongyunuma hofeac kundung seriau ukuyunuu kemegec. Kemegec ye ihai sengngo witi-cyunuu desidesi nasoac tomai kecdae. <sup>5</sup> Nga Noaac nasou habutoa Anutuac yoac ferahegec mi ongongyunuec, kpac. Yeni ine dokudzohong deu erema semeyunuu homegec. Nga Noa ye faka dindingacac dedekperagingic, ye nga yegoc ngicngac seweng, yenisac ongongyunuec. <sup>6</sup> Anu Sodong nga Gomora taong, yeri desiyuruma memanganeyuruu hamangirasac feec. Nga ngicngac Anutuac sing kpema kecdae, yenearu kecma ifi isoc fingecebesandec ongea edzacyunuma ifi anec. <sup>7</sup> Yeneng kaisero faka nga mangana hania hania amma Anutuac yoac kpegec, Roti ye ngic dindingacngo fakangina ifia hemma ubea ebiriu Anutungo ongonggeec. <sup>8</sup> Ye ngic dindingacngo yeneac botucfu kefeac uamemesoc kopocsic faka angkecgec, imoc henu ubahereango yeneac faka manganaac amma ebic mema modzotituu kefec.

<sup>9</sup> Ngeni imoc hemma Kebuac sing yofi negenggecde, ngicngac Anutu eweheimima yeac enac tofohoandae, yeneac faitobang fingeceyemmuu Kebungo imohacnac ongongyunuudeac kuha fede. Nga fakangina manganagoc kecandae, yeni ine witicamau faiyunuu tacmagec yoacfu faiyunuudeac nasoya haude. <sup>10</sup> Ngicngac yeni uba eseac songo modacma faka seuhagoc hoanggeandae, ye yenearunoc ifi angkecde. Yeni Kebu ngadehema deendema amma yenang songo modacma kengeha kpac sawaac asu engena demanganeyunugecde. <sup>11</sup> Anu angero kucngina monggoc yeni sifu Kebuac kicfu asu imoc mi demanganeyunugec.

<sup>12</sup> Yangkposi yeni momorongnginaac songo modacandae, yeni fingegec eng yunuandimbe. Nga kpoukpou ikoha yeni yangkposi isoc momorongngina eng modacma wiac mi negendae, imoc demanganegecde. Amma yeni fakangina mangana modacgec Anutungo memanganeyunuude. <sup>13</sup> Yeni faka mangana amma imocac turunga megecde. Yeni enackerec amma wenac dzongiau neneyakatoa homac negecdeac ayemmeude. Ayemmeu yeni ngenigoc yaka enacurec nema faka seuhagoc nga gameagoc mema

sogaima kecandae. <sup>14</sup> Ifi kecma kichodung faka homac amma ngac yeneac kickerec amma kopocsic gebeha kpac angkecdae. Amma ngicngac negen negensinggoc amma mi serigec, yeni faka manganau kerereyunuma wange-yunugecde. Areng imocfia yeni sowecac nambaracfora.

<sup>15-16</sup> Bireang Beoroac medac, ye dzofinacac songo negemna Anutuac sing ferahema hiedzoac ua meu donggi yoac mi dedeango ngic isoc dehanec ammima profetengo sing segema faka kapaya amma kenghei hahei anecac kpae heimiec. Nga kpoukpou ikoha, yeneng Bireangac sing modacma sing dindingac wama sing segegecde. <sup>17</sup> Yeni dokukiwa dzike dzikea nga hoeng murayowarec yereng kpema fifranggeandape isoc. Anutungo yeneac tatac imoc kundung dzapac ihai deec.

<sup>18</sup> Ngicngac sing segeandae, yenearunac bure mema woramagac kpoukpou ikohango enacdoku ayemmema yoac kuneng dema kaiseroac sing nga uba eseaac songou monggoc wangecyunugecde. <sup>19</sup> Hofeac singngo kpoukpou ikoha witicyunude, yeni deandae, “Ngicngac yoacnina negenggecde, ngeni witicngina kpac anggecde.” ifi dema sing segeandae. Nocac wiac mongngo witicgude, ye kebuga anude. <sup>20</sup> Nga yeni Kebunina nga memengerecna Yesu Kristo negentegecma namma bangecac faka seuhagoc bic wagec, yeni monggoc kopocsicfu kenggec witicyunuu makpegecdeu ebictainginagoc anggecde. Nga ebic imocngo warac ebicgoc kecgec, imoc feraheude.

<sup>21</sup> Ngic mong ye ubamereng amma Kebuac kpetiac singyoac mema sing dindingac negemna modacande, ye imohacnac monggoc dzigenema keema ebictoa meficgeude. Imocac yeni hanahema sing dindingac negenggec naso imohai mi hoanggebaungo ngereebac. <sup>22</sup> Anu yoac heiheia mong yofi fede, Kasingo urumma urung urunga imoc monggoc dzigenema neude. (*Yoac negen negengagoc 26:11*)

Nga berecngo doku nadzicmaguc monggoc goteng nadzirude. Imocac fora imoc yeneac kekecfu fingerec.

### 3

<sup>1</sup> Songo tosofocna, ngeneac kibi andenga yohockang yomoc ohongemme-duae. Kibi yohockang imocngo ubanegen negengngina heighoriu negentegecma kongaha kecbisia. <sup>2</sup> Profete kpetiac, yeneng wiac ngade fingerudeac yoac imoc bic ohogec. Nga Kebu memengerecningango singyoac aposorofora yemmeu yeneng ngenearu hama imoc edengunugec, imoc negenggec fedeac monggoc heighoringemmeduae. <sup>3</sup> Ngeni yofinoc negenghomebisia. Naso wisic wisickeau desusuic ngicngac goa yeneng fingecma yenang faka manganaac hereyacyac modacma desusuic angem-mema <sup>4</sup> degecde, “Haudeac edengunuec, ye damoc kecde? Anutungo hanac hanaheaunacngoc wiac sasawa deu fingerec nga mangesafocnina homegec-funac nang erekema yaguc kecdimbe, imoc sasawa yeni warac feec isoc siriha mockicngoc fede.”

<sup>5</sup> Yeni ifi dema yoac yomoc wagecde, Anutungo bicngoc bicngoc yombong yoac deu sawa fingerec nga bangec dokuunac fingetegecma erema feec. <sup>6</sup> Anu kecma ye dokungoc monggoc edeu yadima bangecfu wiac sasawa feec, imoc semeu manganema kpac andarec. <sup>7</sup> Amma Anutungo yoac monggoc dema, bangec yomoc nga wiac sasawa sawau yofinenggac fedacde, imoc faiyunuu gerecac tomái fedae. Kecma ngicngac Anutu ngadehema kecdae,



yeni yeac yoacfu turungngina mema manganegecde, naso imohai bangec nga wiac sawau fedacde, imoc gerecngo dzedarude.

<sup>8</sup> Songo tosofocna, ngeni ine wiac mocgu yomocac mi nigecngunubeso, Kebuac negen negennu uameme mocgu imoc kifa wan tauseng, ifi isoc. Nga kifa wan tauseng, imoc uameme mocgu, ifi isoc.

<sup>9</sup> Kebungo haudaec deecmoc, ye dafi amma tondzera ande, ngic goango ifi deandae. Nga ifi kpac, imoc ine yofiac, ngicngac ngeni hofeu kemegecdeac songea mi angkecde. Ngeni ubamereng anggecdeac ye modzotitia kpac naso ngenmema tomaingina kecde. <sup>10</sup> Nga Kebuac hahanaso, imoc hamangec ngicngo haandae, ifi isoc haude. Naso imohai sawau wiac sasawa fedacde, imoc gerecngo yonohodarude nga sawango udumengtoagoc aockema kpac andarude. Amma bangec nga wiac sasawa maringo memea imocac witiau fede, imoc monggoc mi feude.

<sup>11-12</sup> Ifi anu wiac sasawa sawau fekendacde, imoc gerecngo yonohodaru sisingaima gagubang amma kpac andarude. Imocac amma ngeni kekecngina garenggema kpetiac kecma Anutuac yoac hoanggema eweheimima kecbisia. Ifi kecmagec yeac nasotoa haudeac singa mema imocac tomal kecbisia. <sup>13</sup> Anu bangec nga sawa gboria, imohai faka nga angammeme dindingac feude, imoc ngade fingerudeac deec, nenang imocac tomal kecdimbe.

<sup>14</sup> Songo tosofocna, ngeni imocac tomal kecma Anutuaru hama yegoc ruaeu uba mocgu kegcdeac ngeni kpetiac nga kongaha kekecac tembuc tembuc ngombongemema kembisia. <sup>15</sup> Nga ngeni komoc kpegecdeac Kebuninango modzotitia kpac uaya mekecde, ngeni imoc negensibisia. Nga negen negentegec imoc Anutungo songo tosonina Pauro miec, ye imoc modacma yoac imocnoc negensima kibi ohongemmu osogec. <sup>16</sup> Nga yeng kibi sasawa ohoec, imohai yoac yoc ohongemmeduae, imoc momoc dekperagiande. Amma yoac goa ohoec, imoc ngicngac goango negentegecgecdeac siriha kpac. Nga ngicngac goa mitiu mi heiserima negen negentegecngina kpac kecdae, yeneng yoac imoc mereng kpereng dema kecdae, imoc yeni yenaoc memanganemema kpac anggecde. Amma mitikibiu yoac fede, yeni imoc momoc mereng kpereng deandae.

<sup>17</sup> Songo tosofocna, ngeni imoc bic negendae, imocac singyoac kpeandae, yeneng wangecngunugec tiposockema mangunubacac ngeni garengemema kecbisia. <sup>18</sup> Nga ngeni Kebu memengerecnina Yesu Kristo yeac danggunuc nga negen negengtoa imohai yadiseri ambisia. Ye yaguc nga nasoya kpac dengerebesonga, imoc fora.

## Yohaneac Kibi 1

<sup>1</sup> Bicngoc bicngoc yombong hanac hanaheaunacngoc kefec, neni ye kedzacininango negemma kicinango siriha nga fakaya hemma marininango kpesereing. Kekecac Yoac, ngic yenoc dekperagidimbe. <sup>2</sup> Kecec imocnoc fingctegeru hemma kekecseri mingina yeac hepuc amma dekperagima edengunudimbe. Yeng warac Manggacgoc kefecngo nenannu fingerec. <sup>3</sup> Neni wiac hennegeng aning, imoc ngeneng nenigoc urec kecec kecnideac dekperagidimbe. Nga urec kecec, imocngo Manggac nga Medaha Yesu Kristo, yerigoc fede. <sup>4</sup> Sogac sogaininango hafoangoc fingerudeac yoac yomoc ohonggemmedimbe.

<sup>5</sup> Neni yearunac yoac yomoc negemma ngenearu yofi dekperagidimbe, Anutu ye kperagi nga yearu kundung mong mi fede. <sup>6</sup> Nga yegoc urec kecdimbe dema kundungac fakaungoc kecnideu nenang ikoc amma faka fora mi modacnide. <sup>7</sup> Ye kperagiau kecede, ifi isoc nenang kperagiau kecnideu, ureckekec kecnide. Ifi kecmi medaha Yesuac sacngo kopocsicnina sasawa dzuacnemmekefude.

<sup>8</sup> Nga kopocsicgoc mi kecdimbe denideu nenang ikocfu wangecemeni yoac forango ubahereninau mi feude. <sup>9</sup> Nga kopocsicnina deficgenideu Anutu faka dindingac mekedengo yoac dedea modacma kopocsicnina wanemema mangananina sasawa dzuarude. <sup>10</sup> Nga nenang kopocsic mong mi meing denideu Anutu ye ikocngic demini yeac yoacngo ubahereninau mong mi feude.

## 2

<sup>1</sup> Nambaracfozna, ngeni kopocsic mi megecdeac kibi yomoc ohonggemmeduae. Nga mongngo kopocsic meficgeudeu nenang memefic yoacdede mong kecede, imoc Yesu Kristo. Ye ngic dindingacngo Manggacac kicfu agennina tikecede. <sup>2</sup> Ye nenang kopocsicac amma yengena sacfusiango bunnina bic meec. Amma nenangsac kpac, ngicngac bangectoa bangec yomohai kecdac, yeneac momoc.

<sup>3</sup> Anu nenang Anutuac singyoac modacnide, imocngo ye negemmima negentegecnide. <sup>4</sup> Ngic mong ye Anutu negemmiduae dema yeac singyoac mi modacande, yeng ikocngic nga yeac ubahereau yoac fora mong mi fede. <sup>5</sup> Nga mong ye Anutuac yoac mekefude, yeac heresongongo ubahereau hafoangoc fingerude. Sing imohainoc Anutuac hereu kecdimbe, imoc negentegecnide. <sup>6</sup> Nga mong ye Anutugoc kecduae deande, yeng Yesungo kefec, ifi isoc kecbeso.

<sup>7</sup> Songo tosofocna, ni singyoac gboria mong mi ohonggemmeduae, kpac. Ngeni yoac esea warac hanac hanaheaunacngoc negemma mekecgec, imocngoc monggoc ohonggemmeduae. Ngeni yoac warac negengec, imocngoc singyoac esea ande. <sup>8</sup> Kundung meickemanu kperagi fora bic fingctegecdeac amma singyoac yomoc gboria monggoc ohonggemmeduae. Imocngo Kebuaru nga ngenearu fora ande.

<sup>9</sup> Anu ngic mong ye kperagiau kecduae dema ogea ubango ukuude, ye kundunnu kecdengoc. <sup>10</sup> Nga mong ye heregoc ogeaac songo negengande, yeng kperagiau kefu ubahereau wiac mongngo fuseu mi makpeude. <sup>11</sup> Nga mong ye ogea ubango ukuude, yeng ine kundung manau kengkefude. Nga kundungngo kiwa mekundungkpeu ye sing dahai kende, imoc mi negenude.

<sup>12</sup> Nambaracfozna Anutungo Yesuac kpacac amma kopocsicngina waec, imocac kibi yoc ohongemmeduae.

<sup>13</sup> Hanac hanaheaunacngoc kefec nga kecede, manggac ngeni ye bic negem-migecac amma kibi yomoc ohongemmeduae.

Nga sebighori ngic, ngeni mangana mingina bic ferahegecac amma kibi yomoc ohongemmeduae.

<sup>14</sup> Naroangmedac, ngeni Anutu Manggac bic negemmigecac kibi yomoc ohongemmeduae.

Hanac hanaheaunacngoc kefec nga kecede, manggac ngeni ye bic negem-migecac amma kibi yomoc ohongemmeduae.

Sebigbori ngic, ngeni kucnginagoc nga Anutuac yoacngo ngenearu feu mangana mingina bic ferahegecac kibi yoc ohongemmeduae.

<sup>15-16</sup> Ngeni bangectoa bangec yomocac kecec nga bangecfu wiac sasawa fede, imocac songo mi negembisia. Imoc yofiac, wiac sasawa bangectoa bangec yomohai, imocac songo yofi fede, sebiac songogoc kecec nga kickerecgc kecec amma bangectoa bangec yomocac finacac amma kpac kunenggc kecec, imocngo Manggacarunac kpac, imoc bangectoa bangec yomohacnac. Nga ngic me ngac mong ye bangectoa bangec yomocac songo mekefude, yeac ubahereau Manggacac heresongo mi fede. <sup>17</sup> Anu bangectoa bangec nga imocac songofaka, imoc kecma kpac andarude nga ngic mong ye Anutuac enac tofohoande, yeng kechereema kefude.

<sup>18</sup> Nambaracfozna, naso yomoc wisickebeso ande. Nga Yesuac ngabayombong haudeac degec negenggec, ifia homac bic fingectegecgec kecdaeac amma naso wisickebeso ande, imoc negentegecdimbe. <sup>19</sup> Yeni nenanggoc kecgoc nga sifu nenang arenunac kpac. Yeni nenannunac ambau dede nenanggoc kecbau. Yeni sasawa nenanggarunac kpac, imoc didiu fingectegec, ifi fingerec.

<sup>20</sup> Kpetiac minginango Asuac dzimbongngo nadzicngemmeu ngeni sawawango yoac fora negendacdae. <sup>21</sup> Ngeni yoac fora mi negentegecdaeac amma ngenearu kibi ohoai isoc kpac. Ngeni yoac fora negendae nga ikoc mong yoac foranac mi hakecede, imoc negentegecdaeac amma kibi yomoc ohongemmeduae.

<sup>22</sup> Yesungo kopocsicac witicfunac mesinunuudeac maec, ngic mongngo imoc busic kpeude, ye ikocngic anude. Nga mong ye Manggac nga Medac yereac busic kpeude, yennoc Yesuac ngabayombong anude. <sup>23</sup> Ngic mong ye Medac busickpede, ye ifingoc Manggac mi hoanggeude. Nga Medac dekperagima hoanggeande, yeng Manggac ifingoc hoanggeude.

<sup>24</sup> Ngeni yoac hanahema negenggec, imocngo ngeneac hereu fekecbeso. Ngeni ifi anggedeu Medac nga Manggac yereac heremanau kecgcede. <sup>25</sup> Medac ye yengenaoc kekecserinoc nemmeudeac deserinemmeec. <sup>26</sup> Ngic goa yeneng ikocfu wangecngunubauac kibi yomoc ohongemmeduae.

<sup>27</sup> Ngeni Tiri Asuac dzimbong warac megec, imocngo ubaanganginau feu ngeni kpoukpou monggac mi obohogecde. Yeac dzimbong imocngo ine wiac sasawa kpoungemmekecede. Nga yeng yoac kpoungemme, imoc fora yombong, imoc ikoc kpac. Ngeni sing imohaingoc yeac hereu kecbisia. <sup>28</sup> Nambaracfozna negenggec, Kebungo fingectegeru neni hahana-soyau yeac kicfu gamea kpac serima nannideac ngeni yeac heremanau kecbisia. <sup>29</sup> Yesu ye kongaha, ngeni ifi negengandaeu ngic mong ye faka dindingac mekecede, yeac ifingoc negemma yofi negenggecde, ngic imocngo Kebuarunac fingec fingera.

## 3

<sup>1</sup> Negenggec, Manggac ye nenanggac noc isoc ammiecac songogoc hoanunuma yengena nambaracfora denecdenemmea. Nga nenannoc nambaracfora kecdimbe. Anu bangectoa bangecac ngicngac yeni Manggac mi negemmidaeac nenang ifingoc mi negennunugecde. <sup>2</sup> Songo tosofocna, nenang yaguc Anutuac nambaracfora kecdimbe. Kecma dafi ambesandimbe, imocac mi dekperaginemmeu negendimbe. Kecma yeng fingectegeru yengenangoc hennide imocac yeac siric isoc amma yengena onga annide, imoc ine negendimbe. <sup>3</sup> Ngicngac Yesugoc kpeketahema wiac gombunga fingerudeac negensinggema kecdae, yeni sasawango kekecngina dzuacemema ye kpetiac, ifi isoc kpetiac anggecde.

<sup>4</sup> Anu kopocsicngo dedeseri kpekepfaka andeac amma ngicngac kopocsic meficgeandae, yeni dedeseriyoac kpegecde. <sup>5</sup> Yesungo kopocsicnina meickeudeac fingerec. Amma yearu kopocsic mong mi fede, ngeni imoc negendae. <sup>6</sup> Nga ngicngac yeac heremanau kecdae, yeneng kopocsic mi mekegecde. Anu ngicngac kopocsicngoc kecdae, yeni ine ye mi henggec nga ye mi negemmigec.

<sup>7</sup> Nambaracfocna, ngic mongngo ikocfu wangecngunuu ngeni ye mi modacbisia. Ngic mong ye faka dindingac angkecde, yeng Yesu isoc dindingac anude. <sup>8</sup> Mangana minginango hanac hanaheaunacngoc kopocsic meficgeecac ngic mong ye kopocsic mekecde, yenoc mangana mingina yearunac. Anu Anutuac Medacngo mangana minginaac uaareng memanganu kpac anudeac amma fingerec. <sup>9</sup> Ngicngac Anutuarunac fingecgec, yeni kopocsic mong mi mekecdae, kpac. Anutuac kpeango yeneac heremanau fedae kopocsic megecdeac obohogece. <sup>10</sup> Anu ngicngac faka dindingac mi mekecdae me tosofocngina heregoc yeneac songo mi negengandae, yeni sasawa Anutuarunac kpac. Imohainoc Anutuac nambarac damoc nga mangana minginaac nambarac damoc, imoc fingectegerude.

<sup>11</sup> Ngeni hanac hanaheaunacngoc dedekperagi yofi negenggec, nenang songogoc hoangemebisina. <sup>12</sup> Ngeni Kaing isoc mi ambisia. Ye Satangno minging ammiu munea kpehomeec. Amma ye yengena anammemea mangana femiec nga muneaac angammemengo dindingac aneac munea kpehomeec. <sup>13</sup> Negen negensinggoc tosofocna, bangectoa bangec yomocac ngicngac yeneng ubango ukungunugecde nga wiac imoc faka gboria, ngeni ifi mi negembisia. <sup>14</sup> Nenang tosofocnina heresongogoc hoangyunuandimbeac amma homec wama ferecgema kekecfu ening, imoc negendimbe. Nga ngic me ngac mong ye heresongogoc kekec mi negende, ye homecfungoc kefude. <sup>15</sup> Anu ngicngac tosofocngina ubango ukuyunuandae, yeni sasawa ngickpekpe andae. Nga ngic ifia yeneac hereu kekecseri mi fede, imoc negendae.

<sup>16</sup> Yesu Kristongo nenanggac amma kekeha waec. Nga faka imoc hemma songogoc kekec foraac negen negeng meing. Imocac nenang ifingoc negen negensinggoc tosofocninaac amma kekecnina wabisina. <sup>17</sup> Ngic mongngo bangectoa bangec yomocac finacgoc kecma ogea henu sebiaac memeficfu makpekpea kefu ubahereau wosoefacgoc mi meficgeudeu Anutuac heresongongo yeac hereu mi feude.

<sup>18</sup> Nambaracfocna, "Nenang heregoc songo negengemeeme." Imoc enacbicngoc me yoacac mi debisina, kpac. Nenang imoc faka foragoc yombong angkecbisina. <sup>19-20</sup> Ifi amma yoac foraac arennu kecdimbe, imoc

negendimbe. Anu ubahereninango wiac monggac yoacfu fainunuu Anutuac kicfu monggoc meseriemende. Anutu ye engenatoa nga ye nenang ubahereu wiac sasawa fede, imoc negendacde. Amma Anutungo nenang ubahere ferahede.

<sup>21</sup> Songo tosofocna, ubahereninango yoacfu mi fainunuudeu Anutugoc seria kecnide. <sup>22</sup> Ifi kecma nenang singyoara modacma yeac songou wiac sasawa fede, imoc angkecdimbeac wiac mong me monggac Anutuarunac kpesima menide. <sup>23</sup> Nenang Medaha Yesu Kristoac kpac negensinggema yeng edenunuec, ifi isoc heresongogoc hoangemebisina. Yeng singyoac imocnoc nemmeec. <sup>24</sup> Ngic mong ye singyoac yomoc modarude, yeng Anutuac hereu kefu Anutungo yeac hereu kefude. Amma yeng hereninau kecde, imoc Anutungo Asuya nemmeec, yeac kufu negendimbe.

#### 4

<sup>1</sup> Songo tosofocna, profete ikoha homacngo bangectoa bangec yomohai kemma kecdaeac amma ngeni asu sasawa mi negensingyunubisia. Ngeni hengising amma asu imoc Anutuarunac me kpac, imocac hentegecbisia. <sup>2</sup> Ngeni Anutuac Asu yofiu hensigece, Asu sasawang Yesu Kristoango ngic siricfu fingerec, imoc deficgegecde, yeni Anutuarunac. <sup>3</sup> Nga asu sasawang Yesuac ifi mi deficgegecde, yeni ine Anutuarunac kpac. Asu imocngo Yesu Kristoac ngabayombong anude. Yeng haudeac degec negenggec, imoc bic bangectoa bangec yomohai fingecma kecde.

<sup>4</sup> Nambaracfozna, ngeni Anutuarunac. Nocac Asu ngeneac hereu tacde, yeac kucngo bangectoa bangec yomocac asu ferahede, imocac amma ngeni profete ikoha bic feracyunuec. <sup>5</sup> Yeni bangectoa bangec yomohanac. Imocac yeni bangectoa bangec yomocac negen negeng mekecma yoac degec bangectoa bangec yomocac ngicngac yeneng yenearu kedzac faigece. <sup>6</sup> Nenang Anutuarunac, imocac ngicngac Anutu negemmidae, yeneng nenang yoac negenggecde. Amma mong Anutuarunac kpac, yeng ine nenang yoac mi negenude. Imohainoc nenang yoac foraac Asu nga asu ikoha hentegecnide.

<sup>7</sup> Songo tosofocna, nenang heresongogoc hoangemebisina. Heresongogoc hoangeme kecec, imoc Anutuarunac, imocac heresongogoc hoangemema kecbisina. Nga ngicngac ogofocngina heresongogoc hoangyunuandae, yeneng Anutuarunac fingecgec amma yeni Anutu negendae. <sup>8</sup> Anutungo heresongogoc kekecac hania, imocac ngic mong ye ngicngac ogofora heresongogoc mi hoangyunuande, ye Anutu mi negende. <sup>9</sup> Nga Anutungo Medaha mocgu, yearu kekecseri menideac sueu bangectoa bangec yomohai maec. Sing imahainoc Anutungo heresongogoc hoannunuu songea nenannu fingectegerec. <sup>10</sup> Nenang hanahema Anutu heresongogoc mi hoangeing, kpac. Yeng ine nenang heresongogoc hoannunuma Medaha kopocsicninaac turung sacfusiango kpouudeac sueu maec. Imocngo songoac hania ande. <sup>11</sup> Songo tosofocna, Anutungo heresongogoc ifi hoannunuecac nenang ifingoc heresongogoc hoangemebisina. <sup>12</sup> Ngic mongngo Anutu mi henec. Nga nenang heresongogoc hoangemekecdimbeu Anutungo nenang hereu kefu yeac heresongogoc kececngo nenannu hafoangoc bic fingectegerec.

<sup>13</sup> Anu ye yengena Asuya nemmeecac amma yofi negendimbe, nenang yeac heremanau kecni yeng nenang heremanau ifingoc kefude. <sup>14</sup> Manggacngo ngicngac bangectoa bangec yomocac ebicfunac

mesiyunuudeac Medaha faiu maec. Neni imoc hemma hepuc amma dekperagikecdimbe. <sup>15</sup> Ngic mong ye yofi dema deficgeude, “Yesu ye Anutuac Medac” Anutungo yeac hereu kefu yeng Anutuac hereu kefude. <sup>16</sup> Nga Anutungo heresongogoc hoannunukecde, imoc negentegecma negensinggedimbe.

Anutu ye heresongogoc kekecac hania nga ngic mong ye ngicngac ogofora heresongogoc hoangyunukecde, yeng Anutuac hereu kefu Anutungo yeac hereu kefude. <sup>17</sup> Ifi kecmina heresongogoc kekecngo nenannu hafoangogoc feude. Feu desidesi nasou nenang negengyohoha kpac serima nan-nide. Nga nenang bangectoa bangec yomohai Yesuac onga isoc kecdimbe. <sup>18</sup> Kengecgoc kekec, imoc memetingagoc. Nga ngic mong kengecgoc kefudeu heresongogoc kekecngo yearu hafoangoc mi fingectegerude. Imoc yofiac, kengecngo heresongogoc kekec, imocac manau naric mi feude. Imocac amma heresongogoc kekecngo hafoangoc fede, imocngo kengec kporarude.

<sup>19</sup> Anutungo hanahemangoc nenang heresongogoc hoannunuec, imocac amma heresongogoc kecdimbe. <sup>20</sup> Nga ngic mong Anutuac songo negenduae, ifi dema ogea ubango ukuude, ye ikocngic. Ngic mong ye tosea kicngo hehena, ye heresongogoc mong mi hoanggeudeu ye Anutu kicngo mi hehena, yeac songo naric mi negenude. <sup>21</sup> Kebungo singyoac yofi nemmeec, ngic mong Anutuac songo negende, yeng ifingoc tosoya heresongogoc hoanggebeso.

## 5

<sup>1</sup> Yesungo ebicfunac mesinunuudeac maec, ngicngac ifi negensinggedae, yeneng Anutuarunac fingecgec. Nga ngicngac Manggacac songo heregoc negendae, yeni Medacyombonga yeac songo ifingoc negenggedce. <sup>2</sup> Imocac sirihaus nenang heregoc Anutuac songo negemma singyoara tofohonideu Anutuac nambaracfora yeneac anemmeude, imoc negendimbe. <sup>3</sup> Nenang Anutuac singyoac tofohoma yeac songo heregoc negengyombonggenide. Nga yeac singyoac imoc ebira kpac.

<sup>4</sup> Ngicngac Anutuarunac fingec fingera, yeni sasawango firang amma bangectoa bangec yomocac kuc ferahegedce. Nga nenang negen negensinninangonoc firang amma bangectoa bangecac kuc sasawa feraheude. <sup>5</sup> Merang firang amma bangectoa bangecac kuc ferahaude? Yesu ye Anutuac Medac nga ngic me ngac mong imoc negensinggede, yeng bangectoa bangecac kuc ferahaude.

<sup>6</sup> Yesu Kristongo dokuu nga sacfu haec. Ye dokuusac mi haec, kpac. Ye dokuu nga sacfu momcngoc haec. Amma Asu ye yocac foraac Asu, imocac amma yeng Yesuac hepuc amma ye dekperagiude. <sup>7</sup> Wiac harebec yeneng Yesuac hepuc amma ye dekperagikecdae. <sup>8</sup> Imoc Asu nga doku amma sac, yeni uba mocgu amma yeac hepuc angkecdae. <sup>9</sup> Ngic yeni ogonginaac hepuc anggeg yoacngina hoanggedimbe. Ifi annideu yofi negembisina, Anutungo wiac mong nanggeudeu imocngo engena ande. Amma ye medaha nanggema yeac hepuc ande. <sup>10</sup> Ngic mong ye Medaha negensinggede, ye hereango yofi dekperagide, “Yesu ye Anutuac Medac.” Nga mong ye Anutungo Medahaac yocac hepuc amma dekperagiuec, imoc mi negensinggeudeu, yeng Anutu ye ikocngic, ifi demiude. <sup>11</sup> Nga dedekperagia yomocngo hepucnina ande, Anutungo kekec wisic wisickea kpac nemmeec nga kekec imocngo Medahaaru fede. <sup>12</sup> Ngic mong ye Medac hoanggeude,

yeng kekec foragoc kefude. Nga mong ye Anutuac Medac mi hoanggeude, ye ine kekec foragoc mi anude.

<sup>13</sup> Ngicngac Anutu Medahaac kpac negensinggedae, yeneng kekecserigoc kegecde, ngeni imoc negentegecgecdeac kibi yomoc ohongemmeduae.

<sup>14</sup> Anu nenang yofi negentegecma negensinggedimbe, wiac monggac numbeso dema yengena songo modacma kpesimini imoc negennemmeude.

<sup>15</sup> Nga nenang wiac mong me monggac numuni yeng negennemmeu wiac imoc bic meing dema yeac ifi negendimbe.

<sup>16</sup> Ngic mongngo kopocsic mong homecac sinnu mi kende, ifia meficgeu tosoyango imoc hemma yeac numuudeu Anutungo kopocsicmeme ye kekec miude. Nga kopocsic goango homecfu kengkengac sinnu fede, kopocsic ifiaac numugecdeac ine mi deduae. <sup>17</sup> Mangana sasawa imoc kopocsic nga kopocsic goa imocngo ngic homecfu mi faiyunuude.

<sup>18</sup> Nenang yofi negendimbe, ngicngac Anutuarunac fingec fingera, yeni sasawango kopocsic mi megecde. Nga yengena Medahango habangyunuu mangana minginango naric mi memanganeyunuude. <sup>19</sup> Anu nenang Anutuac nambaracfora kecdimbe, imoc negentegecdimbe. Nga bangectoa bangec yomoc mangana minginaac kucac bageu fede. <sup>20</sup> Anu nenang yoac fora Mingina negemminideac Medahango hama negen negentegec nemmec, imoc negendimbe. Amma Anutu yoac fora mingina, yeac heremanau nga Medaha Yesu Kristo, yeac heremanau momoc kecdimbe. Yennoc Anutu fora amma kekecseri. <sup>21</sup> Nambaracfocna, ngeni nemu yeneac hoannu mi kenggecdeac garengemebisia.



## Yohaneac Kibi 2

<sup>1</sup> Nenggac meising isingguya, ge nga nambaracfocga ngenearu yadanganango kibi yomoc ohongemmeduae. Ni yocac foraac amma ngeneac heresongo negenduae. Nga nisac kpac, ngicngac sasawa yocac fora negendae, yeneng ifingoc heregoc ngeneac songo negendae. <sup>2</sup> Nga heresongo imocngo yocac foraac amma nenang hereu fema nasosoc nenanggoc fekengkefude.

<sup>3</sup> Anutu Manggac nga Medacyombonga Yesu Kristo, yereac danggunuc nga wosoefac amma ruae, imocngo yocac forau nga songogoc kekecngo nenanggoc febeso.

<sup>4</sup> Nambaracfocga goa yeni yocac fora Manggacngo denemmeu meing, imocac enac tofoc tofoho kecdae, ni yocac imoc negemma ubangerecdoa negenduae. <sup>5</sup> Nga nenggac, ngeni neac yocac yomoc modacgecdeac ohongemema desambic angemmeduaeac negemma imoc modacbisia. Nenang heresongogoc hoangemebisina, imocngo singyoac gboria kpac. Imocnoc hanahema modacereing. <sup>6</sup> Nga Anutuac singyoac modacerekecni imocngo songoac hania. Nga ngeni singyoac hanac hanaheaunacngoc negenggec, imoc yofi, ngeni heresongogoc hoangemema kecbisia.

<sup>7</sup> Anu uba mesufungic homacngo bangectoa bangec yomohai kemma kecandae, yeni Yesu Kristo ngic siricfu fingerec, imoc mi negensinggema ye busic kpeandae. Yesuac ngabayombong, ye uba mesufungic amma ye siriha ifia. <sup>8</sup> Ngeni imocac burengina gombunga meemebisia. Wiac megecdeac uatoa meing, imocngo wangunubacac garengemekecma bungngina hafoangoc mebisia. <sup>9</sup> Netoc netohongic kecma Yesu Kristoac kpoukpou yocac sing feraheandae, yeni Anutua kpac kecdae. Nga mongngo kpoukpou yoara seria mekefu Manggac nga Medac yeri yerahafocngoc yegoc kecdape. <sup>10</sup> Nga ngic mongngo kpoukpou yoara siriha imocngoc mi mehaudeu ngeni ine yegoc mari meme faka mi ambisia nga ngeni amanginau mi heitaibisia. <sup>11</sup> Ngic mong ye ngic ifia yegoc mari meme faka anudeu, ye ngic imocac ua mangana, imoc emema mekefecde.

<sup>12</sup> Nearu yocac yofia ohongemmeduaeac homac fenende, anu kibiuh ohoa mi ngereude. Imocac amma ubangerecna hafaogoc fingerudeac neanaoc haba ewacma enacfu denegeng annideac negensiduae.

<sup>13</sup> Naingga meising isinggea, yeac nambaracfora yeneng ubangerecngina ngenearu faigec hade.

## Yohaneac Kibi 3

<sup>1</sup> Gaio songo tosona, ni yadangingango yoac forau geac songo negemma kibi yomoc ohogenduae.

<sup>2</sup> Songo tosona, ge ubaongagango ebiha kpac nga wiacga sasawa ifin-goc naric anudeac nga hafeia kpac kecnadeac numuanduae. <sup>3</sup> Ge faka fora nga yoac fora mekecma imoc gombunga tofohoannec, geac dedekper-agi imoc tosofocnira yengeng hama degec negemba ngereyombonggeec.

<sup>4</sup> Nambaracfozna yoac forau kecdae, imoc negemba ubangerecnango wiac sasawa ferahede.

<sup>5</sup> Songo tosona, fakaga gombunga imoc mi wanec amma nenang areng-focnina nga hereaunac hakecdae, yeni momoc meficyunuannecc. <sup>6</sup> Amma ge heregoc yeneac songo negemma meficyunuannecc, ngic yengeng dedekper-agi imoc kpebung yeneac kicfu degec negening. Nga yeni monggoc kenggecdeac anggec geng Anutu songoyaac sirihau ayemmema singgac memefic goa yemmema sueyununa ngereeu. <sup>7</sup> Yeni Yesuac kpacac amma ua mekenggec, imohai bangec monnunac ngicngac yeneacunac memefic mong mi megec. <sup>8</sup> Imocac yoac foraac ua nenahafoc menideac sing, imoc fingerudeac ngic ifianoc ubangerecac memefic yemmebisina.

<sup>9</sup> Ni kpebung ngenearu kibi mong ohongemgeai. Nga Diotrefe ye yenge-naoc enara kecbeso ammade, yeng ine wanunuma mi hoannunude. <sup>10</sup> Nga neng kecma ngenearu habade isoc, yeng faka angkecde, imoc didiu dekpesi ammibade. Nga ye neneac dedengbarangyoac sicsauc dema faka mangana ifia angande, imocngo mi hetuckeu arengfocnina ifingoc ama mi heiyem-meande. Nga yeni arengfocnina ama heiyemmebeso degec yeng kpetarima kpebung ngadeau faiyunuande, imocnoc dekperagibade.

<sup>11</sup> Songo tosona, geng ine faka mangana ifia mi modabesena, kpac. Ge faka gombunga modabesena. Nga ngic mong ye faka gombunga angkecde, yeng Anutuarunac nga faka mangana angkecde, ye ine Anutu mong mi henec. <sup>12</sup> Ngic sasawa yeni Demetrioac fakaya gombunga deandae nga yoac forango ifingoc ye dekperagikecde. Neni ifingoc yeac hepuc amma den-gerekecdimbe nga nenang dedekperagi imocngo fora ande, imoc negennecc.

<sup>13</sup> Nearu yoac ohogembadeac homac fenende nga imoc kibiuhogemba mi ngereeu. <sup>14</sup> Ni wegananecc gearu haba gegoc ewacma enacfu denegeng andedeac negensiduae. <sup>15</sup> Wosonomangngo gegoc febeso. Tosofocngina yei kecdae, yengeng gearu ubangerecyoac faigendae. Nga geng tosofocnina kpacnginasoc ubangerecyoac tahockema yenearu dekembesena.

## Yudaac Kibi

<sup>1</sup> Ni Yuda, Yesu Kristoac wanaengic nga Yakoboac munea. Anutu Manggacngo ngicngac kpacngunuma heresongogoc hoangngunuande, ngeni seria nanggecdeac Yesu Kristongo garengngunuma kecde, ngenearu kibi yomoc hade. <sup>2</sup> Anutuac wosoefac nga ruae amma heresongogoc kekec imocngo ngenearu sahema kembeso.

<sup>3-4</sup> Songo tosofocna, Anutungo nenahafoc komoc kpenideac mengerenunuec, imocac yoac kibiuhongemmedeac efaiyombonggeai. Nga yoac imoc wama ngic goa botucnginau sufuu bic eregec kecedaengoc, yeneac amma yoac mong ohobeso negenduae. Imoc yofi, ngeni sing dafi Anutu negensinggecdeac yeng warac nenang kpetiac areng nemmedarec, imocac dzikac seriangoc kpebisia amma ngeni imoc mi wagecdeac gorongina kpeduae.

Ngic imoc yeneac negemma warac mitikibiuh yofi oho ohoya fede, "Anutungo fakangina isinggema desiu kopocsicac turunga fingecyemmeude." Yeneng bangecac faka hoanggema Anutuninaac danggunuc nga wosoefac faka mereng kpereng dema sebinginaac negensongo amma manganaac kpaemong mi heiandae. Nga yeni Kunennina nga Kebunina Yesu Kristoac negenggec mamea anu busic kpeandae.

<sup>5</sup> Anu ngeni yomoc bic negenggec nga monggoc heigboringemmedeac negenduae. Kebungo hanahema ngicngacfora Aigita bangecac ebicfunac mesiyunuu haged amma ngade ngicngac mi negensinggec, yeni kpebucyunuu homedacgec. <sup>6</sup> Nga angero goa yeni kuneng tatacngina imocac negenggec engena mi anu amayombongngina wama magec. Magec Anutungo seng seria wisic wisickea kpac, imocngo wicityunuma kundung seria manau faiyunuu desi desi nasotoaac tomakcedae. <sup>7</sup> Yeneng warac Sodong nga Gomora ngicngac amma guruama yereac wegenacfu tackenec, yeneng faka angandae, ifi isoc anggec. Yeni kaiseru amma sebinginaac songo sicsauc modacgec.\* Sodong nga Gomora ngicngac, yeni gerecfu yonohoec, yeneng gerec wisic wisickea kpac imocac ongea andae amma ihai yaguc kecma kopocsicnginaac turung mekecedaengoc.

<sup>8</sup> Amma gaukpefing sicsauc deandae, yeni imoc negemmaguc sebingina sifu memanganegec wonongagoc angande. Yeni kuc engena hania, imoc ubango wama asu engena kecdacdae, yeni eyemmema desusuc angande. <sup>9</sup> Nga Mikae ye angero yeneac enara mong kecde, yeng mangana minginagoc Moseac farenggac amma ewema yoacngira engemmama anec. Anu ye kengec amma mangana mingina emmima desusuc ammima ebicfu faibesonga yoac mong mi deec, kpac. Ye yofisac deec, "Kebungo geac yoac desibeso." <sup>10</sup> Anu ngic deduaemoc, yeni yamberec isoc negen negengngina kpac kecma wiac monggac hania mi negendae. Yeneng asu engena siricngina mi negentegecma eyemmema desusuc angandae. Amma wiac ubasebinginau negendae, imoc modacma yenaoc memanganemegecde.

<sup>11</sup> Yeni Kainggac sing modacma hiedzongina fingerudeac Bireanggac sicsauc faka imocngo wangecyunuu yeni sing imoc bic kenggec. Amma Korango yoackepke anec, ifi isoc yeni bic yoackepke anggec, imocngo ebiriangoc memanganeyunuec. Imocac yeni sowecnginagoc. <sup>12</sup> Ngeni yaka

\* 1:7: Fingec fingec 18:16-19:29; Sesememe 18:22-23; Roma 1:24-28.

songogoc urecfu neandae, yeni botucnginau seuc heima gamengina kpac, yenaoc garengemegecde. Amma yeni wenacac hoeng kiaya kpac firangngo ffrangyunu kengandae, ifi isoc andae. Amma yeni ic goa foranasou fora kpac imoc kpefuckema ukugecde, ifi isoc andae. Ngic imoc yeni homec yohockang bic homegec. <sup>13</sup> Nga tembong kuneng kpema sofororoc seuhagoc mehaande, yeni ifi isoc gamengina ifi kpakegecde. Yeni asomeng sing segedae, ifi isoc kecdae. Nga yeneac ama kundung dzapac wisic wisickea kpac faifaia fede.

<sup>14</sup> Anu Enoko ye Adanggac fingecsahe yenearunac andenga sewennu fingerec, yeng yeneac profeteyoac yofi deec, “Henggec, Anutungo kpetiac arengfora teng tauseng nga dafiguc meyunuu hama <sup>15</sup> ngicngac sasawa angammenginaac sirihaui isingyunuma desiyunuude. Nga ngicngac sasawa bangecac faka hania hania mekecma kopocsic meficgema Anutuaru ngabayoac dema yoac kpekpe kecgec, yeni imocac turunga megecde.”†

<sup>16</sup> Yeni yoac homac osoma negeung nga ubakpekpe amma ubasebinginaac songo modacandae. Ifi modacma ngicngac yeni gombunga ayem-megecdeac, yeni sebingina meemma dekerec ayemmeandae.

<sup>17</sup> Songo tosofocna, Kebunina Yesu Kristoac aposoro yeneng wiac fingerudeac warac degec, ngeni imoc negenggec febeso. <sup>18</sup> Yoac yofi edengunugec, “Naso wisic wisickeau desusuicngic hania hania kecgecde, yeneng bangecac wiacsac negensima yenang ubasebiac songo modacgecde.” <sup>19</sup> Yenennoc kpebung hendzicyunuma uba eseango garengyunuu Tiri Asugoc mi kecgecde. <sup>20</sup> Anu songo tosofocna, ngeni negen negensingngina kpetiac ande, imoc negemma yadiseri anggecdeac nanggeemebisia. Nga Tiri Asungo ngenearu ua meu ngeni nunumu ua mekecma <sup>21</sup> Anutuac heresongou kecgecdeac ua mekecbisia. Nga ifi kecmagec Kebunina Yesu Kristongo ubamangang angememema kekec wisic wisickea kpac ngemmeudeac tomai kecbisia.

<sup>22</sup> Ngicngac negengyohoc angkecdae, ngeni yeneac ubamangang negemma <sup>23</sup> goa gerecfunac meicyunubisia. Nga yeni uba eseango wambangina meu wonong angande, yeneac ifingoc ubamangang negembisia. Ifi amma yeneac kopocsicac kengecngunuu uba eseac wambangina wonongagoc ngadehebia.

<sup>24</sup> Anutu yengenaoc garengngunuudeac kuc femide, imocac ngeni naric mi mangunuude. Yeng ngeni hesicngunuma yengena kuc nga kibikperagiaac kicfu faingunuu ngeni kopocsicngina kpac sufu sufugoc imohai nanggecde. <sup>25</sup> Memengerecnina Anutu mocgungo kecde. Kebunina Yesu Kristo yeac amma eweheimima dengereni, yeng engenatoanina nga kuc mingina amma wiac sasawa fede, imocac buma ande. Ye wiac mi fingemanu kefec nga yaguc kecde amma kecbesande, imoc fora.

† 1:15: Yoac imoc 1 Enoko 1:9 imohaenac. Kibi imoc mitikibiu mi fede.

## Yesuac Mekperac Kperagi Yohanengo Ohoec

<sup>1</sup> Yoac yomoc Yesu Kristoac memekperagi. Yeac wanac ngicngacfora yeni wiac bic fingerudeac edzacyunubeso imoc Anutungo Yesu miec. Amma angeroya mong sueu yearusing yoara dekperagima wanacngiha ni Yohane, yoac imoc edenuc. <sup>2</sup> Edenuu neng Anutuac yoac nga Yesu Kristoac dedekperagi amma wiac neannaoc hennegeng anai, imoc sasawa mekperagingemduae. <sup>3</sup> Naso wegenedeac mongngo profeteyoac yomoc osonegeng anude, ye kenehagoc. Nga ngicngac yeni yoac yomohai oho ohoya fede, imoc negemma hoanggegede, yeni ifingoc kenecnginagoc.

<sup>4</sup> Ni Yohanengo Asia prowins manau kpebung 7 kecdae, ngeneac kibi yomoc ohoduae. Anutu kefec nga kecdae amma kecma habesande. Ye nga asu 7 yeac ngictau tatacac hoangau kecdae, yenearunac ruae nga danggunuc imocngo ngenigoc febeso. <sup>5</sup> Nga Yesu Kristoarunac ifingoc. Yeng yoac modac modac seria amma ye siducedengic fora. Ye fincema homegec yeneac waracmedac amma bangecac ngictau yeneac kunengngina. Amma ye nenang songo negemma sawango kopocsicninaunac mesinunuec. <sup>6</sup> Mesinunuma eucererengac habu menunuma yegoc arenunuu neni yeac Anutu nga Mamaac kurumengac womong gareng amma kecnide, imocac ifi anec. Yearu kibikperagi nga kuc imoc wisic wisickea kpac fekengkecbeso, imoc fora.

<sup>7</sup> Henggec, ye hoenggoc hau ngicngac sasawa yeneng kicnginango hendacbesandae nga sebiau nenesari ammigeac, yeni kicnginango ye ifingoc henggecde. Nga bangeha bangehaac areng sasawa yeni ye hemma fagung madzagoc kiachesandae. O, imoc fora.

<sup>8</sup> Kebu Anutu ye kefec nga kecdenoc amma kecma habesande, ye Kucseri minginango yofi dede, “Ni neannaoc A nga Y, hanac hanahea nga wisic wisickea.”\*

<sup>9</sup> Ni Yohanengo Anutuac yoacac nga Yesuac dedekperagiac amma Patmos nuclu kefai. Ngeneac dacngina, ngeni nga ni nenahafoc Yesugoc kpeketahema kpendzeng nga eucerereng mekecma modzotitia kpac seria kecdimbe. <sup>10</sup> Kebuac naso kereng monnu Asungo nearu ua meu ngadenau enacadumeng kunengtoa mong trampet udumeng isoc negembare yeng yofi deec, <sup>11</sup> “Ge wiac hennecmoc, imoc kibi ohona. Ohoma kpebung 7 Efeso nga Simirna amma Peagamong nga Tiatira amma Sarde nga Firadefia amma Raodikea, ge kibi imoc yenearu faina kenu.”

<sup>12</sup> Ifi deu udumeng imoc hembadeac dzigeneai. Dzigenema hembra kifa nanangagoc 7 golngo memea nanggec yeneni. <sup>13</sup> Yenembare yeneac bo-  
tufu mongngo Ngicac Medacac siric isoc nanec. *(Danie 7:13)*

Ye ngakpia herea hani usia kpesec kpeserea nga mokuhaul fadeng golngo dzege dzegea feec. <sup>14</sup> Ye orucsira nga orucdzoeya kongac kongac imoc

\* **1:8:** Ye yofi deec, “Ni neannaoc Arafaga nga Omega.” Arafaga imoc grik yoac nonggeaac kibi hanac hanahea nga Omega imoc wisic wisickea. A imoc dedua yoac nonggeaac hanac hanahea nga Y imoc wisic wisickea.

ramadzoeya nga hoeng isoc† amma kiwa imoc gerec borang isoc. <sup>15</sup> Nga aieng sacsac gerecfu ohogec wewengaima feande, ye hania imoc isoc anec. Nga enacudumenga, imoc doku homac yeneac udumeng isoc anec. <sup>16</sup> Ye marifoiau asomeng 7 menanec nga enaraunac wasai beang mana ngadea enaragocngo ereec. Kicmesuya imoc wenackiwa kuhagoc neraranggeande, ifi isoc anec.

<sup>17</sup> Nga ye hemma haniau manuu homemea isoc febare yeng marifoiango witinau faima deec, “Ge mi kengecguu, ni hanac hanahea nga wisic wisickea amma kekecnagoc. <sup>18</sup> Henna, ni homeai nga monggoc gbori kecduae. Nga negenna, ni wisic wisickea kpac kecingkecma homec nga hofe yereac ki mekecduae.

<sup>19</sup> Imocac ge wiac hendang imoc ohona. Ge wiac yaguc fede nga ngade fingerude, imoc momoc ohona. <sup>20</sup> Asomeng 7 marifoianu menandua nga kifa nanangagoc 7 golngo memea hendang, imocac negen negeng sufu sufuya yofi ande, asomeng 7 yeni kpebung 7, yeneac angero. Nga kifa nanangagoc 7 yeni kpebung 7 andae.”

## 2

<sup>1</sup> “Ge Efeso kpebung, yeneac angeroaru kibi yomoc ohoma faina kenu.”\*

“Ngic ye asomeng 7 marifoiau menande nga kifa nanangagoc 7 yeneac botucfu yerecgede, yeng ngeneac yofi dede, <sup>2</sup> Ni geac angammemega nga ua esaga amma seserigoc kecanec, imoc negendacduae. Amma ge ngicngac mangana yeneac mi anggengande, imoc negenduae. Ngic goa yeni yanang-gac aposoro dedae nga aposoro mi andae, ge tobangyununa yeni ikocngic, imoc bic fingectegerec. <sup>3</sup> Ge modzotitia kpac serima kecanec nga kpacnaac amma ebic homac tofohoma kucga mi maec.”

<sup>4</sup> “Nga hanahema heresongogoc hoangyunuma kecne, faka imoc wanec, imoc ine negemba mi ngereede. <sup>5</sup> Ge warac kekecga dafiu wama maguec, imocac negen negeng ua mebesena. Amma ubaga meremma angammemega hanahema dafi angkecne, imoc mebesena. Ifi mi amma ubaga mi merennade isoc ni gearu hama kifaga nanangagoc tatahaunac meickebade. <sup>6</sup> Geac gombangaga ine yofi ande, ge Nikora yeneac angammemengina ubango waannec, neng ifingoc imoc ubango wayai.”

<sup>7</sup> “Kedzahagoc yeng Asungo kpebung yoac edeyunude, imoc negembeso. Nga firang anude, ye kekecac ic Anutuac eucererennu nande, imohacnac fora naric miba neude.”

<sup>8</sup> “Ge Simirna kpebung yeneac angeroaru kibi yomoc ohoma faina kenu,”

“Ngic homema gboriec kecde, ye hanac hanahea nga wisic wisickea, yeng ngeneac yofi dede, <sup>9</sup> Ge kpendzeng kpema kecne nga ge makpekpea, imoc negendacduae. Nga sifu finactoagagoc annec. Yudangic yeni yanang-gac yudangic dema yudangic mi amma Satang-gac kpekpeturang ama andae, yeni deendema anggengandae, ni imoc ifingoc negenduae. <sup>10</sup> Ge kpendzeng kpenadeac kengec mi ambesena. Mangana mingina yeng faitobannu faingunuudeac negemma ngeneanunac goa witicamau faingunuu ngeni uameme 10gac manau ubahodung-goc kecgecde. Goa ngunuhomegecde isoc geng ine yoacdedena modacma seria kecmana kekecac ira gembade.”

† **1:14:** Hania yoacfu hoenggac “Nomang kongac kongac kiac isoc maande.” ifi oho ohoya fede.

\* **2:1:** Grikyoacfusing angero titiha imoc siducedede. Siducedede yoc fede, imoc angero mong me ngic mong imoc mi dekeragide.

11 “Kedzahagoc yeng Asungo kpebung yoac edeyunude, imoc negembeso. Firang anude, ye homec kpetea yohockangngo naric mi memanganeude.”

12 “Ge Pegamong kpebung yeneac angeroaru kibi yomoc ohoma faina kenu.”

“Ngic wasai beang mana ngadea enara santac metacde, yeng ngeneac yofi dede, 13 ‘Satanggac ngictau tataha tacde, ge bangec imohai kecne, imoc negenduae. Amma Satangngo kecde, imohai yeni dedekperagingic nga enactofoc tofohona seria Antipa, ye kpehomegec. Anu ngeneac botucfunac Antipa kpehomegec ge sifu negensinna kpacna seria mekecma kpacnaac busic mi kpenec.’”

14 “Faka goa gearu fede, imoc ine modzona tide. Ngicngac goa gegoc kecandae, yeneng Bireanggac kpoukpou hoanggeandae. Yeng Israe nambarcfora mayunuudeac suba siriha dafi faiude, imoc Barake kpoumiec. Yeni nemuac seseyang nema sero ua megecdeac ifi anec.† 15 Anu goa yeni Nikoraac kpoukpou hoanggeandae, yeneng ifingoc gegoc kecdae. 16 Imocac amma ubaga merembesena. Ifi mi annadeu ni gearu bic yombong hama enacnaac wasai beangngo yunubade.”

17 “Kedzahagoc yeng Asungo kpebung yoac edeyunude, imoc negembeso. Ngic me ngac firang anude, ni ye mannayaka‡ sufufufuya, imohacnac mima hoc mong kongac kongac nga kpac gboria mong ihai oho ohoya fede, imoc mibade. Kpac imoc mongngo mi negemmanu ngic hoc nearunac mede, yengsac negenude.”

18 “Ge Tiatira kpebung yeneac angeroaru kibi yomoc ohoma faina kenu.”

“Anutuac medac ye kiwa gerec borang isoc nga hania aieng sacsac gerec dzema wewengaima feande, kperagia ifia, yeng ngeneac yofi dede, 19 ‘Ni angammemega nga ngicngac songogoc hoangyunukecne, imoc negenduae. Nga negen negensingga nga seserigga kecma enactofoc tofoho angkecne, imoc negendacduae. Amma angammemega wisic wisickeango hanac hanahea monggoc ferahade.’”

20 “Anu ngac kpara Isebe, ye yengenaac profete deande. Ye kpoukpou ua ikocfu mekecma serofaka nga nemuac yang nene, imocac sinnu wanacngicfocna wangecyunuande. Nga geng imoc mi kpetarimianneac modzona tide.§ 21 Ye ubea merennudeac naso bic miba yeng ine ubea meremma kaiserofakaya waudeac mi ammide.”

22 “Negenggec, ye hafei ammiu fefeu tarudeac faibade. Nga damoc yeneng yegoc kpeketahema serofaka angandae, yeni yeac angammemeaunac ubangina mi merenggecde isoc kpendzeng homac kpegecde. 23 Nga ni yeac nambarcfora kpebucyunuba kpebung sasawango yofi negengegecgecde, ni ubaherenginaac hengisingngic. Ni ngic tembuac tembuac angammemeaac siriha turung kpoumbade. 24 Nga Tiatira kpebunnu ngicngac tosea kecdae, ngeni sifu yeac kpoukpou nga Satanggac negen negeng keme kemea dedaemoc, imoc mi megec. Nga ngeni yofi edengunuduade, ngeneac witiu ebic gboria monggoc mi faibade. 25 Amma wiac fengemmede, ngeni imoc seria mekecbisia nga ni kecma habade.”

26 “Ngic firang anude nga neac angammeme seria mekecmanu naso wisickeude, yeng yofi deduae. Ni Mannaarunac kuc meaiac bangeha

† 2:14: Bangec kisiu 25:1-3, 31:16 ‡ 2:17: Yaka imoc yofi, Israe yeneng bangec kisiu yakaya kpac kecec Anutungo asoacsoc yaka yemmu bangecfu mefcgegec, imoc kpara mannayaka degec. “Manna” imoc hebirao yoac nga imocac titiha “Noc wiac?” § 2:20: Ngac profeteyoac deec, yeac fakaya ngictau Ahaba enema Isebeac isoc anec.



bangeha yeneac kuneng kecduae. Nga ifi isocngoc ngic firang anudengo bangeha bangeha yeneac kuneng kefudeac uakibi nga kuc mibade.

<sup>27</sup> 'Nga yeng garengyunuma ngictaumasuya aiengngo memea mekecde, imoc mema ngicngo enang kpedzameandae, ifi isoc yasuyango kpedzameyunuude.' *(Mitiyegec 2:9)*

<sup>28</sup> Amma ni asoacac asomeng ifingoc mibade. <sup>29</sup> Kedzahagoc yeng Asungo kpebung yoac edeyunude, imoc negembeso."

### 3

<sup>1</sup> "Ge Sarde kpebung yeneac angeroarur kibi yomoc ohoma faina kenu."

"Ngic Anutuac asu 7 nga asomeng 7 metacde, yeng ngeneac yofi dede, 'Ni angammemega negendacduae. Ge naric kecnec degengandae nga sifu homemea sirc kecnec. <sup>2</sup> Ge imocac amma gauunac yacma homeecac tosea homebeso amma fede, imoc mengerema meserina. Imoc yofiac, geac angammemega hengising amba Anutuac hehennu soha mi anec. <sup>3</sup> Yoac hanahema gearu hau menec nga kedzacgango negennec, imoc negensima hoanggema angammemega mengerebesena. Ge gbori gbori mi kecnadeu ni hamangecngic isoc gearu habade. Amma noc nasou habade, imoc naric mi negennadengoc.'"

<sup>4</sup> "Anu geac arenunac ngicngac efeanecngoc ine wambangina wonong mi megec. Ni haniangina ifia henaiac ngeni wamba kongac kongac heima nigoc nenahafoc kengha naric annide. <sup>5</sup> Ifi anu mong ye firang ande, ye wamba kongac kongac heimigece. Nga ni yeac kpac kekecac kibiunac naric mi meickebade. Amma yeac kpara Manna nga angerofora yeneac kicfu dekperagibade. <sup>6</sup> Kedzahagoc yeng Asungo kpebung yoac edeyunude, imoc negembeso."

<sup>7</sup> "Ge Firadefia kpebung yeneac angeroarur kibi yomoc ohoma faina kenu."

"Kpetiac kekec nga faka foraac mingina, yeng Dawidiac ki metacde. Ye nagu witiu ngic mongngo naric mi heiude nga nagu heiu mongngo naric mi witiude. Nga yeng ngeneac yofi dede, <sup>8</sup> 'Ni angammemega negendacduae. Imoc yofiac, ge kucmama kecnec amma sifu neac yoacna hoanggema kpacna mi ngadehenec. Imocac nagu mong witigemba ngic mongngo imoc naric mi heiude.'

<sup>9</sup> "Anu ngic goango Satanggac kpekpeturang amaunac, yeni yaneggac ikoc amma yudangic dema yeni yudangic mi andae, kpac. Nga ni geac songo negenduae, imoc yeneng negentegegecdeac ayemmeba yeni gearu hama hanigau fafoc heima ewehei anggenggecde. <sup>10</sup> Ge modzotitia kpac serima kecnadeac edeguai, imoc seriangoc mekecnecac amma ni faitobannunac meicgubade. Faitobang imoc bangectoa bangecac ngicngac yenearu fingerudeac dedeac fede. Nga imoc fingeru neng ifingoc hoanggema imohacnac meicgubade.'

<sup>11</sup> "Ni bic habade, imocac geng ira mekecnec, imoc ngic mongngo mi meudeac angammemega garenggema seria mekecbesena. <sup>12</sup> Firang anude, neng ye gununggeba Anutunaac womong manaac wotung seria anude. Nga ye womong imoc monggoc mi waude. Nga ni yeac witiu Anutunaac kpac amma Anutunaac taongtoaac kpara nga neanna kpacna gboria ifingoc ohobade. Taongtoa imoc Anutunaac taong nga imoc Yerusareng gboria amma kurumennunac neac Anutuarunac maude.'

<sup>13</sup> Kedzahagoc yeng Asungo kpebung yoac edeyunude, imoc negembeso."

14 “Ge Raodikea kpebung yeneac angeroaru kibi yomoc ohoma faina kenu.”

“Ngic kpara Fora, ye dedekperagingic amma yoara modackecde nga yoac fora dekecde. Ye Anutungo wiac sasawa deu fingerec, imocac hania kecde, yennoc yoac yomoc dede, 15 ‘Ni angammemega negendacduae. Ge gerea me nomana mi kecnecc. Gereaa me nomana kecbannu songo negembai. 16 Nga geng ine gerea me nomana mi kecma botuhau aka saraka annecac enacnaunac urunggubeso anduae. 17 Ni finactaanagoc nga wiac monggac mi obohoduuae, ge geanggaac ifi dema sifu mangana yombong kecnecc nga ngic yeneng geac ubahodung negenggecdeac siriha, imoc mi negennecc. Ge makpekpea nga kicpisc amma senggang kecnecc, imocac yofi edeguduae, 18 finactaagoc annadeac nearunac gol gerecngo dzedzea mebesena. Amma senggang gameagoc mi nannadeac wamba kongac kongac mema wambagagoc ambesena. Nga kicfifi annadeac kicac kereha kicga imocngo dzuacnadeac bummebesena.’

19 ‘Neng ngicngac damoc ngenecac songo negengngemmeanduae, ngeni demeting nga ngunumengerec angemmeanduae. Imocac serima ubaga merembesena. 20 Henna, ni naguu namma kpong kpong heikecduae. Heikecha mongngo neac kedzac faima ubadzidzina negemma nagu mesideu neng yearu emba neri nerahafoc tacma yaka nedede.’

21 ‘Ngic firang ande, ni emba Mannagoc yeac tatacfu tacandipe, ifi isoc firang andemoc neng ngictau tatacfu tatanca miba nerahafoc tacede. 22 Kedzahagoc yeng Asungo kpebung yoac edeyunude, imoc negembeso.’”

## 4

1 Anu ni nagu mong witi witia kurumennu henai. Amma ubaudumeng warac trampet isoc yoac edenuu negennai, yeng yofi deec, “Ge yei erena. Yomocac ngadeau noc faka fingechebende, imoc edzacgubade.” 2 Ifi deu imohaingoc Asungo kicna merecgeu ni kurumennu ngictau tatac faifaia hembra ngic mongngo imocac witiau tarec, 3 yeac siriha hoc seria nga gombunga kpacngira yaspa nga kaneriang, yeri isoc. Nga asommadoc mong emerare hoc isoc, imoc ngictau tatac yerecgea feec.

4 Ni ngictau tatac goa, kpetengina 24, yenenai, imoc yeneng ngictau tatac yerecgea nanggec. Tatac imocac witiau ngic enara 24 tacgec. Ngic enara yeni ngakpingina kongac kongac heima orucngina witiau ira golngo memea heigec. 5 Ifi yenembare piratac nga udumengtoa amma gbumparandang ngictau tatacfunac fingerec. Ngictau tatacac kiwau kifa 7 dzetacgec, imoc Anutuac Asu 7. 6 Nga ngictau tatac kiwau wiac mong kondungtoa isoc garasngo memea, garas imoc gontaninga henai.

Anu ngictau tatacac noboc noboc 4, imohai wiac kekecnginagoc 4 oronggema nanggec, ifi yenenai. Yeni hoangnginau nga ngadenginau imoc sasawa kicngo wake wakea. 7 Wiac kekehagoc warac warac, yeac siriha raiong isoc. Nga wiac kekehagoc mong yeac ngadeau, ye burumaka ngiwa kuhagoc isoc. Nga wiac kekehagoc mong yeac ngadeau ye kicmesuya siriha ngic isoc nga wiac kekehagoc wisic wisickea, ye huntoctoa kpututuckeande, ifi isoc anec. 8 Wiac kekecnginagoc 4 yeni tembus tembus kpegangngina 6. Nga sebingina imoc kicngo sasawa soko sokoya amma kpegangngina bageau, imoc ifingoc kiwagoc anec. Amma yeni wenac nga tofocnasoc kecnengena kpac yofi dema kecgec, “Kebu Anutu Kuctoa mingina ye kpetiac, kpetiac nga kpetiac. Ye kefec nga kecde amma kecma habesande.”

<sup>9</sup> Anu wiac kekecnginagoc yeni ngictauac tatahau takecde nga wisic wisickea kpac kecbesande, dengerema eweheimima dangge dekecgec, naso imohai <sup>10</sup> ngic enara 24 yeni Kebu ngictau tatacfu takecde nga wisic wisickea kpac kecbesande, yeac haniu makpegec. Makpema ye afehema irangina mesima ngictau tatacac haniau ukuma yofi dekecgec,

<sup>11</sup> “Ge Kebu nga Anutunina. Geng wiac sasawa dena fingeedarec. Ifi negemma mefigedacnecac geng kibikperagi nga ewehieihei amma kuc sasawa medacna ngereeyombonggede.”

## 5

<sup>1</sup> Kebu ngictau tatacfu tarec, ye kibi kpou kpouya mong marifoiau mekefec. Nga imoc kibi manaac ngadeau kibi oho ohoya fec. Anu imohai kendokereha 7 ongangingagoc, imocngo mendac mendanggea henai. <sup>2</sup> Ni angero mong kuhagoc hembra yeng uba kunengngo yofi arohoec, “Merac ewehieiheiaogocngo kibi mendac mendanggea mekpacgema kpou kpouya imoc witiudeac siriha ande?” <sup>3</sup> Arohou kurumennu me bangecfu me bangec bageau ine ngic mong kibi kpou kpouya imoc witiude me oho ohoya, imoc hehenggacsoc mi kefec. <sup>4</sup> Nga ngic mongngo kibi imoc mekpacgeudeac me hengenggac siriha hofocgecac kiachodung hodung kiarai. <sup>5</sup> Kiacba ngic enarafocngina yeneanunac mongngo yofi edenuc, “Negenna, ge kiac wana! Yuda kiscifunac raiong nga Dawidiac godeanunac sera, yeng firang anec. Imocac amma ye kibi kpou kpouya mendac mendanggea 7 mekpacgema kibi imoc naric witiude.”

<sup>6</sup> Ifi deu yofi henai. Ngictau tatac nga wiac kekecnginagoc 4 amma ngic enara 24 yeneac botucfu ramamedaha mong nanec nga ye kpehomemea isoc anec. Ramamedaha imoc ye baiha 7 nga kiwa 7. Kiwa imoc Anutuac Asu 7 nga imoc yeni bangectoa bangecfu sueyunuyunuya. <sup>7</sup> Yennoc kemma ngictau tatacfu tarec, yeac marifoiaunac kibi kpou kpouya meec. <sup>8</sup> Kibi imoc memanu kekecnginagoc 4 nga ngic enara 24 yeneng yeac kicfu makpegec. Yeni sasawa tembuc tembuc gita kurerenganoc\* nga sokoc golngo memea metacgec. Sokoc imohacnac hosuc homuna gombunga ereec. Wiac hosuhagoc sokocfu fec, imoc ngicngac kpetiac yeneac nunumungina, imocngo sokocnginau wake wakea fec.

<sup>9</sup> Anu yeni yegec mong gboria yofi heigec, “Geng kibi kpou kpouya mema kendokereha naric mekpacgenade. Imoc yofiac, ngic yeneng kpebucgugec geac sacngo ngicngacfcoga bum-meyununec. Ge ngicngac fakaga fakangina nga yoacga yoacna amma sebi siric hania hania nga bangeha bangeha sasawa yeneanunac bummeyununec Anutuac areng amma kecdae. <sup>10</sup> Bummeyunuma Anutuac eucererennu arengyununa yeni womong imocac gareng angecdeac areng, imoc menec. Mena yeni bangeha bangeha yeneac gareng angecde.”

<sup>11</sup> Ni kicna merec merecgeangoc kecbare angero homac yeni ngictau tatac nga wiac kekecnginagoc amma ngic enara 24 orongyunugec ubaudu-mengngina negennai. Amma yeneac kpetengina imoc 10 tauseng naso 10 tauseng nga tauseng naso tauseng. <sup>12</sup> Yeni ubaudumengtoanginagoc yofi degec,

\* 5:8: Musiac onga goa hafac (244) imohai fede.

“Ramamedaha kpebuc kpebucgea, ye kpac kuneng nga finactoa amma negen negentegec nga kuc nga eweheihei nga kibikperagi amma kenec mibesonga ngereede.”

<sup>13</sup> Nga wiac sasawa Anutungo deu fingecearec kurumennu nga bangecfu amma bangec bageau nga kondunnu, yeneac manau wiac sasawa kecdae, yeneng yoac yofi degec negennai,

“Ngictau tatacfu tacde nga ramamedaha, yerearu kenec nga eweheihei amma kibikperagi nga kuc wisic wisickea kpac fekengkecbeso.”

<sup>14</sup> Ifi degec wiac kekecnginagoc 4 yeni “Imoc fora.” degec nga ngic enara 24 yeni makpema ye afehegec.

## 6

<sup>1</sup> Ni imoc hembare ramamedahango kendokereha 7 ongayagoc warac warac kibi mendac mendanggeau tarec, imoc mekpacgeec. Nga wiac kekecnginagoc 4 yeneacunac mongngo ubaudumenga parandangac udumeng isocngo kpacma yofi deu negennai, “Ge hana!” <sup>2</sup> Ifi deu ni fima becosic kongac kongac mong henai nga imocac witiau ngic mongngo tebeagoc tarec. Taru ira mong migec ye imoc heima firang anganggac arennu firang anudeac becosicfu kenec.

<sup>3</sup> Nga ramamedahango kendokereha mong mekpacgeec, imohai negemba wiac kekehagoc mongngo “Ge hana!” deec. <sup>4</sup> Ifi deu becosic mong sacsacngo haec. Yeac witiu ngic tarec, ye wiac goa migec. Ye ngicngac yeni kpebuce-megecdeac bangeha bangeha, imohacnac ruae meic meickeac kuc migec nga wasai beangtoa mong migec.

<sup>5</sup> Nga Ramamedaha kendokereha monggoc mekpacgeu wiac kekehagoc mongngo monggoc yofi deec negenai, “Ge hana.” ifi deu becosic dzadzu mong henai. Nga ngic yeac witiu tarec, ye sigeri mong mariauu metarec.

<sup>6</sup> Nga wiac kekecnginagoc 4, yeneac botucfunac ubaudumeng isoc mongngo yofi deu negennai, “Wit lita mocguac buma, imoc uameme mocguac uabung ande nga bari lita harebec, imoc uameme mocguac uabung ande. Anu ge kerecdoku nga waing mi memanganebesena.”\*

<sup>7</sup> Ramamedahango kendokereha monggoc mekpacgeu negemba wiac kekehagoc mongngo monggoc “Ge hana!” deec. <sup>8</sup> Ifi deu hembra becosic meac meac mong amma ngic yeac witiu tarec, kpapa homec, yeng hofe hesickeu haoc. Haec yereng bangectoa bangec tegia 4, imohacnac noboha mocgu (<sup>1</sup>/<sub>4</sub>) imoc yereng wasai beang nga bodi amma homectoa nga kateyang mehaoc. Mehaec imocngo ngicngac yunuhomegecde, imocac uakibi nga kuc yemecyemera.

<sup>9</sup> Nga ramamedahango kendokereha mong monggoc mekpacgeec, imohai yofi henai. Ngicngac Anutuac yoac mekecma dekperagigecac yunuhomegec, yeneac ubaangangina arataac bageau fegec. <sup>10</sup> Yeni ihai fema kucgoc arohoma yofi kpacgec, “O Kunennina, ge kpetiackekek nga yoac foraac mingina, ge nocac turung kpoukpou naso mehersiema sacninaac kopocsic negemma ngic bangecfu kecdae, yeni kopocsinginaaac turunga mi yemmenec.” <sup>11</sup> Ifi degec ngakpi herea kongac kongac tembuc tembuc yemmema edeyunugec, “Wanacogofocngina nga tosofocngina yeni ifingoc yunukpebuc ayemmegec kpeteu heiudeac ngeni kapianec monggoc tacnegembisia.”

\* **6:6:** Siriwa dzo me denari mocgu nande. Yohaneac nasou siriwa dzo mocguno uameme mocguac bung anec.

<sup>12</sup> Anu ye kendokereha wisic wisickeaac bageau mekpacgeu henai. Hembra usoctoa meu wenackiwa dzadzu kpeec. Imoc ubahodunggak ngakpi isoc, ifia nga afo hafoangoc sac isoc anec. <sup>13</sup> Nga firangtoa kpema ic kpemindzaheu ic gbomea mangganga icfunac kpemorongyunuu maandae, asomeng yeni ifi isoc<sup>†</sup> bangecfu fotockema magec. <sup>14</sup> Magec ngicngo kibi kpouandae, kurumengngo ifi isoc kpouma kpac anec. Kpac anu tiki nga nuc sasawa tatacnginaunac meickedacgec.

<sup>15</sup> Ifi anu bangecac ngictau nga ngickuneng amma dzikacac ngickuneng nga ngic finactoanginagoc amma ngic seria amma wanac areng mingingngina bageau kecegc nga ngicngac witicngina kpac kecegc, yeni sasawango kemma kedzebe manau nga hoctoatoa bagenginau sufudacgec. <sup>16</sup> Sufuma tiki nga hoc yeni yofi edeyunugec, “Ngeni witininau mama ngictau tatacfu tacde, yeac kicfunac nga ramamedahaac ngabaunac semenunubisia. <sup>17</sup> Yereac ngabaac nasotoa bic hadacac neni naric mi serima nannide.”

## 7

<sup>1</sup> Imocac ngadeau angero 4 yenenai. Yeni bangectoa bangec, imocac tuturung 4, imohai nanggec. Nga yenemba yeni bangecac firang 4 medzickema nanggec firang imoc yeni bangecfu me kondunnu me icfu kpegecdeacsoc mi anggec.

<sup>2</sup> Anu ni angero mong henai. Ye Anutu kekehagoc yeac onga mekecma wenac ere ereaunac haec. Nga angero 4 yeni bangec nga kondung memanganegedecdeac ua yemmeyemmea, yeng yeneac kpacma yofi deec, <sup>3</sup> “Ngeni bangec me kondung me ic bic mi memanganebisia. Neneng Anutuninaac wanacarengfora mesunginau kibi faiminaguc ngeni ine wiac sasawa memanganebisia.” <sup>4</sup> Anu ngicngac mesunginau kibigoc, yeneac kpetengina 144 tauseng degec negenai. Kibinginagoc imoc yeni Israe medacforaac habuareng 12, yenearunac sasawa. <sup>5</sup> Mesunginau kibigoc yeneac kpetengina yofi,

Yuda kiscifunac 12 tauseng

Rubeng kiscifunac 12 tauseng

Gade kiscifunac 12 tauseng

<sup>6</sup> Ase kiscifunac 12 tauseng

Naftari kiscifunac 12 tauseng

Manase kiscifunac 12 tauseng

<sup>7</sup> Simong kiscifunac 12 tauseng

Rewi kiscifunac 12 tauseng

Isasa kiscifunac 12 tauseng

<sup>8</sup> Seburong kiscifunac 12 tauseng

Yosefe kiscifunac 12 tauseng nga

Benyaminggac kiscifunac 12 tauseng.

<sup>9</sup> Imocac witiau habutoa yombong yenenai nga kpetengina imoc ngic mongngo naric mi osoude. Ngicngac yenenai, yeni bangeha bangeha nga fakaga fakangina amma yoacna yoacga nga sebi siric hania hania, yenearunac. Amma yeni ngakpingina herea kongac kongac heima maringinau pam icac maria mema ngictau tatacfu nga ramamedahaac kicfu nanggec.

<sup>10</sup> Namma yofi dema kunengngoc arohogec,

“Anutunina ngictau tatacfu tacde nga ramamedaha yeri memengerec mingina.”

<sup>†</sup> 6:13: Ic kpara fig dede.

<sup>11</sup> Ifi degec angero sasawango hama ngictau tatac nga ngic enara 24 amma wiac kekecnginagoc 4 orongyunuma nanggec, yeni ngictau tatacac kiwau makpema kicngina hetutuckema Anutu afehegec. <sup>12</sup> Afehema yofi degec, “Fora, kenec nga kibikperagi, negen negentegec nga ubangerec, ewehelhei nga kpac kuneng nga kuc imoc Anutunina ammini nasoya nasoya feengkecheso, imoc foranoc.”

<sup>13</sup> Ifi degec, ngic enara yeneanunac mongngo yofi kpesinenec, “Ngicngac ngakpingina herea kongac kongac yomoc, yeni merac merac nga yeni dahacnac hagec?”

<sup>14</sup> Kpesinenu merenai, “Kunenna, ge geanggaoc negennec.” ifi deba yeng yofi edenuec, “Ngic yomoc yeni kpendzengetoaunac hama ngakpingina ramamedahaac sawango dzuacegoc kongac kongac ande. <sup>15</sup> Imocac amma yeni hadzing tofocnac Anutuac womong manau ngictau tatacac kiwau namma yeac kingang kpema ua mekecdae. Megec Kebu ngictau tatacfu tacde, yeng yenigoc kecma kporucbedzoya yeneac witiu faiu tarude. <sup>16</sup> Nga yeni herenginaac monggoc mi homegecde nga dokuae mi ayemmeude. Wenacngo monggoc mi yonohoude nga wiac goaac gereango naric mi yonohoude. <sup>17</sup> Imoc yofiac, ramamedaha ngictau tatacac dzongiau nande, yeng ramagarengngina amma kekecac dokukiwau hesicyunuude. Nga Anutungo kickumangina sasawa kicnginaunac mekerenggeude.”

## 8

<sup>1</sup> Ramamedahango kendokereha wisic wisickea mekpacgeec, imohai kurumennu aua nobohaacsoc ning yombong kpeec.

<sup>2</sup> Ning kpeu angero 7 Anutuac kicfu nandae, yeni trampet 7 yemmeyem-mea yenenai.

<sup>3</sup> Anu angero mongngo sokoc golngo memea meemma arata kiwau nanec. Nanu sopo homuna gombunga imoc homac migec. Migec imoc ngicngac kpetiac yeneac nunumugoc kpeturanggema arata golngo memea, imohai gerecfu faiec. <sup>4</sup> Ye ifi ammanu yeac mariaunac hosuc homuna gombangango ngicngac kpetiac yeneac nunumugoc kpeturanggeu Anutuaru enec. <sup>5</sup> Enu angero ye sokohango arataunac gerec fiu wakeu bangecfu ukuec. Ukuu gbumparandang nga udumengtoa amma piratac homac fingeru usoc meec.

<sup>6</sup> Meu angero 7 trampetnginagoc yeneng fifigecdeac efaigec. <sup>7</sup> Efaigec angero warac warac yeng trampeha fifiu nomang gbomea\* nga gerec, imoc sacgoc kpeturanggema imocngo fingeacma bangecfu maec. Mau bangectoa bangec, imocac tegia harebec imohacnac noboha mocgu (¼) dzeec nga ic sasawa bangectoa imocac manau nanggec, yeneanunac harebecac noboha mocgu (¼) dzeec amma kpindzing tengging tengging sasawa gerecngo dzedarec.

<sup>8</sup> Nga yeac ngadeau angero mongngo trampeha fifiu tiki kuneng gerehagocngo kondunnu mau kondungtoa tegia harebec imohacnac noboha mocgu (¼) sac anec. <sup>9</sup> Anu kondunnu wiac kekecnginagoc kecdae, yeneanunac harebecac noboha mocgu (¼) homedacgec amma wage yeneanunac harebecac noboha mocgu (¼) kpac anggec.

<sup>10</sup> Amma yeac ngadeau angerongo monggoc trampeha fifiu kurumenunac asomengtoa mong ahakifa isoc dzema fotockema maec. Mama dokutoa nga dokukiwa yeneanunac harebecac noboha mocgu (¼) witinginau heiec. <sup>11</sup> Asomeng imoc kpara Hodunga. Anu doku yeneanunac harebecac

\* 8:7: Bangec nomanau kia gbomeango sawau nomanema seria anude.

noboha mocgu (½) imoc hodunga anec. Nga doku hodunga anecac amma ngicngac homacngo homegec.

<sup>12</sup> Nga angero mongngo trampeha fifiec. Fifiu wenac nga afo amma asomeng yeneac kperagiaac kuc imohacnac harebecac noboha mocgu (½) kundung kpeudeac meickeec. Meickeu hadzing tofocnac yereac kperagiaac kuc imohacnac harebecac noboha mocgu (½) mi fingerec.

<sup>13</sup> Anu hembra huntoc mong wi kurumeng botuhau kpututuckeu ubaudu-menga negembare kunengngoc yofi arohoec, “Angero harebec yeneng tram-petngina fifigec arohou ngicngac bangecfu kecdae, ngenearu ubahodung, ubahodung, ubahodung fingerude.”

## 9

<sup>1</sup> Angero 5ngo trampeha fifiu ni asomeng mong kurumennunac mamaya henai. Hembra ye teng buya kpac, imocac ki migec. <sup>2</sup> Migec yeng ki imoc mema teng buya kpac mesiec. Mesiu gerecngo ua dzeu hosuc kuneng ereande, hosuc siriha ifia isocngo tennunac ereec. Teng imohacnac hosuc ereu wenac nga sawaac kperagi kucngira maec. <sup>3</sup> Anu hosucfunac ipua erema bangecfu magec. Magec bangecac weme weme yeneac kuc isoc yemmema <sup>4</sup> yofi edeyunugec, “Ngeni kpendzing nga wiac sasawa maria tengging tengging fede amma ic, imoc mi memanganebisia. Ngeni ngicngac Anutuac kibi mesunginau mi mekecdae, yenisac memanganeyunubisia.”

<sup>5</sup> Nga yeni dederece yofi ayemmegec, “Ngeni afo 5 kpendzeng yemme-bisia nga ngeni mi yinihomebisia.” Nga kpendzenga imoc weme wemengo yiniu angande, ifi isoc anec. <sup>6</sup> Naso imohai ngicngac yeni homec hofocma naric mi homegecde. Nga homegecdeac negenggec homecngo yeneanunac woraude.

<sup>7</sup> Anu ipua siricngina imoc dzikacac becosic mengereandae isoc. Oruc-nginau ira golngo memea isoc tarec nga kic samacngina imoc ngicngac yeneac isoc. <sup>8</sup> Nga orucdzongina imoc ngac yeneac isoc amma enacsicngina imoc raiong yeneac enacsic isoc. <sup>9</sup> Nga mariku heigec, imoc aiengngakpi isoc amma kpegangnginaac udumeng imoc becosic homacngo dzikacfu nedzima keretac kpedzima udumenggoc kengandae isoc. <sup>10</sup> Amma dzingina enaragoc imoc weme weme enacngina isoc anec. Nga yeni ngicngac memanganeyunugecdeac kucngina afo 5 imocacsoc feec. Nga kucngina imoc dzinginau tarec. <sup>11</sup> Hofe buya kpac, imocac angerongo\* yeneac ngic-taungina kefec. Yeac kpara imoc hebiraiyo yoacfu Abadong nga grik yoacfu Aporiong.†

<sup>12</sup> Yei ubahodung warac warac wisickede. Negenggec, imocac ngadeau ubahodung yohockangngoc haecde.

<sup>13</sup> Nga angero wisic wisickeaac bageau, yeng trampeha fifiu Anutuac hoannu arata golngo memea, imocac tuturungasoc baiha 4, yeneanunac enacadumeng mong negennai. <sup>14</sup> Negemba yeng angero wisic wisic-keac bageau trampehagoc yofi edeec, “Angero 4 Eufрата dokutoa tegiau witicyunugec nandae, yeni yungecyununa.” <sup>15</sup> Angero 4 yeni ngicngac yeneanunac harebecac noboha mocgu (½) kpebucyunugecdeac aua nga uameme amma afo nga kifanaso yomocac amma efac efaia kecgec yeng yungecyunuec. <sup>16</sup> Anu wasaingic becosic witiau tacgec, yeneac kpetengina 200 mirieng (200,000,000) degec negenai.

\* 9:11: Hania yoacfu angero imocac titiha siducedede me suesuea. † 9:11: Kpara imocac titiha memangac mangane ngic.



<sup>17</sup> Nga kicna tegecmangoc taru wasaingic becosicnginagoc yeneac siricngina yofi henai, yeni aiengngakpingina kpaua nga dzadzu amma asong botuc nga dzagec dzagec, imoc hoc kpara sarafa<sup>‡</sup> isoc. Nga becosicac oruc imoc raiong isoc nga enacnginaunac gerec nga hosuc amma asenga mangac manganea erema kenec. <sup>18</sup> Kpendzeng harebec, gerec nga hosuc amma asenga mangac manganea, yeneng becosic enacnginaunac erema ngicngac yeneanunac harebecac noboha mocgu (½) kpebucyunugec. <sup>19</sup> Kuc imoc becosic enacnginau nga dzinginau tarec. Nga dzingina imoc yeni boudzoc isoc orucnginagoc nga yeni imocngo wiac hania hania memanganekcegec.

<sup>20</sup> Anu ngicngac tosea kpendzeng 6 yomocngo mi yunuhomeec, yeneng ine ubangina mi dzigenegec. Amma yeni asu mangana nga nemuonga gol siriwa kopa nga hoc amma icngo memea numuyemmegecdeac faka mi wagec nga nemuonga maringinango memea, imoc mi ngadehegec. Nemuonga ifia yeneng wiac mong mi henggecde nga kedzacnginango mong mi negenggecde amma haningnginango naric mi tikenggecde. <sup>21</sup> Nga ngicngac yeni ubangina mi dzigeneu yunukpebuc, dzinac nga mosoc faka amma kaisero faka nga hamangecmeme, faka imoc sasawa mekecma mong mi wagec.

## 10

<sup>1</sup> Anu ni angero kuhagoc mong hembra kurumennunac maec. Ye hongngo temboc tembonggea oruhau asommadoc heiec nga kicmesuya imoc wenackiwa isoc amma hanihora imoc wotung isoc gerehagoc. <sup>2</sup> Amma ye kibibisic kpou kpouya mong mariaiu yungec yungera metarec. Metacma hanifoia imoc kondunnu nga kanaya imoc bangecfu faiec. <sup>3</sup> Faima raiongngo arohoande, ifi isoc kucgoc arohoec.

Arohomanu gbururung 7 yeneac enacudumengnginango yoac degec. <sup>4</sup> Ifi degec ohobeso ambare kurumennunac enacudumeng mongngo yofi edenu negennai, “Gbururung 7 yoac degec ge imoc mi ohona. Imoc mesufuna febeso.”

<sup>5</sup> Ifi deu angero bic henaimoc, yeng kondunnu nga bangecfu namma marifoia kurumennugeng miacma <sup>6</sup> yoac deserima yofi deec, “Kebu kecde nga kecengkefude nga kurumenga kurumenga nga kondung amma yeneac manau wiac sasawa fede, imoc yeng deu fingececarec, ni yeac kpac kpacma yoara meserima yofi deduae, ‘Naso wisickedede.’ <sup>7</sup> Angero wisic wisickeango trampeha fifibeso ammanu udumeng negenggecde, imohai yofi negembisia. Anutungo wanacngicfora profete yoac bic edeyunuec nga Anutuac negen negeng sufu sufuya feec, imocngo naso imohai fingecegerude.”

<sup>8</sup> Anu enacudumeng warac kurumennunac negenaimoc, yeng yofi edenuc, “Ge kemma angero kondunnu nga bangecfu nande, yeac mariunac kibi kpou kpouya yungec yungera, imoc mebesena.” <sup>9</sup> Ifi deu angeroaru kemma kibibisic kpou kpouya imoc nenudeac edeai. Edeba yeng deec, “Ge mema nena imoc heregau kemema herega dzeude nga enacgau ine kukundzau isoc songea anude.” <sup>10</sup> Ifi deu ni angeroac mariunac kibibisic kpou kpouya mema neba imoc enacnau kukundzau isoc songea anec. Nga herenau kemema aengagoc anu <sup>11</sup> yofi edenuc, “Ge ngicngac sebi siriha hania hania nga bangeha bangeha amma yoacna yoacga nga ngictau homac yeneac profeteyoac monggoc debesena.”

<sup>‡</sup> 9:17: Hoc imoc gerectikiunac maande nga imoc dzagec dzagec amma homuna mangana.

# 11

1 Anu yeni kpetememe mong yasu isoc nemma yofi edenugec, “Ge yacma Anutuac womong nga arataac kpetengira mema ngicngac ihai Anutu dengeradae, yeneac kpetengina momoc mebesena. 2 Nga sobeng odayagoc amakiwau fede, imoc bangec monnunac ngicngac yemmeyemlea. Imocac amma ge imocac kpete mi mebesena. Yeni afo 42ac manau taong kpetiac\* tidzamema memanganegecde. 3 Anu ni enacdedehocna kuc yemecba yeri toruwamba heima uameme 1 tauseng 2 handret 60ac (1260) manau profeteyoac deecde.” 4 Yeri oriwa ic yohockang nga bangecac Kebuac kicfu kifa nanangagoc yohockang nangkecdape. 5 Ngic mongngo yeri memanganeyurubeso negendeu gerecngo enacngiraunac erema ngabafocngira yonohou homegecde. Monggoc deba, mongngo yeri memanganeyurubeso negendeu ye homecac areng amma ifi homeude. 6 Enacdedehocna yeri profeteyoac dekecma kurumeng heiec kia mong mi kpeude, yeri uayoac nga kuc ifia mekecdape. Amma yeri yeraoc naso dema doku heimerenec sac anudeac uayoac nga kuc mekecdape. Amma yeri kpendzeng hania hania bangecfu faicdeac uayoac nga kuc ifingoc mekecdape.

7 Anu yeri dedekperagingira edeyunudarec wisickeu wasaiyangtoango teng buya kpac, imohacnac erema yerigoc ewema firang amma kpebucyuruude. 8 Kpebucyuruu farengngira taonggac sinnu feece. Taongtoa imocac kpara kpefing yoacfu Sodong nga Aigita nga bangec imohaingoc Kebunina mariponnu kpegec homeec. 9 Nga uameme harebec nga nobohaac manau ngicngac sebi siriha hania hania nga fakaga fakangina amma yoacga yoacna nga bangeha bangeha ngicngac yeneng farengngira hemma tonggogecdeac kpetariyemgecde. 10 Kpetariyemgec ngicngac bangeha bangeha kecdae, yeni sasawango songo nga ubangerec negemma ubangerecac iwai goa emegecde. Profete yohockang yereng bangeha bangeha ngicngac kpendzenu faiyunuocac ifi ayecmegecde.

11 Anu uameme harebec nga noboha wisickemanu kekecac asungo Anuturunac hama yerearu kemeu yeri yacma nanoc. Nanec yeremma yeni damu kuneng yunuec. 12 Nga kurumennunac enacadumengtoa mong negenggec yofi edeyuruec, “Ngeri yei ereec!” ifi deu yeri ngabafocngina yeneac kicfu hoeng manau kurumennu enoc.

13 Enec naso imohaingoc usoctoa meu taongyada tegia 10 imohacnac noboha mocgu (1/10) barackec. Usocyada meec, imocac manaunac ngicngac kpetengina 7 tauseng yeni homegec. Homegec ngicngac tosea yeni kengec amma Anutu kurumennu kecde, ye afehegec. 14 Ubahodung botuha imoc yomohai wisickeu ubahodung wisic wisickeango bic haude.

15 Anu angero wisic wisickeango trampeha fifu kurumennunac enacadumengtoa mong fingecma yofi degec, “Kebunina nga yeac danggunocngic Kristo yeri yaguc bangectoa bangec sasawaac mingina andape. Amma Kebuninango ngictau kecde nga kecengkefude.”

16 Ifi degec ngic enara 24 Anutuac hoannu ngictau tatacnginau tacdae, yeni makpema kicngina hetutuckema Anutu afehegec. 17 Afehema yofi degec, “Kebu Anutu Kuctoa mingina, neni dangge edegudimbe. Ge bicngoc kecnec nga yaguc kecnec, ge geangga kuctoa mema mekecma yaguc ngictau kecnec. 18 Ngicngac bangeha bangeha kecdae, yeni herebu anggec geac herebuac naso ine yofinenggac hau geng homegec yeni

\* 11:2: Taong kpetiac, imoc Yerusarenggac kpara mong.

yoacngina isinggema desinade. Wanacngicfogga profete nga kpetiac arengfocga kuneng nga kapiango geac kpacga ewehiandae, yeni angammenginaac turunga megecde. Nga ngicngac bangec memanganegec geng memanganeyununade.”

<sup>19</sup> Anu kurumennu Anutuac womoggac naguya megec yeac dzadzahacac katapa kicnginango henggec. Hemmagec piratac heiu udumengtoa nga gbururungtoa heiec amma usoc meu nomang gbomeatoa maec.†

## 12

<sup>1</sup> Anu soi engena mong kurumennu yofi fingeru henggec. Ngac mong tarec, ye wambaya wenac nga hania bageau afo amma oruhau ira mong asomeng 12ngo memea. <sup>2</sup> Ye hereagoc amma sabac fingerudeac gadze kiu arohoec.

<sup>3</sup> Nga faka mong ifingoc kurumennu fingeru henggec. Imoc sekactoa sascac mong kuneng yombong. Ye oruha 7 nga baiha 10 nga ye oruhau ira 7 heiu tarec. <sup>4</sup> Taru yeac dziango kurumenggac asomeng yeneurunac harebecac noboha mocgu (½) taiyunuma bangecfu ukuyunuec. Nga ngacngo sabac meu sekactoa ye sabac gbokoudeac negemma ngac yeac kicfu nanec. <sup>5</sup> Nanu ngacngo medac mong meec. Meu yeac sabaha ine faratac wangecma Anutuaru, yeac ngictau tatacfu meemma faigec feec. Nga medac imoc, yeng bangeha bangeha ngicngac aiengyasungo garengyunuude. <sup>6</sup> Nga ngac ye worama bangec kisiu dokuya kpacfu kenec. Kenu yeneng ye uameme 2 tauseng 2 handred 60ac (2260) manau nenesemeng mima henggareng ammigece. Anutungo yeac tatac ihai bic mengereec.

<sup>7</sup> Anu kurumennu dzikactoa fingerec. Imoc yofi, Mikae nga angerofora yengeng sekactoaogoc ewegec sekac nga angerofora yeni turunga merenggec <sup>8</sup> kucngina soha mi anu kurumennu tatacnginaac titing monggoc mi feec. <sup>9</sup> If anu sekactoa, imoc boudzoc esea kpara mong Mangana mingina nga Satang, ye nga angerofora bangecfu ukuyunugec. Ukuyunugec yeng bangecngicngac sasawa ikocfu wangecyunuu yeni ye modacandae. <sup>10</sup> Nga enacudumengtoa mong kurumennu negemba yofi deec,

“Memengerec nga kuc amma eucerereng imocac mingina Anutu. Nga yeac danggunucngic Kristongo yaguc imocac uakibi nga kuc metacde. Ngic tosofocnina yoacfu faiyunukefec, yeng Anutuninaac kicfu hadzing toforec yoacfu faiyunuma kefu yeneng yegoc ewema firang amma ye bic kurumennunac ukugec maec. <sup>11</sup> Yeni ramamedahaac sawa nga Kebuac yoac dekperagigec amma yenang kekecngina mi segerema homecac wagecac amma firang anggec. <sup>12</sup> Kurumeng nga areng kurumennu kecdae, ngeni imocac amma ubangerec negembisia. Nga bangec nga kondung ngeri ebictoa meficgeecde. Mangana mingina ye nasoya wegeneu negemma ngabatoagoc yombong ngenearu haecac ngeri dafi anecde, imoc obohode.”

<sup>13</sup> Yeni sekactoa bangecfu ukugec, yeng imoc hentegegema ngac sabac medac meec, ye kisanec. <sup>14</sup> Kisanu ngac ye boudzocctoac kicfunac worama bangec kisiu dokuya kpacfu kenudeac yeneng ngac imoc huntoccto kpeganga migec. Ye ihai naso mocgu nga naso goa amma naso noboha taru yeni henggareng ammima yaka migecde. <sup>15</sup> Migec boudzocngo ye kisanudeac enaraunac dokuyuyuangorunu maec. <sup>16</sup> Mau bangecngo ngac agenga tima enara anggeu sekacngo enaraunac dokuyuyua urunu bangecngo imoc

† 11:19: Kia kpema seriu heima dzimbong kuneng ukuu maande isoc.

nedarec. <sup>17</sup> Nedaru sekactoa ngoac amma herebu negemma kemma yeac arengfora tosea Anutuac singyoac modacma kecdae nga Yesu Kristoac dedekperagi mekecdae, yenearu dzikac kpeudeac kenec. <sup>18</sup> Anu ye sangi witiau kondung tegiau nanec.

## 13

<sup>1</sup> Hembra kondung manaunac wasaiyang yeneac mimihia mong ereec. Ye baiha 10 nga oruha 7 amma baiha imocac witiau ira 10. Nga oruc imoc yeneac witinginau Anutuac desure kpac hania hania feec. <sup>2</sup> Imocac sebia wasaipusitoac sebi isoc anec nga enara imoc raiong isoc amma ye bea isoc soriherehagoc.

Anu sekactoa ngoac uakibi nga kuc nga ngictau tatac wasaipusitoa mima ngicngac homac garengyunuudeac uakibi miec. <sup>3</sup> Miu wasaipusitoa oruha mong yofohagoc henai. Oruha imoc yunugec kubectoa anu homeandae, ifia isoc hembra bangeha bangeha ngicngac yeni wasaipusi imoc hemma kerectegac amma modacgec. <sup>4</sup> Modacma sekactoa numumigec nga sekactoa yeng wasaipusingo garengyunuudeac uayoac nga kuc miecac amma yeni wasaipusi numumima yofi degec, "Mongngo ye isoc amma yegoc naric mi eweude."

<sup>5</sup> Enara migec ye dearogoc sicsauc amma Anutu desure ammiac. Nga yeni kuc yofi migec, yeng afo 42ac manau ngicngac garengyunuudeac uayoac nga kuc mekefec. <sup>6</sup> Amma ye enara anggema Anutu desure ammima Anutu kpara nga amea amma kurumennu kecdae, yeni desure ayemmeec. <sup>7</sup> Ayemmu yeng ngicngac kpetiac yenearu dzikac kpema firang anudeac migec. Migec yeng ngicngac fakaga fakangina nga sebi siric hania hania amma yoacna yoacga nga bangeha bangeha garengyunuudeac uayoac nga kuc migec. <sup>8</sup> Ifi migec ngicngac sasawa bangefcu kecdae, yeng wasaipusi numumigecde amma ramamedaha kpebucgegec, yeac kekecac kibi ngicngac kpacngina bangec meficmeficgeaunac mi fede, yeng wasaipusi numumigecde. <sup>9</sup> Kedzahagoc kecdengo yoac yomoc negembeso.

<sup>10</sup> Ngic mong megec witicamau faigecdeac degecdeu ye witicamau kembeso. Ngicngac wasai beangngo yunuhomegecdeac degecdeu imocngo yunuhomebisia.

Anu ngicngac kpetiac yeni modzotitia kpac nga negen negensinggoc kecbisia.

<sup>11</sup> Ifi hembra wasaiyang mong bangec manaunac ereec. Ye rama isoc baiha yohockang metacma sekactoa yeneac faka modacma yoac deec. <sup>12</sup> Ifi deu yeng wasaipusiac uakibi nga kuc sasawa mekecma yeac amma ngicngac garengyunuudeac ua sasawa meec. Mema bangectoa bangec nga bangecac witiu ngicngac kecdae, yeni wasaipusi homemeaac kubec bic mosiec, ye numumigecdeac ayemmeude. <sup>13</sup> Ayemmu wasaiyang baiha yohockang, yeng yoara negensinggegecdeac fakatoa meu gerec kurumennunac ngicngac yeneac kicfu bangefcu maec. <sup>14</sup> Mau ye wasaipusiac kicfu faka meudeac kuc migecac amma ngicngac bangefcu kecdae, yeni ikocfu wangecyunuu ye modacgecde. Modacgec ngicngac bangefcu kecdae, yeni deu wasaipusi wasai beangngo heigec monggoc gboriec, yeac onga mong megec.

<sup>15</sup> Megec yeng wasaipusiac onga ongaasu miudeac kuc meec. Meu ongango ifngoc yoac dede negenec. Nga ngicngac sasawa onga mi numumigec, yeni kpebucyunuudeac kuc metarec. <sup>16</sup> Metacma ye ngicngac sasawa kuneng nga kapia, finacgoc nga finaha kpac, wanacngic nga ngicngac yengenaoc kecde, yeni kibi mong sebikibi isoc marifoinginau me mesunginau

mekegcegecdeac deseriyemmeec. <sup>17</sup> Ifi anu ngic mongngo kibia me wasai-  
pusiac kpara me kparaac kpete mi mekefude, yeng wiac mong naric mi  
bummeude me faiude. <sup>18</sup> Kibi yomoc negen negentegegcoc osobesonga.  
Wasai-  
pusiac kpete imoc ngic monggac kpete nga ngic irec ireckeagocngo  
yomoc osonegeng ambeso. Wasai-  
pusiac kpete imoc 666.

## 14

<sup>1</sup> Ni ramamedaha hembra ye Siong tikiu ngicngac 144 tauseng yenigoc  
nanggec. Nanggec, yeni ramamedahaac kpackibi nga Manggacac kpackibi  
mesunginau mekegec. <sup>2</sup> Nga kurumennunac udumeng mong doku homac  
gbururungtoa yeneac udumeng isoc negemba imoc gita kpekepe yeneng  
gitangina kpegec udumeng fingeande, ifi isoc anec. <sup>3</sup> Anu yeni ngictau  
tatacfu nga wiac kekecnginagoc <sup>4</sup> amma ngic enara yeneac kicfu namma  
yegec gboria mong heigec. Heigec ngic 144 tauseng bangecfunac bic bum-  
meyunuyunua, yeneng yegec imoc naric negemma heigec. <sup>4</sup> Ngic imoc  
yeni ngac yenigoc mi kecma wonongngina kpac amma kongaha yombong  
kegcec ramamedahango ihai me ihai kengande, imohai ye modackecdae.  
Ramamedahango bangecac ngicngac yeneac unac buma heima yeni bum-  
meyunuu yeni Anutu nga yeac waracareng anggec. <sup>5</sup> Amma enacnginaunac  
ikoc mong mi ereu yeni kpetiac nga manganangina kpac kegcec.

<sup>6</sup> Ni angero mong henai, ye sawakebangau herecge kenec. Kemma  
siduc gombang feengkefude, imoc yeng ngicngac bangecfu kecdac, yeni  
edeyunuudeac metarec. Metacma bangeha bangeha ngicngac nga fak-  
aga fakangina amma yoacga yoacna nga sebi siric hania hania, yeni  
<sup>7</sup> enacudumeng kunengngo yofi deec, "Ngeni Anutuac damungunuu ewe-  
heimibisia. Anutungo ngenec yoac desiude imocac naso bic hadeac ngeni  
kurumeng nga bangec amma kondung nga dokukiwa meficyunuec, ye  
numumibisia."

<sup>8</sup> Ifi deu angero mongngo ye modacma yofi deec, "Makpedacnoc, Babirong  
taongtoa imoc bic makpedac. Yennoc ngaba nga kaiserofakayaac waindoku  
seria ngicngac sasawa gumecyunuu nedacec."

<sup>9</sup> Ifi deu angero harebecngo modacyuruma enacudumeng kunengngo yofi  
deec, "Mong ye wasai-  
pusi nga ongea numumima yeac kibi mesuyau me  
mariau mema mekefudeu <sup>10</sup> ye Anutuac ngabaac waindoku seria nebeso.  
Waing imoc seria yombong dokugoc mi yerec yerecgea yeac ngabaac taseu  
kpacegec. Kpakemigec, yeng angero kpetiac amma ramamedaha, yeneac  
kicfu gerec nga sarafa\* manau kpendzeng kpeude. <sup>11</sup> Kpeu ngicngac wasai-  
pusi nga ongea numumikecma yeac kparaac kibi megec, yeneac kpendzeng-  
gac hosuc imoc naso wisic wisickea kpac erekefu yeni hadzing tofocnac  
ruae mong mi meficgegecde. <sup>12</sup> Ifi anu ngicngac kpetiac Anutuac singyoac  
modacma Yesu negensinggema kecdac, yeni modzotitia kpac seria kecbisia."

<sup>13</sup> Ifi negemba kurumennunac enacudumeng mong fingeacma yofi ede-  
nuec, "Ge kibi yofi ohona, 'Yaguc hanahama ngicngac Kebuaru kpeketa-  
hama homedae, yeni kenecnginagoc. O, Asungo yofi dede, angammemeng-  
ina gombangango modacyunukecdeac yeni ebicfunac tacnegenggecde.' "

<sup>14</sup> Anu ni hoeng mong kongac kongac henai. Hembra imocac witiau ngic  
mong siriha ngicac medac isoc tarec. (Danie 7:13)

Ye oruhau ira mong golngo memea heima mariau soe mong enarogoc wit  
fora heiandae, ifia metarec. <sup>15</sup> Metaru angero mongngo wamonnunac

\* 14:10: Imoc hoc dzedzea dzagec dzagec homuna mangana.

erema hoeng witiau tarec, yeng enacudumeng kunengngo arohoma yeac yofi deec, “Bangecac semeng fora anu kmememenaso bic hadacac amma ge forakpekpe soega sinema kpekpe ua mena.”<sup>16</sup> Ifi deu ngic hoeng witiau tarec, yeng witkpekpe soea bangecfu ukuma bangecac semeng fora kpeec.

<sup>17</sup> Kpeu angero mong kurumenggac womonunac ereec, ye ifingoc forakpekpeac soe mong enaragoc metarec. <sup>18</sup> Nga angero mong gerec garenggeudeac uayoac nga kuc mekefec, yeng arataunac hama enacudumeng kunengngo forakpekpeac soe enaragoc metarec, yeac yofi kparec, “Bangecac waing gbomea bic kpauedac. Imocac ge forakpekpeac soega enaragoc faina kenu waing gbarihagoc kpedzucnedacna.”

<sup>19</sup> Kparu angerongo forakpekpeac soea bangecfu ukuma bangecac waing gbarihagoc herecgema kpedzucyunuma Anutuac ngabaac waing tidzoc tidzohoac hoctoau ukuyunuec. <sup>20</sup> Ukuyunuu waing tidzoc tidzohoac hoctoau taong ngadeau nanu tidzamegac. Nga waing tidzoc tidzohoac hoctoauac sacngo enec, imoc becasic yeneac enacaieng kpeserema feu bangec 300 kiromitaacsoc mewakeec.<sup>†</sup>

## 15

<sup>1</sup> Ni kurumennu soi mong engena bibiagoc henai. Hembra angero 7 yeneng kpendzeng 7 wisic wisickeca metacgac. Anutuac ngabaac kpendzeng 7ngo fingecma kpac andarude. <sup>2</sup> Ni kondung garas isoc mong gerecgoc yerec yeregeca henai. Hembra ngicngac yeni wasaipusi nga ongea nga kibia amma kpara imocac kpeteagoc, yeni areng imoc yenigoc ewema firang anggec yeneng kondung witiau Anutuac gita menanggec. <sup>3</sup> Menamma yeni Anutuac wanacngiha Mose nga ramamedaha, yereac yegec yofi dema heigec, “Kebu Anutu Kuctoa mingina, angammemega imoc engena nga bibiagoc nga ge bangeha bangeha yeneac ngictau. Geac sing imoc dindingac nga fora. <sup>4</sup> Kebu ge kpetiac, imocac amma sasawango geac damuyunuu kpacga afehebisia. Amma geac faka dindingac didiu fingerecac bangeha bangeha ngicngac yeneng hama geac kicfu numugenggecde.”

<sup>5</sup> Ifi heigec wisickeu hembra kurumennu Anutuac womonnu dzadzahac katapaac kporucedzo naguya megec. <sup>6</sup> Megec angero 7 kpendzeng 7 metacdae, yeni wamba kongaha linengngo memea nga kperagiagoc heima fadeng golngo memea mokucnginau yerec yeregeca heima womonunac magec. <sup>7</sup> Magec wiac kekecnginagoc 4 yeneanunac mongngo angero 7 sokoc 7 yemmec. Sokoc imoc golngo memea nga Anutu kecede nga kecengkefude, yeac herebungo imohai wakema feec. <sup>8</sup> Feu Anutuac kibikperagi nga kuc, imocac hosucngo womong mewakeec. Ngic mongngo womonnu mi engengkecmanu angero 7 yeneac kpendzeng 7 sasawa wisickedarec.

## 16

<sup>1</sup> Ni womonunac enacudumeng kuneng mong negemba yeng angero 7 yofi edeyunuec, “Ngeni kemma Anutuac herebuac sokoc 7 bangecfu kpakegec mau.” <sup>2</sup> Ifi deu angero warac waracngo kemma sokoha bangecfu kpakeec. Kpakeu ngicngac wasaipusi kibi metacgac nga ongea numumigec, yeni kubecngina gereagoc nga mangana fingecyemmec. <sup>3</sup> Anu angero yohockangngo sokoha kondunnu kpakeu kondungngo sac amma

<sup>†</sup> 14:20: 300 kiromita imoc Finschhafen kemma Goroka herea, imocacsoc. Ye stadi 1600 ohoec. Stadi mocgu imoc mita 185 isoc ande.

meremma ngic homececac sac, ifi isoc anec. Nga wiac sasawa kekehagoc kondunnu feec, imoc homeec. <sup>4</sup> Homeu angero harebecngo sokoha doku yuyuya nga mafefeac kiwau kpakeu imoc sasawango sac anec. <sup>5</sup> Nga negemba dokuac angerongo deec,

“Kebu kpetiac mingnina, ge bicngoc kecma yaguc kecneec. Geac fakaga imoc dindingac, ifi anu wiac yomoc sasawa yoacfu faiyununec. <sup>6</sup> Nga yeneng areng ifia amma ngicngac kpetiac nga profete yeneac sac kpakegec. Imocac amma geng sac negecdeac gumecyununa negecdeac ngereede.”

<sup>7</sup> Ifi deu negemba aratango deec,

“O Kebu Anutu kuctoa mingina, ge yoac fora dema ngicngac fakangina isinggema sing dindingacfu forayangina denec.”

<sup>8</sup> Anu angero 4ngo sokoha wenacac witiau kpakeu imoc ngicngac gerehango yonohoudeac kuc meec. <sup>9</sup> Mema gereango homac yombong yonohou ngicngac yeni ubangina sifu mi dzigeneec. Yeni kpendzeng 7gac mingina Anutu, ye mi afehema yeaec kpara desure ammigec.

<sup>10</sup> Anu angero 5ngo sokoha wasaipusiatic tatacfu kpakeu yeaec eucerereng kundung kpeec. Kundung kpeu ngicngac yeni asira kuneng negemba nedzarangnina kirecgegec. <sup>11</sup> Amma yeni asirangina nga kubecnginaac amma kurumenggac Anutu desure ammima angammemenginaunac ubangina sifu mi dzigeneec.

<sup>12</sup> Anu angero 6ngo sokoha Eufрата dokutoau kpakeec. Kpakeu ngictau wenac ere ereaunac singnina meficgeudeac doku imoc dzikeec. <sup>13</sup> Dzikeu hembra sekactoa nga wasaipusiatic dumbengngiraunac amma profete ikoha, yeaec enaraunac asu harebec wononginagoc erema magec nga yeni siricngina waborac isoc.

<sup>14</sup> Asu imoc yeni hadehade mangana yombong amma negensinggecdeac faka kuhagoc meandae. Nga yeneng bangec sasawaac ngictau Anutu kuctoa mingina, yeaec uamemetoa, naso imocac dzikacfu kpedzucyunudacgecac yenearu kenggecde.

<sup>15</sup> “Negenggec, ni hamangecmeme ngic isoc habade. Haba mong ye gbori kecma wambaya garengge kefu ngicngac yeneng sengganga mi henggecde nga gamea mi henggecde, ngic ifia ye kenehagoc.”

<sup>16</sup> Nga asu wononginagoc yeni ngictau bangec mong kpara hebraiao yoacfu Hamagedong, ihai kpedzucyunugec.

<sup>17</sup> Kpedzucyunugec angero 7ngo sokoha sawau kpakeu womonnunac enacadumeng kuneng ngictau tatacfunac hama deec, “Bic fingecdac.” <sup>18</sup> Ifi deu piratac nga udumeng amma gbururung fingeru, usoctoa meec. Nga ngicngac bangecfu keceregec, imohai usoc kunengtoa nga engenayombong ifia mong mi meec. <sup>19</sup> Usoc mema taongtoa mendziru harebec anec. Nga ye bangeha bangeha yeneac taong homac hembarackeec. Hembarackeue Anutungo Babirong taong negensiu ngaba nga herebuac waingsokoha miec. <sup>20</sup> Anu nuc sasawa woragec nga ngicngac yeni tiki hofocma monggoc mong mi meficgegec. <sup>21</sup> Nga kurumennunac nomang gbomea kia isoc ngicngac witinginau mau yeni kpendzeng kuneng kpegec. Gbomea mocguac ebiha imoc 30 kiroacsoc anec nga ngicngac yeni Anutu desure ammigec. Nga nomang gbomeango kpendzeng kuneng yombong yemmeec.



## 17

<sup>1</sup> Angero 7 sokoc 7 mekegcec, yenearunac mongngo nearu hama nigoc denengeng amma yofi deec, “Singtoangac kuneng doku homac yeneac witinginau tacde, ye angammemeaac turunga migece. Ge hana imoc edzacgubade. <sup>2</sup> Bangecac ngictau yeneng yegoc serofaka angcec nga yeac serofakaac waingdokungo ngicngac bangecfu kecdae, yeneac ubangina mesufuec.”

<sup>3</sup> Nga angerongo Asuac kucfu menuu bangec kisiu dokuya kpacfu kenic. Kemma hembra ngac mong wasaiyang kpauc kpaucac witiu tarec. Nga wasaiyang ye oruha 7 nga baiha 10 amma sebia sasawa imoc desure kpacngo wake wakea. <sup>4</sup> Ngac ye wamba giweng giweng nga kpauc kpauc nga gol nga hoc gombunga amma kubu buma kuneng heima kperagiagoc tarec. Nga ye kpakenec mong golngo memea, imohai kaiserofakaya wonongagoc wake wakea mariahu metarec. <sup>5</sup> Amma yeac mesuyau kpac mong negensufuya oho ohoya fec. Kpac imoc Babirong taongtoa, ye bangecac singtoangac amma faka mangana yombong yeneac nonggongina ande.

<sup>6</sup> Nga ngac henai, yeng ngicngac kpetiac nga Yesuac dedekperagi yoac dema kegc, yeneac sac nema ubasufu anec. Anu ni ye hemma homac kpidohoi. <sup>7</sup> Kpidohoba angerongo yofi edenuc, “Ge mi kpidohona. Ni ngac nga wasaiyang oruha 7 nga baiha 10 ngac atickekece, yereac negensufu edegubade. <sup>8</sup> Ge wasaiyang henna ye bicngoc kefec nga yaguc mi kece. Ye teng buya kpac imohacnac eredac nga ye mangedacma kpac anudeac kenude. Anu ngicngac bangecfu kegc kpacngina bangec hanac hanaheunac kekecac kibi uho ohoya mi fede, yeni wasaiyang bicngoc kefec nga yaguc mi kecma haude, imocac amma yeni hemma kpidohogecde.

<sup>9</sup> Yeni negen negengtegec nga negen negeng irec ireckea mekecbesonga. Oruha 7 imoc tiki 7 anu ngac ye tataha yeneac witinginau ande. <sup>10</sup> Nga yeni ifingoc ngictau 7. Yenearunac 5 bic makpegec nga mocgu taru mong ye mi hadacngoc. Ye hama naso kapiancec tacbeso. <sup>11</sup> Wasaiyang bicngoc kefec nga yaguc mi kece, ye ifingoc ngictau kpetea 8 nga ye sifu 7 yenearunac mong amma mangedacma kpac anudeac kenude.

<sup>12</sup> Baiha 10 hennec, imoc ngictau 10 bangecac eucererengngina mi megecngoc, yeni ine aua mocguacsoc wasaiyanggoc ngictau ua megecdeac uayoac nga kuc yemmegec megece. <sup>13</sup> Yeni negen negeng mocgu mekemca uakibingina nga kucngina wasaiyang wamima yeng kuc imoc mekefude. <sup>14</sup> Amma yeni ramamedahagoc ewemagec yeng firang anude. Imoc yofiac, ramamedaha ye kebu yeneac Kebu nga ngictau yeneac Ngictau. Nga ngicngac kpacyunuyunuya nga segec segereyunuya amma ngicngac ramamedaha negensinggema kecdae, yeni yegoc firang anggece.”

<sup>15</sup> Anu angerongo yofi edenuc, “Singtoangacngo doku homac yeneac witinginau tacde, imoc yeni habu toa, sebi siric hania hania nga yoacga yoacna amma bangeha bangeha imoc yeneac ngicngac. <sup>16</sup> Ge wasaiyanggac baiha 10 hennec, yeni wasaiyanggoc singtoangac ngadehema wiara megec ye senggang entegeng tarude. Taru yeni yeac fusia nema ngac imoc gerecfu ukugec dezude. <sup>17</sup> Anutungo ubanginau negen negeng yemmeecac yeni negen negeng mocgu amma ngictau uac kucngina wasaiyang migece. Mima yeneng wasaiyang yoara modacgec kecma Anutungo negene cfu uaareng sasawa mesigece. <sup>18</sup> Anu ngac hennec yeng taongtoa nga bangecac ngictau yeneac witiu ngictau uac kuc metacde.”

## 18

<sup>1</sup> Imocac ngadeau hembra angero mong garengyunuudeac uayoac nga kuc-toa metarec, ye kurumennunac mau yeac kperagingo bangec mekperagiec.

<sup>2-3</sup> Mekperagi u enacudumengtoayango kucgoc yofi arohoc,

“Babirongta ye makpema hadehade yeneac amabangec nga asu wonongnginagoc sasawa amma neng sasawa mangac manganea wonongnginagoc, yeneac amabangec fingerec.

Yeac kaisero fakayaac waindoku bangeha bangeha ngicngac sasawa yeni imoc negec. Bangecac ngictau yeni yegoc serofaka anggec nga bangecac emekeng emehaac ngickuneng yeni yeac kuc nga finactoa gombunga uaya kpac, ihacnac finactoangingagoc anggec.”

<sup>4-5</sup> Anu negema kurumennunac enacudumeng mongngo yofi deec,

“Ngicngac focna, yeac kopocsigoc mi anggecde nga kpendzenga mi kpegecdeac ngeni yearunac wama kenggec.

Yeac kopocsingoc kurumennungoc heiengkefu Anutungo imoc negensima kecede. <sup>6</sup> Nga yeng ngeni ngemmeec, ngeni imocac turunga ifi merem-mima angammemeyaacsoc naso yohockang amma migec. Nga ye kpakenec yerecgeec, imohai noc wiac tarec negemma ngeneng naso yohockang yerecgemigec. <sup>7</sup> Ifi anu ye yengena sebia meemma finac nga kecec uaya kpac, imohai faiemee, imocac sirihau kpendzeng nga ubahodung migec. Ye ubeau yofi dekecede, ‘Ni hodzec kpac, ni ngactau kecma ubahodung naric mi negembade.’ <sup>8</sup> Imocac amma uameme mocguac manau homec nga ubahodung amma here homehome hanahemima yeac witiau kpendzeng ifia fingeru ngac ye gerecfu dzeude. Imoc yofiac, Kebu Anutu ye kuhagoc, yeac faka isinggema foraya desiec.

<sup>9</sup> Nga bangecac ngictau ngac yegoc serofaka angkecgec amma finactoa nga kecec uaya kpac mekecgec, yeni gerehaac hosuc hemma yeac kiasonggong anggecde. <sup>10</sup> Yeni yeac kpendzengac kengec amma hereau yombong namma yofi degecde,

‘Ge aua mocguac manau hanahema yoacfu faifaiguac forayaga bic hadacde. Imocac amma yei yei Babirong, ge taongtoa nga taong kucgagoc.’

<sup>11</sup> Nga bangecac emekeng emehangic yeni finacngina wageu faiandae, imoc mongngo monggoc mi bummeudeac yeac amma kiasonggong anggecde.

<sup>12</sup> Finac goa, gol nga siriwa amma hoc seria nga gombunga nga kubu buma kuneng amma wamba gombunga siricngina giweng giweng nga kpaua amma hiring harang. Nga ic sasawa homuna gombunga amma wiac sasawa erefanggac baihang memea nga wiac hania hania ic seria buma kunengngoc memea amma kopango nga aiengngoc memea nga hoc seria nga kibia gombunga wiac sasawa imocngoc memea. <sup>13</sup> Imoc mosoki nga wiac hosuc homung kerengagoc nga kerecdoku homuna gombunga nga hosuc homuna gombunga kendo isoc seria amma waingdoku nga kerecdoku nga flawa uuha nga wit gbomea. Burumaka nga rama amma becasic nga keretac. Nga ngicngac sebi nga ubaonganginagoc momoc wanac megec, imoc sasawa wagenginau wakema kengha anggec.

<sup>14</sup> Amma geac ubasebigango wiac forayaac ammikefec, imocngoc waguma wiac sasawa gombunga kibikperaginginagoc, imoc gearunac bic woraec. Woraus ifia monggoc mi meficgegecde.

<sup>15</sup> Ifi anu emekeng emehangic yeni singtoangacngoc meficyunuu wiac sasawa yomoc faima finactoangingagoc anggec, yeneng yeac kpendzengac

kengec amma hereau yombong namma kiacsonggong anggecde. <sup>16</sup> Amma yofi degecde,

'Yei yei taongtoa, ge wamba gombunga giweng giweng nga kpauc kpauc nga gol nga hoc seria buma kuneng, amma kubu buma kuneng, imocngo faifaia heidang.

<sup>17</sup> Imoc aua mocguac manau finactoa sasawa gerecngo memanganeu kpac andarec.' Amma wage kisang kisang sasawa nga yeneac bagenginau wageu ua meandae amma ngicngac sasawa kondunnu ua meandae, yeni hereau namma <sup>18</sup> yeac gerecac hosuc hemma yofi dema kpacgec,

'Taongtoa ifia mong mi fede, kpac.'

<sup>19</sup> Yeni orucnginau sendung ukuma kiacsonggong amma kpacma degec, 'Ye aua mocguac manau gerecngo memanganeu kpac anecac amma, yei yei taongtoa. Nga yeac ngicngac sasawa wagenginagoc kondunnu kengandae, yeni yearunac finactoinagoc anggec.'

<sup>20</sup> Anutungo ngeneac turunga yeac witiu faiecac amma kurumeng nga kpetiac areng kecdae nga aposoro amma profete, ngeni yeac amma so-gaibisia."

<sup>21</sup> Anu angero kuhagoc mong, yeng dzamandzingtoa mong mema kondunnu ukuma yofi deec,

"Yeni Babirong taongtoa gereagoc kondunnu ifi ukugec monggoc naric mi meficgegecde. <sup>22</sup> Ukugec gitakpekpe nga yegec heihei nga kungac fifi fifi nga trampet fifi fifi, imoc geac manau naric monggoc mi negenggecde. Nga marikibi hania hania imocac uamemengic, yeni geac manau monggoc naric mi kecgecde. Nga hocfu flawa uuha medzameandae, imocac udumeng geac manau monggoc naric mi negenggecde.

<sup>23</sup> Geac manau kifaac kperagia monggoc naric mi kperagiude. Nga ngicngac meturangemebeso andape, yereac ubangerecac arohoandae, udumeng ifia geac manau monggoc naric mi negenggecde. Ge mosoc fakagango bangeha bangeha imocac ngicngac sasawa uba mesufu ayemmenec. Imocac amma geac emekeng emehangic yeni bangecac ngickuneng kecgec. <sup>24</sup> Nga taongtoa imocac manau profete nga ngicngac kpetiac amma ngicngac sasawa bangecfu yunuhomegec, yeneac sacngina meficgegec."

## 19

<sup>1</sup> Imocac ngadeau kurumennu areng kuneng yombong ubaudumeng isoc negemba yofi degec,

"Halleluya, memengerec nga kuc kibikperagiagoc, imocngo Anutuninaac ande. <sup>2</sup> Imoc yofiac, ye ngicngac yoacngina isinggema fora nga dindngac desiude. Amma yeng singtoangac kuneng serofakayango bangec memanganee, yeac faka isinggema wanacarengfora yeneac sacnginaac turunga yearunac meec."

<sup>3</sup> Yeni monggoc yofi degec,

"Halleluya, yeac hosuc imoc naso wisic wisicke kpac engkefude."

<sup>4</sup> Ifi degec ngic enara <sup>24</sup> nga wiac kekecnginagoc <sup>4</sup>, yeni makpema Anutu ngictau tatacfu tacde, ye numumima yofi degec,

"Imoc fora, halleluya."

<sup>5</sup> Ifi degec enacudumeng mong ngictau tatacfunac erema yofi deec,

"Anutuac wanacarengfora nga ngicngac kuneng nga kapia amma ngicngac eweheimidae, ngeni dengeregec."

<sup>6</sup> Ifi deu udumeng mong negemba, imoc areng kuneng yeneac enacudu-meng isoc anec. Imoc doku homac yeneac udumeng nga gbururungtoaac udumengtoa isocngo yofi degec,

“Kebu Anutunina kuctoa minginango ngictau bic amma kecede, halleluya.

<sup>7</sup> Ramamedahaac memeturangnaso hau enemango bic efaidacac amma yeac ubangerec negemba sogaima ramamedaha afehebisina.

<sup>8</sup> Ifi anu wambaya gombunga kongaha nga kibikperagiagoc heiudeac migece. Wambaya gombunga imoc ngicngac kpetiac yeneac angam-meme dindingac.”

<sup>9</sup> Ifi deu angerongo yofi edenuc, “Ge kibiu yofi ohona, Ramamedahaac memeturangac fatau kpacyunuyunuya, yeni kenecnginagoc.” ifi dema yofi deec, “Anutuac yoac yomoc imoc fora.”

<sup>10</sup> Ifi deu ye numumbadeac haniau makpeai. Makpeba yeng yofi edenuc, “Ifi mi anna! Ni ge nga tosofocga Yesuac dedekperagi metacdae, ngeneac wanac ogongina. Yesuac dedekperagi imoc profeteyoacac asu. Imocac amma ge Anutu numumina.”

<sup>11</sup> Imocac witiau kurumeng anggeu henai. Hembra ngic mong becosic mong kongac kongac, imocac witiau tarec. Nga tarec, yeac kpac yofi, Yoacdedea modackecde nga Yoac fora modackecde. Amma ye ngicngac yoacfu faiyunuude nga dzikau keema faka dindingac modarude. <sup>12</sup> Ye kiwa imoc gerec borang isoc nga oruhau ira homac heiec. Amma kpara mong oho ohoya, imoc mongngo mi negende, yengenaocsac negende. <sup>13</sup> Nga ye wamba mong sacfu nemuc nemuruckea heiec. Ngic yeac kpara imoc Anutuac yoac. <sup>14</sup> Nga kurumenggac wasaiareng ye modacgec, yeneac becosicngina kongac kongac nga wambangina siriha gombunga imoc kongac nga dzuac dzuara. <sup>15</sup> Nga enaraunac wasai beang mong enaragoc ereec, ye imocngo bangeha bangeha imocac ngicngac yunuude nga ye aiengyasungo garengyunuude. (*Mitiyegec 2:9*)

Amma ye Anutu kuctoa mingina yeac ngaba nga herebuac waing tidzoc tidzohoac hoctoau tidzohoude. <sup>16</sup> Kporuhau nga kopohau kpac mong yofi oho ohoya feec, “Ngictau yeneac Ngictau nga kebu yeneac Kebu.”

<sup>17</sup> Hembra angero mongngo wenac manau namma enacudumeng kunengngo arohoma neng sasawa sawakebangau kpututuckeandae, yeni yofi edeyunuec, “Ngeni kpedzucnema Anutuac yakatoau hama <sup>18</sup> ngictau nga wasaienara amma ngic kucnginagoc negec. Ngeni becosic nga ngicngac yeneac witiau tacdae, yeneac sebifusingina negec. Ngeni ngicngac witicngina kpac nga wanac meyunuyunuya amma ngicngac kuneng nga kapia, yeneac sebifusingina ifingoc negec.”

<sup>19</sup> Anu ni wasaipusi nga bangeac ngictau wasaiarenginagoc yenenai. Yenemba yeni ngic becosic witiau tarec, ye nga wasaiarengfora yenigoc dzikac kpegecdeac kpedzucnegec. <sup>20</sup> Nga profete ikohango wasaipusi kicfu faka kuhagoc mekefu ngicngac wasaipusi kibi megec nga yeac ongea numumigec, yeni ubamesufu ayemmeec. Anu yeneng wasaipusi nga profete ikoha yeri meyuruma kondung gerec nga sarfango\* dzema kecede, imocac manau gbori ukuyurugec. <sup>21</sup> Nga becosic witiau tarec, yeac enaraunac wasai beang ereec, imocngo tosea yunu homegec. Homegec neng sasawango sebifusingina negec gebecyunuec.

\* 19:20: Imoc hoc dzedzea dzagec dzagec homuna mangana

## 20

<sup>1</sup> Imocac witiau angero mong henai. Hembra ye kurumennunac maec nga yeng teng buya kpac, imocac ki nga sengtoa mong mariaun metarec. <sup>2</sup> Metacma sekactoa, boudzoc esea kpara mong Mangana mingina nga Satang, ye mema kifa 1 tausenggacsoc tarudeac witickeec. <sup>3</sup> Witickema ngicngac ikocfu monggoc mi wangepcyunuudeac teng buya kpac, imohai ukuma nagu heimima kpaef faiec. Faiu kecma kifa 1 tauseng wisickeu monggoc naso kapienec ye yungegcede.

<sup>4</sup> Anu ni ngictau tatak homac henai. Ngictau tatak imocac witiau tacgec, yeni ngicngac yoacfu faiyunugecdeac uayoac yemmeyemnea. Amma wasaipusi nga ongea mi numumima kibia mesunginau me maringinau mi megec yeneng Yesuac dedekperagi amma Anutuac yoac dekperagigec. Imocac amma ngic yeneng ubangina herecgegec, yeneac ubaongangina henai. Hembra yeni sasawango kifa 1 tausenggacsoc Kristogoc kecma ngicngac garengyunugecdeac ua megec. <sup>5</sup> Yomocngo homecfunac yacyacac warac warac ande. Nga tosea homegec, yeni mi gborima kecmagec kifa 1 tauseng wisickeec.

<sup>6</sup> Nga Kebungo ngicngac warac warac yacyac imohai metorokpe ayemeude, yeni kpetiac nga kenecnginagoc. Nga homec kpetea yohockangngo yeni garengyunuudeac kuc mong mi metaru yeni Anutu nga Kristoac womong gareng kecma kifa 1 tauseng yegoc ngicngac garengyunugecde.

<sup>7</sup> Anu kifa 1 tauseng wisickeu Satang witicamaunac yungegcede. <sup>8</sup> Yungegcec, yeng kemma bangeha bangeha imocac ngicngac ikocfu wangepcyunuma ngicngac bangectoa bangec, imocac tegia 4 kecdae, yeneac kpacarenggina Gogo nga Magogo, yeni dzikac kpegecdeac kpeturangnyaunuude. Imoc yeneac kpetengina kondung tegiaac sangi isoc. <sup>9</sup> Yeni bangeha bangeha, ferecgema kpetiac areng tacgec amma songotaongtoa, imohai kemma yerecgema nanggec. Nanggec kurumennunac gerecngo mama yonohodarec. <sup>10</sup> Yonohodaru mangana minginango ikocfu wangepcyunuec, ye gerec nga sarafa\* kondunnu ukugec. Nga wasaipusi nga profete ikoha, yeni imohai bic kecma hadzing tofocnac kpendzeng kpegecde nga kpekengkechesandae, imoc wisic wisickea kpac.

<sup>11</sup> Imocac witiau ngictau tataktoa kongac kongac mong henai. Nga imocac witiau tarec, yeac kiwaunac bangec nga sawakebanga woraec tatakngira mong mi feec. <sup>12</sup> Nga ngicngac kuneng kapia bic homegec yenenai. Yenemba yeni Anutuac kicfu nammagec kibi homac mesima kibi mong kpara Kekecac kibi mesigec, kibi imohai homegec yeneac angammemengina oho ohoya fede. Nga yeni imoc hemma yoacngina desigec. <sup>13</sup> Nga kondung manau homegec kecdae, kondungo yeni wayunuec. Homecac eucerereng manau homegec kecdae, ye nga homecngo yeni wayunuoc. Ifi anu ngicngac tembus tembus angammemenginaacsoc yoacngina desigec. <sup>14</sup> Faiyunuma homec nga homecac eucerereng gereckondunnu ukugec. Imocngo homec kpetea yohockang ande. <sup>15</sup> Nga mongngo kpara kekecac kibi uho ohoya mi feec, ye kondunggac gerecfu ukugec.

## 21

<sup>1</sup> Ni kurumeng nga bangec gboria yerenai. Imoc yofiac, bangec nga kurumeng warac feoc, yeni kpac anoc nga kondung imoc monggoc mi feec. <sup>2</sup> Ni Yohanengo taongtoa kpetiac, Yerusareng gboria hembra Anutuarunac

\* **20:10:** Imoc hoc dzedzea dzagec dzagec homuna mangana

kurumennunac maec. Mama efaima ngac ngicfu kende, ifi isoc ewe-bingehaac amma siriha gombunga yombong anudeac memengere ammgec tarec. <sup>3</sup>Taru ni enacudumengtoa ngictau tatacfunac negemba yofi deec, “Henggec Anutuac kporuchedzongo ngicngac yenigoc kefu yeni yeac areng anggec Anutu yengenaoc yenigoc kecma Anutungina kefude. <sup>4</sup>Amma yeng kickumangina sasawa kicnginaunac mekerenggeude. Nga homec nga ubahodunggac kiasonggong amma asira monggoc mi feude. Wiac warac feec, imoc bic kpac anec.”

<sup>5</sup>Nga Kebu ngictau tatacfu tarec, yeng yofi deec, “Henggec, ni wiac sasawa gboria mebade.” dema edenuc, “Ge yoac imoc ohona nocac yoac yomoc fora nga ngicngac yeneng imoc negensinggecdeacsoc ande.” <sup>6</sup>Dema monggoc edenuc, “Imoc bic fingeccac. Ni A nga Y, hanac hanahea nga wisic wisickea. Ngicngac mongngo dokuac ammide, ye dokukiwaunac kekecac doku eng neudeac mibade. <sup>7</sup>Firang anude, yeng wiac sasawa yomoc maridzoming meu neng yeac Anutu amba yeng medacna anude. <sup>8</sup>Anu ngic karoaha nga negen negensinggina kpac amma fakangina mangana wonongagoc nga ngickpeke amma serongic nga mosocfaka angandae amma nemu numumiandae nga ikocngic sasawa, yeni ine kondung gerec nga sarafa dzema kecde, imohai torokpegecde. Yomocngo homec kpetea yohockang anude.”

<sup>9</sup>Anu angero seweng yeni sokoc seweng kpendzeng seweng wisic wisickea wake wakea metacgec, yenearunac mongngo nearu hama deec, “Ge hana, ni ramamedahaac enembingeha edzacgubade, ye yeac enema.” <sup>10</sup>Ifi deu Asungo nearu ua meu tiki kuneng nga herea, imocac bumau menu emma kpetiac taongtoa Yerusareng, kurumennunac Anutuarunac maecmoc, imoc edzacnuec. <sup>11</sup>Ye Anutuac kuc nga kibikperagigoc amma hoc seria buma kuneng nga yaspis hoc seria, ifia isoc kperagiagoc gontaning amma pirac pirac heiec. <sup>12</sup>Nga odaya hocngo memea, imoc kuneng nga herea amma naguya 12 nga naguyau angero 12 nanggec. Amma naguyau ifingoc Israeac kisc 12 yeneac kpacngo nanec. <sup>13</sup>Anu wenac ere ereaubigeng nagu harebec, northbigeng nagu harebec nga sautbigeng nagu harebec amma wenac keme kemeaugeng nagu harebec nanggec. <sup>14</sup>Taongtoaac oda imoc hocngo memea nga imocac titiseria 12. Amma titiseria 12 imohai ramamedahaac aposoro 12 yeneac kpacngina oho ohoya nanec.

<sup>15</sup>Anu angero nigoc denegeng anec, yeng taongtoa nga naguya amma oda hocngo memea, imocac kpete meudeac kpetememeyasu mong golngo memea menanec. <sup>16</sup>Menanu hembra taongtoa ye titiha 4 amma tegia sasawa yeneac kpetengina socfungoc anec. Nga angerongo kpetememeyasungo kpetea meu kpete imoc 2 tauseng 2 handret 20 kiromita anec nga tegia amma witiau kpetengina socfungoc anec. <sup>17</sup>Ye odaya kunenggac kpetea meu imoc 72 mita anec.† Kpete imoc ngicngac yeneac kpete amma angero yeneac kpete ifingoc ande. <sup>18</sup>Oda imoc yaspa hocngo memea nga taongtoa imoc gol tegengngo memea amma garas imoc isoc gontaning anec. <sup>19</sup>Nga taongtoaac oda titiseria hocfu siricngina fingerudeac hoc seria sasawa buma kuneng, ifi faigec. Titiseri warac warac imohai yaspa faigec, ngade, imohai sapaia, harebecfu karsedong nga 4u emerare, <sup>20</sup>5 imohai sadoniks, 6fu koniriang, 7nu krisorite, 8 imohai berire, 9nu topase, 10 imohai krisoprasede, 11nu haiasing amma 12 imohai ametisede, ifi faifaia nanec. <sup>21</sup>Ihai naguya 12 yeni

\* **21:16:** 2 tauseng 2 handret 20 kiromita imoc Vanimo kemma Honiara imocacsoc. Ye stadi 12 tauseng ohoec. Stadi mocgu imoc mita 185 isoc ande. † **21:17:** Ye stadi 144 deec.

kubu gbomea kuneng 12. Nga nagu tembus tembus imoc gbomea mocgu mocgungo memea. Amma taongtoaac sing imoc goltegegngng memea, garas isoc ngadeau naric hentegecnade.

<sup>22</sup> Nga imocac manau womong mong mi henai. Imoc yofiac, Kebu Anutu kuctoa mingina nga ramamedahango womonga andape. <sup>23</sup> Nga Anutuac kuc nga kibikperagiango taongtoa mekperagiec nga ramamedahango kperagia anec. Imocac amma taongtoa ye wenac me afokperagi uangira kpac, imohai monggoc mi mekperagiecede. <sup>24-25</sup> Nga tofocnac imohai mi feudeac naguya wenacfu naric mi heigecde. Anu bangeha bangehaac ngicngac yeni imocac kperagiau kengha anggec bangecac ngictau kibikperagingina mema imohai faigecde. <sup>26</sup> Faigec bangeha bangeha, imocac ngicngac yeneng afec afehe nga kibikperagingina imocac manau mekenggecede. <sup>27</sup> Amma wiac mong wonongagoc nga ngicngac angammemengina mangac manganea amma ikocnginagoc, yeneng taongtoa imocac manau naric mi enggecede, kpac. Ngicngac kpacngina ramamedahaac kekecac kibiufede, yenengsac enggecede.

## 22

<sup>1</sup> Imocac witiau angerongo doku mong mafefea kekecac dokugoc edzacnuec. Doku imocngo gontaning pirac pirac amma Anutu nga ramamedaha yereac ngictau tatacfunac erema <sup>2</sup> taongtoaac singtoa botuhau mekengfeec. Feu tegia noboc noboc imohai kekecac ic nanggec, yeni kifasoc foranasoya 12. Yeni afosoc foragoc angkecgec amma ic imocac maria ngiha ngiha yeneac hafeiac memengerec ande. <sup>3</sup> Nga sowec sasawa kpac andarude. Anutu nga ramamedahaac ngictau tatacngira imohai taru wanacarengfora ye kjang kpemigecde. <sup>4</sup> Yeni yeac kicmesuya henggecede nga yeac kpara mesunginau oho ohoya feude. <sup>5</sup> Imohai tofocnac monggoc mi anude nga kifa me wenacac kperagi imoc yeni uangina kpac, nocac Kebu Anutungo mekperagiyunuude. Nga ngicngac yeni ngictau ua megec nga mekecgec imocac nasoya wisic wisickea kpac.

<sup>6</sup> Anu yofi edenuc, “Yoaac yomocngo fora nga ngicngac yeni imoc nengsinggegecdeacsoc ande. Amma profete yeneac asunginaac Anutu, yeng wanacarengfora wiac bic fingebeso, imoc henggecdeac amma angeroya sueec.” <sup>7</sup> “Henggec, ni bic habade. Mong ye profete yeneac yoac kibi yomohai oho ohoya fede, imoc gombunga ongonggema mekefude, ye kenehagoc.” <sup>8</sup> Ni Yohanengo wiac yomoc hennegeng anai.

Nga hembra wisickeu angerongo wiac edzacnuec, yeac haniau numumibadeac makpeba <sup>9</sup> yeng yofi edenuc, “Ifi mi anna. Ni ge nga tosofocga profete, yeni amma ngicngac kibi yomocac yoac gombunga ongonggema mekecandae, ngeneac wanac ogongina. Ge Anutu numumibesena.

<sup>10</sup> Naso wegenedeac amma ge kibi yomocac profeteyoac kasoyagoc wana mi febeso. <sup>11</sup> Mong ye faka dindingac mi angande, ye faka imocngoc mekecbeso. Nga wonongagoc kecede, ye ifingoc kecbeso. Nga faka dindingac angkecede, ye dindingacngoc kecbeso. Amma kpetiac kecede, ye kpetiac kekecfu yadiseriudeac ua mekecbeso.”

<sup>12-13</sup> “Henggec, ni A nga Y, warac warac nga ngade amma hanac hanahea nga wisic wisickea. Ni bic hama ngicngac tembus tembus angammemenginaacsoc turunga yemebadeac mehabade. <sup>14</sup> Mehaba ngicngac kekecac icac deyecdeyemnea nga naguusing taongtoau naric eregecede amma wambangina dzuac dzuara, yeni kenecnginagoc. <sup>15</sup> Anu ngicngac



kasi isoc kecdae nga mosocfaka mekecdae nga seroareng amma ngick-pekpefaka mekecdae nga nemu numumiandae amma sasawango ikoc-fakaac songo negemma ikoc angandae, yeneng ine ngadeau kegecde. <sup>16</sup> Ni Yesungo angerona sueba yeng dedekperagi yomoc kpebung sasawa nge-nearu dekperagingemmeudeac haec. Ni Dawidiac sera nga bangeha amma asoacac asomeng kibikperagiagoc.”

<sup>17</sup> Asu nga enembingeha yeri yeac, “Ge hana.” ifi deec mongngo imoc negende, yeng, “Ge hana.” ifi debeso. Mong ye dokuac homeande nga dokuac ammiande, yeng hama kekecac doku buma kpac eng mema nebeso.

<sup>18</sup> Anu ngicngac kibi yomocac profeteyoac negendae, ngeni sasawa gorongina kpema yofi deduae, “Mongngo yoac yomohai nande, imohai yoac mong torokpeudeu Anutungo ye kpendzeng kibi yomohai oho ohoya fede, imoc torokpemiude. <sup>19</sup> Amma mongngo yoac yomoc nande, imohacnac profeteyoac mong meickeudeu Anutungo kekecac icfunac yeac noboha nga taongtoa kpetiacac manaunac noboha amma wiac sasawa kibi yomohai oho ohoya fede, imohacnac meickeude.” <sup>20</sup> Anu wiac yomocac dekperagingem-meude, yeng yofi dede, “Foracngoc, ni bic habade.” Imoc fora. O Kebu Yesu, ge hana. <sup>21</sup> Kebunina Yesu Kristoac wosoefacngo Anutuac ngicngac kpetiac sasawa ngenearu febeso, imoc fora.

## Read the New Testament daily

### *January*

date	Scripture
1	Mataio 1:1-2:12
2	Mataio 2:13-3:6
3	Mataio 3:7-4:11
4	Mataio 4:12-25
5	Mataio 5:1-26
6	Mataio 5:27-48
7	Mataio 6:1-24
8	Mataio 6:25-7:14
9	Mataio 7:15-29
10	Mataio 8:1-17
11	Mataio 8:18-34
12	Mataio 9:1-17
13	Mataio 9:18-38
14	Mataio 10:1-23
15	Mataio 10:24-11:6
16	Mataio 11:7-30
17	Mataio 12:1-21
18	Mataio 12:22-45
19	Mataio 12:46-13:23
20	Mataio 13:24-46
21	Mataio 13:47-14:12
22	Mataio 14:13-36
23	Mataio 15:1-28
24	Mataio 15:29-16:12
25	Mataio 16:13-17:9
26	Mataio 17:10-27
27	Mataio 18:1-22
28	Mataio 18:23-19:12
29	Mataio 19:13-30
30	Mataio 20:1-28
31	Mataio 20:29-21:22

### *February*

date	Scripture
1	Mataio 21:23-46
2	Mataio 22:1-33
3	Mataio 22:34-23:12
4	Mataio 23:13-39
5	Mataio 24:1-28
6	Mataio 24:29-51
7	Mataio 25:1-30
8	Mataio 25:31-26:13
9	Mataio 26:14-46
10	Mataio 26:47-68
11	Mataio 26:69-27:14
12	Mataio 27:15-31
13	Mataio 27:32-66
14	Mataio 28:1-20
15	Mareko 1:1-28
16	Mareko 1:29-2:12
17	Mareko 2:13-3:6
18	Mareko 3:7-30
19	Mareko 3:31-4:25
20	Mareko 4:26-5:20
21	Mareko 5:21-43
22	Mareko 6:1-29
23	Mareko 6:30-56
24	Mareko 7:1-23
25	Mareko 7:24-8:10
26	Mareko 8:11-9:1
27	Mareko 9:2-29
28	Mareko 9:30-10:12

date	Scripture
1	Mareko 10:13-31
2	Mareko 10:32-52
3	Mareko 11:1-26
4	Mareko 11:27-12:17
5	Mareko 12:18-37
6	Mareko 12:38-13:13
7	Mareko 13:14-37
8	Mareko 14:1-21
9	Mareko 14:22-52
10	Mareko 14:53-72
11	Mareko 15:1-47
12	Mareko 16:1-20
13	Ruka 1:1-25
14	Ruka 1:26-56
15	Ruka 1:57-80
16	Ruka 2:1-35
17	Ruka 2:36-52
18	Ruka 3:1-22
19	Ruka 3:23-38
20	Ruka 4:1-30
21	Ruka 4:31-5:11
22	Ruka 5:12-28
23	Ruka 5:29-6:11
24	Ruka 6:12-38
25	Ruka 6:39-7:10
26	Ruka 7:11-35
27	Ruka 7:36-8:3
28	Ruka 8:4-21
29	Ruka 8:22-39
30	Ruka 8:40-9:6
31	Ruka 9:7-27

date	Scripture
1	Ruka 9:28-50
2	Ruka 9:51-10:12
3	Ruka 10:13-37
4	Ruka 10:38-11:13
5	Ruka 11:14-36
6	Ruka 11:37-12:7
7	Ruka 12:8-34
8	Ruka 12:35-59
9	Ruka 13:1-21
10	Ruka 13:22-14:6
11	Ruka 14:7-35
12	Ruka 15:1-32
13	Ruka 16:1-18
14	Ruka 16:19-17:10
15	Ruka 17:11-37
16	Ruka 18:1-17
17	Ruka 18:18-43
18	Ruka 19:1-27
19	Ruka 19:28-48
20	Ruka 20:1-26
21	Ruka 20:27-47
22	Ruka 21:1-28
23	Ruka 21:29-22:13
24	Ruka 22:14-34
25	Ruka 22:35-53
26	Ruka 22:54-23:12
27	Ruka 23:13-43
28	Ruka 23:44-24:12
29	Ruka 24:13-53
30	Yohane 1:1-28

date	Scripture
1	Yohane 1:29-51
2	Yohane 2:1-25
3	Yohane 3:1-21
4	Yohane 3:22-4:3
5	Yohane 4:4-42
6	Yohane 4:43-54
7	Yohane 5:1-23
8	Yohane 5:24-47
9	Yohane 6:1-21
10	Yohane 6:22-40
11	Yohane 6:41-71
12	Yohane 7:1-29
13	Yohane 7:30-52
14	Yohane 7:53-8:20
15	Yohane 8:21-30
16	Yohane 8:31-59
17	Yohane 9:1-41
18	Yohane 10:1-21
19	Yohane 10:22-42
20	Yohane 11:1-53
21	Yohane 11:54-12:19
22	Yohane 12:20-50
23	Yohane 13:1-30
24	Yohane 13:31-14:14
25	Yohane 14:15-31
26	Yohane 15:1-27
27	Yohane 16:1-33
28	Yohane 17:1-26
29	Yohane 18:1-24
30	Yohane 18:25-19:22
31	Yohane 19:23-42

date	Scripture
1	Yohane 20:1-31
2	Yohane 21:1-25
3	Aposoro 1:1-26
4	Aposoro 2:1-47
5	Aposoro 3:1-26
6	Aposoro 4:1-37
7	Aposoro 5:1-42
8	Aposoro 6:1-15
9	Aposoro 7:1-29
10	Aposoro 7:30-50
11	Aposoro 7:51-8:13
12	Aposoro 8:14-40
13	Aposoro 9:1-25
14	Aposoro 9:26-43
15	Aposoro 10:1-33
16	Aposoro 10:34-48
17	Aposoro 11:1-30
18	Aposoro 12:1-23
19	Aposoro 12:24-13:12
20	Aposoro 13:13-41
21	Aposoro 13:42-14:7
22	Aposoro 14:8-28
23	Aposoro 15:1-35
24	Aposoro 15:36-16:15
25	Aposoro 16:16-40
26	Aposoro 17:1-34
27	Aposoro 18:1-21
28	Aposoro 18:22-19:12
29	Aposoro 19:13-41
30	Aposoro 20:1-38



date	Scripture
1	Aposoro 21:1-16
2	Aposoro 21:17-36
3	Aposoro 21:37-22:16
4	Aposoro 22:17-23:10
5	Aposoro 23:11-35
6	Aposoro 24:1-27
7	Aposoro 25:1-27
8	Aposoro 26:1-32
9	Aposoro 27:1-20
10	Aposoro 27:21-44
11	Aposoro 28:1-31
12	Roma 1:1-17
13	Roma 1:18-32
14	Roma 2:1-24
15	Roma 2:25-3:8
16	Roma 3:9-31
17	Roma 4:1-12
18	Roma 4:13-5:5
19	Roma 5:6-21
20	Roma 6:1-23
21	Roma 7:1-14
22	Roma 7:15-8:6
23	Roma 8:7-21
24	Roma 8:22-39
25	Roma 9:1-21
26	Roma 9:22-10:13
27	Roma 10:14-11:12
28	Roma 11:13-36
29	Roma 12:1-21
30	Roma 13:1-14
31	Roma 14:1-23

date	Scripture
1	Roma 15:1-21
2	Roma 15:22-16:7
3	Roma 16:8-27
4	1 Korinti 1:1-17
5	1 Korinti 1:18-2:5
6	1 Korinti 2:6-3:4
7	1 Korinti 3:5-23
8	1 Korinti 4:1-21
9	1 Korinti 5:1-13
10	1 Korinti 6:1-20
11	1 Korinti 7:1-24
12	1 Korinti 7:25-40
13	1 Korinti 8:1-13
14	1 Korinti 9:1-18
15	1 Korinti 9:19-10:13
16	1 Korinti 10:14-11:1
17	1 Korinti 11:2-16
18	1 Korinti 11:17-34
19	1 Korinti 12:1-26
20	1 Korinti 12:27-13:13
21	1 Korinti 14:1-17
22	1 Korinti 14:18-40
23	1 Korinti 15:1-28
24	1 Korinti 15:29-58
25	1 Korinti 16:1-24
26	2 Korinti 1:1-11
27	2 Korinti 1:12-2:11
28	2 Korinti 2:12-17
29	2 Korinti 3:1-18
30	2 Korinti 4:1-12
31	2 Korinti 4:13-5:10

date	Scripture
1	2 Korinti 5:11-21
2	2 Korinti 6:1-13
3	2 Korinti 6:14-7:7
4	2 Korinti 7:8-16
5	2 Korinti 8:1-15
6	2 Korinti 8:16-24
7	2 Korinti 9:1-15
8	2 Korinti 10:1-18
9	2 Korinti 11:1-15
10	2 Korinti 11:16-33
11	2 Korinti 12:1-10
12	2 Korinti 12:11-21
13	2 Korinti 13:1-14
14	Garata 1:1-24
15	Garata 2:1-16
16	Garata 2:17-3:9
17	Garata 3:10-22
18	Garata 3:23-4:20
19	Garata 4:21-5:12
20	Garata 5:13-26
21	Garata 6:1-18
22	Efeso 1:1-23
23	Efeso 2:1-22
24	Efeso 3:1-21
25	Efeso 4:1-16
26	Efeso 4:17-5:2
27	Efeso 5:3-33
28	Efeso 6:1-24
29	Firipi 1:1-26
30	Firipi 1:27-2:18

date	Scripture
1	Firipi 2:19-3:6
2	Firipi 3:7-4:1
3	Firipi 4:2-23
4	Korosai 1:1-20
5	Korosai 1:21-2:7
6	Korosai 2:8-23
7	Korosai 3:1-17
8	Korosai 3:18-4:18
9	1 Tesaronike 1:1-2:9
10	1 Tesaronike 2:10-3:13
11	1 Tesaronike 4:1-5:3
12	1 Tesaronike 5:4-28
13	2 Tesaronike 1:1-12
14	2 Tesaronike 2:1-17
15	2 Tesaronike 3:1-18
16	1 Timoteo 1:1-20
17	1 Timoteo 2:1-15
18	1 Timoteo 3:1-16
19	1 Timoteo 4:1-16
20	1 Timoteo 5:1-25
21	1 Timoteo 6:1-21
22	2 Timoteo 1:1-18
23	2 Timoteo 2:1-21
24	2 Timoteo 2:22-3:17
25	2 Timoteo 4:1-22
26	Tito 1:1-16
27	Tito 2:1-14
28	Tito 2:15-3:15
29	Firemong 1:1-25
30	Hebiraio 1:1-14
31	Hebiraio 2:1-18

date	Scripture
1	Hebiraio 3:1-19
2	Hebiraio 4:1-13
3	Hebiraio 4:14-5:14
4	Hebiraio 6:1-20
5	Hebiraio 7:1-19
6	Hebiraio 7:20-28
7	Hebiraio 8:1-13
8	Hebiraio 9:1-10
9	Hebiraio 9:11-28
10	Hebiraio 10:1-18
11	Hebiraio 10:19-39
12	Hebiraio 11:1-16
13	Hebiraio 11:17-31
14	Hebiraio 11:32-12:13
15	Hebiraio 12:14-29
16	Hebiraio 13:1-25
17	Yakobo 1:1-18
18	Yakobo 1:19-2:17
19	Yakobo 2:18-3:18
20	Yakobo 4:1-17
21	Yakobo 5:1-20
22	1 Petoro 1:1-12
23	1 Petoro 1:13-2:10
24	1 Petoro 2:11-3:7
25	1 Petoro 3:8-4:6
26	1 Petoro 4:7-5:14
27	2 Petoro 1:1-21
28	2 Petoro 2:1-22
29	2 Petoro 3:1-18
30	1 Yohane 1:1-10

date	Scripture
1	1 Yohane 2:1-17
2	1 Yohane 2:18-3:2
3	1 Yohane 3:3-24
4	1 Yohane 4:1-21
5	1 Yohane 5:1-21
6	2 Yohane 1:1-13
7	3 Yohane 1:1-14
8	Yuda 1:1-25
9	Yohaneac Kpefing 1:1-20
10	Yohaneac Kpefing 2:1-17
11	Yohaneac Kpefing 2:18-3:6
12	Yohaneac Kpefing 3:7-22
13	Yohaneac Kpefing 4:1-11
14	Yohaneac Kpefing 5:1-14
15	Yohaneac Kpefing 6:1-17
16	Yohaneac Kpefing 7:1-17
17	Yohaneac Kpefing 8:1-13
18	Yohaneac Kpefing 9:1-21
19	Yohaneac Kpefing 10:1-11
20	Yohaneac Kpefing 11:1-19
21	Yohaneac Kpefing 12:1-18
22	Yohaneac Kpefing 13:1-18
23	Yohaneac Kpefing 14:1-20
24	Yohaneac Kpefing 15:1-8
25	Yohaneac Kpefing 16:1-21
26	Yohaneac Kpefing 17:1-18
27	Yohaneac Kpefing 18:1-24
28	Yohaneac Kpefing 19:1-21
29	Yohaneac Kpefing 20:1-15
30	Yohaneac Kpefing 21:1-27
31	Yohaneac Kpefing 22:1-21